

Teoso sãkire amaneri

Apurinã New Testament

This Bible is copyrighted by Wycliffe Bible Translators (Wycliffe.org) and is printed with permission by the Digital Bible Society (dbs.org) for non-commercial use.

This Bible is available for free download in a variety of digital formats at dbs.org/bibles.

Mateo	4
Marko	43
Arókasi	66
Xoão.....	107
Átosi.....	134
Homano	169
1 Korĩto.....	186
2 Korĩto.....	200
Karásia.....	210
Épeso.....	217
Piriposi	223
Koroso	227
1 Tesarónika	231
2 Tesarónika	234
1 Tximótxio	236
2 Tximótxio	241
Txito	245
Piremõ	248
Epireo	249
Txiako	261
1 Petro.....	265
2 Petro.....	270
1 Xoão.....	273
2 Xoão.....	277
3 Xoão.....	278
Xota.....	279
Apokorípisi.....	281

Mateo

Xesosi Nirimaneakori Iua Apisapanika Auakani

(Arókasi 3.23-38)

1 Xesosi Teoso mereëkiti itxaua. Uai aua Xesosi apika atokiriakorini uãka. Xosee inakori Xesosi iri atoko ïkorapokoriti. Apraãoni, Taviini pakini Xesosi apika atokiriakorini atoko. Ininiã Xesosi Taviini, Apraãoni pakini imi atoko itxa.

² Ininiã ia atoko itxa:

Kitxakapirïka Apraão, Isaki iri.

Isaki, Xakoo iri.

Xakoo, Xotaa itariakorikata iri.

³ Xotaa, Péresi, Sera pakini iri. Inorona Tamara.

Péresi, Ésirõ iri.

Ésirõ, Arão iri.

⁴ Arão, Aminatapi iri.

Aminatapi, Nasoõ iri.

Nasoõ, Sáomõ iri.

⁵ Sáomõ, Póasi iri. Póasi inoro Haapi.

Póasi, Opetxi iri. Opetxi inoro Hotxi.

Opetxi, Xesee iri.

⁶ Xesee, Tavii iri. Tavii Isaeokini auïte itxaua.

Tavii, Saromão iri. Saromão inoro mitxi Oriã ïtanoro.

Eereka Tavii takaro oa.

⁷ Saromão, Hopoão iri.

Hopoão, Apia iri.

Apia, Asa iri.

⁸ Asa, Xosapaa iri.

Xosapaa, Xorão iri.

Xorão, Osia iri.

⁹ Osia, Xotão iri.

Xotão, Akasi iri.

Akasi, Esekia iri.

¹⁰ Esekia, Manasee iri.

Manasee, Amõ iri.

Amõ, Xosia iri.

¹¹ Xosia, Xekonia itariakorikata iri. Iuasaaki ïkorakanani kãkiti Isaeokini maïkaãka. Papirónia tixini-
moni anikaãkana.

¹² Papirónia anikikona atoko,

Xekonia, Saratxieo iri.

Saratxieo, Soropapeo iri.

¹³ Soropapeo, Apiotxi iri.

Apiotxi, Eriakï iri.

Eriakï, Asoo iri.

¹⁴ Asoo, Satoki iri.

Satoki, Akï iri.

Akï, Eriotxi iri.

¹⁵ Eriotxi, Ereasa iri.

Ereasa, Mataã iri.

Mataã, Xakoo iri.

¹⁶ Xakoo, Xosee iri. Iua Xosee, Maria ïtaniri. Xesosi, iuara Teoso Mereëkiti itxaua. Inoro Maria.

¹⁷ Apraão, iua ãkiri, imekaniri, apika mekaniri, apika mekaniri ãkiri, apika mekaniri apika mekaniri, apiko itxaãpota. Tavii auakasaaki, katosipeka pakini ninoa uãka. Eereka aua Tavii, Tavii ãkiri, imekaniri, apika mekaniri, apiko itxaãpota. Katosipeka pakini ninoa uãka. Iuasaaki Xoteoakori anikaãka Papirónia tixini-
moni. Ninoa mekaniriakori katosipeka inakasaaki, Xesosi iponaniãpeka.

Xesosi Iponaniini Pirena

(Arókasi 2.1-7)

¹⁸ Ia atoko itxapaniko Xesosi. Teoso mereëkiti iponaniãkasaaki, Maria ominapatari Xosee. Oïtaniriuatini apisapanika, omotokiãri amarini Erekari Matamatakoti sikakiti. ¹⁹ Xosee uãkatari Maria kamari maerekati ãtikata. Atão inakarínoka kamakari iua, ininiã kona inirekari kãkiti imaropiretiniri oa kamixi onini. Kãkiti sauaki osiniã, Xosee !inirekaro opëtauatini, kotxi erekari kamakari iua. Ininiã inirekari itakanapiniro oa, ixika kãkiti mimarotakaniã. ²⁰ Ikara atoko inini ixinire-
moni, Teoso nitiri iaxitikiri apoka itaponemoni. Ininiã itxa:

—Xosee, Taviini apika mekaniri pite. Kona pipïkapero Maria papakapini pïtanoro ïkapani, kotxi Erekari Matamatakoti, iuara kamixipeka txïkitakaro. ²¹ Auako oa ãkiri. Pitakauãkatari Xesosi itxauako, kotxi imaktxakari kãkiti maerekani —itxa Teoso nitiri.

“Xesosi” popïkari sãkireë, iuatxikana, “Kãkiti Maerekani Makatxakakari,” itxa.

²² Apikomoni Teoso nitiri txari:

—Ikara atoko inakari auapeka, kotxi kitxakapirïka Teoso sãkire sãpiretakari sãpiretapekari ikara sãkiretxi.

²³ Kitxakapirïka ia atoko itxa:

Hïkenakotari. Sito kikikata masirïkato mixiuatako.

Auako oimi. Itakauãkataãka Emanoeo inakori

—itxa Teoso nitiri Xoseemoni. “Emanoeo” popïkari sãkireë “Teoso atekata aua.”

²⁴ Xosee merekasaaki, iua auikari Teoso nitiri sãkire.

Ininiã ïtanorouata Mariakata. ²⁵ Eereka amarini iponaniãkasaaki, Xosee takauãkatari Xesosi itxaua. Amari-
ni iponaniini apisa iua !isirïka Mariakata.

Atokatxi Pokĩkinimoni Auakani

2 Xesosi iponaniã Pereẽ inakori sitatxiti, Xotéia tõpa, Erotxi auĩtetxi inakasaakia. Iuasaaki atokatxi pokĩkinimoni auakani sari Xerosareẽ sitatxitimoni Pereẽ takote. Iõriki imarotakani ninoa.

² Ininiã itxana kãkitimoni:

—Naniparari amarini Xoteo auĩte inakariau? Ate itikapekaro iõrikite atokatxi pokĩkinimoni. Oa iõriki oerekaua auĩtetxi Apiananiri iponaniãpeka. Ininiã ate apoka uai akapotoreẽkiniua iua apisatoõ, kotxi Apiananiri itxaua —itxana ninoa.

³ Erotxi ikara ikenakoenetakasaaki, kona erekaxinireri. Kona inirekari ãti auĩtetxi apokini. Ininiã ikini mane Xerosareẽ auakani kona erekaxinirena, kotxi ninoa pĩkari Erotxi. ⁴ Ininiã iua apotiitana sasetotxi auĩteakori, kaiõkatsoparerini pakini. Ininiã Erotxi pimaãna:

—Nanipa Teoso Mereẽkiti iponaniãko? —itxa.

⁵ Ninoa apakapapiretari:

—Pereẽ sitatxiti, Xotéia tõpa aua. Ia atoko itxapaniko Teoso sãkire sãpiretakari iõkatsopatakiti kitxakapirĩka:

⁶ Pereẽ sitatxiti auakani, Xotéia tõpa, hĩte sitatxine poiãori, iuaritika kona hĩpẽtauatape, kotxi hĩte sitatxineẽ iponaniãko Isaeokini auĩte. Kãkiti mĩkiikakari itxauako

—itxa ninoa auĩtetxiakori Erotximoni.

⁷ Ininiã Erotxi akiritana ninoa iõriki imarotakani, ni-noanani imisãkiretini ĩkapani. Ininiã ipimaãna:

—Mitxipitipanika kirisaakipa hĩtikataro oa iõriki? —itxa ninoamoni.

Ininiã ninoa sãpiretari. ⁸ Iposo atoko iokanatana Pereẽmoni:

—Hĩsako Pereẽmoni amarini hinitini ĩkapani.

Hãpokasaakiri, hĩsãpiretano. Ininiã nota apaka sako, iua apisatoõ nikapotoreẽkiniua ĩkapani —itxa Erotxi.

Txamari inirekari okiniri Xesosi, kotxi ĩnirekari ãti auĩtetxi auini.

⁹ Erotxi sãkire ikenakotakana atoko, ipotorikana. Iõriki atokatxi pokĩkinimoni itikakitona ĩkiika. Anikana Xesosi auinimoni. Iuaãtaã oa iõriki iotoka. ¹⁰ Ninoa atamatakasaakiro iõriki, iteene ipoxokoniuatana. ¹¹ Ininiã apokana aapoko. ĩroãna. Apokarina amarini inoro Mariakata. Ininiã ikapotoreẽkauana Xesosi apisatoõ. ĩtxarina:

—Apiananiri pitxaua. Aãũite pitxaua —itxana.

Iposo atoko itiina imaktxakana. Ininiã imaktxakarina erekari imĩkitina auĩtetximoni isikakitina ĩkapani. Isikarina oro, ĩsẽso inakori, miha inakori pakini. ĩsẽso, miha pakini kamariãro peerekari. ¹² Ininiã eereka Teoso sãpiretana iõriki imarotakanimoni itaponeẽna:

—Kona hĩkanapiriãpe Erotximoni —itxa Teoso ninoa taponemoni.

Ininiã ninoa kanapiriãkasaaki auinimoni, ãti kimaporitimoni isana.

Exitomoni Xosee, Maria Pakini Sini

¹³ Iõriki imarotakani sipeka atoko, Teoso nitiri iaxitiki sãpiretari Xosee itaponemoni:

—Païamata. Põkitikaua. Panikari amarini, inoro apaka Exito tixinimoni. Himiteka. Kona hĩkanapiriãpe nota masãpiretakanisaakii, kotxi Erotxi nitari amarini okiniri ĩkapani —itxa Teoso Xoseemoni.

¹⁴ Ininiã Xosee:

—Nisapitikako —itxa.

Ininiã iua ĩkanõkatika Xosee õkitikaua. Aïamata Exito tõpamoni isini, amarini anikini ĩkapani. Ininiã imimitekari amarini inorokata Exitomoni. ¹⁵ Erotxi ipinakasaaki, iuasaaki ikanapiriãko. Kona ikanapiriã Erotxi ipinini apisa. Ia atoko itxapaniko kitxakapirĩka Teoso sãkire sãpiretakari sãpiretakiti:

Nakiritariko namarite Exito tixini itakanapini.

Amarini Okiko Pirena

¹⁶ Erotxi imarotakasaakiri iõriki imarotakani sipe inakasaaki, ĩmisãkiretaikarina iua, ininiã iua omanãkarauata. Ininiã amarini ipikananipeka inakaniua, apaka axapitipanika inakaniua, imakinikana okãkitaka Pereẽ sitatxitiã auakani. Ikara atoko itxa, kotxi iõriki imarotakani sãpiretari ipikananipeka oa iõriki tokiã. ¹⁷ Kitxakapirĩka Teoso sãkire sãpiretakari Xeremia inakori sãpiretakiti iaõka auape iuasaaki. ¹⁸ Iua txari:

Hamaa sitatxiti ikenakotaãkako ãtsaãtxi. Hakeo atoko sitoakoro txiapatako oimiakori matinani. !Onirekari kãkiti mĩkapiritiniro oa, kotxi oimiakori kona auaika.

Exito Tixini Ikanapiriinina

¹⁹ Erotxi ipinaka atoko, Xosee Exito tixini auakasaaki, Teoso nitiri misãkiretari iua itaponemoni. ²⁰ ĩtxari:

—Põkitikaua, pimikanapiriãri amarini, inorokata Isaeo tixinimoni. Amarini kinirão okaka inakani kona auaika —itxari.

²¹ Ininiã Xosee mikanapiriãri amarini, inorokata Xotéia tõpamoni, Isaeo tixinimoni. ²² Txamari imarotakasaakiri Akirao, Erotxi ãkiri auĩtetxi ininiua irini tiki-ni, Xosee pĩkari Xotéia tõpa auini. Ininiã Teoso nitiri iuaĩkana itaponemoni sãpiretari ãtiãtaã isini ĩkapani. Ininiã Xosee, Maria, Xesosi pakini sari Kariréia tõpamoni Isaeo tixini. ²³ Nasaree sitatxiti kaikota itxana. Ia atoko itxa kitxakapirĩka Teoso sãkire sãpiretakani sãpiretakiti iaõka inini. Ninoa txari:

Nimereẽkiti, Nasareekiri itxauako.

Xoão Kapatxisareri Sãpiretakiti

(Marko 1.1-8; Arókasi 3.1-20; Xoão 1.19-28)

3 Eereka Xesosi aneẽpe. Iuasaaki Xoão kapatxisareri, ãparaã makipakaniãtaã Xotéia tõpa aua.

Iuaã iua oerekari Teoso sãkire kãkitimoni. ² Iua txa:

—Himaerekani hĩtakanapako, kotxi Teoso mereẽkiti paĩtiki apokako iua ikinipoko auĩte ininiua ĩkapani —itxari Xoão.

³ Kitxakapirīka Isaía inakori, Teoso sākire sāpiretakari, sāpiretapekari Xoão pirenā. Itxari:

Auako kiki āparaā makipakaniātaā. Isāpirenauatako. Itxariko: “Hōeretariko kimapori Apiananiri apokini apisapanika. Itīkaāpo erekari hīkamako iua napini īkapani,” itxa Isaía kitxakapirīka.

⁴ Xoão takari mākatxi kamero piti kamakori. Kamero kākiti pira. Ipakiotsere aamata kamakori. Inikari txītxiri. Itximari mapaā itopakero. ⁵ Kākiti Xerosareēkini, ikinimane Xotéia tōpakini, ikinimane Xotāo tinikata auakani pakini sari ikenakotinirina īkapani. ⁶ Iuaā ninoā sāpiretari Teosomoni maerekati ikamakitina, imaerekani imaktxakini īkapani. Eereka iua patxisatana Xotāo uiniti.

⁷ Txama Xoão atapakasaakina pariseoakori, satoseoakori pakini apokini iuamoni ipatxisatikona īkapani, iua txana:

—Imini katsiiri anaakorirai hīte. Teoso misiritapitikai himaerekani xika. Himitekini !auari. Hinirekari hīpatxisatikona, txamari !hinirekari hītakanapiniri himaerekani. ⁸ Hinirekiniāri himaerekani hītakanapini, ininiā hīkamariko erekari. Ikara atoko ininiā, hōerekari Teoso atāo hītakanapiniri himaerekani. ⁹ Hāxixiniremoni !hīxinikapiri: “Teoso apakapapitikauako ate, kotxi ate atokirini Apraāoni txaua,” !hītxapeko. Ari, nota sāpiretai hīte, Teoso nirekiniāri, iposotari ia kai soroā Apraāoni mekaniriakori ikamini. Kona Apraāoni posotari anikinii Teosomoni. ¹⁰ Aamina maereka iriti atoko hītxa. Teoso iposopeka hīte ixipokini. Kākiti auari ikitaita kuanari aamina maereka iriti itokini īkapani. Ikinika aamina maereka iriti tokaākako. Xaminaā oka inaākanako. Teoso kamakiti iua atokokana itxa. Ininiā Teoso kitaite kuanapeka, aamina kotsa sauakiko tīkane. Iua atokokana ininiā, Teoso aiamatapeka hīte ixipokini īkapani.

¹¹ —Hīte nipatxisata āparaā. Hīpatxisatikona oerekari maerekati hīkamakiti hītakanapapeka. Nota tikini apoākari patxisataiko hīte Erekari Matamatakotiā, xaminaā pakini. Apiatakari itxaua iua. !Apakata iua takote napokini ikiti mata nimaktxakini īkapani, kotxi iua apiata. Nota poiāoka. Imaktxakari himaerekani, itxiko metao āki auakari arikini atoko. ¹² Katarareri āpokari ahoisi otāta imaktxakini īkapani. Otāta arikaāka. Oki nīkataāka ikiena nīkatikoātaā. Iua atokokana Teoso nīkatariko kākiti erekarini. Maerekati kamakani arikaākako xamina maxipoākatiā —itxa Xoão.

Xesosi Patxisatiko Pirena

(Marko 1.9-11; Arókasi 3.21-22)

¹³ Iuasaaki Xesosi potorika Kariréia tōpa. Isari Xotāo uunitimoni, Xoão patxisatiniri īkapani. ¹⁴ Txamari Xoão txari Xesosi:

—Pite nirekatari nota patxisatinii? !Apakata, kotxi pitemoni maerekati !auari. Notara nirekari pite patxisatinino nota —itxa Xoão.

¹⁵ Xesosi apakapapiretari:

—Apakatapitika pipatxisatinino. Uatxa akamariko ikinika Teoso nirekaākiti —itxa.

Ininiā Xoão:

—Ateeneka.

¹⁶ Eereka ipatxisataāka atoko ikanīkīta imiriī.

Iuasaakipeka iaxiti takaka. Ininiā kākiti atapari Erekari Matamatakoti katxakaāpotini kamoā atoko inakari. Xesosimoni oāpoka. ¹⁷ Eereka Teoso sākirauata iaxiti:

—Pite namarite, nitiretakiti, napokaerekatai, kotxi ninirekakiti pikama —itxa Teoso.

Satanasi Nirekari Xesosi Kaminiri Maerekati

(Marko 1.12-13; Arókasi 4.1-13)

4 Erekari Matamatakoti anikari Xesosi āparaā makipakaniātaā Satanasi atamakaerekatiniri īkapani. ² Iuaā Xesosi takanapari inipokotini Teoso imisākiretini īkapani. Koarēta pokamara, koarēta īkanōkati pakini itakanapari inipokotini. Ininiā inatxikatani iuani.

³ Ininiā iuasaakiika Satanasi apoka Xesosimoni. Iua katamakaerekareri itxaua. Itxari:

—Pite Teoso ākiri pininiāua, ininiā ere kai soro komiri pitxīkitaka —Satanasi txari Xesosi.

⁴ Xesosi apakapapiretari:

—Kona nikamari pite paniātakiti, kotxi Teoso sākire iōkatsopatakori txari:

Kona komirinanini txīkitakari kākiti ātipirika auini tīkane. Ikinika Teoso sākirera txīkitakari kākiti ātipirika auini tīkane

—itxa Xesosi Satanasi.

⁵ Eereka Satanasi anikari Xesosi Xerosareēmoni. Iua sitatxi akiritaāka Teoso nakiti. Satanasi anikari Xesosi Teoso misākiretiko aikotimoni apiata otano tsokitiri nopini. ⁶ Ininiā Satanasi txari Xesosi:

—Teoso ākiri pininiāua, pokaua xiti. Ininiā ikinipoko kākiti imarotariko Teoso ākiri pininiāua, kotxi Teoso sākire iōkatsopatakori txari:

Teoso iokanatanako initiriakori iaxitikini pite inīkatini na tīkane. Ninoā maīkai pimapinakani tīkane, ininiā pikarouatini !auari. Kona kai soro karotari pikiti, —itxa Satanasi.

⁷ Xesosi apakapapiretari:

—Teoso sākire iōkatsopatakori apaka txari:

Kona patamakaerekatapiri Apiananiri piTeosone.

⁸ Eereka Satanasi anikari Xesosi ātiātaā iuaīkana.

Itano xiratarimoni anikari. Iuaā Satanasi oerekari ikini itixiti, ikinika tiitxiti iuaā auakari pakini. ⁹ Ininiā itxa:

—Pikapotoreēkiniāua nota apisatoō piteosonetinino, ininiā ikinika nisikaiko —itxa Satanasi.

¹⁰ Xesosi apakapapiretari:

—Konapitini. Pisipeka Satanasi. Teoso sākire iōkatsopatakori txari:

Apiananiri piTeosone, iuanokara piteosoneta. Iua īkapinokara piparīkauatako —itxa Xesosi.

¹¹ Ininiā Satanasi takanapa txari iua. Ininiā Teoso nitiriakori iaxitikini apoka Xesosimoni inīkatinirina īkapani, kotxi itapara !lauaika.

Xesosi Mipotorikari Ipariŋka Kariréia Tõpa

(Marko 1.14-15; Arókasi 4.14-15)

¹² Xesosi kenakoenetakasaakiri Xoão kapatxisareri kateia äki takiko, isari Kariréia tõpamoni. Nasree sitatxitimoni isa. ¹³ Ininiä eereka itakanapari Nasree sitatxiti. Kapanaoõ sitatxitipeka aua itxa. Kapanaoõ, Kariréia poa takote, apaka Seporõ, Natarii pakini tõpati takote. ¹⁴ Kitxakapiriŋka Isaía, Teoso säkire säpiretakari säpiretapekari, iuaã Xesosi auako. Ia atoko Teoso säkire txapeka:

¹⁵ Seporõ, Natarii pakini tõpati ipoa mitari takote, Xotão uiniti ipiniä. Käkiti takauäkatari iua itixi, Kariréia tõpa. Xoteo minakanuia tixine itxaua. Iuaã Erekar apokako. ¹⁶ Ninoa käkiti, ipiä auakani, limarotari Teoso. Ipiŋkaniätaã ninoa auanäta. Ninoa atamatariko tirikapi. Ikamara mitari. Iua tirikapi iopinipokotako ipiä auakani sauaki.

Ikara atoko itxa Isaía kitxakapiriŋka.

¹⁷ Xesosi apokasaaki Kapanaoõ sitatxiti, imipotorikari oerekarauatini. Ia atoko itxa:

—Himaerekani hĭtakanapa, kotxi iposope Teoso hĭauite ininiua —Xesosi txana ikinipoko käkiti.

Xesosi Akiritari Ipi Ipi Pakini Kokatsaãriti

(Marko 1.16-20; Arókasi 5.1-11)

¹⁸ Xesosi Kariréia poa tiniä itĭpokotakasaaki, itikari ipi kiki, Simão Petro inakori, itari Ätree inakori pakini. Itakanätarina hetxi. Kokatsaãriti itxauana. ¹⁹ Ininiä Xesosi akiritana ninoa:

—Masa notakata. Hĭtakanapariko hõkatsaãtini parĭkatxiti. Noerekaiko hĭte Teoso säkire hõerekini ĭkapani, käkiti imarotini ĭkapani —itxa Xesosi.

²⁰ Ininiä iuasaakiika ninoa takanapari okatsaãtinina. Xesosikata sa itxana.

²¹ Apikomoni itĭpokotakasaaki, atamatana Txiako, Xoão pakini. Sepeteo anaakori itxauana. Ninoa irikata kanauaã auanäta. Ihetxina iotsaãñätana. Ininiä Xesosi akiritana ninoa. ²² Iuasaakipeka itakanaparina iri, kanaua pakini. Xesosikata sa itxana imoianatinirina ĭkapani.

Xesosi Amianatakani Imakananitini

(Arókasi 6.17-19)

²³ Xesosi sari ikini Kariréia tõpamoni. Aiko Xoteoakori apotiitiniätaãua isa. Iuaã isäpiretana Teoso iokanapirena erekari, Teoso käkiti auite inini pirena. Apaka erekapeka itxĭkitakana amianatakani. ²⁴ Xesosi kamakiti, apaka isäpiretakiti, iaripiretapeka ikinika Síria tixini. Ininiä käkiti minana itomaneri amianatakani iuamoni. Ikini sereti amianari auakini sari iuamoni. Käkiti maerekati matamatakoti Satanasi nitiri auaĭtotakiti apoka iuamoni. Apaka käkiti mapitxiritakani apoka. Apaka titinanakakari amianariti auakini apoka. Apaka käkiti maposota tĭpokotakani pakini apoka Xesosi-moni. Ikinikana erekape itxĭkitakana ninoa. ²⁵ Ito-maneri sari iua tikini. Käkiti Kariréiakini, tesi pakini si-

tatxitikini, Xerosareekini, käkiti Xotéia tõpakini, Xotão uiniti ipiniäkini pakini sari iua tikini.

Xesosi Säkirauata Ixirata Auite Nopini

(Kapĭtoro 5, 6, 7)

⁵ Xesosi itomaneri käkiti atapakasaaki, ixirata nopini isa, topäka itxa oerekarauatini ĭkapani. Imoianariakori apotiitaua iuamoni. ² Iuasaaki oerekana ia säkiretxiti:

Kirimonipa Teoso Sikatari Erekarĭ?

(Arókasi 6.20-23)

³ —Teoso takari erekari käkitimoni, ia atoko inakanimoni. Ninoa nirekari Teoso nireekiti ikaminina, iuaritika imarotarina ĭposotarina Teoso nireekiti ikaminina, ininiä amanaãrina Teoso sikaposotiiretinina ninoa. Teoso takari erekari käkiti ikara atoko inakanimoni. Ninoa sari Teoso auĭtetxi ininiätaãua.

⁴ —Teoso takari erekari käkitimoni, ia atoko inakanimoni. Mitxi ninoa txiapata imaerekanina xika. Ininiä eereka Teoso mĭkapiritana ninoa, amarini mĭkapiritiko atoko.

⁵ —Teoso takari erekari käkitimoni, ia atoko inakanimoni. Pataparaxinirena ninoa, iuaritika ĭitxitarina äti. ĩamonĭkarina äti. Teoso sikapanikariko ikinika itixi ikara atoko inakanimoni.

⁶ —Teoso takari erekari käkitimoni, ia atoko inakanimoni. Ninoa iteene nirekari erekarinoka ikaminina. Nipokori inirekinina atoko, äparaã inirekinina atoko, ninoa iteene nirekari erekari ikaminina. Ininiä Teoso sikana ninoa ikinipoko erekari inirekakitina.

⁷ —Teoso takari erekari käkitimoni, ia atoko inakanimoni. Ninoa amonĭkari ninoa misiritakani, ininiä iua atokotxikana Teoso amonĭkanako ninoa kaa-monĭkarerini.

⁸ —Teoso takari erekari käkitimoni, ia atoko inakanimoni. Ninoa kamari Teoso nireekitinoka, ininiä ninoa aõkitariko Teoso.

⁹ —Teoso takari erekari käkitimoni, ia atoko inakanimoni, kauaĭrerinimoni. Ninoa parĭkauata neenamatzixipokini ĭkapani. Ininiä ninoa akiritaãkako Teoso anaakori.

¹⁰ —Teoso takari erekari käkitimoni, ia atoko inakanimoni. Ninoa kamari erekari, ininiäkara apanakini käkiti misiritana. Ninoa erekari kamakani auako Teoso auĭtetxi ininiätaãua.

¹¹ —Teoso takari erekari hĭtemoni, apanakini misiritakasaakii, imisäkirepiretakasaakii, aãpirena ikamakasaaki hĭtemoni nota säkire hãuikini xika. ¹² Poxokonoka hĭtxako, kotxi Teoso sikai hĭparĭka ĭki ito, itixine hãpokasaaki. Hĭte misiritiko atokokana Teoso säkire säpiretakani kitxakapiriŋka misiritaãka, ininiä hĭpoxokoniuatako —itxa Xesosi.

Iõkira Pirena

(Marko 9.50; Arókasi 14.34-35)

¹³ Iuaĭkana Xesosi säkirauata:

—Iőkira erekaro atoko hĩtxaua ikinimane ĩkapani. Iőkira matxoatapeka onakasaaki, ininiã !apakata otxoa kanapiriini iuaĩkana. Ininiã oõkaãka. Kãkiti kitakaro, kotxi kona otxaika.

Tirikapi Pirena

¹⁴ —Tirikapi atoko hĩtxaua ikinimane kãkiti ĩkapani. !Hĩposotari hĩkipatiniri sitatxi xirata nopini auakari, kotxi ikinimane atamatari tirikapi. ¹⁵ Kãkiti !itakari tirikapi kopiti ãki. Itakarina itano ikini aapokotxiti iopinikini ĩkapani. ¹⁶ Iua atokokanera hĩtxako, kotxi erekari hĩkamakiti tirikapi kamara atoko itxa. Erekari-nokara hĩkamako. Ininiã apanakini atamatari erekari hĩkamakiti. Ininiãra itxarina aĩri iaxitikirimoni: “Peerekai pite.”

Teoso Sãkire Moisesi Apakapakiti

¹⁷ Iuaĩkana Xesosi sãkirauata:
—Kona hĩtxape: “Xesosi xipokariko Teoso sãkire Moisesini apakapakiti,” kona hĩtxape. Apaka, “Kitxakapirĩka Teoso sãkire sãpiretakani sãpiretakiti Xesosi xipokako,” kona hĩtxape. Kona ikara inakari !nixipoka. Nota ina ikinipoko ninoa sãpiretakiti nikamini ĩkapani. ¹⁸ Atãopitika ikinika Teoso sãkire apokako. Kona xatiki Teoso sãkire iőkatsopatakori kona xipoka. Iaxiti, itixi pakini xipokini apisa Teoso sãkire !ixipoka. Apokapitikako imakinika isãkire. ¹⁹ Teoso sãkire ipaniãtakiti apiari aua, apaka poiãori aua. Kãkiti makamakaniãri ikini-ka Teoso sãkire, oerekiniãri apanakini ikinika Teoso sãkire imakamakani ĩkapani, poiãori itxaua Teoso auĩtetxi ininiãtaãua. ãti kãkitipekana, ikaminiãri ikinika Teoso sãkire, oerekiniãri apanakini ikinika Teoso sãkire ikamini ĩkapani, apiari itxaua Teoso auĩtetxi ininiãtaãua. ²⁰ Ia nisãpiretai. Kaiőkatsopareriakori, pariseoakori pakini !ikamari atão inakari Teoso nireëkiti. Ininiã hĩte kaminiãri ninoa atokotxikana, !hãuritaãka hĩroiini Teoso auĩtetxi ininiãtaãua. Atão inakari Teoso nireëkiti hĩkaminiã, hĩroãpitika iuaã.

Omanãkaretxi Pirena

²¹ —Hĩte imarotari kãkiti kitxakapirĩka sãpiretaãka. Ia atoko inaãka: “Kona apanakini hõkape. Kokaniri anikaãkako imisiritikomoni,” inaãka kitxakapirĩka. ²² Uatxa apikomoni nota sãpiretaiko hĩte. Maxikatĩka pomanatiniãri pitari, panikaãkako pimisiritikomoni. Pite napetiniãri pitari, ininiã auĩtetxiakori misiritapitikai. Pakiritiniãri pitari: “Kĩĩkitei,” ininiã pimisiritiko paĩtiki apokako. Nota txai hĩte, kona erekari kokaniri. Iua atokokana kona erekari hinaperauatini. Hinaperauatiniã, ininiã maerekani misiritikoãtaã hĩsapitikako. ²³ —Ininiã hĩsikasaaiki Teoso apisatoõ hĩsikakiti hĩsikini ĩkapani, iusaaki hĩxinikari hĩtari homanatakiti. ²⁴ Iusaakiika hĩtakanapariko hĩsikakiti iuaã hĩsikini apisa. Hĩsako katimaritika homanatakitimoni. Himisãkiretari, homanãkare hĩxipokini ĩkapani. Iposo atoko kanapiriã, hĩsikakiti tĩkane sika hĩtxako Teosomoni —itxa Xesosi.

²⁵ Iuaĩkana Xesosi sãkirauata:

—Kãkiti kinirão apoĩtakiniãi, ininiã pimisiritiko mereëkarimoni iua anikinii apisapanika, katimariã pisa iuamoni. Pimisãkiretari iua, kotxi pimisiritiko mereëkari sikaiko pite pimisiritakirimoni. Ininiã eereka iua takai kateia ãki. Iuaã pikaikotako. Ininiã apisapanika pimisãkiretariko iua pomanatakiri. ²⁶ Atão nisãpiretai, kona posipikari kateia ikinika pimisiritiko mereëkari paniãtakiti pimiĩkitxitakanisaaki —itxa Xesosi.

Kipa Txĩkitakai Maerekati Pikamini?

²⁷ Xesosi apikomoni sãkirauata:

—Hĩte imarotapekari kitxakapirĩka sãpiretakori: “Pĩtanoro minakotokatika kona pisirĩkape.” ²⁸ Kitxakapirĩka ikara atoko itxama. Nota sãpiretaiko hĩte apikomoni. Sito atamatakari kinirão oakata sirĩkaka inakari, iuara kamapekari maerekati ãkixinireë. ²⁹ Kona paupiritapiri maerekati pikamini txĩkitaãkari pitekata ikaikotini. Patamatakiti txĩkitakiniãi maerekati pikamini, pimakatxakari poki, oka pitxari, kotxi maerekati pikaminiã, maerekani misiritikoãtaã pokaãkako. Apiarekata Teosokata ãtipirika pauini ãti pokinoka pauini. ³⁰ Piuako pikikomoni auakari txĩkitakiniãi maerekati pikamini, ininiã pisauaka, oka pitxa, kotxi maerekati pikaminiã, maerekani misiritikoãtaã pokaãkako. Apiarekata mauakotikai pauini ãtipirika Teosokata. Kona paupiritapiri maerekati kaikotini pitekata. Pitakana-pariko maerekati.

Kiki ĩtanorokata Itakanapakakini

(Mateo 19.3-9; Marko 10.2-12; Arókasi 16.18)

³¹ —Kitxakapirĩka ia atoko itxa sãkiretxi:

Pĩtanoro pitakanapiniã, aãtsopa pisika oamoni ĩtanorotxi takanapiko aãtsopati. ³² Iuaritika nota sãpiretaiko hĩte, !hĩtakanapaperoko pĩtanoro. Pitakanapiniãro, ininiã maerekati pikamapitika, kotxi eereka oa atxĩti nirekakari ãti kiki. Ininiã iusaaki oa kamari maerekati apaka pite xika. Apaka oa takakari kamari maerekati. Apakata pitakanapiniro pĩtanoro, ãtikata osirĩkiniã —itxa Xesosi sãkire.

Atãopitika Inakari Sãkiretxi

³³ Iuaĩkana Xesosi sãkirauata:

—Hĩte imarotapekari kitxakapirĩka sãkiretxiti. Ia atoko itxapaniko: “Hĩkamariko imakinika hĩkamaenetakiti. Hĩkamariko hĩkamaenetakiti Teoso ĩkapani,” itxa. ³⁴ Notara sãpiretai hĩte apikomoni: “Nikamapitikariko,” pinakasaaki, !pakiriuãkatapiri Teoso tixine uãka, kotxi iuaã Teoso auĩtetxi ininiãtaãua. “Nikamapitikariko,” pinakasaaki, kona apikomoni pakiritape. ³⁵ “Nikamapitikariko,” pinakasaaki, !pakiriuãkatapiri itixi uãka, kotxi Teoso uai aua apaka. “Nikamapitikariko,” pinakasaaki, !pakiriuãkatapiri Xerosareë uãka, kotxi auĩtetxi Api-ananiri sitatxine itxa. ³⁶ “Nikamapitikariko,” pinakasaaki, !pakiriuãkatapiri pikii uãka, kotxi !apakata pitxĩkitakiniri piãko pomama inini, kasarori inini. ãtika piãko

kona piposotari pitxīkitakiniri kasarori inini, pomamari inini. ³⁷ “Ari,” pinakasaaki, pikamapitkariko. “Kona,” pinakasaaki, kotxi kona piposotari pikaminiri. Kona āti sākiretxi Ipikamape. Maxikatīka kamakori sākiretxiti Satanasi sākire itxaua —itxa Xesosi.

Xikatzitakaniaua Pirena

(Arókasi 6.29-30)

³⁸ Xesosi oerekarauatapanika:

—Ia atoko kitxakapirīka sākiretxiti: “Neenamatzisaaki āti makatzakiniāri poki, pixikatxitariko. Iuasaaki pimatzakariko iua oki apaka. Pitsiriī pataka āti kākiti xika, pixikatxitariko. Iuasaaki iua tsiriī apaka pimatzakako,” itxa sākiretxi kitxakapirīka. ³⁹ Txamari nota sāpiretaiko hīte apikomoni. Kona hīxikatxitaripi maerekati hītemoni auakasaaki. Āti aritiniāri pitoō, ininiā pikirioka ipinitoō iaritini īkapani. ⁴⁰ Atxiīti āti nirekari anikini pimisiritiko mereēkarimoni, kotxi iua nirekari pite sikiniri pimāka iuamoni iua txineirote pimasikakani xika. Ininiā anikini apisapanika, pisikariko pimāka inirekakiti, apaka apikomoni āti pimāka. Ikara atoko hīkamako. ⁴¹ Ia āti sākiretxiti: Āti paniātiniāi itii panikini āti ōti, ininiā ipi ōti panikari itii. Poerekariko pitiraōki. ⁴² Atxiīti āti amanaāi pitii, ininiā pisikariko iuamoni inirekakiti. Iua amanainiāi pitii “Akamoni iuaīkana Inisikai,” ininiā iuasaaki pisikariko iuamoni —itxa Xesosi.

Pomanatakini Pitiretini

(Arókasi 6.27-28, 32-36)

⁴³ Iuaīkana Xesosi sākirauata:

—Hīkenakotapekari ia sākiretxiti: “Hītiretariko hiniriane. Homanatariko himokaiakari.” Ikara atoko kitxakapirīka auari. ⁴⁴ Ikara atoko itxama. Nota sāpiretaiko hīte ipinimoni. Kona homanatapiri himokaiakari. Hītiretariko iua apaka. Hamanaāri Teoso hīte omanatakani erekari isikini īkapani. ⁴⁵ Apakatapitika amokaiakarimoni erekari akamini, kotxi Teoso kamari atokatxi kākiti erekarini auiniātaā iopinikini īkapani, apaka maerekani auiniātaā iopinikini īkapani. Iua iokanataro āparaā atāo inakari kamakanimoni, apaka atāo minakati kamakanimoni. ⁴⁶ Hīte tirketakaninani hītiretiniā, kinirepa Teoso sikari erekari hītemoni hinirmanenokara hītiretakasaaki? Kotxi kākiti maerekati kamakani apaka tirketari ninoa tirketani. ⁴⁷ Hīte misākiretakaninani himisākiretiniā, kākiti Teoso mimarotakani atoko hītxa, kotxi ninoa misākiretakani imisākiretana. ⁴⁸ Ikinipoko hīri iaxiti auakari kamakiti erekari, ininiā iua atokokana hītxīkitakariko ikinipoko hīte kamakiti erekari —itxa Xesosi.

Xesosi Oerekari Teoso Sikiko

⁶ Iuaīkana Xesosi sākirauata:

—Erepaniko. Erekari pikamakasaaki, kona pikamapiri piukiniua īkapani, erekari pikamakiti apanakini imarotini īkapani. Pikaminiāri erekari apanakini apokaerekatinii īkapani, kona papakapari pi-

parīka īki iaxiti, āri iaxiti auakari sikakiti. ² Aua kākiti ia atoko inakari. Ikamakiti atxiīti erekari, txamari ixinikakiti kona erekari. Kākiti ikara atoko inakari sikarau-atakasaaki minakati matiitimoni aiko Xoteo apotiitiniā-taāua, apaka mapara kākiti napiniātaā, inirekarina ikinimane itikiniri erekari ikamakitina. Inirekarina kākiti iuikinina. Ikara atoko !pitxape minakati matiitimoni pisikarauatakasaaki. Pixinikariko ia: Ninoa apakapapekari ikinika erekari kākiti sikakiti, txamari !apakaparinina erekari Teoso sikakiti. ³ Pisikarauatakasaaki minakati matiitimoni, kona paunitapiri piuako pisaneremoni auakari imarotini piuako pikikomoni auakari sikakiti. ⁴ Ikara atoko ininiā, pitenani imarotari pisiākiti. Piri iaxitikiri, ikinipoko atamatakari, īkitxitaiko kākiti apisatoō —itxa Xesosi.

Teoso Misākiretiko Pirena

(Arókasi 11.2-4)

⁵ Iuaīkana Xesosi sākirauata:

—Teoso himisākiretakasaaki, kona hīkamapiri kamisirienereri atoko hinini. Ninoa potxitari itiminina aiko Xoteo apotiitiniātaāua, kimaporiā apaka, Teoso imisākiretini īkapani. Ininiā ikinimane itikana. Hīxinikari. Ninoa apakapapekari poxokonitxi uai īkorapokoriti auakari. Txamari ninoamoni atāo poxokonitxi !auari. ⁶ Teoso pimisākiretakasaaki, pisa pitenani auiniātaā. Kona paunitapiri āti kaikotini pitekata Teoso pimisākiretakasaaki. Iuaā pimisākiretari piri matamatakoti. Iuaā iua atamataiko pite. Eereka isikaiko erekari iaxitikiri.

⁷ —Teoso pimisākiretakasaaki, pimixinikariko pisākire. Maxikatīka kona pisākirauatape iuakata. Teoso sākire mauiākati xinikari Teoso kenakotiniiri isākire kotxi kaiāori isākire. ⁸ Ikara atoko !pikamape pimisākiretakasaakiri iua, kotxi pisākirauatini apisapanika Teoso imarotapekari pinirekakiti. ⁹ Ia atoko hītxako Teoso himisākiretakasaaki:

“Āri iaxiti auakari, ate nirekari piuāka paxitiko.

¹⁰ Anirekari ikini itixiti auakani auētini pite. Pite tixine pinirekiti kamiko atokokana, anirekari pinirekiti kamiko īkorapokoriti,

¹¹ Nipokori ikiniōtika pisikauako.

¹² Pimaxinīkaretariko maerekati akamakiti.

Maerekati atemoni kamakori amaxinīkaretini atokokana pimaxinīkaretariko.

¹³ Kona panikapeua aātaerekatikomoni.

Pisikakauako ate, maerekati sauaki aūakasaaki.

Ikara atoko piposota, kotxi pitenanira auētetxi txaua.

Pitenanira kaposotiire. Ātipirika peerekai pite.

Ameē.”

Ikara atoko hītxako Teosomoni.

¹⁴ —Pimaxinīkaretiniāri maerekati āti kamakiti pite-moni, ininiā piri iaxiti auakari maxinīkaretari maerekati pite kamakiti apaka. ¹⁵ Pimaxinīkaretakaniāri maerekati āti kamakiti pitemoni, ininiā piri iaxitikiri kona maxinīkaretari maerekati pite kamakiti apaka —itxa Xesosi.

Nipokori Takanapiko Pirena

¹⁶ Iuaĩkana Xesosi sãkirauata:

—Aua kãkiti ia atoko inakari. Ikamakiti atxĩiti erekari, txamari ixinikakiti kona erekari. Kãkiti ikara atoko inakari takanapari inipokotini Teosokata isãkirauatini ĩkapani. Txamari ninoa nirekari ikinimane imarotini itakanapinirina inipokotini, kãkiti iuikinina ĩkapani. Ininiã ninoa matinaniuata itooãna ikara kãkiti imarotini ĩkapani. Atão nitxai, ninoa apakapapekari ikinika erekari kãkiti sikakiti, txamari !apakaparina erekari Teoso sikakiti. Kona ikara atoko !pitxape nipokori pitakanapakasaaki Teoso pimisãkiretini ĩkapani. ¹⁷ Hĩte ikara atoko !hĩkamape. Hinipokotini hĩtakanapakasaaki Teoso himisãkiretini ĩkapani, hãrokatoõtaua. Hõeretari hiãko. ¹⁸ Ininiãkara apanakini !imarotari hĩtakanapiniri hinikini. Ininiã hĩri matamatakoti, iuananira itikariko hĩkamakiti, apanakini mimarotakiniti, ininiã isikaiko hĩparĩka ĩki —itxa Xesosi.

Pitiretakiti

(Arókasi 12.33-34)

¹⁹ Iuaĩkana Xesosi sãkirauata:

—Maxikatĩka kona papotiipari pitiretakiti uai auakari, kotxi atxĩiti kamara nikari pitii. Atxĩiti oerẽkata. Atxĩiti kĩĩtiriri ĩtirĩkari iua. ²⁰ Ikara atoko kona pikamape. Papotiitariko pitiretakiti Teoso tixineẽ, kotxi iuaã !auari kamara. Iuaã tiitxi !oerẽkata. Kona ixipoka. Kĩĩtiriri ĩtirĩkari iua. ²¹ Pitiretakiti auiniãtaã, iuaã pixinikapika. Iuaã pinirekari pauini —itxa Xesosi.

Tirikapi ĩtotxiãkiri Pirena

(Arókasi 11.34-36)

²² —Poki tirikapi atoko itxa piĩto ĩkapani. Poki ereka inakasaaki, ipinikare aua pãkixinireẽ, ininiã pinirekiki imakinika erekari. Erekarinokara patamatiniã, erekari pixinire. ²³ Txamari poki oerekasaakii maerekati pikamini, ipiã apoka pãkixiniremoni. Iuasaaki tirikapi kamara na xatiki !auari pitemoni —itxa Xesosi.

Ipi Auĩtetxi Pirena

(Arókasi 16.13; 12.22-31)

²⁴ Iuaĩkana Xesosi sãkirauata:

—!Apakata kãkiti parĩkauatini ipi iauĩtena ĩkapani, kotxi atxĩiti ãti omanata, ãti itireta. Atxĩiti ãti apokaerekata, ãti inorita. Iua atokokana kãkiti kona posotari iparĩkauatini tiitxi ikinipoko iamotini ĩkapani, Teoso ĩkapani iparĩkauatakasaaki. !Apakata piauĩtetiniri Teoso, txineiro piauĩtetakasaaki.

Teoso Nĩkatiniua Ate

(Arókasi 12.22-31)

²⁵ —Ininiã nitxai: Pinirekari nipokori, iãriã pakini auãki pinini ĩkapani. Apaka pinirekari mãkatxi piĩto ĩkapani. Ikara pinirekini xika maerekaxiniretika kona pitxape. Erekarini nipokori. Apiaerekata pixinire. Erekarini mãkatxi. Apiaerekata piĩto. Ininiã ãtipirika !pixinikapiri

nipokori, mãkatxi pakini pinitini. ²⁶ Kona pipĩkarauatape nipokori poião auakasaaki. Pixinikariko kotipiriki. Kona ninoa takarauata. Kona apotiitari ikiena. Kona ipotetari ikiena. Iuaritika piri iaxitikiri sikakienatana ninoa. Ininiã ninoamoni nipokori lixipoka. Teoso apia xinikai hĩte. Ininiã kona pipĩkarauatape. ²⁷ Kinirepa maerekaxiniretinoka pitxa? Pimaerekaxinirene !itxĩkitakai apikomoni ãti oara pauini.

²⁸ —Kinirepa maerekaxiniretinoka pitxa pimãka pinirekini xika. Aãui pixinikako. Kona aãui parĩkauata. !Ikamari imãka, iuaritika aãui peereri. ²⁹ Kitxakapĩrĩka auĩtetxi Saromão inakori, iteene katiiri itxaua. Kaiãori imãka ereri, iuaritika apia ereri ikinika aãui. ³⁰ Aãui !okanani aua. Uatxa aua. Katana ikatikata iotikaãka. Iuaritika Teoso nĩkatari aãui. Ininiã apiata inĩkatai hĩte. Ikamamãkatapitikai. Poiãonoka hĩte auikari Teoso sãkire. Ikara xika maerekaxiniretinoka hĩtxa.

³¹ —Ininiã maerekaxiniretinoka kona hĩtxape. “Kipa ninika? Kipa niãta? Nãpa napokari mãkatxi?” kona hĩtxape. ³² Teoso sãkire mauĩkani maerekaxiniretinoka itxana ikara atoko. Piri iaxiti auakari imarotari pinirekaãkiti. Ininiã maerekaxiniretika !pitxape.

³³ Merepitipanika pinirekariko Teoso piauĩte ininiãua. Iua nirekiki pinitako, ininiã atão inakarinoka pikamako. Ikara atoko inakari pikaminiã, pite nirekakiti apaka isikaiko. ³⁴ Maerekaxiniretinoka kona pitxape katana pinirekakiti pixinikini xika. Pinirekakiti auapitikako katana, iuaritika mitxipanika kona pixinikapiri ikara maerekaxiniretika, kotxi ikiniõtika aua ikara atoko inakari —itxa Xesosi.

Apoĩretxi Pirena

(Arókasi 6.37-38, 41-42)

7 Iuaĩkana Xesosi sãkirauata:

—“Kona erekari pikamakiti,” kona pitxape ãti moni, ininiãkara Teoso kona txai pite: “Kona erekari pite kamakiti,” !itxai, ² kotxi Teoso misiritai pimaerekani xika, ãti pite misiritini atokokana. Itene pimisiritiniãri ãti imaerekani xika, iteene Teoso misiritai pite, pite maerekani xika. ³ Ikara ia atoko. Pisãpiretari ãti: “Aãsorõ aua poki ãki,” txamari kona pimaãkatari aãtxirata pite oki ãki auakari. Kinirepa ikara atoko inakari pikama? ⁴ !Apakata pisãkire pitarimoni: “Pauiritano aãsorõ poki ãki auakari nimaktxakini.” Ikara atoko pininiã !erekari, kotxi aãtxirata aua pite oki ãki. ⁵ Maerekati kamakari pite, kotxi pikamakiti erekari atxĩiti, txamari maerekatinoka pixinikakiti. Pimaktxakariko aãtxirata pite oki ãki auakari merepanika, ininiã eereka apakata patamatiniã aãsorõ pitari oki ãki auakari pimaktxakini. Ikara oerekaua piteka maerekani auakasaaki, pitakanapariko piteka maerekani, ininiã eereka apakata pimoianatiniri ãti iua maerekani itakanapini ĩkapani.

⁶ —Kãkiti kona sikari Teoso nakiti anãpamoni, kotxi atxĩiti iua anãpa kirioka, akatsata txai. Iua atokokana Teoso nakiti kona asika Teoso mapaxitakatimoni, kotxi iua anãpa atoko. Eereka iua misiritapitikai.

—Apaka kona pinoakitsa ereri kona pisika irarimoni, kotxi iua katxaratari. Iua atokokanera Teoso mapaxitanimoni kona h̄s̄ikari Teoso nakiti, kotxi eereka imisiritari Teoso nakiti noakitsatxi irari misiritini atoko —itxa Xesosi.

Kona H̄itakanapapiri Teoso Himis̄äkiretini
(Arókasi 11.9-13)

⁷ Iuaĩkana Xesosi s̄äkirauata:

—Teosomoni pamanarauatakasaaki, papakapariko pinirekakiti. Pinitarauatakasaaki, papokapitikariko pinireẽkiti. Aĩri iaxitikiri pakiritiniã, iua apakapapiretai. Ia atoko itxako: “Pikanikauata. Pĩroã,” itxako. ⁸ Ikinika amanarauatakari apakapariko inirekakiti. Nitarauatakari apokariko initakiti. Teoso akiritakari apakapaãkapitikako. ⁹ Amarini amanainiãri iri komiri, atauako kai sorokani isikatari imi? ¹⁰ Ximaki amanainiãri, atauako iminikani isikari? Konapitini. Irĩtxi kona kamari ikara atoko inakari. ¹¹ K̄äkiti maerekani apaka imarotari erekari isikini amaritenamoni. Aĩri iaxitikiri apiata imarotari isikiniri erekari iua anaakorimoni, ninoa amanaãkasaakiri.

Āti Pitiretini Pirena

¹² —Pixinikariko. Natokopa pinirekari apanakini tiretini pite? Ininiã iua atokokana pitiretariko apanakini. Ikara atoko itxa ikinika Teoso paniãtakiti aãtsopaã auakari, apaka Teoso s̄äkire s̄äpiretakani s̄äpiretakiti kitxakapirĩka —itxa Xesosi.

Ipi Kimapori Pirena
(Arókasi 13.24)

¹³ Iuaĩkana Xesosi s̄äkirauata:

—Teoso tixine h̄ĩroã axapitiri ĩronakikoãtaã. Mitari ĩronakikoãtaã sikari sari maerekani misiritikoãtaã. Iua kimapori mitari, kotxi itomaneri k̄äkiti sari iuaã. ¹⁴ Axapitiri ĩronakikoãtaã, kimapori axapitiri. Iua apo sari auapininiika inini tixinemoni. Iua kimaporiti axapitiki, kotxi poiãoka k̄äkiti sari iua kimaporiti —itxa Xesosi.

Omina, Ori Pakini Pirena
(Arókasi 6.43-44)

¹⁵ Iuaĩkana Xesosi s̄äkirauata:

—Erepaniko. Auapitika Teoso s̄äkire s̄äpiretakari, txamari iua na atão is̄äpireta, kotxi is̄äpiretari iua s̄äkire Teoso s̄äkirekata. Ikoketari. Atão inakari ikoketa maerekatikata. Erepaniko. Pamonoĩkoniri iua. Mapara patamatakasaakiri, soti auĩte atoko itxa. Ākixiniremoni ākiti atoko itxa. ¹⁶ Pimarotari k̄äkiti ikara atoko inakari, kotxi patamatari ninoa kamakiti maerekati. Inako mina kona iritari k̄ipaima. Aanaia kona iritari pama. Iua atokotxikana k̄äkiti maerekati kamakani kona kamari erekari. ¹⁷ Ikinika aamina erekari, erekari iri. Aamina maerekati, ininiã maerekati iri. ¹⁸ Aamina erekari kona posotari maerekati iritini. Iua atokokana aamina maerekati kona posotari erekari iritini. ¹⁹ Aamina

maereka iriti itoãka, arika inaãka. ²⁰ Ininiã aamina iriãra k̄äkiti imarotari ereka inini. Iua atokokanera k̄äkiti imarotaãka —itxa Xesosi.

K̄äkiti Teoso Tixine ĩroãkani
(Arókasi 13.25-27)

²¹ Iuaĩkana Xesosi s̄äkirauata:

—Apanakini txano nota: “Pite niauĩte” inakani, lisanina Teoso auĩtetxi ininiãtaãua. Niri iaxiti auakari nireẽkiti kamakarinanira sapaniko iuaã. ²² Itixi xipokini õtisaaki, itomaneri k̄äkiti maxikatiĩka akiritano: “Pite aãuĩte apiatakari. Papakapaua. Aõerekapekari pis̄äkire apanakinimoni. Aõmitikapekari maerekati mata-matakoti piuãkaã. Akamapekari posotiiretxi kaiãopokori,” itxanako ninoa. ²³ Txamari nitxanako: “Kona nimarotai h̄ĩte. H̄ĩsipiniikaua. Maerekatira h̄ĩka-ma.” Ikara atoko nis̄äpiretanako ninoa, kotxi maerekati kamakani itxauana —itxa Xesosi.

Aapokotxi Kamakari
(Arókasi 6.46-49)

²⁴ Iuaĩkana Xesosi s̄äkirauata:

—Nis̄äkire kenakotakari, nis̄äkire n̄ĩkaenetakari, ia kiki kimaroreri atoko itxa. Ia kiki kamakasaakiri aapoko, iopitimita aapokotxi tsota. Otsomori ikama. ²⁵ Ininiã āparaã kipakasaaki, uini apoãtakasaaki, ĩtima apisatakasaaki, aapoko kona irika, kotxi iua tsota itakapekari otsomori. Nis̄äkire kenakotakani nis̄äkire n̄ĩkaenetakani, iua kiki kimaroreri atoko itxana.

²⁶ —Nis̄äkire kenakotakari, nis̄äkire miĩn̄ĩkaenetakati, k̄äkiti miĩkiteti atoko itxa. Iua kamari aapoko ikipatxiteẽ. ²⁷ Ikipakasaaki, uini apoãtakasaaki, ĩtima apisatakasaakiri, aapoko irika. Irika, kotxi aapokotxi lotsomori. Poião tsomikari. Irikasaaki, ikinika xipoka. Ikara atoko itxa nis̄äkire miĩn̄ĩkaenetakati. Iua imarotapitikamari, txamari !ikamari. Ikara atoko nis̄äkire mapaxitakani —itxa Xesosi.

Xesosi Posotiire Pirena

²⁸ Xesosi oerekaruatini xipoka atoko, k̄äkiti xinikari: “Paimatireri Xesosi. Iua imarotari atão.” ²⁹ Ikara atoko ixinikana, kotxi Xesosi imarotapitikari Teoso s̄äkire oerekini. Kaposotiireri iua is̄äkirauatakasaaki. Kaiõkat-soparerini atoko kona itxa. Ninoa kona imarotari Teoso s̄äkire Xesosi imarotiniri atoko.

Kiki Maere Matati
(Marko 1.40-45; Arókasi 5.12-16)

8 Xesosi ixirata iokiriĩtaka atoko, itomaneri k̄äkiti sari iua tikini. ² Iuasaaki amianatakari maere matati apoka iuamoni. Ikapotoreẽkiau iua apisatoõ. Itxari:

—Nimarotari pinirekiniã, erekapeka pitx̄ikitakano nota —itxa.

³ Xesosi maãtakari iua. Ininiã itxa:

—Ari, ninirekapitikari. Erekapekai —itxari.

Iuasaakipeka erekapeka itxa. ⁴ Ininiã Xesosi:

—Kona ĩkora !pisāpiretape apanakinimoni. Uatxa sasetotximoni pisa. Poerekaua iuamoni erekapeka pinini. Moisesini paniātakiti atoko pikama. Pikaminiāri ipaniātakiti atoko, ininiā ikinimane imarotari erekapeka pinini —itxa Xesosi.

Eereka isari Xesosi paniātakiti ikamini ĩkapani.

Sotato Auĭte Nitiri Makananitiko

(Arókasi 7.1-10)

⁵ Kapanaoō sitatxiti apokasaaki, sotatoakori auĭte sari Xesosimoni. Homano itxaua. Iua iteene amanaāri Xesosi:

⁶ —Xesosi, ninitiri iteene amianata naapoko. Ikikinana. !Itĭpokotaika. Inikoriātsiitari —itxari Xesosi.

⁷ Ininiā Xesosi:

—Iuaā nisako erekape inini ĩkapani —itxa Xesosi.

⁸ Ininiā iua Homano:

—Konapitini. Pite auĭtetxi apiatakari pitxaua. Nota poiāorino. !Apakata naapoko piĭroini. Pisākirenani piokanata. Ininiā erekapeka itxako ninitiri. ⁹ Nimarotari ikananani apakatako, kotxi nota kamari nota auĭte paniātakiti. Apaka sotato auĭte nitxaua nota. Nisākirau-atakasaaki, nisotatone kamapitikari nipaniātakiti. Nota txari: “Pisa.” Iuasaakipeka isa. Nitxari āti: “Pina.” Iuasaakipeka ina itxa. “Ia pikama,” nitxari ninitiri. Iuasaakipeka ikamari. Ininiā pisākirenani apakatapitika —itxari Xesosi.

¹⁰ Isākire Xesosi kenakotakasaaki, iteene ipotxitari isākire. Iposo atoko itxa:

—Atāo nitxai. Isaeo auakani poiāo auikari nisākire. Ia Homano itxaua, iuaritika apiata iua auikari nota posotiire. Kona nitikapanikari kākiti Isaeo auakari auikini nisākire ia kiki auikini atoko. ¹¹ Nota sāpiretai hĭte, itomaneri kākiti āti uāka atokatxi pokĭkini tixinimoni auakani, atokatxi ereēkokini tixinimoni auakani apaka, itomaneri itixi auakani kiiniritauatako Teoso auĭtetxi ininiātaāua. Ninoa nipokotako anirmanekata kitxakapirĭka auakanikata. Apraō, Isaki, Xakoo pakinikata inipokotana. ¹² Iuasaaki apanakini Apraō apika mekaniriakori kona sari iua Teoso kiiniritemoni, kotxi ninoa lauikari Teoso sākire. Piākatximoni iokanataākanako. Iuaā itxiapatanako, akatsakatsirĭ-tauanako imisiritikona xika —itxa Xesosi sākire.

¹³ Ininiā Xesosi txari sotatoakori auĭte:

—Pisa paapokomoni. Pite auikari niposotiire pinitiri erekape inini ĩkapani. Uatxa auape pinirekakiti —itxa Xesosi.

Ininiā initiri iuasaakipeka erekape itxa.

Simāo Petro Imakiro Makananitiko

(Marko 1.29-34; Arókasi 4.38-41)

¹⁴ Iposo atoko Xesosi sari Petro aapokomoni. Iuaā apokasaaki, atamataro Petro imakiro. Osirimata nopini osirĭkanāta. Oāpoomata. ¹⁵ Ininiā Xesosi takapiotaua ouako nopini. Iuasaakipeka apoomari xipoka. Ininiā oōkitikaua. Osikakienatana ninoa.

Xesosi Makananitana Amianatakani

¹⁶ Mapiāpeka inakasaaki, kākiti anikana itomaneri maerekati matamatakoti auāĭtotakini iuamoni. Isākireē omitikana maerekani matamatakoni. Imakananitana ikinikana amianatakani. ¹⁷ Ikara atoko itxa Xesosi, kotxi inirekari Isaía sākire iaōka apokini. Kitxakapirĭka Teoso sākire sāpiretakari Isaía inakori txari:

Iua taretariko amianatakari. Imaktxakariko aami-anare. Imakanaitaua. Iuaka atatsiirauata ate ĩkapani.

Kākiti Xesosi Imoianatinina Nireēkani

(Arókasi 9.57-62)

¹⁸ Itomaneri kākiti iuakata auakasaaki, Xesosi txari imoianariakori:

—Masa ipiniāmoni —itxana.

¹⁹ Iuasaakipeka āti kaiōkatsoparereri apoka Xesosimoni. Itxa:

—Koerekareri, nota iposope nisini pite nirekinimoni —itxa.

²⁰ Ininiā Xesosi:

—Atauako pinirekatari pisini notakata? Aripa aua auini iriko. Araākani auari ikoa. Txamari nota kākiti itari iaxitikiri !auari nimakiniātaā —itxa Xesosi.

²¹ Ātipekana apoka Xesosimoni. Xesosi moianari iua. Itxari:

—Niauĭte, pauiritano niri nikatanapini merepanika, kotxi kiomātxipekari iua. Eereka nisa pitekata —itxari.

Iteene iua linirekari isini Xesosikata. ²² Xesosi apaka-papiretari:

—Notakata pisa uatxa. Nisākire mauīākani ipĭkani atoko itxana. Ininiā pauiritana ipĭkani katiniri inirimanane nisākire mauīākani —itxa Xesosi.

Xesosi Iotokakiniri Ītima Pirena

(Marko 4.35-41; Arókasi 8.22-25)

²³ Iposo atoko, Xesosi imoianariakorikata iereētaua, ĩpiriātinina ĩkapani. ²⁴ Mokatanitika ĩtima kataparari apoākata. Tsakati okari āparaā kanaua āki. Iuasaaki Xesosi imkanāta. ²⁵ Imoianariakori sari iuamoni. Ōpirĭkarina. Akiripoakatana:

—Apiananiri, !pauiritapiri apinini. Apinanapanoka —itxana.

²⁶ Ininiā Xesosi:

—Kinirepa hĭpĭkarauata? Poiāonoka hāuikari niposotiire —itxa.

Iposo atoko oōkitikaua, pinita itxari ĩtima, tsakati pakini. Iuasaakipeka ĩtima, tsakati pakini iotoka. ²⁷ Ininiā imoianariakori tsoĭkaāta. Itxana:

—Natokopa inakaripa ia kiki? Ītima, tsakati pakini kenakotari isākire —itxana imoianariakori.

Ipi Kiki Maerekani Matamatakoni Auāĭtotakini

(Marko 5.1-20; Arókasi 8.26-39)

²⁸ Ipinā apokasaakina Xerasa tōpamoni, itaōkitarina ipi kiki itomane maerekani matamatakoni auāĭtotakini.

Akauariã auanātana. Paneenamana. Ikara xika kākiti pīkari akauarimoni isinina. ²⁹ Xesosi inaãpotakasaaki, maerekani matamatakoni iitoãna auakani akiripoakata:

—Xesosi, Teoso äkiri pitxaua. Kiripa pinirekaka atemoni? Pite ina uaimoni amisiritiko öti apisapanika pimisiritiniua ĩkapani atxiiti? —itxarina.

³⁰ Ikara ininiãtaã takote auana itomane irariakori. Iki-
ra atoko inipokonãtana. ³¹ Ininiã maerekani mata-
matakoni txari:

—Ate pomitikiniã, irariakorimoni piokanataua —itxarina.

³² Ininiã Xesosi:

—Hĩsipeka ninoamoni —itxa.

Iuasaakipeka irariakori ĩtoã ĩroãna. Ininiã imakinikana irariakori miteẽkata. Iokirĩkatana. Ipoa-
moni isana. Iuaã ikomokana, axãpoãta itxana. ³³ Ninoa
irariakori nĩkatakani miteka sitatximoni. Iuaã ikinika
isãpiretana irari ipinini pirena, kiki maerekani mata-
matakoni auãtotakini pirena apaka. ³⁴ Ininiã ikinimane
sitarixikini sari Xesosi itaõkitinina ĩkapani. Iua itaõki-
takasaakina, amanaãrina ninoa tixine itakanapini ĩka-
pani.

Matĩpokotakati Pirena

(Marko 2.1-12; Arókasi 5.17-26)

9 Ininiã Xesosi iereẽtaua kanauaã. Ikanapiriã iua
auinimoni Kapanaoõ sitatxitimoni. ² Ätikaka kiki-
akori minari matĩpokotakati Xesosimoni. Xesosi imaro-
tari ninoa auikiniri iua sãkire. Ininiã itxari:

—Namarite, pipoxokoniutako. Pimaerekani makatx-
akapeẽkaika —itxa.

³ Iuasaaki aua ätikaka kaiõkatsoparerini iuaã. Ninoa
ãkixinireẽ itxana:

—Kona erekari isãkire. Teosonanira posotari kākiti
maerekani imaktxakini —itxana ninoa.

⁴ Xesosi imarotari maerekati ixinikakitina ãkixinireẽ-
na. Ininiã iua txa:

—Kinirepa hĩuãkatari nisãkire maerekati inini?

⁵ Nitxari iua imaerekani nimaktxakini, txamari !hi-
marotari imaerekani atão nimaktxakini. “Põkitikaua.
Pitĩpokota,” nininiã, himarotari nisãkire atão ininiãua,
kotxi hĩtikari. Niposotiire imaerekani nimaktxakini
ĩkapani, niposotiire iua nõkitikini ĩkapanitxikana.

⁶ Ininiã uatxaika noerekai hĩte, Teoso iokanatano nota
hĩtari iaxitikiri ĩkorapokoritimoni kākiti maerekani ni-
maktxakini ĩkapani —itxa Xesosi.

Ininiã itxari matĩpokotakatimoni:

—Põkitikaua. Pisirimata pikoseka, sipe pitxa
paapokomoni —itxa Xesosi.

⁷ Iuasaakipeka iua õkitikaua, aapokomoni sipe itxa.

⁸ Ikara inakari apanakini itikasaaki, ipĩkarauatana.

—Peerekari Teoso, kotxi iua oerekari iposotiire kākiti-
moni —itxana.

Mateo Pirena

(Marko 2.13-17; Arókasi 5.27-32)

⁹ Ikara inakari oereka atoko Xesosi sipeka. Isikasaaki,
itaõkitari Mateo inakori. Auĩtetxiakori txineirote apoti-
itakari iua. Xesosi napakasaaki, iitopãkanãta txineiro
apakapiniãtaã. Ininiã Xesosi txari:

—Masa notakata pimoianatinino ĩkapani.

Ininiã Mateo õkitikaua, Xesosikata sa itxa. ¹⁰ Eereka
Xesosi imoianariakorikata nipokota Mateo aapoko. Tx-
ineiro apotiitakani, apanakini kākiti maerekati ka-
makani pakini apoka Xesosikata inikinina ĩkapani. Kãki-
ti kona potxitari txineiro apotiitakani, kotxi ninoa
sikaro oa txineiro äti uãka auĩteakorimoni. !Neerekana
ninoa. ¹¹ Pariseoakori itikari ninoa nipokotini, ininiã itx-
ana Xesosi moianariakorimoni:

—Kinirepa hĩauĩte nipokota txineiro apotiitakanikata,
maerekanikata? —itxana.

¹² Ininiã Xesosi kenakotari ninoa sãkire. Itxa:

—Maerekati kamakari amianatakari atoko itxa. Ni-
noa nirekari erekape ininina. Kākiti mamianatakani
!inirekari ipini sikakarimoni isinina. Amianatakaninoka
nirekari ipini sikakarimoni isinina. Hĩte !inirekari nota
makatxakiniri himaerekani, kotxi hĩte uãkatari !uari
himaerekani. ¹³ Hĩxinikariko ia Teoso sãkire iõkat-
sopatakori:

Hĩsikarauata notamoni. Apiaerekata hiamonĩkiniri
apanakini.

Nota ina ĩkorapokoriti kona kãkiti “atão inakarino
kamakarino nota” inakani ĩkapanini, kotxi ninoa
uãkatari erekarini ininiãuana, txamari kona erekana.
Kãkiti maerekati kamakani ĩkapanira nina nota uai
imaerekanina itakanapinina ĩkapani —itxa Xesosi.

Nipokori Takanapiko Teoso Misãkiretiko ĩkapani

(Marko 2.18-22; Arókasi 5.33-39)

¹⁴ Eereka Xoão kapatxisareri moianariakori apoka Xe-
sosimoni. Itxana:

—Ate, pariseoakori pakini atakanapari anipokotini
itokata Teoso amisãkiretini ĩkapani. Kinirepa pite moia-
nariakori !itakanapari inikinina Teoso imisãkiretinina
ĩkapani? —itxana.

¹⁵ Ininiã Xesosi apakapiretana:

—Nota kiiniri kamakari atoko nitxa. Kiki nirekiniã
ĩtanorouatini, ikamari kiiniri. Iuasaaki imoianariakori
kona nirekari imatinianiuatinina, iua ninoakata
auakasaaki. Ininiã kona itakanaparina inikinina Teoso
imisãkiretinina ĩkapani. Äti öti nimaĩkaãkako.
Nanikaãkako ninoa mauakaniãtaã. Iuasaakiko itakana-
parina inikinina Teoso imisãkiretinina ĩkapani —itxa
Xesosi.

Mãkatxi Tãpanatiko Pirena

¹⁶ —Kiomãtxiakori kitxakapiriãka auakani sãkirekata
kona hĩkoketapiri nota sãkire. Ikara hĩkaminiã, ininiã
mãkatxi kitxakari amaneriã hĩtãpanatini atoko itxa.
Mãkatxi kitxakari amaneriã kona hĩtãpanatape, kotxi

parokasaakiri, amaneri txikika, ininiã ikatsorãkari mākaxi kitxakari. Ininiã mitari itsorãkare. Mākaxi amaneri nota oerekakiti atoko. Mākaxi kitxakari, kākiti kitxakapirĩka oerekakiti atoko itxa. Hĩkoketiniãri kitxakapirĩka oerekakiti, amaneri oerekakitikata, imakinika xipoka.

Sako Aamata Kamakori

¹⁷ —Kitxakapirĩka kākiti takari iãriã sako aamata kamakori ãki. Iuasaaki kona kākiti takari amaneri iãriã kitxakari mata ãki, kotxi iãriã txiõkaãtakasaaki, itiãkaãpota. Ininiã omata kitxakari tsorakitako, kotxi paikori. Kona itiãka. Ininiã iãriã katxaka. Iãriã, aamata pakini xipoka. Amaneri matariã itakaãka iãriã amaneri. Ikara atoko ininiã, erekapitikari. Kona ixipokapaniko. Iua atokokana kona hĩkoketapiriko kiomãtxi kitxakapirĩka oerekakiti nota oerekakitikata —itxa Xesosi sãkire.

Xoteoakori Auĩte Pirena

(Marko 5.21-43; Arókasi 8.40-56)

¹⁸ Xesosi sãkirauatapanika, inakasaaki Xoteoakori auĩte apoka iuamoni. Ikapotoreẽkaua Xesosi apisatoõ. Itxa:

—Namarite opinanapanoka. Masa. Piuako pitaka oa nopini, ininiã kona opina —itxari Xesosi.

¹⁹ Ininiã Xesosi imoianariakorikata õkitikaua, iuakata sa itxana.

Xesosi Mãka Maãtakakaro

(Mateo 9.20-22; Arókasi 8.43-48)

²⁰ Isikasaakina, sito apoka iua porikimoni. Oamianare oãrẽka !iotokiniãro. Tosikanani oamianatini.

Oãpokasaaki, omaãtakari imãka imapotomatare.

²¹ Oãkixinireẽ otxa:

—Imãka nimaãtakiniã, erekape nitxako —otxa.

Ininiã otikakari imãka. ²² Iuasaakipeka Xesosi kirioka, atamata itxaro:

—Namarite, kataparaxinire pitxako. Pauikari ni-posotiire, ininiã erekapekai —itxaro.

Iuasaakipeka oa erekape.

Xáiro ãkero Õkitikiko Pirena

(Marko 5.35-43; Arókasi 8.49-56)

²³ Iposo atoko Xesosi sari Xoteoakori auĩte aapokomoni. Iuaã apokasaaki, iĩroã. Itikari sokonaki xõkakani, itomaneri kākiti txiapatakani apaka. ²⁴ Ininiã Xesosi:

—Mapara hĩsa, kotxi oa amarini kona opina. Omakanãta —itxa Xesosi.

Ininiã ninoa napetari Xesosi:

—!Omakanãta. Opĩpe. Pite !imarotari —inapetarina.

²⁵ Ikinimane mapara isikasaakina, Xesosi sari oa ãtokoromoni. Imaĩkaro ouako. Iuasaakipeka oõkitikaua. ²⁶ Ikara ene iaripireta iua tõpa.

Xesosi Kõsiãrepeka Txĩkitakari Mõsiãreti

²⁷ Iposo atoko Xesosi sipe. Iuasaaki ipi mõsiãreni sari iua tikini. Iuasaaki ninoa akiripoakata:

—Tavii apika mekanirii, piamonĩkaua ate —itxana.

²⁸ Aapokotxi Xesosi iĩroãkasaaki, ninoa iĩroã apaka.

Ininiã Xesosi:

—Hãuikatari niposotiniri erekapeka nitxĩkitakinii hĩte? —itxa Xesosi.

Ininiã ninoa:

—Ari, Apiananiri —itxana.

²⁹ Ininiã itakapiotaua ninoa oki nopini. Ininiã itxa:

—Ari, hãuikakiti iaõka itxako —itxa Xesosi.

³⁰ Iuasaakipeka ninoa kõsiãrepeka itxana. Ininiã Xesosi:

—Kona hĩsãpiretapiri nikamakiti apanakinimoni —itxa Xesosi.

³¹ Eereka ninoa sipe. Txamari iaripiretarina ikamakiti ikinika iua tõpa.

Masãkireti Pirena

³² Ninoa kiki potorikasaaki, masãkireti anikaãka Xesosimoni. Iua kona kasãkireri, maerekati mata-matakoti auãtotakiti xika. ³³ Iuasaaki Xesosi omitikari iua maerekati matamatakoti. Iuasaakipeka iua kiki sãkirauata. Itomaneri kākiti itikari. Iuasaakiika ninoa tikoka. Ininiã itxana:

—Ikinika Isaeo tixiniã auakani, mitxi !itikapanikari iĩkora atoko inakari —itxana.

³⁴ Txamari pariseoakori txari:

—Xesosi omitikari maerekati matamatakoti Satanasi posotiireẽ —itxana.

Na atão ninoa sãkire.

Xesosi Ikini Sitatxiti Sini

³⁵ Ininiã Xesosi sari ikini sitatxiti tõpa. Aapokotxi auiniãtaã apaka isa. Oerekarauata aiko Xoteo apoti-itiniãtaãua. Isãpiretari Teoso iokanapirena erekari, Teoso auĩtetxi ininiãua pirena. Apaka erekapeka itxĩkitakana ikinipoko amianatakani. Ikini sereti amianari aua kãkitimoni. Ikinika imakananita. ³⁶ Atamatakasaakina ninoa kãkitipokoni, iamoniãkana ninoa, kotxi soti auĩte minĩkatakoni atoko itxana, kotxi !imarotarina isinimonina. Imaãkauana. ³⁷ Ininiã itxari imoianariakori:

—Kaiãori kākiti iposope auikiniri nisãkire, txamari !imarotarina nisãkire, kotxi likenakotapanirina. Ninoa kiki erekari atoko itxana. Imakinika iposope iuaã. Ininiã iposope auikinirina nisãkire. Txamari, poiãoka parĩkauatakani aua nisãkire isãpiretinina iĩkapani.

³⁸ Ininiãkara himisãkiretariko Apiananiri iaxitikiri iokanatinina parĩkauatakani iua sãkire auĩkani apotiitini-na iĩkapani. Ikara atoko hĩtxako Teosomoni —itxa Xesosi.

Xesosi Mereēna Tosi Imoianariakori

(Marko 3.13-19; Arókasi 6.12-16)

10 Xesosi mereēna tosi imoianariakori. Isikari iposotiire ninoamoni maerekati matamatakoti omitikinina ĩkapani. Isikari iposotiire ninoamoni amianatakani imakananitinina ĩkapani, ikinika amianari inokasaakina ninoa amianatakani. ² Naia imoianariakori uāka: Merepitipanika auari Simāo Petro inakorima, apaka itari Ātree inakorima. Auari Txiakoma, apaka itari Xoāoma. Ninoa Sepeteo anaakori. ³ Auari Piripima, Patoromeoma, Tomeema. Apaka auari Mateoma, txineiro apotiitakari. Apaka āti Txiakoma, Aoepo ākiri. Aua Tateoma. ⁴ Aua Simāoma, Homano omanatakari. Apaka aua Xotasi Isikariotxi inakorima. Iua Xesosi mĩkapiritakari itxaua. Ninoa Xesosi moianariakori itxauana.

Xesosi Iokanatana Imoianariakori Kākitimoni

(Marko 6.7-13; Arókasi 9.1-6)

⁵ Ininiā Xesosi iokanatana ninoa isākire isāpiretinina. Ia atoko ōtāĳikana:

—Kona hĩsipeko Xoteo minakonimoni, apaka Samaria tōpa sitatxitimoni kona hĩsipeko. ⁶ Hĩsako kākiti Isaeo tixinikinimoni. Hinirimanemoni, Xoteoakorimoni hĩsako. Ninoa soti auĩte pĩpinanaāĳani atoko itxana. ⁷ Hāpokasaaki kākitimoni, hĩtxariko: “Teoso ikini mane auĩte ininiua manapi paĩtiki apokako.” ⁸ Himakananitanako amianatakani. Maere matati erekapeka hĩtxĩkitakako apaka. Ipĩkani hōkitikako. Homitikariko maerekati matamatakoti kākiti auaĩtotakini. Ikara atoko hĩkamako. Kona hĩte ĩkitxitari Teoso hāpakapakiti ĩkapani. Ininiā ikara atokokana hĩtxako. Kona hinirekapiri kākiti ĩkitxitinini hĩte, hĩte sikakiti ĩkapani. ⁹ Kona hanikapero txineiro oro kamakoro. Pirata kamakoro, ātiāo txineiro apaka, kona hanikape. ¹⁰ Uatxa hianaxititakasaaki, sako mata !hanikape. Āti himāka !hanikape. Āti hĩkiti mata kona hanikape. Hĩsonere !hanikape. Kona himaāĳapeua, kotxi parĩkauatakani apakapariko nipokori. Hinirekakiti apokapitikako.

¹¹ —Sitatxi hāpokasaaki, hinitari kākiti Teoso sākire kenakotakani, hĩte apakapakani. Hĩkaikota ninoakata. Eereka kona hĩsipe āti aapokomoni hĩkaikotini ĩkapani. ¹² Aapokotxi āki hĩroāĳasaaki, hĩtxako: “Erekari Teoso sikakiti kaikotako hĩtekata,” hĩtxako. ¹³ Kākiti ipoxokoniritika apakapiniāi, hĩtxako: “Teoso takari erekari hĩtemoni,” hĩtxako. Imanirekakaniāi, hĩtxariko: “Teoso kona takari erekari hĩtemoni.” ¹⁴ Atxĩiti aapokotxi hāpokasaaki, kākiti iuaātaā !apakapai. Atxĩiti !nirikarina hĩsākire, ininiā iuasaaki hĩsipeka. Hĩtakanapariko iuaātaā. Hĩpotorikasaaki, himakatzakari kipatxi hĩkiti mataā auakari. Ininiā iuasaaki ninoa imarotari Teoso kona apokaerekatana. ¹⁵ Hĩxinikariko ia nisākire. Kākiti misiritiko ōti apokasaaki, ninoa apiata misiritaāka. Sotoma sitatxiti auakani, Komoha sitatxiti auakani pakini misiritaāka poiāoka —itxa Xesosi.

Misirikaretxi Pirena

(Marko 13.9-13; Arókasi 21.12-19)

¹⁶ Iuaĩkana Xesosi sākirauata:

—Erepaniko, pamonōkoniri. Hĩte soti auĩte atoko hĩtxa, kotxi !kaposotiirei hĩte, iuaritika niokanatai kākitimoni. Ninoa ākiti atoko, ininiā erepaniko. Ininiā kimarorei hĩtxako. Imini kimaroreri atoko hĩtxako. Ininiā maerekati ninoa auakiti kona misiritai. Iuasaakiika kamao atoko hĩtxako, kotxi kamao !imisiritari kākiti.

¹⁷ —Erepaniko. Araōĳire hĩtxako. Auako kākiti kinirāo anikinii maxikatiĩka kākiti misiritiko mereēkanimoni. Apanakini xirokaiko hĩte maxikatiĩka aiko āki Xoteo apotiitiniātaāua. ¹⁸ Nota sākire hāuikini xika hanikaāĳako auĩtetxiakorimoni himisiritiko himarotini ĩkapani. Ikara atoko ininiā, iuasaaki erekapitikari, kotxi hĩsāpiretariko nota sākire iuaā auakanimoni, Xoteo minakonimoni apaka.

¹⁹ —Kākiti misiritiko mereēkarimoni hanikikosaaki, kona himaāĳapeua hĩsākirauatini apisa. Teoso sikaiko hĩsāpirena tĩkane. ²⁰ Sākiretxi hĩsāpiretakiti kona hĩte sākireni. Erekari Matamatakoti, iuarako sikariko sākiretxi hĩsākirauatini ĩkapani iuasaaki.

²¹ —Āti ōti hĩtari sikaiko hĩte homanatakinimoni okinii ĩkapani, kotxi hĩte auikari nota sākire. Iua atokokanerako irĩtxi sikariko imi ātimoni okiniri ĩkapani, kotxi imi auikari nota sākire. Auako apaka imi omanatinina iri, inoro pakini, kotxi inoro, iri pakini auikari nota sākire. Iua sikanako ātimoni okinina ĩkapani. ²² Ikinimane omanataiko hĩte nota sākire hāuikini xika, iuaritika hāuikiniāri nisākire ātipirika, nimakatzakai himapinakani ĩkapani. ²³ Sitatxiā hāuakasaaki, himisiritikosaaki, āti sitatxitimoni himitekako. Atāo nota sāpiretai hĩte. Kona hĩte xipokapaniri hĩparĩka ikini sitatxiti Isaeo tixini hĩtari iaxitiki kanapiriini apisa —itxa Xesosi sākire.

Apiatakari, Poiōori Pakini

²⁴ Iuaĩkana Xesosi sākirauata:

—Apaiaōkarauatakari poiāo. Koerekareri apiata. Apaka nitiritxi poiāo. Iauĩte apiata. ²⁵ Apakatapitika apaiaōkarauatakari koerekareri imarotakiti iaōka imarotini. Iua atokokanera nitiritxi iua auĩte atoko inini. Apanakini akiritano nota “Peosepoo,” Satanasi inakori. Ininiā itakauāĳatai hĩte hĩuāka apia maerekati, kotxi nota anaakorirai hĩte —itxa Xesosi.

Kipatakori !Auari

(Arókasi 12.1-3)

²⁶ —Ininiā kona !hĩpĩkapena ninoa maerekati kamakani, kotxi nota kanapiriāĳasaaki, kona kipatakori auapanika. Ikinika imarotaāĳako. ²⁷ Hĩtemoni ĩkanōka nimaasakapiretakiti, ikara nisākire hākiripoakatako aapokotxi nopini imakinika kākiti imarotiniri ĩkapani. Uatxa hĩtemoninani nisāpiretakiti āti ōti ikini manemoni hĩsāpiretako.

Kipa Ap̄ka?
(Arókasi 12.4-7)

²⁸ Kona h̄p̄kapena h̄ito okakani, kotxi liposotarina h̄xinire okinina. H̄p̄kariko Teoso, kotxi iuanokara posotari iokanatinii h̄ite, h̄ito, h̄xinire pakini maerekani misiritikoãtaã. Iuara h̄p̄kako.

²⁹ —Ipi kotipiriki ũki poião, ãtika txineiro otanoka. Iuaritika h̄iri iaxiti auakari turetana ninoa. Imauri-takaniãri, kona ãtika ipina. ³⁰ Kipakinipa piãko pikiiã auakari aua? !Pimarotari. Teoso imarotapitikari, kotxi iteene in̄kakai, ininiãkara !h̄p̄karauatape. ³¹ Kotipiriki ũki poião, iuaritika Teoso turetari kotipiriki. Ininiãkara kona h̄p̄karauatape. Kaiãopokori kotipiriki auiniã, iuaritika h̄ite ũki apiata, ininiã Teoso turetapatikai h̄ite —itxa Xesosi.

Xesosi Tiretakani, Xesosi Manirekakani Pakini
(Arókasi 12.8-9)

³² Xesosi sãkirauatapanika:

—Apanakini apisatoõ h̄sãpiretiniãri: “Xesosi nakiti nitxaua nota,” iua atokokanerako nitxariko niri iaxiti auakari apisatoõ: “Nota nakitipitikara iua,” nitxako —itxa Xesosi. ³³ H̄sãpiretiniãri apanakini: “Xesosi nakiti !nitxaua nota,” iuasaaki nisãpiretari niri iaxiti auakari: “Kona nota nakitini iua.”

Pinirekakiti Pirena

(Marko 8.34-35; Arókasi 12.49-53; 14.26-27)

³⁴ —Kona h̄xinikapiri nota ũkorapokoriti napokini neenamati nixipokini ũkapani. Kotxi kãkiti auikari nisãkire, ininiã eereka apanakini omanatana. Kona neenamati xipokapanika, kotxi nota minari niposoti-ire maerekati nixipokini ũkapani. ³⁵ Nota apokini xika imi omanatana iri, inoro pakini, kotxi ninoa auikari nisãkire. Tiãrotxi omanataro oimakiro, kotxi ãto omanatano nota, ãto turetano nota. ³⁶ Iuasaaki piniriane pimokaiakarinarako itxauanako.

³⁷ —Poiãoka pitiretiniãno nota, apiata pitiretiniãna pinoro, piri pakini, kona erekari nimoianari pininiua. Apiata pitiretiniãna pamariteakori, kona erekari nimoianari pininiua. ³⁸ Nota kinirão moianataka hinakasaaki, notakata h̄isa. Himam̄iteenekakanisaakiri himisiritiko nota ũkapani, ininiã !apakata himoianatinino. ³⁹ —Pite ãtipirika kaminiãri piteka nireẽkitinoka, ininiã pinireẽkiti xipokapitikako pitekata. Pite nireẽkiti xipokiniã, nota sãkire pauikini xika, pite auapininiika txako Teosokata —itxa Xesosi.

H̄ite Apakapakani Pirena

(Marko 9.41)

⁴⁰ Iuaĩkana Xesosi sãkirauata:

—Kãkiti h̄ite apakapakani, apakapano nota apaka. Nota apakapakari apakapari nota iokanatakari apaka. ⁴¹ Papakapiniãri Teoso sãkire sãpiretakari, kotxi iua sãpiretari Teoso sãkire, ininiã papakapari erekari Teoso sikakiti iua apakapakiti iaõka. Papakapiniãri atão inakari kamakari, kotxi iua kamari atão inakari,

ininiã papakapari erekari Teoso sikakiti iua apakapakiti iaõka. ⁴² Pisikiniãri ãparaã nimoianari poiãorimoni iãtini ũkapani, kotxi nimoianari itxaua, Teoso iĩkitxitapitikai pite —itxa Xesosi.

Xoão Kapatxisareri Tikini Sikani

(Arókasi 7.18-35)

11 Xesosi moianariakori tosi pakini isãkire oerekini xipoka atoko, Xesosi sipe. Isa ãti sitatxitimoni, eereka ãti sitatxitimoni Karirãia tãpa itxaãpota oereka-rauatakasaaki. Teoso sãkire isãpiretari kãkiti.

² Xoão kapatxisareri, kateia ãki auakasaaki, ikenakoenetari Xesosi kamakiti, ininiã iokanatarari ipi imoianariakori Xesosimonikari.

³ Ininiã Xoão txari imoianariakori:

—H̄p̄imaãri Xesosi: “Pitekani iaxiti ũkari, kãkiti iãtapakiti pitxataua? ãtikani atxiiãti aiãtapakiti pitxataua?” h̄txariko —itxa Xoão.

Ininiã ninoa sipe. Ipimaãrina Xesosi Xoão sãkire iaõka. ⁴ Ininiã Xesosi apakapapiretana:

—H̄ikanapiriã Xoãomoni. H̄sãpiretari h̄ikenakotakiti, hãtamatakiti pakini. ⁵ H̄ite atamatapekari m̄osiãreti kãsiãrepeka inini. Mat̄ipokotakati t̄ipokotapeka. Hãtamapekari maere matati erekapeka inini. Makenakokiti kakenakokipeka. Ip̄ikani õkitikapekautaua. Teoso iokanapirena erekari sãpiretapeẽkaika minakati mauapikinitinimoni. Pakini hãtamapeka. Ikara h̄sãpiretako Xoãomoni. ⁶ Kãkiti iteene auikiniãri nota sãkire, Teoso takari erekari iuamoni. Ikara nisãkire h̄sãpiretari Xoão —itxa Xesosi.

⁷ Ininiã ninoa sipe. Isikasaakina, Xesosi sãpiretari Xoão pirena itomaneri kãkitimoni. Ia atoko itxa:

—Kipa ũkai h̄ite, Xoão kapatxisarerimoni h̄sikasaaki, ãparaã makipakaniãtaã iua auakasaaki? H̄ite sari iuamoni, kotxi ãtitxika isãkire aua. Teoso sãkirenoka isãpireta. Ìtima ãpokaxitikasaaki, katsotati ipinimoni ipap̄ka, iuaĩkana ipinimoni ipap̄ka inini atoko kãkiti, kotxi isãkire kita ãti, isãkire uatxa ãtião, isãkire katana iuaĩkana ãtião, itxaãpota isãkire. Ikara atoko !itxa Xoão.

⁸ —Kipa ũkai h̄ite Xoãomoni h̄sikasaaki? H̄ite sari iuamoni, kotxi !inirekari tiitxi, txineiro pakini. !Kakaroneri imãka, kotxi !ikaikota auĩtetxi aapoko. Auĩtetxi aapoko peereri mãkatxi.

⁹ —Kipa ũkai h̄ite iuamoni h̄sikasaaki? H̄ite sari iuamoni, kotxi iua Teoso sãkire sãpiretakari itxaua. Atãopitika Teoso sãkire sãpiretakari itxaua. Iua Xoão Teoso sãkire sãpiretakari apiari.

¹⁰ —Teoso sãkire iõkatsopatakori kitxakapir̄ka txari: Niokanatariko nisãkire sãpiretakari kãkitimoni pite apisa, papokini isãpiretini ũkapani, kãkiti iposope inini ũkapani.

¹¹ Atãopitikara. Ikinimane sauaki Xoão kapatxisareri apiatakari itxaua. Iuaritika Teoso auĩtetakari poiãori inakari apia imarotariko Teoso kamakiti t̄ikane. ¹² Xoão auakasaaki Teoso auĩtetakani misiritaãka, kotxi kãkiti kaneenamari naiatana ninoa. Ninoa nirekari ixipokinirina Teoso auĩtetxi ininiua ũkorapokoriti. Uatxapiima

auapanika ikara atoko inakari. ¹³ Xoão apokini apis-apanika, ikinika Teoso sãkire sãpiretakani, ikinika Teoso sãkire iõkatsopatakani, sãpiretari Teoso auñtetxi ininiua pirena. Xoão apokasaaki, iua apaka oerekari Teoso auñtetxi ininiua pirena.

¹⁴ —Kitxakapirĩka Teoso sãkire sãpiretakani sãpiretaua:

Äti Teoso sãkire sãpiretakari Eríasi atoko inakari apokako, itxana. Iuakara Xoão. Hãuikiniãri nisãkire, hãuikariko iuara apokapeka. ¹⁵ Kakenakokii, ininiã hĩkenakotariko nisãkire —itxa Xesosi.

¹⁶ —Kanatokopa itxa kãkiti ĩkorasaaki auakani? Amarini sarauatini atoko itxana ĩkorasaaki auakani. Nino noa amarini topãka tiitxi amotikoãtaã. Apanakini amarini txitana apanakini amarini. Itxana: ¹⁷ “Ate xikarauata hĩte serenini ĩkapani, txamari !hĩserena. Kãkiti pĩkasaaki xikariti axikareta, txamari !hĩxiapata.” Ninoa amarini sarauatini atoko itxana ĩkorasaaki auakani, ¹⁸ kotxi Xoão kapatxisareri apoka ĩkorapokoriti. Itakanapari inikini Teoso imisãkiretini ĩkapani. !Ītari ovaã. Iuaritika hĩte txari: “Maerekati matamatakoti auañtotari Xoão,” hĩtxari. ¹⁹ Nota hĩtari iaxitikiri apoka ĩkorapokoriti. !Nitakanapari ninikini. Ikinioĩtika ninipokota. Niãtari ovaã. Ininiã hĩte txari: “Iua kiki ixori. Poãtakari iua. Iua moianatana txineiro apakapakani, kãkiti maerekati kamakani,” himisãkirepirenãtano. Kimaroreri atão inakari kamari erekarinani. Kãkiti atamatakasaakiri ikamakiti, imarotari kimaroreri atão inakari ininiua —itxa Xesosi.

Sitatxi Auakani Teoso Sãkire Mauiãkani

(Arókasi 10.13-15)

²⁰ Ininiã Xesosi pinitana Korasiĩ sitatxiti auakani, Pet-sáita sitatxiti auakani pakini, kotxi kaiãopokori iposotiire ikamapeka iuaãtaã, iuaritika kona itakanaparina maerekati. ²¹ Xesosi txana ninoa:

—Kãkiti Korasiĩ auakani himisiritããkako. Kãkiti Pet-sáita auakani hĩte apaka misiritããkako. Kitxakapirĩka Txiro, Sitoõ pakini sitatxitikini kamari maerekati, ininiã Teoso xipokana ninoa arikatxiã. Ninoa atamataãkamariko nota posotiire hĩte atamatiniri atokokana, ininiã ninoa mãkatamariko sako mata. Itakamariko atapani iĩtoãna. Ikara atoko ininiã, ninoa oerekari maerekati itakanapinina. ²² Nisãpiretai hĩte ia: “Kãkiti misiritiko õtisaaki, Txirokini, Sitoõkini pakini misiritããka poião. Hĩte apiata.” ²³ Hĩte Kapanaoõkinipekana, Teoso äkiri aua hĩtekata. Hĩte itikapekari ito posotiiretxi iaxitikiri. Txamari hõkakatapeẽkako maerekani misiritikoãtaã. Nikamakiti hĩtemoni Sotoma auakani sauaki nikamaãkamako, kona ninoa xipokamako. Aupanikamanako. ²⁴ Ininiã nitxai hĩte: “Himisiritikosaaki, apiata himisiritããka. Poiãoka Sotomakini misiritããka,” —itxa Xesosi.

Teoso Imarore Apakapakani

(Arókasi 10.21-22)

²⁵ Iuasaaki Xesosi misãkiretari iri:

—Niri, pitixine auakani auĩte pitxaua. Uai ikini itixiti auakani auĩte apaka pitxaua. Peerekai pite, kotxi na poerekari pimarore kãkiti kimarorerinimoni, iuikakanimoni. Pite oerekari pimarore kãkiti poiãorinimoni, miuikakanimoni. ²⁶ Ari niri, ikara atoko pinireka. Ikara atoko papokaerekata —itxari iri.

²⁷ Eereka imisãkiretari kãkiti:

—Niri sikapekano ikinika. Kãkiti !imarotano nota Teoso äkiri nininiua. Nirinokara atão imarotano nota. Apaka kãkiti na atão imarotari niri. Notanokara imarotari niri, kotxi iua äkiri nitxaua. Kãkiti nirekiniãri imarotini niri, nota oerekari niri iuamoni.

²⁸ —Iteene minari atoko itxa himaerekani. Hinireka hĩtakanapiniri iua, txama !hĩposota hĩtakanapiniri. Hĩsãpakiniã himaerekani xika, hina notamoni hĩtomatini ĩkapani. Iuasaaki nimaktxakari himaerekani. ²⁹ Hĩtakariko nipaniãtakiti hãkixinireẽ. Hãpaiaõkariko nota pirena. Erekapitikari hãpaiaõkiniri ninirekakiti, kotxi kona kaneenamano. Kona nota napetari kãkiti. Niuikiniua !auari. Ikara atoko ininiã, hĩxinire tomatapitika. ³⁰ Hĩposotapitikari nipaniãtakiti hĩkamini, notakata hĩparĩkauatiniã. Nipaniãtakiti !kasãpaniri. Kona kamimari. Peerekari nipaniãtakiti —itxa Xesosi.

Tomatiko Öti Pirena

(Marko 2.23-28; Arókasi 6.1-5)

12 Mapaõti atoko tomatiko õtisaaki, Xesosi imoianariakorikata napaãpota triko takikoãtaã. Inatxitana. Inapaãpotakasaakina, imaktxakarona triko iki mapaki inikinirona ĩkapani. ² Pariseoakori ikara itikasaaki, itxarina Xesosi:

—Patamata. Pimoianariakori kamari ate mauritakinini. Ninoa parĩkauata tomatiko õtisaaki —itxana.

³ Ininiã Xesosi:

—Atxiĩti kona hãtatsopatapanikari Taviini kamakiti imoianariakorikata kitxakapirĩka inatxitakasaakina? ⁴ Iua ĩroã Teoso misãkiretikoãtaã. Imoianariakorikata inikari komiri Teosomoni sikakori. Sasetotxinokara auiritaãka iua komiri inikinina. Apanakini !auiritaãka inikiniri. Iuaritika ninoa sasetotxiakori tiretari Taviini, imoianariakori pakini inatxitakasaakina. ⁵ Atxiĩti kona hãtatsopatapanikari Moisesini iõkatsopatakiti. Iua auiritari sasetotxi parĩkauatini tomatiko õtisaaki, Teoso misãkiretiko aikotiã. Iuasaaki ninoa !ikamari maerekati, kotxi iparĩkauatana Teoso misãkiretiko aikotiã. ⁶ Atão nisãpiretai, hĩte paniãtakiti poiãori. Nota paniãtakiti apiari. ⁷ Teoso sãkire iteene hãuikasaaki, kona hãpoĩtana kãkiti maxikatĩka, kotxi Teoso sãkire txari:

Nota nirekari apanakini hĩtoretini. Pimatiretakanisaakiri äti, !apakata pisikarauatini notamoni. Iuasaaki kona ninirekari pisikakiti, itxa Teoso kitxakapirĩka.

⁸ —Nota hĩtari iaxitikiri posotari ininipoko ninireẽkiti nikamini tomatiko õtisaaki, kotxi Apiananiri nitxaua —itxa Xesosi.

Motĩkauakotakari Pirena

(Marko 3.1-6; Arókasi 6.6-11)

⁹ Xesosi ikara inaãka atoko, isa aiko Xoteoakori apotitiniãtaãua. ¹⁰ Iuaã aua kiki motĩkauakotakari. Iuaã aua apaka pariseoakori Xesosi kinirão apoĩtaka inakani tomatiko õtisaaki iparĩkauatini xika. Ninoa amanaãri Xesosi:

—Atauako apakata atxiĩti tomatiko õtisaaki, erekape pitxĩkitakiniri kãkiti? —itxarina.

¹¹ Ininiã Xesosi pimaãna:

—Hĩpira soti auĩte tomatiko õtisaaki aariko ãki irikiniã, himaktxakatarĩ? Atãopitikara Teoso sãkire auiritapitikari kãkiti makatxakiniri ipira tomatiko õtisaaki. ¹² Soti auĩte poiãori, kãkiti apiari. Ininiã Teoso sãkire auiritapitikari tomatiko õti erekape nitxĩkitakiniri kãkiti —itxa Xesosi.

¹³ Ininiã itxari kiki motĩkauakotakarimoni:

—Poerekauakotauako —itxa.

Oerekauakotakasaakiua, erekapeka itxa, ipini uako atokopeka itxa. ¹⁴ Iuasaaki pariseoakori sipeka atoko, ninoakakarika misãkiretakakauana:

—Natokopa atxatari Xesosi aõkini? —itxakakana.

Nitiritxi Teoso Mereẽkiti

¹⁵ Xesosi imarotakasaakiri ninoa okaenetiniri iua, iuasaakipeka Xesosi sipeka. Itomaneri kãkiti sa iuakata. Ikinika amianatakani erekapeka itxĩkitaka. ¹⁶ Xesosi laurritana isãpiretinirina ikamakiti apanakinimoni. ¹⁷ Ikara atoko itxa Xesosi, Teoso sãkire sãpiretakari Isaía inakori sãpiretakiti iaõka apokini ĩkapani. Ia atoko itxa Teoso Isaíamoni:

¹⁸ Ia ninitiri nimereẽkiti. Ia nitiretakiti napokaerekatakiti. Nota sikariko Erekarĩ Matamatakoti iuamoni. Iua sãpiretariko nota sãkire Xoteo minakonimoni.

¹⁹ !Kataparasãkireri ahoa kimaporiti ĩtiniãpo isãkirauatakasaaki. !Ineenamauata. !Itxitakaka apanakinikata kãkiti napiniãtaã.

²⁰ Apanakini Teoso sãkire auĩãkani oiõkapeta ãkixinireẽna. Itapara !uari. Ninoa aanaia katxitoãkori atoko itxana. Iuaritika kona imapirinikari iua aanaia katxitoãkori. Iua atokokana kona ixipokari iua sãkire auĩãkani mataparani. Itiretana. Apanakini Teoso sãkire auĩãkani, kona iteene auikari Teoso sãkire. Ininiã ninoa tirikapi iopinikare xapitikiri atoko itxana, iuaritika kona iua oakari. Iua atokokana kona ixipokana Teoso sãkire auĩãkani. Ikamaãpotari erekari, erekarinoka kãiatini ĩkapani.

²¹ Xoteo minakanuia auikariko iua sãkire. Itxa Isaía sãpirena kitxakapirĩka.

Maerekani Matamatakoni Omitikini

(Marko 3.20-30; Arókasi 11.14-23)

²² Iuasaaki kãkiti anikari kiki maerekati matamatakoti auãtotakiti Xesosimoni. !Isãkirauata. Mõsiãreti itxaua iua, maerekati matamatakoti xika. Xesosi erekapeka

txĩkitakari iua. Iuasaaki kõsiãrepeka, kasãkirepeka itxa. ²³ Iuasaaki kaiõpokori kãkiti iuaã tsorĩkaãta. Ininiã ipi-maãkakauana:

—Atauako ia kiki aãuĩte Taviini apika mekanirikani? Atxiĩti Teoso iokanatakitikani? —itxana.

²⁴ Pariseoakori ikara ikenakotakasaakina:

—Konapitini. Maerekati matamatakoti auĩte Peosepoo inakori sikari iposotiire Xesosimoni maerekati matamatakoti omitikini ĩkapani —itxana pariseoakori.

²⁵ Xesosi imarotari ikara ixinikakitina. Ininiã itxa Xesosi:

—Kãkiti tixine auakani ninoakakarika inaiatakakiniãuana, ixipokakakauana. Iarikapenako. Iua atokokana kãkiti aapokoã auakani inaiatakakiniãuana, ixipokakakauanako. ²⁶ Iua atokokana Satanasi nitirakori, ninoakakarika inaiatakakiniãuana, ixipokako Satanasi tapara. ²⁷ Hĩte sãkire, Peosepoo sikari iposotiire notamoni maerekati matamatakoti nomitikini ĩkapani. Ininiã nota pimaã: “Kipa sikari posotiiretxi hĩte moianariakorimoni, maerekati matamatakoti omitikinina ĩkapani?” Himoianariakori sãpiretai: “Teosonoka sikari posotiiretxi maerekati matamatakoti omitikakanimoni.” ²⁸ Teoso posotiireẽ nomitikari maerekani matamatakoni. Ikara atoko ininiã, Teoso oerekai iua apokapeka hĩtemoni hãuĩte inini ĩkapani.

²⁹ —Kiki pataparari iua aapoko auiniã, kona kĩtiriri ĩroã ĩtiriatini ĩkapani. Kĩtiriri iaxirikiniãri iua kiki pataparari, iuasaakiika apakata ĩtirĩkiniri itii.

³⁰ —Notakata maparĩkauatakani omanatano nota. Imamoianatakaniãno, inirekari niparĩka ixipokini.

³¹ —Ininiã nisãpiretai. Apakata Teoso makatxakiniri ikinipoko maerekati kãkiti kamakiti, imaerekani Teoso imisãkirepiretini pakini. Txamari Erekarĩ Matamatakoti misãkirepiretakari maerekani makatxakiko kona auari.

³² Kãkiti misãkirepiretiniãno nota hĩtari iaxitikiri, eereka amanainiãri Teoso ikara imaerekani imaktxakini, ininiã Teoso makatxakapitikari. Kãkiti misãkirepiretiniãri Erekarĩ Matamatakoti, !kimaktxakikori ikara maerekati ikamakiti —itxa Xesosi.

Aamina Iri Pirena

(Arókasi 6.43-45)

³³ Ininiã Xesosi sãkirauata iuaĩkana pariseoakorimoni:

—Aamina atoko hĩtxa. Aamina erekari ininiã, iri erekari apaka. Aamina maerekati ininiã, iri apaka !erekari. Patamatiniãri amãtiiri, pimarotari imina. ³⁴ Nimarotai hĩte. Imini kãsiiri atoko hĩtxaua hĩte. Hĩte maerekati kamakanii. Ininiã !hĩposotari erekari hĩsãpiretini, kotxi hãkixinire !erekari. Hinamaã hĩsãpiretakiti hãkixinireẽ potoriãkari itxaua. ³⁵ Kãkiti erekari ininiã, erekarinoka isãkire, kotxi iua ãkixinireẽ erekarinoka aua. Kãkiti maerekati ininiã, isãkire maerekati apaka, kotxi maerekatinoka auari iua ãkixinireẽ. ³⁶ Atão nisãpiretai hĩte. Ikinipoko kãkiti sãkire Teoso atamakaerekata xipokatxi õtisaaki. Iuasaaki Teoso mereẽri kãkiti misiritiko. Maxikatĩka hĩsãpiretakiti kona apakata. Kona iua potxitari. Ininiã iuasaaki

iua pimaäi: “Kinirepa ikara atoko pisäkire?” itxako.
³⁷ Pisäkire ereka ininiä, ixika lauari Teoso misiritinii.
 Pisäkire maerekati ininiä, pisäkire maerekati xika
 Teoso misiritai —itxa Xesosi.

Pariseoakori Nirekari Xesosi Oerekiniri Iposotiire

(Marko 8.11-12; Arókasi 11.29-32)

³⁸ Ätikaka kaiðkatsoparerini, pariseoakori pakini
 txari:

—Koerekareri, takaðtxikari Teoso posotiire po-
 erekaua ate, aätamatiniri ïkapani, Teoso iokanatinii
 ïkorapokoriti aimarotini ïkapani —itxarina.

³⁹ Xesosi apakapapiretana:

—Käkiti uatxarini lerekana. Itakanaparina Teoso.
 Hïte nirekari noerekinii Teoso takaðtxikare, iposotiire.
 Konapitini. Kona noerekai hïte. Kitxakapirïka Teoso
 säkire säpiretakari Xonasini inakori auakasaaki, Teoso
 kamari posotiiretxi. Ikara atoko inakari posotiiretxi
 Xonasini auakasaaki, iuaïkana ikamapanikariko. Iua
 posotiiretxi Teoso takaðtxikare itxapanikaua hïte ïka-
 pani. Iua takaðtxikarinoka Teoso takaðtxikare hïte ïka-
 pani. ⁴⁰ Xonasi kaikota ximaki mitari tikako äki ipi äti
 pakini öti. Iua atokokanerako hïtari iaxitikiri napako ipi
 äti pakini öti ipïkani auiniätaä.

⁴¹ —Itixi xipokini ötisaaki, käkiti Nïnivi sitatxiti
 auakani säkirauatapitikako. Ninoa txai hïte: “Kona
 erekai hïte, kotxi !hïtakanapari himaerekani. Ate
 takanapari amaerekani Xonasi säkire akenakotakasaa-
 ki,” itxanako ninoa. Uatxa uai aua hïte apisatoö Xonasi
 apiatakari. Imisäkiretai hïte, iuaritika kona !hïtakan-
 pari himaerekani.

⁴² —Xipokatxi ötisaaki, sito Sapaa auakani auïte säki-
 rauatapitikako. Oa ötakoxiti auakaro, iuaritika osari
 Saromäomoni imatire okenakotini ïkapani. Uatxa
 apopeka Saromäo apiatakari, iuaritika hïte !auikari no-
 ta säkire —itxa Xesosi.

Maerekati Matamatakoti Kanapiriini Pirena

(Arókasi 11.24-26)

⁴³ Iuaïkana Xesosi säkirauata:

—Maerekati matamatakoti kiki auaïtotakiti takana-
 pakasaakiri iua kiki, iua maerekati matamatakoti
 säöpota äparaä makipakaniätaä, ikaiкотiniätaä initini
 ïkapani, txamari !apokari. ⁴⁴ Ininiä itxa: “Nikanapir-
 iäpiriko mitxi nauinimoni nipotorikinimonikari,” itxa
 iua maerekati matamatakoti. Ininiä ikanapiriä.
 Apokasaaki, äti iuaä auakari !auari. Oeretapeëkaika.
 Iposope äti auini ïkapani. ⁴⁵ Ininiä apana apikomoni
 setxi pakini maerekani matamatakoni apia maerekani-
 takani. Imakinikana aua iua kiki ïtoä. Ininiä iua kiki
 mitxi poiäoka imaerekani, eereka apia maerekanita.
 Ikara atoko itxako käkiti uatxarini maerekani —itxa Xe-
 sosi.

Xesosi Inoro, Itariakori Pakini

(Marko 3.31-35; Arókasi 8.19-21)

⁴⁶ Xesosi säkirauata itomane käkitimoni, inakasaaki
 oäpoka inoro, itariakorikata. Iporikiti auana. Ipïkapire-
 tarina. ⁴⁷ Ininiä äti txari Xesosi:

—Pinoro, pitariakori ikiraä iporikiti auana. Inirekaka-
 rina imisäkiretinii pite —itxa.

⁴⁸ Ininiä Xesosi:

—Keropa ninoro? Kiripa nitariakori? —itxa Xesosi.

⁴⁹ Ininiä imioakari imoianariakori:

—Hätamata. Uai aua ninoro, nitariakori pakini. ⁵⁰ Niri
 iaxitikiri nirekaäkiti kamakanira, ninoara nitariakori, ni-
 taroakoro, ninoro txaua —itxa Xesosi.

Katakareri Pirena

(Marko 4.1-9; Arókasi 8.4-8)

13 Iua ötisaaki Xesosi takanapari iua aapokotxi.
 Ipoa tiniä isa. Iuaä ipoa tiniä iitopäka. ² Iuaä aua-
 na itomaneri käkiti. Apotiitauana iua takote. Ininiä
 kanaua äki iereëtaua, topäka itxa oerekarauatini ïka-
 pani. Ninoa kaikota imiriï. ³ Ininiä itori säpirenatxi atäo
 inakari oerekiko isäpiretana ninoa Teoso imarotiniina
 ïkapani.

Ia atoko itxa:

—Katakareri potorika itakarauatini ïkapani. ⁴ Takari
 iki itakaäpotakasaaki, okaäpotakasaaki, ätikaka irika
 kimapori tiniäpo. Kotipiriki apoka. Inikari imakinika.
⁵ Apanakini irika kai auiniätaä. Poiäoka kipatxi auari,
 ininiä mokatanitika ipitxaka. ⁶ Txamari, atokatxi pap-
 atakari inakasaaki, arikari iua takari. Otxiaroka, kotxi
 kona kakotsari. ⁷ Apanakinipekana irika aanaia auiniä-
 taä. Ininiä aanaia aneë takari takote. Aäpitsa
 iapinokari takari, oka txari. ⁸ Apanakinipekana irika
 kipatxi erekariätaä. Ininiä iriuata. Ätiätaä äti takari iriu-
 ata seï oki pakini. Ätiätaä takari iriuata sesëta oki paki-
 ni. Ätiätaä äti takari iriuata trïta oki pakini. ⁹ Kake-
 nakokii, ininiä hïkenakotariko nisäkire —itxa Xesosi.

Käkiti Mimarotakiniti Xesosi Säpiretini Pirena

(Marko 4.10-12; Arókasi 8.9-10)

¹⁰ Imoianariakori apoka Xesosimoni. Ipimaärina:
 —Kinirepa säpirenatxi atäo inakari oerekiko pisäpire-
 tari käkiti? —itxarina.

¹¹ Ininiä Xesosi:

—Käkiti xinikiniäri Teoso auïtetxi ininiäua pirena,
 auapitika kaiäopokori ninoa mimarotakiniti, kotxi
 Teoso kona oerekana ninoa. Teoso oerekai hïte ninoa
 mimarotakiniti. ¹² Teoso säkire auakiti, iua säkire kïpi-
 takari, Teoso sikari apikomoni imaroretxi iuamoni. Tx-
 mari Teoso säkire kenakotakari, isäkire makïpitakati,
 imarore xapiti iuamoni auakari makatxakaäkako.

¹³ Nisäkirauatakasaaiki käkitikata, nisäpiretana säpire-
 natxi atäo inakari oerekiko, kotxi kokiri käkiti, iuaritika
 !atamatari Teoso kamakiti. Kakenakokiri käkiti, iuariti-
 ka limarotari Teoso säkire. ¹⁴ Ininiä apokapeka Isaïa
 säkire kitxakapirïka, kotxi iua säpiretari Teoso säkire:

Hīkenakotapiikamari nisākire, iuaritika !himarotari.

Hītikapiikamari nikamakiti, iuaritika !himarotari,

¹⁵ kotxi !hinirekari himarotiniiri atāo inakari.

!Hinirekaikari nisākire hīkenakotini. !Hinirekaikari nika-
makiti hātamati. Hinirekaākamari, hātamata-
mariko nikamakiti. Hinirekaākamari, hīkenakota-
mariko nisākire. Hinirekaākamari, himarotamariko
nisākire. Hīkanapiriaākamako notamoni, nimaktxaka-
mariko himaerekani,
itxa Teoso.

¹⁶ —Hītepekana, Teoso sikari erekari hītemoni, kotxi
hōki atamatapitikari iua kamakiti. Hīkenakoki kenako-
tapitikari iua sākire. ¹⁷ Atāo nisāpiretai. Itomaneri
Teoso sākire sāpiretakani, apanakini kiki atāo inakari
kamakani pakini kitxakapiriāka nirekari atamatiniri hīte
atamatakiti, txamari kona atamatarina. Inirekarina ike-
nakotinirina hīte kenakotakiti, txamari kona ikenakota-
rina —itxa Xesosi.

Katakareri Pirena Oerekiko

(Marko 4.13-20; Arókasi 8.11-15)

¹⁸ Xesosi sākiraunātapanika:

—Hītakaōtxikari ikara sāpirenatxi atāo inakari
oerekiko, katakareri pirena. Noerekai ikara. ¹⁹ Kākiti ke-
nakotakasaakiri Teoso auītetxi ininiua pirena, imimaro-
takaniāri ikenakotakiti, kimapori kākiti katxaratakiti
ikotaxiti atoko itxa iua ākixinire, kotxi Satanasi apoka
iuamoni. Imaktxakari Teoso sākire iua ākixinireē
apokakari. Teoso sākire takariki atoko itxa.

²⁰ —Takariki kai auiniātaā iriākari, Teoso sākire ipox-
okoniritika apakapakari atoko itxa. ²¹ Itxama kona
okanani aua, kotxi kona kakotsari. Omanatiko in-
akasaaki, inapetiko inakasaaki, Teoso sākire auikini xi-
ka, itakanapari Teoso sākire auikini.

²² —Āti kākitipekana kenakotari Teoso sākire, txamari
ixinikapikari tiitxi, nipokori, iparīka pakini. Ikinipoko ix-
inikapika, ininiā maerekaxiniretinoka itxa. Txineiro
ipotxitini xika !hinirekaikari Teoso sākire. Takariki aanaia
auiniātaā iriākari atoko itxa iua. Takari mariti atoko
itxa iua ākixinire.

²³ —Āti kākitipekana ikenakotakasaakiri Teoso sākire,
atāo iua auikari. Iua ākixinire kipatxi erekari atoko itxa.
Takari mininiua atoko, iua kākiti minari atxiīti seī pakini
kākiti Teosomoni isākire auikinina īkapani. Atxiīti imi-
nari sesēta pakini kākiti. Atxiīti iminari trīta pakini kāki-
ti Teosomoni isākire auikinina īkapani —itxa Xesosi.

Katsotati Ahoisi Atoko Inakaro

²⁴ Iuaīkana Xesosi sāpiretari āti sāpirenatxi atāo in-
akari oerekiko. Ininiā ia atoko itxa:

—Teoso auītetxi ininiua ia atoko itxa. Teoso
katakareri atoko itxa. Iua katakareri takari erekari
takariki ikikioteē. ²⁵ Āti īkanōkati ikinimane imakasaaki,
imokaiakari apoka. Itakaro katsotati ahoisi atoko in-
akaro ahoisi sauaki. Kona !otxa. Iposo atoko īkorape
itxa. ²⁶ Takari aneēka atoko, oriuta. Iuasaaki kākiti
imarotapekari katsotati ahoisi atoko inakaro auapeka.
Kona otxa. ²⁷ Ininiā katakareri nitiriakori apoka iauite-

monina. “Auītetxi, pite takaro takariki erekaro. Nanipa
oina katsotati?” itxana ninoa.

²⁸ —“Amokaiakari takari,” itxa.

—“Pinirekatari amaporokiniri?” itxana initiriakori.

²⁹ —“Kona. Katsotati himaporokiniā, atxiīti hima-
porokaro nitakare apaka. ³⁰ Hītakanapari imakinika
aneinina īkapani. Oamikosaakirako, omaktxakaāka.
Ininiā iuasaakiko nipaniātaiko hīte: ‘Merepanika hi-
maktxakaroko katsotati. Hāpotiitaro. Xaminamoni
oka inaākako. Iposo atoko hāpotiitari ahoisi. Hītakari
nikiena nīkatiko aikoti āki.’”

Mostata Pirena

(Marko 4.30-32; Arókasi 13.18-19)

³¹ Iuaīkana Xesosi oerekari āti sāpirenatxi atāo in-
akari oerekiko. Ininiā ia atoko itxa:

—Teoso auītetxi ininiua, kiki takinoro mostata iki
ikikioteē atoko itxa. ³² Mostata iki axapitiki. Apanakini
takariki apiata, iuaritika oaneēka atoko amananiikaro.
Aamina otxaua. Ininiā kotipiriki ina. Ikamari ikoa
okatiā —itxa Xesosi.

Tirekakari Pani

(Arókasi 13.20-21)

³³ Xesosi iuaīkana sāpiretari sāpirenatxi atāo inakari
oerekiko. Ininiā ia atoko itxa Xesosi:

—Teoso auītetxi ininiātaāua īkorapokoriti ia
atokokana itxa. Sito kosekari tirekakari pani. Okoketari
axapiti tirekakari pani kaiōpokori triko panikata,
āparaākata. Eereka ikinika ipe tirekaāpota otxa.

Sākiretxi Atāo Inakari Oerekiko

(Marko 4.33-34)

³⁴ Xesosi sākirauatakasaaki kākitikata, isāpiretari
sāpirenatxi atāo inakari oerekiko. Ikara sāpirenatxi-
nokara isāpiretari kākiti. ³⁵ Ininiā kitxakapiriāka Teoso
sākire sāpiretakari sāpiretakiti apokapeka, kotxi iua
txari:

Nisākirauatakasaaki kākitikata, nisāpiretari sāpire-
natxi atāo inakari oerekiko. Itixi kamikosaakipanika
aua kākiti mimarotakinini. Ikara noerekako kākitimoni,
itxa Teoso sākire.

Xesosi Sāpiretari Katsotati Pirena

³⁶ Eereka Xesosi takanapana ninoa kākitipokoni. Iīroā
aapokotxi. Imoianariakori apoka iuamoni. Itxana:

—Poerekaua ate ikara sāpirenatxi atāo inakari
oerekiko, katsotati pirena, mixikanani pisāpiretakiti.
Ate !imarotari —itxana.

³⁷ Ininiā Xesosi:

—Hītari iaxitikiri, iua erekari oki taākari itxaua. ³⁸ Itixi
iua kiki atoko itxa. Teoso auītetakani takariki erekari
atoko itxana. Kākiti Satanasi nakitiakori iua katsotati
atoko itxana. ³⁹ Katsotati takakari Teoso nakitiakori
mokaiakari itxaua. Satanasi itxaua. Itixi xipokini ōti iua
takari amiko ōti atoko itxa. Teoso nitiriakori iaxitikini
ninoa takari amakani atoko itxana. ⁴⁰ Iua katsotati

apotiitaãka, xaminamoni oka inaãka. Iua atokotxikana inaãka itixi xipokini õti. ⁴¹ Hĩtari iaxitikiri iokanatanako initiriakori itiximoni. Apotiitarinako maerekati oerekakani. Apotiitarinako ikinimane maerekati kamakani. ⁴² Iposo atoko Teoso nitiriakori okana ninoa xaminamoni. Iuaã iteene itxiapatana. Akatsatsiriĩtauana. ⁴³ Iuasaaki atão inakarino kamakani aua iotximerena Teoso auĩtetxi ininiãtaãua. Atokatxi iotximere atoko itxa ninoa iotximere. Kakenakokii, ininiã hĩkenakotariko nisãkire —itxa Xesosi.

Txineiro Kipatakoru Pirena

⁴⁴ —Teoso auĩtetxi ininiua, txineiro itomanero kipatakoru atoko itxa. Oa txineiro kipataãka kikio. Āti õti kiki napaãpotakasaaki, apokaro, ininiã iuaĩkana ikipataro. Iteene ipoxokoniua, ininiã ivẽxitari ikinika itii, iua kikio iamotini ĩkapani. Eereka sa itxa iua kikio iamotini ĩkapani. Ikara atoko itxa Teoso auĩtetxi ininiua.

Pérora Inakori Pirena

⁴⁵ —Teoso auĩtetxi ininiua, pérora iamotakari atoko itxa. Iua nitari pérora apia erekari. ⁴⁶ Pérora iteene erekari apokiniã, ikinika itii ivẽxita iua pérora iamotini ĩkapani.

Hetxi Pirena

⁴⁷ —Teoso auĩtetxi ininiua hetxi ipoaã taãkori atoko itxa. Ikini sereti ximaki apotiita hetxi. ⁴⁸ Ixãpokasaaki kaiotaroriti kosekaãpotari itakoãmoni. Iuaã kaiotaroriti iitopãka. Imereẽrina ximaki. Ximaki erekari kotariã itaka. Kãkiti maniãkiniti mapara oka. ⁴⁹ Xipokatxi õtisaaki ikara atoko itxa. Teoso nitiriakori mereẽriko kãkiti. Mapara itakarina erekarini. Mapara itakarina maerekani. ⁵⁰ Ininiã xaminamoni okanako kãkiti maerekati kamakani. Iuaã itxiĩtana. Akerakitatsiriĩtauana, kotxi patsiiri.

Kitxakapiriĩka Oerekakori, Amaneri Oerekakori Pakini

⁵¹ Xesosi pimaãna imoianariakori:
—Hĩte imarotatari ikara atoko inakari nisãpiretakiti?
—itxa.

—Ari, aimarotapitikari —itxarina.

⁵² Ininiã Xesosi:

—Kaiõkatsopareri oerekikosaaki Teoso auĩtetxi ininiua imarotini ĩkapani, imarotari amaneri oerekakori, apaka kitxakari oerekakori. Kaapokori atoko itxa. Iua kaapokori makatxakari apokaerekatakiti mareta ãki inĩkatakiti. Amaneri, kitxakari apaka imakatkaka.

Nasaree Auakani Kona Auakari Xesosi Sãkire

(Marko 6.1-6; Arókasi 4.16-30)

⁵³ Ikara sãpirenatxi atão inakari oerekiko ixipokapiretaka atoko, Xesosi sipe. ⁵⁴ Ikanapiriã Nasaree sitatxiti-moni. Ininiã oerekarauata aiko Xoteoakori apotiitiniãtaãua. Ininiã kãkiti tsoriãkaãta isãkire ikenakotakasaakina. Itxana:

—Kiripa sikatari iua imarore? Kiripa sikaposotiiretari iua? ⁵⁵ Aapokotxi kamakari ãkiri iua. Inoro Maria. Itariakori Txiako, Xoão, Simão, Xotasi pakini. ⁵⁶ Itaroakoro uai apaka aua. Nanipa apaiaõkari ikinika imarore? —itxana.

⁵⁷ Ininiã kona inirekarina iua. Ininiã Xesosi txari:

—Teoso sãkire sãpiretakari paxitaãka, txamari Teoso sãkire sãpiretakari itixineẽ auakasaaki, inirimane sauki auakasaaki, ĩpaxitaãka. Isãkire !auikaãka —itxa Xesosi.

⁵⁸ Ininiã Xesosi kona kamari itori Teoso posotiire iuaã Nasaree sitatxiti auakani ĩkapani, kotxi kãkiti iuaãkini !auikari isãkire.

Xoão Kapatxisareri Ipinini Pirena

(Marko 6.14-29; Arókasi 9.7-9)

14 Iuasaaki Erotxi Kariréia auakani auĩte txaua. Iuasaaki ikenakopiretari Xesosi pirena. ² Iuasaaki itxana initiriakori:

—Iua Xoão kapatxisareri ipĩpekariika õkitapekaua. Iuakara Xesosi txaua. Ininiã uatxa apiata iposota ikamini —itxa Erotxi.

Txamari Xesosipitikara. Kona Xoãoni iua. ³ Mitxi Erotxi paniãtari Xoão kapatxisareri iaxirikiko, itari Piripi ĩtanoro xika. Ouãka Erotxia. Oomanatari Xoão, ininiã itakaãka kateia ãki. ⁴ Mitxi Xoão kapatxisareri txari Erotximoni:

—Kona erekari pitari ĩtanorokata pisiĩkini. !Apakata pikamakiti —itxa.

⁵ Ininiã Erotxi nirekamari okiniri Xoão, iuaritika kona okari, kotxi ipĩkana Xoão sãkire auiãkani. Ninoa uãkatari Xoão, Teoso sãkire sãpiretakari ininiua.

⁶ Erotxi kamari kiiniri auini õti pirena. Erotxia ãkero serena iua Erotxi apisatoõ, ikemaĩtxitakini apisatoõ pakini. Ininiã oserenini kamari ninoa poxokoniuatini.

⁷ Ininiã Erotxi poxokoniuatakasaaki itxa:

—Nisikai imakinika pinireẽkiti pitemoni —itxaro oa.

Ininiã osari onoromoni. ⁸ Onoro nirekari Xoão okiko, ininiãkara oamanaãri Xoão kii prato nopini. Ininiã otxari Erotximoni:

—Xoão kapatxisareri kii ninireka prato nopini.

⁹ Ininiã Erotxi kona erekaxinireri. Kipa ikama? Kotxi ikinimane ikemaĩtxitakini kenakotari isikaenetiniri oa nirekakiti oamoni. Ininiã iua paniãtari oa nirekakiti sikiko oamoni. ¹⁰ Ininiã iua iokanataru sotateakori kateiamoni Xoão kii tsotakiko ĩkapani. ¹¹ Ininiã ninoa minari ikii prato nopini. Isikarina oamoni. Oa sikari onoromoni. ¹² Eereka Xoão moianariakori sari kateiamoni. Ninoa anikari ĩto akauarimoni. Iuaã ikatarina. Eereka ninoa sari Xesosimoni. Isãpiretarina Xesosi Xoão ipinini pirena.

Sĩko Mio Kãkiti Xesosi Sikakienatini

(Marko 6.30-44; Arókasi 9.10-17; Xoão 6.1-14)

¹³ Xesosi kenakopiretakasaakiri Xoão okiko, ipotorika kanauaã. Ātiãtaã iuanani auini nire isa, txamari ito-maneri kãkiti imarotari Xesosi sinimoni. Ininiã itakana-parina sitatxi. Isana imiriĩ iua sinimoni. ¹⁴ Iua kanĩkĩ-

takasaaki, atapari kākiti apokaāpotini. Ininiā iua amoniākana ninoa. Imakananitana amianatakani.

¹⁵ Mapiāpeka inakasaaki, imoianariakori apoka iua-moni. Itxarina:

—Mapiāpeka. Uai aapokotxi mauakaniātaā, ininiā uai nipokori lauari. Piokanataru kākiti aapokotximoni, ininiā iamotarina nipokori iuaātaā —itxana imoianariakori.

¹⁶ Xesosi apakapapiretana:

—Nota kona iokanatanana isinina. Hitekarako sikakientatana ninoa —itxa Xesosi.

¹⁷ Ininiā ninoa:

—Komiri ipi ipi āti pakininokara aua atemoni. Ipi ximaki apaka aua. !Apakata —itxana.

¹⁸ Ininiā Xesosi:

—Himina uai notamoni —itxa.

Ininiā imoianariakori minari Xesosimoni. ¹⁹ Eereka iua paniātari kākiti xiti topākini. Eereka ikosekari komiri siko, ximaki ipi pakini. Ininiā iua ionakaāta iaxiti. Itxari:

—Niri pisikakiti peerekari —itxa.

Ininiā imaxinikaāpotari. Isikaāpotana imoianariakori. Ninoa sikaāpotana kākiti. ²⁰ Ikinikana nipokota. Ikinimane:

—Kamitopekaua ate —itxana.

Eereka imoianariakori apotiitari itetakori. Ininiā xāpokaka itxarina tosi kotari. ²¹ Iuasaaki siko mio kikiākini nipokota. Sitoākini, amarini pakini nipokota apaka.

Xesosi Ipoa Nopini Itipokotini

(Marko 6.45-52; Xoāo 6.15-21)

²² Eereka ipaniātana imoianariakori kanauaā iereētiniua iua apisa ipiriātinina itapani. Ninoa sipeka. Iua kaikota kākiti itakapiretini nire. ²³ Kākiti itakapiretanapaka atoko, Xesosi sari oxiratarimoni, Teoso imisākiretini nire. İkanōkapeka inakasaaki, iuanani iuaā aua.

²⁴ Iuasaaki kanaua ipoa apanikakiāpeka. İtima apiākatara kanaua. Ininiā tsakati iteene apoākata.

²⁵ İmaropiriakatpeka inakasaaki Xesosi sari ninoamoni. Itipokota ipoa nopini. ²⁶ İmoianariakori atapakasaakiri Xesosi ipoa nopini itipokotini, ninoa pīkarauata.

—Kamiri napani —itxana.

Akiripoakatana. ²⁷ Iuasaakipeka Xesosi:

—Kataparaxinire hitxako. Notara. Kona hīpīkarauatape —itxa.

²⁸ Ininiā Petro sākirauata:

—Apiananiri. Xesosi pininiāua, pipaniātano pitemoni napokini ipoa nopini —itxa Petro.

²⁹ Ininiā Xesosi:

—Uai pina —itxari.

Ininiā Petro katxaka. İpotorika ianini ipoa nopini Xesosimoni isini. ³⁰ Txamari kataparari itimati itikasaaki, ipīkarauata, ininiā ipatapiā itairakaāpota. Ininiā iua akirikata:

—Apiananiri. Pimaikano.

³¹ Iuasaakipeka Xesosi maikari iua. Itxari:

—Poiāoka pauikari niposotiire. Kinirepa kona atāo pauikari? —itxa Xesosi.

³² Iuaikana morōkoka itxauana kanaua āki. Iuasaaki itima iotoka. ³³ İmoianariakori kapotoreēkaua Xesosi apisatoō:

—Apiananiri pitxaua. Atāopitikara Teoso ākiripitikarai —itxana.

Xesosi Makananitana Amianatakani Xenesareekini

(Marko 6.53-56)

³⁴ İpoa ipiriātana, Xenesaree tōpamoni apoka itxana.

³⁵ Iuaā kākiti imarotari Xesosi, ininiā iokanapireta kākiti ninoa tixine takote auakanimoni:

—Amianatakani himina.

Ininiā kākiti minari itomane amianatakani Xesosimoni. ³⁶ Amianatakani amanaāri Xesosi:

—Pauiritaua pimāka mapotomatare atakapiotini —itxana.

Ikinimane imāka takapiotakani makananitaāka.

Xoteoakori İikite Pirena

(Marko 7.1-13)

15 Iuasaaki pariseoakori, kaiōkatsopareriakori pakini apoka Xesosimoni. Xerosareekini ninoa. İpimaārına Xesosi:

² —Kinirepa pimoianariakori kona kamari aātokiriakorini sākire iaōka, kotxi inipokotakasaakina, kona arokauakotauana —itxana.

³ Ininiā Xesosi apakapapiretana:

—Hitepekana, kinirepa kona hite kamari Teoso sākire iaōka? Hite kamari hōereēkitinokara, ⁴ kotxi Teoso txari: “Pipaxitariko piri. Pipaxitaroko pinoro.” Apaka Teoso txari: “Piri, pinoro pimisākirepiretiniā, pokaākako.” ⁵ Txamari hite oerekari kākiti: “Kākiti auakiti iri, inoro pakini nirekiniā, iua manirekakaniāri isikiniri ninoamoni, isāpiretana: ‘İa nota auakiti nisika Teosomoni.’” Ininiā İisikari ninoa nirekakiti ninoamoni.

⁶ Ininiā hite oerekari kākiti mapaxitananina iri, inoro pakini. Ininiākara hite sākire hōereēkiti kipatari Teoso sākire. ⁷ Hite txari: “Akamapitikari Teoso sākire iaōka,” txamari kona hite kamari. Atāopitikara İsaía sākire kitxakapiriika. Iua sāpiretari Teoso sākire hite pirena. Teoso txari:

⁸ Kamisirienererini ninoa kākiti. Ninoa sākireēnanira ipaxitanona. Ākixinireēna İnirekanona.

⁹ Maxikatika ninoa kapotoreēkaua nota apisatoō. Maxikatika ninoa txano: “Ateosone pitxaua,” kotxi ninoa İoerekari nota sākire. Ninoaka sākire oerekana, txamari “Teoso sākire asāpiretai” itxana.

İtxa Teoso İsaíaamoni kitxakapiriika —itxa Xesosi.

Ākixiniretxi Txiko Pirena

(Marko 7.14-23)

¹⁰ Xesosi akiritana kākiti, ininiā itxana:

—Hikenakota himarotini itapani. ¹¹ Nipokori, pıixirākakiti kona kamatkotari pākixinire. Pisākire maerekati, pinamaā potoriākari, iuara txikotapitikari pākixinire —itxa Xesosi.

¹² Iuasaaki Xesosi moianariakori apoka iuamoni. Itxarina:

—Pimarotatari pariseoakori !apokaerekatari ikara pisäkire ninoamoni?

¹³ Ininiä Xesosi:

—Käkiti takari atoko itxa. Ininiä ikinika takari niri iaxitiki mataäkiniti maporokaäkako. ¹⁴ Kona himaäkatapena pariseoakori. İkiikakani mösiäreni atoko itxana. Mösiäreni mikiikiniäreni mösiäreni, ikinipoko irikako aariko äki. Iua atokokana maerekati ötäkikiniäreni maerekati, imakinika ninoa sari imisiritikoötaä —itxa Xesosi.

¹⁵ Ininiä Petro:

—Poerekaua ate ikara säpirenatxi atäo inakari oerekiko. Ate !imarotari —itxa.

¹⁶ Ininiä Xesosi:

—Hıte apanakini atoko hıtxa atxiiti? Kona himarotapanikari? ¹⁷ Himarotari. Nipokori hinamaä hıxiräkakiti hıtikakomoni isa. Eereka hıtikatakasaaki, inapa.

¹⁸ Hısäkire hinamaä pokıkarari potorika häkixinireë. Iuara txikotari käkiti äkixinire. ¹⁹ Kotxi häkixinireë hıxinikakiti maerekati potorika. Okaniuatakatxi, äti käkiti İtanorokata sirıfıko nire, anokaretxi, İtiriuatatxı, misirieneretxi, äti misäkirepiretiko pakini potorika häkixinireë. ²⁰ Ikara atoko inakarinanira txikotari käkiti äkixinire. Käkiti marokauakotakanıua kona txikotari äkixinire —itxa Xesosi.

Xoteo Minakatoua Auikiniri Xesosi Säkire

(Marko 7.24-30)

²¹ Ikara atoko inaäka atoko Xesosi sipe. Isipeka Txıro, Sitoö pakini töpamoni. ²² Iuasaaki sito Kanaaäkero, iuaä auakaro, apoka Xesosimoni. Iteene oamanaäreni:

—Apiananiri, Tavii apika mekaniri, piamonıfıcano. Maerekati matamatakoti auaitotarö namarite. Iua iteene misiritaro oa —otxari.

²³ Txamari Xesosi kona apakapapiretaro oa. Imoianariakori apoka Xesosimoni. Itxana:

—Piokanataro, osipekako. Atemoni ätipirika öäkırıpoanäta —itxana. ²⁴ Xesosi apakapapiretaro oa:

—Niokanataäka İsaekini ninıkatini İkapani. Ninoa soti auıte pıpinanaäkani atoko itxana. Txamari pite kona İsaekero. Pite äto uäka —itxa.

²⁵ Iuaritika oa sito apoka iuamoni. Okapotoreëkaua iua apisatoö. Ininiä oa:

—Apiananiri, pımaakanitaro namarite —otxari.

²⁶ Ininiä Xesosi:

—İsaekini amarini atoko. Nota ninoa iri atoko. Kona erekari amarini komirite nimixirikini, anäpamoni nisikini İkapani —itxaro.

²⁷ Ininiä oa:

—Ari, atäöpitikara pisäkire. Anäpa atoko nitxaua, iuaritika anäpa nikari nipokori iriäkari kaapokori patapi koa —otxa.

²⁸ Ininiä Xesosi:

—Atäöpitikara. Sito, pite iteene auikari nıposotiire. Pinirekakiti nikamapitikako —itxaro.

Iuasaakipeka oimi erekapeka otxa.

Xesosi Erekapeka Txıkitakari Käkiti

²⁹ Eereka Xesosi sari Karirėia poatimoni. Iuaä oxıratari nopini topäka itxa. ³⁰ İtomane käkiti iuamoni apoka. Ninoa minari iuamoni käkiti mösiäreni, masäkireni, matıpokotakani, apanakini amıanatakani itomaneri pakini. Xesosi makananıtana ninoa. ³¹ Käkiti iuaä auakani tsorıkaäta, kotxi itıkarına Xesosi makananıtınına amıanatakani. Käkiti masäkireti säkırıratapeka. Käkiti matıpokotakati fıpokotapeka. Mösiäreni, kösiärepeka itxapeka. İkinımane txari: —Peerekari Teoso, İsaao auakani Teosone —itxana.

Xesosi Sikakienatana İpi İpi Pakini Mio Käkiti

(Marko 8.1-10)

³² Xesosi akırıtana imoianariakori. Itxana:

—Nota amonıfıcana naia käkiti. İpi öti, äti öti pakini notakata auana. Uatxa kona minakati kona auari inikinına İkapani. Kona nota iokanatana ninoa natxırıtıka, kotxi arikama ipıtaxıtıtamana, irıka itxamana —itxa Xesosi.

³³ Ininiä imoianariakori txari:

—Nanipa ate apokari nipokori komiri naia käkiti asıkakıenatını? —itxana.

³⁴ Ininiä Xesosi:

—Kıpakınıpa komiri aua hıtemoni? —itxa Xesosi.

Ininiä ninoa:

—Setxi komiri, ätikaka xımaki axapıtırı pakini —itxana.

³⁵ Ininiä Xesosi:

—Hıpanıätana käkiti xıtı topäkinı —itxa Xesosi.

³⁶ Eereka imaıfıkarı ninoa setxi komiri, xımaki pakini. İtxari Teoso:

—Erekapıtıkarı ia komiri, xımaki pakini pıte sıkakıtı.

Mapıxinıka itxari komiri, xımakıkata. Eereka xanakaäpota itxari imoianariakorımoni. Ininiä ninoa xanakaäpotari käkıtımoni. ³⁷ İkinıka nipokota. Kamıtıpeka itxana. Imoianariakori xäpokakari setxi kotari nipokori itetakori. ³⁸ İpi ipı pakini mio kıkıäkını nipokotapeka, apaka sıtoäkını, amarını pakını. ³⁹ Eereka Xesosi iokanatana käkiti aapokomonına. İposo atoko iereëtaua kanaua äki. Makataä töpamoni isa.

Teoso Takaötxıkare

(Marko 8.11-13; Arókasi 12.54-56)

16 Pariseoakori, satoseoakori pakini sari Xesosimoni. İnırekarına Xesosi kerokınırı, inınıä itxarına Xesosi:

—Takaötxıkari, Teoso posotiire poerekaua ate, aätaınatını İkapani, Teoso iokanatını İkorapokorıtı aimarotını İkapani —itxarına.

² Txamari Xesosi txana:

—Na noerekai. Mapiänıkata iaxıtı pökamararı inakasaaki: “Peereötıri katana,” hıtxa. ³ Iua atokokana İkanökapanıka iaxıtı pökamararı, piäkaxıtıta inakasaaki: “Äparaänapanı. Katapararı İtımatıpanı,” hıtxa. Himarotapıtıkarı takaötxıkari iaxıtı auakari. Txamari kona

himarotari Teoso kamanātakiti ĩkorakanani. Hīsākirau-atakasaaki, kākiti erekarini atoko hĩtxa, txamari maerekati hĩkama. ⁴ Kākiti uatxarini !erekana. Itakana-parina Teoso. Hĩte nirekari noerekinii Teoso takaōtxikare, iposotiire. Konapitini. Kona noerekai hĩte. Kitxakapirĩka Teoso sākire sāpiretakari Xonasi inakori auakasaaki, Teoso kamari posotiiretxi. Ikara atoko inakari posotiiretxi Xonasi auakasaaki, iuaĩkana ikama-panikariko. Iua posotiiretxi Teoso takaōtxikare itxapanikaua hĩte ĩkapani. Iua takaōtxikarinoka Teoso takaōtxikare hĩte ĩkapani —itxa Xesosi.

Iposo atoko Xesosi takanapana, sipe itxa.

Pão Tireēkari Pirena

(Marko 8.14-21)

⁵ Xesosi imoianariakorikata ĩpiriātari ipoa. Ipinia apokasaakina, imoianariakori xinikaro pão imaxinĩkaretakitona. ⁶ Iuasaaki Xesosi otākikana ninoa: —Erepaniko. Pariseoakori, satoseoakori pakini pãote tireēkari pamonōkoniri —itxana imoianariakori.

⁷ Ininiã imoianariakori misākiretakakaua:

—Pão amaxinĩkaretini xika Xesosi ikara atoko txaua ate —itxana imoianariakori.

⁸ Xesosi imarotari imisākiretakakiniuana, ininiã iua:

—Kinirepa himisākiretakakaua, pão himaxinĩkaretini xika? Kona iteene hãuikari ninĩkatinii. ⁹ Atauako kona kiĩkitepanikai hĩte? Atauako himaxinĩkaretapekari pão sikonoka siko mio kākiti nisikakienatini? Hĩxinikariko kipakinipa kotari hĩxãpokaka pão itetakoro? ¹⁰ Atauako kona hĩxinikatarĩ āti ōti ipi ipi pakini mio kākiti setxino-ka pão nisikakienatini? Hĩxinikariko kipakinipa kotari hĩxãpokaka pão itetakoro? ¹¹ Hĩte nõtākikasaaki: “Erepaniko. Pariseoakori, satoseoakori pakini pãote tireēkari pamonōkoniri,” ninakasaakii, kinirepa kona himarotatarĩ kona pãoni ikara atoko nitxai hĩte? —itxa Xesosi ninoamoni.

¹² Iuasaakiika imarotarina kona pão tireēkarini monōkori txaua. Imarotarina pariseoakori, satoseoakori pakini sākirera, ninoa oereēkitira, monōkori txaua.

Petro Auikari Xesosi Teoso Ākiri Ininiãua

(Marko 8.27-30; Arókasi 9.18-21)

¹³ Xesosi sari Sesaréia-Piripi sitatxiti takote. Iuaã ipi- maãna imoianariakori:

—Kipa kākiti uākatano nota hĩtari iaxitikiri?

¹⁴ Ininiã imoianariakori:

—Ātikaka uākatai Xoõoni kapatxisarerini iuaĩkana ōk- itikaua inakarii. Apanakini uākatai Eríasini iuaĩkana ōki- tikaua inakarii. Apanakinipekana uākatai Xeremiani iuaĩkana ōkitikaua inakarii. Minakanisaaki ātikaka: “Āti Teoso sākire sāpiretakarini iuaĩkana ōkitikaua inakarii,” itxaina —itxarina.

¹⁵ Ininiã Xesosi:

—Hĩtepekana, kipa hĩte uākatano nota? —itxana ni- noa.

¹⁶ Simão Petro apakapapiretari:

—Teoso mereēkitirai pite. Teoso mapĩkati ākirirai pite —itxari iua.

¹⁷ Ininiã Xesosi:

—Simão Petro, Xoõo ākiri, Teoso takari erekari pite- moni, kotxi kona kākitini sāpiretai Teoso ākiri nininiua. Niri iaxitikirira sāpiretai. ¹⁸ Nisāpirenauatapanika pite- moni. Piuãka Petro. Kai sorotxikana piuãka. Kai aapokotxiti kamakari mereēri kai kaikori xiti itakini ĩka- pani, aapokotxi iua kai nopini ikamini ĩkapani, ininiã aapokotxi ĩrika, kotxi kaikori nopini aua. Aapokotxi ka- makari takari kai kaikori xiti. Iua kai atoko itxa ikara Teoso sākire, isāpiretakiti pitemoni. Kākiti nota nakiti- akori naapoko atoko, ninoa sauaki nauini ĩkapani. Napotiinātapanikari kākiti naapoko ĩkapani. Satanasi tapara kona posotapaniri ixipokiniri ia naapoko. ¹⁹ Ni- paniãtai Teoso sākire pisāpiretini kākitimoni. Xavi nisikini atoko itxa ikara, kotxi kākiti auikasaakiri Teoso sākire ĩroã Teoso auĩtetxi ininiãtaãua. ĩkorapokoriti kākiti kamakiti pimauiritakaniã, Teoso tixine apaka !auritaãka. ĩkorapokoriti kākiti kamakiti pauiritiniã, apaka auiritaãka Teoso tixine —Xesosi txari Petro.

²⁰ Iposo atoko Xesosi:

—Teoso mereēkiti nininiua, apanakinimoni !kasāpire- na hĩtxapeko —itxana imoianariakori.

Xesosi Sāpiretari Ipinini

(Marko 8.31-9.1; Arókasi 9.22-27)

²¹ Iua otisaaki Xesosi potorika isāpiretinina imoianari- akori:

—Nisako Xerosareēmone. Iuaã kiomãtxiakori, kaiōkatsoparerini, sasetotxi auĩteakori pakini misiri- tanoko. Iposo atoko oka ninaãkako. Ipi āti otisaaki iuaĩkana nõkitikaãkako. Iuaĩkana aua nitxako —itxana.

²² Ininiã Petro misākiretari Xesosi iuanoka inakasa- ki. Itapararitika itxari:

—Konapitini, kona ikara atoko inakari kona auapani pitemoni, Apiananiri. Kona Teoso auiritapaniri ikara atoko piniko —itxari.

²³ Ininiã Xesosi kirioka Petromoni.

—Pisipiniikaua Satanasi. Nikimapore katokapareri atoko pitxa, kotxi pite nireēkiti kākiti nireēkiti atokotxikana. Pite nireēkiti kona Teoso nireēkiti atokoni —itxari.

Xesosi Moianari Atão Inakari

(Marko 8.34-38; Arókasi 9.23-27)

²⁴ Iposo atoko Xesosi misākiretana imoianariakori:

—Notakata kinirão sika pinakasaaki, piteka nireēkiti kona pinirekape. Notakata kinirão sika pinakasaaki, nota misiritiko atokokana pimisiritaãkako. Ia atoko pinirekaniã, notakata pisapitikako. ²⁵ Pite ātipirika kaminiãri pite nireēkitinoka, ininiã pinireēkiti xipokapi- tikako pitekata. Pite nireēkiti pimanirekakaniã, nota sākire pauikini xika, Teoso iokanapirena erekari pisāpiretini xika, pite auapininiika txako Teosokata. ²⁶ Atxĩti papakapari ikinipoko tiitxi, ikini itixiti auakani tii, pinakiti ĩkapani. Atxĩti iua tiitxi xika kona pikĩpitari Teoso sākire, ininiã kona pikaikota ātipirika Teosokata.

Ikara atoko ininiã, erekari atxiiti ikinipoko tiitxi auinii? Konapitini. Apiaerekata Teosokata ätipirika pikaikotini. !Apakata kãkiti iikixitiniri Teoso, iuamoni isini iŕapani. ²⁷ Nota hĩtari iaxitikiri apokako ninitiriakorikata. Iuasaaki niri iotximeretxikana nota iotximeretako. Iuasaakirako erekari isika erekari kamakanimoni. Iparĩkana iŕi isika iparĩkana iaõka. Txamari imisiritanako maerekati kamakani. ²⁸ Atãopitikara nisãpiretai hĩte. Uai uatxa aua kãkiti, ninoa imarotapanikariko nota hĩtari iaxitikiri auĩtetxi nininiua. Ikara imarotinina apisa kona ipinapanikana —itxa Xesosi.

Moisesi, Erãsi Pakini
(Marko 9.2-13; Arókasi 9.28-36)

17 Seisi õti napaka atoko Xesosi anikana Petro, Txiako, Xoão pakini. Xoão Txiako itari. Ikanĩkana oxiratarari nopinixiti. Ninoanani anika iuaã. ² Iuaã ninoa atamatari iua. Ipinimonipo itxapeka. Itoõ iotximere atokatxi iotximere atoko itxa. Imãka serõka ipinikare atoko itxa. ³ Iuasaakipeka Moisesi, Erãsi pakini tokiã iuaã, misãkireta itxarina Xesosi. ⁴ Ininiã Petro akiritari Xesosi:

—Apiananiri, erekapitikari uai aãuini. Pinirekiniãri, nota kamari ipi äti pakini papiri uai. Pite nakiti iŕapani, Moisesi nakiti iŕapani, Erãsi nakiti iŕapani nikama.

⁵ Petro sãkirauanãtakasaaki, katxiãri pomẽkoriri ninoa nopini apoka. Katxiãri ãki Teoso txari:

—Ere namarite, nitiretakiti. Napokaerekatarari iua, kotxi ikamari ninirekakiti. Hĩkenakotariko iua sãkire.

⁶ Xesosi moianariakori ikara atoko inakari ikenakotakasaakina, iteene ipĩkarauatana, ininiã iriãkatana xitape. Itoõna ikipatana. ⁷ Xesosi sari ninoamoni. Itakauakotaua ninoa nopini. —Hõkitikaua. Kona hĩpĩkarauatape —itxana.

⁸ Ininiã itikapokotana. Xesosinoka aua.

⁹ Oxiratarari xirata iokiriãipotakasaakina, Xesosi txana ninoa:

—Kona hĩsãpiretapiri apanakinimoni hĩtikakiti. Nota hĩtari iaxitikiri nipina iuaĩkana naua ninaka atokoikarako hĩtikakiti mixikanani hĩsãpiretako —itxana.

—Ateeneka —itxarina.

¹⁰ Xesosi moianariakori pimaãri iua:

—Kinirepa kaiõkatsoparerini oerekaua: “Erãsi apokako Teoso mereẽkiti apokini apisa?”

¹¹ Ininiã Xesosi apakapapiretana ninoa:

—Ari, atãopitikara ninoa sãkire. Merepitipanika Erãsi apokapitika. Iua kamari imakinika iposope inini iŕapani. ¹² Ari, nisãpiretai, Erãsi apokapeka. Txamari kãkiti !imarotari iua. Imisiritarina iua inireẽkitina iaõka. Iua atokotxikana itxanonako nota hĩtari iaxitikiri. Imisiritanona —Xesosi txana Petro, Txiako, Xoão pakini.

¹³ Ininiã imoianariakori imarotari Xesosi sãkire. Erãsi, Xoão kapatxisareri itxaua.

Amarini, Maerekati Matamatakoti Auaĩtotakiti Pirena
(Marko 9.14-29; Arókasi 9.37-43)

¹⁴ Ikanapiriãkana atoko, itomaneri kãkiti apotiitiniã-taãua apokasaakina, kiki apoka Xesosimoni. Ikapotoreẽkaua iua apisatoõ. ¹⁵ Itxari:

—Apiananiri, piamoniŕari namarite. Maerekati matamatakoti auaĩtotari iua. Atatsiirauata. Xaminaã irikapika. Kãuaãriã ikomokapika. ¹⁶ Niminamari namarite pimoianariakorimoni. Ninoa kona posotari erekapeka itxĩkitakinirina.

¹⁷ Ininiã Xesosi txari:

—!Kauikarei hĩte. Maerekati kamakanii hĩte.

Kipakinikananipa Teoso nirekatari hĩtekata nauini? Kipakinikananipa Teoso nirekatari hĩte nimĩteenekini? Himinari amarini notamoni —itxana.

¹⁸ Apokaãka atoko, Xesosi txitari iua maerekati matamatakoti:

—Pisipe.

Ininiã iua maerekati sipe. Iuasaakipeka iua amarini erekapeka itxa.

¹⁹ Eereka imoianariakori apoka Xesosimoni. Iuasaaki ninoanoka aua iuakata. Imisãkiretarina:

—Kanatokopa ininiãpa ate kona posotari maerekati matamatakoti aomitikini?

²⁰ Ininiã Xesosi:

—Kona atãoni hãuikari nisãkire, ininiã kona hĩposotari homitikiniri iua. Atãoenepitikara nisãpiretai hĩte. Mostata iki axapitikiri. Axapitipitika nisãkire hãuikiniã, mostata iki atoko nisãkire hãuikiniã, hĩposotari ia õtanoxiratarari hĩpaniãtini: “Pite oxiratarari, uai posipika, ikaimoni pisa,” ininiã oxiratarari sapitikamako. Hĩte posotari ikinipoko hinireẽkiti hĩkamini. ²¹ Txamari himamisãkiretakaniãri Teoso, hinipokotini himatakana-pakaniã Teoso himisãkiretini iŕapani, ininiãra kona hĩposotari maerekati matamatakoti homitikini —itxa Xesosi.

Xesosi Iuaĩkana Sãpiretari Ipinini
(Marko 9.30-32; Arókasi 9.43-45)

²² Karirẽia tõpa apokasaakina, Xesosi misãkiretana imoianariakori:

—Nota, hĩtari iaxitikirino mĩkapiritaãkako.

Nisikaãkako kikiakorimoni inirekaãkitina ikaminina tĩkane. ²³ Ninoa okano nota. Ipi äti pakini õtisaaki iuaĩkana nõkitikauako, iuaĩkana aua nitxako —itxana ninoa.

Ikara inakari ikenakotakasaakina, imatinaniuatana.

Txineiro Teoso Misãkiretiko Aikoti Iŕapani

²⁴ Kapanaoõ sitatxiti apokasaakina, kikiakori sari Petromoni. Ninoa kiki apakaparo txineiro Teoso misãkiretiko aikoti nĩkatakani amanaãkito. Ipimaãrina Petro:

—Hĩte oerekakari sikataro txineiro Teoso misãkiretiko aikoti nĩkatakani amanaãkito? —itxarina iua Petro.

²⁵ Ininiã Petro:

—Ari, isikapitikaro —itxa.

Eereka Petro ñroã aapokotxi äki ikara säkiretxiti Xesosi isäpiretini ñkapani. Xesosi säkirauata, Petro masäkirauatakani apisa:

—Petro, ikini itixiti kipa sikataro txineiro auñtetxiakorimoni? Atauako auñtetxi nirimane sikataro? Atauako käkiti ätiãtaã ñkanikani sikataro? —itxari.

²⁶ —Käkiti ätiãtaã ñkani sikaro txineiro auñtetximoni —itxa Petro.

—Ari atãopitikara. Ininiã kona auñtetxi nirimane ni sikaro txineiro iuamoni. Iuaritika asikapitikaro. ²⁷ Txineiro amasikaniã, txineiro apotiitakani lapokaerekataua. !Anirekari ikara atoko inakari. Ininiã ipoa pisa. Pokatsaãta. Pimanamãkaro ximaki merepiti-panika pimañkakitoto. Onamaã papokaro txineiro ota añkitxirauatini ñkapani. Oa txineiro ota apakata nota sikataro ñkapani, pite sikakitoto ñkapani apaka. Panika. Pisikaro oa txineiro Teoso misäkiretiko aikoti nñkatakanimoni —itxa Xesosi.

Ininiã Petro kamari Xesosi säkire iaõka.

Kiripa Käkiti Apiatakari Txataua?

(Marko 9.33-37; Arókasi 9.46-48)

18 Iuasaaki Xesosi moianariakori apoka iuamoni. —Teoso auñtetxi ininiãtaãua, kipa käkiti apiatakari txataua? —itxana.

² Xesosi akiritari amarini axapitiri. Ninoa apisatoõ taka itxari.

³ —Atãopitikara nota säkire. Himaerekani himatakanapanisaaki, Teoso nireëkiti himakamakanisaaki, amarini axapitiri atoko himinakanisaaki, kona hñsapani Teoso auñtetxi ininiãtaãua. ⁴ Ia amarini axapitiri !iuikaua. Käkiti ia amarini atoko inakarira, iuaka poiãotakiniãua, iuara apiatakari itxaua Teoso auñtetxi ininiãtaãua. ⁵ Nota nireëkiti pikamakasaaki, pipoxokoniritika papakapiniãri amarini ia atoko inakari pinakasaaki, papakapano nota apaka —itxa Xesosi.

Maerekati Oerekakari

(Marko 9.42-48; Arókasi 17.1-2)

⁶ Xesosi säpirenauatapanika:

—Käkiti txñkitakiniãri amarini, nota säkire auñãkari, maerekati ikamini, !apakata. Erekamariko kai mitari iua käkiti maerekati oerekakari iaxirikanokitaãkamako, iposo atoko ipoa apanñkakiã okaãkamako ipinini ñkapani. ⁷ Käkiti ikini itixiti auakani misiritaãkako, kotxi auari käkiti maerekati apanakini kamini txñkitakani. Auapika käkiti ikara atoko inakani. Ninoa misiritaãkako. ⁸ Piuako txñkitakiniãri maerekati pikamini, ininiã pitsotakari, oka pitxariko. Pikiti txñkitakiniãri maerekati pikamini, ininiã pitsotakari, oka pitxariko. Kotxi maerekati pikaminiã arikatxi maxipokatimoni pokaãkako. Apiaerekata mauakotikai pauini ätipirika Teosokata. Apiaerekata makititikai pauini ätipirika Teosokata. Pauiritiniãri maerekati pikamini txñkitaãkari pitekata ikaikotiniã, ininiã pite kamari maerekati apaka, ininiã arikatxi maxipokatimoni pokaãkako. ⁹ Iua

atokokana poki txñkitakiniãri maerekati pikamini, pima-poroka, oka pitxariko. Kotxi maerekati pikaminiã, arikatximoni maerekani misiritikoãtaã pokaãkako. Apiaerekata Teosokata ätipirika pauini äti pokinoka pauini. Kona pauiritapiri maerekati pikamini txñkitaãkari pitekata ikaikotini —itxa Xesosi säkire.

Soti Auñte Pñpinanaãkari

(Arókasi 15.3-7)

¹⁰ —Ikinipoko amarini pipaxitako, kotxi niri tixine aua niri nitiriakori. Ninoa nñkatari amarini. Niri apisatoõ ätipirika iniritiakori auapika, ininiã käkiti mapaxitakaniãri amarini, isäpiretarina niri. ¹¹ Nota hñtari iaxitiki napoka ñkorapokoriti käkiti pñpinanaãkani atoko inakani napokini ñkapani, kotxi !imarotarina Teoso kimapore.

¹² —Kiãtokopa itxa hñxinikakiti? Kiki aua ipiraakori soti auñte señ pakini. Txamari ätika pñpinanaka. Kiãtokopa itxa? Itakanapari ipiraakori novëta novi pakini. Isari oxiratarimoni. Initari iua pñpinanaãkari. ¹³ Ipiraaakori novëta novi na pñpinanaka, ininiã ipoxokoniuata. Apokasaakiri iua pñpinanaãkari, iteene ipoxokoniuata. ¹⁴ Iua atokokana hñri iaxitiki kona nirekari amarini ätika pñpinanakini. Hñri nirekari imakinika amarini imarotiniri ikimapore iuamoni sikari apo —itxa Xesosi säkire.

Maerekati Pitemoni Kamakari

¹⁵ —Pitari nisäkire auñãkari kaminiãri maerekati pitemoni, ininiã pisa iuamoni. Pitenoka pisa iuamoni. Iuanani pimisäkiretako. Põtãkikiniri ikñpitakasaaki, pimoianari iuañkana itxapekaua. ¹⁶ Põtãkikiniri imakñpitakanisaaki, ipi käkiti panikako iuamoni. Ipi minakanisaaki ätika panika iuamoni. Ininiã iuañkana põtãkikari iua maerekati kamakari. Iuasaaki pitekata sikani apaka õtãkikari. Kotxi Teoso säkire iõkat-sopatakori oerekaua käkiti säkire kenakotakani, käkiti kamakiti itikakani ipi äti pakini auiniã, apakata apanakini atão inakari imarotini ñkapani. Ipi äti minakanisaaki, ipi apakata. ¹⁷ Ninoa pitekata sikani säkire imakñpitakanisaaki, pisäpiretana käkiti Teoso misäkiretikoãtaã apotiitakaniua. Ninoa ikinipoko Teoso säkire auñãkani õtãkikariko iua. Imakñpitakanisaakiri ninoã säkire, himarotari atão maerekati kamakari itxaua iua. Teoso säkire mauñãkati atoko itxaua iua, kotxi kona inirekari õtãkikiko. Ate mokaiakari moianari atoko itxaua —itxa Xesosi säkire.

Pauiritakiti, Pimauritakiniti Pakini

¹⁸ —Atãopitikara nitxai hñte. ñkorapokoriti käkiti kamakiti himauritakiniti, Teoso tixine apaka !auritaãka. ñkorapokoriti käkiti kamakiti hñauritakiti, apaka auiritaãka Teoso tixineë.

¹⁹ —Apikomoni ia nisäpiretai. Pite xinikakitixikana äti xinikiniã apaka, hinirekakiti hamanainiãri Teoso, niri iaxitiki sipapitikai hamanaãkiti. ²⁰ Käkiti apotiitakasaakiaua nota ixinikinina ñkapani, nota ninoakata

aua. Atxiiti ipi ätinoka aua. Atxiiti ipinoka aua. Iuaritika nota aua ninoakata —itxa Xesosi.

Nitiritxi Äti Matiretakati

²¹ Petro sari Xesosimoni, pimaã itxari Xesosi: —Apiananiri, kipakinikatapa napakapari nitari, maerekati ikaminano ätipirika inakasaaki? Setxikata atxiiti?

²² Ininiã Xesosi:

—Kona, kona setxikatani papakapari iua. Setxikata setëta papakapari iua, ininiã ätipirika papakapariko.

²³ —Apikomoni noerekai papakapiniri kãkiti, maerekati ikamakasaaki pitemoni. Teoso auñtetxi ininiua patrão ia atoko inakari itxa. Ia patrão nirekari iniriti-akori iñkitxitiniri iua. ²⁴ Ininiã iua iaõtaro txineiro isikakitopeka. Iuasaaki iniriti minaãka iuamoni. Mitxipeka iua patrão sikari tesi mirão txineiro ota iua iniritimoni. Txineiropokoni. Oa txineiro isikasaaki, itxari iniriti: “Äti õti iuañkana pisikano oia nitxineirote,” itxari iniritimoni. Txamari, lisikaro, kotxi !oãuauka. ²⁵ Kona katxineiroteri. Ininiã ipatrãote paniätari ivëxitiko iua, ãtanoro, imiakori, itii ikinipoko, ipatrãote iñkitxitini ãkapani. ²⁶ Iua iniriti ikara inakari säkiretxiti ikenakotakasaaki, ipatrãote apisatoõ ikapotoreëkaua. Itxari iua: “Piãta-paroko. Ikinika pitxineirote nisikaiko,” itxari ipatrãotemoni.

²⁷ —Ininiã ipatrãote amonñkari. “Kona ninirekaikaro nitxineirote pisikinino.” Ininiã auiritari isini.

²⁸ —Ininiã sipe itxa. Iua nitiritxi mitxi sikapekaro txineiro iua inakito señ ota äti ipatrãote nitirimoni. Poiãonoka oa txineiro. Iuasaaki, aapokomoni isikasaa-ki, aõkitari iua äti nitiritxi ipatrãote nitiri. Imañkari inoakiã. “Uatxa pisikano nitxineirote,” itxari.

²⁹ —Ininiã imoianari kapotoreëkaua iua apisatoõ. “Piãtaparoko. Ikinika pitxineirote nisikaiko,” itxari.

³⁰ —Txamari mitxiri nitiritxi: “!Niãtapaikaroko,” itxari. Ininiã kateiamoni ieretakakitãkari imoianari txineiro xika. “Ikinika nitxineirote pisikasaakiikanoko, pikatxakako,” itxari. ³¹ Ikara inakari ene apanakini iua patrão nitiriakori kenakotakasaaki, ninoa naiataua. Ininiã isana ipatrãotemonina. Isãpiretarina iniriti iokanatiniri äti iniriti kateiamoni. ³² Ininiã iua patrão akiritari iua iniriti: “Pite maerekati pitxaua, kotxi kita pite amanaãno nota niamonñkinii, ininiã piñkitxitinino !nininrekaika. ³³ Kinirepa kona pite amonñkari pimoianari nota amonñkinii atokokana? Kona erekai,” itxari.

³⁴ —Ininiã ipatrãote iteene naiataua. Iokanatarari iua kateiamoni imisiritikomoni ipatrãote txineirote okinika imasikakanisaaki.

³⁵ Ininiã Xesosi xipokapiretari ia isãpirena:

—Niri iaxitikiri iua atokokana txauko hñte, maerekati äti kamakasaakii hñtemoni himamaxinñkaretakaniã häkixinireë —itxa Xesosi.

Kiki ãtanorokata Itakanapakakini

(Mateo 5.31-32; Marko 10.1-12; Arókasi 16.18)

19 Ikara inaka atoko Xesosi potorika Karirëia tõpa. Isa Xotëia tõpamoni uini Xotão ipiniã. ² Iuaã ito-

maneri kãkiti sari iuamoni. Erekapeka itxñkitakana amianatakani.

³ Pariseoakori apaka sari iuamoni. Inirekarina Xesosi kerokiniri isãkire. Ininiã ipimaãrina Xesosi:

—Auiritaãka atxiiti kiki takanapiniro ãtanoro, itakanapiniro inirekasaaki? —itxarina.

⁴ Ininiã Xesosi:

—Hñte imarotapekari ia Teoso säkire iõkatsopatakori: Kitxakapirñka merepitipanika ikinipoko Kamakari kamari kãkiti, kiki inini, sito onini apaka ikamari kãkiti.

⁵ Ikara atoko ininiã, kiki takanapari iri, inoro pakini, ãtanorokata auini ãkapani, ininiã ninoa ätika atoko itxauana,

itxa Teoso säkire iõkatsopatakori. ⁶ Ininiã kona ipi !itxauka. Ätika itxauana. Ikara atoko ininiã, lerekari kãkiti kaiarikiniri Teoso apotiitakini —Xesosi txana ninoa.

⁷ Ininiã ninoa pariseoakori pimaãri:

—Ikara atoko ininiã, kinirepa Moisesi paniätari kiki iõkatsopatiniri aãtsopa, ãtanoro itakanapini aãtsopate, ininiã eereka auiritari iua iokanatiniro oa?

⁸ Ininiã Xesosi apakapapiretana:

—Moisesi auiritari ãtanoro hñtakanapini, kotxi paikori hñxinire. Teoso nireëkiti himanirekakani xikara, Moisesi auiritari hñtakanapini. Txamari kitxakapirñka merepitipanika kona kiki takanaparo ãtanoro. ⁹ Ininiã nitxai hñte, kiki takanapiniãro ãtanoro, ätikata masirñkatoka, iua kamari maerekati. Itakiniaõro äto sito, maerekati apiata ikama, kotxi !imaãkatari Teoso paniãtakiti. Oa itakanapakito taãkari apaka kamari maerekati —Xesosi txana ninoa.

¹⁰ Ininiã imoianariakori ikara ikenakotakasaakina, itxarina Xesosi:

—ãtaniritxi, ãtanorotxi !auiritaãka itakanapakakinina, ininiã erekapiimana imñtaniriuatakanina —itxarina.

¹¹ Ininiã Xesosi:

—Erekapitikari kãkiti ãtanorouatini. Ätikakanoka Teoso kona nirekari ãtanorouatinina. ¹² Ixika auapitika kãkiti mñtanorouatakani. Kotxi ätikaka kiki auakasaaki, iñtona kona apakata ninoa takiniro sito. Apanakinipekana ikisauakatsikitiko xika kona ninoa posota itakinirona sito. Apanakinipekana kona nirekari ãtanorouatini Teoso auñtetxi ininiãua ätipirika isãpiretini ãkapani. Teoso manirekakaniãri pite ãtanorouatini, ininiã kona piñtanorouatape —itxa Xesosi.

Xesosimoni Amarini Apokini

(Marko 10.13-16; Arókasi 18.15-17)

¹³ Iposo atoko kãkiti minana amarini Xesosimoni. Inirekarina ninoa kii nopini iuako itakini. Inirekarina Xesosi misãkiretiniri Teoso amarini ãkapani. Txamari imoianariakori txitana. !Auiritana amarini anikinina Xesosimoni. ¹⁴ Ininiã Xesosi txana imoianariakori:

—Hñuiritanako amarini notamoni apokini. Kona hñotokakapena notamoni apokinina. Kotxi kãkiti Teoso auñtetakani amarini atoko itxauana —itxana.

¹⁵ Ininiã iuako itaka ninoa kii nopini. Iposo atoko ãkorape itxa.

Ātokori Ito Txineiroteri
(Marko 10.17-31; Arókasi 18.18-30)

¹⁶ Ātokori apoka Xesosimoni.

—Koerekareri erekarii, kiripa erekari nikama ātipirika Teosokata nauini ĩkapani? —itxari.

¹⁷ Ininiā Xesosi:

—Kininiāpa “erekari” pitxano? Kākiti erekari Iauari. Teosonanira erekari. Teosokata ātipirika pauini pinirekiniā, pikamariko Teoso paniātakiti.

¹⁸ —Īkiripa? —itxa.

Ininiā Xesosi:

—!Pokaniuatape. !Pisiriĳkape āti ĩtanorokata. !Piĳtiriuatape. Poxiene !pikamape. ¹⁹ Piri, pinoro pakini pipaxitako. Pitiretanako apanakini, piteka pitiretinuia atokokana, pitxapaniko —itxari.

²⁰ —Nikamapitikari ikara atoko pinakiti. Kiripa apikomoni nikamaā Teosokata ātipirika nauini ĩkapani? —itxari.

²¹ —Ikinika kinirāo kamaka pinakasaaki, ikinika pitii pivĳtxitako. Txineiro papakapakito pisika kākiti matxineirotenimoni. Ikara atoko inakari pikaminiā, Teoso tixine papokasaaki ikinipoko erekari auiniiko pite. Pitii pivĳtxitaka atoko, notakata sa pitxako —Xesosi txari.

²² Iua ātokori ikara ikenakotakasaaki, isipe. Imatinaninoka itxari ātokori, kotxi kaiāori itii. !Inirekari itii ivĳtxitini. ²³ Ininiā Xesosi txana imoianariakori:

—Atāopitikara ia nitxai hĳte. Pamimari katxineiroterini auĳtetiniri Teoso. ²⁴ Apikomoni nisāpiretai. Atauako kamero napatari ākorike sonakiā? Apia mimari kākiti katxineiroterini auĳtetiniri Teoso —itxana.

²⁵ Xesosi moianariakori ikara ikenakotakasaakina, it-soriĳkaātana. Ninoa uākatari katxineiroterinimoni txineiro aua, kotxi Teoso apokaerekatana ninoa, ininiā txineiro isika ninoamoni, ninoa uākatakiti. Ininiā ninoa pimaāri:

—Katxineiroteri maposotakaniāri Teoso tixinemoni isini, kipa posotari iuaā isini? —itxanātana.

²⁶ Xesosi atamatana. Apakapapiretana:

—Kākitika kona posotari. Teoso posotari ikinipoko ikamini.

²⁷ Petro misākiretari Xesosi:

—Atepekana, ate takanapapekari ikinipoko pitekata asini ĩkapani. Ikara atoko aniniā, kiripa ate apakapako? —itxari.

²⁸ Ininiā Xesosi:

—Atāopitikara nitxai hĳte. Nota, hĳtari iaxitikiri nitopākau auĳtetxi itopanere nopini. Iuasaaki ikini itixiti amaneri itxauako. Ikinipoko atamatanoko nota hĳtari iaxitikiri iotximere. Iuasaaki hĳte nisākire kĳpitakanii apaka topākako auĳtetxi itopanere nopini. Iua iitopaneretxi tosi pakini. Tosi nirimanetxi Isaeo tixine auakani auĳteakori hĳtxauako. ²⁹ Atxĳiti nota ĩkapani pitakanapari paapoko, pitariakori, pitaroakoro. Atxĳiti nota ĩkapani pitakanapari piri, pinoro, pamarite. Atxĳiti pitakanapari pikikiote nota ĩkapani. Ikara pitakana-pakasaaki nota ĩkapani, apiata papakapariko. Itori papakapariko. Ikara atoko pininiā nota ĩkapani, ātipirika

paua Teosokata. ³⁰ Itori kākiti apiarini uatxa, itixi xipokini ōtisaaki poiāorini itxapekauana. Uatxa itori kākiti poiāorini, apiarini itxapekauana itixi xipokini ōtisaaki —itxa Xesosi sākire.

Ova Takakoriātaā Parĳkauatakani

20 Xesosi txari:

—Teoso auĳtetxi ininiua ia kakikioteri atoko itxa. Ia kakikioteri takapekari txipokori ova inakoro ikikioteē. Ovanoka itaka. Oiōpeka onakasaaki, iua kakikioteri potorika ĩkanōkapanika. Initari parĳkauatakani ova amakani ĩkapani. ² Aōkitakasaakina, ipimaāna: “Hinirekatari parĳkatxi?” itxa.

—“Ari, anirekapitikari,” itxana.

—“Atauako ātoka txineiro ota pirata kamakori apakata āti ōti pokamara piparĳka ĩki ĩkapani?” itxana.

—“Ari, apakatapitika,” itxana. Kotxi ātoka ota pirata kamakori iuasaaki atāo parĳkatxi ĩki āti ōti pokamara kākiti parĳkauatini ĩki. Ininiā itakaremoni iokanataka iparĳkauatinina ĩkapani.

³ —Novi oarape inakasaaki iuaĳkana ipotorika.

Nipokori vētxitikoātaāmoni isa. Iuaā atamatana kākiti maparĳkauatakani. ⁴ Ininiā imisākiretana: “Hĳte apaka atxĳiti nirekatari hĳparĳkauatini nitakareātaā, ininiā niĳk-itxiti atāo inakari hĳparĳka ĩki,” itxa. Ininiā ninoa apaka sari.

⁵ —Apaniāxitipeka inakasaaki iuaĳkana iokanataka apanakini parĳkauatakani itakaremoni. Itinĳtikitakasaa-ki iuaĳkana iokanataka apanakini parĳkauatakani itakaremoni. Mitxi isākire atokokana itxa isākire ninoa-⁶moni. ⁶ Mapiānikata takotepeka inakasaaki iuaĳkana isa parĳkauatakani initini. Apokapanikana maparĳkauatakani. Ipimaāna: “Kinirepa ia ōti maparĳkauatanika hĳtxa?” itxana.

⁷ —“Kotxi kona kākiti sikaua parĳkatxi,” itxarina.

—“Nitakareātaā hĳsa. Iuaā hĳparĳkauata. Hĳte apakapariko hĳparĳka ĩki erekari,” itxana.

⁸ —Īkanōkapeka inakasaaki kakikioteri akiritari initiri apiari: “Parĳkauatakani pakirita. Piĳkitxitana. Merepanika piĳkitxitana kikata parĳkauatakani. Eereka piĳkitxitana tinĳtikita parĳkauatakani, pitxaāpotako,” itxari.

⁹ —Kikata parĳkauatakani imakinikana apakapari ātoka txineiro ota pirata kamakori. ¹⁰ Kikiākini ĩkanōkapanika parĳkauatakani ikara itikasaakina, oākatarina: “Ate apakaparoko apiatako aparĳka ĩki,” itxamana. Ātoka txineiro ota pirata kamakoro imakinikana apakapana. ¹¹ Txineiro apakapakana atoko, omanākarauatana. “!Erekari kakikioteri,” itxanātana. ¹² Ininiā ninoa txari iua: “Naia kikata parĳkauatakani poiāoka iparĳkauatana. Āto oaranoka iparĳkauanātana. Ate parĳkauata ikiniōtika kapatakariā. Ate parĳkauatapitipo, txamari pite ĳkitxitaua ate naia piĳkitxitini atokokana. Kona erekai,” itxarina.

¹³ —Iua kakikioteri apakapapiretana: “Nitiretakini, kona nota misirienetai hĳte. Īkanōkapanika nipimaāi: ‘Atauako ātoka txineiro ota pirata kamakori apakata āti ōti pokamara piparĳka ĩki ĩkapani?’ nitxai mixikanani. Ininiā hĳte: ‘Ari, apakatapitika,’ hĳtxa. Ininiā na

nimisirienetai hïte. ¹⁴ Ininiã txineiro nisikakito hanikalka. Haãpokomoni hïsipeka. Nota nirekari niïkitxitinina hïte tikini parïkauatakani hïte niïkitxitini iaõka.

¹⁵ Atauako kona erekari nota txineirote ninirekakitemoni nisikini? Hïte xikotano, erekari nikamini xika,“ itxana ninoa.

¹⁶ Xesosi xipokari isãpirena:

—Itori kãkiti apiarini uatxa, itixi xipokini õtisaaki poiãorini itxapekauana. Uatxa itori kãkiti poiãorini, apiarini itxapekauana itixi xipokini õtisaaki. Teoso aiatana kaiãopokori kãkiti itixine isinina ïkapani, txamari poiãonoka iua mereẽ —itxa Xesosi.

Iuaïkana Xesosi Sãpiretari Ipinini

(Marko 10.32-34; Arókasi 18.31-34)

¹⁷ Xesosi Xerosareẽmoni ikimaporitakasaaki, akiritana imoianariakori. Ninoanoka imisãkireta.

¹⁸ —Hïkenakotari nisãkire. Xerosareẽmoni asako. Iuaã nota hïtari iaxitikiri mïkapiritaãkako. Sasetotxi auïteakori, kaiõkatsoparerini pakimomoni nisikaãkako, ininiã ninoa apotiitaua. Iuasaakiko ninoa txari: “Okaãkapitikako.” ¹⁹ Eereka ninoa sikano Xoteo minakonimomoni. Ninoa napetano. Ixirokitanonona aãpitsaã. Iposo atoko aamina ïpiriãmitakariã tokakita ninaãkako, oka itxanonako. Ipi ãti õtisaaki nõkitikauako, iuaïkana aua nitxako —itxa imoianariakorimoni.

Txiako, Xoão Pakini Amanaãkiti

(Marko 10.35-45)

²⁰ Eereka Sepeteo ïtanoro apoka Xesosimomoni. Ominana imi Txiako, Xoão pakini. Ninoa Txiako, Xoão pakini Xesosi moianariakori. Okapotoreẽkaua iua apisatoõ.

—Atauako ninirekakiti pikaminano? —otxari.

²¹ —Kipa pinireka? —itxaro.

—Ikinimane auïte pinakasaakiaua, ninirekari naia ipi namariteni auïtetxiakori ininiãuana pitekata. Pauiritatana pitekata iitopãkinina, ãti pikikomoni inini, ãti pisaneremomoni inini? —otxari.

²² Ininiã Xesosi apakapapiretana ninoa:

—!Himarotari hamanaãkiti. Mapaõti napa atoko iteene nimisiritaãkako. Atauako hïposotatari hãtatsi-itiniri notakata? —itxana ninoa.

—Aposotapitika —itxarina.

²³ —Atãopitikara hãtatsiirauata notakata, txamari kona notani mereẽna kãkiti nikikomoni, nisanaremoni topãkakani ïkapani. Nirira mereẽpekana ninoa kãkiti notakata topãkini ïkapani —itxana.

²⁴ Apanakini Xesosi moianariakori kenakoenetari Txiako, Xoão pakini amanaãri Xesosi auïtetxi ininiuana ïkapani, ininiã omanatana. ²⁵ Ininiã Xesosi akiritana ninoa imakinikana iuamoni.

—Himarotari Xoteo minakanuia auïteakori paniãtari kãkiti ikinika auïteakori nireẽkiti ikaminina ïkapani. Kona atão itiretana kãkiti. Kãkiti kona kamari auïtetxiakori mauritakiniti. ²⁶ Kona ninoa auïtetxiakori atoko !hïtxape. Atão apiari pininiua pinirekiniã, pimoianatariko apanakini. ²⁷ Apanakini auïte pininiã pinirekiniã, nitiritxi pitxauako merepanika. ²⁸ Ikara

atoko nitxa nota hïtari iaxitikiri ïkorapokoriti napokasaaki. Ninitiri lauari. ïkorapokoriti napoka, kãkiti nitiri nininiua ïkapani, kãkiti nitiretini ïkapani. ïkorapokoriti napoka nipinini ïkapani, kaiãopokori kãkiti mapinakani ïkapani, kotxi nota ïkitxirauata ninoa mapinakani ïkapani —itxana ninoa.

Ipi Mõsiãreni Xesosi Makananiti

(Marko 10.46-52; Arókasi 18.35-43)

²⁹ Xerikoo sitatxiti ipotorikasaakina, itomaneri kãkiti sari Xesosikata, imoianariakori pakinikata. ³⁰ Iuasaaki ipi mõsiãreni topãkanãta kimapori tiniãpo. Xesosi napaãpotini ikenakotakasaakina, akiritana:

—Apiananiri, aãuïte Taviini apika mekanirii, piamonïkaua ate —itxarina.

³¹ Kãkiti iuaã pinitana:

—Himaãtako —itxana.

Txamari apiata akirikatana:

—Apiananiri, aãuïte Taviini apika mekanirii, piamonïkaua ate —itxarina.

³² Ininiã Xesosi iotoka. Akiritana ninoa mõsiãreni. Apokana iuamoni.

—Kipa hinireka nikaminii hïte? —itxa.

³³ —Apiananiri, aïtikapokotini anireka.

³⁴ Ininiã Xesosi amonïkana. Okina nopini itakari iuako. Iuasaakipeka kõsiãrepekana, sa itxana Xesosikata.

Xesosi Xerosareẽ Apokaãpotini

(Marko 11.1-11; Arókasi 19.28-40; Xoão 12.12-19)

21 Xesosi imoianariakorikata imatokoãpotari Xerosareẽ. Apokana Petxipaxee inakori aapokotxiti, õtanoxiratari takote Oriva inakori xiratamoni. Iuaã Xesosi iokanatana ipi imoianariakori aapokotximoni.

² —Hïsa ikiraã kaixiti auakari aapokotxitiã. Iuaxiti hãpokasaaki, hãpokaroko xomẽta iaxiriãkoro oimikata. Hïkoxirikana. Uaimoni mina hïtxanako. ³ ãti misãkiretakasaakii: “Kinirepa hïkaxirikatari pirãtxi?” Ininiã hïte: “Apiananiri nirekana,” hïtxako. Ininiã iua auiritai himininina —itxana ninoa.

⁴ Kitxakapirïka Teoso sãkire sãpiretakari sãpiretapekari ikara atoko inakari. Ininiã iua sãpiretakiti kitxakapirïka atão inakari apokapeka. ⁵ Iua txari:

Hïtxariko Xerosareẽ auakanimomoni: “Hãtamata. Hïauïte apokaãpota hïtemoni. !Kaneenamari. Xomẽta nopini iitopãkanãta. Xomẽta ãkiri nopini isaãpota,” hïtxako ninoamoni,

itxa Teoso sãkire sãpiretakari kitxakapirïkapeka.

⁶ Ininiã Xesosi moianariakori sari. Ipaniãtakiti iaõka ikamana. ⁷ Ininiã iminaro xomẽta oimikata. Itakarina imãkana inopinina Xesosi topãkini ïkapani. Ininiã Xesosi topãka xomẽta ãkiri nopini. ⁸ Itomaneri kãkiti katamẽkari imãkana kimapori ãpo. Apanakini sauakari aãxike. Ikasirïkaxikeãpotarina aãxike kimapori ãpo. Ikara atoko ikamana, Xesosi paxitiko oerekinina ïkapani. Imãkana nopini, aãxike nopini, xomẽta napaãpota. ⁹ Kãkitipokoni ïkiikakani. Kãkitipokoni Xesosi tikini ïkani. Imakinika saãpotakasaakina, akirikatana:

—Peerekari Tavii apika mekaniri. Teoso posotiirekata ĩkari, Teoso nireĕkiti kamakari iua. Teoso sikariko erekari iuamoni. Peerekari Teoso, iaxiti apiko nopinixiti auakari. Apiananiri itxaua —itxaĕpokatana.

¹⁰ Ininiĕ Xesosi apokapeka Xerosareĕ. Iuasaaki ikini-mane Xerosareĕ auakani tsořikaĕta.

—Kirinapanipa ikira kiki inatari? —itxanĕtakakana.

¹¹ Kĕkiti Xesosikata ĩkani sĕpiretana:

—Xesosikara ikira. Teoso sĕkire sĕpiretakari, ikira. Nasaree sitatxitikiri, Karirĕia tĕpa auakari ikira —itxana.

Pirĕtxi Vĕtxitakani Omitikiko

(Marko 11.15-19; Arĕkasi 19.45-48; Xoĕo 2.13-22)

¹² Xesosi ĩroĕ aiko ĕki Teoso misĕkiretikoĕtaĕ. Omitikenatana tiitxi vĕtxitakani. Amotiitakani Teoso misĕkiretikoĕtaĕ auakani omitikenata. Ikitakari txineiro vĕtxitakani mesate. Kamo vĕtxitakani topĕkini apaka ikitaka. ¹³ Xesosi misĕkiretana:

—Teoso sĕkire iĕkatsopatakari txari:

Ia naapoko, “Teoso misĕkiretiko aikoti” akiritaĕkako, itxa. Txamari hĕte txĕkitakari ia aiko kĕttiririni iomaĕtiniĕtaĕ ininiua —itxa Xesosi.

¹⁴ Mokirini, kĕkiti matĕpokotakani pakini apoka Xesosimoni Teoso misĕkiretiko aikotiĕ. Erekapeka itxĕkitakana ninoa. ¹⁵ Iuasaaki amarini Teoso misĕkiretikoĕ auakani iteene akirikata:

—Peerekari aĕuĕte Taviini apika mekaniri —itxanĕtana.

Sasetotxi auĕteakori, kaiĕkatsoparerini pakini itikari Xesosi posotiire, kĕkiti erekapeka itxĕkitakini. Ninoa kenakotari amarini akiritakiti:

—Peerekari aĕuĕte Taviini apika mekaniri.

Ininiĕkara ninoa omanĕkarauata. ¹⁶ Ininiĕ imisĕkiretarina Xesosi:

—Pikenakotatari ikara amarini akiritakiti? —itxana.

—Nikenakotapitikari. Hĕte atatsopatapekari ia Teoso sĕkire iĕkatsopatakari:

Ātokoriakori, amarini pakini, ninoapeka apaka txariko: “Peerekari iua,” itxanako, itxa Teoso sĕkire iĕkatsopatakari. Ininiĕ Teoso sĕkire iaĕka ninoa kamanĕta. Ininiĕ erekapitikari ninoa akiritakiti —itxa Xesosi.

¹⁷ Iposo atoko itakanapana. ĩkorape itxa. Itakanapari Xerosareĕ. Isa aapokotximoni Petĕnia inakorimoni. Iuaĕ itxiaka.

Piko Mina Marito Pirena

(Marko 11.12-14, 20-25)

¹⁸ Katimatinĕkata iuaĕkana Xesosi sari sitatximoni. Ipinipokoriti inatxita. ¹⁹ Atamataro piko mina kimapori ĩtiniĕpo. Isa oamoni txipokori itximini ĩkapani. Txamari otsopanani auaro. Iuasaaki itxa:

—Kona kariikaiko —itxaro.

Iuasaakipeka otxiaroka.

²⁰ Imoianariakori ikara itikasaakina, itsorikitaĕtana.

—Ī natokopa otxape katimari otxiarokini? —itxanĕtana ninoa.

²¹ Ininiĕ Xesosi:

—Atĕo nisĕpiretai. Teoso sĕkire hĕuikiniĕ, hĕte posotari hĕkaminiri mixikanani nikamakiti atoko inakari. Piko mina txiarokini nitxĕkitakini atoko, hĕposota hĕkamini. Teoso sĕkire iteene hĕuikiniĕ, apiata hĕkamako. Hĕposotamariko hĕpaniĕtiniri ikira ixirata: “Pĕkitikaua. Ipoamoni oka pitxaua.” Iuasaakipekamako ixirata ipoamoni oka itxamauako. ²² Pite atĕo pauikiniĕri Teoso sĕkire, iua pimisĕkiretakasaaki, ikinipoko pamaĕkiti Teoso sikai —itxa Xesosi.

Xesosi Paniĕtakari Moerekakoni

(Marko 11.27-33; Arĕkasi 20.1-8)

²³ Xesosi ĩroĕ Teoso misĕkiretiko aikotiĕ. Kĕkiti oerekasaaki, sasetotxi auĕteakori, kiomĕtxiakori pakini apoka iuaĕ. Ipiniaĕrina Xesosi:

—Kipaniĕpa pikamari ĩkora pikamakiti? Kipa paniĕtai? —itxarina.

²⁴ Ininiĕ Xesosi:

—Nota apaka pimarauatako hĕtemoni. Ātinoka nipi-maĕiko hĕte. Nota pimaĕkitiko hĕtemoni hĕsĕpiretiniĕno, nota apaka sĕpiretai hĕte hĕpimaĕkiti notamoni, ininiĕ nisĕpiretai nota paniĕtakari uĕka apaka.

²⁵ Ia nipimaĕi hĕte: “Kipa paniĕtari Xoĕoni ipatxisarauatini? Teosokani paniĕtari Xoĕo? Kĕkitikani paniĕtari Xoĕo?” —itxana.

Ininiĕ ninoa misĕkiretakaua:

—“Teoso paniĕtari,” aniniĕ, “Kinirepa kona hĕuikatari isĕkire?” Xesosi txamaua eereka. ²⁶ “Kĕkitira paniĕtari Xoĕo,” aniniĕ, apanakini omanatamaua, kotxi ninoa uĕkatari Xoĕo Teoso sĕkire sĕpiretakari ininiua.

Ikara atoko itxana imisĕkiretakakiniuana. ²⁷ Ininiĕ apakapapiretana:

—!Aimarotari iua paniĕtakari.

Ininiĕ Xesosi:

—Nota apaka kona sĕpiretai nota paniĕtakari uĕka.

Iri Sĕkire Kĕpitakari, Iri Sĕkire Makĕpitakati Pakini

²⁸ —Hĕxinikariko ia nisĕpiretakitiko: Kiki auari ipi imi. Akiritari anekari. “Namarite uatxa piparĕkauata nitakare ova auiniĕtaĕ,” itxari imi.

²⁹ —Ininiĕ imi anekari: “!Nisapani. !Ninirekari niparĕkauatini,” itxari. Eereka ixinikaxitinĕta. “Ari, nisapitikako,” ininiĕ isa iri takaremoni.

³⁰ —Iua kiki akiritari imi maneritakari. Ipaniĕtari iua atokokana. Iua imi: “Ari, nisapitikako.” Txamari, ĩsari.

³¹ —Ininiĕ ĩkiripa kamatarari iri paniĕtakiti? —itxa Xesosi.

Ininiĕ ninoa kiomĕtxiakori, sasetotxi auĕteakori pakini apakapapiretari:

—Anekarira.

Ininiĕ Xesosi:

—Atĕopitika nisĕpiretai hĕte. Kĕttiriri apokako Teoso auĕtetxi ininiĕtaĕua hĕte apisapanika. Kanokarero apokako Teoso auĕtetxi ininiĕtaĕua hĕte apisapanika.

³² Kotxi Xoĕo kapatxisarerini apoka hĕtemoni. Oerekai erekari kimaporiti. Txamari kona hĕte auikari isĕkire. Kĕttiriri, kanokarero pakini auikari isĕkire. Iuasaaki hi-

marotari ninoa maerekati kamakani takanapiniri imaerekanina. Ikamarina erekarinoka. Hīte itikapekari. Txamari hīte kona takanapari himaerekani. Kona hāuikari Xoāo sākire, ininiā iua kiki sākire makīpitakati atoko hītxa, kotxi hīsākire: “Akīpitapitikari Teoso sākire,” txamari kona hīkīpitari —itxa Xesosi.

Parīkauatakani Maerekani
(Marko 12.1-12; Arókasi 20.9-19)

³³ —Āti sāpirenatxi atāo inakari oerekiko nisāpiretai. Hīkenakota —Xesosi txana.

—Kiki kakikioteri takaro txipokori ova inakoro. Ovanoka itaka. Iposo atoko ipiriketaro. Eereka iuaātaā ikamari ova katsonakiko. Iposo atoko ikamari aapokotxi ōtanori, ikinipoko itakare atamatini īkapani. Iposo atoko iikixitana kikiākini itakare nīkatakani īkapani. Ininiā ninoa nīkatari itakare. Eereka kakikioteri sari āti itixiti. ³⁴ Ova manapi inakasaaki, iokanata iniritiakori itakare nīkatakanimoni, ova apakapinina īkapani.

³⁵ —Txamari, ninoa maīkapena iniritiakori. Ixirokī-tatarina āti. Okapirina āti. Āti kai soroā ikiporonakana. ³⁶ Iuaīkana iua kakikioteri iokanata iniritiakori. Iuasaaki ito iokanata. Mitxirini atokokana itakare nīkatakani txapena ninoani. ³⁷ Eereka imapotōkire iokanatarī imi ninoamoni. Iuākatari: “Namarite iua, ininiā ninoa paxitari iua,” itxa.

³⁸ —Txamari, imi atapakasaakina, imisākiretakakana: “Erepani imi. Maōkari, ininiā okinika itakare kaikotin-
aua atemoni.” ³⁹ Ininiā imaīkarina imi. Kikio xiripirexiti anikarina. Iuaā oka itxapirina.

Ininiā Xesosi pimaāri kākiti iua takote auakani:

⁴⁰ —Ininiā iua kakikioteri īkasaaki, kiātokopa itx-
atanako ninoa kikiākini? —itxa Xesosi.

⁴¹ Ininiā ninoa iua takote auakani apakapiretari:

—Kakikioteri okanako ninoa maerekati kamakani. Iīkitxitanako apanakini itakare nīkatakani īkapani, ininiā ninoa sīkapitikaroko ova oiōkasaaki —itxarina Xesosi.

⁴² Ininiā Xesosi:

—Hīte atatsopatapekari ia iōkatsopatakori Teoso sākire:

Kai aapokotxi kamakani kona nirekari āti kai soro. Iua kai imanirekakiniti kai apiari itxapekaua. Apanakini kai soro maīkakari itxaua. Teosokara txīkitakari ikara atoko inini. Ikara peerekari atemoni.

Nota hītari iaxitikiri iua kai atoko nitxaua. Peerekari Teoso, kotxi nota hītari iaxitikiri kākiti manirekakiniti. Teoso txīkitakano nota apiananiri nininiāua.

⁴³ —Ininiā nisāpiretai hīte, Teoso kona hīauīte !itx-
aikauako. Iua mereēriko apanakini kākiti inakitiakori īkapani. Ninoa kamapitikari Teoso nireēkiti.

⁴⁴ Apikomoni Teoso sākire iōkatsopatakori sāpiretaua iua kai apiari atoko inakari. Itxari:

Kākiti iua kai nopini irikasaaki, ikarouata iua. Kai kākiti nopini irikiniā, lauauka kākiti,
—Xesosi txana ninoa.

⁴⁵ Sasetotxi auīteakori, pariseoakori pakini kenako-takasaakiri ikara sāpirenatxi atāo inakari oerekiko Xesosi sāpiretakiti, ninoa !apokaerekatarina isāpirena, kotxi imarotarina ninoa takari nīkatakani maerekani atoko inakani itxauana. ⁴⁶ Ininiā ia xika inirekarina imaīkinirina. Txamari !imaīkarina, kotxi ipīkarina kākiti iuaā apotiitakaniua. Kākitimoni Xesosi atāo Teoso sākire sāpiretakari itxaua.

Kiiniri Ītanorouatiko Pirena
(Arókasi 14.15-24)

22 Iuaīkana Xesosi sākirauatakasaaki kākitikata, isāpiretari sāpirenatxi atāo inakari oerekiko. Itxari:

² —Teoso auītetxi ininiāua ia auītetxi atokokana. Ia auītetxi kamari kiiniri imi ĩtanorouatini īkapani. ³ Ipaniātari iniritiakori akiritinina ikemaītxitakini kiiniriā ininina īkapani. Txamari ikemaītxitakini !inirekari iki-iniriteē isinina. ⁴ Iuaīkana iokanatarī apanakini iniritiakori ikemaītxitakinimoni. “Hīttxanako: ‘Nipokori iposopeka. Nokapekari kema auīte, kema auīte ākiri pakini. Paīpepokori. Imakinika niposotapekari. Hīsapoka kiinirimoni,’ hīttxanako.” Ininiā ninoa kamarī isākire iaōka.

⁵ —Txamari ikemaītxitakini limaākapiretarina. Iparīkamoni isana. Ātikaka sari kikiomoni. Apanakini sari ātiātaā tiitxi ivētxitinimoni. ⁶ Apanakinipekana maīkapena iniritiakori, noropata, oka itxapena. ⁷ Iua auītetxi ikara inakariene ikenakotakasaaki, iteene ina-
iataua. Iokanatarī isotatoneakori ninoamoni. Ininiā okapena ninoa kokanirini. Iotikapirina ninoa aapoko.

⁸ —Eereka iua auītetxi akiritana apanakini iniritiakori: “Kiiniri namarite ĩtanorouatini pirena iposopeka. Txamari merepitipanika nikemaītxitakini !erekana. ⁹ Iua atoko ininiā, hīsa ahoaātaā, kākiti napanakiniātaā. Hīkemaītxitana ikinimane haōkitakini,” itxana ninoa.

¹⁰ —Ininiā isana ahoaātaā. Ikemaītxitana ikinimane aōkitakini. Apotiitarina kākiti itanapoko. Maerekani, erekarini pakini apotiitana. Anikana kiinirimoni, ininiā kākitipokoni xāpoākata.

¹¹ —Iua auītetxi atamatana ikemaītxitakini. Atamatari kiki mākatxi ĩtanorouatikosaaki ieretaākori miere-
taākati. ¹² Ininiā akiritari iua: “Nimoianari, kiātokopa piīroā naapoko, kotxi mākatxi ĩtanorouatikosaaki ieretaākori kona pieretaka?” Iua kona kasākireri.

¹³ —Ininiā iua auītetxi paniātari iniritiakori: “Hi-
maīkariko. Hīaxirikariko iuako, ikitinota pakini, anika hīttxariko mapara. Piākatximoni hōkariko,” itxana iniritiakori. Iuaātaā kākiti txiapatiniātaā, kākiti akerakitat-siriitiniātaā.

¹⁴ Xesosi xipokapiretari isāpirena.

—Itomaneri kemaītxitakoni. Txamari poiāoka mereēkoni —itxana ninoamoni.

Homano Auīte Īkitxitiko Pirena
(Marko 12.13-17; Arókasi 20.19-26)

¹⁵ Ninoa pariseoakori sipeka. Eereka apotiitauana. Imisākiretakakana. Ixinikaxitinātarina:

—Anirekari Xesosi kerokiniri isäkire, aäpoitiniri iŕkapani. Ininiä kiätokopa atxatari apimainiri ikerokiniri iŕkapani? —itxanätakakana.

¹⁶ Ininiä ninoa pariseoakori paniätana ätikaka ninoa oerekakini, apaka ätikaka Erotxi säkire auikäni, Xesosimoni isinina iŕkapani. Ininiä isana iuamoni.

Imisäkiretarina. Pariseo säkire iaöka isäpiretana.

—Koerekareri, aimarotari atäoenepitikara pisäkire. Atäoenepitikara pisäpiretari Teoso nireëkiti akamini iŕkapani. Pite na piŕkarauata xatiki käkiti säkire xika. Ätinoka pisäkire pisäpireta ikinakariti käkitemoni.

Apanakinimoni pisäpiretakiti iuatxikana pisäpiretari apanakininapemoni. ¹⁷ Ininiä pisäpiretaua. Atäokani txineiro asikini Homanoakori auitemoni, Sesa inakorimoni? Apakata amasikakaniri iuamoni? —itxarina iua.

¹⁸ Xesosi imarotari ninoa nirekari ikerokiniri isäkire. Ininiäkara itxana:

—Kinirepa hinirekari nikerokiniri nisäkire? Kona erekai hite. Hīsäkirauatakasaaki, käkiti erekarini atoko hitxa, txamari maerekati hīkama. ¹⁹ Hōerekano txineiro ota Homano auite asikini iŕkapani.

Ininiä iminarona txineiro ota.

²⁰ —Kisanökapä ia? Kiuäkapa aua uai? —itxana ninoa.

²¹ —Ari, Homano auite —itxana.

—Ininiäkara hīsikariko Sesamoni iua nakiti. Hīsikariko Teosomoni iua nakiti —Xesosi txana ninoa.

²² Ikara apakapapirenatxi ikenakotakasaakina itsorīkaätana.

—Paimatireri iua —itxanätakakana.

Ininiä itakanaparina, sipeka itxana.

Ipīkari Ökitikiniua Mauikakoni

(Marko 12.18-27; Arökasi 20.27-40)

²³ Iua ötisaakipeka ätikaka satoseo apoka Xesosimoni. Satoseo inakoni !auikari ipīkani iuaīkana ökitikiniua.

²⁴ —Koerekareri, Moisesinira oerekari ia säkiretxiti: “Kiki meenetipanika ipininiä, iua itari takaroko tikinitakoro. Iua itari keene ininiä, itakauäkatari amarini iua itarini ipīpekarini uäka,” itxa Moisesini. ²⁵ Setxi itaritxiakori aua mitxi iŕkorapokoriti. Apia anekatakari iŕtaniriuata. Eereka ipīpe meenetika, ininiä itari takaro iuani tikinitakito. ²⁶ Iua atokokana iua itari ipīpe meenetika. Äti itari iuaīkana takaro iuani tikinitakito. Txamari iua atokokana ipīpe meenetika. Iua atokokana txaäpota ikinika itariakori. ²⁷ Eereka oa sito apaka opīpe. ²⁸ Ininiä ipīkani iuaīkana ökitikasaakia iuaīkana auäki ininina, iŕkiripa oitaniri aua oakata iusaaki? Kotxi ikinimane ninoa setxi itariakori takapekaro oa —itxarina iua.

²⁹ Ininiä Xesosi:

—Hite kerokari, kotxi !himarotari Teoso säkire iökat-sopatakori. !Himarotari Teoso posotiire apaka.

³⁰ Ipīkani iuaīkana aua inakasaaki, kona ninoa iŕtaniriuataika. Teoso nitiriakori iaxitikini atokopeka itxanako.

³¹ Hite !auikari ipīkani ökitikiniua iuaīkana auäki inini. Atauako kona hätatsopatapanikari Teoso säpiretakiti hitemoni? Iara isäpiretai:

³² Apraão, Isaki, Xakoo pakini Teosonekarano nota, itxa Teoso. Ininiä Apraão, Isaki, Xakoo pakini auäkipanika itxana, kotxi auäki inakani Teosonera iua. Ninoa uatxa auäki inakani, kotxi kona ipīkani Teosoneni Teoso —itxa Xesosi.

Iusaaki käkitemoni kenakotari ikara Xesosi säkire.

³³ Xesosi säkire ikenakotakasaakina, itsorīkaätana, kotxi paimatireri Xesosi apakapapiretakiti satoseoakorimoni.

Teoso Paniätakiti Apiari Akamini

(Marko 12.28-34)

³⁴ Xesosi iŕkiteritika apakapapiretari satoseo pimainiri, ininiä satoseo lipimarauataika. Pariseoakori kenakotari ikara, ininiä apotiitauana. ³⁵ Pariseo, Moisesi säkire oerekakari, iua nirekamari Xesosi kerokiniri isäkire. Ininiä ipimaäri:

³⁶ —Koerekareri, iŕkiripa Teoso paniätakiti apiari txataua? Kipa apiaerekata Teoso nireëkiti akamini? —itxa.

³⁷ Ininiä Xesosi apakapapiretari:

—“Pitiretariko Apiananiri piTeosone, ikinipoko pinireëkitiä, ikini päkixinireë, ikinipoko pixinikakitiä pakini.” ³⁸ Ikara atoko inakari Teoso merepitipanika paniätaua akamini. Iua ipaniätakiti akamini apiari itxaua. ³⁹ Iuaīkana Teoso paniätaua. Iua ipaniätakiti apaka apiari. Merepanika ipaniätakiti akamini atoko itxa. “Piteka pitiretiniäua atokotxikana, pitiretariko äti.”

⁴⁰ Iteene atiretiniäri Teoso, iteene atiretiniäri äti, ininiä akamapitikari apanakini Teoso paniätakiti, Moisesinimoni isäpiretakiti. Iteene atiretiniäri Teoso, iteene atiretiniäri äti, ininiä akamapitikari Teoso säkire säpiretakani paniätakiti apaka —Xesosi txari iua.

Teoso Mereëkiti Tavii Apika Mekaniri

(Marko 12.35-37; Arökasi 20.41-44)

⁴¹ Pariseoakori apotiitapanikaua inakasaaki, Xesosi pimaäna ninoa:

⁴² —Teoso mereëkiti pisäpiretano. Kiripa apika mekaniripa iua? —itxana ninoa.

Ninoa apakapapireta:

—Ari, Taviini apika mekanirira —itxana.

⁴³ Ininiä Xesosi:

—Ikara atoko ininiä, kinirepa Erekari Matamatakoti kamasäkiretari Tavii: “Teoso mereëkiti niauite itxaua,” ina säkiretini? ⁴⁴ Kotxi Tavii txari:

Apiananiri misäkiretari niauite: “Nota kikomoni pitopäkiniritika nixipokariko pimokaiakariakori. Nika-mariko ninoa pikiti pitakiniätaä atoko ininiua,” Apiananiri txari niauite, itxa Taviini. ⁴⁵ Ininiä Tavii akiritari Teoso mereëkiti “niauite.” Ikara atoko ininiä, kiätokopa itxa Teoso mereëkiti Tavii apika mekaniri ininiäua? —Xesosi txari pariseoakori.

⁴⁶ Kona imarotarina, ininiä kona kasäkirena ninoa. Ikara eereka kona käkiti pimarauataika Xesosimoni, kotxi ipīkarina Xesosi imarore.

Xoteo Auñteakori Maerekani
(Marko 12.38-40; Arókasi 11.37-54; 20.45-46)

23 Ininiã Xesosi misãkiretana imoianariakori, ito-
maneri kãkiti iuaã auakani apaka. ² Ia atoko
isãpiretana:

—Kaiõkatsoparerini, pariseoakori pakini, Moisesini
sãkire oerekakani itxauana. ³ Ininiãra ikinika kaiõkatso-
parerini, pariseoakori pakini paniãtakiti hĩkamako,
kotxi ninoa sãpiretari Moisesini sãkire Teoso oerekaki-
ti. Ikara erekari. Txamari kona ninoa kamari Moisesini
paniãtakiti. Ikara !erekari. Ininiã ninoa kamakiti atoko
!hĩkamape. Kotxi isãkirena erekari, txamari ikamakiti-
na !erekari. ⁴ Ninoa kaiõkatsoparerini, pariseoakori
pakini, kiki ia atoko inakari ninoa. Ia kiki takari iminani
imoianariakori porikiã, txamari iuaka na xatiki nirekari
iporikitiniri. Kaiõkatsoparerini, pariseoakori pakini,
ikara kiki atoko itxana. Ninoa paniãtakiti iua iminani
atoko itxa.

⁵ —Pariseoakori kamari erekari apanakini atamatini
ĩkapaninoka, ereka ininina apanakini uãkatini ĩkapani-
noka. Himarotari kãkiti ieretakari Teoso sãkire iõkat-
sopatakori aãkoana xapitikiri ãki. Eereka iaxirikarina
iteẽtaãna, iuakonotaãna pakini. Ninoa kaiõkatso-
parerini, pariseoakori pakini takari aãkoana mitari
apanakini atamatini ĩkapaninoka. Pañtanori itsarãpe
imãkana apanakini atamatini ĩkapani. ⁶ Kiinirisaaki ni-
noa nirekari kãkiti potxitiniãtaã iitopãkinina. Aiko ãki
Xoteoakori apotiitiniãtaãua inirekarina kãkiti potxi-
tiniãtaã iitopãkinina. ⁷ Apokaerekatarina okapiretikona
ipaxitikona kienatxi vëtxitikoãtaã. Apokaerekatarina
kãkiti akiritinina: “Koerekareri” inikona.

⁸ —Txamari, ãtinani hĩte oereẽkari txaua, Teoso
mereẽkitira iua. Koerekareri hiniko !hãuiritapeko, kotxi
himakinikara hĩtarakakaua. ⁹ Kona ĩkorapokoriti
auakari “niri,” !hĩtxape, kotxi ãtinani aĩri auari iaxiti
auakari. ¹⁰ Apaka apanakini akiritinii “aãuĩte,” !hãuiri-
tapeko, kotxi ãtinani hãuĩte. Teoso mereẽkiti itxaua.
¹¹ Auñtetxi pininiua pinirekiniã, apanakini nitiri atoko
pitxauako. ¹² Iua “Auñtetxi nitxaua,” inakari, Teoso txĩki-
takariko nitiritxi itxauako. Iua “Nitiritxi nitxaua,” in-
akari, Teoso txĩkitakariko auñtetxi itxauako.

Xoteo Auñteakori Misiritaãkako
(Marko 12.40; Arókasi 11.37-44, 52; 20.47)

¹³ Iuaĩkana Xesosi sãkirauata:

—Erepaniko hĩte kaiõkatsoparerinii, pariseoakorii
pakini. Hĩsãkire atxiĩti erekari, txamari kona hĩkamari
hĩsãkire iaõka. Kinirão ĩroãkari apisapanika aapokotxi
tore totakani atoko hĩtxa, kotxi hĩte iotokakari kãkiti
Teoso sãkire atão auikini, ininiãkara hĩte iotokakari
kãkiti ĩroini Teoso auñtetxi ininiãtaãua. Hĩte kona ĩroã.
Apaka kona hĩte auiritana kinirão ĩroãkani.

¹⁴ Erepaniko hĩte kaiõkatsoparerinii, pariseoakorii paki-
ni. Hĩsãkire atxiĩti erekari, txamari kona hĩkamari
hĩsãkire iaõka. Hĩte mixirikari tikinitakoro aapoko.
Himisirienetana. Teosokata hĩsãkirauatakasaaki, itori

sãkiretxi hĩkama apanakini, “paimatirena” inini ĩkapani-
nokara. Ikara xika himisiritiko apiatako.

¹⁵ —Erepaniko hĩte kaiõkatsoparerinii, pariseoakorii
pakini. Hĩsãkire atxiĩti erekari, txamari kona hĩkamari
hĩsãkire iaõka. Hĩte sari õtakoxiti. Hĩpiriãtari kãuaãri.
Imiriĩ õtakoxiti hĩsa, hĩsãkire auikakari hinitini ĩkapani.
Ãtinoka hĩsãkire auikakari auiniã, iuaritika hĩsa iuaxiti.
Eereka hõerekari iua ikinipoko himarotakiti. Eereka
hĩte maerekani xika, iua kiki maerekani apiatako. Isapi-
tika hĩtekata maerekani misiritikoãtaã.

¹⁶ —Erepaniko hĩte. Mõsiãreni atoko hĩtxa, iuaritika
hinirekari hõerekiniri Teoso kimapore apanakinimoni.
!Hĩposotari. Hĩte oerekari apanakini ia hĩsãkire: “Ia
nikamapitikako’ pinakasaaki, Teoso misãkiretiko aikoti
pakiriuãkatakasaaki, pimakamakaniãri, kona pimisiri-
taãkako,” itxa hĩte sãkire. Iuaĩkana hĩte sãkire:
“Nikamapitikariko,’ pinakasaaki, Teoso misãkiretiko
aikoti ãki auakoro pakiriuãkatakasaaki, pikamapi-
tikariko pikamaenetakiti. Ikara pimakamakanisaaki,
pimisiritaãkako,” itxa hĩte sãkire.

¹⁷ —Hĩte mõsiãreni atoko. Kona kĩkĩte hĩte. ĩkiripa
apiari? Orokani? Teoso misãkiretiko aikotikani? Teoso
misãkiretiko aikoti apiari, kotxi oa oro aiko ãki aua,
ininiã aiko txĩkitakoro oro Teoso nakito oniniãua.

¹⁸ —Hĩte oerekari apanakini ia hĩsãkire apaka:
“Nikamapitikariko’ pinakasaaki, Teosomoni sikakori
takikoãtaã pakiriuãkatakasaaki, pikamaenetakiti pi-
makamakaniã, kona pimisiritaãkako. ‘Nikamapitikako’,
pinakasaaki, Teosomoni sikakori takikoãtaã nopini
takakori pakiriuãkatakasaaki, pikamapitikariko pika-
maenetakiti. Pimakanakanisaakiri, pimisiritaãkako,”
itxa hĩte sãkire.

¹⁹ Hĩte mõsiãreni atoko hĩtxa. !Kĩkĩte hĩte. ĩkiripa api-
ata? Sikakorikani? Sikakori takikoãtaãkani? Sikakori
takikoãtaã apiata, kotxi sikakori inopini takikosaaki,
iuaaakipeka Teoso nakitipeka. Ininiã sikakori takikoã-
taã txĩkitakari sikakori Teoso nakiti ininiãua. ²⁰ Ininiã
pisãpiretakasaakiri Teoso pikamaenetakiti, Teoso
sikakori takikoãtaã pakiriuãkatiniã, iuatxikana iua
nopini auakari pakiriuãkata. ²¹ Pakiriuãkatakasaakiri
Teoso misãkiretiko aikoti, iua atokotxikana pakiri-
uãkatari Teoso, kotxi iua aiko ãki aua. ²² Pakiri-
uãkatakasaakiri Teoso tixine, ininiã iua atokotxikana
pakiriuãkatari Teoso topãkini. Iua atokotxikana pakiri-
uãkatari Teoso, kotxi Teoso topãkini nopini iitopãka
Teoso.

²³ —Erepaniko hĩte kaiõkatsoparerinii, pariseoakorii
pakini. Hĩsãkire atxiĩti erekari, txamari kona hĩkamari
hĩsãkire iaõka. Ipixini hinakiti hĩsikari Teosomoni. Tesi
hĩtii auiniãi, hĩsikari ãti Teosomoni. Tesi txineiro ota
auiniãi, hĩsikari ãto Teosomoni, hĩtxaãpota. Ikara hĩka-
makiti erekari. Nipokori koke, oteraã, erva tosi,
komínio, axapitikiri inakari, iuaritika ipixini hĩsika Teo-
somoni. Ikara Teoso paniãtakiti hĩkamapitika. Txamari,
Teoso paniãtakiti apiari !hĩkama, kotxi !hĩkamari atão
apanakinimoni. !Hiamonĩkana apanakini. Hĩkamaene-
takiti !hĩkama. Ikinika Teoso paniãtakiti hĩkamako.

²⁴ Mõsiãreni atoko hĩtxaua, iuaritika hinirekari

hõerekiniri Teoso kimapore apanakinimoni. !Hĩposotari. Himakatxakaro xikiri iãriã äki komokakaro, txamari hĩxirapoataro kamero, kotxi Teoso paniãtakiti poiãori hĩkama, txamari ipaniãtakiti apiari kona hĩkama.

²⁵ —Erepaniko hĩte kaiõkatsoparerinii, pariseoakorii pakini. Hĩsãkire atxiiti erekari, txamari kona hĩkamari hĩsãkire iaõka. Hõeretari hĩito maparakiri, txamari hãkixinireẽ !erekari. Papotxinanii, patirenanii, paĩtirii.

²⁶ Hĩte pariseoakorii, mõiãreni atoko hĩtxa. Merepiti-panika himakatxakariko maerekati hãkixinire auakari, ininiã hĩito erekatxikana. Hãkixinire ereka ininiã, hĩkamakiti ereka apaka.

²⁷ —Erepaniko hĩte kaiõkatsoparerinii, pariseoakorii pakini. Hĩsãkire atxiiti erekari, txamari kona hĩkamari hĩsãkire iaõka. Kai auĩte iriko, ipĩkari takikoãtaã atoko hĩtxa. Mapara txĩta kasarori minapaãkapeka, ininiã mapara peerekari. Txamari, iriko äki ipinakari api, arakapoakatakari aua. ²⁸ Iua atokokanera hĩtxa. Kãkiti uãkatai hĩte atão inakarinoka kamakani hininiua, kotxi hinopini ererini hĩtxaua. Txamari, hãkixinire !erer, kotxi maerekatinoka hĩkama. Hĩsãkire atxiiti erekari, txamari kona hĩkamari hĩsãkire iaõka —itxa Xesosi sãkire.

Xoteo Auĩteakori Misiritiko

(Arókasi 11.47-51)

²⁹ Iuaĩkana Xesosi sãkirauata:

—Erepaniko hĩte kaiõkatsoparerinii, pariseoakorii pakini. Hĩsãkire atxiiti erekari, txamari kona hĩkamari hĩsãkire iaõka. Hĩkamari akauari Teoso sãkire sãporetakanini ĩkapani. Peereri akauari hĩkama. Hĩkamari akauari ipĩkani atão inakarinoka kamakani ĩkapani. Txĩta himinapa akauariã. Aãui hĩtaka iuaãtaã. ³⁰ Hĩtxari: “Kĩtxakapirĩka aãtokiriakorini okana Teoso sãkire sãporetakani. Atepitika auaãkamako iuasaaki, konimako ate okana ninoa,” hĩtxa. ³¹ Teoso sãkire sãporetakanini okakani mekaniriakori hĩtxaua hĩte. Kotxi hĩtekara txari: “Aãtokiriakorini okana Teoso sãkire sãporetakani.” Hĩte maerekati kamakani ninoa atokokana hĩtxa. ³² Hãtokiriakorini mipotorikari Teoso sãkire sãporetakani okinina. Hĩte xipokapanikanako ätikaka kaikotakani Teoso sãkire sãporetakani.

³³ —Imini atoko hĩtxa. Imini anaakori atoko hĩtxa hĩte. Himisiritaãkapitikako maerekani misiritikoãtaã. Himitekini !auari. ³⁴ Ininiã nisãpiretai hĩte. Niokanatanipakari hĩtemoni Teoso sãkire sãporetakani, Teoso iokanapirena imarotakani, koerekarerini pakini niokanata hĩtemoni. Txamari ätikaka hõka, aamina ĩpiriãmitakari nopini hĩtokakitana apanakini. Apanakinipekana hĩxirokitata aiko Xoteo apotiitiniãtaãua. Eereka hãsikatikinitana ninoa äti sitatxitimoni sikani, eereka äti sitatxitimoni, eereka äti sitatxitimoni hĩtxaãponãta ninoa hãsikatikinitini. ³⁵ Ininiã hĩte misiritãkako ikinika atão inakari kamakani okiko xika. Kĩtxakapirĩka Apeo inakorini okapeẽka. Atão inakari kamakari iua. Ikinimane okapekoni tikinimoni okapeẽka Sakariani, Parakia äkiri. Iua Sakariani okapeẽka sikako-

ri takikoãtaã takote Teoso misãkiretiko aikoti äki.

³⁶ Atãopitikara nisãpiretai hĩte. Kãkiti uatxa auakani apakapariko misirikaretxi ninoa erekarini okapekoni xika —itxa Xesosi sãkire.

Xerosareẽ Xesosi Tiretini

(Arókasi 13.31-35)

³⁷ Iuaĩkana Xesosi sãkirauata:

—Xerosareẽ auakanii, Xerosareẽ auakanii, hĩte okapekana Teoso sãkire sãporetakani. Kai soroã hĩkiporonakana ninoa hĩtemoni Teoso iokanatakini. Kaiãokatanini ninirekamari ninĩkatinii, patari oimiakori omĩkita patapi otakini atokokana nitxanakamaiko hĩte. Txamari !hãuiritano nota nĩkatinii. ³⁸ Ikara atoko inakari xika haãpoko asikaãkako. Teoso !auaika hĩtekata. ³⁹ Nisãpiretai. Ia õti hãtamatanano, eereka !hãtamataikano. “Teoso takari erekari uaimoni ĩkarimoni, Apiananiri posotiireẽ ĩkarimoni,” hinakasaaki, iuasaakinanirako hãtamatanoko nota —itxa Xesosi.

Teoso Misãkiretiko Aikoti Iririkio

(Marko 13.1-2; Arókasi 21.5-6)

24 Teoso misãkiretiko aikoti Xesosi portorikasaakipeka, imoianariakori apoka iuamoni.

—Patamata. Peerepokori aikoniri —itxarina.

² Ininiã Xesosi:

—Ari, hãtamatatari ere aikoniri? Atãopitikara nisãpiretai hĩte. Koniko kai kaikotapani äti kai nopini. Imakinika kai irikaãkako —itxana.

Misirikaretxi Apokaenetini

(Marko 13.3-13; Arókasi 21.7-19)

³ Iposo atoko Xesosi sari oxiratarimoni, Oriva inakorimoni. Iuaã topãka itxa. Imoianariakori sari iuamoni. Ninoanoka auari iuaãtaã.

—Pisãpiretaua kirisaakiparako aiko Teoso misãkiretiko irikataãkako. Natokopa ininiãparako ate imarotatari pite kaiama kanapirikape pinini? Natokopa ininiãparako aimarotatari itixi xipokini õti kaiamapeka inini õti? —itxarina Xesosi.

⁴ Ininiã Xesosi:

—Erepaniko. !Hãuiritapena apanakini misirienetini. ⁵ Kotxi apokako kãkiti itomaneri “Teoso mereẽkiti nitxaua nota,” inakani. Ninoa misirienetana itomaneri.

⁶ Hĩkenakopiretariko neenamati ene uaimoni, õtakoxiti apaka. Iuaritika !hĩpĩkarauatape. Kotxi auapitikako neenamati. Txamari itixi xipokini õti !apokapanika.

⁷ Ikara inakari apisapanika, äti uãka neenamauatoko äti uãkakata. Apanakini auĩte inirimanekata neenamauatoko apanakini auĩtekata inirimane pakinikata. Ätiãtaã kãkiti inikoriãriko natxi. Ätiãtaã amianari inokanako kãkiti. Ätiãtaã itixi iakeẽkatakoko. ⁸ Ikara atoko itxako misirikaretxi potoriakini. Sito amarini tsii atoko itxako iuasaaki.

⁹ —Iuasaaki hĩte maĩkaãkako, himisiritiko ĩkapani. Iposo atoko oka hinaãkako. Nisãkire hãuikini xika ikini- mane omanataiko hĩte. ¹⁰ Iuasaaki itomaneri !auikaikari Teoso sãkire. Itakanapapekarina Teoso

kimapore. Imīkapiritakakanako. Omanatakakanako. ¹¹ Apokako kākiti “Nota Teoso sākire sāpiretakari nitxaua,” inakari. Txamari kona atāo. Ninoa misiriene-tanako itomaneri kākiti. ¹² Kākiti tiretiko poiōotako, kotxi maerekanitxi iarikako ikini itixitimoni. ¹³ Iuasaaki kākiti mīteenekiniāri misirikaretxi, imatakanapakaniāri Teoso sākire, auapikako ātipirika Teosokata. ¹⁴ Teoso iokanapirena erekari, Teoso auītetxi ininiāua, sāpiretaākako ikini itixiti auakani, ikini kākiti imarotini ūkapani. Ikara inakari auaāka atokoikarako itixi xipokini ōti apokako.

Iteene Maerekanitxi Apokini

(Marko 13.14-23; Arókasi 21.20-24)

¹⁵ Xesosi sāpirenauatapanika:

—Hīte itikariko iteene maerekati kamakari timini aiko Teoso misākiretiko āki. Kitxakapirīka Tanieo inakori, Teoso sākire sāpiretakari, sāpiretapekari ikara ene. Hīte ia atatsopatakani, himarotariko ikara. ¹⁶ Ikara atoko inakari hītikasaaki hīte ūkorapokoriti Xotéia auakani, oxiratarimoni himitekako. ¹⁷ Ikara ōti apokasaaki haāpoko nopini hāuiniā, katima hītixako himitekini. !Apakata haāpoko āki hītii himaktxakini. ¹⁸ Kikio hīparīkauanātakasaaki, hāapokomoni !hīkanapiripe himāka hāpini ūkapani. ¹⁹ Ikara ōti apokasaaki, kamixironi, kaxitakareroni pakini iteene atatsiitariko. Pasāpaniri ninoa mitekini. ²⁰ Hamanaāriko Teoso katxīkareri mauakani himitekini ōtisaaki. Hamanaāriko tomatiko ōtisaaki ikara inakari mauakani ūkapani. ²¹ Kotxi ikara mitekatzki ōtisaaki kākiti iteene atatsiitariko imisiritiko. Ikara ōti apisa kākiti !imarotari iteene imisiritiko. Itixi kamikosaakipanika !auari ikara atoko inakari misirikaretxi. Ikara mitekatzki ōti napaāka atoko kākiti !imarotaikari iteene imisiritiko. Ikara ōti apiatakako kākiti misiritiko. ²² Teoso poiōotakari iua ōti ikinipoko kākiti mapinakani ūkapani. Ito ōti ininiā, kākiti !auaika. Ipoiōotakari iua ōti, kotxi itiretana kākiti imereēkini.

²³ —Iuasaakiko āti: “Ia kiki Teoso mereēkiti aiātapakiti inakari,” inakasaaki, !hāuikapiri. Ātipekana: “Ikira Teoso mereēkiti inakari,” inakasaakii, !hāuikapiri. ²⁴ Kotxi apokako kākiti paxirari kamakari, “Teoso mereēkiti hiātapakitino nota,” inakari, “Teoso sākire sāpiretakari nitxaua nota,” inakari. Ninoa kamariko posotiiretxi kākiti tsorikitaātini ūkapani. Inirekarina kākiti Teoso mereēkini imisirienetinina. ²⁵ Hīkenakota. Nōtākikai hīte ikara inakari apokini ōti apisa.

²⁶ —Hīte sāpiretikosaaki: “Hīkenakota. Teoso mereēkiti aiātapakiti āparaā makipakaniātaāpekarari,” hinikosaaki, !hīsipe iuaā. Hīsāpiretikosaaki: “Iriko ākirari iua,” hinikosaaki, kona hāuikapiri. ²⁷ Kotxi nota hītari iaxitikiri nikanapiriākasaaki, !ikara atokoni nitxa. Mēkokari atoko itxa nota hītari iaxitikiri nikanapiriākasaaki, kotxi mēkokari atokatxi pokīkinimoni imēkoka, isapitipo atokatxi ereēkokinimoni, ininiā ikinimane itikariko. Iua atokokana nota hītari iaxitikiri napokini. Ikinimane itikanoko nota. ²⁸ Aātamatakasaakiri maiori apotiitiniua, aimarotari ipīkari iuaātaā auini. Iua

atokokana nota kanapiriākasaaki, ikinimane imarotari napokini.

Kākiti Itari Iaxitikiri Kanapiriini

(Marko 13.24-27; Arókasi 21.25-28)

²⁹ Xesosi sāpirenauatapanika:

—Apikomoni nisāpiretai nikanapiriini pirena. Iua inikoriākori napaka atoko, atokatxi piākako. Kasiri kona ponikaikako. Iōriki iaxitikero irikako. Iaxiti iōriki auiniātaā auakari iakeēkatakako. ³⁰ Iuasaaki Teoso takaōtxikare auako iaxiti, nota hītari iaxitikiri ka-iamapeka uai nikanapiriini himarotini ūkapani. Ikara atoko inakasaaki, ikini kākiti itixi auakani txiapatakako, kotxi ninoa atapanoko nota kākiti itari iaxitikiri katxiāri āki nikatxakaāpotini. Nitapararitika napoākatakako, kotxi ikinimane auīte nitxauako iuasaaki. Niotximerekata nikatxakaāpota. ³¹ Okenakotaākako koitxi mitaro, trōpeta inakoro. Iuasaakipekako niokanatanana ninitiriakori itixi iaōka kākiti Teoso mereēkini apotiitakani ūkapani.

Piko Mina Pirena

(Marko 13.28-31; Arókasi 21.29-33)

³² Xesosi sāpirenauatapanika:

—Nisāpiretai sāpirenatxi atāo inakari oerekiko, piko mina pirena, nikanapiriini apiata himarotini ūkapani. Pooīoporipeka onakasaaki, otomorekasaaki, “Kamoī apokanapanoka,” hītixa. ³³ Iua atokokana, ikara misirikaretxi mixikanani nisāpiretakiti hītikasaaki, himarotapekariko nota kaiama kanapirikapeka ninini. ³⁴ Ia nisākire atāo. Itixi auakani !ixipoka ikinipoko nisāpiretakiti mapokakani apisa. ³⁵ Iaxiti xipokapitikako. !koraxiti apaka xipokapitikako. Iuaritika nota sākire !ixipoka.

Kākiti !Imarotari Xesosi Apokini Manapi

(Marko 13.32-37; Arókasi 17.20-37)

³⁶ Xesosi sāpirenauatapanika:

—Kākiti !imarotari ikara ōti, nota hītari iaxitikiri nikanapiriini ōti. Teoso nitiriakori iaxitikini apaka !imarotari ikara ōti. Nirinanira imarotari. ³⁷ Nota hītari iaxitikiri nikanapiriākasaaki, kitxakapirīka Noee auakasaaki atoko itxako. ³⁸ Xirataātxi apisa ikinimane nipokota, iāta itxa. Kiki, sito !taniriuata. Ikara atokokanera itxa Noee maporo āki iereētini ōti. ³⁹ Ikara apisa !imarotarina ipininina tīkane. Mokatanitika xirataātxi apoka, ikinikana xipoka itxana. Nota hītari iaxitikiri nikanapiriākasaaki, iua atokokanerako itxa, ininiā iposope hītixako.

⁴⁰ —Iuasaaki nikanapiriini ōtisaaki, ipi kiki parīkauanāta kikio. Teoso nitiri iaxitikiri anikariko āti, āti kaikota itxako. ⁴¹ Ipi sito atarokiri kamakani, āto anikaākako, āto takanapaākako. ⁴² Ininiā iposope hītixako, kotxi kona himarotari hāuīte kanapiriini ōti. ⁴³ Hīxinikariko. Kaapokori imarotaākamariko kīitiriri apokini ōti, !imakamako. !Auiritamariko kīitiriri anikiniri itii. ⁴⁴ Kīitiriri apoka kākiti miātapakinitipanika. Iua atokokanerako nota apokako himimarotakinitini-

panikarako. Ininiã iposope hĩtxako nota hĩtari iaxitikiri hiãtapini —itxa Xesosi sãkire.

Nitiritxi Erekar, Nitiritxi Maerekati Pakini
(Arókasi 12.41-48)

⁴⁵ —Ininiã Teoso nitiriakori erekarini hĩtxauako. Nisãpiretai nitiritxi kimaroreri inakari, kotxi iua kĩpitari ipatrãote sãkire. Iuakara ipatrãote paniãta, apanakini initiriakori inĩkatini ĩkapani. Isikakienatana ipatrãote nitiriakori, nipokori sikiko manapi. ⁴⁶ Iua initiri poxokoniua ipatrãote paniãtakiti iaõka ikaminiã, ipatrãote apokasaaki iposope itxa. ⁴⁷ Atãopitikara nitxai hĩte. Iua patrão paniãtariko iua initiri ikinika inakiti inĩkatini ĩkapani. ⁴⁸ Nitiritxi maerekatipekana xinikari: “!Katimari ikanapiriã nipatrãote,” itxa. ⁴⁹ Ininiã apanakini nitiritxi ixiroka. Inipokota, iãta poãtakanikata. ⁵⁰ Ininiã ipatrãote kanapiriãko imiãtapakinitipanika. Ikanapiriãko initiri mimarotakinitipanika. ⁵¹ Ininiã ipatrãote xirokitatariko aãpitsaã. Iposo atoko imisiritaãkako maerekaniakata, “Erekapitikaua ate,” inakanikata. Iuaã kãkiti txiapata, akatsatsiriãtaua ätipirika. Ininiã ikara nitiritxi maerekati atoko kona hĩtxape —itxa Xesosi sãkire.

Tesi Ätokoroakoro Pirena

25 Xesosi sãpirenauatapanika:
—Ia nisãpirena oerekai Teoso auĩtetxi ininiãua. Tesi ätokoroakoro kosekari tirikapi. Isana kimaporiã. Iãtaparina ipatrãotena. Iua inapanikako kiinirimoni ĩtanorouatini ĩkapani. ² Sĩko ätokoro kĩkiterini, sĩko miĩkiteni. ³ Miĩkiteni anikari tirikapi koana, txamari !anikarina tirikapiã. ⁴ Kĩkiterini anikari tirikapi koana. Apaka anikarina tirikapiã. ⁵ Ipatrãotena !katimari apokini. Ininiã itaponoka ininiãna, imakanãtana. ⁶ —Apanĩkanõka ikenakotarina: “Apokanapanoka. Hĩsapoka. Hãpiãkatari.” ⁷ —Ininiã ätokoroakoro õkitikaua, tirikapi iopotokaka, sa itxana. ⁸ Ninoa miĩkiteni amanaãri kĩkiterini tirikapiãte, kotxi miĩkiteni tirikapite oakaarita. ⁹ —Kĩkiterini apakapapiretana: “Kona. Tirikapiã ate nakiti !apakata hĩte ĩkapani. Ate ĩkapaninokara apakata. Hĩsa tirikapiã vëxtitarimoni. Hiamotariko.” ¹⁰ —Ininiã ninoa miĩkiteni sari tirikapiã iamotinina. Ninoa sikasaaki, ipatrãotena apoka. Ätokoroakoro iposope inakani ĩroã iuakata aapokotxi äki ĩtanorouatakari kiiniritiã. Itore totaãka. ¹¹ —Eereka ätokoroakoro tirikapiã amotakani kanapiriã. Ninoa akirita: “Patrão, patrão, pimatakakinua itore aĩroini ĩkapani,” itxana. ¹² —Ipatrãotena apakapapireta: “Hĩsipeka. Atão nisãpiretai. !Nimarotai hĩte.” ¹³ Xesosi sãkirauata:
—Erepaniko. Iposope hĩtxako, kotxi !himarotari nota hĩtari iaxitikiri kanapiriini õti. !Himarotari amoniki-tauako napokini —itxa Xesosi.

Ipi Äti Pakini Nitiritxiakori
(Arókasi 19.11-27)

¹⁴ Xesosi sãpirenauatapanika:

—Nikanapiriini ia atoko itxapaniko. Kiki aiamatapeka õtakoxiti äti itixitimoni isini ĩkapani. Ininiã akiritari initiriakori. “Hinĩkatariko ikini nitii,” itxana. ¹⁵ Isikari initiri apia imaroretakari txineiro ota sĩko mio. Äti initiri isika txineiro ota ipi mio. Äti initiri poiãoka imarotakari ätika mio txineiro ota isikari iua. Eereka sipe itxa.

¹⁶ —Sĩko mio apakapakari amotari tiitxi, eereka vëxtita itxari. Ikara atoko ininiã apakaparo txineiro ota tesi mio. ¹⁷ Iua ipi äti mio apakapakari iua atokokana itxa. Iua apakaparo ipi ipi pakini mio txineiro ota. ¹⁸ Iua ätika mio txineiro ota apakapakari, ikisakari kipatxi, taka itxaro txineiro iua aariko äki. Ikataro ipatrãote txineirote.

¹⁹ —Eereka okananixiti inaka atoko ipatrãotena kanapiriã. Akiritana: “Kiãtokopa hĩtxataro nitxineirote?” itxana. ²⁰ Iua sĩko mio apakapakari minari tesi mio. Iua sãpiretari ipatrãote: “Patrão, pite sikano sĩko mio txineiro ota. Patamata. Napakapari apikomoni sĩko mio txineiro ota pite ĩkapani,” itxa.

²¹ —Ipatrãote apakapapiretari: “Erekapitikai pite. Erekar nitiritxi pitxaua. Erekar pinĩkatiniro nitxineirote. Erekapitikari pinĩkatiniro poiãoka nisikini. Ininiã nauritaiko itomaneri pinĩkatini. Ininiã pipoxokoniuaatako notakata,” itxa.

²² —Iua ipi mio ota apakapakari apoka. Iminaro ipi ipi pakini mio. Isãpiretari ipatrãote: “Patrão, pite sikano ipi mio txineiro ota. Patamata. Apikomoni nota apakaparo ipi mio txineiro ota pite ĩkapani,” itxa.

²³ —“Erekapitikai pite. Erekar nitiritxi pitxaua. Erekapitikari nitxineirote pinĩkatini. Erekar poiãoka pinĩkatini. Ininiã itomane nitakanapako pinĩkatini ĩkapani. Ininiã pipoxokoniuaatako notakata,” itxa.

²⁴ —Eereka iua ätika mio txineiro ota apakapakari apoka. Iua sãpiretari ipatrãote: “Patrão, nimarotai pite. Pataparaxinirei pite. Pite amotari pikiena, kotxi kona pite takarauata. Pite apari pikiena pimaparĩkau-atakaniãtaã. ²⁵ Nipĩkarauatiniã, nikipataro pitxineirote kipatxi äki. Patamata. Oia pitxineirote,” itxa.

²⁶ —“Nitiritxi maerekati iareri pitxaua pite. Pimarotari niamotiniri nikiena, kotxi !nitakarauata. Pimarotari nota apari nikiena nimaparĩkauatakaniãtaã. ²⁷ Ikara atoko ininiã, pimanirekakaniãri piparĩkauatini, kinirepa kona pisikatari nitxineirote päkomoni? Pisikaãkamaroko, napakapamaroko apikomoni nitxineirote nikanapiriãkasaaki,” itxa.

²⁸ Ininiã äti ipaniãta:

—“Pimakatzakariko iua mio ätika mio auakiti. Tesi mio txineiro ota auakitimoni pisika. ²⁹ Kotxi apikomoni isiãkako iua itomaneri auakiti, ininiã apiata auinariko iua. Iua poiãoka auakiti, inakito mixirikaãkako. ³⁰ Ia ninitiri iareri hõka mapara piãkatximoni. Iuaã kãkiti txiapata. Akerakitatsiriãta itsii xika.”

Ikinimane Apotiitaākako Xesosi Apisatoō

³¹ Apikomoni Xesosi sāpirenauata:

—Nota hītari iaxitikiri nikanapiriākasaaki auītetxi nina-kasaakia, ikinika Teoso nitiriakorikata, niitopākako auītetxi itopanere nopini. Peerekari iusaaki. Ikinimane paxitanoko nota. ³² Ikini uākati kākiti apotiitaākako nota apisatoō. Iusaaki nikaarikitatanako nino. Soti auīte, kapra pakini piratakari ipiraakori koke-takaniaua ikaiarikitatini atokokanera, nota hītari iaxi-tikiri kaiarikitatanana ikinimane kākiti. ³³ Pirātxi piratakari takiniri soti auīte ikikomoni, itakiniri kapra isanaremonni, iua atokokanera nota hītari iaxitikiri takari kākiti erekarini nikikomoni. Kākiti maerekani nitaka nisanaremoni.

³⁴ —Eereka nota kākiti auīte txanako nino kākiti erekarini nikikomoni auakani: “Niri sikari erekari hīte-moni. Hina. Hīroā auītetxi nininiātaāua. Ia auītetxi nininiātaāua maiamatapeēkaika hīte īkapani itixi kamikosaakipeka. ³⁵ Mitxipeka ninatxitakasaaki, hīte sikakienatapekano nota. Niposonatakasaaki, āparaā hīsikapekano. Āti itixiti nīkasaaki, hīte apakapapekano nota. ³⁶ Nimamākanisaaki, mākatxi hīsikapekano. Namianatakasaaki, hinīkatapekano. Kateia āki nauakasaaki, himotikaētapekano. Ininiā hīroā,” nota kākiti auīte txanako kākiti erekarini.

³⁷ —Ininiā kākiti atāo inakari kamakani apakapapiretariko: “Apiananiri, kirisaakipa pinatxitakasaaki, asikakienatai? Kirisaakipa piposonatakasaaki, āparaā asikai? ³⁸ Kirisaakipa āti itixiti pīkasaaki, āpapakapai? Kirisaakipa pimamākanisaaki, mākatxi asikai?

³⁹ Kirisaakipa pamianatakasaaki, anīkatai? Kirisaakipa kateia āki pauakasaaki, amotikaētai?” itxanonako nota.

⁴⁰ —Ininiā nota kākiti auīte apakapapiretanako: “Atāopitikara nitxai hīte. Kākiti poiāori, nisākire auīākari, hītiretiniā, iusaaki nota hītiretini atokokana hītiretari,” nitxanako nino.

⁴¹ —Iusaaki nitxanako nisanaremoni auakani: “Hīsipeka. Teoso misiritaike hīte, kotxi !hīkīpitari iua sākire. Hīsipeka arikatxi maxipokatimoni. Teoso kamari iua arikatxi, Satanasi misiritikoātaā tīkane, Satanasi nitiriakori misiritikoātaā tīkane. Hīsipeka iuamoni. ⁴² Kotxi ninatxitakasaaki nipokori !hīsikano. Niposonatakasaaki, āparaā !hīsikano. ⁴³ Āti itixiti nīkasaaki, !hinirekano haāpoko napokini. Nimamākanisaaki, kona mākatxi !hīsikano. Namianatakasaaki, !hinīkatano. Kateia āki nauakasaaki, !himotikaētano,” itxanako kākiti maerekani.

⁴⁴ —Ininiā nino apakapapiretariko: “Apiananiri, pinatxitakasaaki, piposonatakasaaki, pamianatakasaaki, pimamākanisaaki, kateia āki pauakasaaki, āti itixiti pīkasaaki, kirisaakipa ate !apakapai?” maerekani txanoko nota.

⁴⁵ —Ininiā nota kākiti auīte apakapapiretanako nino: “Atāopitikara nitxai hīte. Himanirekakanisaakiri hītiretiniri kākiti poiāori nisākire auīākari, iusaaki !hinirekari nota hītiretini,” nitxanako nino.

⁴⁶ —Ininiā Teoso iokanatanako nino maerekani kamakani misiritikoātaā. Iuaātaā nino misiritikoātaākapikako. Imisiritikona kona xipokaikako. Kākiti atāo inakarinoka kamakani auapininiika imaxipopekaniika Teosokata —itxa Xesosi.

Xesosi Okaenetiko Pirena

(Marko 14.1-2; Arókasi 22.1-2; Xoāo 11.45-57)

26 Ikara inakari isāpiretaka atoko, Xesosi misākiretana imoianariakori:

² —Hīte imarotari ipi ōti napaka atoko aua Páskoia inakori kiiniriti. Iua kiiniriti auakasaaki nota hītari iaxitikiri nisikaākako nimokaiakariakorimoni. Aamina ĩpiriāmitakari nopini nitakaākako. Iua atoko ipina nitxako —Xesosi txana imoianariakori.

³ Iusaaki sasetotxi auīteakori, kaiōkatsopareriakori, kiomātxiakori pakini apotiitaua. Sasetotxi auīte apiatakari Kaipasi inakori aapoko āki apotiitauana. ⁴ Imapapiretarina Xesosi imaīkinina īkapani. Inirekarina Xesosi imaīkinina apanakini mimarotakinitika. Imisākiretakakana Xesosi okinina īkapani.

⁵ —Kiinirisaaki !amaīkapaniri. Amaīkiniāri, apanakini kākiti naiatamaua ate —itxakakana.

Sito Kamariāro Mīkaro

(Marko 14.3-9; Xoāo 12.1-8)

⁶ Xesosi auanāta aapokotxi Petánia inakoriātaā. Isari Simāo inakori aapokomoni. Iua Simāo mitxi amianatakari, maere matati. Eereka erekapekari. ⁷ Simāo aapoko Xesosi auakasaaki, sito apoka iuamoni. Ominari kopitipaki kai kamakori, kai arapástiro inakori. Kopitipaki xāpoka kamariāro. Oa pakaronero. Xesosi nipokonātakasaaki, oa sito kitakaro kamariāro ikiiā.

⁸ Imoianariakori itikari Xesosi kiiā okitakiniro, ininiā nino naiataua:

—Kinirepa oa ioanataro kamariāro? ⁹ Kinirepa kona ovētxitataro? Ovētixitaākamaroko oāpakapamaroko txineiro ito, matxineirotenimonikari osikini īkapani —itxakakana.

¹⁰ Xesosi imarotari nino ikara atoko ininina.

—Kinirepa homanataro oia sito? Erekari okaminano notamoni. ¹¹ Auapikanako matxineiroteni hītekata. Kona nota auapani hītekata. ¹² Oia kitakaro kamariāro nikiiā, nota iposope ninini nikatiko apisa. ¹³ Atāo nisāpiretai hīte. Teoso iokanapirena erekari sāpiretikoātaā ikini itixiti, isāpiretaākako apaka oia sito kitakiniro kamariāro nikiiā, ininiā kākiti ikini itixiti auakani xinikapikaro oa —Xesosi txana nino.

Xotasi Sari Sasetotxi Auīteakorimoni

(Marko 14.10-11; Arókasi 22.3-6)

¹⁴ Eereka Xesosi moianari Xotasi Isikariotxi inakori sari sasetotxi auīteakorimoni.

¹⁵ —Xesosi nisikiniāi hītemoni, kiripa hīte sikano nota? —itxana nino.

Ininiā nino:

—Asikaiko trīta txineiro ota pirata kamakoro —itxana nino.

Ininiã iĩkitxitarina. ¹⁶ Eereka Xotasi iãtapari Xesosi poiãonoka kãkitikata auakasaaki, imĩkapiritiniri ĩkapani.

Páskoa Kiiniriti Kamiko
(Marko 14.12-21; Arókasi 22.7-13)

¹⁷ Pão miãtiãkati nikiko kiiniriti potorikini õti, Xesosi moianariakori apoka iuamoni.

—Namonipa ate maiamatari Páskoa kiiniriti pite ĩkapani? —itxarina iua.

¹⁸ —Hĩsa sitatximoni. Nisãpiretakiti iaõka hinitari kiki. Hãpokasaakiri, hĩtxariko iua: “Koerekareri txai, ipinini tĩkane kaimapeka. Ikamariko kiiniri Páskoa inakori pite aapoko imoianariakorikata,” hĩtxako.

¹⁹ Ininiã imoianariakori kamari Xesosi paniãtakiti iaõka. Imaiamatari ikinika kiiniri ĩkapani.

²⁰ ĩkanõkapeka inakasaaki, Xesosi imoianariakorikata topãka inipokotinina ĩkapani. ²¹ Inipokotakasaakina, Xesosi txana:

—Atão nisãpiretai hĩte. Ātika hĩte sauaki mĩkapiritanoko nota.

²² Ininiã imoianariakori tsorĩkaãta. Iteene imatinaniuatana. Āti pimaãri:

—Apiananiri, atauako notakani?

Iua atokokana ãtipekana:

—Apiananiri, atauako notakani?

Ikara atoko itxanãtana ikinikana, ipimaaãpotinirina Xesosi. ²³ Ininiã Xesosi apakapapiretana:

—Ia tiitxiã notakata nikakari mĩkapiritanoko. ²⁴ Nota hĩtari iaxitikiri okaãkako. Teoso sãkire iõkatsopatakori sãpiretapekari nipinini tĩkane. Nota hĩtari iaxitikiri mĩkapiritakari iteene misiritaãkako. Erekariko maponaniãkatika inaãkamako.

²⁵ Ininiã Xotasi kamĩkapirireri misãkiretari Xesosi:

—Koerekareri, atauako notakani?

Xesosi apakapapiretari:

—Ari, pitepitikara.

Xesosi Īto, Iarẽka Pakini
(Marko 14.22-26; Arókasi 22.14-23; 1 Korĩto 11.23-25)

²⁶ Inipokonãtakasaakina, Xesosi kosekari komiri. Imisãkiretari Teoso:

—Erekapitikari ia komiri pisikakiti atemoni —itxa.

Eereka imaxinĩkitari, sika itxari imoianariakorimoni.

—Apakapa, nika hĩtxako. Ia niĩto —itxana.

²⁷ Eereka ikosekari iãkoanatxi iãriã auini. Imisãkiretari Teoso:

—Erekapitikari ia iãriã pisikakiti atemoni —itxa.

Eereka sika itxari iãkoanatxi ninoamoni:

—Hĩkinika hiãtariko. ²⁸ Ia niarẽka xiketakari makatxakariko kaiãopokori kãkiti maerekani. Teoso sãpiretapekari kãkiti ikamaenetakiti amaneri kãkiti ĩkapani. Ia niarẽka oerekari kãkiti, Teoso kamapekari ikamaenetakiti. ²⁹ Atão nisãpiretai. !Niãtaikaroko ovapeẽ, Teoso auĩtetxi ininiãtaãua nimapokakanisaaki. Iuaã napokasaaki niãtari. Amaneri iãriãti niãtako hĩtekata —itxana imoianariakori.

³⁰ Xipoka atoko ixikaretarina xikari Teoso ĩkapani. Eereka isana oxiratarimoni Oriva inakorimoni.

Xesosi Sãpiretari Petro Kipatiniri Iua
(Marko 14.27-31; Arókasi 22.31-34; Xoão 13.36-38)

³¹ Iuaã Xesosi misãkiretana imoianariakori:

—Ia ĩkanõkati hĩkinika hĩte takanapanoko nota, kotxi Teoso sãkire iõkatsopatakori sãpiretapekari ikara atoko inakari. Itxari:

Nokariko soti auĩte piratakari, ininiã ikinika ipiraakori iarikitatako, itxa Teoso sãkire iõkatsopatakori. ³² Ininiã eereka nota nipinaãka atoko, iuaĩkana nõkitikaãkaua atoko, nisako hĩte apisa Karirẽiamoni —itxa.

³³ Ininiã Petro apakapapiretari:

—Nota !nitakanapai pite. Atxiĩti ikinimane takanapai, iuaritika kona nota takanapai —itxa.

³⁴ Ininiã Xesosi:

—Atão nisãpiretai. Ia ĩkanõkati patari sãkirauatini apisapanikako, “!Nimarotari iua,” pitxanoko ipi ãti pakinikata.

³⁵ Ininiã Petro:

—Ikara atoko !nitxapanii pite. Nikipatinii apisapanikamako, nipinamako.

Ikinika Xesosi moianariakori ikara atoko itxana.

Xesosi Misãkiretiniri Teoso Xetsẽmani Inakoriãtaã
(Marko 14.32-42; Arókasi 22.39-46)

³⁶ Eereka Xesosi sari imoianariakorikata Xetsẽmani inakoriãtaã. Xesosi:

—Uai hĩitopãka. Ikiraã nisako Teoso nimisãkiretini ĩkapani —itxa Xesosi.

³⁷ Anikari Petro, Sepeteo anaakori ipi pakini iuakata isinina. Iuaã Xesosi tsorĩkaãnãta, imaromaxiretari.

³⁸ Imisãkiretana ninoã:

—Nixinire imaromaxiretari. Iteene nimaxire, ininiã okaaritano. Uai hĩkaikota. Araõkire hĩtxako —itxana ninoã.

³⁹ Apikomoni isa, pamaka itxa, misãkireta itxari Teoso:

—Niri, atauako apakata pimakatxakiniri nimisiritiko akamoni ĩkari? Kona ninirekari natatsiirauatini. Iuaritika pite nirekiniãri, ininiã nota apaka nirekari —itxari Teoso.

⁴⁰ Iuasaaki ikanapiriã ipi ãti imoianariakori auiniãtaã. Ninoã imakanãta:

—Petro, atauako kona hĩte mĩteenekari hĩtikapokotini ãto oaranoka? ⁴¹ Erepaniko. Hinirekasaakiri maerekati hĩkamini, !hĩkamapiri. Araõkire hĩtxako. Himisãkiretariko Teoso, ininiã !hĩkamari maerekati. Kãkiti xinire atxiĩti !nirekari maerekati ikamini. Txamari kãkiti ĩto tapara poiãoka, ininiã ikamari maerekati. Ininiã erepaniko —Xesosi txari Petro.

⁴² Iuaĩkana isa apikomoni Teoso imisãkiretini ĩkapani: —Niri, pinirekiniãri natatsiitini nimisiritiko akamoni ĩkari, ininiã nikamapitikariko pinirekakiti —itxari Teoso.

⁴³ Iuaĩkana ikanapiriã imoianariakorimoni. Imakanãtapanikana. Itaponoka itxana. Kona iposotarina ikoat-

inina. ⁴⁴ Iuaĩkana Xesosi takanapana, iuaĩkana ikanapiriã iuaãtaãkana. Iuaĩkana misãkireta itxari Teoso. Mitxi atokokana itxa isãkire.

⁴⁵ Iuaĩkana ikanapiriã imoianariakorimoni:

—Himakanãtapanika? Hĩtomanãtapanika? Nisikiko manapi apopeka. Nota hĩtari iaxitikiri nimĩkapiritaãka maerekanimoni nisikiko, inireẽkitina ikaminina ĩkapani. ⁴⁶ Hõkitikaua. Masipeka. Hãtapa. Ikiraã ina nota mĩkapiritakari —itxana ninoa.

Xesosi Maĩkiko Pirena

(Marko 14.43-50; Arókasi 22.47-53; Xoão 18.1-11)

⁴⁷ Xesosi sãkirauanãtapanika inakasaaki, Xotasi, Xesosi mitxi moianari, apoka. Iuakata ina itomaneri kãkiti, saasara mĩkani, piriri mĩkani pakini. Sasetotxi auĩteakori, kiomãtxiakori pakini iokanatanana ninoa.

⁴⁸ Iua Xotasi kamĩkapirireri sãpiretapekana ninoa:

—Iuapitipankarako napitxokapaniko. Himaĩkariko iua napitxokakiti.

⁴⁹ Xotasi apoka. Xesosimonipitipo isa.

—Ereẽkai koerekereri.

Eereka apitxoka itxari. ⁵⁰ Ininiã Xesosi txari Xotasi:

—Nitiretakiti, pikamariko pinirekakiti. Nauritai —itxari.

Iuasaakipeka Xotasikata sikani sakata Xesosimoni, maĩka itxarina. ⁵¹ Āti Xesosi moianari kosekaro saasara. Isauaãkatari sasetotxi auĩte apiatakari nitiri. Itsotakakĩpitatari.

⁵² Ininiã Xesosi txari:

—Pitaka saasara mitxi oãuiniãtaã. !Pineenamauatape. Ikeekotxi himaĩkiniã, āti õti hĩpinako ikeekotxi xika. ⁵³ !Pimarotari niposotiire. Nota nirekiniãri, nakiritari niri moianatinino nota. Nakiritiniãri, iuasaakipeka iua iokanatariko seĩ mio iniritari nota imaktxakiniina ĩkapani. ⁵⁴ Kona nakiritari niri, kotxi Teoso sãkire iõkatsopatakori sãpiretapekari nimaĩkiko tĩkane ia atoko inakari.

⁵⁵ Iuasaaki Xesosi misãkiretana iuamoni ĩkani:

—Kinirepa himinari saasara, piriri pakini himaĩkinino ĩkapani? !Kĩtirino nota. !Kikeekono nota. Ikiniõtika nitopãka Teoso misãkiretiko aikoti āki noerekinii hĩte. Iuasaaki kona himaĩkano. ⁵⁶ Ia atoko himaĩkano, kotxi kitxakapirĩka Teoso sãkire sãpiretakani iõkatsopapekari ia atoko himaĩkinino. Ininiã Teoso sãkire iõkatsopatakori iaõka uatxa apokapeka —itxa Xesosi. Iuasaakipeka Xesosi moianariakori asikari iua, miteka itxana.

Xesosi Xoteo Auĩteakori Apisatoõ

(Marko 14.53-65; Arókasi 22.66-71; Xoão 18.12-14, 19-24)

⁵⁷ Ninoa Xesosi maĩkakani anikari Xesosi Kaipasi aapokomoni. Iua Kaipasi sasetotxi auĩte apiatakari itxaua. Iuaãtaã kaiõkatsopareriakori, kiomãtxiakori pakini apotiitapekautaua iuasaaki. ⁵⁸ Ninoa anikasaakiri Xesosi, Petro sari Xesosi tikini. Ikira atoko auaãponãta. Sasetotxi auĩte apiatakari aapoko takote isa. Īroã pirikere āki. Iitopãka Kaipasi nitiriakorikata. Kiatokopa

inaãkapani Xesosi, ininiãra isa Xesosi tikini imarotini ĩkapani.

⁵⁹ Kaipasi aapoko āki Sasetotxi auĩteakori, kiomãtxiakori, ikinika Xoteo auĩteakori pakini nitana kãkiti aãpirena kamakani Xesosi okinina ĩkapani. ⁶⁰ Itori kãkiti sãpiretari aãpirena Xesosi ikamapiretinina. Txamari ixika !auari Xesosi okinina ĩkapani.

Eereka apokana ipi aãpirena kamakani. ⁶¹ Ninoa txari:

—Ia kiki txari: “Nota posotari aiko Teoso misãkiretiko nirikini. Ipi āti õtisaaki niposotari iuaĩkana nõkitikiniri,” itxa isãkire.

Kona atão ninoa sãkire. ⁶² Sasetotxi auĩte apiatakari õkitikaua.

—Kona papakapapiretataro pitemoni apoĩrauatakani? Atãokani piposotataro ikara atoko pikamini? —itxari Xesosi.

⁶³ Xesosi !kasãkireri. Ininiã sasetotxi auĩte apiatakari iuaĩkana misãkiretari Xesosi:

—Uatxa nipimaãi Teoso mipĩkati apisatoõ. Atãonani pisãpiretaua. Pite, Teoso mereẽkiti pitxataua? Teoso ākirikai pite? —itxari Xesosi, kotxi inirekari Xesosi kerokiniri isãkire.

⁶⁴ —Ari, iuapitipankarano. Nisãpiretaiko hĩte hĩkinika. Hãtamatariko kãkiti itari iaxitikiri topãkini Kaposotiireri kikomoni. Hãtapaniko kãkiti itari iaxitikiri uai apokaãpotini katxiãri āki —Xesosi txana ninoa.

⁶⁵ Sasetotxi auĩte apiatakari kenakotari ikara Xesosi sãkire. Iuasaakipeka iua matsorãkari imãka, kotxi kona xatiki ipotxitari Xesosi sãkire.

—Maerekati isãkire: “Teoso ākirirano,” itxa.

!Anirekaikari apanakini kamapiretiniri Xesosi. Uatxaika hĩkenakotapekari isãkire maerekati. ⁶⁶ Kiãtokopa atxataro Xesosi? —itxana ninoa.

—Ixika auapeka ipinini ĩkapani ininiã uatxa okaãkapi-tikako —ninoa txari iua.

⁶⁷ Eereka ikiisokatoõtarina. Iãsokarina. Apanakini ari-toõtari Xesosi.

⁶⁸ —Pite Teoso mereẽkiti pininiãua, pisãpiretaua, kipa aritai? —itxarina iua.

Inapetarina.

Petro Kipataro Xesosi Imarotini

(Marko 14.66-72; Arókasi 22.54-62; Xoão 18.15-18, 25-27)

⁶⁹ Iuasaaki Petro topãkanãta mapara pirikeri āki. Ātokoro Kaipasi nitero sari iuamoni.

—Pite Xesosi Karirėiakiri moianaripitakarai —otxari iua.

⁷⁰ Txamari iua kipataro ikinimane apisatoõ.

—!Nimarotari ikara atoko pinanãtakiti.

⁷¹ Ininiã isa pirikeri ĩroãnakikomoni. Iuaã ãto ãtokoropekana Kaipasi nitero atamataro iua. Ininiã osãpiretana kãkiti iuaã auakani:

—Xesosi Nasareekiri moianaripitakarai ikira —otxa.

⁷² Iuaĩkana ikipataro:

—Teoso imarotari iua kiki nimimarotakani —itxa.

⁷³ Eereka paĩtiki atoko kikiãkini iuaã auakani sari Petromoni:

—Pite atãopitika iua moianaripitkarai, kotxi pisãkire ipinimoni. Kãkiti Kariréiakiri sãkire atokokana, Xesosi sãkire atokokana pitxa pite sãkire —ninoa txari Petro.

⁷⁴ Ininiã Petro apakapapiretana:

—Atão nisãkire minakaniãua Teoso misiritanoko. Nisãkire atãopitika. !Nimarotari iua kiki —itxama.

Iuusaakipeka patari sãkirauata. ⁷⁵ Ikara ikenakotakasaaki, Petro xinikari Xesosi sãkire, kotxi mitxipe Xesosi txari iua: “Patari sãkirauatini apisapanikako, ipi ãti pakinikata, !Nimarotari iua,’ pitxanoko.” Ininiã Petro sipeka. Itxiapakata.

Xesosi Pirato Apisatoõ

(Marko 15.1; Arókasi 23.1-2; Xoão 18.28-32)

27 Katimatinĩkata sasetotxi auĩteakori, kiomãtxiakori pakini apotiitaua. Imisãkiretakakana: —Kiãtokopa atxatari Xesosi aõkini? —itxana.

² Eereka iaxirikãkitakarina Xesosi, anika itxarina Homano auĩte Põsio Pirato inakorimoni, sikanapa itxarina.

Xotasi Ipinini

(Átosí 1.15-19)

³ Xotasi, Xesosi mĩkapiritakari, kenakoenetakasaakiri Xesosi ipinini tĩkane, maerekaxiniretinoka itxa, kotxi iuaka sikari Xesosi imokaiakariakorimoni okiko tĩkane. Iuaĩkana isipikaro trĩta txineiro ota pirata kamakoro sasetotxi auĩteakori, kiomãtxiakori pakinimoni.

⁴ —Nota kamari maerekati. Nimĩkapiritari Xesosi. Ixi-ka !auari iua ipinini ĩkapani —itxana ninoa.

Ininiã ninoa:

—Pite kamakiti xikakara. Pitekara sikaua ate Xesosi.

⁵ Ininiã Xotasi okaro txineiro ota Teoso misãkiretiko aikoti ãki, eereka isipe ãtiãtaã. Iuaãtaã iuaka iaxirikanokitapeua, aamina poria iaxirikaua, arõka, ipĩpe itxa.

⁶ Teoso misãkiretiko aikoti ãki sasetotxi auĩteakori kosekaro oa txineiro.

—Oia txineiro kiki okiko ĩki. Ia xika ate !auiritaãka aãpotiitiniro oia txineiro ãto txineirotikata Teoso misãkiretiko aikotiãkero. ⁷ Kiãtokopa atxataro oia txineiro? —itxakakana.

Eereka ninoa imarotape. Iamotarina kiki, tiitxi kamakari kikiote, Xoteo minakaniua ikatiko tĩkane. ⁸ Oa txineiro kiki okiko ĩki xika, Xesosi okiko ĩki xika, iua akauari takauãkataãka “Arẽkatxi Akauariti” inaãka. Uatxa akiritaãkapanika iuaãtaã “Arẽkatxi Akauariti.” ⁹ Iua atoko ininiã, kitxakapirĩka Teoso sãkire sãpiretakari Xeremia inakori atão txari:

Isaero auakani ĩkitxitari trĩta ota pirata kamakoro Teoso mereẽkiti okiko ĩkapani.

¹⁰ Eereka isikarona oa txineiro ota tiitxi kamakarimoni, ikikiote iamotinina ĩkapani, kotxi Teoso nirekari ia atoko ikaminina, itxa Xeremia kitxakapirĩka. Ininiã Xeremia sãkire iaõka apopeka iuusaaki.

Xesosi Pirato Apisatoõ

(Marko 15.1-5; Arókasi 23.1-5; Xoão 18.28-38)

¹¹ Iuusaaki Xesosi tima Homano auĩte Pirato inakori apisatoõ. Pirato pimaãri Xesosi:

—Pitekani Xoteoakori auĩte txataua?

—Ari, iuapitikarano —itxari.

¹² Eereka sasetotxi auĩteakori, kiomãtxiakori pakini apoĩtari Xesosi. !Kasãkireri Xesosi iuusaaki. ¹³ Ininiã Pirato txari:

—Atauako kona pikenakotatari apoĩtiniina?

¹⁴ Xesosi !kasãkireri, ininiã Pirato tsorĩkaãta. ãkix-inireẽ iua:

—Kininiãpa !kasãkireri?

Xesosi Okiko Nirekiko

(Marko 15.6-15; Arókasi 23.13-25; Xoão 18.38–19.16)

¹⁵ ĩkini kiiniriti Pãskoia inakori, Homano auĩte sikakari ãtika kateia ãki auakari kãkiti nirekakiti. ¹⁶ Iuusaaki aua kateia ãki auakari Pahapasi inakori. ĩkinimane imarotari iua. ¹⁷ Itomaneri kãkiti apotiitakasaakiaua, Pirato pimaãna ninoa:

—Īkiripa kateia ãki auakari hinireka nisikakini? Pahapasikani? Xesosi Teoso mereẽkiti inakorikani? —itxana ninoa.

¹⁸ Pirato imarotari Xesosi isikinina iuamoni ixikotinirina xika.

¹⁹ Iuusaaki Pirato topãkanãta kãkiti misiritiko isãpiretini pakita ãki. Iuusaaki ĩtanoro iokanapireta iuamoni.

—Maerekati !pikamape iua kikimoni, kotxi ixika !auari pokiniri. Erekari iua. Minipani nitaponetari iua kiki, ininiã maerekaxiniretinoka nitxa —otxari.

²⁰ Mapara sasetotxi auĩteakori, kiomãtxiakori pakini misãkiretana kãkiti iuaãtaã apotiitakaniua:

—Piratonomi hĩtxako: “Pisikakariko Pahapasi. Pokãkitakariko Xesosi,” hĩtxariko —itxana kãkiti.

Ininiã ninoa auikari isãkirena. ²¹ Eereka Pirato pimaãna kãkiti iuaã apotiitakaniua:

—Īkiripa kateia ãki auakari hinireka nisikakini?

Ininiã ninoa akirikata:

—Pahapasira.

²² —Kiãtokopa nitxatari Xesosi, Teoso mereẽkiti inakorima? —itxa Pirato.

ĩkinikana apakapapiretana:

—Aamina ĩpiriãmitakari nopini pitokakitariko.

²³ Ininiã Pirato:

—Kixikapa? Maerekati !ikama —itxa.

Iuusaakipeka ninoa iteene akiripoakatana:

—Aamina ĩpiriãmitakari nopini pitokakitariko.

²⁴ Ininiã Pirato kona sãpiretakari Xesosi isikakini, kotxi ninoa neenamauatanapanoka. Ikosekari ãparaã. Arokauakotaua ninoa apisatoõ.

—Na nota xikani ia kiki ipinako. Hĩte xikakara ia kiki ipina —Pirato txana ninoa.

²⁵ ĩkinimane apakapapiretari:

—Atãopitikara. Misirikaretxi auiniã okiko xika, ate, aamariteni pakini apakapariko iua misirikaretxi —itxana.

²⁶ Iuasaakipeka Pirato sikakari Pahapasi. Eereka ipaniātari Xesosi xirokitatiko aāpitsaā. Eereka isikari Xesosi isotatonemoni aamina ĩpiriāmitakari nopini itokakitinirina tĳkane.

Sotatoakori Napetiniri Xesosi

(Marko 15.16-20; Arókasi 22.63-65; Xoāo 19.2-3)

²⁷ Ininiā sotatoakori anikari Xesosi ninoa auĳte aapokomoni. Iuaā akiritarina apanakini sotatoakori, ininiā ikinimane sotatoakori ākitari Xesosi. Inapetarina. ²⁸ Imaktxakarina Xesosi māka. Mākatxi pōkamarari ieretaka itxarina. ²⁹ Eereka itakarina saporieĳta kotipiaro kamakori ikiiā. Iuako ikikomoni taka itxari aāke. Ininiā itxĳitakarina Xesosi auĳtetxi atoko ininiāua. Eereka ikapotoreēkauana iua apisatoō, nape-ta itxarina Xesosi:

—Aāuĳte —itxarina Xesosi inapetinina.

—Xoteo auĳte kai pite —itxarina.

³⁰ Ikiisokarina. Iua aāke ikosekana, arikiita itxapikarina. ³¹ Inapetarina, eereka imaktxakarina mākatxi pōkamarari. Iua nakiti imāka iuaĳkana ieretaka itxarina. Eereka mapara anika itxarina, aamina ĩpiriāmitakari nopini itokakitinirina ĳkapani.

Xesosi Tokakitaāka Aamina ĩpiriāmitakari Nopini

(Marko 15.21-32; Arókasi 23.26-43; Xoāo 19.17-27)

³² Xesosi anikaāpotakasaakina, aōkitarina Sireni sitatxitikiri, Simāo inakori. Ninoa paniātari iua, Xesosi anikakiti aamina ĩpiriāmitakari, anikini ĳkapani, kotxi Xesosi liposotaikari anikiniri. Ininiā Simāo anikari.

³³ Apokana Kóokota inakoriātaā. Apanakini akiritari “Ki-itātatxi” inaāka akiritiko. ³⁴ Iuaā iāriāmoni ikoketarina pinĳtxi kipixiāri, sika itxarina Xesosimoni, Xesosi iāĳtini ĳkapani, imakini ĳkapani. Atapixiātaāka atoko, liātari.

³⁵ Ininiā itokakitarina Xesosi aamina ĩpiriāmitakari nopini. Inaāka atoko ikamarina sarauatxi kai soroā. Sarauatxi kāiatakani apakapari Xesosi māka. Kitxakapirĳka Teoso sākire sāpiretakari sāpiretapekari ikara atoko inini tĳkane. Iua txari:

Ixanakarina nimāka. Sarauatxi ikamana nimāka apakapakani imarotinina ĳkapani.

Itxa Teoso sākire sāpiretakari kitxakapirĳka. ³⁶ Sarauatxi xipoka atoko iitopākana. Imoiaārina Xesosi, kākiti manikakaniri ĳkapani. ³⁷ Aamina ĩpiriāmitakariā ikii nopini itakarina iōkatsopatakori: “Xesosi, Xoteoakori Auĳte,” itxa iōkatsopatakori. Ikara xika okaāka Xesosi.

³⁸ Xesosi takote itokakitarina ipi kĳĳtiririni aamina ĩpiriāmitakari nopini, āti Xesosi kikomoni, āti Xesosi sanaremoni. ³⁹ Kākiti iuaā napakani napetari, nokonoko itxa kiitana. Maerekaeneti isākirepiretarina Xesosi:

⁴⁰ —Pite txari: “Aiko Teoso misākiretiko niriāka atoko, ipi āti ōtisaaki iuaĳkana nōkitikari,” pitxa. Piteka pimaktxakaua. Pite Teoso ākiri pinakasaakiaua, pikatxaka. Ikara atoko itxa sākiretana kākiti iuaā napakani.

⁴¹ Iua atoktxikana itxana sasetotxi auĳteakori, kaiōkatsoparerini, kiomātxiakori pakini ikara atoko inapetarina Xesosi:

⁴² —Iua makananitapekari apanakini. Txamari iuaka ĳiposotari imakananitiniua. Iua Isaeo auakani auĳte ininiāua, iuaka imaktxakamaauako. Ikatxakiniā, ate auikari iua sākire. ⁴³ Iua auikari Teoso sākire. Maiāta-pari. Atauako Teoso nirekari imaktxakiniri iua uatxa, kotxi iua txari: “Teoso ākirirano nota,” itxa —itxana.

⁴⁴ Kĳĳtiririni iuakata tokakitakoni apaka maerekaeneti isākirepiretarina Xesosimoni.

Xesosi Ipinini Pirena

(Marko 15.33-41; Arókasi 23.44-49; Xoāo 19.28-30)

⁴⁵ Apaniāxiti itixi piāka. Ipi āti pakini oara ipiāka. ⁴⁶ Ipi āti pakini oarape kikatamonipeka Xesosi iteene akirikata:

—Erii, Erii, aremaa sapakatanii.

Ikara Epireo sākire. Ia atatsopatakari sākireē, “Ni-Teosone, niTeosone, kinirepa pitakanapano?”

⁴⁷ Kākiti iuaā auakani kenakotari Xesosi sākire. Ninoa uākatari akirinātiniri Eríasi.

⁴⁸ Ininiā āti miteka, mapoa atoko inakari iāka itxari iāriā katxioārimoni. Aāke mapotōkire taka, isirĳka itxamari Xesosi iāĳtini ĳkapani. ⁴⁹ Txamari apanakini:

—Kona pisikapiri. Atxĳĳti Eríasi maktxakari iua —itxana.

⁵⁰ Iuaĳkana Xesosi iteene akirikata. Eereka iokanatarini xiniire Teosomoni, eereka ipĳpe.

⁵¹ Iuasaakipeka mākatxi mata Teoso misākiretiko aikoti āki arōkakarini tsorakita. Itano itsorakita. Ixitiipeka apoka. Mitxi iua mākatxi mata !auiritari kākiti ĳroini Teosonani Auini Pakitaātaā. Itsorakitakasaaki, itixi iakeēkata. Kai mitari xoreka iuasaaki. ⁵² Apanakini akauari xoreka. Itomaneri kākiti ipĳkani Teoso nakitiakori iuaĳkana ōkitikapekaua. ⁵³ Osipikarina akauari. Xesosi iuaĳkana ōkitikaākaua atoko, isana Xerosareēmoni, Teoso nakiti sitatxitimoni. Iuaā itomaneri kākiti itikana ninoa iuaĳkana ōkitikakaniua.

⁵⁴ Sotato auĳte, sotatoakori Xesosi moiaākani apaka, itikarina Xesosi ipinini. Imarotarina itixi iakeēkatini, ininiā iteene ipĳkarauatana.

—Atāopitikara Teoso ākiri itxaua —itxana.

⁵⁵ Ito ro sitoākini ikira atoko atamanātari Xesosi. Karirēia tōpa Xesosi potarikasaaki ninoa sitoākini moianatarini iua. ⁵⁶ Maria Matarena inakoro iuaā aamina ĩpiriāmitakari ikira atoko auanāta apaka. Txiaako, Xosee pakini inoro, Maria inakoro iuaā aua. Sepeteo anaakori inoro iuaā auanāta apaka.

Xesosi Ikatiko Pirena

(Marko 15.42-47; Arókasi 23.50-56; Xoāo 19.38-42)

⁵⁷ ĳkanōka katxineiroteri Xosee inakori, Arimateia sitatxitikiri, apoka. Iua apaka Xesosi sākire auĳkari itxaua. ⁵⁸ Isa Piratomoni. Xesosi ĳto amanaā. Ininiā Pirato paniātari isikiko. ⁵⁹ Ininiā Xosee anikari Xesosi ĳto. Mākatxi mataā iapirika itxari. Mākatxi mata amaneri arĳnio inakoriā iapirikari. ⁶⁰ Eereka taka itxari akauari āki. Iua akauari amaneri, Xosee kisakakiti kai auĳte iriko. Ikamari iua akauari ipĳkasaaki ikatiko ĳkapani. Xesosi ĳto iriko āki itaka atoko ikakanapiritari kai merami-

napoari, itota itxari akauari iriko, sipe itxa. ⁶¹ Iuasaaki Maria Matarena inakoro, āto Maria inakoro apaka topākanāta akauari apisatoō.

Imoiaārina Xesosi Akauari

⁶² Iua ōti sesta veira, tomatiko ōti apisa. Iua ōti Xoteoakori paīkauatapitipo, tomatiko ōti imapaīkau-atakani īkapani. Katimatinīkata sasetotxi auīteakori, pariseoakori pakini sari Piratomoni. ⁶³ Ninoa txari:

—Ate xinikari iua kamisirienereri sākire. Iua txari: “Nipīkasaaki eereka ipi āti pakini ōtisaaki iuaīkana nōk-itikauako.” ⁶⁴ Pipaniātana pisotatoneakori ipi āti pakini ōti akauari imoianina. Imamoiaākaniārina, imoianariakori īkanōka sari iuaā īto ītirīkinina. Ininiā eereka isāpiretarina kākiti: “Teoso ōkitikapekari iua. Iuaīkana auāki itxapeka,” itxamana ninoa imoianariakori. Ininiā ikara misirieneretxi apiatama eereka. Mītxiri misirieneretxi poiāoka —itxarina Pirato.

⁶⁵ —Ininiā hanikari sotatoakori akauari moiaākani tīkane. Hīsa. Hītotariko akauari sona —Pirato txana.

⁶⁶ Ininiā isana iuaā. Akauari sona iteene itotiniā īkapani. Itakarina Pirato takaōtxikare itore nopini. Sotatoakori iuaā kaikota. Imoiaārina akauari.

Xesosi Iuaīkana Auāki Inini

(Marko 16.1-8; Arókasi 24.1-12; Xoāo 20.1-10)

28 Tomatiko ōti xipoka atoko, tomīko īkanōkapanika Maria Matarena, oa āto Maria pakini sari akauarimoni.

² Ninoa saāpotakasaaki, katimaritika itixi iakeēkata itapararitika. Iuasaaki Teoso nitiri iaxitikiri katxaka. Ikatapakiritari kai akauari tore, topāka itxa iua kai nopini. ³ Itoō atokatxi iotximere atoko itxa. Imāka mapoa sarō atoko itxa. ⁴ Sotatoakori, akauari moiaākani, kikinanaākata, ipīkarauatinina. Irikana xitipeka. Ipīkani atokopeka itxana.

⁵ Eereka ninoa sitoakoro apoka akauari. Teoso nitiri misākiretana:

—!Hīpīkarauatape. Nimarotari hīte nitanātiniri Xesosi, aamina īpiriāmitakari nopini tokakitakori. ⁶ !Auai-ka uai. Teoso ōkitikapekari iua. Ikara iua sāpiretapekai hīte. Uai hina. Hātamatarī īto mitxi auiniātaā.

Ininiā ninoa atamatarī.

⁷ —Katima hītxako imoianariakorimoni hīsini īkapani. Hīsāpiretana: “Iuaīkana auapeka itxa Xesosi. Teoso ōkitikapekari iua. Iua sari hīte apisapanika Kariréiamoni. Iuaā haōkitariko iua,” hītxako ninoamoni. Ikara atoko nitxa nisāpirena hītemoni —itxa Teoso nitiri.

⁸ Ininiā ninoa takanapari akauari. Ipīkareritkana, ieneniritkana isana. Imitekana Xesosi moianariakorimoni ōkitikiniua isāpiretini tīkane. ⁹ Ninoa

mitekaāpotakasaaki, ipixinipokoriti Xesosi tokiā ninoamoni:

—Hītepinī ina —itxana.

Ininiā ninoa kapotoreēkaua iua apisatoō, maīkakitita itxarina.

—Peerekai. Apiananiri pitxaua —itxanātana.

¹⁰ Ininiā Xesosi:

—Kona hīpīkarauatape. Nitariakorimoni hīsa.

Hīsāpiretana Kariréiamoni isinina. Iuaā aōkitanonako nota —Xesosi txana ninoa Mariaakoro.

Ininiā ninoa sipe.

Sotatoakori Xesosi Akauare Moiaākani

¹¹ Sitoākini sikasaaki, ātikaka sotatoakori akauari moiaākani kanapiriā sitatximoni. Isāpiretarina itikakiti-na sasetotxi auīteakorimoni. ¹² Ininiā sasetotxi auīteakori, kiomātxiakori pakini apotiitaua ikara ene ixinikinina īkapani. Eereka isikarina itoro txineiro sotatomoni, atāo imasāpiretakanina īkapani apanakinimoni. ¹³ Ininiā sasetotxi auīteakori, kiomātxiakori pakini txana:

—Hītxariko apanakinimoni: “Xesosi moianariakori apoka īkanōka aimakasaaki. Ītirīkarina Xesosi īto,” hītxako. ¹⁴ Hīauīte Pirato imarotakasaakiri himakini, ininiā ate misākiretariko iua, ininiā kona himisiritaāka himakini xika —itxarina sotatoakorimoni.

¹⁵ Ininiā sotatoakori apakaparo txineiro, sāpireta itxarina kākiti Xesosi moianariakori ītirīkiniri Xesosi īto. Ikara aāpirena iaripireta Xoteoakorimoni. Uatxa apaka ikara aāpirena auīākapanika.

Xesosi Apoka Imoianariakorimoni

(Marko 16.14-18; Arókasi 24.36-49; Xoāo 20.19-23; Átosi 1.6-8)

¹⁶ Ōsi pakini Xesosi moianariakori sari oxiratarimoni Xesosi paniātinimoni Kariréia tōpamoni. ¹⁷ Ninoa atamatarī Xesosi. Ikapotoreēkauana iua apisatoō.

—Peerekai. Apiananiri pitxaua —itxanātana.

Txamari ātikaka kona iteene auikari iua Xesosi ininiāua. ¹⁸ Xesosi apoka ninoa takote, misākireta itxana ninoa:

—Teoso txīkitakano itixine auakani auīte nininiāua. Itxīkitakano īkoraxiti auakani auīte apaka nininiāua. Ininiā ikinika posotiiretxi aua notamoni. ¹⁹ Ininiā nipaniātai. Hīsako ikini uākati kākitimoni ikini itixitika. Hōerekana ninoa nisākire. Hīpatxisatana nisākire kīpitakani niri uākaā, imi uākaā, Erekari Matamatakoti uākaā pakini hīpatxisatanako. ²⁰ Hōerekanako ninoa ikinika nipaniātakiti ikaminina īkapani. Hīxinikariko ia. Nota ātipirika auako hītekata. Hītekata nauiniritika itixi xipokako —itxa Xesosi sākire.

Marko

Hoão Kapatxisareri Sãpiretakiti (Mateo 3.1-12; Arókasi 3.1-20; Hoão 1.19-28)

- 1** Ia Xesosi Kristo iokanapirena erekari. Teoso äkiri itxaua Xesosi.
- ² Teoso säkire säpiretakani iökatsopatari ia: Niokanatariko niokanapirena aniäkari kãkitimoni kimapori oeretini ikapani pite uai apokini apisa.
- ³ Iua auako äparaã makipakaniätaã. Isãpirenauatako: "Hõeretariko kimapori Apiananiri apokini apisapanika. Itïkaãpo erekari hïkamako iua napini ikapani," itxa iua. Itxa Teoso säkire iökatsopatakori kitxakapirïka.
- ⁴ Ikara atoko Hoão kapatxisareri äparaã makipakaniätaã aua. Ipatxisatakasaakiri kãkiti, isãpiretari ia pirena:
—Hïtakanapariko maerekati hïkamakiti. Hïpatxisataãkako. Ininiã Teoso makatxakariko maerekati hïkamakiti —itxa Hoão kapatxisareri.
- ⁵ Ikinimane kãkiti Xotéia auakani Xerosareë sitatxiti auakani pakini sari Hoãomoni isäkire ikenakotinina ikapani. Ninoa säpiretakasaakiri maerekati ikamakitina, ipatxisatana uini Xotão inakoriätaã.
- ⁶ Hoão takari imãka kamero piti kamakori. Itakari ipakiomatatare pirãtxi mata kamakori. Inikari txïtxiri. Mapaã itxima. ⁷ Iua txari kãkitimoni:
—Nota poiãori. Nota tikini apokako apiatakari. !Apakata nikapotoreëkiniua iua takote ikiti mata ni-makatxakini ikapani, kotxi nota poiãoka. Iua apiata.
- ⁸ Nota patxisatai äparaãnokara. Iua patxisataiko Erekar Matamatakotiã. Iuasaaki hïte apakapariko Erekar Matamatakoti.

Xesosi Patxisatiko Pirena (Mateo 3.13-17; Arókasi 3.21-22)

- ⁹ Iuasaaki Xesosi apoka Nasaree sitatxiti, Kariréia tõpamoni. Iuasaaki Hoão kapatxisareri patxisatari iua uini Xotão inakoriätaã. ¹⁰ Xesosi kanïkïitakasaaki, iua itikari iaxiti takakini. Iuasaaki Erekar Matamatakoti katxaka kamo katxakini atoko. Iua nopini apoka.
- ¹¹ Iuasaakipeka Teoso iaxitikiri txari:
—Pite namarite, nitiretakiti, napokaerekatai, kotxi ninirekakiti pikama.

Satanasi Atamakaerekatini Xesosi (Mateo 4.1-11; Arókasi 4.1-13)

- ¹² Iuasaaki Erekar Matamatakoti iokanatar Xesosi äparaã makipakaniätaã. ¹³ Iuaãtaã ikaikota koarëta õti. Iuasaaki Satanasi atamakaerekatari iua. Iuaãtaã auari

kaxipirini kaneenamarini. Ininiã Teoso nitiriakori iaxitikini nïkatari Xesosi.

Xesosi Mipotorikiniri Iparïka Kariréia Tõpa (Mateo 4.12-22; Arókasi 4.14-15)

- ¹⁴ Hoão kateia äki takikosaaki, Xesosi sari Kariréia tõpamoni. Iuaãtaã isãpiretari Teoso iokanapirena erekari, Teoso auïtetxi ininiãua pirena. ¹⁵ Itxari:
—Teoso keto apopeka. Iua auïtetxi ininiua apokaãpotapeka. Ininiã hïtakanapariko himaerekani. Hãuikariko Teoso iokanapirena erekari —itxa Xesosi.
- ¹⁶ Xesosi tïpokota Kariréia poati tiniã. Iuasaaki atamatana ipi hetxi takakani, Simão Petro, itari Ätree pakini. Iua atamatana itakinirina hetxi. ¹⁷ Ininiã Xesosi txana:
—Uatxa masa notakata. !Himaïkaikariko ximaki. Ätião hïparïka auako. Nisäkire hïsãpiretako kãkitimoni —itxa.
- ¹⁸ Ininiã iuasaaki ninoa takanapari hetxi, sa itxana Xesosikata.
- ¹⁹ Apikomoni ninoa saãpota. Itikana Txiako, itari Hoão pakini. Ninoa Sepeteo anaakori. Kanaua miramaneri äki auanãtana iuasaaki. Hetxi iotsaãnãtana.
- ²⁰ Iuasaaki iua akiritana ninoa. Ininiã ninoa takanapari iri, iri nitiriakori pakini kanaua äki. Eereka isana Xesosikata.

Kiki Maerekati Matamatakoti Auaïtotakiti (Arókasi 4.31-37)

- ²¹ Xesosi imoianariakorikata apoka Kapanaoõ sitatxiti. Ininiã tomatiko õtisaaki Xesosi sari aiko Xoteo apotiitiniãtaãua oerekarauatini ikapani. ²² Iua säkire kenakotakani tsorïkaãta, kotxi kona kaiökatsoparerini atokoni litxa. Iua oerekakiti säkiretxiti pataparari, kotxi !isãpiretari äti koerekareri säkire apanakini kaiökatsoparerini atoko. Iuaka säkirekara isãpireta.
- ²³ Iuasaaki aiko äki Xoteo apotiitiniãtaãua aua kiki maerekati matamatakoti auakiti. Iua akiripoakata:
²⁴ —Xesosi Nasaree sitatxitikiri. Kipa pinireka atemoni? Pite ina ate pixipokini ikapanikani? Erekarinoka kamakarii. Teoso nakiti pitxaua —itxa.
- Ikara atoko iua akiripoakata, kotxi iua maerekati matamatakoti pïkari Xesosi.
- ²⁵ Ininiã Xesosi itapararitika txari:
—Piotoka. Pitakanapariko ere kiki ïto.
- ²⁶ Iuasaaki maerekati matamatakoti iökokaïtotari. Ikatxakasaaki, akiripoakata.
- ²⁷ Kãkiti iuaãtaã auakani tsorïkaãta. Iuasaaki imisãkiretakakauana:

—Kiripa? Atxiiti oerekakori sākiretxiti amaneri apopeka? Iua sākire kaposotiireri. Ipaniātakiti maerekati matamatakoti kamapeka —itxanātana.
²⁸ Ininiā ikara pirena iaripireta ikini Kariréia tōpati.

Xesosi Makananitiniro Simão Petro Imakiro
 (Mateo 8.14-15; Arókasi 4.38-39)

²⁹ Ininiā Xesosi, Txiako, Xoão pakini takana-pakasaakiri aiko Xoteo apotiitiniātaāua, isana Simão, Ātree pakini aapokomoni. ³⁰ Iuasaaki Simão imakiro apoomata. Osiríkanāta. Ininiā ninoa sāpiretari Xesosi oamianare. ³¹ Ininiā Xesosi sari oamoni. Imaĩkaro ouako. Ōkitikaro. Iuasaakipeka oāpoomare !auaika. Ininiā opotorika oparĩkauatini, ninoa kiena okamini ĩkapani.

Xesosi Makananitinina Amianatakani
 (Mateo 8.16-17; Arókasi 4.40-41)

³² Ininiā mapiānikata kākiti minana ikinipoko amianatakani, maerekati matamatakoti auaiťotakini pakini iuamoni. ³³ Ininiā ikinimane iua sitatxi auakani apotiitaua aapokotxi tore takote. ³⁴ Ininiā Xesosi makananitanita itomaneri amianatakani. Kaiāopokori amianari auakini imakananita. Apaka omitikana itomaneri maerekani matamatakoni. Iuasaaki !auiritana ninoa sākirauatini, kotxi ninoa imarotari Teoso ākiri ininiua Xesosi.

Xesosi Sāpiretiniri Teoso Sākire
 (Arókasi 4.42-44)

³⁵ ĩkanōkapanika mapiāpanika Xesosi ōkitikaua. Itakanapari aapokotxi. Iuanoka sari kākiti mauakaniātaā iri iaxitikiri imisākiretini ĩkapani. ³⁶ Eereka Simão imoianariakorikata sari Xesosi initinina ĩkapani. ³⁷ Ninoa apokasaakiri, itxana:

—İkinimane nitai —itxarina.

³⁸ Xesosi apakapapiretana:

—Masa ātiātaā kākiti aapokomoni. Iuaā nisāpiretariko Teoso sākire, kotxi ikara atoko itxa nĩparĩka kākitimoni. ³⁹ Xesosi sari ikini Kariréia tōpa. Aiko Xoteo apotiitiniātaāua isāpiretari Teoso sākire. Apaka omitikana maerekani matamatakoni kākiti ĩtoā auakani.

Kiki Maere Matati
 (Mateo 8.1-4; Arókasi 5.12-16)

⁴⁰ Amianatakari maere matati apoka Xesosimoni. İkapotoreēkaua iua apisatoō. Iua iteene amanaāri: —Nimarotari, pinirekiniāri piposotari erekape pitxĩkitakinino —itxa.

⁴¹ Ininiā iuasaaki Xesosi iteene turetari iua. Itakari iuako iua nopini. Itxari:

—Ari, ninirekapitikari. Erekepekai uatxa.

⁴² Iuasaakipeka amianari !auaika. Erekepekari iua.

⁴³ Xesosi iokanatarari iua. Iuasaaki isāpiretari iua:

⁴⁴ —Kona pisāpiretapiri apanakini pitemoni nikamakiti. Uatxa merepanika pisa sasetotxiakorimoni. Poerekari piťto ninoamoni. Eereka pikamariko Moisesini

paniātakiti. Ikara atoko oerekari kākiti atāo erekapeka pinini —itxari.

⁴⁵ Iuaritika isāpiretapikari Xesosi kamakiti. Ininiā iaripireta ikara pirena. Ikara xika Xesosi !iposotaika isini aapokotximoni. Ikaikota kākiti mauakaniātaā. Iuaritika kākiti sari iuamoni.

Matĩpokotakati Pirena
 (Mateo 9.1-8; Arókasi 5.17-26)

2 Eereka mapaōtipeka inaka atoko iuaĩkana Xesosi Kapanaoō sitatxiti apoka itxa. Iaripireta Xesosi inirime aapoko apokini. ² Iuasaakipeka mirikiniti kākiti apoka iuamoni, ininiā iua aapokotxi xāpoka. Apotiitauana ĩronakikoātaā apaka. Ininiā !apakata apanakini kākiti ĩroini aapokotxi āki. Iuasaaki Xesosi sāpiretari Teoso sākire kākitimoni. ³ Iuasaaki ipi ipi pakini kikiakori minari matĩpokotakati. ⁴ Kākiti itomaneri ĩronakikoātaā aua, ininiā kona iposotarina Xesosi takote apokinina. Ininiā aapokotxi nopini, Xesosi manapi ninoa sonatarari iua matĩpokotakati iokaxakinina tĩkane Xesosimonikari. Iposo atoko isikakaāpotarinina iua manapi. ⁵ Xesosi imarotari ninoa atāo auikiniri iua sākire. Ininiā Xesosi txari matĩpokotakatimoni:

—Namarite, pimaerekani makatxakapeēkaika —itxa.

⁶ Iuasaaki ātikaka kaiōkatsopareriakori topākanāta iuaā. Itsorĩkaānātana. İxiniemoninani:

⁷ —Kinirepa ia kiki ikara atoko itxa? Maerekati isāpiretakiti, kotxi Teosonanira posotari imaktxakiniri kākiti maerekani —itxa ninoa sākire.

⁸ Iuasaakipeka Xesosi imarotari ninoa xinikakiti ākixinireēna. Ininiā Xesosi txana ninoa:

—Kininiāpa ikara atoko hĩtxa xinireta? ⁹ Nitxari iua imaerekani nimaktxakini, txamari !himarotari imaerekani atāo nimaktxakini. “Pōkitikaua. Pisirimata pikoseka, sipe pitxa,” nininiā, iuasaaki himarotari nisākire atāo ininiāua, kotxi hĩtikari. Niposotiire imaerekani nimaktxakini ĩkapani, niposotiire iua nōkitikini ĩkapanitxikana. ¹⁰ Ininiā uatxaika noerekai hĩte, Teoso iokanataro nota hĩtari iaxitikiri ĩkorapokoritimoni kākiti maerekani nimaktxakini ĩkapani —itxana kaiōkatsopareriakori.

¹¹ Ininiā matĩpokotakatimoni itxa:

—Pōkitikaua. Pisirimata pikoseka, sipe pitxa paapokomoni —itxa.

¹² Iuasaakipeka iua ōkitikaua. İkosekari isirimata. İkorape itxa ikinimane okiātaā. İmakinika kākiti tikoka.

—Peerekari Teoso kamakiti. Kona mitxi ate itikari ĩkora atoko inakari —itxanātana kākiti.

Mateo Pirena
 (Mateo 9.9-13; Arókasi 5.27-32)

¹³ Ininiā iuaĩkana isari ipoamoni. Kaiāopokori kākiti apotiitaua iuakata. Iuasaaki oerekana ninoa.

¹⁴ İsaāpotakasaaki, atamatari Arevii inakori. Āti iuāka Mateo inaāka. Aoepo inakori ākiri itxaua iua.

İtopākanāta auĩtetxiakori txineirote apakapiniātaā. Ininiā Xesosi txari:

—Masa notakata.

Iuasaakipeka õkitikaua, Xesosikata sa itxa.

¹⁵ Eereka Xesosi nipokota Arevii aapoko. Itori auütetxiakori txineirote apakapakani, itori apanakini maerekani, topākanāta Xesosi takote, imoianariakori takote pakini. Kaiāopokori kākiti aua iuasaaki, kotxi kaiāopokori kākiti Xesosikata sikani. ¹⁶ Pariseoakori, kaiōkatsopareriakori pakini itikari Xesosi auütetxiakori txineirote apakapanikata, apanakini maerekanikata pakini inipokotini. Ininiā kaiōkatsopareriakori, pariseoakori pakini pimaāna Xesosi moianariakori: —Kinirepa hinipokota auütetxiakori txineirote apakapanikata, maerekanikata? —itxana.

¹⁷ Xesosi ikara ikenakotakasaaki, itxana:

—Kākiti mamianatakani kona nirekari kākiti pinītxi imarotakari. Amianatakaninokara nirekari pinītxi imarotakari. Nota uai apoka maerekani nakiritini ũkapani, imaerekanina itakanapinina ũkapani. Kona nakiritari kākiti “atāo inakari kamakani” uākatakaniua —itxa Xesosi.

Nipokori Takanapiko Teoso Misākiretiko ũkapani

(Mateo 9.14-17; Arókasi 5.33-39)

¹⁸ Āti õti Xoāo moianariakori, pariseoakori pakini takanapari inikinina Teoso imisākiretinina ũkapani. Iuasaaki kākiti pimaāri Xesosi:

—Kinirepa Xoāo moianariakori, pariseoakori pakini takanapari inikinina Teoso imisākiretinina ũkapani, txamari pite moianariakori kona ikara atoko !itxana.

¹⁹ Ininiā Xesosi:

—Kiiniri kākiti ũtanorouatakasaaki, ũtanorouatakari aua iuaā, ininiā kona kākiti takanapari inikini iuasaaki. Kona iua ũtanorouatakari nirekari kākiti natxitini. Ininiā iua auakasaaki ninoakata, ikinimane nipokota.

²⁰ Ininiā nota ũtanorouatakari atoko nitxa. Nota auakasaaki nimoianariakorikata, kona itakanaparina inikinina Teoso imisākiretinina ũkapani. Āti õti nota lauaika nimoianariakorikata. Iuasaakiikarako itakanaparina inipokotinina Teoso imisākiretinina ũkapani.

Amaneri Mākatxi Pirena

²¹ Kona kākiti tāpanetari mākatxi kitxakari mākatxi mata amaneriā. Mākatxi mata amaneri itxikika, ininiā kitxakari tsorakita.

Amaneri Sako Aamata Kamakori

²² Kona kākiti takari iāriā amaneri sako kitxakari aamata kamakori āki. Itakiniāri, koanatxi kitxakari aamata kamakori tsorakita, ininiā iāriā xikepoata, ininiā koanatxi !kikeikari. Sako amaneri āki itakaāka iāriā amaneri. Iua atokokana kona hīkoketari kitxakari sākiretxiti amaneri sākiretxitikata.

Tomatiko Őti Pirena

(Mateo 12.1-8; Arókasi 6.1-5)

²³ Tomatiko õti Xesosi imoianariakorikata napaāpota kikio triko takikoātaā. Ininiā ninoa makatxakaro triko

iki mapaki inikinirona ũkapani. ²⁴ Pariseoakori atamatana, ininiā itxarina:

—Kinirepa ninoa parīkauata tomatiko õtisaaki? —itxana.

²⁵ Ininiā Xesosi apakapapiretana:

—Kona hātatsopatapanikari Taviini kamakiti? Iua, imoianariakorikata natxitakasaaki, kona himarotatari ikamakiti? ²⁶ Iua ũroā Teoso misākiretikoātaā. Apiataa inakori sasetotxi auite apiatakari iuasaaki. Iuaā Tavii nikari komiri Teosomoni sikakori. Sasetotxinokara auiritaāka iua komiri inikinina. Apanakini !auiritaāka inikiniri. Txamari Tavii sikari imoianariakori inikinina ũkapani.

²⁷ —Tomatiko õti kamaāka, kākiti ũto ereka inini ũkapani. Kona kākiti kamaāka tomatiko õti auini ũkapani. ²⁸ Nota hītari iaxitikiri posotari inipokoti ninireēkiti nikamini tomatiko õtisaaki, kotxi Apiananiri nitxaua —itxa Xesosi.

Motīkauakotakari Pirena

(Mateo 12.9-14; Arókasi 6.6-11)

3 Iuaũkana Xesosi imoianariakorikata ũroā aiko Xo-teoakori apotiitiniātaāua. Iuaā apokari kiki motīkauakotakari. ² Ininiā iuaā auakani txari

—Atxiīti iua erekapeka txīkitakari motīkauakotakari uatxa tomatiko õtisaaki?

Ninoa xinikari ikara atoko inini, kotxi ninoa kinirāo apoũtaka txari Xesosi. ³ Ininiā Xesosi akiritari iua motīkauakotakari:

—Uaimoni pina —itxari.

⁴ Iposo atoko ipimaāna iuaā auakani:

—Kipa atāo Teoso paniātaua akamini tomatiko õtisaaki? Maerekati akaminikani? Erekar akaminikani? Ipaniātataua āti amakananitini? Ipaniātataua āti aōkinī?

Txamari ninoa !kasākirena. ⁵ Xesosi atamatana. Iuasaaki inaiataua, iuaritika imatinaniuata, kotxi ninoa !nirekari atāo imarotinina. Ininiā Xesosi txari iua motīkauakotakari:

—Pisirīkauakota —itxari.

Ininiā itamēkauakota. Erekape itxa iuako. ⁶ Ininiā pariseoakori potorika iuaā. Isana Erotxi sākire auīkanimoni. Iuaātaā ninoa xinikari Xesosi okaenetinina.

Itori Amianatakani Sari Xesosimoni

⁷ Ininiā Xesosi sari Kariréia poamoni. Iuasaaki itori kākiti Kariréia tixinikini, Xotéia tixinikini pakini sari iuamoni. ⁸ Xerosareē sitatxitikini, Itoméiakini, Xotāo ipiniākini, Txirokini, Sitoōkini pakini sari iuamoni. Ninoa kenakoenetari ikamakiti, ininiā iuamoni isana. ⁹ Ininiā ipaniātana imoianariakori:

—Kanaua himina, kotxi kaiāopokori kākiti katikaāpotano. Ininiā kanaua āki niereētaua —itxa Xesosi.

¹⁰ Iuasaaki kaiāopokori kākiti erekapeka itxīkitakapeka. Apanakini amianatakani nirekakari imaātakinirina Xesosi, erekapeka ininina ũkapani. Ininiā ikatikaāpota-

rina Xesosi, kotxi kaiāori kākiti. ¹¹ Maerekati mata-matakoti auakini atamatakasaakiri Xesosi, irikana Xesosi apisatoō. Akiripoatana:

—Teoso ākiripitikai pite.

¹² Ininiā Xesosi kona auiritana ninoa: “Teoso ākiripitikai,” ininina.

Xesosi Mereēna Tosi Imoianariakori

(Mateo 10.1-4; Arókasi 6.12-16)

¹³ Iposo atoko Xesosi sari ōtanoxiratarimoni, akirita itxana inirekaākini. Ininiā ninoa sari iuamoni. ¹⁴ Ininiā iua mereēna tosi kikiakori iuakata kaikotakani tīkane, Teoso sākire sāpiretakani īkapani. ¹⁵ Iua sikari iposoti-ire ninoamoni, amianatakani erekapeka itxīkitakinina īkapani, apaka maerekati matamatakoti omitikinina īkapani. ¹⁶ Ininiā akiritari Simão. Xesosi takauākatari Simão āti iuāka. Petro itxaua. ¹⁷ Akiritana Txiako, itari Xoāo pakini. Sepeteo anaakori itxauana. Xesosi takauākatana ninoa Poanexi. Poanexi Popīkari sākireē “Ikarokirauari anaakori.” ¹⁸ Akiritana Ātree, Piripi, Patoromeo, Mateo, Tomee, Txiako pakini. Aopeo ākiri itxaua iua Txiako. Akiritana Tateo, Simão pakini. Homano omanatakari iua Simão. ¹⁹ Akiritari Xotasi Isikariotxi inakori apaka. Xesosi mīkapiritakari itxaua iua Xotasi Isikariotxi. Pakini Xesosi akiritakini imoianariakori ininiuana īkapani.

Maerekani Matamatakoni Omitikiko

(Mateo 12.22-32; Arókasi 11.14-23; 12.10)

²⁰ Iuaīkana āti aapokotxitimoni isa Xesosi, imoianariakorikata. Iuasaaki mirikiniti kākiti iuaīkana apotiitaua. Ikara atoko ininiā kona ninoa nipokota. !Apakata inipokotinina, kotxi mirikiniti kākiti aua iuaā. ²¹ Xesosi nirimane kenakotari kākiti apotiitiniua iuakata. Ininiā isana iua apinina īkapani.

—Imapitxiritapeka —itxana.

²² Kaiōkatsopareriakori Xerosareē īkani apoītari Xesosi maerekati ikamini. Ninoa sākire:

—Peosepoo inakori auātotari iua. Ininiā Peosepoora omitikari maerekati matamatakoti —itxana.

Peosepoo Satanasi itxaua. Apanakini sākire:

—Maerekani matamatakoni auīte sikaposotiiretari Xesosi maerekati matamatakoti omitikini.

²³ Ininiā Xesosi akiritari kākiti isākire ikenakotinina īkapani. Sāpirenatxi atāo inakari oerekiko isāpiretana ninoa. Ipimaāna:

—Natokopa itxa Satanasi omitikiniua? ²⁴ Auītetxi tixine auakani naiatakakiniāua, ixipokaākanako. ²⁵ Kākiti aapoko āki auakani ninoakakarika neenamauatiniā, ixipokaākanako apaka. ²⁶ Iua atokokana, Satanasi nitiriakori, ninoakakarika naiatakakiniāua, Satanasi tapara xipokako.

²⁷ —Kona kākiti īroā kiki mitapoari aapoko āki ītiriuatini īkapani. Kinirāo ītiriuataka, ininiā iaxirikari mitari mitxi. Iposo atoko inirekaākiti ītirīka.

²⁸ —Ari, atāopitikara nota txai hīte. Apakata Teoso makatxakiniri ikinipoko maerekati kākiti kamakiti, imaerekani Teoso imisākirepiretini pakini. ²⁹ Txamari

ātipekana maerekati kamakari aua. Erekari Mata-matakoti misākirepiretakari maerekani makatxakiko kona auari. Ikara atoko inakani inikoriāriko imisiritiko maerekani misiritikoātaā —itxa Xesosi.

³⁰ Xesosi ikara atoko itxa, kotxi pariseoakori txari: “Iua auari maerekati matamatakoti.”

Xesosi Inoro, Itariakori Pakini

(Mateo 12.46-50; Arókasi 8.19-21)

³¹ Iuasaaki itariakori inorokata apoka porikiti. Ipaniātarina āti akiritiniri Xesosi. ³² Iuasaaki itori kākiti topākakani ākitari Xesosi. Isāpiretarina:

—Pitariakori, pinoro apaka porikiti aua. Initanātai —itxarina.

³³ Ininiā Xesosi apakapapireta:

—Kiripa nitariakori, ninoro pakini?

³⁴ Iua atamatana itakote topākakani:

—Hātamata, uai aua ninoro, nitariakori pakini.

³⁵ Teoso nireēkiti kamakani nitariakori, nitaroakoro, ninoro pakini itxauana —itxa Xesosi.

Katarereri Pirena

(Mateo 13.1-9; Arókasi 8.4-8)

4 Iuaīkana Xesosi oerekarauata ipoa takote. Kākiti mirikiniti, ininiā imorōkokaua kanaua āki. Iitopāka. Ninoa aua imiriī, ininiā iua kanaua oerekarauata. ² Itori Teoso sākire oerekana ninoa sāpirenatxi atāo inakari oerekikoā. Itxana:

³ —Hīkenakota. Katarereri takarauata. ⁴ Itakarau-atakasaaki itakareki irika kimapori tiniāpo. Ininiā kotipiriki nikari itakareki.

⁵ —Apanakini itakareki irika kai auiniātaā, kipatxi mauakaniātaā. Atāoka ipitxaka. ⁶ Kipatxi poiāoka auiniā atokatxi pataka apokasaaki itxarika. Omakot-sani xika osonāka. ⁷ Apanakini irika inako sauaki. Inako aneēkasaaki, okari takari. !Iriuata. Ipina.

⁸ —Apanakini irika kipatxi auiniātaā. Ininiā iriuata. Āti poiāoka iriuata, trītakata. Āti apiata iriuata, sesētakata. Āti kaiāopoko iriuata, seīkata.

⁹ —Kakenakokii, ininiā hīkenakotariko nisākire —itxa Xesosi.

Kākiti Mimarotakiniti Xesosi Sāpiretini Pirena

(Mateo 13.10-23; Arókasi 8.9-15)

¹⁰ Iuanani imoianariakorikata auakasaaki, ipimaārina Xesosi:

—Poerekaua mixikanani sāpirenatxi atāo inakari oerekiko pisāpiretakiti? —itxarina.

¹¹ Ininiā isāpiretana:

—Teoso sākire mauīākani limarotari Teoso auītetxi ininiuua. Teoso oerekai hīte ninoa mimarotakiniti. Teoso oerekana ninoa isākire sāpirenatxi atāo inakari oerekikoā. ¹² Atxīiti ninoa iteene atamatari Teoso oerekakiti, iuaritika limarotarina atamatakinitina. Atxīiti iteene ikenakotarina Teoso sākire, iuaritika limarotarina ikenakotakitina. Imarotaākamariiko, akiritaākamariiko Teoso, ininiā Teoso makatxakamariko ninoa maerekani.

¹³ Ininiã Xesosi txari:

—Himarotatari ikara sãpirenatxi atão inakari oerekiko?

—!Aimarotari —itxana.

—Ininiã natokopa ininiãparako himarotatari apanakini sãpirenatxi atão inakari oerekiko?

¹⁴ Ininiã imimarotakininitina oerekana:

—Iua takarauatakari takari Teoso sãkire. ¹⁵ Aua kãkiti kimapori tiniãpo takarekitxi irikiniãtaã atoko inakani. Ininiã Teoso sãkire ikenakotakasaaki Satanasi apoka. Ininiã imakatzakari Teoso sãkire ãkixinireëna apokakari.

¹⁶ —Aua kãkiti kai auiniãtaã atoko inakani. Ninoa kenakotakasaakiri Teoso sãkire, iuasaakipeka apakapari-na ipoxokoniritikana. ¹⁷ Itxamana, kona kakotsari. Imaxikiko apokiniã, imisiritiko Teoso sãkire auikinina xika apokiniã, iuasaaki itakanaparina Teoso sãkire.

¹⁸ —Aua kãkiti aanaia auiniãtaã atoko inakani. Ninoa kenakotapitikari Teoso sãkire. ¹⁹ Txamari maerekaxiniretinoka itxana. Txineironoka inirekana, ininiã ikara misirienetana ninoa. Kaiãopokori inireëkitina, Teoso manirekakiniti. Maerekaxiniretinoka ininina, txineiro, inireëkitina pakini inako atoko itxa, ininiã !ixinikaikari-na Teoso sãkire, ininiã kona iriuata.

²⁰ Aua kãkiti kipatxi erekari auiniãtaã atoko inakani. Ninoa auikari Teoso sãkire. Iriuatana. ãti iriuata poiãoka, trítakata. ãti iriuata apiata, sesëtakata. ãti iriuata ito, seïkata.

Tirikapi Pirena

(Arókasi 8.16-18)

²¹ Xesosi pimaãna ninoa:

—Nanipa hítakari tirikapi? Kopiti ãkikani hítakatari? Amesa patapikani hítakatari? Konapitini. Hítakari itano imakinika iopinikini ïkapani. ²² Iomaãtakori ãti õti oerekaãkako. Kipatakori oerekaãkako, kotxi nota imarotapitikari hïkamakiti. ²³ Kakenakokii, ininiã hïkenakotariko nisãkire —itxa Xesosi.

²⁴ Xesosi sãkirauatapanika:

—Hítakaõtxikariko nisãkire. Imakinika hïkenakotako. Erepaniko pikamakiti ãtimoni, kotxi pite kamakiti-tixikana kamaãka pitemoni. Erepaniko, kotxi apiata ikamaãka pitemoni. ²⁵ Teoso sãkire auakiti, iua sãkire kïpitakari, Teoso sikari apikomoni imaroretxi iuamoni. Txamari Teoso sãkire kenakotakari, isãkire makïpitakati, imarore xapiti iuamoni auakari makatx-akaãkako.

Takariki Pirena

²⁶ Apikomoni Xesosi txari:

—Teoso auítetxi ininiãua kiki takariki taãkari atoko itxa. ²⁷ Itakarauata. Imaka ïkanõka. ãti iparïka ikama pokamara. Iuasaaki itakare pitxakapeka. Kona iua imarotari otomoretini. ²⁸ Merepanika otomoretika. Iposo atoko opitxaka. Eereka opa aua. ²⁹ Oaneëpeka onakasaaki katakareri makoapataro, kotxi oamiko manapipeka itxa.

Ikara atoko itxa Teoso auítetxi ininiãua.

Mostata Pirena

(Mateo 13.31-32; Arókasi 13.18-19)

³⁰ Xesosi sãkirauatapanika. Itxari:

—Natokopa itxa Teoso auítetxi ininiãua? ïkiripa sãpirenatxi atão inakari oerekiko oerekaua? Ia atoko itxa: ³¹ Teoso auítetxi ininiãua mostata oki atoko itxa. Axapitikiro oa. Apanakini iki apiata. ³² Otakaãka atoko opitxaka. Eereka oaneë. Apanakini takari ïtano apiata oa. Amaripokoro okati. Kotipiriki takari okoa okatiã. Iua atokotxikana Teoso auítetxi ininiãtaãua.

Merepanika poião kãkiti. Eereka apiata. Eereka kaiãopokori kãkiti auítetari Teoso. Txamari iuasaaki Satanasi apoka ninoamoni kotipiriki apokini atokokana.

³³ Kaiãopokori sãpirenatxi atão inakari oerekiko isãpiretana, Teoso sãkire imarotinina ïkapani. Ninoa imarotakasaakiri isãkire, apiata isãpiretana. Imimaro-takanisaakiri isãkire, poiãonoka isãpiretana. ³⁴ Teoso sãkire oerekasaakina ninoa, sãpirenatxi atão inakari oerekikonoka isãpireta. Eereka imoianariakorinoka auakasaaki iuakata, oerekana ikara imarotinina ïkapani.

Xesosi Iotokakiniri ïtima

(Mateo 8.23-27; Arókasi 8.22-25)

³⁵ Iua õtipanika mapiãnikata itxana imoianariakori:

—Maïpiriãta ipoa. Ipiniaãmoni masa —itxana.

³⁶ Ininiã itakanapana itomaneri kãkiti. Iuasaaki imoianariakori anikari Xesosi kanauaã. Apanakini kanaua axapitiri apaka sari ninoakata. ³⁷ ïpiriãtakasaakina ïtima kataparari apoka ninoamoni. Tsakati kataparari, ininiã ãparaã ierepeëpokataua kanaua ãki. Kanaua sakikaariãpotape.

³⁸ Iuasaaki Xesosi ikapokiãmoni imakanãta. Isirimata nopini imakanãta. Ninoa õpiriãkari iua:

—Kona pimaãkataua ate. Kona pitiretataua? Apinanapanoka —itxana.

³⁹ Ininiã imereka. Ipinitari ïtima:

—Piotoka. Auapika pitxako —itxari ipoa.

Ininiã itsoriãkaxitita. ïtima iotoka. Tsakati iotoka apaka. ⁴⁰ Ininiã Xesosi:

—Natokopa ininiãpa kapïkarei hïte? Kinirepa hïte kona auikano nota? —itxana ninoa.

⁴¹ Apiapïkareta ninoa. Ininiã ninoa:

—Kinakaripa ia kiki, kotxi ïtima, tsakati pakini auikari iua sãkire —itxana.

Kiki Maerekani Matamatakoni Auaïtotakiti

(Mateo 8.28-34; Arókasi 8.26-39)

5 Xesosi imoianariakorikata apoka ãtiãtaã Xerasa tõpa, Kariréia poa ipiniã. ² Xesosi kanïkiãtakasaaki, kiki ina iuamoni. Iua akauariãtaã auakari. ³ Iuaãtaã iua auanãta. Kãkiti !iposotari ïtxikiniri iua. ïtxikare metao kamakori karakitapekata. ⁴ Kaiãokatani kãkiti ïtxikari iuako, ikiti pakini metaoã, txamari ikakarakitsatari metao. !Apakata kãkiti nïkatiniri iua. ⁵ ïkanõka, poka-mara pakini ixirataãtaã akiripoanãta akauari auiniãtaã. Kai soroã iuaka ikisauakitataua. ⁶ Õtakopanika atapari

Xesosi inini. Ininiã imiteëkata iuamoni. Ikapotoreëkka iua apisatoõ.

—Apiananiri pitxaua —itxa.

⁷ Akiripoakata:

—Xesosi, Teoso äkiri pitxaua. Apiananiri äkiri pitxaua. Kipa pinireka nota ïkapani? Teoso uäkaã nanaã pite, kona pimisiritapeno —itxa maerekati matamatakoti. ⁸ Ikara atoko itxa kotxi Xesosi paniätari:

—Maerekati matamatakoti pisipeka. Pitakanapari ere kiki —itxari.

⁹ Xesosi pimaãri:

—Kipa piuäka? —itxari.

Iua apakapapiretari:

—“Itori” ninaäka niuäka. Kotxi itori maerekani matamatakoti ate.

¹⁰ Iteene iua amanaaãpotari Xesosi:

—Kona piokanatapeua ätiätaã.

¹¹ Iuasaaki auari kaiãopokori irari ixiratamoni nipokonätakani. ¹² Maerekati matamatakoti iteene amanaãri Xesosi:

—Piokanataua ate irarimoni. Pauritaua ate sini ni-noamoni —itxanätana.

¹³ Ininiã Xesosi iokanataua. Iuasaakipeka maerekani matamatakoti takanapari iua kiki, ïroã itxana irari ïtomoni. Iuaätaã auari ipi mio irari. Ninoa ïroäksaaki, irari miteëkata oiokiriitini ipoamoni. Komoka, axäpoãta itxana iuasaaki.

¹⁴ Irari nïkatakani miteka sitatximoni, aapokotxi poião auinimoni pakini. Isäpiretana kãkiti itikakitina.

¹⁵ Eereka isana Xesosimoni. Iuasaaki atamatarina kiki mitxi maerekati auaitotakiti. Iitopäkanãta. Mãkatxi auapekari. Atão ïkitapeka auari. Iuaritika ninoa pïkarauata. ¹⁶ Itikakani säpiretari apanakini iua kiki pïrena, irari pïrena pakini. ¹⁷ Kãkiti iuaätaã auakani paniätari Xesosi osipikiniri iuaätaã.

¹⁸ Xesosi iereëtakasaakiaua kanaua äki, iua kiki amanaãri iuakata isini ïkapani. ¹⁹ Xesosi lauiritari. Itxari:

—Pisa pinirimanemoni. Pisäpiretana Apiananiri kamakiti pite ïkapani. Pisäpiretana iua iteene iamoniãkai pite. ²⁰ Ininiã iua sipe. Iuaätaã auari sitatxi tesi pakini. Iua kiki sari ninoa tesi sitatxitimoni. Isäpiretari kãkiti Xesosi kamakiti iua ïkapani. Iuaätaã auakani tsoriãkaãta:

—Anekani, peerekari Teoso —itxana.

Xáiro Amanaãkiti Pirena (Mateo 9.18-19; Arókasi 8.40-42)

²¹ Ininiã eereka Xesosi ïpiriãta ipoa. Ininiã ipoa ïtiniã kaiãopokori kãkiti apotiitaua iuakata. ²² Aiko Xoteo apotiitiniãtaãua sikani auïte apoka iuamoni. Akiritaãka Xáiro iua. Iua kapotoreëkka Xesosi apisatoõ. ²³ Iua iteene amanaãri Xesosi:

—Namarite opinanapanoka. Masa notakata. Pitakari piuako oa nopini erekape onini ïkapani.

²⁴ Ininiã Xesosi sari iuakata. Kãkiti kinapokope itxakata isinina.

Xesosi Mäka Maãtakakaro (Mateo 9.20-22; Arókasi 8.43-48)

²⁵ Iuasaaki sito amianatakaro apoka. Tosikanani oa arëka !iotoka. ²⁶ Okinika otxineiroteë oïkitxitapekari oamianare imarotakani. Kaiãopokori ipitamaro. Txamari ninoa liposotari imakatkakinirina oamianare. Kona erekaro. Apiata oamianare. ²⁷ Okenakoenetakasaakiri Xesosi napini, osari iuamoni. Omaãtakari imäka, ²⁸ kotxi oamoni: “Nimaãtakiniãri imäka, iuasaakiika erekapekano,” otxanãta oxinikakiti. ²⁹ Ininiã omaãtakasaakiri, oarëka iotoka. Iuasaakipeka oimarotari erekape onini.

³⁰ Iuasaakiika Xesosi posotiire sari oamoni. Ininiã ikirioka kãkiti sauaki. Eereka ipimaãna:

—Kipa maãtakatari nimäka? —itxa.

³¹ Iuasaaki imoianariakori apakapapiretari:

—Apiananiri, patamata. Itomaneri kãkiti kinapokopeka, iuaritika pite pimaãri kãkiti: “Kipa maãtakatano?” pitxa —itxana.

³² Iuaritika Xesosi nitari imäka maãtakakari.

³³ Iuasaaki oa sito imarotari erekape onini, ininiã okapotoreëkka iuamoni. Opïkarauata. Okikinanaka. Eereka osäpiretari ikinika oamianare iuamoni. ³⁴ Ininiã Xesosi txaro:

—Namarite, pite erekapekai uatxa, kotxi pauikari niposotiire. Pisipiniikaua, erekaxinirepekai —itxa Xesosi.

Xáiro Äkero Ökitikiko (Mateo 9.23-26; Arókasi 8.49-56)

³⁵ Xesosi säkirauatakasaaki oakata, apanakini Xáiro nitiriakori apoka. Itxari:

—Pamarite !auaika. Opïpeka. Pauritari Xesosi kanapiriini.

³⁶ Ininiã Xesosi !imaãkatari ikara pïrena. Itxari Xáiro:

—Kona pipïkarauatape. Pauikano —itxari.

Ininiã ninoa sari Xáiro aapokomoni. ³⁷ Xesosi auiritana Petro, Txiako, Txiako itari Xoão pakini sini iuakata. !Auiritana apanakini sini iuakata. ³⁸ Ninoa apokasaaki Xáiro aapoko, kãkiti iuaätaã auakani limarotarina ikamakitina. Ikinipoko kãkiti txiapanãta, akiripoakanãtana. ³⁹ Xesosi ïroã. Itxana:

—Kinirepa iteene hïtxiapanãta? Kinirepa hãkiripoanãta? Amarini !lipina. Oimakanãta —itxa.

⁴⁰ Ininiã inapetarina iua. Ininiã iokanataua ninoa mapara. Oïri, onoro, Xesosi moianariakori pakini ïroã amarini auiniãtaã. ⁴¹ Imaïkaro ouako. Iuasaaki isäpiretaro oa isãkireë:

—Taritaa komii.

Popïkari säkireë: “Amarini pökitikaua.”

⁴² Iuasaakipeka oökitikaua. Otïpokota. Oa amarini aua tosi anokanani. Iuasaaki ninoa iteene tsoriãkaãta.

⁴³ Ininiã Xesosi paniãtana:

—!Hïsäpiretapiri apanakini nimakananitiniro oa.

Apaka ipaniãtana isikakienatiniro oa.

Nasaree Auakani Kona Auikari Xesosi Säkire

(Mateo 13.53-58; Arókasi 4.16-30)

6 Xesosi imoianariakorikata potorika iuaã. Nasaree sitatxitimoni isana. Iuaãtaã mitxi Xesosi aneë.

² Tomatiko õtisaaki iua oerekari kãkiti aiko Xoteo apotitiniãtaãua. Xesosi sãkire kenakotakani tsoríkaãta. Itxana:

—Nanipa apaiaõkarauata, ikara atoko imarotini? Kipa oerekari imarore? Ikamakiti oerekari apiata imarore aua. Kininiãpa ïkora atoko itxa posotiiireta?

³ Ate imarotari iua, kotxi aapokotxi kamakari itxaua iua. Maria ãkiri iua. Iua itariakori Txiaiko, Xosee, Xota, Simão pakini itariakori itxauana. Itaroakoro apaka aua uai, ininiã ate imarotari iua —itxana.

Ikara xika kona ninoa auikari isãkire.

⁴ Ininiã Xesosi txana ninoa:

—Teoso sãkire sãpiretakari paxitaãka, txamari Teoso sãkire sãpiretakari itixineë auakasaaki, iuaã auakani, inirimane, iua aapoko ãki auakani pakini !ipaxitari. !Auikarina iua sãkire —itxa.

⁵ Ininiã iuaã kona ikamari iposotiire apiari. Iuako itaka ãtikaka amianatakani nopini, ininiã amianatakani erekapeka itxíkitaka. ⁶ Itsoríkaãta, kotxi iuaã auakani !auikari isãkire. Ininiã iua tãpa isari aapokotximoni. Oerekarauata iuaã. Eereka isari apanakini aapokotxitimoni. Iuaãkana oerekarauata. Itxaãpota iuaãtaã.

Xesosi Iokanatana Imoianariakori Kãkitimoni.

(Mateo 10.5-15; Arókasi 9.1-6)

⁷ Xesosi akiritana imoianariakori tosi pakini. Ipi iokanata ãtiãtaã, iuaãkana ãtiãtaã iokanatana ipi. Ikara atoko iokanaãpotana imoianariakori. Iposotiire isikana ninoa maerekani matamatakoni omitikinina ïkapani.

⁸ Itxana:

—Kona minakati hanikape. Hítsonerenoka hanika. Kona hítii, kona auatxi, kona txineiro !hanikape. ⁹ Híkiti mata hïeretaka. ãtika kasipiri himãka hanika. ¹⁰ Sitatxi hãpokasaaki, ãtika aapokotxinanirako hãua. Iua sitatxi hãuakasaaki, hïkaikota iua kãkiti aapoko. Kona hãuape ãti kãkiti aapoko. ¹¹ Kãkiti mapakapanisaakii, hïsãkire imakenakotakanisaakina, ininiã hítakanapana. Hïpotorikasaaki, hïkaxipokari kipatxi hïkiti mataã auakari, ininiã ikara atoko hõerekana ninoa maerekani ininiuana. Kãkiti misiritiko sãpiretiko õti apokasaaki, Sotoma sitatxiti auakani misiritiko auapitika. Iuasaaki Komoha sitatxiti auakani misiritiko auapitika. Iuaritika sitatxi auakani hïte mapakapanani misiritaãkako apiata iuasaaki.

¹² Ininiã isana. Isãpiretari kãkiti imaerekani itakanapini.

¹³ Mirikiniti maerekati matamatakoti iokanatana. Iïtxiã itakana amianatakani nopini. Ininiã erekapeka itxíkitakana amianatakani.

Xoão Kapatxisareri Ipinini

(Mateo 14.1-12; Arókasi 9.7-9)

¹⁴ Auítetxi Erotxi inakori kenakopiretari Xesosi pirena. Xesosi uãka iaripireta ikini tãpati. Ininiã Erotxi xinikanãta:

—Ikara Xesosi, Xoão kapatxisareri itxaua. Uatxa iua õkitikapekaua. Iuakara Xesosi itxa. Ininiãkara iposotiire aua iuamoni.

¹⁵ ãtikaka uãkatari Xesosi Eríasi ininiua. ãtikaka uãkatari Xesosi Teoso sãkire sãpiretakari kitxakapiríka ininiua.

¹⁶ Ikara Erotxi kenakopiretakasaaki, itxari: —Xoãokara nitsotakakiitakitarina iua Xesosi txa. Ipipekariika iuaãkana õkitikapekaua —itxa.

¹⁷ Mitxi Erotxi takaro itari Piripi ïtanoro. Ouãka Erotxia inakoro. Oa xika Erotxi maãkari Xoão. Iaxiriïtotari, kateia ãki taka itxari. ¹⁸ Xoão takaãka kateia ãki, kotxi itxari Erotximoni:

—!Erekari pitari ïtanoro pitakini —itxari.

¹⁹ Ikara xika Erotxia apaka omanatari Xoão. Oa iteene kinirão okaka otxamari Xoão. Kona oposotari oõkiniri iua, ²⁰ kotxi Erotxi piãkari Xoão. Iua imarotari, atão inakarínoka kamakari, erekarínoka kamakari ininiua Xoão. Xoão sãkire ikenakotakasaaki, liteene !imarotari isãkire, iuaritika iua apokaerekatari ikenakotiniri isãkire.

²¹ Erotxi kamari isaiã kiiniriti. Iua kemaïtxitana sotato auíteakori, Kariréia auakani auíteakori, apanakini auíteakori pakini. ²² Ininiã Erotxia ãkero apoka iua kiiniritiã. Iuasaaki oserenapiríkatata Erotxi apisatoõ, ikemaïtxitakini apisatoõ pakini. Ninoa potxitari oserenini. Ininiã Erotxi txaro oa ãtokoro:

—Pinirekakiti pamanaãno, ininiã nisikai. ²³ Atãopitakar nisikai pamanaãkiti. Nitixine pinirekiniã, ipixini nisikai —itxaro.

²⁴ Ininiã oa miteka onoromoni. Oa pimaã txaro onoro:

—Kiripa namanaãtari? —otxaro.

Ininiã onoro txaro:

—“Xoão Kapatxisareri kii prato nopini ninireka,” pitxari. Ikara atoko pamanaãri iua —otxaro.

²⁵ Ininiã katimariã okanapiriã kiiniri auiniãtaã iuaãkana. Katimariã auítetximoni osa. Oamanaãri iua: —Ninirekari Xoão kapatxisareri kii prato nopini —otxa.

²⁶ Ininiã Erotxi maerekaxiniretinoka itxa, kotxi mitxi iua sãpiretaro oa amanaãkiti isikiniro oa ikemaïtxitakini apisatoõ. Ininiã !apakata imasikakaniãri isikaenetakiti. ²⁷ Ininiã katimariã ipaniãtari sotatoakori okiniri Xoão:

—Ikii himina —itxa.

Ininiã isana kateiamoni. Itsotakakiitarina Xoão. ²⁸ Pirato nopini itakarina ikii, sika itxarona ãtokoro. Ininiã oa sikari onoromoni.

²⁹ Ininiã Xoão moianariakori kenakopiretakasaakiri Xoão okiko pirena, isana kateiamoni. Aparina iïto. Itakarina iïto kai iriko ãki.

Siko Mio Käkiti Xesosi Sikakienatini
(Mateo 14.13-21; Arókasi 9.10-17; Xoão 6.1-14)

³⁰ Ininiã Xesosi iokanatakini kanapiriã iuamoni. Apoka itxana Xesosimoni. Isãpiretarina ikamakitina, oerekakitina pakini. ³¹ Iuasaaki kaiãopokori kãkiti aua iuaãtaã, ininiã !apakata inipokotini. Ininiã:

—Amasipeka kãkiti mauakaniãtaã atomatini ïkapani —itxana.

³² Ininiã kanauaã iereëtauana. Ïpiriãtarina ipoa. Isana kãkiti mauakaniãtaã. ³³ Kãkiti itikari Xesosi inapaãpotini, ininiã ninoa miteka. Iopiriãrina ipoa koropoa, apoka itxana Xesosi apisapanika. ³⁴ Iua kanïkïitakasaaki apisamoni mirikiniti kãkiti, ininiã iamoniãkana, kotxi soti auite ipitikiri mauakiniti atoko itxana. Iuasaaki Xesosi oerekana kaiãori Teoso sãpiretakiti.

³⁵ Ininiã mapiãpeka inaãpotiniã, Xesosi moianariakori iuamoni apoka. Itxarina:

—Kona kãkiti aapoko auari uai. Uatxa mapiaãpopeka. ³⁶ Ininiã pipaniãtana kãkiti isinina ïkapani nipokori iamotinina tïkane.

³⁷ Ininiã Xesosi:

—Hïtekarako sikakienatana ninoa —itxana.

Ininiã ninoa:

—Pinirekatari asini komiri aamotini ïkapani? Oito kasiriti kãkiti parïkauatini ïki anireka komiri ïki naia kãkiti nikini ïkapani —itxana.

³⁸ Ininiã Xesosi pimaãna ninoa:

—Kipakinipa komiri katari aua? Hãtariko —itxa.

Ninoa imarotakasaakiri, apoka iuamoni. Itxana:

—Sïko pakini komiri katari, ipi ximaki pakini aua —itxarina.

³⁹ Xesosi paniãtana ikinika kãkiti topãkini katsotati nopini. ⁴⁰ Ätiãtaã iitopãkana sïkoëta, ipinimoni iitopãkana seï. Imakinikana ikara atoko itxaãpotana iitopãkinina.

⁴¹ Ininiã Xesosi kosekari sïko pakini komiri, ipi ximaki pakini. Iuasaaki ionakaãta iaxiti:

—Erekapitikari pisikakiti —itxa.

Eereka imaxiõpekaru komiri. Isikari imoianariakori. Imoianariakoripekana sikaãpotana apanakini.

Iuaïkana imapiririkari ximaki, xanaka itxari imakinikana. ⁴² Ikinimanekana nipokota, kamitopeka itxana. ⁴³ Ininiã imoianariakori apotiitari ximaki itetakori, komiri itetakori pakini. Tosi pakini kotari xãpoka itetakori. ⁴⁴ Iuasaaki sïko mio kikiakori nipokotakani.

Xesosi Ipoa Nopini Itïpokotini

(Mateo 14.22-33; Xoão 6.15-21)

⁴⁵ Xesosi takapiretakasaakiri kãkiti, iuasaaki iokanataka imoianariakori ïpiriãtinina iua apisa, Pet-sãita tixinimoni isinina ïkapani. ⁴⁶ Xesosi takapiretana paka atoko, mitaxiratari nopini isa Teoso imisãkiretini ïkapani. ⁴⁷ Mapiãpe inakasaaki kanaua ipoa apanïkak-iãxitipeka aua. Iuasaaki Xesosi imiriãpanika aua.

⁴⁸ Xesosi atamatana ninoa, itaparanoka itxana imekoãtinina, kotxi ïtima, tsakati pakini anikaãpotana ninoa. Ininiã ikatimaãpotakasaaki, Xesosi apokaãpota

ninoamoni. Itïpokota ipoa nopini. Inapaãpoaritana imoianariakori. ⁴⁹ Ininiã ninoa atapakasaakiri ipoa nopini itïpokotini, ninoa uãkatari kamiri. Ininiã ninoa akiripoakata. ⁵⁰ Ininiã iua misãkiretana:

—Kataparaxinire hïtxako. Notakara. Na !hïpïkarauatape —itxana imoianariakori.

⁵¹ Eereka kanauaã iereëtauana. Iuasaaki ïtima iotoka itxa. Ininiã itikokitatana ninoa. Itsoriããtana:

—Kiripa atxiïti? —itxana.

⁵² Ikara atoko isãkirena, kotxi kona ixinikaikarina Xesosi posotiire komiri ixanakasaaki. Paikoxinirena ninoa iuasaaki.

Xesosi Makananitana Amianatakani Xenesareekini

(Mateo 14.34-36)

⁵³ Xesosi imoianariakorikata ïpiriãtari ipoa. Isari Xenesaree tixinimoni. ⁵⁴ Ikanïkïitakasaakina apanakini itikari Xesosi.

—Xesosira —itxana.

⁵⁵ Ininiã imitekana kãkiti auinimoni amianatakani apinina ïkapani. Anikana isirimatana nopini Xesosimoni.

⁵⁶ Ikini sitatxiti kãkiti amianatakani sirïka kimapori tiniãpo. Amanaãrina Xesosi auiritinina ninoa imãka itikakinina. Ikinikana imãka tikakakani erekapeka itxïk-itaka.

Xoteoakori Iïkite Pirena

(Mateo 15.1-9)

7 Ininiã pariseoakori, kaiõkatsopareriakori pakini, Xerosareë ïkani, apotiitaua Xesosikata. ² Iuasaaki itikarina Xesosi moianariakori marokapiotakaniua nipokori inikinina apisa. Ininiã itxana:

—!Erekari imarokapiotakaniua —itxana.

³ Pariseoakori, imakinikana Xoteoakori apaka kamari ikiomaneakori kitxakapirïkarini sãkire iaõka. Inipokotiniina apisapanika arokapiotauana.

⁴ Nipokori amotikoãtaã Xoteoakori sikasaaki, eereka apokasaakina aapokona imarokapiotakaniãuana kona inipokotana. Tiitxi iãkoanatxi, kopiti, apanakini itiina pakini arokasaakina ikiomaneakorini oerekakiti iaõka arokana.

⁵ Ininiã pariseoakori, kaiõkatsopareriakori pakini pimaãri Xesosi:

—Kinirepa pimoianariakori kona kamatari kitxakapirïka atoko ininina? Kinirepa marokapiotakanikaua inikarina nipokori? —itxarina.

⁶ Ininiã Xesosi apakapapireta:

—Mitxipitipanika Isaia sãpiretai hïte. Atão iua sãkire, kotxi hïssãkire atxiïti erekari, txamari kona hïkamari hïssãkire iaõka. Iua txari:

Kamisirienererini ninoa kãkiti. Ninoa sãkireënanira ipaxitanona. Äkixinireëna !inirekanona.

⁷ Maxikatïka ninoa kapotoreëkaua nota apisatoõ. Maxikatïka ninoa txano: “Ateosone pitxaua,” kotxi ninoa !oerekari nota sãkire. Ninoaka sãkire oerekana, txamari “Teoso sãkire asãpiretai” itxana.

Ikara atoko Isaia iõkatsopatakiti Teoso sãkire.

⁸—Ininiã hĭtakanapapekari Teoso sãkire, kãkiti oereëkiti hĭkamini ĩkapani. ⁹Hĭtakanapapikari Teoso paniãtakiti, hinirekaãkiti hĭkamini ĩkapani. ¹⁰Kitx-akapirĭka Moisesi txari:

Pipaxitariko piri. Pipaxitaroko pinoro. Piri, pinoro pimisãkirepiretiniã, pokaãkako, itxa Moisesi sãkire. ¹¹Txamari hĭte oerekari kãkiti: “Kãkiti auakiti iri, inoro pakini nirekiniã, iua manirekakaniãri isikiniri ninoamoni, isãpiretana: ‘Ia nota auakiti nisika Teosomoni.’” Ininiã !isikari ninoa nirekakiti ninoamoni. Ikara atoko inakari kãkiti sikakiti Teosomoni, hĭte takauãkatari “Kopaã.” ¹²Ininiãkara hõerekari kãkiti imatiretakanina iri, inoro pakini. !Apakata hõerekakiti. ¹³Ikara hõerekakiti xika kona hĭte maãkatari Teoso sãkire. Apiata hinirekari kãkiti oereëkiti. Auapanika itori hõereëkiti sãkiretxiti ikara atoko inakari —itxa Xesosi.

Åkixiniretxi Txiko Pirena

(Mateo 15.10-20)

¹⁴Xesosi iuaĭkana akiritana ikinimane kãkiti. Itxana: —Hĭkinika hĭkenakota. Hĭtakaõtxikariko nisãkire.

¹⁵Imakinika hinikakiti, mapara auakari. !Ikamari ate maerekani. Hĭxinireë potoriãkarira kamari maerekan-itxi. ¹⁶Kakenakokii, ininiã hĭkenakotariko nisãkire —itxa Xesosi.

¹⁷Ikinimane kãkiti itakanapaka atoko, aapokotxi åki ĩroã. Iuasaaki imoianariakori pimaãri:

—Pisãpiretaua mixikanani pisãpiretakiti —itxana.

¹⁸Ininiã iua txari:

—!Kĭkĭitei hĭte. Kona hĭte imarotatari hinamaã ĩroãkari kona kamari maerekanitxi. ¹⁹Kotxi ĩroãkari !is-ari hĭxiniremoni. Hĭtikako åki isa. Iposo atoko hĭtikatakasaaki inapa. Ikara atoko ininiã, erekari ikinipoko kãkiti niãkiti.

²⁰—Ixinireë potoriãkari iuara kamari kãkiti maerekani. ²¹Kãkiti åkixinire ipotorika ixinikakiti maerekati, anokaretxi, ĩtiriuatakatxi, okaniuatakatxi, åti kãkiti ĩtanorokata isirĭkini nire pakini. ²²Kãkiti åkix-inireë ipotorika itirenani, maerekati Satanasi oerekakiti, misirieneretxi, pëtauatakatxi kamakari, xikotakatxi, åti misãkirepiretiko, iuikiniua, miĭkiteti inini pakini.

²³Ikinika ikara maerekati kãkiti åkixinire auakari txiko-tari kãkiti xinire —itxa Xesosi.

Xoteo Minakatoua Auikiniri Xesosi Sãkire

(Mateo 15.21-28)

²⁴Xenesaree tixini Xesosi potorika. Txiro sitatxiti tõpa, Sitoõ tixini pakinimoni isa. Iuaã kãkiti aapoko ĩroã. Kona inirekari kãkiti imarotiniiri iua auiniãtaã. Txamari !iposotari iomaãtiniua. Kãkiti imaroãpotari iua auiniãtaã. ²⁵Sito apoka Xesosimoni, kotxi oa kenakopiretari Xesosi pirena. Maerekati matamatakoti auãĭtotoaro oimi. Oãpokasaaki Xesosimoni, okapotoreëkaua iua apisatoõ.

²⁶Oa sito sãkiretari Kreko sãkire. Åto uãka oa. Siropenisia tixinikero oa. Okapotoreëkasaakia Xesosi apisatoõ, oamanaãri Xesosi:

—Pomitikenatariko maerekati matamatakoti namarite ĩtoã auakari —otxari.

²⁷Ininiã Xesosi:

—Xoteo !pitxaua. Maparakerorai. Pite nirekakari nisikinii Xoteoakori nakiti. Amarini mitxi nikini atão. !Erekari nokiniri amarini kiena anãpamoni —itxaro oa.

²⁸Oa apakapapireta:

—Atãopitikara ikara atoko pitxa, kotxi nota maparakero, anãpa atoko Xoteoakorimoni. Iuaritika kãkiti auiritari anãpapiki nikiniri nipokori katxakakari amari-ni nipokotiniãtaã patapi —otxari Xesosi.

²⁹Ininiã Xesosi apakapapireta:

—Erekari papakapapiretini, ininiã paapokomoni pisa. Maerekati matamatakoti !auaika pamarite ĩtoã —itxaro.

³⁰Oaãpoko oãpokasaaki, oãpokaro oamarite sirĭkanãta. Erekapekaro oa. Maerekati matamatakoti asikapekaro.

Makenakoreti Pirena

³¹Eereka Xesosi takanapari Txiro sitatxiti tõpa. ĩpirixi-titari Sitoõ tixini. Sitatxi tõpa tesi pakini ĩpirixitita. Apoka Karirëia poamoni. ³²Åtikaka kãkiti minari makenakoreti Xesosimoni. !Iposota atão isãkirauatini. Ninoa iteene amanaãri Xesosi:

—Piuako pitaka iua nopini kakenakorepeka inini ĩkapani —itxana.

³³Xesosi anikari iua kiki kãkiti mauakaniãtaã. Itakari iuakoki ikĭpita åki. Eereka ikiisoka, taka itxari ienemaã masãkireti nini nopini. ³⁴Eereka ionakaãta iaxiti, oõka itxa:

—Epataa —itxa.

Popĭkari sãkireë, “Piauãka.” ³⁵Iuasaakipeka ikenakoki auãka, ininiã kakenakorepeka itxa. Iuasaaki inini poiõpeka apaka. Eereka erekapeka itxa isãkirauatini.

³⁶Ininiã Xesosi txana ninoa:

—Kona hĭsãpiretapiri apanakini nimakananitiniri iua. Txamari apiata ninoa sãpirenauata. ³⁷Kãkiti tsorĭkaãta:

—Ikinika ikamakiti peerekari. Makenakoreti kakenakorepeka itxa. Mimatasaãkiretakati, kasãkirepeka itxa —itxana.

Xesosi Sikakienatana Ipi Ipi Pakini Mio Kãkiti

(Mateo 15.32-39)

8 Eereka mapaõti itomaneri kãkiti apotiitaua Xesosimoni. Nipokori xipokapeka, ininiã Xesosi akiritana imoianariakori. Itxana ninoa:

²—Nota amonĭkana naia kãkiti, kotxi ipi õti, åti õti pakini õtipeka auana notakata. Ininiã uatxa nipokori !auaika. ³Niokanatinianã auinimoni manipokotakati-panikana, ininiã ipixiniãpo iõkapetana. Irikana. Åtikaka õtako ĩkani kona apakata manipokotakanika isinina —Xesosi txana imoianariakori.

⁴Imoianariakori apakapapireta:

—Uai aapokotxi mauakaniãtaã, ininiãkara nãpa aãpokari nipokori ito naia kãkiti asikakienatini ĩkapani? —itxana.

⁵ Ininiã Xesosi:

—Kipakinipa komiri katari hitemoni aua?
—Setxinokara komiri aua atemoni —itxana.

⁶ Ipaniãtari kãkiti topãkini iixiti. Imaĩkari iua komiri setxi.

—Erekari pisiãkiti —itxari Teoso.

Iposo atoko imaxiõpekari komiri, sika itxana imoianariakori. Imoianariakori sika itxana apanakinimoni.

⁷ Ninoamoni aua ãtikaka ximaki axapitiri. Ininiã Xesosi txari:

—Ia erekari —itxa Teosomoni.

Eereka ipaniãtana imoianariakori sikiniri kãkitimoni.

⁸ Ininiã ikinipoko kamitopeka itxana. Iposo atoko apotiita itxarina itetakori. Xãpokaka itxarina setxi kotarina. ⁹ Ninoa komiri nikakani ipi ipi pakini mio kãkiti. Kamitopeka itxana.

Ininiã itakapiretanapana ninoa. ¹⁰ Iposo atoko imoianariakorikata iereẽtaua kanaua ãki. Taomanota tõpamoni isana.

Pariseoakori Nirekari Xesosi Oerekiniri Iposotiire

(Mateo 12.38-42; 16.1-4; Arókasi 11.29-32)

¹¹ Pariseoakori apoka Xesosimoni. Inirekarina Xesosi kerokiniri, ininiã itxarina Xesosi:

—Takaõtxikari, Teoso posotiire poerekaua ate, aãtaminiri ãkapani, Teoso iokanatinii ãkorapokoriti aimarotini ãkapani —itxarina. ¹² Ininiã Xesosi oõka. Itxari:

—Kinirepa kãkiti uatxarini nirekari noerekiniri Teoso takaõtxikare, iposotiire? Atãopitikara nota txai hĩte, kona noerekai hĩte.

¹³ Ininiã itakanapana. Iereẽtaua kanaua ãki. Ikanapiriã ipoa ipiniãmoni iuaĩkana.

Pão Tireẽkari Pirena

(Mateo 16.5-12)

¹⁴ Xesosi moianariakori maxinĩkaretari pão. ãtika pão porĩ kanaua ãki aua. ¹⁵ Ininiã Xesosi õtãkikana:

—Erepaniko, pamonõkoniri pariseoakori, Erotxi pakini pãote tireẽkari —itxa Xesosi.

¹⁶ Xesosi moianariakori misãkiretakakaua:

—Ikara atoko itxaua, kotxi amaxinĩkaretari pão.

¹⁷ Xesosi imarotari ninoa sãkire, ininiã itxana:

—Kinirepa hĩsãkirauanãta pão mauakani xika? Kona himarotatapanikari niposotiire? Kona hĩkitetapanikari? Kona hinirekatari hãuikiniri nisãkire? ¹⁸ Kokimai, txamari, !hãtamatarari. Kakenakokimai, txamari !hĩkenakotari nisãkire. ¹⁹ Kona hĩxinikapanikari iuusaaki nimaxiõpekitakiti sĩko komiri, sĩko mio kãkiti nisikakienatini? Kipakinipa kotari itetakori hĩxãpokaka? —ipimaãna.

Ininiã ninoa apakapapireta:

—Tosi kotari axãpokaka.

²⁰ Xesosi txana ninoa:

—Eereka ãti õti nimaxiõpekari setxi komiri porĩ. Nisikari ipi ipi pakini mio kãkiti. Itetakori hãpotiitakiti, kipakinipa kotari hĩxãpokaka? —ipimaãna.

Ininiã ninoa:

—Setxi kotari axãpokaka.

²¹ Ininiã Xesosi:

—Ininiã kinirepa kona hĩkitetapanikari?

Mõsiãreti Petsáita Aapokotxitikiri

²² Xesosi Petsáita aapokotxitimoni apoka. Iuusaaki kãkiti minari mõsiãreti iuamoni. Amanaãrina Xesosi maãtakiniri iua mõsiãreti. ²³ Ininiã iua anikaãpotari iuakoã kãkiti mauakanimoni. Iuaã iminapari ienemaã mõsiãreti okiã. Eereka taka itxari iuako iĩtoã. Ipimaãri iua:

—Kõsiãrepekai? —itxari.

²⁴ Ininiã iua atamata.

—Nota itikapokotapeka, txamari nitikari kãkiti tĩpokotakari aamina atoko —itxa.

²⁵ Iposo atoko Xesosi iuaĩkana takari iuako mõsiãreti nopini. Eereka mõsiãreti atão itikapokotapeka.

Ikinipoko atamata. ²⁶ Ininiã Xesosi iokanatarari:

—Pisipeka paapokomoni. Kona pisipe Petsáita aapokotxitimoni, kotxi kona ninirekari pisãpiretiniri nikamakiti kãkitimoni —itxa Xesosi.

Petro Auikari Xesosi Teoso Mereẽkiti Ininiãua

(Mateo 16.13-20; Arókasi 9.18-20)

²⁷ Eereka Xesosi imoianariakorikata sari kãkiti poiõoka auinimoni, Sesaréia-Piripi sitatxiti takote isana. Ipixiniãpo Xesosi pimaãna imoianariakori:

—Kiripa kãkiti uãkatano nota? —itxa.

²⁸ Ninoa apakapapireta:

—Xoão kapatxisareri iuãkataka. Apanakini “Erfasi inakori” iuãkataka. Ininiã apanakini “Teoso sãkire sãpiretakari” iuãkataka —itxana Xesosi moianariakori.

²⁹ Iuaĩkana Xesosi pimaãna:

—Hĩtepekana, kipa hĩte uãkatano? —itxana.

Ininiã Petro apakapapiretari:

—Teoso mereẽkiti, kãkiti iãtapanãtakiti pitxaua —itxari.

³⁰ Ininiã Xesosi txana imoianariakori:

—Teoso mereẽkiti nininiua !hĩsãpiretapiri apanakini —itxa.

Xesosi Sãpiretari Ipinini

(Mateo 16.21-28; Arókasi 9.22-27)

³¹ Ininiã ia atoko oerekarauata:

—Nota hĩtari iaxitikiri iteene atatsiirauatako.

Kiomãtxiakori, sasetotxi auĩteakori, kaiõkatsoparerini pakini kona nirekapanino nota. Nokaãkako. Eereka ipi ãti pakini õtisaaki iuaĩkana nõkitikauako.

³² Ikara isãpireta ikinimane kãkitimoni. Ininiã Petro anikari iua maparamoni. Itxari:

—Kona ikara atoko !pitxape. Kona erekari pisãkire ikara atoko pinini —itxa Petro.

³³ Ininiã Xesosi kirioka imoianariakorimoni. Iua txitari Petro:

—Pisipiniikaua Satanasi. Pite nireẽkiti kãkiti nireẽkiti atokotxikana. Pite nireẽkiti kona Teoso nireẽkiti atokoni —itxa Xesosi.

Xesosi Moianari Atão Inakari

(Mateo 16.24-28; Arókasi 9.23-27)

³⁴ Xesosi akiritana kãkiti imoianariakori apaka. Itxana ninoa:

—Notakata kinirão sika pinakasaaki, piteka pinireëkiti kona pixinikape. Notakata kinirão sika pinakasaaki, nota misiritiko atokokana pimisiritaãkako. Ia atoko pinirekiniã, notakata pisapitikako. ³⁵ Pite ätipirika kaminiãri piteka nireëkitinoka, ininiã pinireëkiti xipokapitikako pitekata. Pite nireëkiti xipokiniã, nota sãkire pauikini xika, Teoso iokanapirena erekari pisãpiretini xika, pite auapininiika txako Teosokata.

³⁶ Atxiiti papakapari ikinipoko tiitxi, ikini itixiti auakani tii, pinakiti ïkapani. Atxiiti iua tiitxi xika kona pikïpitari Teoso sãkire, ininiã kona pikaikota ätipirika Teosokata. Ikara atoko ininiã, erekari atxiiti ikinipoko tiitxi auinii? Konapitini. Apiaerekata Teosokata ätipirika pikaikotini, kotxi tiitxi ïki poiãoka, pixinire karone apiata. ³⁷ !Apakata kãkiti ïkitxitiniri Teoso, iuamoni isini ïkapani.

³⁸ ïkorasaaki kãkiti !inirekari Teoso. Inirekari maerekatinoka. ïkorasaaki pipëtatinianõ nota, pipëtatinianõ nota sãkire, ininiãkara nota kãkiti itari iaxitikirino pëtataiko pite, uai nikanapiriãkasaaki. Nikanapiriãkasaaki, niri iotximere aua notamoni. Nina niri nitirikorikata, erekarinikata.

9 Xesosi txana ninoa:

—Hïxinikariko ia nisãkire. Apanakini hïte uatxa uai auakanii, hïpinini apisapanika himarotari Teoso auïttxi ininiãua. Auïttxi kaposotiireri itxaua —itxa Xesosi.

Moisesi, Erïasi Pakini

(Mateo 17.1-13; Arókasi 9.28-36)

² Seisi pakini õti napaka atoko Xesosi anikana Petro, Txiako, Xoão pakini oxiratarimoni, mitaxiratarimoni. Iuasaaki ninoanani aua iuaã. Iuaã auakasaakina, Xesosi ïto ipinipo itxa. ³ Imãka kasarori itxaua. Iotximere apaka auari. Ikara imãka saro atoko inakari, !auari. Kãkiti iteene arokiniãri mãkatxi, iuaritika ikara isaro atoko !auari. ⁴ Iuasaaki Erïasi, Moisesi pakini tokiã iuaã. Isãkirauatana Xesosikata. ⁵ Ininiã Petro txari Xesosi:

—Koerekareri, erekapitikari uai aãuini. Makamari papiri ipi äti pakini, pite ïkapani, Moisesi ïkapani, Erïasi ïkapani —itxa.

⁶ Ikara atoko itxa Petro, kotxi !imarotaikari isãkire, iteene ipïkarauatiniã.

⁷ Iuasaaki katxiãri apoka ninoamoni. Katxiãri äki aua-na. Katxiãri äki Teoso txari:

—Ere namarite, nitiretakiti. Hïkenakotariko iua sãkire —itxa.

⁸ Katimaritika Xesosi moianariakori sapotorika. Itikapokotana. Mitxi Xesosikata sãkirauatakani !uaika iuaã. Xesosinokara kaikota ninoakata.

⁹ Ötanoxiratarari iokiriiãpotakasaakina, Xesosi txana:

—Mixikanani hïtikakiti !hïsäpiretapiri apanakini. Nota hïtari iaxitikiri nipinaka atoko iuaãkana nõkitikaãkaua atokoikarako, hïsäpiretariko mixikanani hïtikakiti —itxana.

¹⁰ Ininiã !isãpiretarina apanakinimoni. Ninoanoka isãkirauanãtana:

—Natokopa itxa kãkiti ipïkaripeka iuaãkana õkitikiniãua —itxanãtana.

¹¹ Ipimaãrina Xesosi:

—Kinirepa kaiõkatsoparerini sãkire: “Teoso mereëkiti apokini apisapanikarako Erïasi apokako.” Kinirepa ikara atoko itxana?

¹² Ininiã Xesosi:

—Inipitikara Erïasi apoka merepanika, kãkiti iposope inini ïkapani. Teoso sãkire iõkatsopatakori txari: “Kãkiti itari iaxitikiri iteene atatsiirauatako. !Inirekaãkako.”

Kinirepa ikara atoko itxa Teoso sãkire iõkatsopatakori ¹³ Nisãpiretaiko Erïasi apokapeka. Kãkiti misiritapekari iuani. Inireëka iaõka imisiritarina. Teoso sãkire iõkatsopatakori sãpiretapekari ikara ene —itxa Xesosi.

Amarini Maerekati Matamatakoti Auaïtotakiti

(Mateo 17.14-21; Arókasi 9.37-43a)

¹⁴ Ninoa apokaãpotakasaaki apanakini imoianariakorimoni, atamatana kãkitipokoni. Ninoa äkitana Xesosi moianariakori. Iuasaaki kaiõkatsoparerini kãkitikata itaparakienetakakaua. ¹⁵ Iuasaaki kãkiti atapari Xesosi. Ipoxokoniritikana itxana:

—Xesosi napani.

Ininiã imitekana iuamoni, okapireta itxarina:

—Piteni?

¹⁶ Ininiã Xesosi:

—Ari, notara.

Ipimaãna:

—Kininiãpa hïtxitakakaua? —itxa.

¹⁷ Ininiã kiki kãkiti sauaki auakari apakapapiretari:

—Nota minamari namarite pitemoni. Maerekati matamatakoti auaïtotari iua. !Auiritari namarite sãkirauatini. ¹⁸ Iua mãkasaakiri, okaïtotari iua xiti. Iuasaaki namarite sorikipeta. Akatsakatsirïitaua. Itorõkaïtota. Ininiã nimisãkiretamana pimoianariakori omitikiniri maerekati matamatakoti, txamari ninoa !iposotari.

¹⁹ Xesosi txari:

—!Kauikarei hïte. Maerekati kamakanii hïte.

Kipakinikananipa Teoso nirekatari hïtekata nauini? Kipakinikananipa Teoso nirekatari hïte nimïteenekini? Himinari amarini notamoni —itxana.

²⁰ Ininiã ninoa anikari iua amarini Xesosimoni.

Iuasaakipeka maerekati matamatakoti atamatari Xesosi. Iuasaakipeka maerekati matamatakoti txïkitakari amarini okaratiniua. Ininiã iua amarini iriãkata. Ikanapirikata, isorikipekata, itxïkitakari amarini. ²¹ Xesosi pimaãri iri:

—Kirisakipa ipotorika ïkora atoko inini?

—Axapitipanikara ipotorika ïkora atoko inini. ²² Itokata maerekati matamatakoti okaïtotari xaminamoni. Itokata okaïtotari kãuaãrimoni. Inirekari okiniri iua. Pi-

posotiniäri, pomitikariko maerekati matamatakoti. Piamonĩkauako atepaniko —itxa iri säkire.

²³ Ininiä Xesosi:

—Nota posotatari? Teoso säkire auiäkari posotari ikaminiri ikinika —itxari.

²⁴ Iuasaaki iua kiki apakapapiretari iätsaritika:

—Nauikapitikari piposotiire. Axapitikinoka !nauikari, ininiä pisikaposotiiretano iteene pisäkire nauikini ĩkapani.

²⁵ Isäkirauanätakasaakina, kãkitipokoni miteëkata ni-noamoni Xesosi kamakiti imarotininina ĩkapani. Ininiä Xesosi itapararitika txitari maerekati matamatakoti:

—Pite maerekati matamatakoti. Pitxĩkitakari kãkiti masäkireti inini. Pitxĩkitakari kãkiti makenakokiti inini. Nota omitikai pite. Pipokĩka. Iuaĩkana !piĩroäpinikako iua ĩtoä —itxa Xesosi.

²⁶ Iua maerekati matamatakoti akiripoakata. Okaraĩtokatari atoko, sipe itxa. Iua amarini ipĩkari ĩto atokopeka itxa. Ininiä apanakini kãkiti:

—Ipĩpeka —itxarina.

²⁷ Ininiä Xesosi maĩkauakotari. Ökitikari iua, ininiä itima.

²⁸ Xesosi aapokotxi äki auakasaaki, iuanoka inakasaaki, imoianariakori pimaäri:

—Natokopa ininiäpa kona ate posotatari maerekati matamatakoti aomitikini? —itxana iuamoni.

²⁹ Ininiä Xesosi:

—Teoso pimisäkiretakasaaki, iuasaaki pimanipokotakaniära, iuasaaki piposotari ikara atoko inakari maerekati matamatakoti pomitikini —itxa Xesosi.

Xesosi Iuaĩkana Säpiretari Ipinini

(Mateo 17.22-23; Arókasi 9.43b-45)

³⁰ Iuaä ipotorikana. ĩpirixitarina Kariréia tōpa. Xesosi !nirekari apanakini kenakoenetiniri iua auiniätaä.

³¹ Kotxi inirekari oerekinina imoianariakorinoka ipinini pirena. Ininiä Xesosi:

—Nota hĩtari iaxitikiri mĩkapiritaäkako. Nisikaäkako kikiakorimoni inirekaäkitina ikaminina tĩkane. Ninoa okano nota. Ipi öti äti öti inakasaaki iuaĩkana nõkitikauako —itxa.

³² Ninoa !imarotari Xesosi säkire. Ninoa pĩkari ipi-mainirina iua.

Kiripa Kãkiti Apiatakari Txataua?

(Mateo 18.1-5; Arókasi 9.46-48)

³³ Kapanaoö sitatxiti apokana. Aapokotxi äki auakasaakina, Xesosi pimaäna ninoa:

—Natokopa itxa hĩsäkire, uaimoni aĩkasaaki hĩtaparakienatakakasaakiaua? —itxa.

³⁴ Masäkirenika itxana, kotxi kimaporiäpo ninoa säkire: “ĩkiripa ate apiatakari?” itxana. ³⁵ Xesosi, iitopäka atoko, akirita itxana imoianariakori tosi pakini.

—Hĩkinika uaimoni hĩitopäka. Apiatakari pininiäua pinirekiniä, piteka poiäotakaua. Ikinimane nitiri pitx-auako.

³⁶ Xesosi kosekari amarini, mina itxari imoianariakori sauaki, katarata itxari.

³⁷ —Papakapiniäri amarini pipoxokoniritika, papakapano nota apaka. Papakapiniäno nota, na notananini papakapa. Iuasaaki papakapari iua uaimoni niokanatakiri —itxa Xesosi.

Maerekani Matamatakoni Omitiäkari

(Arókasi 9.49-50)

³⁸ Xoäo säpiretari Xesosi:

—Koerekareri, ate kenakotari kiki omitikinina maerekani matamatakoni pite uäkaä. Kona pimoianarinini iua. Ininiä ate: “ĩkara atoko !pitxape,” atxari.

³⁹ Ininiä Xesosi:

—!Hĩotokakapiri ikara ikamini. Kãkiti nota uäkaä maerekati matamatakoti omitiäkari, kona imisäkirepiretano. ⁴⁰ Iua ate mokaiakari minakatiua. Atiretakiri itxaua. ⁴¹ Nota atäöpitikara nitxai hĩte. Atxĩti kãkiti sikai äparaä, kotxi Teoso mereëkiti nakiti pitxaua. Iua kamakiti erekari, ininiä apakapapitikariko ikamakiti ĩki.

Maerekati Oerekakari

(Mateo 18.6-9; Arókasi 17.1-2)

⁴² !Erekari kãkiti mitari oerekiniäri amarini nota säkire auiäkari maerekati ikamini. !Erekari. Erekariko kai mitari iaxirikaäkamako iua kãkiti mitari nokiä, eereka okaäkamako ipoamoni ipinini ĩkapani. ⁴³ Piuako maerekati ikamãkitakiniäi, pitsotakari. Erekariko ätinani piuako Teosokata ätipirika pauini ĩkapani, kotxi maerekati pikaminiä, pisa maerekani misiritikoätaä. Iuaä xamina tirinapika. !Oakaäka. Atxĩti piuako ipi aua, txamari pite sari iuaätaä. !Erekari. ⁴⁴ Iuaä kĩtxi piĩtoä auakaro !opina. Xamina !oakaäka. ⁴⁵ Pikiti maerekati ikamãkitakiniäi, pitsotakari. Erekariko ätinani pikiti Teosokata ätipirika pauini ĩkapani, kotxi maerekati pikaminiä, pisa maerekani misiritikoätaä. Iuaä xamina tirinapika. !Oakaäka. Atxĩti pikiti ipi aua, txamari pite sari iuaä. !Erekari. ⁴⁶ Iuaä kĩtxi piĩtoä auakaro !opina. Xamina !oakaäka. ⁴⁷ Poki maerekati ikamãkitakiniäi, pimakatxakari. Erekariko ätinoka poki auini Teoso auĩtetxi ininiätaäua pisini ĩkapani, kotxi maerekati pikaminiä pisa maerekani misiritikoätaä. Iuaä xamina tirinapika. !Oakaäka. Atxĩti poki ipi aua, txamari pite sari iuaä. !Erekari. ⁴⁸ Iuaä kĩtxi piĩtoä auakaro !opina. Xamina !oakaäka.

⁴⁹ Iökira nipokorimoni takiko atokokana xamina tirinakari takaäkako ikinimane kãkitimoni. Ikara atokokana ikinimane ataerekataäkako. ⁵⁰ Iökira erekaro. Txamari iökira koketikosaaki kipatxikata, !erekaikaro. !Apakata xinitxi piökiratini ĩkapani. Atäo iökira atoko hĩtxako. !Hĩtxitakakapeua.

Kiki ĩtanorokata Itakanapakakini

(Mateo 5.31-32; 19.1-12; Arókasi 16.18)

10 Xesosi potorika iuaä. Xotéia tōpa isa. ĩpiriäkitari Xotäo kãuaäriti. Iuaĩkana kãkiti apotiitaua iuamoni. Kaiäopokori kãkiti, ininiä oerekarauata, mitxi oerekarauanätini atokokana.

² Kikiakori, pariseo inakaniua, apoka Xesosimoni. Ni-noa nirekari Xesosi kerokiniri isäkire, ininiä ipimaärina: —Atäokani erekari kiki takanapiniro itanoro?

³ Ininiä Xesosi:

—Kiatokopa itxa Moisesi paniätakiti?

⁴ Ininiä ninoa:

—Moisesi paniätari kiki iökatsopatiniri aätsopa, itanoro itakanapini aätsopate, ininiä eereka auiritari iua iokanatiniro oa —itxana.

⁵ Ininiä Xesosi:

—Moisesi auiritari hitanoro hitakanapini, kotxi paikori hixinire. Teoso nireekiti himanirekakani xikara, Moisesi auiritari hitanoro hitakanapini. ⁶ Kotxi merepitipanika Teoso ikinipoko ikamakasaaki, ikamari kiki, sito pakini.

⁷ Ikara atoko ininiäpitikara, kiki takanapari iri, inoro pakini, itanorokata auini itapani. ⁸ Ininiä ätika atoko itxauana. Ininiä ipi käkiti itxaikauana. Ätinokara itxapekauana. ⁹ Ikara atoko ininiä, !erekari käkiti kariakiniri Teoso apotiitakini —itxa Xesosi.

¹⁰ Eereka Xesosi imoianariakorikata kanapiriä aapokomonina. Iuaä apokasaakina, imoianariakori pimaäri iua ikara säkiretxiti iuaikana oerekinina itapani.

¹¹ Ininiä isäpiretana:

—Kiki itanoro takanapakari, äto sito itaka inakari, maerekati ikaminaro itanoro. ¹² Iua atokokana sito ötaniri takanapakaro, äti ötanirita inakaro maerekati okaminiri ötaniri —itxa Xesosi.

Xesosimoni Amarini Apokini

(Mateo 19.13-15; Arókasi 18.15-17)

¹³ Iposo atoko ätikaka käkiti anikari amarini Xesosimoni. Inirekarina Xesosi misäkiretiniri Teoso ninoa amarini itapani. Txamari imoianariakori txitana. !Auritana amarini anikinina Xesosimoni. ¹⁴ Xesosi ikara ikenakotakasaaki, lapokaerekatari. Ininiä iua:

—Häuiritariko amarini notamoni apokini. !Hïo-tokakapiri, kotxi käkiti Teoso auitetakani amarini atoko itxauana. ¹⁵ Ia atäo: Käkiti mapakapaniäri Teoso, amarini apakapiniri atoko iminakaniä, kona isa Teoso auitetxi ininiätaäua —itxa Xesosi.

¹⁶ Ininiä Xesosi kataratari amarini. Itakari iuako ikiina nopini. Amanaäri Teoso erekari itakini amarinimoni.

Ätokori Ito Txineiroteri

(Mateo 19.16-30; Arókasi 18.18-30)

¹⁷ Xesosi iuaikana potorika. Iuasaaki ätokori miteka iuamoni. Ikapotoreëkaua Xesosi apisatoö.

—Koerekareri erekari, kiripa nikama Teosokata ätipirika nauini itapani? —itxa.

¹⁸ Ininiä Xesosi:

—Kininiäpa “erekari” pitxano? Teosonanira erekari.

¹⁹ Pite imarotari Teoso paniätakiti. !Pokaniuatape. !Pisiriäpate äti itanorokata. !Pitiriuatape. Poxiene !pikamape. Apanakini !pimisirienetape. Piri, pinoro pakini pipaxitako —itxa Xesosi.

²⁰ Iua ätokori txari:

—Noereëkiri, axapitipanikara ninakasaaki, nikipitari ikara Teoso paniätakiti —itxari.

²¹ Ininiä Xesosi apokaerekatari iua.

—Auapanika ätinoka pikamini tükane. Pisa. Tiitxi ikini-ka pinakiti pivëtxitako. Txineiro papakapakito pisikako matxineirotenimoni. Eereka pimoianatanoko nota. Ikara atoko inakari pikaminiä, Teoso tixine papokasaaki ikinipoko erekari auiniiko pite —itxari iua.

²² Ikara Xesosi säkire ikenakotakasaaki, imatinaniua-ta. Iisipe. Maerekaxiniretinoka itxa, kotxi kaiäori itii.

²³ Xesosi sapotorika, misäkireta itxana imoianariakori:

—Pamimapaniri katxineiroteri sini Teoso auitetxi ininiätaäua —itxa.

²⁴ Imoianariakori:

—Anekani? —itxana.

Iuaikana Xesosi txari:

—Pamimapaniri katxineiroteri sini Teoso auitetxi ininiätaäua. ²⁵ Atauako kamero napatari äkorike son-akiä? Apia mimari käkiti katxineiroterini auitetiniri Teoso —itxana.

²⁶ Imoianariakori iteene tsoriäkäänäta.

—Ininiä kipa sari Teoso auitetxi ininiätaäua? —itxana imoianariakori.

²⁷ Ininiä Xesosi apakapapiretana:

—Teoso posotari ikinipoko ikamini. Käkiti liposotari. Teoso posotari anikiniri katxineiroteri itixinemoni —itxa.

²⁸ Petro txari:

—Ate takanapapekari ikinipoko pite amoianatini itapani —itxari Xesosi.

²⁹ Ininiä Xesosi:

—Atäo nitxai. Paapoko pitakanapiniä, pitariakori, pitaroakoro, piri, pinoro, pïtanoro, pamariteni, pikikiote, pitakanapiniä notakata pisini itapani, Teoso iokanapirena erekari pisäpiretini itapani, ³⁰ pitakana-pakiti iua apiata nisikaiko. Itxasaaki nisikaiko ito-maneri aapokotxi, itomaneri pitariakori, itomanero pitaroakoro, itomanero pinoroakoro, itomaneri pamariteni, itomaneri pikikiote, nisikaiko. Txamari iuasaaki patatsitari pimisiritiko. Iuaritika eereka Teosokata pauapika ätipirika. ³¹ Uatxa apiari inakari, iuasaakiko minakati itxauako. Uatxa minakati inakari, iuasaakiko apiari itxauako —itxa Xesosi säkire.

Iuaikana Xesosi Säpiretari Ipinini

(Mateo 20.17-19; Arókasi 18.31-34)

³² Xesosi imoianariakorikata Xerosareë kimaporite iäpotakasaakina, Xesosi itikiika. Iuasaaki ninoa maerekaxiniretinoka itxana. Apanakini ninoa tikini sikani pïkarauata. Ininiä Xesosi iotoka. Akiritana imoianariakori tosi pakini. Isäpiretana païtiki käkiti kamakiti iuamoni tükane. ³³ Ininiä iua:

—Hïkenakota. Xerosareëmoni asa uatxa. Iuaä nota hitari iaxitikiri sikaäkako sasetotxi auiteakorimoni, kaiökatsopareriakorimoni pakini. Ninoa paniätariko nota okiko. Iposo atoko Xoteo minakonimoni sika ninaäkako. ³⁴ Inapetanonako. Inoropatanonako aäpitsaä. Ikiisokanonako. Iposo atoko oka ninaäkako. Ipi äti

pakini ōti inakasaaki iuaīkana nōkitikauako —itxa imoianariakorimoni.

Txiako Xoão Pakini Amanaākiti

(Mateo 20.20-28)

³⁵ Iposo atoko Txiako, Xoão pakini sari Xesosimoni. Ninoa Sepeteo anaakori.

—Koerekareri, ate nirekari aamanaākiti pikamini —itxana.

³⁶ Ininiā Xesosi pimaāna:

—Kipa hinireka nikaminii hīte? —itxana.

³⁷ —Pite ikinimane auīte pinakasaakia, pauiritaua pitekata aītopākini, pikikomoni, pisaneremoni aītopākini —itxana.

³⁸ Ininiā Xesosi:

—!Himarotari hamanaākiti, kotxi mapaōti napa atoko nota apakapariko iātatxi tsiītxiā niātini īkapani. Hīposotatari ikara hiātini? Nipatxisataākako tsiītxiā. Hīposotatari ikara atoko hīpatxisatiko?

³⁹ —Aposotapitika —itxana ninoa.

Xesosi txana ninoa:

—Inipitikara hiātariko nota iātakiti. Inipitikara hīpatxisataākako nota patxisatiko atokokana. ⁴⁰ Txamari Iniposotari nauiritinii hīte nikikomoni, nisanaremoni hītopākini, kotxi Teoso mereēpekana kākiti nikikomoni, nisanaremoni topākakani tīkane —itxa Xesosi.

⁴¹ Xesosi moianariakori tesi pakini kenakopiretakasaakiri Txiako, Xoão pakini amanaākiti, ininiā ninoa omanatana. ⁴² Ininiā Xesosi akirita txana imoianariakori:

—Uaimoni hina. Hītopāka notakata —itxana ninoa.

—Hīte imarotari Xoteo minakanua auīteakori pataparana. Ninoa auiritari kākiti kaminiri ninoa paniātakitinoka. ⁴³ Ninoa atoko !hītxape. Apiari pininiua pinirekiniā, pimoianatana apanakini. ⁴⁴ Apanakini auīte pininiā pinirekiniā, nitiritxi pitxauako merepanika.

⁴⁵ Ikara atoko nitxa nota hītari iaxitiki īkorapokoriti napokasaaki. Ninitiri !uari. Īkorapokoriti napoka, kākiti nitiri nininiua īkapani, kākiti nitiretini īkapani. Īkorapokoriti napoka nipinini īkapani, kaiōpokoriti kākiti mapinakanani īkapani, kotxi nota īkitxirauata ninoa mapinakanani īkapani —itxa Xesosi.

Mōsiāreti Patximeo Inakori

(Mateo 20.29-34; Arókasi 18.35-43)

⁴⁶ Xesosi imoianariakorikata apoka Xerikoo sitatxiti. Eereka ipotorikasaaki imoianariakorikata itomaneri kākikitikata, iusaaki mōsiāreti Patximeo inakori kimapori tīniniāpo iitopākanāta. Tximeo inakori ākiri iua. Iua mōsiāreti amanaānātarō txineiro. ⁴⁷ Iua kenakotari Xesosi Nasareekiri inapaenetini, ininiā akirināta:

—Xesosi, Taviini apika mekanirii, piamonīkanoko —itxa.

⁴⁸ Ininiā apanakini kākiti pinitari:

—Maātako. !Pakirinātape —itxarina mōsiāreti.

Iuaritika apiata akirinānikata:

—Taviini apika mekani. Piamonīkanoko nota —itxanāta.

⁴⁹ Ininiā Xesosi iotoka itxa.

—Hākiritari iua mōsiāreti —itxa.

Ininiā ninoa:

—Pipoxokoniuatoko. Pōkitikaua. Akiritapekai —itxarina iua mōsiāreti.

⁵⁰ Ininiā Patximeo okanapari imāka inopini auakari. Pakoteri ōkitikaua, sa itxa Xesosi akiritiniri manapi.

⁵¹ Ininiā Xesosi:

—Kipa pinireka nota kaminii pite? —itxari.

—Apiananiri, nōsiārera ninireka —itxari.

⁵² Ininiā Xesosi:

—Pisa. Erekapekai, kotxi pite auikari niposotiire —itxari.

Iusaakipeka Patximeo kōsiārepeka itxa. Xesosikata sa itxa kimaporiā.

Xesosi Xerosareē Apokaāpotini

(Mateo 21.1-11; Arókasi 19.28-40; Xoão 12.12-19)

11 Xesosi imoianariakorikata imatokoāpotari Xerosareē. Ōtanoxiratari, oriva mina takikoātaā takote apokana. Iuaā aua aapokotxi Petxipaxee inakori, Petánia inakori apaka. Iuaā Xesosi iokanātana ipi imoianariakori.

² —Hīsa ikiraā kaixiti auakari aapokotxiā. Iuaā hāpokasaaki, hāpokari xomēta ākiri iaxiriākari. Kākiti !iitopākapanika iua nopini. Hīkoxirikari. Uaimoni mina hītxari. ³ Kākiti pimaākasaakii hīte: “Kinirepa hīkoxirikatari xomēta ākiri?” hinikosaakiko: “Apiananiri nirekari iua. Iuaīkana akamoni aminariko,” hītxako.

⁴ Ininiā eereka isana. Apokarina iua xomēta ākiri iaxiriākari kimaporiā aapokotxi tore takote. Ininiā ikoxirikarina. ⁵ Ātikaka kākiti iuaā auakani:

—Kinirepa hīkoxirikatari xomēta ākiri? —itxana Xesosi moianariakorimoni.

⁶ Ininiā Xesosi paniātini iaōka apakapapiretana.

Ininiā kākiti iuaā auakani:

—Ininiā hanikaikari —itxana.

⁷ Ninoa anikari xomēta ākiri Xesosimoni. Ininiā imākana āti imākana nopini auakari itakarina xomēta ākiri nopini Xesosi topākini īkapani. ⁸ Apanakini kākiti matameēkari imākana āti imākana nopini auakari kimaporiā Xesosi napini tīkane. Apanakinipekana sauakari aāxike. Kimaporiā itakaāpotarina. ⁹ Ninoa Xesosi tikini īkani, iua apisa sikani pakini akiriāpokatana ipoxokoniritikana imakinikana:

—Peerekari Teoso, Apiananiri. Iua iokanatai pite atemoni. Anirekari erekari isikinii pite. ¹⁰ Peerekari Teoso, aātokirini Tavii aauīte ininiua atokokana iuaīkana apoka. Peerekari Teoso, iaxiti apiko nopinixiti auakari. Apiananiri itxaua —itxaāpokatana.

¹¹ Xesosi apoka Xerosareē. Teoso misākiretiko aikotimoni isa. Iuaā iroā itxa. Ikinika iroko āki itikapokota. Iua atoko mapiāpe, ininiā isari Petánia aapokotxitimoni tosi imoianariakorikata.

Piko Mina Marito Pirena

(Mateo 21.18-19)

¹² Ikatimatakasaaki ipotorikana Petánia. Iuasaaki Xesosi natxita. ¹³ Ikira atoko atamataro piko mina. Ito ot-sopa aua. Isari oamoni kariro iuákatiniáro, kotxi piko mina tsopa auakasaaki, ori auapitika. Txamari apokasaaki, otsopanani auari, kotxi kona ori manapini.

¹⁴ Ininiá Xesosi:

—Kákiti !itximaikaiko piri —itxari piko mina.

Imoianariakori kenakotari isáikire.

Pirátxi Vētxitakani Omitikiko

(Mateo 21.12-17, 20-22; Arókasi 19.45-48; Xoão 2.13-22)

¹⁵ Xesosi imoianariakorikata apoka Xerosareē. Xesosi ĩroá Teoso misáikiretiko aikotiá. Omitikana kákiti iuaá-taá amotiitakani, sikatiitakani. Ikapakitikari amesa nino txineiro apakapakani amesane. Ikapakitikari kamoá vētxitakani topáikini apaka. ¹⁶ Iua !auritana kákiti anikiniri tiitxi aiko ĩpirikoatinina. ¹⁷ Xesosi oerekana kákiti iuaá auakani:

—Teoso sáikire iókatsopatakori txari:

Ia naapoko. “Teoso misáikiretiko aikoti” akiritaákkako, ikini itixiti auakani misáikiretinino ĩkapani, itxa. Txamari hĳte txĳkitakari ia aiko kiĳtiririni iomaá-tiniátaá ininiua —itxa Xesosi.

¹⁸ Sasetotxi auĳteakori, kaiókatsoparerini pakini kenakotari Xesosi sáikire. Ininiá ninoa tsorĳkaáta. Ix-inikaxititana.

—Kanatokopa atxatari Xesosi aóikini? —itxanátana.

Ikinimane iteene apokaerekatari Xesosi sáikire, ininiákara sasetotxi auĳteakori, kaiókatsoparerini pakini pĳkari Xesosi.

¹⁹ Ipiákapokotapeka Xesosi takanapari sitatxi imoianariakorikata.

²⁰ Katimatinĳkata kimaporiá isaápotakasaakina, atamatarona oa piko mina. Opĳpe. Okotsapekara ipinakepeta apaka. ²¹ Petro xinikari iua apisapanika Xesosi sáikire, ininiá akiritari Xesosi:

—Koerekereri, patamataro piko mina. “Kákiti !itximaikaiko piri,” pinakito. Oa piko mina ipĳpeka —itxari.

²² Ininiá Xesosi:

—Pauikapiretariko Teoso sáikire. ²³ Atáoenekara nisápiretai. Pauikiniári Teoso sáikire, piposotari pipaniátiniri ikira ótanoxiratar: “Pókitikaua. Pokakataua potxoari uinitimoni.” Páixinireē iteene pauikiniári pisáikire iaóka apokini, ininiá apokapitikako pamanaákiti. ²⁴ Ikara atoko ininiá nota txai hĳte, Teoso pimisáikiretakasaaki, pamanaákasakiri pinirekakiti, pauikariko iposope Teoso sikinii, ininiá papakapapanikariko.

²⁵ Teoso pimisáikiretakasaaki, áti pomanatiniá, pitakanapariko pomanákkare. Pimaxinĳkaretiniári maerekati ikaminii, ininiá piri iaxitikiri maxinĳkaretari maerekati pite kamakiti. ²⁶ Pimaxinĳkaretakaniári maerekati áti kamakiti pitemoni, ininiá piri iaxitikiri kona maxinĳkaretari maerekati pite kamakiti apaka.

Xesosi Paniátakari Moerekakoni

(Mateo 21.23-27; Arókasi 20.1-8)

²⁷ Iuaĳkana apokana Xerosareē. Xesosi tĳpokota aiko Teoso misáikiretiko pirikere áki tinikata. Itĳpokoná-takasaaki, sasetotxi auĳteakori, kaiókatsoparerini, kiomátxiakori pakini apoka iuamoni. ²⁸ Ininiá ninoa txari:

—Kipaniápa pikamari ĳkora pikamakiti? Kipa paniá-tai? —itxarina Xesosi.

²⁹ Ininiá Xesosi apakapapiretana:

—Nota apaka pimarauatako hĳtemoni. Átinoka nipi-maáiko hĳte. Hĳsápiretiniáno, nota sápiretai hĳte niokanatakiri uáka apaka. ³⁰ Kipa paniátari Xoáoni ipatxisarauatini? Teosokani paniátari Xoáo? Kákitikani paniátari Xoáo? Hĳsápiretano —itxana.

³¹ Ininiá ninoa xinikaxitináta. Imisáikiretakakana. Ipi-maákkakana:

—Natokopa itxa aápakapapiretiniri iua? Aápakapapiretiniári: “Teoso paniátari iua,” ininiá iua: “Kinirepa kona háuikataru iuani sáikire?” itxapemaua. ³² Aápakapapiretiniári: “Kákiti paniátari iua,” ikinimane omanataua —itxanátana.

Ninoa pĳkari kákiti kotxi ikinimane auikari Xoáoni atáo Teoso sáikire sápiretakari ininiua. ³³ Ikara atoko ininiá ninoa apakapapiretari Xesosi:

—Ate !imarotari.

Ininiá Xesosi:

—Ikara atoko ininiá, nota Inisápiretai hĳte nipaniá-takiri uáka.

Parĳkauatakani Maerekani

(Mateo 21.33-46; Arókasi 20.9-19)

12 Eereka Xesosi sápiretana ninoa sápirenatxi atáo inakari oerekiko. Itxari:

—Kiki takarauata. Txipokori ova inakoronoka itaka.

Ipiriketari. Ikamari ova maókkiko. Iposo atoko itakare apanĳkakixitika ikamari aapokotxi axapitiri ótanori ikikiote imakinetini ĳkapani. Iposo atoko ipaniátana átikaka kikiakori itakare inĳkatinina ĳkapani, kotxi iua sariko ótakoxiti. Ninoa apakapamaroko ipixini ova iparĳkana ĳki. Iposo atoko katakareri sipe. ² Ova manapi, iua katakareri iokanataru inĳtiri ninoa kikiakorimoni ova ipixini apakapini ĳkapani. ³ Txamari iua apokasaaki ninoa maĳkari iua. Ixirokittatarina. “Pisipeka,” itxarina. Miketika ikanapiripe.

⁴ —Iuaĳkana katakareri iokanataru áti inĳtiri ninoamonikana. Txamari ninoa kikiakori misiritari iua. Kai soroá ikiporonakarina, karota itxapirina ikiiá.

⁵ Iuaĳkana katakareri iokanataru áti ninoamonikana, txamari ninoa okapiri iuani. Kaiópokori inĳtiriakori iokanata ninoamoni. Apanakini inoropatana. Apanakini okana. Itxaápotana.

⁶ —Iua katakareri auapanika átinoka iokanataru ĳkapani, imi iteene itiretakiti. Imapotókkire iokanataru imi ninoamonikana. “Notamoni ninoa paxitariko namarite” itxa. Ininiá imi apoka ninoamoni. ⁷ “Katakareri

ākiri napani. Maōkari. Aōkiniāri, itakare imakinika kaikotinaua ate," itxakakana kikiakori.

⁸—Ininiā ninoa maīkari katakareri ākiri, oka itxapirina, kiki xiripire oka itxarina iito.

⁹—Ininiā kiripa ikama katakareri? —itxa Xesosi.

—Iua kanapiriā. Okanako ninoa kikiakori. Ipaniātana apanakini itakare imakinetinina īkapani —itxa Xesosi.

¹⁰Hīte atatsopatapekari ia Teoso sākire iōkatsopatakori:

Aapokotxi kamakani kona nirekari ātika kai soro. Iua kai imanirekakiniti kai apiari itxapekaua. Apanakini kai soro maīkakari itxaua.

¹¹Teosokara txīkitakari ikara atoko inini. Ikara peerekari atemoni, itxa Teoso sākire iōkatsopatakori.

¹²Xoteo auīteakori imarotarina Xesosi sākire. Ninoa imarotari ikamakitina takari makinetakani kamakiti atokokana, ininiā ninoa omanākarauata Xesosi sāpiretakiti xika. Ninoa kinirāo maīkaka itxarina Xesosi, txamari limaīkarina iua, kotxi ipīkarina kākiti. Ininiā itakanaparina Xesosi, sipe itxana.

Homano Auīte Īkitxitiko

(Mateo 22.15-22; Arókasi 20.19-26)

¹³Eereka Xoteo auīteakori iokanatana ātikaka Erotxi sākire auīākani, ātikaka pariseoakori pakini Xesosimoni. Inirekarina Xesosi kerokiniri isākire, kotxi ninoa nirekari Xesosi kaminiri maerekati imaīkinirina īkapani.

¹⁴Ninoa apokasaaki, imisākiretarina Xesosi:

—Koerekareri, ate imarotari pite sākire atāonani ininiāua. Poerekari atāonani Teoso nireēkiti kākiti kamini īkapani. !Pipīkari kākiti. Kākiti poiāori pimisākiretini atokokana kākiti apiari pimisākireta apaka. Ikara atoko ininiā, pisāpiretaua. Atāokani txineiro asikini Homanoakori auītemoni, Sesa inakorimoni?

¹⁵Atāokani asikiniri iuamoni? Apakata amasikakaniri iuamoni? —itxana.

Xesosi imarotari isākirena. Imarotari ninoa pimarauatini isākire ikerokini īkapani. !Inirekarina atāo inakari imarotinina. Ininiā Xesosi txana ninoa:

—Kinirepa hātamakaerekatano nota? Himinaro txineirota. Ninirekari natamatiniro —itxa.

¹⁶Ininiā iminarona.

—Kisanōkapa ia? Kiuākapa aua uai? —itxana.

Ininiā ninoa:

—Sesa sanōka, iuāka pakini —itxana.

¹⁷Ininiā Xesosi:

—Ikara atoko ininiā, hīsikariko Sesamoni iua nakiti. Hīsikariko Teosomoni iua nakiti —itxana.

Ininiā kasākirena ninoa, kotxi peerekari Xesosi apakapapiretakiti.

Ipīkari Ōkitikiniua Mauikakoni

(Mateo 22.23-33; Arókasi 20.27-40)

¹⁸Kikiakori satoseo inakoni, lauikari kākiti ipīkaripeka iuaīkana ōkitikiniua iuaīkana auāki inini īkapani. Ninoa satoseo apoka Xesosimoni.

¹⁹—Koerekareri, Moisesini iōkatsopataria ipaniātakiti: "Kiki meenetipanika ipininiā, iua itari takaroko tikinitakoro. Iua itari keene ininiā, itakauākatari amari ni iua itarini ipīpekarini uāka," itxa Moisesi. ²⁰Setxi itar-itxiakori aua īkorapokoriti. Apia kiomanetakari takaro sito. Txamari ipīkasaaki meenetopanika itikinitaro.

²¹Ininiā āti itari takaro oakana. Ipīkasaaki

!keenepanikaro oa. Iua atokokana itxape āti itari.

²²Ininiā imakinikana ninoa takapiimaro oa. Ikinikana ninoa meenenipanika ipīpena. Eereka oanipekana apaka opīpe. ²³Ipīkani ōkitikasaakiaua, kirīītanoropa otxatauaoko? Kotxi ikinikana setxi takapekaro oa —itxana.

²⁴Ininiā Xesosi:

—Hīte kerokari, kotxi !himarotari Teoso sākire iōkatsopatakori. Teoso posotiire apaka !himarota. ²⁵Ipīkani iuaīkana ōkitikasaakiaua, Teoso nitiriakori iaxitikini atoko itxapekauana. !ītanorouataikako. ²⁶Hīte !auikari ipīkani ōkitikiniua. Hīte atatsopatapekari Moisesi iōkatsopatakiti aanaia tirinakari pirena. Iuasaaki Teoso misākiretari Moisesi: "Apraō, Isaki, Xakoo pakini Teosonekarano nota," itxari Moisesimoni. ²⁷Ikara atoko ininiā Apraō, Isaki, Xakoo pakini ōkitikapekaua iuaīkana, kotxi auāki inakani Teosonera iua. Kona ipīkani Teosoneni itxaua Teoso. Amananini hīkerokari —itxa Xesosi satoseoakorimoni.

Teoso Paniātakiti Apiari Akamini

(Mateo 22.34-40)

²⁸Iuaātaā aua kaiōkatsopareri. Ikenakotana ninoa misākiretakiniua. Ikenakotari Xesosi apakapapiretakiti erekari ene. Ininiā iua pimaāri Xesosi:

—Īkiripa Teoso paniātakiti apiari txataua? Kipa apiareekata Teoso nireēkiti akamini?

²⁹Xesosi apakapapiretari:

—Teoso paniātakiti apiari ia: "Isaero tōpa auakani, hīkenakota. Ateosone Apiananiri iua. Iuananira Teoso txaua. ³⁰Pitiretariko Apiananiri piTeosone, ikinipoko pinireēkitiā, ikini pākixinireē, ikinipoko pixinikakitiā, ikini pitaparaxinireē pakini." ³¹Ātipekana Teoso paniātakiti apiari ia: "Piteka pitiretiniāua atokotxikana, pitiretariko āti." Iuananira Teoso paniātakiti ipi apiari txaua —itxa Xesosi.

³²Ininiā iua kaiōkatsopareri apakapapiretari Xesosi:

—Inipitikara pisākire, koerekareri. !Auari āti Teoso.

Iuanokara auari. ³³Ininiā atiretamariko Teoso ikinipoko anireēkitiā, ikinipoko axinikakitiā, ikini ataparaxinireē. Atiretamanako apanakini ātōka atiretini atokokana. Ikara Teoso paniātakiti ipi apiari txaua. Teoso paniātakiti pirātxi aōkini iua īkapani poiāori —itxa Xesosimoni.

³⁴Xesosi kenakotakasaakiri isākire ereka inini, itxari iua:

—Pite auītearitari Teoso.

Iposo atoko apanakini !kataparaxinireika apikomoni ipimainirina.

Teoso Mereëkiti Tavii Apika Mekaniri

(Mateo 22.41-46; Arókasi 20.41-44)

³⁵ Xesosi Teoso misäkiretiko aikoti oerekaruanã-takasaaki, ipimaãri:

—Kinirepa kaiõkatsoparerini sãkire: “Tavii apika mekanirako Teoso mereëkiti txauako?” itxana.

³⁶ Erekar Matamatakoti kamasãpirenatariki Tavii:

Apiananiri misäkiretari niauïte: “Nota kikomoni pitopãkiniritika nixipokariko pimokaiakariakori. Nika-mariko ninoa pikiti pitakiniãtaã atoko ininiua,” Apiananiri txari niauïte,

itxa Taviini. ³⁷ Tavii akiritari iua Teoso mereëkiti “Niauïte.” Ikara atoko ininiã, natokopa itxa iua Tavii apika mekani ininiua? —itxa Xesosi.

Iuasaaki ikinimane kãkiti iuaã apitiitakaniua potxitari Xesosi sãkire.

Kaiõkatsoparerini Maerekani Pirena

(Mateo 23.1-36; Arókasi 20.45-47)

³⁸ Xesosi oerekaruanãtakasaaki, õtãkikana kãkiti:

—Kaiõkatsoparerini moianari !hïtxapeua. Ninoa potxitari mãkatxi ereri ieretakinina kãkiti apisatoõ inapinina ïkapani, kãkiti atamatinina ïkapani. Ninoa apokaerekatariki imisäkiretikona ipaxitikona nipokori sikikoõtaã inapaãpotakasaakina. ³⁹ Ninoa potxitari kãkiti topãkini apiaerekatariki nopini iitopãkinina aiko Xoteo apotiitiniãtaãua. Kiiniriã ninoa potxitari kakiiniriteri topãkinimoni iitopãkinina. ⁴⁰ Ninoa mixirikari tikinitakoni aapoko, iuaritika okanani imisäkiretarina Teoso kãkiti apisatoõ, ininiã kãkiti uãkatari ninoa erekarini atoko ininiãuana. Teoso iteene misiritanako kãkiti ikara atoko inakani.

Tikinitakoro Matxineiroto Sikakito

(Arókasi 21.1-4)

⁴¹ Xesosi topãka txineiro Teoso ïkapani apakapikoãtaã. Xesosi itikari kãkiti ieretakiniro txineiro kaixa ãki. Itori katxineiroterini okaro txineiro mirikinito kaixa ãki.

⁴² Eereka tikinitakoro matxineiroto apoka iuaã. Otakaro ipi txineiro otaki kaixa ãki. Poiãonoka txineiro.

⁴³ Ininiã Xesosi akiritana imoianariakori.

—Inipitikara nisãpiretai hïte. Õkora tikinitakoro matxineiroto sikakito apiata. Apanakini sikakito poiãoka. ⁴⁴ Kotxi ninoa sikaro txineiro itetakoro. Oa matxineiroto sikari okinika onakito —itxa Xesosi.

Teoso Misäkiretiko Aikoti Irikiko

(Mateo 24.1-2; Arókasi 21.5-6)

13 Teoso misäkiretiko aikoti Xesosi pokïkasaaki, imoianari misäkiretari iua:

—Koerekareri, patamata ia kai aapokotxiti itomaneri. Amaripokori. Ia aiko Teoso misäkiretiko peerekari.

² Ininiã Xesosi:

—Hãtamatariki ia aiko mitari. Æti õti imakinika irikaãkako. Kona kai kaikotaikako Æti kai nopini —itxa Xesosi.

Misirikaretxi Apokaenetini

(Mateo 24.3-14; Arókasi 21.7-19)

³ Xesosi topãka oxiratari nopini Teoso misäkiretiko aikoti apisatoõ. Iuaã aua oriva minanape. Iuasaaki Petro, Txiaiko, Xoão, Ætree pakini apoka iuamoni. Ni-noanoka aua iuaã. ⁴ Ipimaãrina Xesosi:

—Kirisaaakipa aiko Teoso misäkiretiko irikaãka? Natokopa itxa aimarotiniri ikara õti apisapanika?

⁵ Ininiã Xesosi:

—Erepaniko. !Hãuiritapiri apanakini misirienetini hïte. ⁶ Itopaniriko kãkiti, “Xesosikarano,” inakani-paniko. Ninoa misirienetari kaiõpokori kãkiti.

⁷ Neenamtxi hïkenakoenetakasaaki, neenamtxi ene hïkenakoenetakasaaki, !hïpïkarauatape. Ikara auapitikako, iuaritika kona xipokatxi õtipanikani. ⁸ Æti uãka neenamauata Æti uãkakata. Æti tixini auakani neenamauatako Æti tixini auakanikata. Ætikaka itixi iakeëkatoko. Kaiõpokopaniri natxi. Amarini auini tsii atoko itxapaniko.

⁹ —Erepaniko hïte. Himaïkaãkako, auïtetximoni hïsiãkako. Hinoropataãkako aãpitsaã aiko ãki Xoteo apotiitiniãtaãua. Nota sãkire hãuikini xika hïte anikaãkako poiãori auïtetximoni. Apiari auïtetximoni apaka hanikaãkako. Iuasaaki hïte sãpiretanako ninoa Teoso iokanapirena erekari. ¹⁰ Itixi xipokini apisapanika Teoso iokanapirena erekari sãpiretaãkako ikini-manemoni ikini itixitikinimoni. ¹¹ Kãkiti maïkasaakii hïte, anikasaakii hïte auïtetxiakorimoni, !hïxinikapiri hïsiãkire tïkane hïsiãkirauatini apisapanika. Hïsiãkirauatakasaaki, iuasaakipeka himarotari hïsiãkire. Erekar Matamatakoti txïkitakai iuasaaki hïsiãkire himarotini. ¹² Kãkiti sikanapariko atão itariakori auïtetximoni okiko tïkane. Iriakoritxi sikanapanako imiakori auïtetximoni okiko tïkane. Eenetxiakori omanatana iriakori, inoroakoro pakini. Eenetxiakori xika ninoa okapeëka. ¹³ Nota sãkire hãuikini xika, ikinimane omanatai hïte, iuaritika himatakanapakaniãri nisãkire hãuikini, hanikaãkako Teoso tixinemoni —itxa Xesosi imoianari-akorimoni.

Iteene Maerekanitxi Apokini

(Mateo 24.15-28; Arókasi 21.20-24)

¹⁴ Iuaïkana Xesosi sãpiretana:

—Hïtikariko Maerekati Apiatakari Teoso misäkiretiko aikoti ãki. Kitxakapirïka Teoso sãkire sãpiretakari Tanieo inakori sãpiretapekari ikara pirena. (Ininiã hïte ia atatsopanãtanani, hïkenakotariko Xesosi õtãkikiniua.) Maerekati Apiatakari Teoso misäkiretiko aikoti ãki hïtikasaaki, hïte Xotëia tãpa auakanii, himitekapaoka mitaxiratarimoni. ¹⁵ Iuasaaki hïte haãpoko nopini auakanii, katima hïtxako hïkatxakini. Haãpoko !hïiroãpe hïtii himakatkakini ïkapani. ¹⁶ Hïte kikio auakanii, !hïkanapiripe haãpokomoni himãka hãpini ïkapani. ¹⁷ Ikarasaaki !erekapaniri sito kamixiromoni, sito kaxitakakareromoni. ¹⁸ Teoso hamanaã himitekini kamoïsaaki, kotxi himitekini mitaãsaaki !erekari. ¹⁹ Iuasaaki atatsiiri auakatapitikako. Ia atatsiiri apiata

atatsiitaākako. Kitxakapirīka itixi Teoso kamakasaaki kākiti atatsiirauata poiāoka. Ikara atatsiiri ōti apisa kākiti atatsiirauata poiāoka. Ikara atatsiiri ōti napa atoko !ikara atoko inakari atatsiiri !auaikako. ²⁰ Teoso mapoiāotakaniāri iua ōti kākiti atatsiirauatini ōti, !auaikamako kākiti. Ikinipekamako ipīpemanako. Teoso iotokakariko !kora atatsiiretxi, imereēkini map-inakani !kapani.

²¹ —Apanakini sāpiretiniāi hīte: “Xesosi Teoso mereēkiti ia,” hinikosaaki, !hāuikapiri. “Xesosi Teoso mereēkiti ikiraātaā,” hinikosaaki, !hāuikapiri. ²² Kotxi Teoso mereēkiti minakaniua apokapitikako, “Xesosikarano nota,” inakari. Apaka apanakini apokapitikako, “Teoso sākire sāpiretakarikarano nota,” inakari. Paxirari ninoa sākire. Kākiti ikara atoko inakani kamari nirekamari Teoso mereēkini imisirienetinina. ²³ Erepaniko. Ikara ōti apokini apisapanika nōtākikai hīte —itxa Xesosi imoianariakorimoni.

Kākiti Itari Iaxitikiri Kanapiriini

(Mateo 24.29-31; Arókasi 21.25-28)

²⁴ —Iua misirikaretxi napa atoko atokatxi iuakapeka. Kasiri !iponikaika. ²⁵ Iōriki iaxitikero irikako. Ikinipoko kaikori iaxiti auakari ioīketaākako. ²⁶ Iuasaakipekako ikinimane atapariko kākiti itari iaxitikiri apokaāpotini katxiāri āki. Itapararitika apoka. Kaiotximereri itxaua iuasaaki. ²⁷ Iuasaaki iokanatana initiriakori iaxitikini !tinixitimoni, ipinimoni !tinixitimoni, atokatxi pokīkini-moni, atokatxi ereēkokinimoni. Iokanatana initiriakori ikini itixitimoni kākiti imereēkini apitiitinina !kapani —itxa Xesosi imoianariakorimoni.

Piko Mina Pirena

(Mateo 24.32-35; Arókasi 21.29-33)

²⁸ Iuaīkana Xesosi sākirauata. —Nisāpiretai sāpirenatxi atāo inakari oerekiko, piko mina pirena, nikanapiriini apiata himarotini !kapani. Pooīoporipeka onakasaaki, otomoresakaaki, “Kamoī apokanapanoka,” hītxa. ²⁹ Iua atokokana ikara misirikaretxi mixikanani nisāpiretakiti hītikasaaki, himarotapekariko nota kaiama kanapirikapeka ninini. ³⁰ Ia nisākire atāo. Itixi auakani !ixipoka ikinipoko nisāpiretakiti mapokakani apisa. ³¹ Iaxiti xipokapitikako. !koraxiti apaka xipokapitikako. Iuaritika nota sākire !ixipoka —itxa Xesosi imoianariakorimoni.

Kākiti !Himarotari Xesosi Apokini Manapi

(Mateo 24.36-44)

³² Iuaīkana Xesosi sākirauata: —Kākiti !Himarotari ikara ōti manapi apokini. Teoso nitiriakori iaxitikini apaka !Himarotari ikara ōti. Nota Teoso ākirikanera !Himarotari ikara ōti. Nirinanira, Teosonanira, imarotari. ³³ Hiātapapikariko. Hīkoatapikako. Teoso himisākiretapikako. Kotxi !Himarotari ikara ōti apokini. ³⁴ —Nikanapiriākasaaki, kiki ōtako sikari kanapiriini atoko nitxa. Iua kiki potoriakasaaki, ipaniātana initiriakori aapoko inīkatinina. Ikininape isikanapana

parīkatxi ikaminina. Ipaniātari initiri aapoko toreātaā kaikotakari, “Araōkire pitxako,” itxari. ³⁵ Nota hītari iaxitikiri iua kiki ōtako sikari atoko nitxako. Ātipirika hiātapapikanoko, kotxi !Himarotari nota apokini ōti. !Himarotari mapiātikikauako napoka. !Himarotari apanīkanōkauako napoka. Imaropirīkatauako napoka. !kanōkapanikauako napoka !Himarotapaniri. ³⁶ Atxiīti patimari napokini, ininiā hīkoatapikako, mimakatika hinini !kapani nota apokasaaki. ³⁷ Ininiā ātipirika hiātapapikanoko. Ikininapemoni apaka ikara nitxa —itxa Xesosi imoianariakorimoni.

Xesosi Okaenetiko Pirena

(Mateo 26.1-5; Arókasi 22.1-2; Xoāo 11.45-53)

14 Iuasaaki kākiti apotiitaua ipi kiiniriti auakasaaki. Páskoa kiiniriti, pāo miātiākati nikiko kiiniriti pakini aua. Ipi ōti kiiniri potoriakini apisapanika sasetotxi auīteakori, kaiōkatsoparerini pakini xinikaxitita: —Natokopa atxatariko Xesosi amaīkini aōkini !kapani? ² !Amaīkapaniri kiinirisaaki, kotxi amaīkiniāri, kākiti naiatamaua eereka —itxanātana.

Sito Kamariāro Mīkaro

(Mateo 26.6-13; Xoāo 12.1-8)

³ Xesosi auanāta Petánia aapokotxiti Simāo inakori aapoko. Iua Simāo akiritaāka “Maere Matati.” Simāo aapoko Xesosi nipokonātakasaaki, sito apoka. Oa minari kopitipaki kai kamakori, kai arapástiro inakoro. Kopitipaki āki aua kamariāro, nato inakoro. Pakaronepokoro. Oāpokasaaki Xesosimoni, opakauanakai kopitipaki. Okitakaro kamariāro Xesosi kiiā. ⁴ Iuasaakipeka apanakini iuaā auakani omanākarauata.

—Kinirepa oioanataāka kamariāro? ⁵ Ovētxitamaro, ininiā kaiōpokomaniko txineiro oāpakapamako. Tresētosi txineiro ota prata kamakori oāpakamako. Txineiro mauakinimoni osikiniā erekamariko —itxana.

Iteene ikapatitana. ⁶ Ininiā Xesosi:

—Ikara atoko !hītxapero. !Homanatapero. Erekari okaminano. ⁷ Kākiti matxineiroteni auapikako hītekata. Hinirekasaakiriko hīsikaro txineiro ninoamoni. Nota !auari ātipirika hītekata. ⁸ Oia sito kamari ikinipoko oimarotakiti nota !kapani. Nipinini apisapanika oina notamoni. Omaritari nīto, nīto iposope inini nikatiko !kapani. ⁹ Atāo nisāpiretai hīte. Teoso iokanapirena erekari sāpiretikoātaā ikini itixiti, osāpiretaākako apaka oia sito kitakiniro kamariāro nikiiā, ininiā kākiti ikini itixiti auakani xinikapikaro oa —itxa Xesosi.

Xotasi Mīkapiritiniri Xesosi

(Mateo 26.14-16; Arókasi 22.7-16, 21-23; Xoāo 13.21-30)

¹⁰ Tosi pakini Xesosi moianariakori. Imoianari Xotasi inakori sari sasetotxi auīteakorimoni. Imisākiretana ninoa Xesosi imīkapiritini !kapani, ninoamoni isikiniri !kapani. ¹¹ Ikenakotakasaakirina Xotasi sākire, ipoxokoniuatana. Isikaenatarona txineiro iuamoni. Eereka Xotasi iātapari Xesosi imīkapiritini ōti.

Páskoa Kiiniriti Kamiko
(Mateo 26.17-25; Arókasi 22.7-13)

¹² Páskoa kiiniriti potorikini òti, soti auíte anaakori okiko òti, Xesosi moianariakori misákiretari iua:
—Namonipa pinirekatari Páskoa kiiniriti akamini?
¹³ Ininiã Xesosi iokanatana imoianariakori ipi.
—Hísa sitatximoni. Iuaã kiki ãparaã kopitiã anikakari hápiãkata. Iua kikikata hísa. ¹⁴ Iua sinimoni kaapokori himisákireta. Hítxariko iua: “Koerekareri nirekari imarotiniri, namonipa erekari imoianariakorikata inipokotini Páskoa kiiniriti ikamakasaakina?” hítxariko.
¹⁵ Ininiã iua oerekaiko híte itanokiri koa mitapoari. Auapeka kãkiti topãkini. Imakinika oeretapeëkaika —itxana.
¹⁶ Ininiã imoianariakori sari. Sitatxi apokasaakina Xesosi sákire iaõka aua. Ininiã ninoa kamari nipokori Páskoa kiiniriti íkapani.
¹⁷ Íkanõkapeka inakasaaki Xesosi apoka tosi imoianariakorikata. ¹⁸ Inipokonãtakasaakina, Xesosi txana:
—Atão nisãpiretai. Áti híte notakata nipokotakari mĩkapiritanoko nota —itxa.
¹⁹ Ininiãkara Xesosi moianariakori matinaniuata. Ipi-mããrina Xesosi:
—Notakani atxiíti?
Átipekana:
—Notakani atxiíti?
Ininiã imakinikana ikara atoko itxana. ²⁰ Ininiã Xesosi:
—Átika híte notakata auakari mĩkapiritano. Notakata komiri iopitiãtakarikaroko sikano nimokaiakariakori-moni. ²¹ Nota hĩtari iaxitikiri okaãkako. Teoso sákire iõkatsopatakori sãpiretapekari nipinini tĩkane. Nota hĩtari iaxitikiri mĩkapiritakari iteene misiritaãkako. Ereka-mariko maponaniãkatika inaãkamako.

Xesosi Íto, Iarëka Pakini
(Mateo 26.26-30; Arókasi 22.14-23; 1 Korĩto 11.23-25)

²² Xesosi imoianariakorikata nipokonãtakasaaki, Xesosi kosekari komiri. Imisákiretari Teoso:
—Erekapitikari ia komiri pisikakiti atemoni —itxari.
Imapopeëri komiri, xanaka itxari imoianariakori-moni.
—Apakapa, nika hĩtxako. Ia niĩto —itxana.
²³ Iposo atoko koseka itxaro iãkoanatxi. Imisákiretari Teoso:
—Erekapitikari ia iãriã pisikakiti atemoni.
Ininiã iãkoanatxi isikana imoianariakori. Ikinikana iã-tarina iãriã. ²⁴ Ininiã Xesosi:
—Ia niarëka xiketakari makatxakariko kaiãopokori kãkiti maerekani. Teoso sãpiretapekari kãkiti ikamaenetakiti amaneri kãkiti íkapani. Ia niarëka oerekari kãkiti, Teoso kamapekari ikamaenetakiti. ²⁵ Atão nisãpiretai. !Niãtaikaroko ovapeë, Teoso auítetxi ininiã-taãua nimapokakanisaaki. Iuaã napokasaaki niãtari. Amaneri iãriãti niãtako —itxa Xesosi.
²⁶ Eereka ninoa xikarauata Teoso íkapani. Iua atoko isana oriva mina auiniãtaã, oxiratari nopini.

Xesosi Sãpiretari Petro Kipatiniri Iua
(Mateo 26.31-35; Arókasi 22.31-34; Xoão 13.36-38)

²⁷ Xesosi misákiretana imoianariakori:
—Ia íkanõkati híkinika híte takanapanoko nota, kotxi Teoso sákire iõkatsopatakori sãpiretapekari ikara atoko inakari. Itxari:
Nokariko soti auíte piratakari, ininiã ikinika ipiraakori iarikitatako,
itxa Teoso sákire iõkatsopatakori. ²⁸ Ininiã eereka nota nipinaãka atoko, iuaíkana nõkitikaãkaua atoko, nisako híte apisa Kariréiamoni —itxa Xesosi.
²⁹ Ininiã Petro:
—Nota !nitakanapai pite. Atxiíti ikinimane takanapai, iuaritika kona nota takanapai.
³⁰ Ininiã Xesosi:
—Atão nisãpiretai. Ia íkanõkati patari ipikata sákirauatini apisapanikako, ipi áti pakinikata, “!Nimarotari iua,” pitxanoko —itxari Petro.
³¹ Petro apakapapiretari itaparaxinireritika:
—Atxiíti pitekata nokaãka, iuaritika kona nota sãpiretari apanakini nimimarotakanii pite.
Ikininape Xesosi moianariakori Petro sákire iaõka ikamana.

Xesosi Misákiretiniri Teoso Xetsémani Inakoriãtaã
(Mateo 26.36-46; Arókasi 22.39-46)

³² Xesosi imoianariakorikata apoka átiãtaã kãkiti akiritakiti Xetsémani inakoriãtaã. Iuaã Xesosi paniãtana imoianariakori:
—Uai híitopãka. Teoso nimisákiretako —itxa.
³³ Anikari Petro, Txiako, Xoão pakini iuakata apikomoni. Iuaã Xesosi iteene matinaniuata. Maerekaxiniretinoka itxa. ³⁴ Ininiã iua:
—Nixinire imaromaxiretari. Iteene nimaxire, ininiã okaaritano. Uai híkaikota. Araõkire hĩtxako —itxana.
³⁵ Apikomoni isa. Ipamaka xitimoni, misákireta itxari Teoso. ³⁶ Itxari iri:
—Papai, pite posotari ikinipoko pikamini. !Pauri-tapeno paítiki natatsiirauatini, iuaritika ninirekari pite nirekakiti nikamini. Nota nirekakiti nikamini kona ninireka —itxari iri.
³⁷ Eereka ikanapiriã Petro, Txiako, Xoão pakinimoni, txamari ninoa imakanãta. Xesosi akiritari Petro:
—Simão, himakanãta? Kona híposotatari áti oara-noka híkoatini? ³⁸ Erepaniko. Hinirekasaakiri maerekati híkamini, !hĩkamapiri. Araõkire hĩtxako. Himisákiretari Teoso, ininiã !hĩkamari maerekati. Kãkiti xinire atxiíti !nirekari maerekati ikamini. Txamari kãkiti íto tapara poiãoka, ininiã ikamari maerekati. Ininiã erepaniko —itxana ninoa.
³⁹ Iuaíkana isa Teoso imisákiretini íkapani. Teoso imisákireta, mitxi isákire atokokana itxa. ⁴⁰ Iposo atoko ikanapiriã. Txamari iuaíkana ninoa imakanãtapanika. !Iposotarina ikoatinina. Ipëtauatana, ininiã !kasákirena.
⁴¹ Iuaíkana ikanapiriã Petro, Txiako, Xoão pakini-moni.

—Himakanātapanika? Hītomanātapanika? Iaōpe. Hā-tapana. Hītari iaxitikiri uatxa sikaākako maerekati kamakanimoni. ⁴² Hōkitikaua. Masa. Hātapanana. Apokaāpota kiki nimīkapiritakiri —itxana.

Xesosi Maīkiko Pirena

(Mateo 26.47-56; Arókasi 22.47-53; Xoão 18.1-11)

⁴³ Xesosi sākirauanātakasaaki, Xotasi apoka. Iua Xotasi Xesosi moianarikamara. Iminana ito kiki, saasara mīkani, piriri mīkani. Sasetotxi auīteakori, kaiōkatso-parerini, kiomātxiakori pakini iokanataro Xotasi kiki-akorikata Xesosi imaīkinina īkapani. ⁴⁴ Xotasi mitxipeka sāpiretari kikiakori:

—Nota apitxokakiti Xesosipitkarako iua. Iuasaaki himaīkapekariko. Erepaniko hanikasaakiri, imamitekakani īkapani —itxa.

⁴⁵ Xotasi apokasaaki, isakatapitipori Xesosimoni. Akiritari:

—Koerekareri.

Inakasaakipeka apitxoka itxari.

⁴⁶ Inakasaakipeka kikiakori maīka, anika itxarina Xesosi. ⁴⁷ Kiki iuasaaki iuaā auakari kosekaro saasara. Iua sauaākatari sasetotxi auīte apiatakari nitiri. Itso-takakīpitari. ⁴⁸ Iuasaakipeka Xesosi:

—Hīte ina himaīkinino īkapani, saasarakata, piririka-ta. Kīitiriri atoko hītchapeno nota himaīkinino. ⁴⁹ Ikiniōtika nota auanātari hītekata Teoso misākiretiko aikoti āki, noerekarauatakasaaki. Iuaā hīte !imaīkano nota, kotxi Teoso sākire iōkatsopatapeēkaika hīte maīkinino kīitiriri himaīkini atoko —itxana ninoa.

⁵⁰ Iuasaakipeka ikinika Xesosi moianariakori miteka, asika itxarina iua. ⁵¹ Iuasaaki ātokori sari Xesosi tikini. Iua māka ātinoka aua iītoā pirikakari. Kikiakori maīkamari iua. ⁵² Imākanoka kaikota iuakoāna. Kasarapeka imiteka iua ātokori.

Xesosi Xoteo Auīteakori Apisatoō

(Mateo 26.57-68; Arókasi 22.54a, 63-71; Xoão 18.12-14, 19-24)

⁵³ Ninoa anikari Xesosi sasetotxi auīte apiatakari aapokomoni. Iuaā ikinika sasetotxi auīteakori, kiomātxiakori, kaiōkatsoparerini pakini apotiitaua.

⁵⁴ Petro ikira atoko isaāpota Xesosi anikakani tikini. Īroā sasetotxi auīte aapoko piriketakorīā. Iuaā iitopāka sasetotxi auīte apiatakari nitiriakorikata. Iroka xamina tinipoki.

⁵⁵ Aapokotxi āki sasetotxi auīteakori, ikinika Xoteo auīteakori pakini pimaāna kākiti:

—Kipa imarotari maerekati Xesosi kamini?

Ninoa nirekari Xesosi okiko imaerekani xika. Txamari lapokarina imaerekani imarotakani, kotxi likamari maerekati. ⁵⁶ Kaiōpokori kākiti sāpiretari maerekati Xesosi kamakiti, txamari paxirari ninoa sākire, kotxi āti sāpiretakiti ipinimoni, āti sāpiretakiti ipinimoni, itxaāpotana.

⁵⁷ Apanakini kiki ōkitikaua, sāpireta itxarina ia aāpirena Xesosi ikamapiretinina. ⁵⁸ Ninoa:

—Ate kenakotari isaāpiretiniri: “Nirikariko ia aiko Teoso misākiretiko aikoti kākiti kamakiti. Ipi āti pakini

ōti inakasaaki nikamariko āti aiko kākiti makamakiniti,” itxa isaākire.

⁵⁹ Txamari ikara sākiretxi āti sāpiretakiti ipinimoni, āti sāpiretakiti ipinimoni, itxaāpota.

⁶⁰ Iposo atoko sasetotxi auīte apiatakari tima ikini-mane apisatoō. Iua pimaāri Xesosi:

—Kininiāpa na papakapapiretari ninoa sākire? Kixikapa ninoa ikara atoko txanātai? —itxari.

⁶¹ Txamari !kasākireri Xesosi. !Apakapapiretari. Ininiā sasetotxi auīte apiatakari iuaīkana pimaāri:

—Pitekani Teoso mereēkiti txataua? Pitekani Teoso ākiri txataua? —itxari.

⁶² Ininiā Xesosi:

—Ari, iua ākiripitkarano. Hātamatariko kākiti itari iaxitikiri topākini Kaposotiireri kikomoni. Hātapariko kākiti itari iaxitikiri uai apokaāpotini katxiāri āki —itxa.

⁶³ Iuasaakipeka sasetotxi auīte apiatakari mat-sorākari imāka, kotxi iuākatari Xesosi sākire maerekati ininiua.

—!Anirekaikari Xesosi kamakiti sāpiretakani. Atokopeka. ⁶⁴ Kotxi hīte kenakotapekari isaākire maerekati, “Teoso ākirirano” inini. Natokopa atxatari iua? —itxana.

Ininiā ninoa apakapapiretari:

—Okaākapitakiko —itxarina.

⁶⁵ Apanakini kiisokari Xesosi. Mākatxi mataā iapirikarina ikiiā oki manapi imatamatakani īkapani. Iposo atoko iāsokarina.

—Pisāpiretaua, kipa āsokai? —itxarina.

Sasetotxi auīte nitiriakori apaka āsokari iua iuakoāna.

Petro Kipatari Xesosi Imarotini

(Mateo 26.69-75; Arókasi 22.54b-62; Xoão 18.15-18, 25-27)

⁶⁶ Iuasaaki Petro ixiti aua aapokotxi piriketakorī āki. Sasetotxi auīte apiatakari nitero ātokoro apoka iuaā.

⁶⁷ Oātamataro Petro irokanātini xamina tinipoki. Oa mixinitari iua. Ininiā oa:

—Xesosi Nasareekiri moianarikai pite apaka —otxa.

⁶⁸ Ininiā:

—Kona, nota !imarotari pisākire —itxaro.

Iuasaaki pirikere ĩronakikoātaā isari. Iuasaakipeka patari sākirauata. ⁶⁹ Oa sasetotxi auīte nitero atamatari iua iuaā.

—Ere kiki iua moianaripitikara —otxana ninoa Petro takote auakani.

⁷⁰ —Kona iuano nota —itxa.

Paītiki ninoa iuaā auakani:

—Iua moianaripitikarai. Pite Kariréiakirikarai.

Pisākireēra ate imarotai —itxarina.

⁷¹ Ininiā Petro:

—Nota !imarotari kiki ikara atoko hinanātakiti.

Atāoene nimasāpiretakaniā, Teoso misiritamanoko. Teoso imarotari nota sākire atāoka nisāpiretinii —itxana.

⁷² Ikara atoko Petro inakasaaki, iuaīkana patari sākirauata. Ininiā Petro xinikari Xesosi sāpiretakiti iua-moni. “Ipikata patari sākirauatini apisapanikako, ipi āti

pakinikata, 'Nimarotari iua,' pitxanoko." Ikara inakari ixinikasaaki, itxiapata.

Xesosi Pirato Apisatoõ

(Mateo 27.1-2, 11-14; Arókasi 23.1-5; Xoão 18.28-38a)

15 Katimatinĩkata sasetotxi auĩteakori, kiomãtxiakori, kaiõkatsoparerini, ikinimane Xoteo auĩteakorikata xinikaxitinãta. Ipaniãtarina Xesosi iaxirikiko. Iposo atoko anika, sika itxarina Piratomoni.

² Pirato pimaãri Xesosi:

—Pitekani Xoteoakori auĩte txataua? —itxari.

Ininiã Xesosi:

—Ari, pisãkire atãopitikara.

³ Sasetotxi auĩteakori apoiãpotari Xesosi, txamari Xesosi !kasãkireri. ⁴ Ininiã Pirato:

—Na papakapapiretari? Ninoa iteene misãkirepiretai —itxari.

⁵ Iuaritika Xesosi !apakapapiretari. Ininiã Pirato ãkixinireẽ:

—Kinirepa kona apakapapiretari? —itxa.

Xesosi Okiko Nirekiko

(Mateo 27.15-26; Arókasi 23.13-25; Xoão 18.38b-19.16)

⁶ Pãskoa kiiniriti auakasaaki, Pirato itotari isikakiniri kateia ãki auakari kãkiti nireẽkiti. ⁷ Iuasaaki Xesosi maĩkikosaaki, Pahapasi inakori aua kateia ãki. Iua Pahapasi apanakini kateia ãki auakanikata okaniuatapeka Homanoakori inaiatakasaakina. ⁸ Pirato sãkirauatakasaaki Xesosikata, kãkitipokoni apoka Piratomoni.

—Kateia ãki auakari pisikaka —itxarina.

⁹ Ininiã Pirato pimaãna:

—Hinirekatari nisikakiniri Xoteo auĩte hĩte ĩkapani? —itxana.

¹⁰ Pirato iteene imarotari sasetotxi auĩteakori sikari Xesosi iuamoni Xesosi ixikotinina xika. ¹¹ Sasetotxi auĩteakori maasakana ninoa iuaã apotiitakaniua:

—Hamanaãri Pirato Pahapasi isikakini ĩkapani —itxana kãkitimoni.

¹² Pirato iuaĩkana pimaãna:

—Natokopa nitxatari ia kiki Xoteo auĩte inakori? —itxa.

¹³ Akiripoakatana:

—Aamina ĩpiriãmitakari nopini hĩtokakitari —itxana.

¹⁴ Ininiã Pirato:

—Kixikapa? Maerekati !lkama —itxa.

Apiata akiripoakatana:

—Aamina ĩpiriãmitakari nopini hĩtokakitari —itxakatana.

¹⁵ Ininiã Pirato sikakari Pahapasi ninoa ĩkapani, kotxi inirekari ikamapoxokonitininina ninoa kãkiti. Eereka ipaniãtari Xesosi xirokitatiko aãpitsaã. Eereka Pirato paniãtari sotatoakori tokakitiniri Xesosi aamina ĩpiriãmitakari nopini.

Sotatoakori Napetiniri Xesosi

(Mateo 27.27-31; Arókasi 22.63-65; Xoão 19.1-3)

¹⁶ Ininiã sotatoakori anikari Xesosi Pirato aapoko ãki. Akiritarina ikinika sotato. ¹⁷ Iposo atoko ieretakarina

mãkatxi põkamarari Xesosi ĩtoã. Ikamarina saporieãta kotipiaro kamakori, taka itxarina Xesosi kiiã.

¹⁸ —Aãũite —itxarina Xesosi inapetinina.

—Xoteo auĩtekai pite —itxarina.

¹⁹ Iaritakiitarina aãkeẽ. Ikiisokarina. Ikapotoreẽkauana Xesosi apisatoõ.

—Aãũite —itxarina Xesosi inapetinina.

²⁰ Inapetakarina atoko imaktxakarina mãkatxi põkamarari. Xesosi mãka iuaĩkana ieretaka. Eereka anikarina Xesosi aamina ĩpiriãmitakari nopini itokakitininina ĩkapani.

Xesosi Tokakitaãka Aamina ĩpiriãmitakari Nopini

(Mateo 27.32-44; Arókasi 23.26-43; Xoão 19.17-27)

²¹ Ipixinipokoriti itaõkitarina kiki Simão inakori. Sireni sitatxitikiri iua. Iua anaakori Arexãtri, Hopo pakini. Iuasaaki Simão apoka Xerosareẽ. Sotatoakori paniãtari iua:

—Ia aamina ĩpiriãmitakari panikinari —itxana.

²² Anikarina Xesosi ixirataã, Kóokota inakoriãtaã. Xoteo sãkire "Kóokota." Apanakini akiritari iua oxiratari uãka "Kiitãtatxi," inaãka akiritiko. Iuaã apokana.

²³ Isikamarina iãriã pinĩtxikata, miha inakorokata, Xesosi iãtini ĩkapani, itsii imimarotakani ĩkapani, txamari !nirekaro iãtiniro. ²⁴ Ininiã itokakitarina aamina ĩpiriãmitakari nopini. Eereka ikamarina sarauatxi, Xesosi mãka apakapakani imarotinina ĩkapani. Ikara atoko apanakini anikari Xesosi mãka. ²⁵ ĩkanõkapanika novi oara itokakitapeẽka Xesosi aamina ĩpiriãmitakari nopini. ²⁶ Aaminaã auari iõkakitina, apoĩtiko pirena, "Xoteoakori Auĩte" itxa. ²⁷ Ninoa tokakitana ipi kiĩtiririni apaka aamina ĩpiriãmitakari nopini, ikikomoni ãti, isanarekoni ãti. ²⁸ Kitxakapirĩka Teoso sãkire iõkatsopatakori txari:

Okapeẽkako iua, kokaniri okiko atoko inapeẽkako. Ininiã Xesosi okikosaaki ia Teoso sãkire iõkatsopatakori iaõka auapeka iuasaaki.

²⁹ Ninoa iuaã napakani misãkirepiretapikari Xesosi:

—Kiĩkitei. Pite sãkire: "Nirikariko Teoso misãkiretiko aikoti. Ipi ãti pakini õti inakasaaki nikamari iuaĩkana," pitxama. ³⁰ Ikara atoko piposotiniã, piteka pimaktxakauako, ininiã pikatxaka aamina ĩpiriãmitakariã —itxarina Xesosi inapetinina.

³¹ Sasetotxi auĩteakori, kaiõkatsoparerini pakini napetari Xesosi:

—Iua makananitapekari apanakini. Txamari iuaka !iposotari imakananitiniua —itxakakana.

³² —Ikatxakiniãrako ate auikari Teoso mereẽkiti ininiãua. Ikatxakiniã, aũuikari Isaeo auakani auĩte ininiãua —itxakakana.

Kiĩtiririni iuakata tokakitakoni apaka misãkirepiretari.

Xesosi Ipinini Pirena

(Mateo 27.45-56; Arókasi 23.44-49; Xoão 19.28-30)

³³ Iuasaaki apaniãxiti ipiãka. Ikini itixitika piãka. Ipi ãti pakini oara ipiãka. ³⁴ Ipi ãti pakini oara napa atoko Xesosi akiripoakata:

—Erii, Erii, aremaa sapakatanii —itxa.

Ia atatsopatakari sākireē: “NiTeosone, niTeosone, kinirepa pitakanapano?” itxa.

³⁵ Kākiti iuaā auakani kenakotari akirinātini.
—Hīkenakota. Akirinātari Eriasi —itxana.

³⁶ Iuasaakipeka kiki ina katimariā. Iākari mapoa atoko inakari iāriā katxioārimoni, aāke mapotōkire taka itxari, sika itxari Xesosi iātini īkapani.

—Mitxipanikako. Maiātapari. Atauako Eriasi makatxakatapaniri Xesosi —itxana.

³⁷ Xesosi itapararitika akiripoakata, eereka ipīpe itxa.

³⁸ Iuasaakipeka mākatxi mata Teoso misākiretiko aikoti āki arōkakari tsorakita. Itano itsorakita. Ixitipeka apoka. Mitxi iua mākatxi mata !auiritari kākiti īroini Teosonani Auini Pakitaātaā. ³⁹ Sotatoakori auīte aua aamina īpiriāmitakari apisatoō. Ikenakotari Xesosi akiritini. Itikari ipinini.

—Atāopitikara Teoso ākiri itxaua ia kiki —itxa.

⁴⁰ Ātokaka sitoakoro ikira atoko atamanātarina Xesosi, Maria Matarenama, Saromeema, āto Mariama, apanakini sitoakorokata. Xesosi, Txiako pakini inoro oa Maria. Iua Txiako maneripanika inakari. ⁴¹ Xesosi Kariréia auakasaaki, ninoa sitoakoro moianatari iua. Imiparīkatarina. Xesosi ipīkasaakikanera apanakini sitoakoro kaiāopokoro aua iuaātaā. Ninoa apoka Xesosareē Xesosikata.

Xesosi Ikatiko Pirena

(Mateo 27.57-61; Arókasi 23.50-56; Xoāo 19.38-42)

⁴² Ikara ōti, Xesosi ipinini ōti, kākiti parīkauatini ōti, kākiti tomatini ōti apisapanika, iuasaaki kikatatikipeka.

⁴³ Iuasaaki Xosee inakori, Arimateia sitatxitikiri, sari Piratomoni. Iua Xosee Xoteo auīte apanakinikata. Ikinimane paxitari iua. Iua apaka iātapari Teoso ikinimane auīte ininiua ōti apokini. Itaparaxinireritika Piratomoni isa, amanaā itxari Xesosi īto. ⁴⁴ Ininiā Pirato ākixinireē:

—Atauako patimari Xesosi ipinini? —itxa.

Ininiā ipīkapiretari sotatoakori auīte. Iua apokasaaki Pirato pimaāri:

—Atauako Xesosi ipīpeka? —itxa.

⁴⁵ Ininiā iua:

—Ari, ipinapitipeka —itxari.

Ininiā Pirato:

—Panikaikari īto —itxari Xoseemoni.

⁴⁶ Iuasaaki Xosee amotari mākatxi mata erekari, arinio inakori. Eereka imaktxakari Xesosi īto.

Iapirikari īto mākatxi mataā, anika itxari akauari irikomoni. Kai kisakakori āki ieretakari Xesosi īto. Eereka kai mitapoari ikatika, tota itxari iriko. ⁴⁷ Ipi Maria itikanātari Xesosi īto takikoātaā, Maria Matarenama, Maria, Xesosi inakori inoroma pakini.

Xesosi Iuaīkana Auāki Inini

(Mateo 28.1-8; Arókasi 24.1-12; Xoāo 20.1-10)

16 Tomatiko ōti xipoka atoko mapiānikata, ipi āto pakini sito amotaro kamariāro, Xesosi īto ikamaritinina īkapani, Maria Matarenama, Saromeema, Maria Txiako inoroma pakini. ² Katimatiniākata, tomīkosaaki, īkanōkapanika, atokatxi pokīkasaaki, ni-

noa sari akauarimoni. ³ Kimaporiā isikasaakina, isāki-rauaāpotana:

—Kipa makatxakinaua kai auīte iriko tore? —itx-aāpotana.

Amaripokori iua kai. ⁴ Iuaā apokasaakina, atamatarina. Kai makatxakapeēkaika. ⁵ Ininiā īroāna iriko āki. Atamatarina ātokori topākanāta ikikomoni. Imāka ītanori, kasarori. Ininiā ninoa tikoka.

⁶ Ininiā iua:

—!Hītikokape. Hīte nitanātari Xesosi Nasareekiri, aamina īpiriāmitakari nopini tokakitakori. Ōkitikapekaua iua. !Auaika uai. Hātamata. Mitxi itakarina īto uai. ⁷ Hīsipeka. Hīsāpiretari Petro, apanakini Xesosi moianariakori pakini: “Xesosi sapanikako hīte apisa Kariréiamoni. Iuaā hīte aōkitari iua, kotxi ipinaka apisapanika isāpiretapekari ikara hītemoni,” —itxana ninoa.

⁸ Itimaritikana ninoa pokīka. Imitekana. Ikikinana, ipīkarena xika. !Isāpiretarina apanakini, kotxi ipīkarauatana.

Xesosi Oerekaua Maria Matarenamoni

(Mateo 28.9-10; Xoāo 20.11-18)

⁹ Xesosi ōkitikasaakia ipinaka atoko īkanōkapanika semana potorikini ōti, tomīkosaaki, oerekaua merepitanika Maria Matarenamoni. Mitxipe Xesosi aōkitakasaakiro oa Maria, omitikari maerekani mata-matakoni setxi pakini oa ītoā auakani. ¹⁰ Xesosi ōkitikasaakia, iua oaōkitaka atoko, osari merepanika Xesosi moianariakorimoni. Iuasaaki iteene imatinaniuatana. Itxiapanātana. Osāpiretana ninoa:

¹¹ —Xesosi iuaīkana auāki itxapeka. Nota aōkitari iua —otxana.

Txamari ninoa kona auikari osākire.

Xesosi Oerekaua Ipi Imoianariakorimoni

(Arókasi 24.13-35)

¹² Eereka iuaka oerekaua ipi imoianariakorimoni, kimaporiā isikasaakina aapokotxi mauakaniātaā. Iuasaaki itoō ipinipo itxa. ¹³ Eereka ninoa kanapiriā. Isāpiretana apanakini imoianariakori, txamari !auikarina isākirena.

Xesosi Oerekaua Imoianariakorimoni

(Mateo 28.16-20; Arókasi 24.36-49; Xoāo 20.19-23)

¹⁴ Eereka Xesosi oerekaua ōsi imoianariakorimoni inipokotakasaakina. Xesosi ōtākikana:

—Kinirepa hīte !auikatari nota iuaīkana auāki ninini? Kinirepa !hāuikatari nota aōkitakani sākire? !Kaiokakarekii —itxa.

¹⁵ Iposo atoko Xesosi txana:

—Ikini itixiti hīsako. Hīsāpiretariko Teoso iokanapirena erekari ikinimanemoni. ¹⁶ Teoso sākire auīkari patxisatakori, iuarako sari Teoso tixinemoni. Teoso sākire mauikakati, Teoso misiritapikariko. ¹⁷ Teoso sika-posotiiretanako isākire auīkani, ininiā apanakini imarotari Teosokara sikari iposotiire ninoamoni. Ia atoko Teoso sikaposotiiretana. Omitikarina maerekani

matamatakoni nota uākaā. Isākirauatana imimaro-takinitina sākiretxitiā. ¹⁸ Imaīkiniārīna imini, !ipinana. Iātiniārīna ikianari, lamianatana. !Ipinana. Itakauakotaua amianatakani nopini, ininiā amianatakani makananitaāka —itxa Xesosi sākire.

Xesosi Anikaāka Teoso Tixinemoni

(Arókasi 24.50-53; Átosi 1.6-11)

¹⁹ Imoianariakori imisākiretanapaka atoko, Xesosi anikaāka Teoso tixinemoni. Iuaā iua topāka Teoso

kikomoni. ²⁰ Xesosi moianariakori eereka isipekana, Teoso sākire ikini aapokotxiti auakani isāpiretinina ūkapani. Apiananiri moianatana. Apiananiri sikaposotiiretana ninoa, ininiā apanakini imarotari ninoa sāpiretakiti atāo inini. Ameē.

Arókasi

Arókasi Iőkatsopata Teópiromoni

1 Nota Arókasi iőkatsopata pite Teópiromoni. Iteene nipaxitai. Kākiti ito iőkatsopatapekari ikinipoko Xesosi kamakiti Xoteoakori sauaki auakasaaki. ² Ninoa, nota pakini imarotari ikinipoko Xesosi kamakiti, kotxi Xesosi kamakiti atamatakani, isākire oerekakani, sāpiretapekaua ate. ³ Nota apaka apia-iaōkapekari ikinipoko Xesosi sākire, ikamakiti pakini. Ininiā nota apokaerekatari ikinipoko Xesosi pirena niőkatsopatini pite Teópiromoni. Merepitipanika ikamakiti nisāpiretai. Ininiā eereka ikamakiti nisāpiretai. Ininiā eereka ikamakiti nisāpiretai, nitxaāpotako. ⁴ Kocerekererini oerekapekai Xesosi pirena, ininiā uatxa pimarotari ninoa oerekakiti atāo inini.

Xoāo Kapatxisareri Iponaniini Sāpiretiko

⁵ Erotxi inakori Xoteoakori auīte inakasaakiaua Xotéia tōpa, iusaaki auanāta sasetotxi Sakaria inakori. Sakaria auīte, apanakini sasetotxiakori auīte apaka, Apia inakori. Sakaria tanoro ouāka Isapeo otxaua. Oīri, oātokiri, oātokiri iri imakinikana sasetotxi itxauana. Oātokiri kitxakapirīkari Moisesi itari Arāo inakori. Iua apaka sasetotxi itxaua. ⁶ Teoso nirekaākitinanira ikamana Sakaria, Isapeo pakini. Ninoa kamari ikinipoko iua paniātakiti, Apiananiri paniātakiti. Atāo inakarinoka ikamana. !Ikerokarina ikamakitina. ⁷ Txamari !keenena. Isapeo !oposotari kamixi onini. Iusaaki ikiomaneēpekana.

⁸ Āti ōti Sakaria, apanakini sasetotxiakorikata, parīkauanāta Teoso misākiretiko aikoti āki. Iusaaki ni-noatene iuaā parīkauata. ⁹ Sasetotxiakori itotari sasetotxi imereinina Apiananiri misākiretiko aikoti ĩroini kamariāro arikini ĩkapani, ininiā iusaaki ninoa mereēri Sakaria. Ininiā iua ĩroā. ¹⁰ Sakaria aiko āki kamariāro arikanātakasaaki, mapara kākiti apotiitakaniaua misākiretari Teoso.

¹¹ Iusaakipeka Teoso nitiri iaxitikiri tokiā Sakariamoni kamariāro arikikoātaā takote. ¹² Sakaria atamatakasaakiri, itikoākata, pīkarauata itxa. ¹³ Teoso nitiri misākiretari iua:

—Sakaria, kona pipīkarauatape. Teoso sikapitikaiko pamanaākiti. Ininiā pītanoro Isapeo keenepitikaroko. Pitakauākatari pamarite Xoāo. ¹⁴ Iua auakasaaki ikamapoxokonitaiko pite, itori kākiti apaka. ¹⁵ Apiananirimoni apiari itxauako iua Xoāo. Kona Xoāo iātanapiroko kapoāro. Erekar Matamatakoti auariko iua ākixinireē. Inoro irokota ākipanika auakasaaki, Erekar

Matamatakoti auako iua ākixinireē. ¹⁶ Iua Xoāo anikanako itomaneri kākiti Isaeo auakani Teosomoni. Apiananirimoni iua anikana. Ininiā iuaīkana ninoa kanapiriā iTeosonemonina, isākire auikinina ĩkapani. ¹⁷ Xoāo apokako Apiananiri apokini apisapanika. Erekar Matamatakoti sikataparatarari Eríasi kitxakapirīka. Iuatxikana Erekar Matamatakoti sikataparatarariko Xoāo. Ikara atoko ininiā, iua oerekariko irītxi iuaīkana amaritena itiretinina ĩkapani. Iua Xoāo oerekariko kākiti Teoso paniātakiti makamakani, imaerekanina itakanapinina, erekarinoka ikaminina ĩkapani. Paimatirenako ninoa iusaakiko. Iua Xoāo oerekariko kākiti iposope ininina Apiananiri apokini apisapanika —itxa Teoso nitiri Sakariamoni.

¹⁸ Ininiā Sakaria pimaāri:

—Kiātokopa nitxa uatxa keenepeka ninini, kotxi nota, nītanoro apaka kiomaneēpeka —itxa.

¹⁹ Teoso nitiri apakapapireta:

—Niuāka Kapiriego. Nota auari Teosokata ipaniātakiti nikamini ĩkapani. Teoso iokanatanano pitemoni pite nimisākiretini ĩkapani, ia erekar pirena niminapiretini ĩkapani. ²⁰ Txamari na pauikari nisāpiretakiti. Ia xika !kasākireikaiko, kotxi nisāpiretakiti atāopitika. Teoso sikaenetakiti apokapitikako. Apokasaaki, pimarotariko nisākire atāo ininiua. Iusaakiikarako piposotari pisākirauatini —itxa Teoso nitiri Sakariamoni.

²¹ Iusaaki kākiti mapara auakani iātanapanātari Sakaria.

—Kiripa ikamanāta Sakaria aiko āki? !Katimari —itxanāšana.

²² Ipokīkasaaki !kasākireikari. Ninoa kākiti imarotari Teoso misākiretiniri iua aiko āki itaponeē, kotxi !kasākireikari. Iuakoānokara imisākiretana ninoa.

²³ Mapaōti iparīka xipoka atoko aapokomoni isipeka. ²⁴ Eereka Isapeo kamixipeka otxa. Onapari ipi ipi āti pakini kasiriti oaāpoko. !Osari ātiātaā.

²⁵ —Apiananiri sikano namarite. Erekar ikaminano notamoni. Uatxa !nipētauataika kākiti apisatoō. Keenepekano —otxa.

Kapiriego Iokanataāka Mariamoni

²⁶ Isapeo seisi pakini kasiriti kamixi onakasaaki Teoso iokanatarini nitiri iaxitikiri Kapiriego Nasaree sitatxitimoni, Kariréia tōpamoni. ²⁷ Iuaā iokanatarini iua ātokoromoni Maria inakoromoni. Oa kona sirīkapanika kikikata. Osāpiretapekari ātokori Xosee inakori iuakata oītaniriuatini ĩkapani. Xosee atokiri kitxakapirīka Xo-

teoakori auíte Tavii inakori. ²⁸ Teoso nitiri apokasaaki oamoni, akiritaro Maria:

—Ereëkai. Apiananiri pitekata aua. Iua mereëi pite. Itoro sitoakoro ikini itixiti aua, iuaritika pitenanirako Teoso sika iteene erekari —itxaro oa.

²⁹ Maria pīkarauata Teoso nitiri sākire okenako-takasaaki.

—Kinirepa ikara atoko itxa sākireta? —otxa oākix-inireë.

³⁰ Teoso nitiri txaro:

—!Pīpīkarauatape, Maria. Teoso apokaerekatai pite.

³¹ Pimixiuatako, keene pitxako. Pitakauākatariko pamarite Xesosi. ³² Iua Apiatakari itxauako. Apiananiri ākiri akiritaākako. Teoso Apiananiri kamariko iua auítetxi ininiāua. Kitxakapirīka Xoteoakori auíte Taviini. Taviini auítetxi ininiua atokokana, Teoso txīkitakariko Xesosi Xoteoakori auíte ininiua. ³³ Ātipirika Xoteoakori auíte, Xakooni apiko mekaniriakori auíte, itxauako. Iua auítetxi ininiua !ixipoka —itxaro oa.

³⁴ Ininiā oa:

—Kiātokopa nitxa kikikata masirīkatokano, keenepe ninini? —otxa.

³⁵ Teoso nitiri apakapapiretaro:

—Erekari Matamatakoti apokako pākixinireë. Apiananiri posotiire ākitaiko pite, ininiā amarini auakari Teoso ākiri akiritaākako. ³⁶ Pinoromane Isapeo kiomātxipe, iuaritika kamixiro oa. Kākiti sākirema: “!Oposotaikari kamixi onini” iuaritika seisi pakini kasiripte kamixi onini. ³⁷ Kotxi Teoso posotari ikinipoko ikamini —itxaro oa.

³⁸ —Nikamapitkariko Apiananiri nirekaākiti. Pisāpiretakiti iaōka ninirekapitika —otxa Maria.

Iusaakipeka Teoso nitiri sipeka.

Maria Isapeomoni Motikini

³⁹ Mapaōti napa atoko Maria katimariā sari oxiratarimoni, Xotéia tōpamoni. Iuaā osari sitatximoni. ⁴⁰ Oīroā Sakaria aapoko. Oākiritaro Isapeo:

—Ereëkai —otxa.

⁴¹ Isapeo kenakotakasaakiri Maria akiritiniro oa, iusaaki amarini otikakoākiri oākika. Iusaakipeka Erekari Matamatakoti itapararitika apoka Isapeo ākixinireë. ⁴² Iusaaki otapararitika otxaro Maria:

—Kaiāopokoro sito itixi auakani, iuaritika pitenokara Teoso sika apia erekari. Apaka Teoso sikariko erekari pamaritemoni. ⁴³ Erekari Teoso kaminano nota, kotxi niauíte inoro motikaētano. Kinirepa ia erekari Teoso kaminano, kotxi nota minakato nitxaua. ⁴⁴ Nikenakotakasaakiri “Ereëkai” pininino, namarite nitikakoākiri oākika, ipoxokoniuatiniā. ⁴⁵ Teoso sikari erekari pitemoni, kotxi pite auikari isākire. Pite auikari isikaenetakiti atāo isikinii —otxa Isapeo Mariamoni.

Maria Xikaretakiti

⁴⁶ Maria txari:

“Erekapitkari Apiananiri notamonikari.

⁴⁷ Nipoxokoniuata, kotxi Teoso nimaerekani makatx-aākari itxaua.

⁴⁸ Nipoxokoniuata, kotxi ixinikano nota. Initero poiāoro nitxaua. Īkorakanani eereka auakani kākiti txanoko: ‘Teoso kamapoxokonitaro, erekari isikiniro,’ txanoko nota.

⁴⁹ Nipoxokoniuata, kotxi Teoso Apiananiri kaminano posotiiretxi. Maerekati !auari iuamoni.

⁵⁰ Iua amonīkari kākiti iua paxitakani, kitxakapirīkari-ni, ĩkorakanani auakani, eereka auakani apaka ia-monīka.

⁵¹ Pataparari iua, ininiā ikamari posotiiretxi. Teoso txīkitakana kākiti iuikakanuia minakani ininiāuana, kotxi ākixinireë iuikauana.

⁵² Teoso makatxakapekari auítetxi pataparari inakanuia. Eereka auítetxi !itxaikauana ninoa. Kākiti poiāorini inakanuia Teoso kamari auítetxi ininiāuana.

⁵³ Isikakienatari natxitakani. Iokanitari katxineiroteri sini. Kona xatiki isikari iuamoni.

⁵⁴ Imoianatapekana Xoteoakori, iua ĩkapani parīkau-atakani. !Imaxinīkaretari iamoniĳinina ninoa.

⁵⁵ Kitxakapirīka Teoso xinikari Apraāoni iamoniĳini. Apaka iua tikini auakani ātipirika iamoniĳika, kotxi: ‘Nimoianataiko hīte,’ itxa anirimanemoni kitxakapirīkarinimoni,”

otxa Maria.

⁵⁶ Okaikota ipi, āti pakini kasiriti Isapeokata. Eereka oaāpokomoni kanapiriā otxa Maria.

Xoāo Kapatxisareri Iponaniini

⁵⁷ Amarini auini ōti apopeka. Isapeo auākitakari amarini kiki. ⁵⁸ Oaāpoko takote auakani, onirimane pakini kenakotari erekari Teoso kaminaro oa, ininiā ninoa, Isapeo pakini poxokopeka itxana ninoa.

⁵⁹ Oito ōtisaaki, onirimane motika oamoni, Teoso takaōtxikare amarinimoni itakinina ĩkapani. Inirekari-na iuāka Sakaria itakauākatinirina, kotxi iri uākatxikana ninoa nireka itakauākatinirina. ⁶⁰ Txamari inoro:

—Kona Sakariani iuāka. Xoāorako akiritaākako —otxa.

⁶¹ Ininiā ninoa txaro:

—Pinirimane ātika kona Xoāo txa uākataua.

⁶² Ninoa pimaāri amarini iri Sakaria iuakoāna amarini uāka inirekaākiti. ⁶³ Ininiā Sakaria amanaāri iōkat-sopatiko. Iōkatari: “Imi uāka Xoāo.” Ininiā ikinimane tsorīkaāta. ⁶⁴ Iusaakipeka Teoso sikaposotiiretari isākirauatini:

—Peerekari Teoso —itxa Sakaria.

⁶⁵ Kākiti iua aapoko takote auakani pīkarauata. Teoso posotiire ipīkana. Ikara inakariene Sakaria, Xoāo pakini pirena iaripireta oxiratarari Xotéia tōpa, ininiā kākiti iuaātaā sāpirenauanāta ikara pirena. ⁶⁶ Kākiti ikara inakariene kenakotakani tsorīkaāta:

—Kanatokopa inakaripa itxatapaniua ia amarini? —itxana.

Ikinimane imarotari Apiananiri nīkatiniri iua amarini.

Sakaria Xikaretakiti

⁶⁷ Iuasaaki Erekar Matamatakoti sikaposotiiretari Xoão iri Sakaria, ininiã Sakaria sãpiretari Teoso sãkire:

⁶⁸ "Peerekari Apiananiri aTeosone, ikinimane Xoteoakori Teosone, kotxi iua apoka inakitiakorimoni imaktxakinina ĩkapani, imapinakanina ĩkapani.

⁶⁹ Teoso iokanatarĩ kãkiti maerekani makatxakakari kaposotiireri atemoni. Teoso nitiri Taviini mekanirira iua.

⁷⁰ Kitxakapirĩka Teoso sãkire sãpiretakani erekarini sãpiretari ikara Teoso sãkire.

⁷¹ Teoso txari: 'Nimakatxakaiko hĩte himokaiakari mokakanii tĩkane, homanatakini mokakanii tĩkane.'

⁷² Isãpiretari aãtokiriakorini kitxakapirĩkarini: 'Niamonĩkai. Nikamariko nikamaenetakiti hĩte ĩkapani,' itxa ninoamoni. Ikara Teoso kamaenetakiti erekari.

⁷³ Kitxakapirĩka Teoso txari aãtokiri Apraãoni: 'Kona nimaxinĩkaretari nisikaenetakiti.

⁷⁴ Nimakatxakapitikaiko hĩte himokaiakari mokakanii tĩkane, ininiã hĩparĩkauata nota ĩkapani mapĩkaretika.

⁷⁵ Ininiã hĩte auini erekari. Kona hĩkamari maerekati hãuapanika hinakasaaki,' Teoso txari Apraãoni.

⁷⁶ Pitepekana namarite Xoão, Teoso sãkire sãpiretakari pitxauako. Teoso Apiananiri iaxitikiri sãkire sãpiretakari pitxauako. Pite sari Apiananiri apisa. Ikinika pimaamatako iua apokini apisa, ikinika iposope inini ĩkapani.

⁷⁷ Pisãpiretariko kãkiti Teoso nakitiakori, Teoso makatxakiniri maerekanitxi kãkiti kamakiti. Ininiã ninoamoni imarotariko ikara.

⁷⁸ Katiraõkiri aTeosone. Kaamonĩkareri iua. Ininiã iua tixinekiri apokako atemoni. Atokatxi pokĩkini atoko itxako. Iuasaaki ipiã !auaika, kotxi iua makatxakari amaerekani.

⁷⁹ Ininiã iua iopinikari kãkiti xinire, ipinini pĩkakani xinire. Ipiã auakani atoko ninoamoni. Ininiã iua iopinikari axinire Teoso kimapore aimarotini ĩkapani, aãuini ereka inini ĩkapani."

Itxa Sakaria xikare.

⁸⁰ Iua amarini aneẽ. Teoso sãkire iaõka ikamapika. Teoso sãkire Xoteoakorimoni imasãpiretakani apisapanika āparaã makipakanĩtaã aua Xoão.

Xesosi Iponaniini Pirena

(Mateo 1.1-25)

2 Iuasaaki Homanoakori auĩte Sesa Akósito inakori. Iua paniãtana initiriakori iaõtiniri ikininape kãkiti iua auĩtetxi ininiãtaãua tõpa auakani, ikini aapokotxitikini uãka imaktxakini ĩkapani. ² Mitxi Sesa Akósito !ikamapanikari kãkiti iaõtiko. Iuasaaki Síria tixini auakani auĩte Sirénio inakori. ³ Iuasaaki ikinimane sari sitatximoni iponaniiniãtaãna. Iuaã isikarina iuãkana.

⁴ Ininiã Xosee apaka sari iuãka isikini ĩkapani. Ininiã ipotorika Nasaree sitatxiti Kariréia tõpa. Xotéia tõpamoni isa, Pereẽ sitatxitimoni. Iuaã isa, kotxi iuaã

auĩtetxi Taviini kitxakapirĩka aua. Taviini nirimane itxaua Xosee. ⁵ Isa Mariakata. ĩtanoro tĩkane oa. Iuasaaki !itakapanikaro. Kamixipeka otxa iuasaaki. ⁶ Pereẽ apoka itxana. Iuaã auakasaakina, aua itxa amarini.

⁷ Oãuãkitakari merepitipanika oimi kiki. Ininiã mãkatxi mataã oiapirikari, pirãtxi nipokotini tiitxitiã taka otxari amarini, kotxi kãkiti imakanakiniãtaã imakinika xãpokapeka, ininiã ninoamoni auanãta pirãtxi auiniãtaã.

Soti Auĩte Piratakani Pirena

⁸ Iuaãtaã Pereẽ sitatxiti mapotõkire ĩkanõka kikiakori soti auĩte piratakani nĩkanãtari ipiraakorina. ⁹ Iuasaaki katimaritika Apiananiri nitiri iaxitikiri tokiã ninoamoni. Iuasaaki Apiananiri iotximere iopinikari ninoamoni. Ininiã imarotarina Teoso apokini iuaãtaã. Ininiã iteene ipĩkarauatana ninoamoni. ¹⁰ Ininiã Teoso nitiri txana ninoamoni:

—!Hĩpĩkarauatape. Nota minapiretari erekari pirena ikinimane kãkiti enenĩkini ĩkapani, ¹¹ kotxi ia õti kãkiti maerekani makatxakari iponaniãpeka Taviini auini sitatxitiã. Iua Teoso mereẽkiti. Apiananiri iua. ¹² Himarotariko nisãkire atão inini, kotxi hãpokariko ia amarini mãkatxi mataã iapirikiko pirãtxi nikini tiitxitiã —Teoso nitiri txana ninoamoni.

¹³ Iuasaakipeka itomaneri Teoso nitiriakori iaxitikini tokiã iuaãtaã. Ninoamoni xikarauata Teoso ĩkapani.

¹⁴ Ixikaretarina:

—Peerekari Teoso, iaxiti apiko nopinixiti auakari. Iua kamaerekaxiniretari kãkiti iua apokaerekatakini —itxana ixikarena.

¹⁵ Teoso nitiriakori kanapiriã itxana Teoso tixinemoni. Iuasaaki ninoamoni pirãtxi nĩkatakani misãkiretakakaua:

—Masa Pereẽmõni. Maãtamatarini ikara Apiananiri sãpiretakiti —itxana.

¹⁶ Ininiã katimaritika isana Pereẽmõni. Iuaã apokasaakina, initarina amarini. Apokana Xosee, Maria pakini. Ininiã atamatarina amarini pirãtxi nikini tiitxitiã. ¹⁷ Ikara atamataãkana atoko, isãpirenãtarina Teoso nitiri sãpiretakiti amarini pirena ikinimanemõni.

¹⁸ Kãkiti kenakotakasaakiri soti auĩte nĩkatakani sãpiretakiti, ikinimane tsoĩkaãta iuasaaki. ¹⁹ Maria kenakotakasaakiri soti auĩte nĩkatakani sãpiretakiti, oa ãkixinireẽ onĩkatari ikara ene. !Omaxinĩkaretari ninoamoni sãpiretakiti. Oxinikapikari. ²⁰ Eereka pirãtxi nĩkatakani kanapiriã ipiraakori auinimõni. Imisãkiretakakana:

—Peerekari Teoso. Apiananiri iua, kotxi erekapitikari aĩtikakiti. Erekapitikari initiri iaxitikiri sãpiretakiti. Isãpiretakiti atãopitika, kotxi aãtamatarini isãpiretakiti iaõka —itxanãtana ninoamoni soti auĩte nĩkatakani.

Xesosi Takauãkatiko

²¹ Xesosi oito õti auakasaaki, inirimane kamari Teoso takaõtxikare ĩtõã. Iuasaaki inirimane takauãkatari Xesosi, kotxi iua iaõka Teoso nitiri iaxitikiri sãpiretapedekaro Maria oa kamixi oinini apisapanika.

Xesosi Anikiko Teoso Misäkiretiko Aikotimoni

²² Moisesini ketotiniri manapi Xosee, Maria pakini kamari Moisesini paniätakiti iaõka amarini auakasaaki, Xosee, Maria pakini maerekani Teoso makatxakini İkapani. Ikara xipoka atoko anikarina Xesosi Xerosareë sitatxitimoni Apiananirimoni isikinirina İkapani, ²³ kotxi Apiananiri paniätakiti iõkatsopatakori txari:

Merepitipanika iponaniäkari sikaäkako Teosomoni, kotxi Teoso nakiti iua.

²⁴ Apaka Apiananiri paniätakiti iõkatsopatakori txari:

Amarini iponaniäkasaaki, ipi kamo a pisika Teosomoni. Iminakaniä, ipi kamo a äkiri pisika Teosomoni, itxa Teoso. Ininiä Xosee, Maria pakini sari Xerosareë kamo a isikinina İkapani.

²⁵ Iuasaaki kiki Simiäo inakori aua Xerosareë. Iua erekari kamakari. İkinipoko Teoso paniätakiti ikama. Erekari Matamatakoti auari äkixinireë. Äkixinireë iäta-panätapikari Teoso Mereëkiti apokini, kotxi İsaao auakani maerekani makatxaäkari itxaua. ²⁶ Erekari Matamatakoti säpiretapekari iua: "Pipinini apisa paõkitapanikariko Apiananiri Mereëkiti," itxari Simiäo.

²⁷ Erekari Matamatakoti sikanireõtari Simiäo aiko Teoso misäkiretiko aikoti İroini. Iuasaaki Xosee, Maria pakini İroä iuaätaä, Apiananirimoni Xesosi isikinina İkapani, Teoso paniätakiti ikaminina İkapani.

²⁸ Iuasaakipeka Simiäo apakapari Xesosi:

—Peerekari Teoso. ²⁹ Niauİte Apiananiri, uatxa apokapeka ia amarini pisikaenetakiti. Nota pite İkapani parİkauatarino. Uatxa niposotari nipinini erekaxinirepeka ninini, ³⁰ kotxi nota atamatari ia amarini piokanatakiti atemoni, amaerekani imaktxakini İkapani, amapinakani İkapani. ³¹ Pite iokanatapekari ia İkorapokoriti ikini itixiti auakani maerekani imaktxakini İkapani. ³² Ia amarini tirikapi atoko, kotxi iopinikariko pikimapore, pisäkire Xoteo minakaniua imarotini İkapani. Ia amarini tirikapi apiatakari atoko Xoteoakorimoni pinakitiakorimoni, kotxi oerekai pite ninoamoni —itxa Simiäo säkire Teosomoni.

³³ Xosee, Xesosi inoro apaka tsorİkaänäta ikara Simiäo säkire ikenakotakasaakina. ³⁴ Simiäo amanaäri Teoso İkinipoko erekari ninoamoni isikini İkapani. Eereka imisäkiretaro Maria, Xesosi inoro:

—Teoso mereëri ia amarini Xoteoakorimoni iokanatiniri İkapani. Ia apakapakari Teoso apakapa apaka. Ia mapakapakati Teoso İapakapari. İmisiritaäkako. Ia amarini oerekari Teoso käkitimoni, txamari itori käkiti laukari isäkire. ³⁵ Ikara atoko ininiä, itori käkiti xiniäkiti kipatakori äkixinireë, imarotaäkako. Pitepekana pite matinaniuatako. Päkİpa iouata iorotini tsii atoko itxako —itxa Simiäo säkire Mariamoni.

³⁶ Iuasaaki oäua sito Teoso säkire säpiretakaro Ana inakoro. Panoeo äkero oa. Oätokiri kitxakapirİka Asee inakori. Iuasaaki kiomätxipekaro oa. Oäua setxi ano ötanicakata. Eereka ipİpe. ³⁷ !Öitaniriuataika. Öitëta koatrokananipeka oäuini. Oa auapika Teoso misäkiretiko aikoti äki. Iuaä ikini öti, ikini İkanökati pakini omisäkiretapikari Teoso. Itokata otakanapari onipoko-

tini Teoso omisäkiretini İkapani. ³⁸ Xosee, Maria pakini Simiäo misäkiretaka atoko Ana apoka. Omisäkiretari Teoso:

—Erekapitikari ia amarini pimereëkiti käkiti iätapakiti piokanatinini atemoni —otxa.

Eereka osäpirenauata Xesosi apokini pirena Xerosareë auakanimoni käkiti maerekani makatxaäkari iätapakanimoni.

Nasree Sitatxitimoni İkanapiriinina

³⁹ Xosee, Maria pakini Apiananiri paniätakiti iõkatsopatakori imakinika ikamaäkana atoko, kanapiriä itxana Karirëia töpamoni. Iuaä isana aapokomonina Nasree sitatxitiä. ⁴⁰ Iua amarini aneë. İtapara auaäpotari. Kimaroreri itxaua. Teoso iteene tiretari iua Xesosi.

Xesosi Misäkirenätari Koerekarerini

⁴¹ İkinikanani Xosee, Maria pakini sari Päscoa kiiniritimoni Xerosareë sitatxitimoni. ⁴² Xesosi tosi anopeka inakasaaki, isana Xerosareë auakari kiiniritimoni mitxi isanätinina atokokana. ⁴³ Kiiniri xipoka atoko Xosee, Maria pakini potorika aapokomonina isinina İkapani. Iuasaaki Xesosi kaikota Xerosareë. Txamari ninoa İmarotari ikaikotini. ⁴⁴ Ninoa uäkatamari apanakini inirimanekata isini. Ikara atoko ininiä, ikimaporitana äti ötipeka. Mapiänikata ipixinipokoriti initamarina inirimanemoni, aökimaneremoni. !Apokarina. ⁴⁵ Ininiä İkanapiriäna Xerosareëmoni iuaİkana initinirina İkapani. ⁴⁶ İpi, äti pakini öti initapiimarina. !Apokarina Xesosi. Eereka apokarina Teoso misäkiretiko aikoti äki. Moisesi säkire oerekakanikata iitopäkanäta. Xesosi kenakonätari ninoa säkire. Apaka ipimarauata. ⁴⁷ Ninoa Xesosi säkire kenakotakani tsorİkaänäta, kotxi paimatireri iua. ⁴⁸ Xosee, Maria pakini apokasaakiri iua, kona imarotarina Xesosi parİka. Inoro txari:

—Namarite, kinirepa pimisiritaua ate? Piri, nota pakini pikamamaxirexiniretaua ate. Anitapiimai. Kona aäpokai —otxari Xesosi.

⁴⁹ Ininiä Xesosi:

—Kinirepa hinitanätano? Kona himarotatari uai niri aapoko ninirekari nauini, ipaniätakiti nikamini İkapani —itxa.

⁵⁰ Txamari ninoa İmarotari Xesosi säkire.

⁵¹ Ikara atoko ininiä, Xesosi kanapiriä ninoakata Nasree sitatxitimoni. İkinika Xosee, Maria pakini säkire ikİpita. Inoro xinikapikari Xesosi säkire oäkixinireë. Opotxitari oxinikiniri Xesosi säkire. ⁵² Xesosi aneë. İmatire apaka aneë. Teoso apokaerekatari Xesosi. Käkiti apaka apokaerekatari Xesosi.

Xoäo Kapatxisareri Säpiretakiti

(Mateo 3.1-12; Marko 1.1-8; Xoäo 1.19-28)

3 Homa sitatxitiä Homanoakori auİte Txipërio inakori iua. Kİsi anokananipeka iua auİtetxi ininiua iuasaaki. Iuasaaki Xotëia tōpa auakani auİte Pōsio Pira-to inakori. Karirëia tōpa auakani auİte Erotxi inakori.

Erotxi itari Piripi inakori. Itoreia tixini auakani auíte, Takonitxi tixini auakani auíte apaka itxaua Piripi. Iuasaaki Apireni auakani auíte Arisánia inakori.

² Iuasaaki Anasi inakori, Kaipasi inakori pakini sase-totxi auíteakori apiatakani itxauana ninoa. Iuasaaki Teoso sápiretari isákiro Xoãomoni Sakaria ákirimoni, áparaá makipakaniátaá auakasaaki. ³ Ininiá Xoão sari ikininape kákitimoni, uini Xotão takote auakanimoni. Isápiretari Teoso sákiro:

—Hítakanapariko himaerekani. Eereka patxisata hinaáka. Ikara atoko hininiá, Teoso makatxakinii himaerekani —itxanáta Xoão ikininape kákitimoni.

⁴ Kixakapiríka Teoso sákiro sápiretakari Isaía inakori iókatsopari:

Auako kiki áparaá makipakaniátaá. Isápirenauatako. Itxariko: “Hóeretariko kimapori Apiananiri apokini apisapanika. Itíkaápo erekari híkamako iua napini íkapani.

⁵ Kipatxiá ixápokakaáka ikini isuana. Ixirata mirí oerekataáka. Kimapori ikitokare oerekataáka. Kimapori pakota totaáka.

⁶ Ikinimane kákiti itixi auakani imarotariko Teoso makatxakiniri kákiti maerekani imapinakani íkapani,” itxanáta.

Ikara atoko itxa Isaía iókatsopatikiti Xoão pirena. Kimapori kákiti oerekatini atokokana, auítetxi apokini apisa, iua atokokana Xoão nirekari kákiti iposope inini Apiananiri apokini apisa, imaerekanina itakanapinina íkapani.

⁷ Itomaneri kákiti sari Xoãomoni ipatxisatikona íkapani. Ininiá Xoão:

—Imini kasiiri anaakorirai híte. Teoso misiritapitikai himaerekani xika. Himitekini !auari. Hinirekari hípatxisatikoti, txamari !hinirekari hitakanapiniri himaerekani.

⁸ Hinirekiniári himaerekani hitakanapini, ininiá híkamariko erekari. Ikara atoko ininiá, hóerekari Teoso atão hitakanapiniri himaerekani. Háxixiniremoni !híxinikapiri: “Teoso apakapitikauako ate, kotxi ate atokirini Apraãoni txaua,” !hítxapeko. Ari, nota sápiretai híte, Teoso nirekiniári, iposotari ia kai soroá Apraãoni mekaniriakori ikamini. Kona Apraãoni posotari anikinii Teosomoni. ⁹ Aamina maereka iriti atoko hítxa. Teoso iposopeka híte ixipokini. Kákiti auari ikitaite kauanari aamina maereka iriti itokini íkapani. Ikinika aamina maereka iriti tokaáka. Xaminaá oka inaákanako. Teoso kamakiti iua atokokana itxa. Ininiá Teoso kitaite kauanapeka, aamina kotsa sauakiko tíkane. Iua atokokana ininiá, Teoso aiamatapeka híte ixipokini íkapani —itxa Xoão ninoamoni.

¹⁰ —Ikara atoko ininiá, kipa akama Teoso mamsiritakaniua íkapani? —itxarina.

¹¹ Ininiá Xoão apakapipireta:

—Pimáka kauanata ipi auiniái, áti pisika mákatxi kauanata mauakinitimoni. Nipokori auiniái, pisikari nipokori mauakinitimoni —itxa Xoão sákiro.

¹² Kikiákinii, txineiro apakapakani Homano auíte nitirakori, apoka apaka ipatxisatikona íkapani.

—Koerekereri, atepekana, kipa ate kama Teoso mamsiritakaniua íkapani? —itxarina.

¹³ Ininiá Xoão:

—Kákiti txineirote himakatxakakito, Homano auíte nireékito iaóka himakatxakako. Apikomoni !himakatxakapero —itxana.

¹⁴ Átikaka sotatoakori apaka pimaári:

—Atepekana, kipa ate kama amaerekani atakanapini íkapani?

Ininiá Xoão:

—!Himaíkapiri kákiti, itxineirote himixirikini íkapani. Kona áti maxikatíka !hápoítape. Hípoxonouatako txineiro hápakapakitoá híparíka íki. !Hinirekapero apikomoni —itxa sotatoakorimoni.

¹⁵ Iuasaaki kákiti iáapanári Teoso mereékiti apokini. Ininiá Xoão sápiretakiti ikenakotakasaakina, ákixinireña ixinikarina:

—Xoãokani Teoso mereékiti txataua atxiíti? —itxanánata ixinikanákitina.

¹⁶ Ininiá Xoão:

—Áparaáñokara nipatxisatai híte. Nota tikini apoákarí patxisataiko híte Erekari Matamatakotiá, xaminaá pakini. Apiatakari itxaua iua. !Apakata iua takote napokini ikiti mata nimakatxakini íkapani, kotxi iua apiata. Nota poiáoka. Imakatxakari himaerekani, itxiko metao áki auakari arikini atoko. ¹⁷ Katarereri ápokari ahoisi otáta imakatxakini íkapani. Otáta arikaáka. Oki níkataáka ikiena níkatikoáta. Iua atokokana Teoso níkatari kákiti erekarini. Maerekati kamakani arikaáka xamina maxipoákatí.

¹⁸ Ikara atokora itxa Xoão sápirena ótákininina kákiti. Isápiretari erekari pirena Teoso pirena kákitimoni.

¹⁹ Áti óti Xoão pinitari Erotxi, Kariréia auakani auíte:

—Pitakiníaro pitari Piripi ítanoro Erotxia inakoro, maerekati pikama. Apaka apikomoni maerekati pikamapitipo —itxa Xoão.

²⁰ Ininiá iuasaaki iuaíkana Erotxi kamari maerekati, kotxi itakari Xoão kateia áki isákiro imapokaerekatakani xika.

Xesosi Patxisatikoti Pirena

(Mateo 3.13-17; Marko 1.9-11)

²¹ Xoão Erotxi maíkinii apisapanika ikinimane kákiti ipatxisatakasaaki, Xesosi apaka patxisataáka. Iuasaaki Xesosi sákirauatakasaaki Teosokata, iaxiti takaka.

²² Erekari Matamatakoti katxaka Xesosi nopini. Kamoakatkakini atoko itxa ikatxakini. Iuasaaki ikenakotaáka iaxitikiri sákiro:

—Pite namarite, nitiretakiti, napokaerekatai, kotxi ninirekakiti pikama —itxa.

Xesosi Nirimaneakori Iua Apisapanika Auakani

(Mateo 1.1-17)

²³ Iuasaaki Xesosi potorika iparíkuatini Teoso íkapani. Tríta anokananipeka itxaua iuasaaki Xesosi. Kákiti uákatari iua Xosee ákiri ininiáua.

Xosee iri Erii.

²⁴ Erii iri Matatxi.

Matatxi iri Arevii.
 Arevii iri Meokii.
 Meokii iri Xanai.
 Xanai iri Xosee.
²⁵ Xosee iri Matatxia.
 Matatxia iri Amosi.
 Amosi iri Naoõ.
 Naoõ iri Esirii.
 Esirii iri Nakai.
²⁶ Nakai iri Maatxi.
 Maatxi iri Matatxia.
 Matatxia iri Semei.
 Semei iri Xosee.
 Xosee iri Xota.
²⁷ Xota iri Xoanaã.
 Xoanaã iri Hesa.
 Hesa iri Soropapeo.
 Soropapeo iri Saratxieo.
 Saratxieo iri Nerii.
²⁸ Nerii iri Meokii.
 Meokii iri Atxii.
 Atxii iri Kosaã.
 Kosaã iri Eomataã.
 Eomataã iri Eri.
²⁹ Eri iri Xosoe.
 Xosoe iri Eriesa.
 Eriesa iri Xoriĩ.
 Xoriĩ iri Matatxi.
 Matatxi iri Arevii.
³⁰ Arevii iri Simião.
 Simião iri Xotaa.
 Xotaa iri Xosee.
 Xosee iri Xonaã.
 Xonaã iri Eriakiĩ.
³¹ Eriakiĩ iri Mereaa.
 Mereaa iri Mena.
 Mena iri Matata.
 Matata iri Nataã.
 Nataã iri Tavii.
³² Tavii iri Xesee.
 Xesee iri Opetxi.
 Opetxi iri Póasi.
 Póasi iri Sáomõ.
 Sáomõ iri Nasoõ.
³³ Nasoõ iri Aminatapi.
 Aminatapi iri Átximĩ.
 Átximĩ iri Anii.
 Anii iri Ésirõ.
 Ésirõ iri Péresi.
 Péresi iri Xotaa.
³⁴ Xotaa iri Xakoo.
 Xakoo iri Isaki.
 Isaki iri Apraão.
 Apraão iri Tera.
 Tera iri Nakoo.
³⁵ Nakoo iri Seroki.
 Seroki iri Hakaoo.
 Hakaoo iri Pareki.

Pareki iri Epi.
 Epi iri Sara.
³⁶ Sara iri Kainaã.
 Kainaã iri Apaxatxi.
 Apaxatxi iri Seĩ.
 Seĩ iri Noee.
 Noee iri Arameki.
³⁷ Arameki iri Metosareẽ.
 Metosareẽ iri Enoki.
 Enoki iri Xaretxi.
 Xaretxi iri Marereo.
 Marereo iri Kainaã.
³⁸ Kainaã iri Enosi.
 Enosi iri Setxi.
 Setxi iri Adão.
 Adão iri Teoso. Imapotõkirepe.

Satanasi Nirekari Xesosi Kaminiri Maerekati

(Mateo 4.1-11; Marko 1.12-13)

4 Xesosi ipatxisatiko atoko, Erekaru Matamatakoti iteene sikaposotiiiretari iua. Erekaru Matamatakoti txĩkitakari Xesosi uini Xotão itakanapini, ãparaã makipakaniãtaã isini ĩkapani. ² Iuaã koarẽta õti auakasaaki, Satanasi atamakaerekatari Xesosi. Koarẽta õti manipokotakatinoka itxa Xesosi. Ininiã natxinoka itxa Xesosi.

³ Ininiã Satanasi txari:

—Pite Teoso ãkiri pitxaua, ininiã ia kai soro komiri pitxĩkitaka —itxari Xesosi.

⁴ Ininiã Xesosi apakapapiretari:

—Kona, kotxi Teoso sãkire iõkatsopatakori txari: Kona komirinanini txĩkitakari kãkiti ãtipirika auini tĩkane. Ikinika Teoso sãkirera txĩkitakari kãkiti ãtipirika auini tĩkane.

⁵ Ininiã iuasaaki Satanasi anikari Xesosi ixirata nopinixiti. Iuaã pakoteri oerekiniri ikinimane tixine.

⁶ Ininiã Satanasi:

—Nota posotari nisikinii ikinimane auĩtetxiakori posotiiire. Ikinipoko ninoa txineirote apaka niposotari nisikinii. Merepitipanika notamoni isikaãka ia posotiiiretxi, ininiã nota sikari ninirekaãkitimoni. ⁷ Ikara atoko ininiã, piteosonetiniãno, ia posotiiiretxi nisikai pite —Satanasi txari Xesosi.

⁸ Ininiã Xesosi:

—Konapitini. Pisipeka Satanasi. Teoso sãkire iõkatsopatakori txari: Apiananiri piTeosone. Iuanokara piteosoneta. Iua ĩkapaninokara piparĩkauatako.

⁹ Eereka Satanasi anikari Xesosi Xerosareẽmoni, aiko Teoso misãkiretiko nopinixiti. Itanoxiti paĩtanori. Pamõõkoniri. Iuaã itxari:

—Teoso ãkiri pininiãua, pokaua xiti. Ininiã ikinipoko kãkiti imarotariko Teoso ãkiri pininiãua, ¹⁰ kotxi Teoso sãkire iõkatsopatakori txari:

Teoso iokanatanako initiriakori iaxitikini pite inĩkatini-ni tĩkane.

¹¹ Ninoa maĩkai pimapanakani tĩkane, ininiã pikarouatini !auari. Kona kai soro karotari pikiti,

itxa Teoso sákire —Satanasi txari Xesosi.

¹² Ininiã Xesosi:

—Teoso sákire iókatsopatakori apaka txari:

Kona patamakaerekatapiri Apiananiri piTeosone,
—itxari.

¹³ Iuasaakipeka Satanasi atamakaerekatini Xesosi xipope. Ininiã itakanapari Xesosi äti öti iuaïkana ikanapiriini iuamoni ïkapani.

Xesosi Mipotorikari Iparïka Kariréia Töpa

(Mateo 4.12-17; Marko 1.14-15)

¹⁴ Ikara inaãka atoko Xesosi kanapiriã Kariréia töpa auakanimoni. Paposotiireri, kotxi Erekar Mata-matakoti auari iuakata. Iua pirena iaripireta ikini Kariréia töpa auakanimoni. ¹⁵ Iua oerekarauata aiko äki Xoteo apotiitiniãtaãua. Ininiã ikinimane txari:

—Peerekari iua, kotxi erekapitikari iua säpiretakiti —itxana.

Nasaree Auakani Kona Auikari Xesosi Sákire

(Mateo 13.53-58; Marko 6.1-6)

¹⁶ Eereka Xesosi sari Nasaree sitatxitimoni. Iuaã Xesosi aneë mitxi. Xoteo tomatini ötisaaki Xesosi ito-tapekari aiko Xoteo apotiitiniãtaãua isini. Ininiã iuasaa-ki, Xoteo tomatini ötisaaki isari iuaã. Iuaãtaã itima Teoso sákire iókatsopatakori atatsopatini ïkapani.

¹⁷ Teoso sákire säpiretakari Isaía iókatsopatakiti tsopa isikaãka. Ininiã imatakireëri aãtsopa. Ia Teoso sákire inita, atatsopata itxa:

¹⁸ —Erekari Matamatakoti notakata aua, ininiã Api-ananiri mereëno nota matxineirotenimonikari erekari pirena nisäpiretini ïkapani. Iokanatano kateia äki auakani nisikakini ïkapani. Iokanatano mösiärenimoni iuaïkana atamarauatinina ïkapani. Iokanatano misiritakonimoni, ninoa misiritakani nixipokini ïkapani.

¹⁹ Ipaniãtano käkiti nisäpiretini: “ïkorakanani Teoso apokapeka käkiti maerekani imakaxakini ïkapani, imapinakanina tïkane.” Ikara atatsopata Xesosi.

²⁰ Aãtsopa iapirikaãka atoko, sika itxari sasetotxi niti-rimoni. Ikara inaãka atoko Xesosi topãka. Imakinika käkiti aiko Xoteo apotiitiniãtaãua äki auakani, imakinikana atamatari Xesosi, isäpiretakiti kinirão kenakotaka inakani. ²¹ Ininiã Xesosi säpiretana:

—Ikara Teoso sákire hïkenakotakiti apokapeka uatxa —itxa ninoamoni.

²² Ikinimane käkiti säpirenauata Xesosi ereka inini. It-sorïkaãntana isákire erekari ikenakotakasaakina:

—Kiãtokopa ininiãpa imarotatari ikara atoko inakari isäpiretini? Kotxi Xosee äkirira iua, minakati äkirira iua —itxanãtana.

²³ Ininiã Xesosi txana ninoa:

—Atxiïti hïte txanoko nota imatiretxi kitxakapiriãka kiomãtxiakori sákire. Ninoa txari: “Pinïtxi imarotakari pininiãua, piteka pipitaua.” Atxiïti hïxinikanãtari: Kapanaoõ sitatxiti nauakasaaki, nikamari posotiiretxi iuaãtaã. Kinirepa na nikamatari posotiiretxi uai nauiniãtaã? Ikara atoko atxiïti hïxinikanãta. ²⁴ Atão

nisäpiretai, käkiti Teoso sákire säpiretakari inirimane sauaki auakasaaki, inirimane !auikari isákire. Ia xika kona nikamari posotiiretxi uai. ²⁵ Atãopitika nisäpiretai hïte. Kitxakapiriãka Teoso sákire säpiretakari Eríasi in-akori auakasaaki, ipi äti pakini ano ipixini ano pakini äparaã !kipa. Iuaã Isaeo tixini natxinoka aua. Iuasaaki kaiãopokoro sitoakoro tikinitakoro auari iuaãtaã.

²⁶ Iuaritika Teoso liokanitari Eríasi ninoa ikininape-moni. Iokanitari ätoka sitomoni tikinitakoromoni, nipokori isikiniro ïkapani. Oa sito aua Sarepita sitatxiti Sitoõ töpa, Isaeo tixini takote. Xoteo !otxaua oa.

²⁷ —Ikara atokotxikana itxa Teoso sákire säpiretakari Eriseo inakori. Iua auakasaaki, kaiãopokori ami-anatakani maere matati Isaeo tixini auakani aua. Kona imakinikani erekapeka inaãkana. Kiki Naamaã inakori Síria tixini auakari, iuanokara erekapeka itxïkitakaãka. Iua Naamaã kona Xoteo !itxaua iua —itxa Xesosi ni-noamoni.

²⁸ Ikinimane aiko äki apotiitakaniua, ikara ikenako-takasaakina, iteene inaiatauana. ²⁹ Ininiã ikosekaïtotarina Xesosi sitatxi mapotökiremoni. Anikarina ixirata nopini sitatxi auiniãtaã. Iuaã inirekarina Xesosi okinina ixiratamoni ipinini ïkapani. ³⁰ Txamari Xesosi napari nino sauaki, ïkorape itxa.

Kiki Maerekati Matamatakoti Auãtotakiti

(Marko 1.21-28)

³¹ Eereka Xesosi sari Kapanaoõ sitatxitimoni Kariréia töpa. Iuaã tomatiko ötisaaki oerekana käkiti Teoso sákire. ³² Käkiti iuaã auakani tsorïkaãnta oerekakiti ikenakotakasaakina, kotxi paimatireri iua. Isäpiretakiti atãonoka itxa isákire. ³³ Iuasaaki aiko äki käkiti apoti-itiniãtaãua, aua kiki maerekati matamatakoti auãtotakiti.

³⁴ Iua kiki äkixinire auakari akiripoakata:

—Xesosi Nasareekiri, kipa ïkai uai? Kiãtokopa pitx-ataua ate? Atxiïti papoka ate pixipokini ïkapani? Nota imarotai pite. Pite maerekati mauakiniti pite. Teoso nakiti pitxaua pite —itxa maerekati matamatakoti Xesosimoni.

³⁵ Ininiã Xesosi txitari iua. !Auiritari isäkirauatini:

—Maãtako. Posipikari ere kiki —itxari.

Ininiã maerekati matamatakoti iriãkatari iua kiki ikinimane okiãtaã. Ininiã itakanapari iua, makarotika itxa kiki. ³⁶ Käkiti iuaãtaã tsorïkaãnta. Imisäkiretakakauana:

—ïkora kiki paposotiireri isákire. Itapararitika ipaniã-tari maerekati matamatakoti sini, ininiã nãkorape itxapena maerekani matamatakoni.

³⁷ Ininiã Xesosi pirena iua töpa iaripireta.

Xesosi Makanitaro Simão Petro Imakiro

(Mateo 8.14-17; Marko 1.29-34)

³⁸ Eereka Xesosi potorika aiko Xoteoakori apotiitiniã-taãua. Simão aapokomoni isa. Iuasaaki Simão imakiro iteene oãpoomata. Ininiã amanaãrina Xesosi oa erekape inïkitakini. ³⁹ Ininiã ipapïka oamoni:

—Nipaniãtari apoomari iotokini —itxa.

Ininiã apoomari iotoka. Iuasaakipeka oa õkitikaua, nipokori osikana ninoa.

Xesosi Makananitana Amianatakani

(Mateo 8.16-17; Marko 1.32-34)

⁴⁰ Atokatxi ereëkokaãpotapeka inakasaaki, kãkiti anikana amianatakani ikinipoko amianari auakini, Xesosimoni. Itakari iuako amianatakani nopini. Iuasaakipeka ninoa erekapeka itxana. ⁴¹ Omitikari maerekati matamatakoti kãkiti ãtoã auakari apaka. Osipikasaakina, akiripoakatana:

—Pite Teoso ãkiri pitxaua.

Ininiã Xesosi txitana ninoa. !Auiritaikana akiritinina, kotxi ninoa imarotari Teoso mereëkiti ininiãua Xesosi.

Xesosi Sãpiretari Erekaru Pirena

(Marko 1.35-39)

⁴² Katimatinĩkata Xesosi sari kãkiti mauakaniãtaã. Iuasaaki kãkiti nitanãtari iua. Apokasaakirina, amanaãrina Xesosi:

—Pikaikota atekata —itxarina.

⁴³ Txamari Xesosi txari:

—!Apakata uai nikaikotini, kotxi ãtiãtaã apaka nisãpiretariko erekaru pirena Teoso auĩtetxi ininiãua pirena. Ikinimanemoni ikara nisãpiretini ãkapanira, Teoso iokanatanu kãkitimoni.

⁴⁴ Ikara atoku ininiãra, isãpirenauata ikininape aiko ãki Xoteoakori apotiitiniãtaãua ikinipoko Xoteoakori tixine.

Merepitipanika Xesosi Moianariakori

(Mateo 4.18-22; Marko 1.16-20)

5 ãti õti Xesosi auanãta Xenesaree inakori poa tinikata. Xenesareetxikana Kariréia poa. Ipi iuãka aua. Iuasaaki kãkitipokoni ãkitari iua Teoso sãkire ikenakotinina ãkapani. Iukatapeka xãpoka itxana.

² Iuasaaki Xesosi atamatari ipi kanaua ioporoko. Kokatsãriti kanauate. Ninoa imiriĩ arokanãtari hetxi. ³ Xesosi iereëtaua Simão kanauate ãki:

—Pikatika pikanauate amaãtiki apanĩkakiã —itxa Simãomoni.

Eereka iitopãka kanaua ãki. Iuaãtaã isãpiretari Teoso sãkire kãkitimoni imiriĩ apotiitakanimoni.

⁴ Isãpirenauataka atoku itxari:

—Apanĩkakiã pimekota. Iuaãtaã pitakari hetxi kãuaãriã —Xesosi txari Simão.

⁵ Ininiã Simão:

—Koerekareri, hetxi atakapikama ãkanõka. Iteene aõkatsaãkatapiikama. Txamari na xatiki ximaki amaĩka. Kona ãtika amaĩka. Iuaritika pite paniãtiniãno, iuaritika nitakapititariko hetxi —itxa Simão.

⁶ Hetxi ninoa takasaaki kãuaãriã, ximakipokoni imaĩkana, ininiã hetxi tsorakiarita. ⁷ Ikara xika akiritana imoianariakori ãti kanauate ãki auakani:

—ãpina. Himoianataua ate. Hetxi tsorakiãpotanapanoka.

Ininiã ninoa ina. Ikinimane kosekari hetxi. Ximakipokoni. Ipi kanaua xãpoãkata ximakinoka. Ximaki

xika kanaua sakikaarita. ⁸ Simão Petro atamatakasaakiri ximakipokoni, ikapotoreëkãua Xesosi apisatoõ:

—!Pikaikotape nota takote, kotxi erekai pite.

Maerekati kamakarino nota —itxa.

⁹ Ikara atoku itxa Simão sãkire, kotxi iua, imoianariakori apaka tsorĩkaãta kaiãopokori ximaki ninoa maĩkakiti xika. ¹⁰ Simão moianariakori Txiaiko, Xoão pakini, ninoa apaka tsorĩkaãta. Txiaiko, Xoão pakini Sepeteo anaakori. Ininiã Xesosi txari Simão:

—!Pipĩkarauatape. !Pimaĩkaikari ximaki. ãtiãno piparĩka auako. Nisãkire pisãpiretako kãkitimoni —itxa.

¹¹ Eereka ninoa apokitaãka atoku, ikinika itiina itakanapana, Xesosikata sa itxana imiparĩkatinirina ãkapani.

Kiki Maere Matati

(Mateo 8.1-4; Marko 1.40-45)

¹² ãti õti Xesosi auanãta ãti sitatxitiã. Iuaã auakasãki, aua kiki maere matati. Atamatakasaakiri Xesosi, ikapotoreëkãua, iãka Xesosi apisatoõ. Iteene amanaãri Xesosi:

—Apiananiri, pinirekiniãri, piposotari nota ereka pitxĩkitakini —itxari.

¹³ Ininiã Xesosi maãtakari iua:

—Ari ninirekapitikari. Erekapekai —itxari.

Iuasaakipeka erekapeka itxa. ¹⁴ Ininiã Xesosi paniãtari:

—!Pisãpiretapiri apanakini ereka nitxĩkitakinii. Pisa sasetotximoni. Poerekari pĩto iuamoni, ininiãkara itxai: “Atãopitika erekapekai pite.” Eereka pisikari Teosomoni Moisesi paniãtakiti iaõka. Ikara atoku pikaminiã, ikinimane imarotari pite atão ereka pininiãua —itxa Xesosi.

¹⁵ Xesosi paniãtari iua apanakini imasãpiretakani, iuaritika Xesosi pirena apikomoni iaripireta. Ininiã kãkitipokoni sari iuamoni isãkire ikenakotinina ãkapani, amianari imaktxakini ãkapani. ¹⁶ Ininiãkara Xesosi itotapekari iuanoka isini kãkiti mauakaniãtaã Teosokata isãkirauatini ãkapani.

Matĩpokotakati Pirena

(Mateo 9.1-8; Marko 2.1-12)

¹⁷ ãti õti Xesosi sãpirenauata. Iua takote pariseoakori, kaiõkatsoparerini apaka topãkanãta. Ninoa Kariréia tãpakini, Xotéia tãpakini, Xerosareë sitatxitikini pakini. Iuasaaki Xesosi sãpirenauatakasaaki, Apiananiri sika-posotiiiretari Xesosi amianatakani erekapeka itxĩkitakini ãkapani.

¹⁸ Iuasaaki kikiakori apoka iuaã. Iminarina kiki matĩpokotakatinoka inakari. Isirimata nopini iminari-na. Inirekarina aapokotxi ãki ãroinina, Xesosi apisatoõ iua matĩpokotakati itakinina ãkapani. ¹⁹ Txamari !apakata ninoa ãroini, kotxi kãkitipokoni xãpoka. Ininiã ikanĩkana kanikoatxiã aapokotxi nopini. Imaktxakarina itano auakari kipatxi kai kamakori, eereka isikakaãpotarina iua matĩpokotakati isirimata nopini Xesosi manapi kãkiti sauaki. Xesosi apisatoõ apoka.

²⁰ Ininiã Xesosi imarotari ninoa auikiniri iua posotiire. Ininiã itxari matipokotakati:

—Namarite, pimaerekani makatxakapeëkaika.

²¹ Iuasaaki pariseoakori, kaiökatsoparerini pakini tsorikaãnäta. Äkixinireëna ninoa:

—Teosonokara posotari amaerekani imakatxakini. Maerekati Xesosi kama Teosomoni —itxana.

²² Xesosi imarotari ninoa xinikakiti äkixinireëna, ininiã Xesosi txana:

—!Erekari häkixinireë ikara hixinikakiti. ²³ Nitxari iua imaerekani nimakatxakini, txamari !himarotari imaerekani atão nimakatxakini. “Pökikikaua. Pitipokota,” nininiã, ininiã himarotari nisäkire atão ininiãua, kotxi hïtikari. Niposotiire imaerekani nimakatxakini ïkapani, niposotiire iua nökikikini ïkapanitxikana.

²⁴ Ininiã uatxaika noerekai hïte. Teoso iokanatano nota hïtari iaxitikirino ïkorapokoritimoni käkiti maerekani nimakatxakini ïkapani.

Ininiã ipaniãtari matipokotakati:

—Pökikikaua. Pisirimata pikoseka, sipe pitxa paapokomoni —itxari.

²⁵ Iuasaakipeka ökitikaua. Ikinimane käkiti okiãtäã ökitikaua. Ikosekari isirimata, sipe itxa aapokomoni. Isikasaaki ipoxokoniua.

—Peerekari Teoso —itxaãpota iua.

²⁶ Ikinimane käkiti tsorikaãta. Ipïkarauatana.

—Peerekari Teoso. Mitxi !ãitkari matipokotakati erekapeka txïkitaãkari. Peerekari uatxa aïtikakiti —itxanãtana ninoa.

Mateo Pirena

(Mateo 9.9-13; Marko 2.13-17)

²⁷ Eereka Xesosi tïpokoãponãtakasaaki, atamatari kiki Arevii inakori. Iitopãkanãta iparïkauatiniãtäã. Iuaã apakapari txineiro Homanoakori auïte paniãtakiti kãkiti ätiãtäã tiitxi anikini ïkapani. Xesosi akiritari Arevii:

—Äpina, uatxa nimoianari pitxaua —itxari.

²⁸ Iuasaakipeka Arevii ökitikaua. Ikinika itii itakanapa, Xesosikata sa itxa, Xesosi imiparïkatini ïkapani. ²⁹ Eereka Arevii kamari kiiniri aapokoã Xesosi ïkapani. Kiinirisaaki aua ïkamanere kaiöopokori. Txineiro apakapanani aua kiiniriã. Ninoa apanakinikata nipokota Xesosikata Arevii aapokoã. ³⁰ Pariseoakori, ninoakata parïkauatakani, kaiökatsoparerini pakini txitana Xesosi moianariakori, Xesosi txineiro apakapanikata nipokotini xika. Ininiã ninoa txari:

—Kinirepa hïte nipokota txineiro apakapanikata, maerekati kamakanikata? —itxana.

³¹ Xesosi apakapapiretana:

—Käkiti mamianatakani !inirekari pinïtxi siãkarimoni isinina. Amianatakarinoka nirekari pinïtxi siãkarimoni isini. ³² Iua atokokana, nota ina ïkorapokoriti kona kãkiti “Atão inakarino kamakarino” ïkapanini, kotxi ninoa uãkatari atão inakarino ikaminina, txamari !ikamarina atão. Käkiti maerekati kamakani ïkapanira nina nota uai imaerekani itakanapini ïkapani. Nota pinïtxi siãkari atoko inakarino nota —itxa Xesosi säkire iuasaaki.

Nipokori Takanapiko Teoso Misäkiretiko ïkapani

(Mateo 9.14-17; Marko 2.18-22)

³³ Käkiti txari Xesosi:

—Xoão kapatxisareri moianariakori itokata takanapari inikinina Teoso imisäkiretinina ïkapani. Iua atokotxikana itxa pariseoakori moianariakori. Txamari pite moianariakori !itakanapari nipokori, iãriã, Teoso imisäkiretinina ïkapani. Kinirepa? —itxana kãkiti.

³⁴ Ininiã Xesosi apakapapiretana:

—Kiki ïtaniriuatini pirenasaaki erekari atxiïti kemaïtxitakoni manikakaniãri nipokori? !Erekari. Ninoa poxokoniua imoianari ïtaniriuatini, ininiã inipokotapitikana. ³⁵ Txamari äti öti ninoa moianari maïkaãkako, oka inaãkako. Iuasaakiko ninoa takanapari inipokotini, kotxi imatinaniuatana. Iua atokotxikana nota. Nota auapanika nimoianariakorikata. Äti öti nokaãkako. Iuasaakiko ninoa takanapari inipokotini Teoso imisäkiretinina ïkapani —itxa Xesosi.

³⁶ Eereka Xesosi säpiretari säpirenatxi, atão inakari oerekiko.

—!Pikitsorãkitari mäkatxi amaneri, kitxakari pitãpanetini ïkapani. Ikara atoko pikaminiã, mäkatxi amaneri pioanata. Mäkatxi mata amaneri ïsapekata piotsainiã, mäkatxi kitxakari tsorakita iuaïkana. ³⁷ Käkiti kitakari ovaã sako aamata kamakori äki. Ovaã amanero auiniã, !otakaãka aamata kitxakari äki. Pitakiniãro aamata kitxakari äki, aamata tsorakita. Ovaã xikepoatamako. Sako !otxaika. ³⁸ Ovaã amanero pikitakako aamata amanero äki. ³⁹ Ovaã kitxakaro auiniã, käkiti !inirekaro amanero, kotxi: “Ovaã kitxakaro apiaerekata,” itxa.

Ikara atoko Xesosi txari kãkitimoni. Ikara säkiretxiti Xesosi säpireta, kotxi apanakini kãkiti itotapekari Moisesini säkire, Teoso säkire kitxakapirïka isäpiretakiti, ininiã !inirekari Xesosi säkire amaneri inakari. Ninoa mäkatxi kitxakari atoko. Sako kitxakari atoko ninoa. Ovaã kitxakaro atoko ninoa. Xesosi säkire mäkatxi amaneri atoko. Ovaã amanero atoko itxa Xesosi säkire.

Tomatiko Öti Pirena

(Mateo 12.1-8; Marko 2.23-28)

6 Xoteoakori tomatini ötisaaki Xesosi imoianariakorikata motipetari kiki takari triko auiniãtäã.

Ïpiripetakasaakirina, imoianariakori makatxakaãpotari triko oki. Iuakoã ikotxokarona, ixöka itxarona otãta katxakini ïkapani, okinoka nika itxana. ² Ätikaka pariseoakori itikana imakatxakirona:

—Kinirepa triko hïkotxoka tomatiko ötisaaki? !Auriãtäãka tomatiko ötisaaki parïkauatiko —itxana.

³ Ininiã Xesosi apakapapiretana:

—Himarotari Taviini kamakiti kitxakapirïka, iua imoianariakorikata natxitakasaaki. ⁴ Iua ïroã Teoso misäkiretikoãtäã. Iuasaaki imakatxakari komiri Teosomoni sikakori. Inikari, sika itxari imoianariakorimoni. Ninoa nikari apaka. Sasetotxinokara auiritaãka iua komiri inikinina. Apanakini !auritaãka inikiniri.

Iuaritika iua Taviini nikari. ⁵ Nota hītari iaxitikiri posotari ikinipoko ninireēkiti nikamini tomatiko ōtisaaki, kotxi Apiananiri nitxaua —Xesosi txana ninoa pariseoakori.

Motīkauakotakari Pirena
(Mateo 12.9-14; Marko 3.1-6)

⁶ Āti tomatiko ōtisaaki Xesosi ĭroā aiko āki Xoteoakori apotiitiniātaāua. Oerekarauata. Iuasaaki iuaātaā aua kiki iuako ikikomoni motīkauakotakari. ⁷ Kaiōkatso-parerini, pariseoakori apaka aua iuaā. Atamatapikarina Xesosi, atauako erekapeka itxīkitakapaniri motīkauakotakari tomatiko ōtisaaki. Inirekarina Xesosi kerokiniri. Tomatiko ōtisaaki iparīkauatiniā, ninoa apoūtari iua. ⁸ Xesosi imarotari ākixinireēna ixinikakitina, ininiā ipaniātari kiki motīkauakotakari:

—Pōkitikaua. Āpina ikinimane okiātaā.

Ininiā iua kiki ōkitikaua, sa itxa Xesosimoni. ⁹ Ininiā Xesosi pimaāna kaiōkatsoparerini, pariseoakori pakini:

—Natokopa itxa Moisesini paniātakiti iōkatsopatakiti tomatiko ōtisaaki atāo akamini? Ipaniātataua maerekati akamini tomatiko ōtisaaki? Ipaniātataua erekari akamini tomatiko ōtisaaki? Inirekatari amoianatiniri āti imapinakani ĭkapani tomatiko ōtisaaki? Inirekatari aōkaniuatini tomatiko ōtisaaki? —itxa Xesosi ninoamoni.

¹⁰ !Kasākirena ninoa kaiōkatsoparerini, pariseoakori pakini. Xesosi atamatana ikinimane.

—Piuako poerekata —itxari iua kiki.

Oerekatari iuako. Iuasaakipeka iuako erekapeka itxa.

¹¹ Pariseoakori, kaiōkatsoparerini pakini omanākarauata. Imisākiretakakauana Xesosi okinina ĭkapani.

Xesosi Mereēna Tosi Imoianariakori
(Mateo 10.1-4; Marko 3.13-19)

¹² Āti ōti Xesosi kanīka oxiratari nopini, Teoso imisākiretini ĭkapani. Īkanōka ikaikota iuaātaā Teosokata isākirauatini ĭkapani. ¹³ Katimatiniĭkata akiritana itomaneri imoianariakori iuamoni apokinina ĭkapani. Apokasaakina, imereēna kikiakori tosi pakini kākitimoni iokanatakini tīkane. ¹⁴ Imereēna

Simāoma, (Iuāka Petro apaka.)

Ātreema, (Simāo itari)

Txiakoma,

Xoāoma,

Piripima,

Patoromeoma,

¹⁵ Mateoma,

Tomeema,

Txiakoma, (Aopeo ākiri)

Simāoma, (Homano omanatakari)

¹⁶ Xotasima, (Txiako ākiri, āti Txiakoti)

Xotasi Isikariotxima (Xesosi mīkapiritakari tīkane) pakinima.

Ninoa kikiakori tosi pakini Xesosi mereēkini imoianariakori ĭkapani.

Xesosi Amianatakani Imakananitini
(Mateo 4.23-25)

¹⁷ Eereka oxiratari iokiriiāpotana. Ipitexitimoni apokana. Iuaā aua kaiōpokori imoianariakori. Apanakini kākiti iuaātaā aua apaka. Xotéia tōpa ĭkani, Xerosareē sitatxiti ĭkani pakini auari iuaā. Apaka auari Txiro sitatxiti ĭkani, Sitoō sitatxiti ĭkani apaka. Txiro, Sitoō pakini potxoari uiniti ĭtinikata aua. ¹⁸ Ninoa kākitipokoni sari Xesosimoni isākire ikenakotinina ĭkapani, amianarena imaktxakini ĭkapani. Ninoa maerekati matamatakoti auaĭtotakini sari Xesosimoni maerekati imaktxakini ĭkapani. ¹⁹ Ikinimane nirekari imaātakiniri Xesosi, kotxi imaātakiniārina, apakapari Xesosi tapara amianarena sini ĭkapani. Ininiā ikinimane amianatakani Xesosi maātakakani iuaĭkana erekape itxana.

Kirimonipa Teoso Sikatari Erekari?
(Mateo 5.1-12)

²⁰ Eereka Xesosi misākiretana imoianariakori: —Hīte matxineiroteni Teoso sikai erekari. Teoso hīauīte itxaua. Iua nakitiakori hītxaua.

²¹ —Hīte ĭkorapokoriti natxitakani Teoso sikai erekari. Himitouatapanikako.

—Hīte ĭkorapokoriti txiapatakani Teoso sikai erekari. Hāpiapoxokonitapanikako. Hīsiroatapanikako.

²² —Apanakini omanatiniāi hīte, hītari iaxitikiri sākire hāuikini xika, Teoso sikai erekari. Atxiīti apanakini !nirekai. Atxiīti apanakini misākirepiretai. Atxiīti ninoa akiritai “maerekati kamakari” nota hītari iaxitikiri sākire hāuikini xika. Ikara atoko hinaākako.

²³ —Ninoa misiriāpotakasaakii, hīpoxokoniatako. Himīteenekariko hīpoxokoniritika, kotxi erekari Teoso nīkatiniĭ iaxiti itixine. Inīkatakiti hīte ĭkapani peerekari. Apanakini misiritiniĭ atokokanera, ninoa atokiriakorini misiritari Teoso sākire sāpiretakani kitxakapirīka.

²⁴ —Hīte ĭkorapokoriti katxineiroterini misiritaākako. Mitxi papoxokonii hīte. Uatxa hīpoxokoni !auaika.

²⁵ —Hīte ĭkorapokoriti ikiniōtika mitouanātakanii misiritaākako. Hinatxitapanikako.

—Hīte ĭkorapokoriti siroatakanii misiritaākako. Himatinianuatapanikako. Hītxiapatapanikako.

²⁶ —Ikinimane: “Peerekai pite,” ininiā, himisiritāākako, kotxi ninoa nirimane kitxakapirīkarini sāpiretari ikara atoko inakari Teoso sākire atāo masāpiretanimoni —itxa Xesosi.

Kākiti Mokaiakari Tiretiko
(Mateo 5.38-48)

²⁷ Iuaĭkana Xesosi sāpirenauata:

—Nōtākikai hīte nisākire kenakotakanii. Hītiretanako himokaiakari. Erekari hīkaminana hīte omanatakani.

²⁸ Himisākiretariko Teoso erekari hīte misākirepiretakani isikini ĭkapani. Himisākiretariko Teoso hīte misiritakani ĭkapani. ²⁹ Kākiti aritiniāi pikakota, ipinimoni pikakota iuaĭkana pisikana. Kākiti anikiniāri pimāka ōtanominari, pauiritari iua pimāka kauanata

apaka anikini. ³⁰ Pitii amanaãkarimoni pisika inirekaki-ti. Kãkiti anikiniãri pitii, !pamanaãpiri iuaĩkana imikanapiriiniri. ³¹ Åti tiretinii pinirekini atokotxikana, pitiretari åti.

³² —Pite tirketakaninani pitiretiniã, kinirepa Teoso sikari erekari pitemoni, pinirimanenokara pitiretakasaaki? Kotxi kãkiti maerekati kamakani apaka tirtari ninoa tirketakani. ³³ Pimoianatiniãna pite moianatakaninani, !apakata, kotxi iua atokotxikana maerekati kamakari moianatana iua moianatakaninani. ³⁴ Pisikiniãro pitxineirote, pitxineirote mikanapiriãkarimoninani, !apakata, kotxi iua atokotxikana maerekati kamakani sikaro itxineirotena apanakini maerekati kamakanimoni åti õti iuaĩkana imikanapiriiniro !kapani. ³⁵ Iua atokokana na pitxape. Pitiretariko pimokaiakari. Erekari pikaminariko. Inirekiniãri pitii iparĩkauatini !kapani, pisika iuamoni. !Pimaãkapeua, pitii iuaĩkana imasikakaniãi. Iua atokokana hĩkaminiã, Teoso sikai hite iteene erekari. Iua atokokana hĩkaminiã, Apiananiri iaxitikiri anaakari hĩtxauako, kotxi iua amonĩkari kãkiti maerekati kamakani. Ninoa !isãpiretari Teoso iua ereka inini, iuaritika Teoso amonĩkana. ³⁶ Piamonĩkariko åti, aĩri Teoso amonĩkaruatini atokokana —itxa Xesosi.

Apoĩretxi Pirena

(Mateo 7.1-5)

³⁷ —!Papoĩtapiri åti. Papoĩtiniãri åti, ininiã pite apaka apoĩtaãkako. !Pisãpiretapiri åti ikamakiti maerekati inini, ininiãkara Teoso !isãpiretai pite pikamakiti maerekati inini. !Pixinikapinikari maerekati åti kamakiti pitemoni, ininiã Teoso !ixinikaikari maerekati pite kamakiti. ³⁸ Pisikarauatako åtimoni, ininiã Teoso sikarauata ito pitemoni. Kaiãopokori papakapa. Atarokiri arata åki takakori atokokana papakapa. Atarokiri iõkokakori, kaiãakakori kinapakopeka iuaĩkana atarokiri inopini takaãka. Xãpoãkata, ininiã katxapoaãpota. Iua atokotxikana Teoso sikai kaiãopokori, åtimoni pisikarauatiniã. Åtimoni pisikarauatini atokotxikana, Teoso sikarauata pitemoni —itxa Xesosi.

³⁹ Xesosi sãpiretari ia sãpirenatxi atão inakari oerekiko:

—Apakata åti mõsiãreti anikiniri åti mõsiãreti? !Apakata. Ninoa ipi irikako aariko åki. Ininiã nota sãkire himimarotakanisaaki, kona apakata hõerekiniri åti. Hõerekiniãri åti, hĩkerokari. Ninoa mõsiãreni aariko åki irikakani atoko hĩtxa. ⁴⁰ Apaiaõkarauatakari !imarotari koerekareri imarotakiti atoko. Poiãonoka imarota. Apaiaõkaruatini ixipokasaaki, iusaaki koerekareri imarotakiti atoko imarotape.

⁴¹ —Pisãpiretari åti: “Aãsorõ aua poki åki,” txamari kona pimaãkatari aãtxirata pite oki åki auakari. Kinirepa ikara atoko inakari pikama? ⁴² Kinirepa pitxari pitari? “Nitari, nota makatxakinii aãsorõ pokiã auakari,” kotxi !piposotari patamatiniri aãtxirata piteka pokiã auakari. Pisãkire atxiiti erekari, txamari pikamakiti kona erekari. Merepitipanika pimakatxakari aãtxirata piteka pokiã auakari. Eereka piposotari patamatiniri

aãsorõ pitari okiã auakari pimakatxakini. Maerekati pite kamakiti apiata atxiiti iua aãtxirata atoko. Maerekati åti kamakiti poiãoka atxiiti iua aãsorõ atoko. Iuaritika !pimaãkatari maerekati piteka kamakiti. Põtãkikari åti imaerekani itakanapini. Ikara atoko !apakata. Merepitipanika pite takanapariko pite maerekani, eereka põtãkikari åti imaerekani itakanapini —itxa Xesosi sãkire.

Amãtiiri Pirena

(Mateo 7.15-20; 12.33-35)

⁴³ —Amãtiiri erekari kona iritari matximakoti. Amãtiiri matximakoti kona iritari erekari. ⁴⁴ Patamatiniãri amãtiiri, pimarotari imina. Txipokori piko inakoro pinirekiniã, kona pisa inakomoni. Ova pinirekiniã, kona pisa inakomoni. ⁴⁵ Kãkiti erekari amãtiiri erekari atokokana itxa. Iua erekari, ininiã ekerarinoka ikama, kotxi iua åkixinireẽ ekerarinoka aua. Kãkiti maerekati amãtiiri matximakoti atoko itxa. Iua maerekati, ininiã ikamakiti maerekati apaka, kotxi maerekatinoka auari iua åkixinireẽ. Iua åkixinire ereka, ininiã isãkire ereka apaka. Iua åkixinire maerekati, ininiã isãkire maerekati apaka, kotxi isãkire potorika åkixinireẽ —itxa Xesosi sãkire.

Aapokotxi Kamakari

(Mateo 7.24-27)

⁴⁶ Xesosi sãkirauatapanika:

—Kinirepa pakiritano nota “Apiananiri,” nipaniãtakiti pimakamakanisaaki? ⁴⁷ Kãkiti notamoni !kari, nisãkire kenakotakari, nisãkire kĩpitakari, aapokotxi kamakari atoko itxa. ⁴⁸ Iua kamari aapokotxi. Iksakari kipatxi. Otsomori aapoko tsota ikama. Iua apokari kai, ininiã iopitĩkari aapoko tsota iua kai nopini. Ininiã aapokotxi ikamakiti paikori. Åparaã apoãtakasaaki, itorõkani inokasaakiri iua aapoko, !iakeka, kotxi iua kiki atão ikamari aapoko. Iua kiki atoko kãkiti nisãkire kĩpitakari.

⁴⁹ —Åti kiki aapokotxi kamakari, iua iopitĩkari aapoko tsota motsomotika popaiape ininiãtaã. Åparaã apoãtakasaaki, itorõkani inokasaakiri iua aapoko pakitika. Xipoka itxa. Iua kiki atoko kãkiti nisãkire kenakotakari, nisãkire mauĩãkati —itxa Xesosi.

Xesosi Makananitiniri Sotato Auĩte Nitiri

(Mateo 8.5-13)

7 Ikara sãkiretxiti isãpiretaka atoko, Kapanaoõ sitatxitimoni isa Xesosi. Iuaãtaã apoka. ² Kapanaoõ auari kiki åti uãka Homano inakori. Sotatoakori auĩte itxaua iua Homano. Ipaniãtana sotatoakori seĩ pakini inireẽkiti ikaminina. Xesosi apokasaaki Kapanaoõ, iua Homano nitiri iteene itiretakiti amianata. Ipinanapanoka.

³ Iua Homano kenakopiretari Xesosi. Ininiã ipaniãtari Xoteoakori kiomãtxiakori Xesosimoni isinina.

—Hĩtxariko: “Homano nirekai iuamoni pisini, initiri pimakananitiniri !kapani.”

⁴ Ininiã ninoa sa itxana Xesosimoni, aõkita itxarina.

—Masa sotatoakori auñtemoni. Initiri amianata. Masa, pimakananitiniri ïkapani. Iua Homano erekari itxaua, ininiã erekapitkari pimoianatiniri iua. ⁵ Itiretari Xoteoakori. Aiko aãpotiitiniãtaãua ikaminaua ate, ininiã iua Homano erekari itxaua —itxana ninoa.

⁶ Ininiã Xesosi sari ninoakata. Iua Homano aapoko takote apokasaaki, iua Homano iokanatari imoianariakori Xesosimoni, isãpiretinirina ïkapani:

—Apiananiri, apikomoni !pisipe, kotxi minakati nota. Pite Apiananiri txaua. Nota apakapiniãi naapoko äki !apakata. ⁷ Nota pitemoni napokini !apakata, kotxi pite Apiananiri, nota poiãori. Ininiãkara ereë pïotoka.

Ereëkarako pitxïkitakariko ninitiri ereka inini. ⁸ Nota auñte paniãtiniãno nota ipaniãtakiti nikamini ïkapani, ininiã nikamapitkariko. Nota auñtetxi nitxaua apaka. Nota paniãtakiti sotatoakori kamapitika. Äti nipaniãta: “Pisa,” ininiã iua sa. Äti nipaniãta: “Uai pina,” ininiã iua ina. Ninitiri nipaniãta: “Ia pikama,” ininiã iua kamari. Ininiã nimarotari ereë pite paniãtiniãri ninitiri ereka inini, ereëkarako erekapeka pitxïkitakari ninitiri —itxa Homano säkire Xesosimoni.

⁹ Iua Homano säkire ikenakotakasaaki, Xesosi tsorïkaãta. Isapotorika, misäkireta itxana kãkiti iuakata sikani.

—Iua Homano iteene auikari nisäkire. Peerekari. Mitxi !naõkitari nisäkire auiaãkari iua Homano atoko inakari. Na naõkitapanikari Xoteo iua Homano atoko inakari —itxa.

¹⁰ Eereka ninoa Homano iokanatakini kanapiriã Homano aapokomoni. Iuaã apokasaakina, atamatari-na Homano nitiri. Erekapeka itxa.

Xesosi Txïkitakari Ipïkari Iuaïkana Auãki Inini

¹¹ Mapaõti napaãka atoko Xesosi sari Naiï sitatxiti-moni. Imoianariakori, kãkitipokoni apaka sari iuakata.

¹² Iimatokoãpotakasaakiri sitatxi pirikere tore kãkiti ïronakikoãtaã, ipïkari imipokïkaãka sitatxi mapara. Sito imatonõkari oimi ipïpe. Oa sito tikinitakoro.

Kaiãopokori kãkiti sitatxi auakani pokïka oakata sikani.

¹³ Apiananiri atamatakasaakiro, iamoniãkaro oa, ininiã: —!Pitxiapatape —itxaro.

¹⁴ Isa ipïkarimoni. Imaãtakari ipïkari auini kaixati, ininiã iua kaixa anikakani iotoka. Iuasaaki iua akiritari: —Ätokori, nipaniãtai põkitikaua —itxa Xesosi.

¹⁵ Iuasaakipeka iua ätokori topãka, säkirauata itxa. Ininiã Xesosi sikari iua inoromoni.

¹⁶ Ikinimane pïkarauata.

—Peerekari Teoso. Teoso iokanatari isäkire säpiretakari apiatakari atemoni. Teoso apokapeka ïkorapokoriti ate inakitiakori imoianatini ïkapani —itxanãtana ninoa.

¹⁷ Ia Xesosi pïrena iaripireta ikini tõpati Xotëia tõpa. Apaka apikoxiti Xesosi pïrena kenakopiretaãka.

Xoão Kapatxisareri Pimaãkiti Säkiretxiti

(Mateo 11.2-19)

¹⁸ Xoão kapatxisareri moianariakori minapiretari Xesosi pïrena Xoãomoni. Eereka Xoão akiritari imoianariakori ipi:

¹⁹ —Hïsa Xesosimoni. Hïpimaãri: “Teoso mereëkitikai pite? Kãkiti iãtapanãtakitikai pite? Kãkiti iãtapanãtakiti ätikani atxïiti?” Ikara atoko hïtxako Xesosimoni —Xoão txana ninoa.

²⁰ Ininiã ninoa ipi sari Xesosimoni. Iuamoni apoka itxana.

—Xoão kapatxisareri iokanataua ate pitemoni. Ipi-maãri: “Teoso mereëkitikai pite? Kãkiti iãtapanãtakitikai pite? Kãkiti iãtapanãtakiti ätikani atxïiti?” itxai —itxana.

²¹ Iuasaaki ninoa Xesosimoni apokasaaki, amianatakani kaiãopoko erekapeka itxïkitaka Xesosi. Iua omitikari maerekani matamatakoni kãkiti ïtotaã auakani. Mõsiãreni kõsiãrepeka itxïkitaka. ²² Ininiã Xesosi apakapapiretana Xoão moianariakori:

—Hïkanapiriã Xoãomoni. Hïsapiretari mixikanani uai hïtikakiti, hïkenakotakiti pakini. Hïsapiretari mitxi mõsiãreni uatxa kõsiãrepeka nitxïkitakapeka. Hïsapiretari mitxi matïpokotakani tïpokotapeka uatxa. Mitxi maere matati erekapeka uatxa. Mitxi makenakokini uatxa kakenakokipeka. Mitxi ipïkani iuaïkana auãki itxapekana. Hïsapiretari Xoão, nota säpiretari Teoso iokanapirena erekari minakati mauakinimoni. ²³ Kãkiti iteene auikiniãri nota säkire, Teoso takari erekari iuamoni. Ikara nisäkire hïsapiretari Xoão —itxa Xesosi.

Xoão Kapatxisareri Pïrena

²⁴ Ininiã ninoa Xoão moianariakori sipe. Eereka Xesosi säpiretari Xoão pïrena kãkiti iuamoni apotiitakani-ua.

—Kipa ïkai hïte Xoão kapatxisarerimoni hïsikasaaki äparaã makipakaniãtaã iua auakasaaki? Hïte sari iuamoni, kotxi isäkire ätinoka, Teoso säkirenoka. Kãkiti katsotati ïtima anikakiti atoko itxa. Isäkire kita äti, isäkire uatxa ätião, isäkire katana iuaïkana ätião, itxaãpota isäkire. Ikara atoko !itxa Xoão. ²⁵ Kipa ïkai hïte Xoãomoni hïsikasaaki? Hïte sari iuamoni, kotxi !inirekari tiitxi, txineiro pakini. !Kakaroneri imãka, kotxi !ikaikota auñtetxi aapoko. Auñtetxi auiniãtaã kãkiti mãka peereri. ²⁶ Kipa ïkai hïte iuamoni hïsikasaaki? Hïte sari iuamoni, kotxi iua Teoso säkire säpiretakari itxaua. Atão inakari Teoso säkire säpiretakari itxaua. Apiata iua Xoão. ²⁷ Apiata iua, kotxi kitxakapiriãka Teoso säkire iõkatsopatakori säpiretapekari Xoão pïrena:

Ia kiki nisäkire säpiretakari. Niokanatari iua kãkiti-moni, pite nimereëkiti sini apisa, papokini isãpiretini ïkapani, kãkiti iposope inini ïkapani, itxa Teoso säkire iõkatsopatakori.

²⁸ Iuaïkana Xesosi txana kãkiti:

—Atão nisãpiretai, äti Xoão atoko inakari lauari. Xoão apiata. Iuaritika kãkiti Teoso auñtetakari poiãori inakari apia imarotariko Teoso kamakiti tïkane —itxa Xesosi.

²⁹ Ikinimane kākiti, txineiro apakapakani apaka kenakotakasaakiri Xesosi sākire, imarotarina Teoso nireēkiti kākiti kamini ĩkapani atāo inini, kotxi ninoa sari Xoāomoni ipatxisatikona ĩkapani. ³⁰ Txamari pariseoakori, Teoso paniātakiti oerekakani pakini ĩnirekari Xoāo patxisatinina ninoa, ininiākara Teoso nireēkiti iaōka ĩnirekana ikaminina.

Kākiti ĩkorasaaki Auakani

³¹ Xesosi sāpirenauatapanika:

—Kiātokopa itxana kākiti ĩkorasaaki auakani?

³² Amarini sarauatini atoko itxana ĩkorasaaki auakani. Ninoa amarini topākanāta tiitxi amotikoāta. Ipixini amarini tsoanāta. Itxana apanakinimoni: “Ate xikarau-ata hĭte serenini ĩkapani, txamari !hĭserena. Kākiti ipĭkasaaki xikariti axikareta, txamari !hĭtxiapata.” Ninoa amarini sarauatini atoko itxana ĩkorasaaki auakani, ³³ kotxi Xoāo kapatxisarereri apoka ĩkorapokoriti. Itakanapari inikini Teoso imisākiretini ĩkapani. !Īātari ovaā. Iuaritika hĭte txari: “Maerekati matamatakoti auaitotari Xoāo,” hĭtxari. ³⁴ Nota hĭtari iaxitiki apoka ĩkorapokoriti. !Nitakanapari ninikini. Ikiniōtika ninipokota. Niātari ovaā. Ininiā hĭte txari: “Iua kiki ixori. Poātakari iua. Iua moianatana txineiro apakapakani, kākiti maerekati kamakani,” himisākireporetano. ³⁵ Paimatireri Teoso. Iua nakitiakori imarotari isākire atāo ininiua —itxa Xesosi.

Sito Arokari Xesosi Kiti Oātsaā

³⁶ Āti ōti pariseo Simāo inakori aiataro Xesosi inipokotini iuakata, ininiā Xesosi sari iua aapoko. Iuaā apoka atoko iitopāka inipokotini ĩkapani. ³⁷ Simāo auini sitatxiti oāua sito kanokarero. Oa kenakopiretari Xesosi iua pariseo aapoko inipokotini, ininiā oa anikaro kamar- iāro iuamoni. Kopitipaki kai arapástiro kamakori āki oāua kamar- iāro. Xāpoka. ³⁸ Otima Xesosi kiti takote. Otxiapanāta. Oātsaā oārokari ikiti. Okaxipokari oiākoā. Ikiti oāpitxoka. Eereka okitakari kamar- iāro ikiti nopini.

³⁹ Iua Simāo atamatakasaakiro Xesosi kiti oārokini, ākixinireē ixinikari:

—Xesosi atāo Teoso sākire sāpiretakari inaākamako, imarotamaroko oa sito iua maātakakaro. Imarotamaroko maerekati kamakaro oa —itxa ākixinireē.

⁴⁰ Ininiā Xesosi:

—Simāo, ninirekari nimisākiretinii —itxa.

—Ei, koerekareri, pisākirauata —itxa Simāo.

⁴¹ Ininiā Xesosi:

—Ipi kiki apakapari txineiro sikakari txineirote. Imikanapiriāpanikaroko txineiro isikakito. Āti apakapari isikakito txineiro kaiāopokoro, kiētosi txineirota. Ātipekana apakapari isikakito poiāonoka, sĭkoēta txineirota. ⁴² Ninoa ipi !iposotaikarina iuaĭkana txineiro isikinirina txineiro sikakarimoni, kotxi !oāuaika. Iuaritika iua xipokari ninoa kōtane. !Inirekaikaro itxineirote. Ininiākara ĩkiripa ninoa kiki ipi apia apokaerekatari iua txineiro sikakari? —Xesosi pimaāri Simāo.

⁴³ Ininiā Simāo:

—Niuākatari kiētosi txineirota apakapakari. Iua apia apokaerekatari txineiro sikakari, kotxi iua apakaparo kaiāopokoro txineiro —itxa.

—Iuapitikara —itxa Xesosi.

⁴⁴ Iuasaaki Xesosi sapotorika sitomoni. Itxari Simāomoni:

—Patamatataro oia sito? Niōroā pite aapoko, txamari kona pite sikano āparaā nikiti narokini ĩkapani. Oia arokapekari nikiti oātsaā. Oiākoā okaxipokari. ⁴⁵ Uai napokasaaki kona pite apitxokano. Oia ĩotoka nikiti oāpitxokini. ⁴⁶ Pite na takari ĩtxi nikiiā. Oia kitakari kamar- iāro nikitiā. ⁴⁷ Oia iteene turetano, ininiā aimarotari omaerekani kaiāopokori makatxakaākapeka. Kākiti poiāonoka turetakasaakino, aimarotari imaerekani poiāo inakari makatxakaākapeka —itxa Xesosi.

⁴⁸ Iuasaaki Xesosi sāpiretaro:

—Nimakatxakapekari pimaerekani —itxaro oa sito.

⁴⁹ Xesosikata nipokonātakani ākixinireēna ixinikanā- tarina:

—Kiripitipa ia kiki atxĭiti? Iua makatxakatari kākiti maerekani? —itxanātana ninoa.

⁵⁰ Iuasaaki Xesosi txaro oa sito:

—Atāo pauikari nisākire, ininiākara pimaerekani makatxakaākapeka. Pispiniikaua erekaxinirepeka pini- ni —itxaro oa.

Sitoākini Xesosi Moianatakani

8 Mapaōti napaāka atoko Xesosi sari āti sitatxitimoni, ininiā eereka āti sitatxitimoni isa, itxaāpota. Isāpiretari erekari pirena Teoso auĭtetxi ininiāua. Imoianariakori tosi pakini sari iuakata. ² Sitoakoro apaka sari iuakata. Mitxipe Xesosi erekapeka txĭkitakana ninoa sito. Mitxipe ātikaka amianata. Mitxipe maerekati matamatakoti auaitotana ātikaka. Maria Matarena inakoro sari iuakata. Mitxipe Xesosi omi- tikana maerekani matamatakoni setxi pakini oĭtoā auakani. ³ Xoana inakoro, Kosa inakori tanoro, oa apaka sari Xesosikata. Kosa parĭkauata auĭtetxi Erotxi in- akorikata. Erotxi paniātakiti ikama. Sosana inakoro apaka sari Xesosikata. Apanakini sitoakoro apaka sari iuakata. Ninoa sikari itxineirotena Xesosimoni, imoianariakori pakinimoni nipokori iamotinina ĩkapani.

Katarereri Pirena

(Mateo 13.1-9; Marko 4.1-9)

⁴ Kākitipokoni apokaāpota Xesosimoni, āti sitatxitikini, iuaĭkana āti sitatxitikini, iuaĭkana āti sitatxitikini tx- aāpota apokinina Xesosimoni. Kākitipokoni apoti- itakasaakia Xesosikata, Xesosi sāpiretana ninoa sāpirenatxi atāo inakari oerekiko.

⁵ —Kiki sari ikikiote itakarauatini ĩkapani. Triko oki itaka. Okaāpotari. Okaāpotakasaakiro, kimaporiā apaka oāpoka oki okakiti. Eereka oki katxarataāka. Apanakini kotipiriki nika. ⁶ Oki apoka kai nopini. Kai auiniātaā kipatxi poiāonoka auari. Eereka ipitxaka, txamari pitxakakaro kotsa imiti masakianiā, āparaā mauakaniā, opina. ⁷ Triko oki apoka inako sauaki apaka. Eereka inako aneē takarikata, txamari inako matx-

erotakaro takari, ininiã opina. ⁸ Oki apoka kipatxi erekari nopini apaka. Eereka takari pitxaka, aneë otxa. Eereka ominaua kaiãopokori. Triko katiã seï oki aua.

Xesosi sãkirauata uiaïkana:

—Kakenakokii, ininiã hïkenakotariko nisãkire —itxa Xesosi.

Kãkiti Mimarotakiniti Xesosi Sãpiretini Pirena

(Mateo 13.10-23; Marko 4.10-20)

⁹ Xesosi moianariakori pimaãri iua:

—Poerekaua ikara sãpirenatxi atão inakari oerekiko pisãpiretakiti. !Aimarotari mixikanani pisãpiretakiti.

¹⁰ Ininiã Xesosi:

—Nisãpiretapitikaiko hïte Teoso auïtetxi ininiãua, ininiã hïte imarotari. Apanakini !imarotari hïte imarotakiti Teoso auïtetxi ininiãua. Ninoa apanakinimoni nisãpiretari sãpirenatxi atão inakari oerekiko. Ninoa kenakotari, txamari !imarotarina nisãpiretakiti sãkiretxiti, kotxi kitxakapiriïka Teoso sãkire sãpiretakani sãpiretari:

Kokiri kãkiti, txamari !atamatari Teoso kamakiti. Karokokenakokiri kãkiti, txamari !ikenakotari Teoso sãkire.

¹¹ —Noerekai hïte ikara sãpirenatxi atão inakari oerekiko, kiki takarauatini pirena. Triko oki atoko itxa Teoso sãkire.

¹² Apanakini kãkiti kimapori atoko itxa. Ninoa kenakotari Teoso sãkire, kimapori nopini oki apokini atoko itxa. Txamari Satanasi apoka kotipiriki apokini atoko. Imaktxakari Teoso sãkire ãkixinireëna apokakari, ininiã ninoa !auikaikari Teoso sãkire, ininiã Teoso !imaktxakari ninoa maerekani.

¹³ —Apanakini kãkiti kai auiniãtaã atoko itxa. Ninoa kenakotari Teoso sãkire, ininiã ipotxitarina. Txamari oki kipatxi poião nopini apokini atoko, Teoso sãkire !ïroã ninoa ãkixinireë. Mapa kasiriti ninoa aukari Teoso sãkire atxiïti. Eereka imisiritaãkana Teoso sãkire auikinina xika, ininiã itakanaparina Teoso sãkire.

¹⁴ —Apanakini kãkiti inako auiniãtaã atoko itxa. Ninoa kenakotari Teoso sãkire. Eereka ninoa maerekaxinirenoka itxana. Inirekarina txineiro, tiitxi pakini. Inirekarina isarauatinina. Inako atoko itxa txineiro, tiitxi, isarauatinina, maerekaxinirenoka ininina pakini. Ininiã !ixinikaikarina Teoso. Oki inako sauaki pitxakakaro !ominaua. Iua atokokana, ninoa kãkiti !ikamari erekari Teoso !kapani.

¹⁵ —Apanakini kãkiti kipatxi erekari atoko itxa. Ninoa kenakotari Teoso sãkire. Teoso sãkire !ïroã ninoa ãkixinireë ikaikotini !kapani. Erekari ninoa ãkixinire. Ninoa nirekari Teoso paniãtakiti ikaminina ikiniõtika. Eereka ninoa kamapitikari erekari Teoso !kapani.

Tirikapi Pirena

(Marko 4.21-25)

¹⁶ —Tirikapi iopotokaãkari iomaãtatari tirikapi kopiti ãki atxiïti? Isïkatatxi patapi itakatari atxiïti? Konapitini. Itano itakari tirikapi, ininiã iopinikari aapokotxi ãki !ïroãkani atamarauatini !kapani. ¹⁷ Ikinika iomaãtakori

atamataãkako. Ikinika ipatakori apokaãkako, iopinikaremoni anikaãkako.

¹⁸ —Erepaniko. Iteene pikenakotariko Teoso sãkire, kotxi isãkire auakiti, Teoso sãkire kïpitakari, Teoso sikari apikomoni imaroretxi iuamoni. Txamari Teoso sãkire kenakotakari, isãkire makïpitakati, imarore xapiti iuamoni auakari makatxakaãkako —itxa Xesosi.

Xesosi Inoro, Itariakori Pakini

(Mateo 12.46; Marko 3.31-35)

¹⁹ Xesosi sãpirenauanãtakasaaki, inoro, itariakori pakini apoka iuaãtaã. Inirekamarina Xesosimoni apokinina, txamari kãkitipokoni ãkitari iua. ²⁰ Iuasaaki kãkiti txari Xesosi:

—Pinoro, pitariakori porikiti auanãta. Inirekarina imisãkiretinii —itxana.

²¹ Ininiã Xesosi sãpiretari ikinimane:

—Teoso sãkire kenakotakani, isãkire kïpitakani, inoro atoko itxauana. Nitariakori atoko itxauana —itxa Xesosi.

Xesosi Iotokakiniri !tïma

(Mateo 8.23-27; Marko 4.35-41)

²² !ti õti Xesosi iereëtaua kanaua ãki imoianariakorikata. Aiatana:

—Masa ipoa ipiniã —itxana imoianariakori.

Ininiã !piriãtana. ²³ !piriãtakasaakina, Xesosi imaka. Mokatanitika !tïma inataparata. Kataparari !tïma apokasaaki, tsakati kataparari apaka, ininiã ierepeëpokataua. Iuasaaki kanaua ãki ãparaã xãpokaãpokata. Pamonoãkoniri. ²⁴ Xesosi moianariakori õpiriãkari.

—Apiananiri, Apiananiri, pimereka. Apinanapanoka.

Ininiã Xesosi õkitikaua. Ipaniãtari !tïma, tsakati pakini iotokini:

—Hïotokako —itxa.

Iuasaakipeka !tïma, tsakati pakini iotoka. Itsoriãkaãta.

²⁵ Iuasaaki Xesosi txari imoianariakori:

—Kinirepa hïte lauikano nota?

Itsoriãkaãkatana, ipïkarauakatana. Ninoakakarika isãkirauatana:

—Kinakaripa ia kiki? Iua paniãtari !tïma, tsakati pakini iotokini, ininiã ninoa kïpitari isãkire —itxakakana.

Kiki Maerekani Matamatakoni Auaïtotakiti

(Mateo 8.28-34; Marko 5.1-20)

²⁶ Eereka ipoa ipiniã apokana Xesosi imoianariakorikata. Ninoa potarikiniãtaã Karirëia tãpa. Ninoa apokiniãtaã Xerasa tãpa. ²⁷ Xesosi kanikïitakasaaki, kiki apoka iuamoni. Xerasa sitatxitikiri iua. Maerekani matamatakoni auaïtotari iua. Okananipe !itakaikari imãka. !nirekari aapoko ãki ikaikotini. Akuariã auanãta. ²⁸ Atamatakasaakiri Xesosi, akiripoakata. Iriãkata Xesosi apisatoõ. Maerekati matamatakoti akiritari Xesosi:

—Xesosi, Teoso ãkiri, Apiananiri ãkiri, kiatokopa pitxanoko? Namanaãi !pimisiritapeno —itxa.

²⁹ Ikara atoko itxa isákire, kotxi Xesosi paniātana maerekani matamatakoni takanapiniri iua kiki. Mitxi inirimane iitxikapiimari iito imasikani ikapani. Iitxikarina iuako, ikiti kohētxiā. Txamari maerekati matamatakoti itotapekari imaikiniri, ininiā iua kiki kapatakari kohētxi. Maerekati matamatakoti txikitakari iua kiki mitekini kākiti mauakaniātaā.

³⁰ Xesosi aōkitakasaakiri iua kiki, ipimaāri:

—Kipa piuāka?

Ininiā maerekati matamatakoti txari:

—Nota uāka "Itori," ninaāka —itxa.

Ikara atoko iuāka, kotxi itori maerekani matamatakoni auāitotari iua kiki. ³¹ Maerekati matamatakoti amanaāri Xesosi:

—Aariko mamapotōkire irikotimoni !piokanatapeua ate —itxa.

³² Iuaātaā auari kaiāopokori irariakori piratakoni. Inipokonātana oxiratarari nopini. Maerekati matamatakoni amanaāri Xesosi:

—Pauritaua irariakori āki aīroini —itxana.

Ininiā Xesosi auiritana. ³³ Ininiā ninoa takanapari iua kiki. Irariakori iito āki iroāna. Iuasaakipeka ikinika irari miteēkata. Iokiriīkatana oxiratarari. Kāuaāriāmoni iko-moākatana, ipīpe itxana irariakori.

³⁴ Kikiakori irari piratakoni itikari irari mitekini, ininiā imitekana sitatximoni. Anikapiretarina itikakitina sitatxi auakanimoni, sitatxi mapara auakanimoni apaka.

³⁵ Ininiākara kākiti sari Xesosimoni ikamakiti imarotini-na ikapani. Ninoa apoka iuamoni. Atamatarina iua kiki mitxi maerekani matamatakoni auāitotakiti.

Iitopākanāta Xesosi apisatoō. Kamākapekari. Kīikitepekari apaka. Ininiā iuasaaki ninoa kākiti pīkari Xesosi posotiire. ³⁶ Xesosi kamakiti itikakani sāpiretari ninoa kākiti, Xesosi erekapeka itxikitakiniri iua kiki. ³⁷ Eereka ikinimane kākiti Xerasa tōpa auakani paniātari Xesosi ātiātaā isini ipīkarena xika. Ininiā Xesosi iereētaua kanaua āki ipoa iuaīkana ipiriātini ikapani. ³⁸ Iua kiki mitxi maerekani matamatakoni auāitotakiti amanaāri Xesosi:

—Pauritano pitekata nisini.

Txamari Xesosi iokanatarari aapokomoni.

³⁹ —Pikanapiriā paapokomoni. Pisāpiretari kākiti Teoso kamakiti pitemoni —itxa Xesosi.

Ininiā iua sari ikini aapokotxitimoni. Isāpiretari ikini-mane kākiti Xesosi kaminiri iua erekapeka inini.

Xáiro Amanaākiti Pirena

(Mateo 9.18-19; Marko 5.25-34)

⁴⁰ Xesosi kanapiripe, ipoa ipiriātini. Apokitakasaaki, kākitypokoni apakapari Xesosi ipoxokoniritikana. Ninoa iātapanātari iua, ipiniā iua auakasaaki. ⁴¹ Iuasaaki kiki Xáiro inakori apoka iuaā. Iua auītetxi itxaua aiko Xoteo apotiitiniātaāua. Apoka Xesosimoni. Ikapotoreēkaua Xesosi apisatoō.

—Masa naapoko. ⁴² Nota ākero imatonōkaro, tosi ano auakaro, opinanapanoka —itxari Xesosi.

Iuakata Xesosi sikasaaki, kākitypokoni ākitari iua, ininiā ikaiarikaāpotana kākiti.

Xesosi Māka Maātakakaro

(Mateo 9.20-22; Marko 5.25-34)

⁴³ Kākiti sauaki oāua sito amianatakaro. Tosi ano oamianata oārēka !iotokinaro. Otxineirote !auaika, kotxi okinika otxineiroteē oīkitxitapekari pinītxi siākani, txamari erekapeka otxikitakakiri !auari. ⁴⁴ Kākiti sauaki oāpoka Xesosi porikimoni. Omaātakari imāka mapotomatare. Omaātakasaakipeka, oārēka iotoka.

⁴⁵ Ininiā Xesosi pimaāri kākiti:

—Kipa maātakano?

Ikinimane kākiti:

—!Ateni —itxana.

Ininiā Petro:

—Apiananiri, kākitypokoni ākitai. Ikinimane kākiti tikakai.

⁴⁶ Txamari Xesosi:

—Kākiti maātakapitikano, kotxi iuasaaki nitapara sari iuamoni.

⁴⁷ Iuasaaki oa sito imarotari Xesosi imarotiniro oa maātakiniri. Ininiā osa Xesosimoni otitinanakiniritika. Okapotoreēkaua iua apisatoō. Ikinimane okiātaā osāpiretari Xesosi:

—Notara maātakai namianatiniā. Nimaātakasaakii, iuasaakipeka erekapekano —otxari.

⁴⁸ Ininiā Xesosi:

—Namarite, pauikari niposotiire, ininiākara erekapekai. Pisipiniikaua erekaxinirepeka pinini —itxaro.

Xáiro Ákero Ōkitikiko

(Mateo 9.23-26; Marko 5.35-43)

⁴⁹ Xesosi sākirauanātakasaaki, Xáiro aapoko portoriākari apoka Xáiromoni.

—Pamarite !oāuaika. Pauritari Xesosi kanapiriini —itxa.

⁵⁰ Xesosi kenakotari iminapiretakiti, ininiā Xesosi txari:

—!Pipīkarauatape. Pauikari nisákire, ininiā iuaīkana oāuapanikako pamarite —Xesosi txari Xáiro.

⁵¹ Xesosi apokasaaki Xáiro aapoko, auiritana Petro, Xoō, Txiako, Xáiro, Xáiro itanoro pakini iroini iuakata.

⁵² Iuaātaā ikinimane kākiti txiapanāta. Imatinaniu-atana amarini ipinini xika. Ininiā Xesosi:

—!Hītxiapatape. !Opina. Oimakanāta —itxa.

⁵³ Ininiā ninoa napetari Xesosi, kotxi imarotarina amarini ipinini. ⁵⁴ Ininiā Xesosi paniātana ninoa porikiti ipokīkinina. Eereka Xesosi māikaro oa ātokoro uako, akirita itxaro:

—Ātokoro, pōkitikaua.

⁵⁵ Iuasaakipeka iuaīkana oa auākipeka otxa. Oōkitikaua. Xesosi paniātana oīri, onoro pakini nipokori isikinirona. ⁵⁶ Oīri, onoro pakini tsoriākaāta. Xesosi sāpiretana apanakini imasāpiretakanina ikapani.

Xesosi Iokanatanana Imoianariakori Kākitimoni

(Mateo 10.5-15; Marko 6.6-13)

9 Xesosi akiritana imoianariakori tosi apotiitiniuana ĩkapani. Iuasaaki isikataparatanana. Isikaposotiiretana maerekani matamatakoni iokanatinina ĩkapani, amianari imakaxakinina ĩkapani. ² Eereka iokanatanana imoianariakori kākitimoni Teoso auĭtetxi ininiāua isāpiretinina ĩkapani, amianatakani erekapeka itxĩkitakinina ĩkapani. ³ Xesosi txana ninoa:

—Hĩsíkasaaki, !hanikapiri hĩtii. Na hĩtsonere !hanikape. Na sakora, na nipokori, na txineiro, na āti himāka, !hanikape. ⁴ Kākiti apakapakasaakii, iuaā ninoa aapoko hĩkaikota iua sitatxiti hāuakasaaki. ⁵ Kākiti mapakapakaniāi, hĩtakanapari iua sitatxiti. Hōsipikasaakiri, hĩkaxipokariko kipatxi hĩkitiākiri. Ikara oerekana iua sitatxiti auakani Teoso misiritanako ninoa, kotxi ĩnirekarina ikenakotininirina Teoso sākire —itxa Xesosi imoianariakorimoni.

⁶ Eereka imoianariakori potorika. Ninoa sari ikinipoko aapokotxiti. Isāpiretarina Teoso iokanapirena erekari aapokotxiā auakanimoni. Erekapeka itxĩkitakana amianatakani ikini aapokotxiti auakani.

Erotxi Nirekari Xesosi Aōkitini

(Mateo 14.1-12; Marko 6.14-29)

⁷ Erotxi Kariréia tōpa auakani auĭte kenakopiretari Xesosi pirena. Maerekaxiniretinoka itxa, kotxi kākiti sāpiretari:

—Xoāo kapatxisareri iuaĭkana auāki itxapekaua. Iuara Xesosi txaua —itxana.

⁸ Apanakini sāpiretari:
—Eríasi iuaĭkana uatxa auāki itxapekaua. Iuara Xesosi txaua —itxana.

Apanakinipekana:
—Teoso sākire sāpiretakari kitxakapirĩka auakari iuaĭkana uatxa auāki itxapekaua. Iuara Xesosi txaua —itxana.

⁹ Erotxi txari:
—Notara paniātari Xoāo nopi tsotakiko, ininiā Xesosi kona Xoāoni. Kiripitipa Xesosi? Ātipirika nikenakopiretari iposotiire —itxa Erotxi.

Kinirāo aōkitaka itxari Xesosi.

Sĩko Mio Kākiti Xesosi Sikakienatini

(Mateo 14.13-21; Marko 6.30-44; Xoāo 6.1-14)

¹⁰ Ninoa Xesosi iokanatakini kanapiripeka iuamoni. Ikinika ikamakitina isāpiretarina Xesosi. Eereka Xesosi anikana ninoa kākiti mauakaniātaā, Petsáita sitatxiti takote. Ninoanoka sari iuaā. ¹¹ Txamari apanakini kenakopiretari Xesosi sinimoni, ininiā kākitipokoni sari iua tikini. Ninoa apokasaaki Xesosimoni, Xesosi apakapana ipoxokoniritika. Isāpiretana Teoso auĭtetxi ininiāua. Erekapeka itxĩkitakana amianatakani.

¹² Tinĩtikita imoianariakori tosi pakini apoka iuamoni:
—Piokanatanana kākiti aapokotxi imatokotininimoni inipokotininina ĩkapani, imakinina ĩkapani, kotxi uai aapokotxi mauakaniātaā —itxarina Xesosi.

¹³ Txamari Xesosi txana:

—Hĩtekarako sikakienatanana ninoa.

Ininiā ninoa:

—Poiāonoka nipokori aua atemoni, sĩkonoka komiri, ipinoka ximaki pakininokara aua. !Apakata aiamentiniri nipokori kaiāopokori kākiti asikakienatini ĩkapani —itxarina Xesosi.

¹⁴ Iuaātaā kikiakorinoka sĩko mio auakata. Xesosi paniātana imoianariakori:

—Hĩpaniātari kākiti topākini, uai sĩkoēta, apikomoni iuaĭkana sĩkoēta, apikomoni iuaĭkana sĩkoēta, tx-aāpokata kākiti —itxa. ¹⁵ Ininiā imoianariakori paniātari kākiti ikara atoko iitopākinina. Ininiā ninoa topāka.

¹⁶ Iuasaaki Xesosi kosekari komiri sĩko, ximaki ipi pakini. Iaxiti ionakaāta, misākireta itxari Teoso:

—Peerekari ia nipokori pisikakiti —itxa.

Iuasaaki ixanakari komiri, ximaki pakini, sika itxari imoianariakorimoni, ininiā ninoa sikari kākitimoni.

¹⁷ Ikinimane nikari, kamitopeka itxana. Eereka Xesosi moianariakori amari nipokori itetakori. Ixāpokakarina kotari tosi pakini.

Petro Auikari Xesosi Teoso Mereēkiti Ininiāua

(Mateo 16.13-20; Marko 8.27-30)

¹⁸ Āti ōti Xesosi iuanani misākiretari Teoso. Eereka imoianariakori apoka iuamoni. Ipimaāna:

—Kiripa kākiti uākatano nota? —itxa.

¹⁹ Ininiā ninoa:

—Apanakini xinikakiti pite Xoāo kapatxisareri pitxaua. Apanakinipekana xinikakiti pite Eríasi pitxaua. Apanakinipekana xinikakiti pite Teoso sākire sāpiretakari kitxakapirĩka auakari iuaĭkana auāki inakari pitxaua —itxarina Xesosi.

²⁰ Ininiā Xesosi:

—Hĩtepekana, kipa hĩte uākatano nota? —itxa.

Petro apakapiretari:

—Pite Teoso mereēkiti kākiti iātapanātakiti pitxaua —itxa.

²¹ Ininiā Xesosi iteene pinitari ikara apanakinimoni imasāpiretakani.

Xesosi Sāpiretari Ipinini

(Mateo 16.21-28; Marko 8.31-9.1)

²² Ininiā Xesosi:

—Nota hĩtari iaxitikiri iteene natatsiitariko nimisiritiko. Kiomātxiakori, sasetotxi auĭteakori, kaiōkatso-parerini pakini ĩnirekano nota, ininiā nokaākakako. Ipi āti ōtisaaki Teoso ōkitikanoko nota iuaĭkana auāki nini ĩkapani —itxari imoianariakori.

Xesosi Moianari Atāo Inakari

(Mateo 16.24-28; Marko 8.34-38)

²³ Eereka isāpiretari ikinimane:

—Notakata kinirāo sika pinakasaaki, piteka pinireēkiti kona pixinikape. Notakata kinirāo sika pinakasaaki, nota misiritiko atokokana pimisiritaākakako. Ia atoko pinirekiniā ikiniōtika, notakata pisapitikako. ²⁴ Pite ātipirika kaminiāri piteka nireēkitinoka, ininiā pinireēk-

iti xipokapitikako pitekata. Pite nireékiti xipokiniã, nota sãkire pauikini xika, Teoso iokanapirena erekari pisãpiretini xika, pite auapininiika txako Teosokata.

²⁵ Atxiïti papakapari ikinipoko tiitxi, ikini itixiti auakani tii, pinakiti ïkapani. Atxiïti iua tiitxi xika kona pikïpitari Teoso sãkire, ininiã kona pikaikota ätipirika Teosokata. Ikara atoko ininiã, erekari atxiïti ikinipoko tiitxi auinii? Konapitini. Apiaerekata Teosokata ätipirika pikaikotini. ²⁶ Pipëtatiniãno nota, pipëtatiniãri nisãkire, nota kãkiti itari iaxitikiri pëtataiko pite uai nikanapiriãkasaaki. Peerekari iuasaaki uai nikanapiriini öti. Iuasaaki kãkiti imarotariko niposotiire, niri posotiire, iniritiakori iaxitikini posotiire apaka. Teoso nitiriakori erekarini itx-auana. ²⁷ Atão nisãpiretai, apanakini hïte uatxa uai auakanii, hïpinini apisapanika himarotari Teoso auïtetxi ininiãua —itxa Xesosi.

Moisesi, Erãsi Pakini Xesosi Aõkitini

(Mateo 17.1-3; Marko 9.2-13)

²⁸ Äti semanati napaka atoko, Xesosi anikana Petro, Xoão, Txiako pakini. Ikanïkana oxiratarini nopini Teoso imisãkiretini ïkapani. ²⁹ Teosokata isãkirauanãtakasaaki, itoõ ipinipo itxa, imãka ponika, kasarori. ³⁰ Iuasaaki ipi kiki tokiã iuaã, Moisesi, Erãsi pakini. Isãkirauatana Xesosikata. ³¹ Ninoa iotximere aua, kotxi ipotorikana Teoso tixine. Isãkirauatana Xesosikata, Xesosi ipinini pirena, mapa semanati napaka atoko Xerosareë ipinini Teoso paniãtakiti ikamini ïkapani. ³² Iuasaaki Petro, Xoão, Txiako pakini imkanãta. Eereka imerekana. Atamatarina Xesosi iotximere. Atamatarina ninoa ipi kiki iuakata itiminina. ³³ Moisesi, Erãsi, takapiretakasaakiri Xesosi, Petro akiritari Xesosi:

—Koerekareri, erekari uai akaikotini. Makamari papiri ipi äti pakini, pite ïkapani, Moisesi ïkapani, Erãsi ïkapani —itxa.

Txamari maxikatïka isãkirauata. !Imarotari amanaãkiti.

³⁴ Petro sãkirauanãtakasaaki, katxiãri apoka. Xesosi moianariakori pïkarauata katxiãri äki auakasaakina. Katxiãri äkitana. ³⁵ Katxiãri äki ikenakotaãka sãkiretixi: —Ere namarite, nitiretakiti. Hïkenakotariko iua sãkire —itxa.

³⁶ Isãkirauataka atoko Xesosi moianariakori atamatarini Xesosinani. Eereka !isãpiretarina itikakitina apanakinimoni. Masãkirenika itxana.

Amarini Maerekati Matamatakoti Auaïtotakiti

(Mateo 17.14-20; Marko 9.14-29)

³⁷ Katimatinïkata iokiriïtana. Iuasaaki kãkitipokoni apoka Xesosimoni. ³⁸ Ninoa sauaki kiki akiritari Xesosi:

—Koerekareri, patamatarini nota äkiri imatonõkari namarite. ³⁹ Ätipirika maerekati matamatakoti maïkari iua. Iuasaaki akiripoakata, okarakataua. Isorikipekata inamamoni. Maerekati matamatakoti kamatsiitari namarite. Poiãonoka itakanapari. ⁴⁰ Iteene namanaãpekari pimoianariakori omitikiniri, txamari !iposotarina —itxa Xesosimoni.

⁴¹ Ininiã Xesosi txari kãkitimoni:

—!Kauikarei hïte. Maerekati kamakanii hïte. Kipakinikananipa Teoso nirekatari hïtekata nauini? Kipakinikananipa Teoso nirekatari hïte nimïteenekini? —itxa.

Eereka ipaniãtari iua kiki:

—Pamarite pimina uai.

⁴² Iua amarini apokaãpotakasaaki, maerekati matakoti irikari ixiti. Amarini okarakataua. Xesosi paniãtari maerekati takanapiniri amarini. Erekapeka itxïkitakari amarini, ininiã isika iua iuaïkana irimoni.

⁴³ Ikinimane tsorïkaãta Teoso posotiire itikasaakina.

Xesosi Iuaïkana Sãpiretari Ipinini

(Mateo 17.22-23; Marko 9.30-32)

Ikinimane tsorïkaãtakasaaki, Xesosi misãkiretari imoianariakori.

⁴⁴ —!Himaxinïkaretapiri uatxa nisãpiretakiti. Nota hïtari iaxitikiri miãkapiritaãkako. Nisikaãkako kãkitimoni ninoa nirekakiti ikaminina ïkapani —Xesosi txana nino.

⁴⁵ Imoianariakori kenakotari Xesosi sãkire, txamari !imarotarina isãpiretakiti. Teoso !nirekari ninoa imarotiniri Xesosi sãpiretakiti iuasaaki. Ninoa pïkari Xesosi ipimainina isãkire oerekinina ïkapani.

Kiripa Kãkiti Apiatakari Txataua?

(Mateo 18.1-5; Marko 9.33-37)

⁴⁶ Äti öti Xesosi moianariakori !auikakauana isãkirena, kotxi inirekarina imarotinirina apiatakari ninoa sauaki auakari. ⁴⁷ Xesosi imarotari ninoa xinikakiti, ininiã iminari amarini ninoamoni. Xesosikata tima itxa amarini. ⁴⁸ Iuasaaki Xesosi txana:

—Papakapiniãri amarini ia atoko inakari, papakapano nota apaka. Papakapiniãno nota, papakapari niokanatakari apaka. Iuaka poiãotakakariua hïte sauaki, iuarako apiatakari txauako —itxa Xesosi.

Kiki Maerekani Matamatakoni Omitiãkari

(Marko 9.38-41)

⁴⁹ Xoão sãpiretari Xesosi:

—Koerekareri, ate kenakotari kiki omitikinina maerekani matamatakoni pite uãkaã. Ate sãpiretari iua kiki ikara atoko inakari imakamakani, kotxi kona pimoianarini iua —itxa.

⁵⁰ Ininiã Xesosi:

—!Hïtotokakapiri ikara atoko inakari ikamini, kotxi iua kiki !omanataua ate. Iua apamonïkaua ate —itxa.

Samaria Auakani !Apakapari Xesosi

⁵¹ Teoso tixine iuaïkana Xesosi kanapiriini öti apokaãpota, ininiã Xesosi äkixinireë txari:

—Nisapitikako Xerosareëmoni.

⁵² Iokanatarini kãkiti iua apisa, imakiniãtaã initinina ïkapani. Ipinipokoriti ninoa kãkiti nitari imakiniãtaã aapokotxi Samaria auakani auiniãtaã. ⁵³ Txamari kãkiti iuaãtaã !inirekarina Xesosi apakapinina, kotxi iua nirekari Xerosareëmoni isini. Samaria auakani

omanatana Xerosareë auakani. ⁵⁴ Txiako, Xoão pakini kenakopiretari ikara ene. Iuasaaki ipimaärina Xesosi: —Apiananiri, pinirekatari aamanainiri Teoso xamina iaxitikiri iokanatinini ninoamoni ixipokinirina ïkapani? ⁵⁵ Txamari Xesosi pinitana, isäkirena maerekani xika. ⁵⁶ —Nota, hïtari iaxitikiri kona kãkiti nixipokini ïkapanini napoka uai. Kãkiti maerekani nimakaxakini ïkapanira uaimoni nina —Xesosi txari Txiako, Xoão pakini. Eereka ninoa sari apikoxiti apanakini kãkiti auiniãtaãmoni.

Kãkiti Xesosi Imoianatinina Nireëkani (Mateo 8.18-22)

⁵⁷ Xesosi imoianariakorikata saãpotakasaaki kimaporiã, kiki txari Xesosi: —Apiananiri, pite sinimoni nota apaka sako. ⁵⁸ Ininiã Xesosi: —Karikori aripa auini. Kakoari kotipiriki auini, txamari nota hïtari iaxitikiri nimakiniãtaã lauari. Pimoianatiniãno, ikara atoko pimisiritiko pinireka atxiiti? —itxa Xesosi. ⁵⁹ Xesosi txari äti kiki: —Notakata pisako. Txamari iua kiki: —Koerekareri, merepanika ninirekari niãtapiniri niri ipinini —itxa. ⁶⁰ Ininiã Xesosi: —Ikara piparïka pauiritari äti kamini. Piparïka apiari uatxa aua. Pite sari kãkitimoni. Pisãpiretanako Teoso auïtetxi ininiãua —itxa Xesosi iuamoni. ⁶¹ Äti kikipekana txari Xesosi: —Koerekareri, nota pimoianari nitxamauako. Mitxi paupiritano nikanapiriini nauinimoni. Nitakapiretanapana ninirimane —itxari. ⁶² Ininiã Xesosi: —Teoso kimaporeë potoriãkari nirekiniãri mitxi ikamakiti iuaïkana ikamini, !apakata iparïkauatini aãuïte Teoso ïkapani —itxa Xesosi.

Xesosi Iokanatanana Setëta Pakini Kãkiti

10 Ikara inaãka atoko Apiananiri mereëna setëta pakini kãkiti. Iokanatanana ipi, iuaïkana ipi, iuaïkana ipi, itxaãpotana iokanatinina. Iokanatanana iua sini apisapanika ikini aapokotxitimoni. Ninoa ïkiika. Apokana Xesosi apisa. ² Xesosi txana ninoa: —Kaiãori kãkiti iposope auikiniri nisãkire, txamari !imarotarina nisãkire, kotxi !ikenakotapanirina. Ninoa kiki erekari atoko itxana. Imakinika iposope iuaã. Txamari, poiãoka parïkauatakani aua nisãkire isãpiretinina ïkapani. Ininiãkara himisãkiretariko Apiananiri kakikioteri iokanatinina parïkauatakani iua sãkire auïãkani apotiitinina ïkapani. ³ Hïsa. Soti auïte anaakori äkitimoni iokanatikoto atoko, niokanatai hïte kãkitimoni, kotxi pamonõkonina ninoa. ⁴ Txineiro !hanikape. Tiitxi !hanikape. Äti hïkiti mata !hanikape. Kimaporiãpoã kãkiti akiritakasaakii, !hïtokaãpotape kãkitikata hïsäkirauatini ïkapani. Hïsapitiporiko niokanatinimoni. ⁵ Kãkiti aapoko hãpokasaaki, merepitpanika hïtxariko:

“Namanaãri Teoso, ikamaerekaxiniretinina kãkiti uai auakani,” hïtxako. ⁶ Kaapokori nirekiniãri Teoso ikara atoko inakari ikaminana ninoa, Teoso kamapitikari hamanaãkiti. Kaapokori manirekakaniãri, hïsäpiretana Teoso kona kamaerekaxiniretana ninoa. ⁷ Kaapokori apakapiniãri hïte, hïkaikotako iua aapokonoka. Äti aapoko, eereka äti aapoko kona hïtxaãpotapeko iua si-tatxiti hãuakasaaki. Iuaã ninoa sikakiti hinikini ïkapani, hiãtini ïkapani hãpakapariko. !Hïpëtauatape hãpakapiniri, kotxi hïte nota ïkapani parïkauatakani hïtxaua. Apakatapitika hãpakapiniri hïparïka ïki.

⁸ —Aapokotxiãtaã hãpokasaaki hãpakapikoã, iuaã hïsikiko hinikako, hiãta hïtxaãpotako. !Hïxinikapiri ninoa sikakiti mapitxiri ininiua. Hinikariko. ⁹ Erekapeka hïtxiãkitakanako amianatakani iuaã auakani. Hïsäpiretana ninoa, kaiaapekari Teoso ninoa auïte ininiua tïkane. ¹⁰ Aapokotxiãtaã himapakapokoniã, hïsa kãkiti napaãporetxiã. Hïsäpiretana kãkiti iuaã auakani: ¹¹ “Hãuiniãkiri pani akitiãkiri akaxipoka, kotxi !erekari uai, kotxi maerekati hïkama ate himapakapaniã. Hïxinikariko, ate apoka uai Teoso auïtetxi ininiãua asãpiretinii ïkapani, txamari !hinirekari.” Ikara atoko hïtxa sãkiretako ninoamoni. ¹² Kãkiti misiritiko õtisaaki Teoso misiritanako kãkiti Sotoma sitatxiti auakani ninoa maerekani xika, txamari Teoso apia misiritanako iua aapokotxiti auakani hïte mapakapakani, kotxi hïte sãpiretana Teoso sãkire, iuaritika !auikarina. Kitxakapirïka Teoso sãkire sãpiretakani !isana Sotoma sitatxitimoni —itxa Xesosi.

Kãkiti Sitatxi Auakani Maerekati Matakanapakani (Mateo 11.20-24)

¹³ —Hïte Korasiï sitatxiti auakani inipitika atatsiitariko misirikaretxi. Hïtepekana Petsãita sitatxiti auakani apaka atatsiitariko misirikaretxi, kotxi nota kamapekari posotiiretxi hïte sauaki, txamari !hïtakana-pari himaerekani. Ikara posotiiretxi Sitoõ sitatxiti, Txiro sitatxiti pakini auaãkamako, kãkiti iuaã auakani uatxakapokoikamani itakanapamarinako maerekati ikamakitina. Ninoa sako mata ieretakamanako, atapani ïtoãna itakamanako, imaerekanina itakanapinina oerekinina. ¹⁴ Kãkiti misiritiko õti apokasaaki, Teoso misiritariko Txiro sitatxiti auakani, Sitoõ sitatxiti auakani pakini, txamari iua apia misiritariko hïte Petsãita sitatxiti auakani, hïte Korasiï sitatxiti auakani apaka. ¹⁵ Hïtepekana Kapanaoõ sitatxiti auakani apiarini hinireka hininiãua, txamari maerekani misiritikoãtaã iuamonirako hõkapeëkako —itxa Xesosi. ¹⁶ Xesosi misãkiretana imoianariakori: —Hïte sãkire kenakotakani kenakotari nota sãkire apaka. Hïte mapakapakani !apakapano nota apaka. Nota mapakapakani !apakapari nota uaimoni iokanatakari apaka —itxana imoianariakori.

Setëta Pakini Kãkiti Kanapiriini

¹⁷ Ninoa setëta pakini kãkiti kanapiriã. Poxokonoka itxakatana.

—Apiananiri, maerekani matamatakoni apaka kīpitarī asākire, pite uākaā aiokanatakasaakina —itxarina Xesosi.

¹⁸ Ininiā Xesosi:

—Ari, nitikapekari Teoso patimari iokanatiniri Sathanasi, okaraxirari patimari imēkokini atoko itxa.

¹⁹ Hīkenakota. Nota sikaposotiiretai hīte imini, kaxipiro pakini hīkatxaratini. Kona ioākai hīte. Amokaiakari Sathanasi pataparari, iuaritika hīposota hīokanatiniri iua, kotxi nota sikataparatai hīte. !Auari hīte karotakani.

²⁰ Hīpoxokoniuaata, kotxi maerekani matamatakoni kamari hīpaniātakiti. Apia hīpoxokoniuaatako, kotxi hīuāka Teoso tixine aātsopateē iōkatsopatapeēkaika iuaā hīsini īkapani —Xesosi txana ninoa.

Xesosi Iri

(Mateo 11.25-27; 13.16-17)

²¹ Iuasaaki Erekari Matamatakoti kamapoxokonitari Xesosi, ininiā Xesosi misākiretari Teoso:

—Niri, pitixine auakani auīte pitxaua. Uai ikini itixiti auakani auīte apaka pitxaua. Peerekai pite, kotxi kimarorerini, iuikakaniua kona poereka pimarore. Poiāorini, miuikakaniua poereka pimarore. Ari niri, ikara atoko pinireka. Ikara atoko papokaerekata —itxari iri.

²² Eereka imisākiretari kākiti:

—Niri sikapekano ikinika. Kākiti limarotano nota Teoso ākiri nininiua. Nirinokara atāo imarotano nota. Apaka kākiti na atāo imarotari niri. Notanokara imarotari niri, kotxi iua ākiri nitxaua. Kākiti nirekiniāri imarotini niri, nota oerekari niri iuamoni —itxa Xesosi.

²³ Eereka Xesosi aua imoianariakorikata. Ninoanani aua iuakata. Imisākiretana:

—Teoso sikari erekari hītemoni, kotxi hīte atamatari nota kamakiti, hīte kenakotari nota sāpiretakiti. ²⁴ Nota sāpiretai hīte. Kitxakapirīka Teoso sākire sāpiretakani, auītetxiakori pakini kinirāo atamataka txari hīte atamatakiti, txamari ninoa !atamatari. Ninoa nirekari hīte kenakotakiti ikenakotinina, txamari !ikenakotarina —Xesosi txari imoianariakori.

Kiki Karotakori Tiretakari

²⁵ Kiki Moisesi sākire oerekakari apoka Xesosimoni. Inirekamari Xesosi kerokiniri isākire.

—Koerekareri, kirīpa nikama Teosokata ātipirika nauini īkapani? —itxa.

²⁶ Ininiā Xesosi:

—Kirīpa patatsopata Teoso aātsopateē? Pisāpiretano Teoso paniātakiti —itxari.

²⁷ Ininiā iua kiki apakapapireta:

—Teoso paniātaua: “Pitiretariko Apiananiri piTeosone, ikinipoko pinirekitiā, ikini pākixinireē, ikini pitaparaxinireē, ikinipoko pixinikakitiā pakini.” Apaka Teoso paniātaua: “Piteka pitiretiniāua atokotxikana, pitiretariko āti,” itxa.

²⁸ —Atāopitikara papakapapiretano. Ikara pikaminiā, pauapika ātipirika Teosokata —itxa Xesosi.

²⁹ Txamari iua kiki linirekari ikara atoko inakari ikamini, ininiā iua pimaāri Xesosi:

—Kirīpa āti nitiretini īkapani?

³⁰ Xesosi apakapapiretari, ia sāpirenatxi atāo inakari oerekiko isāpiretini:

—Kiki potorika Xerosareē. Inirekari Xerikoo sitatxiti-moni isini. Ipxinipokoriti kītiririni maīkari iua. Iītirīkarina imāka, itii pakini, noropata, karota, itxarina.

Mauākixiniretinoka itakanaparina iua kiki. ³¹ Iuasaaki sasetotxi iāpota iua kimaporiti. Iua atamatari iua kiki karotakori, txamari !imaākatari. Iopiriāri, napa, īkorape itxa. ³² Eereka kiki Arevii apika mekaniri, sasetotxi-akori moianatakari apoka. Iua apaka atamatari iua kiki karotakori, txamari iua sasetotxi atokokana

!imaākatari. Iopiriāri, napa, īkorape itxa. ³³ Eereka kiki Samaria tōpakiri iāpota iua kimaporiti. Iua apoka iuaā. Atamatari iua kiki maīkapekari, ininiā iua amonīkari.

³⁴ Iuamoni isa. Arokari ikaro ipiniā. Ipitari ikaro iītxiā.

Mākatxi mataā iapirika itxari ikaro. Eereka ōkitika itxari, ipira poho nopini taka itxari. Anikari kākiti imakiniātaā aikotimoni. Iuaā imoiaāri. ³⁵ Katimatinīkataka isikari txineiro kaapokorimoni. Ipi ota pirata kamakori isika. “Nisipekako. Pite moiaāriko ia kiki. Apikomoniapanika txineiro pinirekiniā ikiena īkapani, nikanapiriākasaaki nīkitxitai,” itxa Samariakiri, —itxa Xesosi Moisesi sākire oerekakarimoni.

³⁶ Xesosi pimaāri iua:

—Ipi āti kikiakori iāpota iua kimapori. Īkirīpa iua kiki kītiririni maīkakiti tiretakari? —itxa.

³⁷ Ininiā iua Moisesi sākire oerekakari:

—Ari, Samariakirinokara tiretari iua —itxa.

Ininiā Xesosi:

—Pisipe. Samariakiri kamakiti atoko inakari pikamako, kotxi iua tiretari āti.

Xesosi Motikaētaro Mata, Maria Pakini

³⁸ Xesosi imoianariakorikata sipeka. Apokana aapokotxiātaā. Iuaā sito Mata inakoro apakapana oaāpoko. ³⁹ Oītarō Maria inakoro topāka Apiananiri takote isākire okenakotini īkapani. ⁴⁰ Mata maerekaxiniretonoka otxa oparīka ito inini xika. Ininiā osari Xesosimoni.

—Apiananiri, nitaro topākanāta ereē. Notanani parīkauanāta. Pitemoni erekari atxīti? Pipaniātaroko notakata nipokori okamini —otxa.

⁴¹ Ininiā Xesosi:

—Mata, Mata, maerekaxiniretonokai pitxa, kotxi piparīka ito inini xika. ⁴² Ātinoka pikamini tīkane ninireka. Maria mereēri ikara. Omereēri nota sākire okenakotini. Oa mereēkiti apiaerekata, ininiā !niotokakaro oa nisākire okenakotini —itxa Xesosi.

Teoso Misākiretiko Pirena

(Mateo 6.5-15; 7.7-11)

11 Āti ōti Xesosi misākiretari Teoso. Ixipoka atoko ātika imoianari txari:

—Apiananiri, Xoão oerekari imoianariakori Teoso imisäkiretinina. Iua atokokana poerekaua ate Teoso amisäkiretini. Natokopa itxa Teoso amisäkiretini?

² Xesosi apakapapireta:

—Teoso himisäkiretakasaaki, ia atoko hïtxako: “Aïri, iaxiti auakari, ate nirekari piuäka paxitiko. Anirekari ikini itixiti auakani auïtetinii pite. Pite tixine pinireëkiti kamiko atokokana, anirekari pinireëkiti kamiko ïkorapokoriti.

³ Nipokori ikiniõtika pisikauako.

⁴ Pimaxinïkaretariko maerekati akamakiti. Maerekati atemoni kamakori amaxinïkaretini atokokana, pimaxinïkaretariko. Kona panikapeua aã-taerekatikomoni. Pisikauako ate, maerekati sauaki aãuakasaaki.”

Ikara atoko hïtxako Teoso himisäkiretini —itxa Xesosi.

⁵ Eereka Xesosi oerekana imoianariakori:

—Atxiïti apanïkanõka pisa pimoianari aapokomoni nipokori pamanaini ïkapani. Ininiã pakiritari iua: “Nimoianari, ipi äti pakini komiri pisikano. ⁶ Naõkimanere iãpotakari uatxaika apoka naapoko. Natxinoka itxape. Nipokori lauari nisikiniri,” atxiïti pitxari iua.

⁷ —Atxiïti pimoianari iroko äki apakapapiretai: “!Pakirinãtapeno. Naapoko tore katoreri. Nota, namariteni apaka imakanãtape. !Niposota nõkitikiniua, nipokori nisikinii.”

⁸ —Pimoianari itxaua iua, iuaritika atxiïti !inirekari õkitikiniua. Iuaïkana, iuaïkana pakiritiniãri pimoianari, iua õkitikapitikaua. Ikini nipokoriti pinirekakiti isikaiko, iuaïkana imakini ïkapani. Iua pimoianari na atoko itxa Teoso. ⁹ Ininiãkara pamanaãriko pinirekakiti, ininiã Teoso sikapitikai. Pinitariko pinirekakiti, ininiã papokapitikari. Pakiritariko Teoso, ininiã iua apakapapiretai. ¹⁰ Amanarauatakari apakapapitikari amanaãkiti. Nitarauatakari apokapitikari initakiti. Teoso akiritakari apakapapiretaãkapitika.

¹¹ —Hïte irïtxiakori, hamariteni amanainiãi komiri, kaikani hïssikatana hamariteni? Ximaki amanainiãna, iminikani hïssikatana hamariteni? ¹² Patari naki amanainiãna, kaxipirokani hïssikatana hamariteni? Konapitini. ¹³ Hïte maerekati kamakani hïtxaua, iuaritika himarotari erekari hamaritenimoni hïssikini, ininiã hïri iaxiti auakari, erekarinani kamakari, iua sikapitikariko Erekari Matamatakoti hïtemoni hamanainiãri iua —itxa Xesosi.

Maerekani Matamatakoni Omitikiko

(Mateo 12.22-32; Marko 3.20-30)

¹⁴ Äti õti Xesosi omitikari maerekati matamatakoti masäkireti. Iua maerekati matamatakoti sipeka atoko, iua kiki mitxi maerekati matamatakoti auãïtotakiti posotari iuaïkana isäkirauatini. Kãkiti Xesosi kamakiti itikakani tsorïkaãnãta. ¹⁵ Ätikaka ninoa txari:

—Satanasi, maerekani matamatakoni auïte, iuakara sikataparatarari Xesosi maerekani matamatakoni omitikini.

¹⁶ Apanakinipekana nirekari Xesosi kerokiniri, ininiã itxarina Xesosi:

—Takaõtxikari, Teoso posotiire poerekaua ate, aãtamariniri ïkapani, Teoso iokanatinii ïkorapokoriti aimarotini ïkapani —itxarina.

¹⁷ Xesosi imarotari ninoa xinikanãtakiti, ininiã iua txana:

—Kãkiti tixine auakani, ninoakakarika inaiatakakiniãuana, lapakata. Ixipokakakauana. Iua atokokana kãkiti aapokoã auakani inaiatakakiniãuana, ninoakakarika ixipokakakauana. ¹⁸ Iua atokokana Satanasi nitiriakori, ninoakakarika inaiatakakiniãuana, Satanasi tapara xipokako. Ikara atoko ininiã, kona atão hïte sãkire, nota iokanatinina Satanasi nitiriakori, maerekani matamatakoni, Satanasi taparaã. Ikara hïssãkire kona atãoni. ¹⁹ Hïte sãpiretano, maerekani matamatakoni Satanasi taparaã nomitika, ininiãkara kitaparaãpa hïte moianariakori omitikana maerekani matamatakoni? Ninoa omitikana maerekani matamatakoni Teoso taparaã, ininiã ninoakara oerekari !atão hïssãkire nota pirena. ²⁰ Teoso posotiireë nomitikari maerekani matamatakoni. Ikara atoko ininiã, Teoso oerekai iua apokapeka hïtemoni hïauïte inini ïkapani.

²¹ —Kiki pataparari ikeeko iposope inakari moiainiãri aapoko, kona kiïtïrikikori itii. ²² Txamari äti kiki apiataparata inaiatiniãri, iriãkata, ininiã anikapitikari kaapokori ikeeko. Mitxi iua kaapokori sãkire: “Nikeeko auiniã, kona kamakaxakikori nitii,” itxama, iuaritika kiki apiataparatakari ïtirïkari itii. Eereka imoianariakorimoni ixanakari tiitxi.

²³ —Notakata maparïkauatakani omanatano nota. Imamoianatakaniãno, inirekari niparïka ixipokini —itxa Xesosi.

Maerekati Matamatakoti Kanapiriini Pirena

(Mateo 12.43-45)

²⁴ Iuaïkana Xesosi sãpirenauata:

—Maerekati matamatakoti omitikikosaaki, kãkiti itakanapakasaaki, isaãpota äparaã makipakaniãtaã auiniãtaã initini ïkapani. Imapokakaniãri, “Iuaïkana nikanapiriãko mitxi nauinimoni,” itxa. ²⁵ Iuaã apoka. Iua aapoko mitxi inakari iusaaki peereri. Oere-tapeëkaika. ²⁶ Ininiã apana apikomoni setxi pakini maerekani matamatakoni, apia maerekanitakani. Ninoa ikinikana ïroaïtotari iua kiki. Iua ïtoã aua itxana. Iusaaki oitope maerekani matamatakoni misiritari iua kiki, ininiã apiata itsii inikoriã. Mitxipe ätinoka maerekati matamatakoti paniãtari iua maerekati ikamini. Eereka oito paniãtari iua —itxa Xesosi.

²⁷ Xesosi sãkirauataka atoko, sito iuaã kãkiti sauaki auakaro txari Xesosi:

—Pite auãkïtakakaro, pite axitakakaro, poxokoniuata, kotxi Teoso sikari erekari oamoni —otxa.

²⁸ Xesosi apakapapiretaro oa:

—Ari, inipitikara. Iuaritika Teoso sãkire kenakotakani, isãkire auiaãkani, apia poxokoniuatako, kotxi Teoso sikari apikomoni erekari ninoamoni —itxa Xesosi.

Xonasi Pirena

(Mateo 12.38-42; 16.1-4; Marko 8.11-13)

²⁹ Kaiãopokori kãkiti apokaãpota Xesosi takote. Iuasaaki Xesosi txari:

—Kãkiti uatxarini lerekana. Hïte nirekari noerekini Teoso takaõtxikare, iposotiire. Konapitini. Kona noerekai hïte. Kitxakapirïka Teoso sãkire sãpiretakari Xonasini inakori auakasaaki, Teoso kamari posotiiretxi. Ikara atoko inakari posotiiretxi Xonasini auakasaaki, iuaïkana ikamapanikariko. Iua posotiiretxi Teoso takaõtxikare itxapanikaua hïte ïkapani. Iua takaõtxikarinoka Teoso takaõtxikare hïte ïkapani.

³⁰ Kitxakapirïka Nïnivi sitatxiti auakani imarotari Teoso iokanatiniri Xonasi ninoamoni. Iua atokokana kãkiti uatxa auakani imarotariko Teoso iokanatinino nota kãkiti itari iaxitikiri ninoamoni.

³¹ —Kitxakapirïka sito Sapaa auakani auïte sari õtakoxiti auïtetxi Saromão inakorimoni imarore okenakotini ïkapani. Kãkiti misiritiko õti apokasaaki, oa sito txitanako kãkiti uatxa auakani, kotxi uatxa uai aua Apiatakari. Iua Saromão auïtetxi itxaua, iuaritika uatxa uai aua auïtetxiakori auïte. Txamari kãkiti uatxa auakani !inirekari ikenakotinirina nota sãkire.

³² —Kãkiti misiritiko õti apokasaaki, kãkiti Nïnivi sitatxiti auakani txitaiko hïte ïkorasaaki auakani, kotxi ninoa kenakotari Xonasi sãkire. Iuasaaki itakanaparina maerekati ikamakitina. Uatxa uai aua Apiatakari. Xonasi poiãoka. Hïte kenakotapekari nota sãkire, txamari himaerekani !hïtakanapa —itxa Xesosi.

Tirikapi ïtotxiãkiri Pirena

(Mateo 6.22-23)

³³ Iuaïkana Xesosi sãpirenauata:

—Kãkiti iopotokakasaakiri tirikapi, itano itaka ikini-mane ïroãkani atamarauatini ïkapani. !Ikipatari tirikapi. !Iomaãtari tirikapi kopiti ãki. ³⁴ Poki tirikapi atoko itxa piïto ïkapani. Poki ereka inakasaaki ipinikare aua pãkixinireë. Poki maerekanisaaki, pãkixinireë mapiãriko. ³⁵ Erepaniko. Atxiïti piuãkatari ipinikare pãkixinireë auini, txamari atxiïti ipiãnoka auari pãkixinireë. ³⁶ Ipinikarenoka pãkixinireë auiniã, ipiã na xatikini auinii, tirikapi iopinikinini atoko itxa —itxa Xesosi.

Pariseoakori Maerekani

(Mateo 23.1-36; Marko 12.37-40)

³⁷ Xesosi sãkirauataka atoko pariseo aiataru Xesosi: —Manipokota naapoko —itxari.

Ininiã Xesosi sari iuakata. Apokaãka atoko, iitopãka inipokotini ïkapani. ³⁸ Iua pariseo tsorïkaãnãta Xesosi marokauakotakaniãua inipokotini apisa, kotxi iuasaaki Xesosi !ikamari Xoteo kiomanekarini oerekakiti iaõka. ³⁹ Ininiã Xesosi:

—Hïte pariseoakori arokari hïto, txamari hãkixinire patxikopiïri, kotxi maerekatina hïkama. Kapotxinaniri hïtxaua. Iãkoanatxi inopinina arokiko atoko hïtxa. Pirato inopinina arokiko atoko hïtxa. ⁴⁰ !Kiïkitei hïte. Teoso hïto kamakari kamari hãkixinire apaka.

⁴¹ Iãkoanatxi ãki auakari iãriã hïsikako matxineirotenimoni. Hïpratone ãki auakari nipokori hïsikako matxineirotenimoni. Hïtiretariko apanakini. Ikara atoko hïkaminiã, Teoso atamataru hãkixinire ereka inini.

⁴² —Hïte pariseoakori misiritaãkako. Hïte sikari ipixini hïtakare kikio auakari Teosomoni Moisesi paniãtakiti iaõka. Apikomoni hïkama, kotxi ipixini takari kanaua ãki hïtakakiti apaka hïsika Teosomoni, oteraã, seporïa hïsika. Erekapitikamari hïte sikakiti Teosomoni, txamari himisirienetari kãkiti. Teoso !hïtireta. Erekaru ipixini hïtii hïsikiniri Teoso. Iuakatikana erekaru atão hïkaminiã kãkiti. Erekaru atão hïtiretiniri Teoso.

⁴³ —Hïte pariseoakori misiritaãkako. Hïte potxitari hïtopãkini kãkiti apisatoõ, aiko ãki Xoteo apotiitiniãtaãua kãkiti atamatinii ïkapaninoka. Nipokori sikaretikoãtaã hãuakasaaki, hïte apokaerekataru kãkitipokoni paxitinii hïte koerekareri hininiãua.

⁴⁴ —Hïte pariseoakori misiritaãkako. Akauari matakãõtxiãkoti atoko hïtxa. Iua nopini kãkiti napa imarotakoniã, kotxi hïto peerekari, txamari hãkixinire !erekari. Akauari ãki arakakari atoko itxa hãkixinire —itxa Xesosi.

Moisesi Paniãtakiti Oereëkani Maerekani

⁴⁵ Ikara sãkiretxiti kiki Moisesi paniãtakiti oereëkari kenakotakasaaki, omanãkarauata. Itxari Xesosi:

—Koerekareri, ikara atoko pisãkirauatiniã, ate apaka “maerekati kamakani” pitxataua ate —itxari.

⁴⁶ Ininiã Xesosi:

—Hïte Moisesi paniãtakiti oereëkanii hïtekanerako misiritaãkako. Hïte paniãtari kãkiti hïteka paniãtakiti ikaminina. Ninoa !liposotari ikinika hïpaniãtakiti ikaminina. Iminani ninoa porikiã hïtakini atoko hïkamanãta hïte. !Iposotarina anikinirina. Hïte apaka !hïkamari hïteka paniãtakiti. ⁴⁷ Hïte misiritaãkako. Hïte kamari takaõtxikari peereri Teoso sãkire sãpiretakanini ikatikoãtaã hïtakini. Txamari hïte atokiriakorinikara okapena ninoa Teoso sãkire sãpiretakanini. ⁴⁸ Iuaritika hïte sãpiretari ikinimane hãpokaerekatini hïte atokiriakorini kamakiti. Txamari ninoara okana Teoso sãkire sãpiretakanini. Hïtera takari takaõtxikari peereri ninoa Teoso sãkire sãpiretakanini akauariãtaã, ininiã kãkiti uãkatari hïpaxitinina ninoani, txamari !hïkamari ninoani paniãtakiti.

⁴⁹ —Paimatireri Teoso, kotxi mitxipe imarotari ninoa kamakiti tïkane. Mitxipe iua txari: “Nota iokanatanako nisãkire sãpiretakani, niokanapirena aniãkani pakini ninoamoni, txamari ninoa okapanikana apanakini. Imisiritapanikana apanakini,” itxa Teoso. ⁵⁰ Kãkiti uatxa auakani misiritaãkako, Teoso sãkire sãpiretakanini okiko xika. Teoso itixi ikamakasaakipeka ipotorika Teoso sãkire sãpiretakani okiko. ⁵¹ Merepitipanika Apeo inakori okapeëka. Eereka apanakini okaãpotapeëka. Imapotõkire okakori Sakaria inakori. Teosomoni sikakori takikoãtaã takote, Teoso Auini Pakitaãtaã takote apaka, iuaã okapeëka Sakaria. Inipitikara nota sãpiretai hïte, uatxa auakani misiritaãkako ninoa Teoso sãkire sãpiretakani okiko xika.

⁵² —Híte Moisesi paniätakiti oereékani misiritaåkako. Híte kipatari atão inakari Teoso iokanapirena. Híte apaka lauikari ikara. !Häuiritari apanakini auikiniri —itxa Xesosi.

⁵³ Ikara Xesosi säkire xika, Moisesi paniätakiti oereékani, pariseoakori pakini tsoata, Xesosi omanatinina. Ätipirika ipimaänätapikarina Xesosi. ⁵⁴ Inirekari-na Xesosi kerokiniri isäkire, imaĩkiko ĩkapani.

Kipatakori !Auari (Mateo 10.26-27)

12 Kãkitipokoni apotiitaua kinapokopeka, ininiã ikatxarakititakakauana. Iuasaaki Xesosi merepanika õtãkikana imoianariakori:

—Erepaniko pariseoakori säkire. Pamonõkoniri isäkirena, kotxi likamarina isäkirena iaõka. Ikara imaerekanina kipataua pão tireékari pani koketakori atoko itxaua. Eereka imarotaãka imaerekani. ² Ikinika seretakori oerekaåkako. Ikinika kipatakori imarotaåkako. ³ Ininiã ipiãpokoã pisãpiretakiti, pokamara imarotaåkako. Aapokotxi katoreri äki pimaasakapiretakiti aapokotxi nopini akiritaåkako ikinimane imarotini ĩkapani.

Kipa Apĩka? (Mateo 10.28-31)

⁴ —Nimoianariakori nõtãkikapanikai híte. !Hĩpĩkapiri híte okakani tĩkane. Hĩtonanira iposotana okinina. Hĩxinire ĩposotana okinina. ⁵ Nisãpiretai hĩpĩkakiti tĩkane. Teosora hĩpĩkako. Iuara posotari hĩto okini, eereka iposotari iokanatinii maerekani misiritikoãtaã. Ari, iuara hĩpĩkako.

⁶ —Kiripa ipi ipi äti pakini kotipiriki karone? Poiãonoka txineiro, ota ipinoka. Iuaritika Teoso !imaxinĩkaretari ätika kotipiriki. ⁷ Kipakinipa piãko pikiiã auakari aua? !Pimarotari. Teoso imarotapitikari, kotxi iteene inĩkatali, ininiãkara !hĩpĩkarauatape. Kotipiriki ĩki poião, iuaritika Teoso tiretari kotipiriki. Kaiãopokori kotipiriki auiniã, iuaritika híte ĩki apiata, ininiã Teoso tiretapitikai híte —itxa Xesosi.

Xesosi Nakitiakori (Mateo 10.32-33; 12.31-32; 10.19-20)

⁸ Xesosi säpirenauatapanika:

—Apikomoni nisãpiretai. Kãkiti ikinimanemoni: “Xesosi nakiti nitxaua nota,” inakari, iua atokokana nota hĩtari iaxitikiri txako Teoso nitiriakorimoni: “Nota nakitipitikara iua,” nitxako. ⁹ Kãkiti ikinimanemoni: “Xesosi nakiti !nitxaua nota,” inakari, iua atokokana nota hĩtari iaxitikiri txako Teoso nitiriakorimoni: “Kona nota nakitini iua,” nitxako.

¹⁰ —Kãkiti misãkirepiretiniãno nota hĩtari iaxitikiri, eereka amanainiãri Teoso ikara imaerekani imaktxakini, ininiã Teoso maktxakapitikari. Kãkiti misãkirepiretiniãri Erekar Matamatakoti, !kimaktxakikori ikara maerekati ikamakiti.

¹¹ —Hanikikosaaki aiko Xoteo apotiitiniãtaãua hãpoĩtikoã, hanikikosaaki auĩtetxiakorimoni

hãpoĩtikoã, mitxi !hĩxinikapiri híte apoĩtakani hãpakapapiretini. Maerekaxiniretinoka !hĩtxape. ¹² Iuasaaki ni-noa apoĩtakasaakii, Erekar Matamatakoti säpiretaiko híte hãpakapapiretini ĩkapani —itxa Xesosi säkire.

Kiki Katxineiroteri Mĩkiteti

¹³ Kiki kãkitipokoni sauaki misãkiretari Xesosi: —Koerekareri, pipaniätari nitari sikinino nota ipixini aĩrini tii ipĩkasaaki itakanapakiti —itxa.

¹⁴ Ininiã Xesosi:

—Naõkimanere, kona nota parĩkani pirini tii nixanakini —itxa Xesosi.

¹⁵ Ininiã Xesosi misãkiretana ikinimane:

—Erepaniko. !Erekari tiitxi iteene pinirekini. Kapotxinani !hĩtxape. Itomaneri tiitxi !itxĩkitakai okanani pauini —itxa Xesosi.

¹⁶ Ininiã Xesosi säpiretari ia säpirenatxi atão inakari oerekiko:

—Kiki katxineiroteri aua kiki mitari. Itakare peerekari, kaiãopokori. ¹⁷ Ixinikaxitita äkixinireë: “Nãpa ninĩkatari nikiena? Nikiena nĩkatikoãtaã xapitikiri.

!Apakata itomaneri nikiena ĩkapani. Kipa nikama?

¹⁸ Ari, nimarotari nikamakiti tĩkane. Nõtikariko nikiena nĩkatikoãtaã. Iuaĩkana nikamari äti mitari. Iuaã ikinika nikiena, nitii apaka ninĩkata. ¹⁹ Eereka notaka nitxauako: ‘Peerekano nota. Kaiãopokori nikiena.

Kaiãopokori nitii. Apakatapitikako kaiãopokori anokanani ĩkapani. Ininiã !niharĩkauataika. Ninipokotako, niãtako, nipoxokoniuatoko nitxako,” itxa iua kiki.

²⁰ Txamari Teoso misãkiretari iua: “Kĩĩkitei pite. Uatxa ia ĩkanõkati pipinako, ininiã kipa apakapatari ikinipoko pikiena, pitii apaka?” itxa Teoso.

²¹ —Ikara atoko itxa kãkiti tiitxinoka xinikakari, Teoso maxinikati —itxa Xesosi ikara säkiretxiti ixipokini.

Teoso Nĩkatiniua Ate (Mateo 6.25-34)

²² Ininiã Xesosi misãkiretari imoianariakori:

—Ininiãkara nota säpiretai híte, maerekaxiniretinoka !hĩtxape, hiniãkiti nire, mãkatxi hĩretaãkiti nire.

²³ Nipokori, mãkatxi pakininoka kona txĩkitakari pauini ereka inini. Nipokori, mãkatxi pakini poiãoka. ²⁴ Hãtamatar kotipiriki. Ninoa !itakarauata. !Amarina ikiena.

!Ipotetarina ikiena. Iuaritika Teoso sikakienatana ni-noa. Teoso nĩkatiniãri kotipiriki, inĩkatapitikai híte apaka. Híte ĩki apiata. ²⁵ Kinirepa maerekaxiniretinoka pitxa? Pimaerekaxinirene !itxĩkitakai apikomoni äti oara pauini.

²⁶ Pimaerekaxinirene kona txĩkitakai axapitiki apikomoni pauini, ininiã kinirepa maerekaxiniretika pitxa?

²⁷ —Aãui pixinikako. Kona aãui parĩkauata. !Ikamari imãka, iuaritika aãui peereri. Kitxakapĩrĩka auĩtetxi Saromão inakori, iteene katiiri itxaua. Kaiãori imãka ereri, iuaritika apia ereri ikinika aãui. ²⁸ Aãui !okanani aua. Uatxa aua. Katana ikatikata iotikaãka. Iuaritika Teoso nĩkatari aãui. Ininiã apiata inĩkatali híte. Ika-mamãkatapitikai. Poiãonoka híte auikari Teoso säkire. Ikara xika maerekaxiniretinoka hĩtxa. ²⁹ Ininiãkara

maerekaxiniretinoka !h̄txape. !H̄xinikanātapiri nipokori mauakanisaaki, iāriā mauakanisaaki. ³⁰ Kākiti Teoso sākire mauiakani ikiniōtika maerekaxiniretinoka itxana imākana ixinikinina xika, inipokore ixinikinina xika. H̄iri imarotari himāka hinirekini, h̄ikiena hinirekini. ³¹ Merepitipanika pinirekariko Teoso piauīte ininiāua. Iua nireēkiti pikamako, ininiā, himāka, h̄ikiena apaka Teoso sikaiko h̄ite —itxa Xesosi sākire.

H̄iparīka Īki N̄ikatiko (Mateo 6.19-21)

³² —Ininiā h̄ite ninakitiakori !h̄ip̄karauatape, kotxi h̄iri apokaerekatari isikinii ikinipoko erekari iua auītetxi ininiātaūakiri. ³³ Ikinika h̄itii h̄iv̄txitako. Txineiro h̄isikako matxineirotenimoni. Ikara atoko h̄ikaminiā, h̄iparīka ĩki auapitika Teoso tixine. Iuaā h̄iparīka ĩki !ixipoka. K̄iītiriri !ītirīkari. K̄iīriki !inikari. Iuaā hinīkatariko h̄iparīka ĩki. ³⁴ Erekari h̄iparīka ĩki Teoso tixine auiniā, ininiākara iuaā pixinikapika. Iuaā pinirekari pauini —itxa Xesosi.

Nitiritxi Erekarini

³⁵ Xesosi s̄apirenatapanika:

—Himerekako, kamāka h̄txako. Tirikapi h̄ipopotokakako. Iposope h̄txako niparīka h̄ikamini ĩkapani. ³⁶ Nitiritxi ipatrāotena iātapakani atoko h̄txako. Ipatrāotena sari ĩtanorouatakari kiiniritemoni. Initiriakori iātapari ikanapiriini. Apokasaaki, akiritakasaaki, pakoteri initiriakori matakakari itore ipatrāotena ĩroini ĩkapani. Ninoa nitiritxi atoko h̄txako. ³⁷ Patrāo apokasaaki initiriakori merekapanika inakasaaki, iātapanātakasaakiri iua, ininiākara erekapitikari. Himarotatari patrāo kamakiti? Iua ieretakari imāka iparīkauatini ĩkapani. Ipaniātana ninoa topākini. Eereka isikakienatana initiriakori. ³⁸ Erekapitikari ipatrāotena apokasaaki imirekiniāna. Atxiīti apanīkanōka apoka ipatrāotena. Atxiīti imaropirīkata apoka ipatrāotena, iuaritika iposope itxana, ininiā erekapitikari.

³⁹ —H̄xinikari ia. Kaapokori imarotaākamariko k̄iītiriri apokini, lauiritamariko iua aapoko ĩroini itii ĩtirīkini ĩkapani. ⁴⁰ H̄itepekana, h̄ite apaka iposope h̄txako, kotxi nota h̄itari iaxitikiri kanapiriāko. Iuasaaki, “!Apoka uatxa,” hinakasaaki, iua ōtipitika nota kanapiriā uai —itxa Xesosi.

Nitiritxi Erekari, Nitiritxi Maerekati Pakini (Mateo 24.45-51)

⁴¹ Petro misākiretari Xesosi:

—Apiananiri, ikara s̄apirenatxi atāo inakari oerekiko pisāpiretakiti, atenani poerekini ĩkapanikani? Ikinimane poerekini ĩkapanikani ikara pisāpireta? —itxa Petro Xesosimoni.

⁴² Ininiā Xesosi:

—Nitiritxi kimaroreri ipatrāote paniātakiti kamakari ia atoko itxako. Iuara apanakini nitiritxi auīte itxaua. Iuara sikakienatana apanakini nitiritxi nipokotiko manapi. ⁴³ Nitiritxi ipatrāote paniātakiti iaōka kamakari

poxokoniyata ipatrāote apokasaaki, kotxi ipatrāote paniātakiti iaōka ikama. ⁴⁴ Ipatrāote auiritariko iua ikinika itii, aapoko, ikikiote pakini inīkatini.

⁴⁵ —Txamari atxiīti āti patrāo nitiri !nirekari ipatrāote paniātakiti iaōka ikamini, ipatrāote auapokotini xika. Atxiīti inoropatari apanakini ipatrāote nitiriakori, apanakini ipatrāote niteroakoro apaka. Atxiīti inipokota, kapoāro iāta, ipoāta. ⁴⁶ Ipatrāote apoka initiri mimarotakanisaaki, ininiākara initiri liposopanika ipatrāote apakapini. Ikara xika ipatrāote misiritari iua. Eereka iokanatarari iua Teoso sākire mauiakani misiritikoātaā.

⁴⁷ —Nitiritxi ipatrāote nireēkiti imarotakari makamaniāri ipatrāote paniātakiti iposope inini ĩkapani, ixirokitataākako aāpitsaā. ⁴⁸ Nitiritxi ipatrāote nireēkiti mimarotakati kaminiāri maerekati, ixirokitataākako, txamari poiāonoka. Teoso sikari parīkatxi, imaroretxi pakini k̄akitimoni. Kaiāopokori parīkatxi, kaiāopokori imaroretxi isikiniāi pitemoni, ininiā Teoso nirekari pite iteene parīkauatini iua ĩkapani. Apikomoni parīkatxi, apikomoni imaroretxi isikiniāi pitemoni, ininiā Teoso nirekari pite apiata piparīkauatini iua ĩkapani —itxa Xesosi sākire.

Neenamtxi Xesosi Sākire Auikiko Xika (Mateo 10.34-36)

⁴⁹ Xesosi sākiraumatapanika:

—Teoso misiritariko kākiti imaerekani xika. Xamina tirinini atoko itxa kākiti misiritiko. Ia itixi napoka ikara xamina tirinini nitx̄ikitakini ĩkapani. Ninirekari ikara niparīka nixipokini. ⁵⁰ Nota atatsiirauatoko. !Erekaxinireno. Ninirekakari natatsiirauatini katima xipokaka inini. ⁵¹ Kona neenamtxi niotokakini ĩkapanini napoka ĩkorapokoriti. Nota sākire auikiko xika neenamtxi auapitikako. ⁵² Aapokotxi āki auakani s̄iko. Atxiīti ipi āti pakini naiatarari ipi, atxiīti ipi naiatarari ipi āti pakini, nota sākire auikiko xika. ⁵³ Ir̄txiakori omanatana ninoa ākiri nota sākire auikiko xika. Ninoa ākiri omanatana iriakorari. Inorotxiakoro omanatana ninoa ākero. Ninoa ākero omanatana inoroakoro. Imakirotxiakoro omanatana otiroakoro. Otiroakoro omanatana oimakiroakoro nota sākire auikiko xika —itxa Xesosi sākire.

Iaxiti Imarotiko (Mateo 16.1-4)

⁵⁴ Xesosi iuaīkana misākiretari kākiti:

—Atokatxi ereēkokinimoni ipiākaāpotakasaaki, “Āparaānapani,” h̄txa. Ari, ikipapitikako. ⁵⁵ Ītima ikiitaā ĩkari apokasaaki ĩkorapokoriti, h̄ite: “Kamoīpani,” h̄txa. Ari, kapatakapitikariko. ⁵⁶ Kamisirienererini h̄txaua. Hātamatari iaxiti, itixi pakini, ininiā himarotapitikari āparaā, kamoī pakini. Kinirepa kona hātamatana nota? Kinirepa kona h̄ikenakotari nisākire Teoso kamaenetakiti himarotini ĩkapani? —itxa Xesosi sākire.

Pimisiritiko Mereēkarimoni Pimasikani Īkapani

(Mateo 5.25-26)

⁵⁷ —Kinirepa hīteka na xinikari atāo inakari hīkamini tīkane? ⁵⁸ Maerekati pikamakasaaki, āti nirekari anikinii pimisiritiko mereēkarimoni. Iua anikinii apisapanika, pisākirauata iuakata atāo pikamini ĩkapani, ininiā iua lanikaikai pimisiritiko mereēkarimoni. Pimamisākiretakaniāri, iua anikaiko pimisiritiko mereēkarimoni. Eereka pimisiritiko mereēkari sikaiko sotatomoni. Eereka sotato takai kateia āki. ⁵⁹ Atāo nisāpiretai, kona posipikari kateia ikinika pimisiritiko mereēkari paniā-takiti pimiīkitxitakanisaaki —itxa Xesosi.

Himatakanapakaniāri Himaerekani, Hīpinako

13 Xesosi sākirauatakasaaki, kākiti iuaā auakani sāpiretari iua Kariréia auakani okiko pirena. Ninoā Teoso misākiretiko aikotiā auakasaaki, ninoā okari ipirana imaerekanina Teoso makatxakini ĩkapani. Ininiā iuasaaki Pirato sotatone apoka iuaā. Iuasaaki ninoā okana. ² Xesosi imarotari kākiti ākixinire xiniākiti. Ininiā ia atoko itxa:

—Hīte uākatari ninoā Kariréia auakani maerekani apiata. Ininiā, “Ikara atoko inapeēkana ninoani,” hītxa. ³ Konapitini. Nota sāpiretai hīte, himaerekani himatakanapakanisaaki, hīpinako ninoā atokokana hinaākako —itxa Xesosi.

⁴ Ininiā Xesosi sāpiretana ninoā apanakini ipinini pirena:

—Xerosareē aua Siroee inakori aapokotxiti. Iua aapokotxi ĩtanori irika. Irikasaaki, tesoito kikiakorini ipīpe. Hīte uākatana iuaā auakani apia maerekani itx-auana? ⁵ Konapitini. Hītekanera himaerekani himatakanapakanisaaki, ninoā atokokanera hīpina —itxa Xesosi.

Piko Mina Mariti Pirena

⁶ Ininiā Xesosi sāpiretari āti sāpirenatxi atāo inakari oerekiko:

—Aua kiki. Initirikata isari ikikiote atini ĩkapani. Iuaā-tāā aua amātiiri piko inakori mina. Iuaā apokasaaki, maritoka otxa itakare. ⁷ Ininiā itxari: “Īpikanani ātikanani pakini ninapiima. !Kariro. Ininiā erekari otokiko, kotxi kona oīriuata. Ininiā kona erekari uai okaikotini, kotxi oxipokari takari kiena kipatxi āki auakari,” itxari initiri. ⁸ Ininiā initiri: “Kona pitokapero. Nota oeretariko opatapi. Āti kipatxi erekari patari tikakata nitakapatapitaroko. ⁹ Ātikanani inakasaakiaua karipeka oniniā, ereē oāua. Erekari okaikotini. Omiriu-atakanisaaki, iuasaaki erekapekari otokiko,” itxa initiri —itxa Xesosi.

Tomatiko Ōtisaaki Xesosi Makananitiniro Sito

¹⁰ Tomatiko ōtisaaki Xesosi auari aiko Xoteo apotiitiniātaāua. ¹¹ Iuasaaki sito apoka. Tesoito anokananipeka ina amianaretakaro. Ia atoko otxa amianareta. Okomīkaāpota, kotxi maerekati matamatakoti amia-

nari kamakari ĩroaītotoaro. Kona oposota oōkitikaīto-tiniāua. ¹² Xesosi atamatakasaakiro, itxaro:

—Sito, erekapitikaiko uatxa —itxaro.

¹³ Ininiā itakari iuako onopini. Iuasaakipeka oōkitikaī-totaua. Ininiā iuasaaki otxa:

—Peerekari Teoso. Erekari imakinika ikamakiti —otxa.

¹⁴ Iuasaakipeka Xoteo apotiitiniātaāua aikotiā auakani auīte naiataua, kotxi tomatiko ōtisaaki Xesosi makananitaro amianataro. Ininiā iua txitari kākiti:

—Auari seisi pakini ōti kākiti parīkauatini ĩkapani.

Ininiā ĩkora seisi ōti hina iua makananitinii ĩkapani. Kona hinape tomatiko ōti erekapeka hītxīkitakiko ĩkapani —itxana.

¹⁵ Ininiā Xesosi txari iua:

—Hīsākire atxiīti erekari, txamari kona hīkamari hīsākire iaōka. Tomatiko ōtisaaki hīte tiretari hīpiraakori, kotxi hanikari hīpiraakori, kema auīte iaāmoni āparaā iātinina ĩkapani. ¹⁶ Oia sito Apraōni apika mekaniro otxaua. Satanasi kamaamianaretaro oa tesoito anokananipeka. Iaōpe. Apakatapitika tomatiko ōtisaaki nitiretiniro oa, nimakananitiniro oa —itxa Xesosi.

¹⁷ Xesosi apakapapiretakasaakina, imokaiakariakori pētauata. Iuasaaki apanakini iuaā auakani poxokoniuata, kotxi imarotarina erekari Xesosi kamakiti.

Mostata Pirena

(Mateo 13.31-32; Marko 4.30-32)

¹⁸ Ininiā Xesosi pimaāna:

—Natokopa itxa Teoso auītetxi ininiāua? Kiātokopa itxa axinikiniri? ¹⁹ Teoso auītetxi ininiāua mostata iki atoko itxa. Kiki takaro mostata ikikioteē. Oa aneē. Mitape onakasaaki kotipiriki kamari ikoa okatiā. Ikara atoko itxa Teoso auītetxi ininiua —itxa Xesosi.

Merepanika poiāo kākiti auītetari Teoso. Eereka kaiāopokori kākiti auītetari iua. Txamari iuasaaki Satanasi apoka ninoamoni kotipiriki apokini atokokana.

Pāo Tirekakari Pirena

(Mateo 13.33)

²⁰ Iuaīkana Xesosi pimaāna:

—Natokopa itxa ĩkorapokoriti Teoso auītetxi ininiāua? ²¹ Ia atokokana itxa: Sito kosekari pāo tirekakari pani. Okoketari axapiti pāo tirekakari pani kaiāopokori triko panikata, āparaākata. Eereka ikinika ipe tirekaāpota otxa.

Axapitiri Ironakikoōtaā

(Mateo 7.13-14, 21-23)

²² Ikara inaka atoko Xesosi potorika Xerosareē sitatxi-ti isini ĩkapani. Isaāpotakasaaki, isāpiretari Teoso sākire. Isāpiretari āti sitatxitiā, āti aapokotxitiā, āti sitatxitiā, itxaāpota isāpiretiniri Teoso sākire kākitimoni.

²³ Oerekaruanātakasaaki, kiki pimaāri:

—Niauīte, poiāokani satako Teoso auiniātaā?

²⁴ Ininiā Xesosi apakapapiretari:

—Teoso tixine ñronakikoãtaã axapitiri. Hinirekariko iuaã hiïroini. Kaiãopokori kãkiti nirekari ñroinina. Txamari, liposotarina. ²⁵ Kaapokori totiniri aapoko tore atoko itxa. Itotakasaakiri, kãkiti iporikiti aritari itore: “Pimataakariko itore ate ñkapani.” Iuasaaki iua kaapokori txako: “Kona nimarotai hñte,” itxanako ni-noamoni. ²⁶ Ininiã ninoa: “Ate nipokota pitekata. Sitatxi ate auiniãtaã pauakasaaki, pitekara oerekaua,” itx-anako ninoa. ²⁷ Ininiã iuañkana itxako ninoamoni: “!Nimarotai hñte. Namonipa hãua hñte? Hñsipiniikaua. Imakinika hñkamakiti !erekari.”

²⁸ —Hãtamatakasaakina Apraã, Isaki, Xakoo, ikini-mane Teoso sãkire sãpiretakani pakini Teoso auñtetxi ininiãtaãua, iuasaaki hñtxiapatapitikako. Apanakini ñroãpeka. Txama hñtenoka kaikotape iporikiti hi-maerekani xika. ²⁹ Teoso auñtetxi ininiãtaãua apokako kaiãopokori kãkiti, ikini itixiti ñkani. Atokatxi pokñkini-moni ñkani, atokatxi ereëkokinimoni ñkani, atokatxi pokñkini sanaremoni ñkani, atokatxi pokñkini kikomoni ñkani pakini apokako Teoso kiiniritimoni. ³⁰ Merepiti-panika Xoteoakori kenakotari Teoso sãkire, txamari ñimaãkatari. Eereka Xoteo minakanuia kenakotari Teoso sãkire, ininiã auikarina. Ininiã Xoteo minakanuia apokako Teoso auñtetxi ininiãtaãua Xoteoakori apokini apisa —itxa Xesosi sãkire.

Xesosi Tìretari Xerosareë Auakani

(Mateo 23.37-39)

³¹ Ikarasaakipeka ãtikaka pariseoakori apoka. Itxarina Xesosi:

—Pisipiniikaua, kotxi Erotxi okaenetai —itxarina.

³² Ininiã Xesosi apakapapiretana:

—Hñsa iuamoni. Hñtxariko iua aripa kamisirienereri: “Nota omitikari maerekati matamatakoti, apaka amianatakani erekapeka nitxñkitaka. Uatxa, katana pakini nipañkauatako. Ipi ãti õtisaaki nixipokariko nipañka ñkorapokoriti.” Ikara atoko hñtxariko iua. ³³ Ininiã uatxa nipañkauatako. Katana nipañkauatako. Ininiã katana eereka nisa Xerosareëmoni, kotxi ãtiãtaã Teoso sãkire sãpiretakani okikoãtaã lauiri. Xerosareënanira ninoa ipina. Ininiã nota sako iuaã.

³⁴ —Xerosareë auakanii, Xerosareë auakanii, hñte okapekana Teoso sãkire sãpiretakani. Kai soroã hñkiporonakana ninoa hñtemoni Teoso iokanatakini. Kaiãokatani ninirekamari ninñkatini, patari oimiakori omñkita patapi otakini atokokana nitxanakamaiko hñte. Txamari !hãuiritano nota nñkatini. ³⁵ Ikara atoko inakari xika hãpoko asikaãkako. Teoso !auaika hñtekata. Nisãpiretai. Ia õti hãtamatanano, eereka !hãtamataikano. “Teoso takari erekari uaimoni ñkarimoni, Apiananiri posotiireë ñkarimoni,” hinakasaaki, iuasaakinanirako hãtamatanoko nota —itxa Xesosi.

Xesosi Erekapeka Txñkitakari Amianatakari

14 Tomatiko õtisaaki Xesosi sari pariseoakori auñtemoni, iuakata inipokotini ñkapani. Iuaã auakani mixinitari iua apoñtinirina ñkapani. ² Iuasaakipeka apoka kiki amianatakari. Ikanoke, itapike, imakinika

ananañtota. Iua apoka Xesosimoni. ³ Ininiã Xesosi pi-maãna Moisesini sãkire oerekakani, pariseoakori pakini. Ipimaãna:

—Erekari atxñiti tomatiko õtisaaki amianatakari erekapeka nitxñkitakini? —itxa Xesosi.

⁴ Ininiã ninoa tsoñkaãnãta. !Apakapapiretarina. Ininiã iuasaaki Xesosi erekapeka txñkitakari iua amianatakari.

—Pisipeka paapokomoni —itxa Xesosi.

⁵ Eereka ipimaãna pariseoakori:

—Hñpira kema auñte, hñpira poho apaka aariko ãki irikiniã tomatiko õtisaaki, iuasaaki himaktxakatari? Ari, himaktxakapitikari hñpira tomatiko õtisaaki. Ininiã kinirepa kona hinirekatari erekari nikamini tomatiko õtisaaki? —itxa Xesosi.

⁶ Txamari kona ninoa apakapapiretari, kotxi atão Xesosi sãkire.

Kiiniri Kamakari Pirena

⁷ Iuasaaki Xesosi itikana kãkiti. Apanakini mereëri kãkiti apiatakari takote iitopãkini. Ininiã isãpiretari ia sãpirenatxi atão inakari oerekiko.

⁸ Kãkiti ñtaniriuatini kiiniriti pirena isãpireta:

—Kiiniriã hñsikasaaki, kona himereëpiri kãkiti apiatakari topãkiniãtaã hñitopãkini, kotxi atxñiti eereka kemañxitakori apiatakari apoka. ⁹ Ininiã iua apiatakari apokasaaki, kakiiniriteri txaike pite: “Ikiraã piitopãka. Ia kiki topãka nota takote.” Iuasaaki pipëtauata. Ininiã pitakanapari iuaã. Maparapeka apanakinikata topãka pitxa. ¹⁰ Kiiniriã hñsikasaaki, apanakinikata hñitopãka. Ikara atoko ininiã, kakiiniriteri akiritai: “Nitari uaimoni pina. Piitopãka uai. Uaira erekari.” Ikara atoko pininiã, apanakini iuaã auakani imarotariko pite apiatakari pininiãua. ¹¹ ãtikaka kãkiti txari: “Nota apiari nitxaua.” Txamari Teoso txariko: “Poiãori itxaua.” ãtipekana txari: “Nota poiãori nitxaua.” Txamari Teoso txariko: “Iua apiari itxaua.”

¹² Xesosi txari ikemañxitakiri:

—Kiiniri pikamakasaaki, kona pikemañxitapiri piniriane, pitariakori, paõkimaneri, paapoko takote auakani, katxineiroteni pakini, ninoa iuañkana kemañxititini pite ñkapani. Ininiã ikara atoko ninoa iñkitxitai.

¹³ Apiaerekata kiiniri pikamakasaaki, pikemañxitari kãkiti minakati mauakiniti, mokirini, matñpokotakati pakini. ¹⁴ Ikara atoko pininiã, Teoso sikari erekari pitemoni, kotxi ninoa !iposotari kiiniri ikaminina, iuaritika kãkiti erekarini iuañkana õkitikasaakia, iuasaaki Teoso ñkitxitaike pite —itxa Xesosi sãkire.

Kiiniri Mitari Pirena

(Mateo 22.1-14)

¹⁵ Ininiã ãti Xesosikata nipokotakari kenakotari ikara Xesosi sãkire. Ininiã iua txari:

—Teoso auñtetxi ininiãtaãua sikani nipokotako iuaã. Ininiã iuasaaki Teoso sikapoxokonitana —itxari.

¹⁶ Ininiã Xesosi apakapapireta. Ia atoko itxa:

—Kiki kiiniri kamakari kemañxitari itomaneri kãkiti.

¹⁷ Nipokori iposopeka inakasaaki, iokanatarini itirini ike-

maĩtakitanimoni: “Masa kiinirimoni. Iposopekari imakinika nipokori,” itxa.

¹⁸ —Txamari ikemaĩtakitani kamari äti säkiretxi kiinirimoni imasikanina ĩkapani. Ininiä kemaĩtakitakori txari: “Nota amotari itixi. Iua ninireka natini. Ininiä !nipo-sotari nisini kiiniriä,” itxa.

¹⁹ —Ininiä äti: “Nota amotari tesi kema auĩte parĩkau-atakani. Ininiä nota sari ninoamoni. Ninireka nimarotini nino parĩka. Pauiritano nisini ninoamoni,” itxa.

²⁰ —Ätipekana: “Nota ĩtanorouatape. Nĩtanoro auano nota. Ininiä kona nipo-sota nisini pikiiniritemoni,” itxa.

²¹ —Ininiä initari kanapiriä iauĩtemoni. Ikinipoko ikemaĩtakitani säkire isäpireta iuamoni. Ininiä iuasaaki iua auĩtetxi naiataua. Ininiä ipaniätari initari: “Sitatxi auakari kimaporitiä pisa. Katima pitxako. Piminana käkiti minakati mauakini, matĩpokotakani, mokirini pakini pimina,” itxari. ²² Ininiä katimaritika ikamari ikinika auĩtetxi paniätakiti. “Nikamapekari ikinika pipaniätakiti, txamari auapanika nipokori. Apakatapanika käkiti nikini ĩkapani,” itxa.

²³ —Ininiä iuaĩkana, iua auĩtetxi paniätari sitatxi mapara õtako isini. “Iuaä pakiritana käkiti inini, naapoko käkiti xäpokini ĩkapani. ²⁴ Atäopitikara nitxai: ‘Mitxi nikemaĩtakitani !inikapaniri nikiena,’” itxa.

Xesosi Moianari Pininiua

(Mateo 10.37-39)

²⁵ Äti õti itomaneri käkiti moianatari Xesosi. Ininiä ikirioka säpireta itxana ia säkiretxiti:

²⁶ —Nota kiniräo moianataka hinakasaaki, apiata hĩtiretanoko nota. Merepanika hĩtiretanoko nota, eereka hĩtiretanako hĩri, hinoro, hĩtaniri, hĩtanoro, hĩtari, hĩtaro, hamarite pakini. Hĩteka apaka poiäo hĩtiretauako.

²⁷ Nota kiniräo moianataka hinakasaaki, notakata hĩsa. Himamĩteenekakanisaakiri himisiritiko nota ĩkapani, ininiä !apakata himoianatinino.

²⁸ —Hinirekiniäri aapokotxi mitari sitatxi auakari atoko hĩkamini, merepanika hĩxinikaroko txineiro aapokotxi kamiko karone. Atxiĩti !apakata hĩtxineirote. Atxiĩti apakata. Ikara atoko hĩxinika merepanika.

²⁹ Ikara maxinikati merepanika !ixinikari, ininiä atxiĩti itakari itsota, ininiä eereka txineiro !auaika, ininiä kona apakata imakinika ikamini. Ininiä apanakini napetari iua. ³⁰ Ininiä nino txari: “Hätamatariko ikamakiti. Iua kiki potorikamari ĩkora aapoko, txamari !iposotari imakinika ikamini.” Ikara atoko itxanako. Ininiä pikamakiti apisapanika iteene hĩxinikariko.

³¹ Ininiä eereka Xesosi säpiretari äti säkiretxi:

—Auĩtetxi auari tesi mio sotato. Iua nirekari neenamtxi ikamini äti auĩtetxikata. Txamari äti auĩtetxi auari vĩtxi mio sotato. Iua tesi mio sotato auakiti merepanika xinikari, atxiĩti iposota ineenamauatini vĩtxi mio sotatokata? Atxiĩti auĩtetxi vĩtxi mio sotato auakiti xipokari iua? Ininiä apisapanika ixinikari. ³² Imaposotakaniäri, vĩtxi mio sotato õtakopanika auakasaa-ki, iua auĩtetxi tesi mio auakiti iokanapireta äti auĩtetxi-moni isäkirauatinina ĩkapani, neenamtxi xipokini ĩkapani.

³³ —Erekari iua auĩtetxi neenamtxi takanapakari atoko hinini. Ininiä merepanika hĩkixiniree hĩxinikariko: “Nota nirekatari nimoianatiniri Xesosi, kotxi pasäpaniri?” hĩtxa. Atäo hinirekiniäri himoianatinino, ininiä imakinika hĩtakanapako notakata hĩsini ĩkapani. Himanirekakaniäri hĩtakanapiniri imakinika, ininiä !apakata himoianatinino. Ininiä hĩxinikariko merepanika —itxa Xesosi.

Iökira Matxoato Pirena

(Mateo 5.13; Marko 9.50)

³⁴ —Iökira peerekaro. Omatxoaniä, !otxaika. Aua käkiti iökira potxoaro atoko inakani, ininiä erekapitikana ninoa. Apanakini käkiti iökira matxoato atoko itxana. !Kakamarena ninoa. ³⁵ Iökira matxoato ininiä, !apakata takari sikakienatiko ĩkapani. !Apakata hĩkokenitiri kipatxikata, pirätxi tikakata takari sikakienatiko ĩkapani. Kona erekaro. Maparamoni oõkapeeõkaika. Ikara atoko itxa apanakini, kotxi nino !kakamarena.

—Kakenakokii hĩte, ininiä hĩkenakotariko ia nisäkiere.

Soti Auĩte Ereëkokakari

(Mateo 18.10-14)

15 Äti õti auĩtetxiakori txineirote apakapakani, apanakini maerekati kamakani apaka apotiitaua Xesosi säkire ikenakotininina ĩkapani. Ninoa kaiäopoko. ² Iuasaaki pariseoakori, kaiõkatsopareriakori pakini misäkiireporetari Xesosi. Itxana:

—Iua apakapari maerekani. Maerekanikata inipokota —itxana.

³ Ikara isäkiereña xika Xesosi säpiretari ipi, äti pakini säpirenatxi atäo inakari oerekiko. ⁴ Ia atoko itxa Xesosi:

—Atxiĩti pite aua seĩ soti auĩte. Äti pĩpinanakiniä, kipa pikama? Pitakanapari apanakini mapara inipokotiniä-täa apanakini nĩkatini ĩkapani. Ininiä eereka pisari pĩpinanakakari pinitini ĩkapani. ⁵ Papokasaakiri iua pĩpinanakakari, pipoxokoniuata. Piporikiäpotari pipira paapokomoni. ⁶ Papokaäka atoko pakiritana paõki-maneriakori, apanakini käkiti pakini. Pitxana ninoa: “Hĩpoxokoniuatako notakata, kotxi napokapekari nipi-ra pĩpinanakakari,” itxa soti auĩte pitikiri.

⁷ —Nisäpiretai hĩte, ätika maerekati kamakari takanapakasaakiri imaerekani, iaxiti Teoso auiniätaä auakani poxokoniuatapitikako. Atxiĩti novëta novi käkiti iuikakanuia txari: “Peerekaua ate. !Akamari maerekati,” itxana. Txama kona atäo isäkiereña. Ninoa säkiere kona kamari iaxitikini poxokoniuatini —itxa Xesosi.

Ota Pirata Kamakoro Ereëkokakaro

⁸ Apikomoni Xesosi txari:

—Sito aua tesi ota pirata kamakoro. Pakaronero. Äto ereëkokiniä, ininiä onitakasaakiro oiopotokakari tirikapi. Oiatĩkaäpotari oaäpoko ota onitaäpotini ĩkapani. ⁹ Oa apokasaakiro, apanakini oäkirita: “Hĩpox-

okonauatako notakata. Napokapekaro ota ereëkokakaro,” otxa.

¹⁰ —Käkiti poxokoniuaata ota pirata kamakoro apokikosaaki. Nisäpiretai, iaxiti Teoso nitiriakori api-apoxokoniuaata, äti maerekati kamakari imaerekani itakanapakasaaki —itxa Xesosi.

Imi Ereëkokakari Pirena

¹¹ Apikomoni Xesosi txari:

—Aua kiki. Ipi imiakori. ¹² Maneri takari amanaäri iri. Itxari: “Ninirekari pitakanapakito pipïkasaaki pisikini notamoni uatxa,” itxa. Ininiä iri xanakari inakiti imiakorimoni. ¹³ Eereka mapaöti inaka atoko, iua ätokori apotiitari iri sikakiti. Ininiä eereka isipeka. Ötakoxiti äti tixini isa. Iuaä maerekati ikama. Iuaä xipoka itxari iri sikiñiri.

¹⁴ —Ikinika ixipoka iuaä. Iuasaaki äparaä !ikipa. Natxipokoni auari. Nipokori !auari. Ininiä iuasaaki iua minakati !auari. Imakinika xipope. ¹⁵ Ininiä iuaxiti auakarimoni isa, parïkatxi amanaini ïkapani. Ininiä ipaträote paniätari iririakori isikakienatini. ¹⁶ Iririakori isikakienatakasaaki, natxinoka itxa. Iuasaaki iua nirekari iririakori kiena inikini, kotxi iua sikakienatakari !auari.

¹⁷ —Iuasaakiika ixinikari iri aapoko: “Niri nitiriakori aua nipokori. Nipokori itetakori auapitika. Uai natxinoka txapeno nota. ¹⁸ Nikanapiriäko niri aapokomoni. Nitxariko niri: ‘Maerekati nikamapeka Teosomoni, pitemoni apaka. ¹⁹ Kona pamarite na pitxaikanoko, kotxi !erekano. Pitxïkitakano pinitiri nininiua.’ Ikara atoko nitxariko niri,” itxa. ²⁰ Ininiä iua aiamata, kanapiriä itxa iri aapokomoni. Iuasaaki iri iätapanätari iua ikiniötika.

—Ininiä iua apokaäpotakasaaki, ötakopanika, iri atapari iua. Ininiä iri miteëkata iuamoni. Ininiä iteene ipoxokoniuaata. ²¹ Iuasaaki imi txari iri: “Niri, maerekati nikamapeka Teosomoni, pitemoni apaka. Kona pamarite na pitxaikanoko, kotxi !erekano.”

²² —Iuasaakipeka iri akiritari initiriakori: “Katima hïtxako, mäkatxi ereri himinini. Aneo ereri hïtakako iuakokimoni. Ikiti mata hïtakako ikitiä. ²³ Kema auïte kiïri hökako. Kiiniri makamako. Manipokota. Mapoxokoniuaata, ²⁴ kotxi ia namarite ipïkari atokopeka, uatxa iuaïkana ikanapiripeka. Mitxi pïpinanakakari atoko itxa, uatxa apokapeëkaika,” itxa.

—Ininiä iuasaaki ninoamoni ipoxokoniuatini apopeka.

²⁵ Ninoa kiiniritauatakasaaki, imi aneëkari tokoriä iparïkauanäta. Ikanapiriäkasaaki aapokomoni, ikenakotari xikari, serëkatxi ene pakini. ²⁶ Ininiä akiritari iri nitiri: “Kiripa ikara?” itxari. ²⁷ Iri nitiri apakapapireta: “Pitari apoka. Ininiä piri paniätari kema auïte okiko, kotxi erekapanikari pitari. Kona monökori apoka iuamoni. Erekeri ikanapiriini,” itxari.

²⁸ —Ininiä ikara ikenakotakasaaki, inaiataua. Kona inirekari ñroini kiiniriä. Ininiä iri iuamoni sa itxa. Akiritari: “Pïïroä,” itxari. ²⁹ Ininiä iua apakapapiretari: “Itori mitaäti niparïkauatinapekai. Txama kona nota sipikapiretari pisäkire. Iuaritika kona pisikano potxi äkiri nimoianariakorikata kiiniri nikamini ïkapani. ³⁰ Iua

pamarite xipokari pitxineirote. Sitokata isirïka. Txama ikanapiriäkasaaki, pokari kema auïte. Kiiniri pikama iua ïkapani.” Ikara atoko itxitari iri.

³¹ —Iri apakapapireta: “Namarite, ätipirika pauapika notakata. Ikinika nota nakiti pite nakiti txaua.

³² Erekapitikari kiiniri nikamini apoxokoniuatini ïkapani, kotxi pitari ipïkari atokopeka itxa. Uatxa auapanika. Pïpinanakakari uatxa apokapeka,” itxari.

Nitiritxi Kamisirienereri

16 Xesosi säpiretana imoianariakori:

—Kiki ito tiitxi aua. Iua nitiri nïkatari ikinika ipaträote nakiti. Apanakini säpiretari iua kiki, initiri iouanatiniri itxineirote. ² Ikara atoko ininiä, iua akiritari initiri: “Nikenakopiretari pite misirienetinino nota. Ininiä piminari tiitxi piamotiitini tsopa. Ikara pisikasaakino, niokanatai pisini. Kona apikomoni piparïkauataika nota ïkapani,” itxa.

³ —Ininiä initiri äkixinireë: “Kipa nikama uatxa, kotxi nipaträote païtiki iokanatanano. !Kataparano nota, ininiä !niposotari atokatxi patapi niparïkauatini. Nipëtauata txineiro maxikatïka namanainiri käkiti. ⁴ Uatxaika nimarotari nikamakiti tïkane. Ininiä niparïka xipokasaaki uai, käkiti apakapapanikano nota ninoa aapokoä,” itxa.

⁵ —Ininiä akiritana käkiti ipaträote maïkitxitakani. Ininiä ipimaäri äti: “Kipakinipa !pïkitxitapanika nipa-träotemoni?”

⁶ —“Seï kopiti iïtxi auakiti kona niïkitxitapanika,” itxari.

—Ininiä iua nitiritxi txari: “Pikosekari pimaïkitxitakini-ti tsopa. Pitakari sïkoëta kopitinoka,” itxari.

⁷ —Ininiä äti ipaträote maïkitxitakari ipimaä: “Kipakinipa kona pïkitxitapanika nipaträote?”

—Iua apakapapiretari: “Seï atarokiri kotarina,” itxa.

—Itxari iua: “Pimaïkitxitakini-ti tsopa pikoseka. Oitëta kotarinoka pitaka,” itxa. Ikara atoko ikama ninoa ïkapani, ininiä iparïka itakanapaka atoko, ninoa apakapari iua ninoa aapokoä.

⁸ —Ininiä iua paträote ikara imarotakasaaki, it-sorïkaäta: “Ari, ninitiri paimatireri. Maerekati ikama, iuaritika ikamakasaakiri, paimatireri iua,” itxa.

—Teoso säkire mauiäkani imarotapitikari ixinikinirina parïkatxi katana ikamakitina. Atxïiti Teoso säkire auïäkani !imarotari ixinikinirina parïkatxi katana ikamakitina. ⁹ Nisäpiretai hïte, ïkorapokoriti häuakasaaki, hïxinikari ikara nitiritxi. Hïsikari hïtii, hïtxineirote pakini Teoso parïka ïkapani, Teoso mimarotakani atäo inakari imarotininä ïkapani. Eereka atxïiti Teoso mimarotakani moianatai. Eereka ninoa apaka imarotari aïri iaxitikiri. Eereka äti öti haökita ninoa iaxiti.

¹⁰ —Axapitiki parïkatxi atäo pikaminiä, ininiä käkiti auikariko piposotiniri parïkatxi apiatakari pikamini apaka. Axapitiki pïtïriuata mitxi, ininiä eereka kaiäori pïtïriuata. ¹¹ Txineiro uaimonipokoriti auakari himimarotakaniäri hinïkatini, ininiä kona hïposotari hinïkatini erekeri Teoso sikakiti. ¹² Apanakini tii pimanïkatakaniä, ininiä kona käkiti sikai tiitxi pinakiti inini ïkapani.

¹³ —!Apakata kākiti paríkautatini ipi iauñtena ñkapani, kotxi atxiñti ãti omanata, ãti itireta. Atxiñti ãti apokaerekata, ãti inorita. Iua atokokana kākiti kona posotari iparíkautatini tiitxi ikinipoko iamotini ñkapani, Teoso ñkapani iparíkauatakasaaki. !Apakata piauñte-tiniri Teoso, txineiro piauñtetakasaaki —itxa Xesosi.

Teoso Säkire Maxipokakani

(Mateo 11.12-13; 5.31-32; Marko 10.11-12)

¹⁴ Pariseoakori ikara ikenakotakasaakina, inapetarina Xesosi, kotxi ninoa iteene potxitaro txineiro. ¹⁵ Ininiã Xesosi sãkirauata ninoamoni:

—Hñte txa apanakinimoni: “Ate likeroka. Peerekaua ate,” hñtxa hñsãkire. Txama Teoso imarotari hãkixinire. Kãkiti uãkatari erekari hñkamini, txama Teoso omanatari hñkamakiti.

¹⁶ —Kitxakapirñka kãkiti auikari Teoso sãkire Moisesimoni sikakori, Teoso sãkire sãpiretakani sãkire pakini. Xoão kapatxisarereri apoka. Iuasaaki Teoso iokanapirena erekari auñtetxi ininiãua sãpiretaãka. Itomaneri iteene nirekari isini Teoso auñtetxi ininiãtaãua ñroini.

¹⁷ —Teoso sãkire !ixipoka. !ixipoka axapiti. Auapika imakinika isãkire. Itixi, iaxiti pakini xipokapitikako, iuaritika Teoso sãkire !ixipoka.

¹⁸ —Teoso sãkire iõkatakori kitxakapirñkari auapanika uatxa. Ininiã ñtanorotxi asikakari ãto itakini ñkapani inakari, maerekati ikama. Apaka sito takanapakoro takakari maerekatikanera ikama. Ikara Teoso sãkire auapanika. Kona ixipoka ikara —itxa Xesosi.

Katiiri, Arásaro Pakini

¹⁹ Xesosi sãkirauatapanika. Ia atoko itxa:

—Aua kiki katiiri. Peereri imãka. Põkamarari imãka. Apiaerekata imãka. Ikinioñtika peerekari ikiena. Imakinika iua auakiti peerekari. Iua aapoko ikiniõñtika kiinirisaaki auakari atoko itxapika ikiena.

²⁰ —Ñti kiki Arásaro inakori. Pamatinaniri. Minakati lauinaru iua. Iua sirñka katiiri aapoko patapi koa. Amianari aua iuamoni. Ininiã ñto imakinika kakaro.

²¹ Kinirão nika inakasaaki, ixiti okakorinoka inika. Iuaã anãpa amerokari ikaro.

²² —Ikara atoko ininiã, eereka ipñpe. Ininiã eereka Teoso nitiriakori iaxitikini anikari iua Teoso auinimoni. Kitxakapirñka Apraão sari iuaã. Iuaã iua Arásaro aõkitari Apraão.

—Eereka iua katiiri apaka ipñpe. Ikataãka. Isari maerekani misiritikoãtaã. ²³ Iuaã maerekani misiritikoãtaã auakasaaki, õtakoxiti atamatari Apraão, Arásaro pakini. ²⁴ Ininiã akiritari Apraão: “Toti Apraão, piamonñkano. Pipaniãtariko Arásaro iãkiniri iuakoki iaã, tapikaka itxa ninamamoni. Ia xamina sikatsiitapitipono,” itxa.

²⁵ —Apraão apakapapireta: “Pixinikariko kãkitikata pauakasaaki, kaiõori pitii aua pitemoni. Arásaro auakasaaki, kona minakati auari iua. Arásaro auakasaaki, amianarinani, natxinani pakini auari. Uatxa iua poxokoniuãñtakasaaki, pite atatsiitari pimisiritiko. ²⁶ Patamata ereẽ sauana auñte. Kona ate

posotari hñtemoni asini. Hñte apaka kona posota uaimoni hãpokini,” itxa Apraão.

²⁷ —Iuañkana katiiri: “Toti, pikenakotano. Pipaniãtariko Arásaro niri aapokomoni isini. ²⁸ Iuaã aua sñko nitiriakori maneripanika inakanuia. Isãpiretanako: “Kona erekari uai. Erekari ia misirikaretxi auiniãtaã imñkanina. Ininiã uatxa ikamarinako Teoso sãkire paniãtakiti,” itxa katiiri.

²⁹ —Ininiã Apraão: “Ninoamoni auape Teoso sãkire, Moisesini sãpiretakiti, apanakini Teoso sãkire sãpiretakani sãpiretakiti apaka. Ininiã pitariakori posotari ikenakotinirina ninoa sãkire,” itxa Apraão.

³⁰ —Ininiã katiiri txari: “Toti Apraão, ikara atokonani !apakata. Ipñkari kanapiriiniã ninoamoni, iuasaaki-ikarako itakanaparina imaerekanina.”

³¹ —Ininiã Apraão: “Pitariakori !auikari Moisesini sãkire, apanakini Teoso sãkire sãpiretakani sãkire pakini. Ipñkari kanapiriiniã ninoamoni, iuaritika ninoa !auikari Teoso sãkire. Ikara atoko ininiã, kona nipaniãtari Arásaro isini ninoamoni,” itxa Apraão.

Ikara atoko itxa Xesosi sãpiretakiti.

Maerekati Oerekakari

(Mateo 18.6-7, 21-35; Marko 9.42)

17 Xesosi txari imoianariakorimoni:

—Aua maerekati oerekakani. Ninoa kãkiti kamari maerekati. Ikara atoko inakani apokapitikako. Ninoa xika kãkiti kamari maerekati. Maerekati oerekakari misiritaãkapitikako. ² Teoso omanatari kãkiti maerekati oerekakani. Kãkiti txñkitakiniãri amarini nota sãkire auiaãkari maerekati ikamini !apakata. Erekamariko iua kãkiti maerekati oerekakari kai mitariã iaxirikanokitaãkamako, ipoa apanñkakiã okaãkamako ipinini ñkapani. ³ Erepaniko. !Pikamapiriko maerekati. Pitari Xesosi sãkire auiaãkari kaminiãri maerekati pitemoni, põtãkikariko, imaerekani itakanapini ñkapani. Itakanapiniãri, !pixinikapinikari ikara maerekati ikamakiti. ⁴ Atxiñti ãti õti iua kamari maerekati pitemoni. Eereka iua pitemoni apoka. “!Erekari nikamakiti pitemoni. Pimaxinñkaretariko maerekati nikamakiti. !Nikamaikari,” itxa. Ininiã ñkora õti iuañkana maerekati ikama pitemoni. Iuañkana amanaãi imaerekani pimaxinñkaretini ñkane. Atxiñti ñkora õti setxikata ikara atoko ikama pitemoni, ininiã pimaxinñkaretariko ikinika maerekati ikamakiti —itxa Xesosi.

Xesosi Säkire Auikiko

⁵ Xesosi iokanatakini txari Xesosi:

—Pitxñkitakaua ate apikomoni aãuikiniri Teoso sãkire —itxana.

⁶ Ininiã Xesosi txana:

—Mostata iki axapitiki. Mostata iki atokokana nisãkire poião hãuikiniã, iuaritika hñposotapitikari hñpaniãtiniri ia uasini aamina: “Pikotsakatika pimaporokauako. Ipoamoni pitakauako.” Ininiã ikamapititariko pisãkire iaõka —itxa Xesosi.

Nitiritxi Paríka Pirena

⁷ Xesosi txari:

—Pinitiri tokoriã paríkauatakari, pipiraakori in-
ítkatakari, apokasaaki paapoko, kona pitxa: “Pinipoko-
ta, pitomata.” Kona ikaraatoko pitxa. ⁸ Pitxari: “Aua-
panika paríkatxi. Nipokori pikaminano. Xipoka atoko
pisikakienatano. Piãtapari nota nipokotini, ininiã eere-
ka pite nipokota.” Ikara atoko pitxa pinitiriakorimoni.
⁹ Pipaniãtakitinanira ikama, ininiã kona pitxa: “Erekapi-
tikari piparíka,” kotxi pipaniãtakitinani ikama.

¹⁰ —Ininiã iua atokokanera itxa ikinipoko Teoso
paniãtakiti pikamakasaaki. Kona apakata: “Erekapi-
tikano nota,” pinini. Ia atoko atão pinini: “Nitiritxinani
nitxaua. Poiãori nitxaua, kotxi niauíte paniãtakitinani
nikama.”

Xesosi Makananitinina Paiaka Matatakani

¹¹ Xerosareëmoni Xesosi sikasaaki, inapari Samaria
tõpa. Ipinimoni auari Kariréia tõpa. ¹² Áti aapokotxi
apokaãpotakasaaki, aõkitana tesi kikiakori ami-
anatakani paiaka matatakani. ¹³ Ikira atoko akiritarina:

—Xesosi, koerekareri, piamoníkaua ate —itxana.

¹⁴ Xesosi atamatakasaakina, ipaniãtana ninoa Moi-
sesini paniãtakiti iaõka ikaminina, sasetotximoni isini-
na, iitona oerekinina ítkapani.

—Sasetotximoni hĩsako. Hõerekariko hĩto iuamoni
—itxa Xesosi.

Iuamoni isaãpotakasaakina, ikinipoko ninoa
erekapeka itxana. ¹⁵ Ninoa amianatakani erekapeka,
txamari átinani kanapiriã Xesosimoni. Itapararitika
akirita:

—Peerekari Teoso —itxa iua paiaka matatakari.

¹⁶ Ininiã ikapotoreëkaua Xesosi apisatoõ.

—Notamoni pikamakiti peerekari —itxa.

Samaria tõpakiri iua kiki. ¹⁷ Ininiã Xesosi txari:

—Nota makananitana tesi kikiakori. Ítapari apanaki-
ni? Auapanika novi kikiakori nimakananitakini. ¹⁸ Ia kiki
Samariakiri. Ianokara kanapiriã, “Peerekari Teoso,” ini-
ni ítkapani. Ninoa Xoteo iua atoko !itxana —itxa Xesosi
sãkire.

¹⁹ Ininiã itxari iua Samariakiri:

—Põkitikauako. Pisako. Pite aukari nisãkire,
ininiãkara erekapekai —itxa Xesosi.

Kanatokopa Itxa Teoso Auítetxi Ininiãtaãua?

(Mateo 24.23-28, 35-44)

²⁰ Áti õti pariseoakori pimaãri Xesosi:

—Kirisaaakipa Teoso ikinimane auíte inini õti
apokatako? —itxana.

Ininiã Xesosi apakapapiretana:

—Teoso auítetxi inakasaakia, kãkiti !atamatari iua
apokini. Teoso kãkiti auíte inakasaaki, iua kãkiti ãkix-
inireë apoka. ²¹ Iuasaaki kãkiti !akiritari: “Uaigarari
Teoso auítetxi ininiãtaãua. Ikiraãrari Teoso auítetxi
ininiãtaãua.” Ikara atoko !itxana, kotxi hĩxinire ãkirari
Teoso auítetxi ininiãtaãua —itxa Xesosi.

²² Ininiã itxa imoianariakorimoni:

—Apokako áti õti nota hĩtari iaxitikiri iteene kinirão
hãtamatani. Txamari !hãtamatano. ²³ Apanakini sãpire-
taiko hĩte: “Ikiraãrari iua.” Áti sãpiretari: “Uaigarari iua.”
Iuasaaki kona himaãkatapiri ikara atoko inakari
sãkiretxiti. !Hãuikapiri ikara atoko inakari. ²⁴ Hĩtari iaxi-
tikiri kanapiriãkasaaki, mēkokari átiãtaã potoricini,
átiãtaã apokini, iua atokokana nikanapiriini. Katimariti-
ka napokako. Mēkokari atoko nitxako napokini.
Iuasaakiika ikinimane kãkiti atamatano. ²⁵ Nikanapiri-
ni apisapanika, nota hĩtari iaxitikiri iteene ninikoriãriko
nimisiritiko, kotxi kãkiti uatxa auakani kona nirekano.
²⁶ —Nota hĩtari iaxitikiri kanapiriãkasaaki, Noee
auakasaaki atokokana itxapaniko. ²⁷ Noee auakasaaki,
ikinimane nipokota. Iãta. Ítanorouata. Ikara atoko
itxapikana. Áti õti Noee, inirimanekata maporo ãki
iĩroãna. Eereka imaiãtapakinitipanika ãparaã kipakata.
Xãpoãkata. Ininiã xirataãtxi xipopena ikinimane. Ikara
atokotxikana itxako nota kanapiriãkasaaki.

²⁸ —Aroo inakori auakasaaki atokokana itxako nota
kanapiriãkasaaki. Iuasaaki ikinimane nipokota. Iãtana.
!amotiitana. Isikatiitana. Itakarauatana. Aapokona ika-
mana. ²⁹ Sotoma sitatxiti Aroo potoricini õti,
iuasaakipeka xamina ãparaã kipini atoko itxa ikatxaki-
ni. Xamina miniki katxaka. Ininiã ikinipoko iuaãtaã ar-
iãkata.

³⁰ —Iuasaaki kãkiti !imarotari xamina katxakini õti.
Iua atokokana kãkiti !imarotari nota hĩtari iaxitikiri
apokini õti. ³¹ Napokini õti haãpoko mapara hãuiniã,
kona hĩkanapiripe haãpokomoni hĩtii hãpini ítkapani.
Tokoriã hãuiniã, kona !hĩkanapiripe haãpokomoni.
!Apakata hĩkanapiriini iuaã. ³² Hĩxinikaroko Aroo
ítanoro. Kona oa atoko hĩtxape, kotxi oa ipina, kotxi
!onirekari otakanapiniri sitatxi maerekani auiniãtaã.

³³ —Pite átipirika kaminiãri piteka nireëkitinoka,
ininiã pinireëkiti xipokapitikako pitekata. Pite nireëkiti
xipokiniã, nota sãkire pauikini xika, pite auapininiika
txako Teosokata.

³⁴ —Nikanapiriãkasaaki, ia atoko itxako. Nikanapiriini
ítkanõkati atxĩti ipi kãkiti imakanãta imakiniãtaãna.
Iuasaaki Teoso sãkire auĩkari sari notakata. Teoso
sãkire mauĩkati kaikota.

³⁵ —Iuasaakiko atxĩti ipi sito kamanãtari atarokiri.
Teoso sãkire auĩkaro sari notakata. Teoso sãkire
mauĩkato kaikota.

³⁶ —Iuasaakiko atxĩti ipi kiki kizio paríkauata. Áti sa
notakata, áti kaikota —itxa Xesosi.

³⁷ Ininiã imoianariakori pimaãri:

—Namoniparako? —itxana.

Ininiã iua apakapapiretana:

—Aãtamatakasaakiri maiori apotiitiniãtaãua, ikini-
mane imarotari ipĩkari iuaãtaã auini. Iua atokokana
ikinimane atamatariko kãkiti apotiitiniua notakata
nikanapiriãkasaaki —itxa Xesosi.

Sito, Kãkiti Misiritiko Mereëkari Pakini

18 Xesosi misãkiretari imoianariakori áti sãpire-
natxi atão inakari oerekiko, Teoso misãkiretiko

pirena. Ikara inakari oerekari kākiti ātipirika imisākiretiniri Teoso, Teoso misākiretiko imatakanapakani īkapani. ² Xesosi sāpiretari ia sākiretxiti:

—Sitatxi auari kākiti misiritiko mereēkari. Iua kona paxitari Teoso. Kona ipaxitari kākiti apaka. ³ Iuaā sito apaka aua. Ōtaniri ipīpe. Tikinitakoro otxaua. Oa nirekari iua atāo ikamini oa misiritakarimoni. Txamari iua kākiti misiritiko mereēkari lipotxitari omokaiakari pirena ikenakotini. Osāpiretapikari iuamoni: “Pikenakotariko nisākire. Pikamariko atāo nota misiritakarimoni. !Nimīteenekaikari nota misiritakari apikomoni misiritinino,” otxa.

⁴ —Isāpakapekari ātipirika osākire ikenakotini. Ininiā eereka ixinikari: “Atāopitikara, kona nota paxitari Teoso, kākiti pakini. Iuaritika nikamariko onirekakiti, kotxi ⁵ ātipirika oa tikinitakoro amanaānātano, ininiā nikamaākaretxitaro. Ininiā nikamariko onirekakiti, kotxi nisāpakapekaro osākire. Ātipirika ikara atoko otxanātapikano. !Nimīteenekaikari,” itxa kākiti misiritiko mereēkari.

⁶ Ininiā Xesosi txana imoianariakori:

—Ikara kākiti misiritiko mereēkari kona erekari, iuaritika ikamari osākire iaōka. ⁷ Teoso apiaerekata. Ininiā ikenakotapitikari imereēkini sākire pokamara, īkanōka. Ninoa amanaāri Teoso imoianatinina. Ininiā apiata Teoso kenakotari isākirena. Patimari Teoso kenakotini imereēkini amanaākiti. ⁸ Nisāpiretai, patimari Teoso misiritinina ninoa misiritakani. Ia nipimaāi. Nota hītari iaxitikiri iuaīkana nikanapiriākasaaki, atxiīti napokari nisākire auiākani īkorapokoriti? —itxa Xesosi.

Pariseo, Txineiro Apotiitakari Pakini

⁹ Iuikakaniua !apokaerekatari apanakini. Ninoamoni, ninoanokara kamari atāo. Āti ōti Xesosi sāpiretari ia sāpirenatxi atāo inakari oerekiko, kākiti ikara atoko inakanimoni atāo imarotinina īkapani:

¹⁰ —Ipi kiki sari Teoso misākiretiko aikotimoni. Āti kiki pariseo itxaua. Āti kiki auītetxiakori txineirote apakapakari itxaua. Iteene iua misiritari kākiti, kotxi kākiti-moni imakatzakaro apikomoni txineiro. Kona atāo imakatzaka. Imisiritari kākiti. ¹¹ Iuaā pariseo tima Teoso imisākiretini īkapani. Txama iuaka imisākiretaua. Ia atoko itxa isākire: “Teoso, nota poxokopitikano, kotxi nota apanakini atoko kona nitxa. Kīitiriri !nitxaua. Kākiti misiritakari kona nitxaua. Kona nota sirīka āti ītanorokata. Kona nota ia txineiro apakapakari atoko na nitxa. Konapitini. ¹² Ikini semanati, ipi ōti nitakanapari ninikini pite nimisākiretini īkapani. Txineiro nisikai. Tesi txineirota auiniāno, ātoka nisikai, ininiā pipaniātakiti iaōka nikama,” itxa iua pariseo.

¹³ —Iuasaaki txineiro apakapakari ikira atoko itima. Kona ionakaāta iaxiti. Iaritari itorota imaerekani oerekini īkapani, kotxi maerekati ikamapeka. Itxari Teosomoni: “Teoso, piamonīkano. Kona erekano nota, kotxi maerekati kamakarino nota,” itxa txineiro apakapakari.

¹⁴ Ininiā Xesosi txari:

—Atāopitikara nisākire. Ikara inakari kiki Teoso kamaerekata. Isikasaaki iua aapokomoni, erekari itxapekaua. Iua pariseopekana, Teoso !ikamaerekatari iua.

—Iuikakariua, poiāori itxauako. Poiāoripekana, apiatakari itxauako —itxa Xesosi.

Amarini Apokini Xesosimoni

(Mateo 19.13-15; Marko 10.13-16)

¹⁵ Āti ōti kākiti minari amarini Xesosimoni erekari ninoamoni itakini īkapani. Txamari Xesosi moianariakori atapakasaakiri kākiti imiakori mīkani, isipikapana.

—Hīkanapiripeka. Hīsipeka —itxana.

¹⁶ Txamari Xesosi txari imoianariakori:

—Hāuiritanako amarini notamoni apokini. !Hīsipikapana amarini, kotxi nitretapitikana ninoa. Nisākire auiākani auikari nisākire amarini auikini atoko. Kākiti nisākire amarini auikini atoko inakaninokara apoka Teoso auītetxi ininiātaāua. ¹⁷ Amarini auikari iri sākire. Ininiā hīxinikariko ia: Amarini atoko himinakaniā, Teoso sākire iteene himauikakaniā, ininiā Teoso auītetxi ininiātaāua !hīroā —itxa Xesosi.

Kiki Katiiri Pirena

(Mateo 19.16-30; Marko 10.17-31)

¹⁸ Xoteo auīte pimaāri Xesosi:

—Koerekareri erekari, kiripa nikama Teosokata ātipirika nauini īkapani? —itxa.

¹⁹ Xesosi txari iua:

—Kininiāpa “erekari,” pitxano? Kākiti erekari !auari. Teosonanira erekari. ²⁰ Pite imarotapitikari Teoso paniātakiti: “!Pisirīkape āti ītanorokata. !Pokaniuatape. !Pīitiriuatape. Apanakini !pimisirienetape. Piri, pinoro pakini pipaxitako.” Ikara atoko pimarotapeka —itxa Xesosi sākire.

²¹ Ininiā iua kiki apakapapiretari:

—Nota axapitipanika ninakasaaki, nikīpitari ikara atoko inakari sākiretxiti Teoso paniātakiti —itxa.

²² Xesosi kenakotakasaakiri iua kiki sākire, itxari:

—Auapanika ātinoka pikamini tīkane. Ikinika pitii pivētxitako, eereka oa txineiro pisikanako minakati mauakinimoni. Eereka pisa notakata. Ikara atoko inakari pikaminiā, Teoso tixine papokasaaki ikinipoko erekari auiniiko pite —itxa Xesosi sākire.

²³ Iua kiki ikara ikenakotakasaaki, imatinaniuata, kotxi iua iteene katiiri itxaua. ²⁴ Xesosi atamatakasaakiri iua matinaniuatini, itxari:

—Pamimari katxineiroteri auītetiniri Teoso.

²⁵ Atauako kamero napatari ākorike sonakiā? Apia mīmari kākiti katxineiroterini auītetiniri Teoso —itxa Xesosi.

²⁶ Ikara inakari kenakotakani txari:

—Pamimari pisākire. Ininiā kiripa apoka Teoso auiniātaā? —itxana.

²⁷ Ininiā Xesosi txana:

—Kākiti maposotakinini Teoso posota ikamini —itxa Xesosi.

²⁸ Ininiā Petro txari:

—Ate takanapapekari ikinipoko pitekata asini ikapani —itxa.

²⁹ Ininiã Xesosi txari:

—Atãopitikara, ininiã ia atoko nitxai hĩte. Pauini pitakanapiniã, pĩtanoro, pitariakori, piri, pinoro, pamariteakori pakini pitakanapiniã, Teoso auĩtetxi ininiãua pirena pisãpiretini ikapani, ³⁰ ininiã ikorasaaki apiata erekari papakapa. Ininiã ãti õti pipĩkasaaki iaxiti papokasaaki, pauapininiika pitxako —itxa Xesosi.

Iuaĩkana Xesosi Sãpiretari Ipinini

(Mateo 20.17-19; Marko 10.32-34)

³¹ ãti õti Xesosi anikari imoianariakori ikira atoko, misãkireta itxana:

—Uatxa Xerosareẽmoni asa. Kitxakapirĩka Teoso sãkire sãpiretakani sãpiretapedari nota hĩtari iaxitikiri pirena. Ninoa sãkire iõkatsopatakita paĩtiki apokapitakako, ³² kotxi nisikaãkako Xoteo minakonimoni. Ninarapetaãkako. Nimisãkirepiretaãkako. Nikiisokaãkako. ³³ Niaritaãkako. Eereka nokaãkako. Ipi, ãti pakini õti-saaki iuaĩkana nõkitikaua —itxa Xesosi.

³⁴ Xesosi moianariakori !imarotari isãkire. Ikara sãkiretxi kipatakori atoko itxa. Ininiã kona ninoa imarotari isãkire.

Mõsiãreti Xesosi Makananitini

(Mateo 20.29-34; Marko 10.46-52)

³⁵ Xesosi apokaãpota Xerikoo sitatxiti takote. Mõsiãreti kimapori tiniãpo iitopãkanãta. Amanããntaro txineiro. ³⁶ Ikenakotari kãkiti kimaporiã napakani, ininiã:

—Kiripa ikara? —itxa.

³⁷ —Xesosi Nasaree sitatxitikiri, iuara napaãpota —itxana apanakini.

³⁸ Ininiã iua mõsiãreti akirikata:

—Xesosi, Taviini apika mekanirii, piamonĩkanoko —itxa.

³⁹ Ninoa iikiikakani txitari iua:

—!Pakiripoatape —itxana.

Txama iteene iua akirikata iuaĩkana:

—Taviini apika mekaniri, piamonĩkano —itxari.

⁴⁰ Ininiã Xesosi iotoka. Amanããna kãkiti:

—Ere kiki himina notamoni —itxa Xesosi.

⁴¹ Xesosi takote apokasaaki, Xesosi pimaãri:

—Kipa pinireka nikaminii pitemoni?

—Kõsiãrepeka ninini ninireka —itxari.

⁴² Ininiã Xesosi txari:

—Kõsiãrepekai uatxa, kotxi pauikari nisãkire —itxa.

⁴³ Iuasaakipeka iua kiki kõsiãrepeka itxa. Ininiã iua saãpota Xesosi tikini. Teoso ereka inini pirena isãpireãpota. Ikinimane kãkiti itikasaakiri Xesosi kamakiti iuamoni.

—Peerekari Teoso —itxana.

Sakeo Pirena

19 Xesosi Xerosareẽmoni isikasaaki, Xerikoo sitatxiti apanĩkaki inapaãpota. ² Iuaã aua kiki, Sakeo

inakori. Iua katiiri. Iua kãkiti txineirote apotiitakari auĩtetxiakori ikapani. Apanakini txineiro apotiitakani auĩte itxaua. Iua misirienetari kãkiti. Imaktxakari txineiro auĩtetxiakori ikapani. Txamari apikomoni imaktxaka. Kona atão ikamakiti. !Erekari iua.

³ Xesosi apokasaaki Xerikoo, iua Sakeo nirekari Xesosi atamatini. !Apakata atamatiniri, kotxi paĩtiri iua. Itomaneri kãkiti Xesosi itinikata auanãta. Ininiã !apakata mõtãnoti atamatiniri iua. ⁴ Ininiã imiteka Xesosi apisa, aaminaã kanĩka itxa. Xesosi iuaã napakasaaki, iposotari itikiniri. ⁵ Xesosi apoka iua aamina patapi. Ionakaãta itxa. Itxari:

—Sakeo pikatxaka, katima pitxa. Uatxa, paapokomoni nisako, nianapokotini ikapani —itxa Xesosi.

⁶ Ininiã katxaka katimapeka itxa. Ipoxoniritika iua apakapari Xesosi. ⁷ Ikinimane iuaã auakani misãkirepiretari Xesosi. Itxana:

—Xesosi sari maerekati kamakari aapokomoni. Kininiãpa iua sa iua aapokomoni? —itxana.

⁸ Ininiã iua aapoko apoãka atoko, Sakeo tima isãkiauatinini ikapani. Ininiã itxari Xesosi:

—Ipxixini ninakiti nisika matiinimoni. Niĩtirĩkakiti iuaĩkana nisikanako kãkiti. Txineiro niĩtirĩkiniã, ininiã iuaĩkana ipi ipi pakinikata nisikariko nimisiritakinimoni —itxa Sakeo.

⁹ Ininiã Xesosi:

—Ia kiki Aprão apika mekaniri apaka. Uatxa imaerekani makatxakaãka, kotxi itakanapari maerekati ikamakiti. ¹⁰ Kãkiti itari iaxitikiri apoka ikorapokoriti kãkiti pĩpinanaãkani inisini, imaerekani imaktxakini ikapani —itxa Xesosi.

Nitiritxi Erekari, Nitiritxi Maerekati Pakini

(Mateo 25.14-30)

¹¹ Eereka Xesosi sãpiretari ia sãpirenatxi atão inakari oerekiko. Oerekari ia sãpirenatxi, kotxi Xerosareẽ nino apokaãpota. Kãkiti uãkatari paĩtiki Teoso ikini-mane auĩte ininiua. ¹² Ia atoko itxa:

—Kiki aiamaapeka õtakoxiti isini, auĩtetxi ininiua ikapani. Iua nirekari isini, ininiã eereka inirekari ikanapirini. ¹³ Ininiã isini apisapanika akiritari tesi initiriakori. Isikanapana txineiro tesi ota oro kamakoro. ãtoka isikaãpotana initiriakori. Itxa: "Nota ãtiãtaã nauakasaa-ki, hiamotari tiitxi. Eereka pivẽtxitari apikomoni txineiro hãpakapini ikapani. Ikara atoko hĩtxako," itxa.

¹⁴ —Isipeka atoko kãkiti iuaã auakani !inirekari iua auĩtetxi ininiua, kotxi omanatarina. Ininiã ninoa iokanapireta iuamoni: "Ate !nirekai pite aãuĩte pininiua," itxana ninoa.

¹⁵ —Iuasaaki iua ãtiãtaã auĩtetxipeka itxaua. Ikanapiriãkasaaki akiritana initiriakori, txineiro isikanapakini. Ininiã iua txana ninoa: "Hõerekano txineiro apikomoni hãpakapakito," itxa. ¹⁶ ãti initiri apoka iuamoni. "Nipatrãote, pite sikanapano ãtoka ota. Uatxa tesipeka ota aua notamoni," itxa.

¹⁷ —Iuasaaki auĩtetxi txari iua: "Pite kamakiti peerekari. Pite ninitiri erekari. ãtonoka ota nisikapekai,

iuaritika piparíka peerekari. Uatxa tesi pakini sitatxiti auakani auíte pitxauako,” itxa.

¹⁸ —Átipekana apoka auítetximoni: “Áti ota pisikana-pano nota. Uatxa síkokepa ota aua notamoni,” itxa iniriti.

¹⁹ —Ininiã auítetxi txari: “Erekapitikari. Ininiã síko pakini sitatxiti auakani auíte pitxauako,” itxari.

²⁰ —Átipekana apoka auítetximoni: “Oniã pinakito txineiro. Mãkatxi mataã niapirikaro, poteta nitxaro pitxineirote. ²¹ Nota píakai pite. Pataparaxinirei. Nimarotari pite amotari áti kamakiti. Piamotari pikiena áti kãkiti kiena,” itxa.

²² —Ininiã iua auítetxi apakapapiretari: “Pite ninitiri maerekati pitxaua. Pite txano nota kiki kataparaxinireri nitxaua. Pimarotari niamotiniri áti kamakiti. Pimarotari niamotiniri áti kãkiti kiena. ²³ Ikara atoko ininiã, pimanirekakaniãri piparíkauatini, kinirepa kona pisikataro nitxineirote pãkomoni? Pisikaãkamaroko, napakapamaroko apikomoni nitxineirote nikanapiriãkasaaki,” itxa auítetxi.

²⁴ —Ininiã iua paniãtana iuaã auakani: “Himakatxakaroko nitxineirote iuamoni nisikakito. Hísikaro tesi ota auakitimoni,” itxa.

²⁵ —“Auapeka tesi ota iuamoni,” itxarina.

²⁶ —Ininiã auítetxi apakapapiretana: “Piparíkauatiniã, ininiã pinakiti itori aua, ininiã apikomoni papakapa. Pite iarinouatiniã, ininiã ikara xika pinakito poião. Áti õti piarini xika ikara poiãori makatxakaãkako apaka. ²⁷ Uatxa himinana notamoni nimokaiakariakori, kotxi ninoa !inirekano nota iauítena nininiu. Hõkana ninoa nota apisatoõ,” itxa auítetxi.

Xesosi Xerosareë Apokaãpotini

(Mateo 21.1-11; Marko 11.1-11; Xoão 12.12-19)

²⁸ Ikara inaãka atoko, Xesosi sari imoianariakori apisa Xerosareëmoni. ²⁹ Xerosareëmoni isikasaakina, apokaãpotana Petxipaxee, Petãnia pakini aapokotxiti. Ninoa ipi aapokotxi Oriva inakori xirata takote. Iuaã auakasaaki, Xesosi iokanatanana ipi imoianariakori aapokotximoni.

³⁰ —Ikara aapokotximoni hĩa. Iuaã hãpokariko xomẽta ãkiri, iaxiriãkori. Iua xomẽta ãkiri kãkiti maitopãkakotipanika inakori. Hĩkoxiripatariko iua. Himinari notamoni. ³¹ Ipitikiri akiritiniã: “Kinirepa hĩte koxiripataro nipira?” inakasaakii, ia atoko hĩtxariko: “Apiananiri nirekari iua,” hĩtxako —itxana.

³² Iuaã apokasaakina, ikinika Xesosi sãkire iaõka auapeka. ³³ Ninoa koxiripatakasaakiri xomẽta ãkiri, ipitikiri apoka.

—Kinirepa nipira hĩkoxirika? —itxa.

³⁴ Ininiã ninoa:

—Apiananiri nirekari iua —itxana.

³⁵ Ininiã anikarina xomẽta ãkiri Xesosimoni. Imoianariakori takari imãkana xomẽta nopini. Imoianatarina Xesosi xomẽta nopini iitopãkini íkapani.

³⁶ Xesosi saãpotakasaaki Xerosareëmoni, apanakini kãkiti matameëkari imãkana kimaporiãpo Xesosi napini íkapani. ³⁷ Ótanoxirataro Oriva inakori iokiriãtakasaa-

ki, ninoa imakinika ipoxokoniritikana akiripoakatana, kotxi itikapekarina itori Teoso posotiire.

³⁸ —Peerekari auítetxi, Apiananiri iokanatakiti kãkitimoni. Teoso takari erekari iuamoni. Ininiã Teoso !omanataikari kãkiti. Peerekari Teoso, iaxiti apiko nopinixiti auakari. Apiananiri itxaua —itxanãtana ninoa iuasaaki.

³⁹ Iuaã kãkiti itomaneri sauaki aua pariseoakori apaka. Ninoa txari Xesosi:

—Koerekareri, piotokakana pimoianariakori ikara isãkirena.

⁴⁰ Ininiã Xesosi:

—Atão ninoa akiritakiti. Ininiã !nipinitana iotokakiniri. Nimaairitakaniãna isãkirena nota Apiananiri nininiãua, ininiã Teoso txíkitakari kai soro sãkiauatinu ikara sãkire isãpiretini —itxa Xesosi.

Xesosi Txiapata Xerosareëkini Itiretini

⁴¹ Ninoa apokaãpotakasaaki Xerosareë, Xesosi Xerosareë atamatakasaaki, iua txiapata, kotxi iuaã aua mirikiniti kãkiti isãkire mauikakani. ⁴² Ixinikasaakina Xerosareë auakani itxa:

—!Himarotari hĩkamakiti tĩkane hãuini ereka inini íkapani, neenamataxi mauakani íkapani. Ninirekari himarotiniri, txamari uatxa ikara himarotini kipataãka himimarotakaniri íkapani. ⁴³ Áti õti himokaiakarini ãkita hĩte. Ininiã kona kãkiti pokíka sitatxi, kona íroã. Iuasaaki himitekini !auari. Hãkitapeëkaikako.

⁴⁴ Himokaiakarini xipokariko ia sitatxi. Ikinimaneko okaãkako. Kai áti kai nopini auakari !ikaikotaika. Imakinika xipope. Iua atoko inakari auako, kotxi hĩte !apakapari Teoso hĩtemoni apokasaaki.

Pirãtxi Vẽtxitakani Omitikiko

(Mateo 21.12-17; Marko 11.15-19; Xoão 2.13-22)

⁴⁵ Xesosi apokasaaki Xerosareë, isari Teoso misãkiretiko aikotiã. Iuaã auari kãkiti tiitxi vẽtxitakani, ininiã Xesosi omitikana. ⁴⁶ Xesosi txana ninoa:

—Teoso sãkire iõkatsopataro txari:

Ia naapoko, “Teoso misãkiretiko aikoti” akiritaãkako, itxa. Txamari hĩte txíkitakari ia aiko kíitiririni iomaãtiniãtaã ininiu —itxa Xesosi.

⁴⁷ Teoso misãkiretiko aikoti ãki ikiniõtika oerekaruata. Iuasaaki sasetotxi auíteakori, kaiõkatsopareriakori, kãkiti auíteakori pakini kinirão okaka txari Xesosi.

⁴⁸ Txamari itomaneri kãkiti potxitari Xesosi oerekakiti sãkiretxiti. Ininiã ninoa kaikotapika Xesosikata ikinika isãkire imarotinina íkapani. Ikara xika liposotarina okiniri iua iuasaaki.

Xesosi Paniãtakari Moerekakoni

(Mateo 21.23-27; Marko 11.27-33)

20 Xesosi Teoso iokanapirena erekari isãpiretakasaaki Teoso misãkiretiko aikoti ãki, iuasaaki sasetotxi auíteakori, kaiõkatsopareriakori, kãkiti auíteakori pakini apoka. ² Ninoa pimaãri Xesosi:

—Pite omitikana tiitxi sikakani Teoso misäkiretiko aikotiã auakani. Kipaniãpa pikamari ïkora pikamakiti? Kipa paniãtai? —itxana.

³ Ininiã Xesosi txana:

—Nota apaka pimarauatako hïtemoni. Ætinoka nipi-maãiko hïte. Ininiã hãpakapapiretano. ⁴ “Kipa paniãtari Xoãoni ipatxisarauatini? Teosokani paniãtari Xoão? Kãkitikani paniãtari Xoão?” —itxa Xesosi.

⁵ Eereka ninoakakarini isãkirauatana:

—Kanatokopa atxa? “Teosora,” aniniã, ininiã ipaniã-tamaua eereka: “Kinirepa kona hãuikatari Xoão sãkire?” itxamaua ate. ⁶ “Kãkitira paniãtari Xoão,” aniniã, ininiã kãkiti kiporonakauako ate kai soroã, kotxi ninoamoni Xoão Teoso sãkire sãpiretakari itxaua. Ininiã kanatokopa atxa? —itxakakauana.

⁷ Ininiã eereka ninoa apakapapiretari Xesosi:

—Kona ate imarotari —itxana.

⁸ Eereka Xesosi txana:

—Ininiã nota apaka kona nisãpiretai nipaniãtakiri uãka —itxa Xesosi.

Parïkauatakani Maerekani

(Mateo 21.33-46; Marko 12.1-12)

⁹ Eereka Xesosi sãpiretari kãkiti ia sãpirenatxi atão inakari oerekiko. Ia atoko itxa:

—Aua kiki. Itakari amãtiiri ova inakoro. Ovanoka itaka ikikioteã. Eereka ïikitxitana kãkiti itakare nïkatakani. Eereka isari ãti tixini. Iuaã mapakanani ikaikota.

¹⁰ Oamiko manapi iokanatarini iniriti apakapiniri ipixini amãtiiri. Txamari amãtiiri nïkatakani noropatari iua nitiri. Ininiã eereka iokanatarina iua. Kona axapiti amãtiiri anika ipatrãotemoni. ¹¹ Ininiã iuaïkana ãti iniriti iokanata. Iuaïkana ninoa noropatari iua iniriti. Imisiritarina. Eereka iokanatarini iua. Kona axapiti amãtiiri anika ipatrãotemoni. ¹² Iuaïkana ãti iniriti iokanata ikikiotemoni. Iuaïkana ikarotarina, iokanata itxarina. Kona anikari axapiti amãtiiri iuamoni. ¹³ Iua katakareri txari: “Kipa nikamaã? Ari, uatxa nimarotapekari. Namarite nitiretakiti niokanatako ninoamoni. Ninoa paxitapitikariko iua,” itxama.

¹⁴ —Amãtiiri nïkatakani atapari amãtiiri takakari ãkiri apokaãpotini. Ininiã itxana: “Katakareri ãkiri ina. Katakareri ipïkasaaki, iua ãkiri apakapari ikinika. Ininiã maõkari iua. Ininiã ikinika itakare aua atemoni,” itxana.

¹⁵ —Ininiã ninoa kosekaïtotari katakareri ãkiri, mapara okaïtota itxarina. Ininiã okapirina.

Ininiã Xesosi pimaãri kãkiti iuaã auakani:

—Kiripa iua katakareri kamaã? ¹⁶ Iua okanako ikinipoko ninoa. Itakare apanakinimoni sika itxako —itxa Xesosi.

Kãkiti kenakotakasaakiri ikara pirena itxana:

—Ikara atoko inakari ïanireka —itxana ninoa.

¹⁷ Ininiã Xesosi iteene atamatana.

—Ininiãkara natokopa itxa Teoso sãkire iõkatsopatakori oerekiniua?

Aapokotxi kamakani kona nirekari ãtika kai soro. Iua kai imanirekakiniti kai apiari itxapekua. Apanakini kai soro maïkakari itxaua.

Itxa Teoso sãkire iõkatsopatakori. ¹⁸ Kãkiti mãkititiniã ïkora kai xika, ikarotaãka. ïkora kai irikiniã kãkiti nopini, pomaïpeka itxana. Ininiã eereka aãpani itxaua —itxa Xesosi.

Homano Auïte ïkitxitiko

(Mateo 22.15-22; Marko 12.13-17)

¹⁹ Iuasaaki Xesosi sãkirauatakasaaki, sasetotxi auïteakori, kaiõkatsopareriakori pakini, nirekari maïkiniri Xesosi, okinirina ïkapani, kotxi ninoamoni ikara Xesosi sãpiretakiti oerekari kãkiti ninoa nirekiniri okiniri Xesosi. Txamari ïmaïkarina, kotxi ipïkarina apanakini kãkiti. ²⁰ Ikiniõtika ninoa itikapikarina Xesosi sinimoni imarotinina ïkapani. Ininiã ninoa ïikitxitari kamïkapirirerini Xesosi imisãkiretinina ïkapani. Ninoa nirekari Xesosi kerokiniri isãkire. Ikerokiniãri, iposotarina anikiniri auïtetxiakorimoni okinirina ïkapani. ²¹ Ininiã ninoa kamïkapirirerini apoka Xesosimoni.

—Koerekareri, ate imarotari atãopitikara pisãkire. Pite oerekari ikinipoko kãkiti atão Teoso nireëkiti kamiko. Poerekakiti sãkiretxiti kãkiti apiarinimoni, iuatxikana poerekari kãkiti poiãorini. ²² Atãokani txineiro asikini Homanoakori auïtemoni, Sesa inakorimoni? Apakata amasikakaniro iuamoni? —itxana ninoa.

²³ Xesosi imarotari ninoa nirekari ikerokiniri isãkire, ininiã iua txana:

—Kinirepa hãtamakaerekatano nota? ²⁴ Poerekano txineiro ota. Kisanõkapa ia? Kiuãkapa aua uai? —itxa.

Ininiã ninoa:

—Sesa sanõka, iuãka apaka aua —itxana.

²⁵ Ininiã Xesosi:

—Hïsikariko Sesamoni iua nakiti. Hïsikariko Teosomoni iua nakiti —itxa Xesosi.

²⁶ Ninoa nirekari Xesosi kerokiniri isãkire kãkiti apisatoõ, txamari ïkerokari. Ininiã ninoa tsořkaãta Xesosi apakapapiretakiti ikenakotakasaakina. Apikomoni ïsãkirauataikana.

Ipïkari Õkitikiniua Mauikakoni

(Mateo 22.23-33; Marko 12.18-27)

²⁷ Ikara inaãka atoko, apoka satoseoakori inakoni. Satoseo kona auikari ipïkari iuaïkana õkitikiniua. Ninoa misãkiretari Xesosi. ²⁸ Itxana:

—Koerekareri, kitxakapirïka Moisesini iõkatsopatarini ia atoko inakari: “Kiki meenetipanika ipininiã, iua itari takaroko tikinitakoro. Iua itari keene ininiã, itakauãkatari amarini iua itarini ipïpekarini uãka,” itxa Moisesini. ²⁹ Setxi itaritxiakori aua mitxi ïkorapokoriti. Apia kiomanetakari ïtaniriuata. Meenetipanika ipina.

³⁰ Itari takaro iuani tikinitakito. Iua apaka ipina meenetipanika. ³¹ Iuaïkana ãti itari takaro oa. Iuaïkana ipina meenetipanika. Iua atokotxikana itxana imakinikana itariakori. ³² Eereka oanipekana opïpe apaka. ³³ Ipïkani õkitikasaakia, kiripa oïtaniri? Kotxi ikinikana takapekaro oa —itxana.

³⁴ Ininiã Xesosi:

—Uatxa ïkorasaaki kãkiti ïtaniriuata. ³⁵ Teoso nakiti-akori iuaïkana ôkitikasaakiaua, ïtaniriuataikana. ³⁶ Ninoã ïlipinaika, kotxi Teoso nitiriakori iaxitikini atoko itx-auanako. Iuasaaki Teoso anaakori atoko itxauana, kotxi Teoso ôkitikapekana ninoã. ³⁷ Hïte kerokari hïsäkire. Hïte säkire txari: “Ipïkani !ôkitikaikaua.” Moisesini oerekaua ipïkani iuaïkana ôkitikapanikaua. Iua iôkatsopatakasaakiri aamina tirinakari pirena, isãpiretari Teoso säpiretakiti. Ia atoko itxa Teoso iuasaaki: “Nota Apraão Teosone, Isaki Teosone, Xakoo Teosone pakini nitxaua,” itxa Teoso. ³⁸ Ininiã ninoã Apraão, Isaki, Xakoo auapanika, kotxi Teoso ïipïkani Teosoneni. Auãki inakani Teosonera iua, kotxi iuamoni ikinimane auãkipanika —itxa Xesosi.

³⁹ Eereka ätikaka kaiôkatsopareriakori txari:

—Koerekereri, atãopitikara pisãkire —itxana.

⁴⁰ Ikara inaãka atoko kãkiti pïkarauata apikomoni ipimarauatini.

Teoso Mereëkiti Tavii Apika Mekaniri Itxaua

(Mateo 22.41-46; Marko 12.35-37)

⁴¹ Ininiã Xesosi pimaãna:

—Kinirepa isãpiretaãka Teoso mereëkiti Taviini apika mekaniri ininiua? ⁴² Kotxi Taviini iôkatsopata Xikari aãt-sopateë. Itxari:

Apiananiri txari niauïtemoni: “Nota kikomoni piitopãka.

⁴³ Piitopãkiniritika nixipokariko pimokaiakariakori. Nikamariko ninoã pikiti pitakiniãtaã atoko ininiua.” Itxa Taviini xikare. ⁴⁴ Taviini akiritari Teoso Mereëkiti “Niauïte.” Ininiãkara kanatokopa iua Tavii apika mekaniri? —itxa Xesosi.

Kaiôkatsoparerini Maerekani

(Mateo 23.1-36; Marko 12.38-40)

⁴⁵ Eereka kãkiti apisatoõ Xesosi ôtäkikana imoianariakori. ⁴⁶ Ia atoko itxa:

—Erepaniko, kaiôkatsoparerini misirienetini. Ninoã ieretakari mãkatxi ïtanori, peereri, apanakini atamatinina ïkapani. Tiitxi amotikoãtaã ninoã potxitari kãkiti ninoakata säkirauatini apanakini atamatinina ïkapani. Ninoã potxitari iitopãkinina auïtetxi topãkiniãtaã aiko äki Xoteo apotiitiniãtaãua. Kiinirisaaki ninoã nirekari apiari topãkiniãtaã iitopãkinina. ⁴⁷ Kiki ipïkasaaki, ninoã misiritaro tikinitakoro. Ninoã mixirikari oaãpoko, iuaritika imisãkiretarina Teoso. Teoso imisãkiretakasaakina, kaiãori säkiretxi isãkiretana. Ininiã apanakini kenakotakasaakiri, ninoã xinikari: “Atão iua imarotari Teosokata isãkirauatini,” itxana. Txamari Teoso kamaãkaretxitana, ininiã apiata imisiritaãkanako.

Tikinitakoro Matxineiroto Sikakito

(Marko 12.41-44)

21 Xesosi säkirauatakasaaki Teoso misãkiretiko aikoti äki, itikari katiirini takiniro itxineirotena kaixa äki Teoso ïkapani. ² Iuasaaki oãua tikinitakoro

matiito. Ôtaniri !auaika. Oa sikaro ipi txineiro ota okinika oamoni auakaro. ³ Ininiã Xesosi txaxa:

—Atãopitikara, okira sito sikari apiata. ⁴ Kotxi apanakini sikaro itxineirotena itetakito. Okira sikari okinika onakito —itxa Xesosi.

Teoso Misãkiretiko Aikoti Irikiko

(Mateo 24.1-2; Marko 13.1-2)

⁵ Äti ôti Teoso misãkiretiko aikoti äki aua Xesosi imoianariakorikata. Aiko ereri pirena isãkirenãtana.

—Uai peereri. Ere kai sorokiniri paretxiã auakari pakaronepokori. Patamatari kãkiti sikakiti Teosomoni —itxana.

⁶ Ininiã Xesosi txana:

—Ari atãopitikara peerekari. Txamari apokapitikako äti ôti ia aiko irikiko ïkapani. Iuasaaki kai äti kai nopini auakari !auaika. Ikinipoko irikaãkako —itxa Xesosi.

Misirikaretxi Apokaenetini

(Mateo 24.3-14; Marko 13.3-13)

⁷ Ininiã ninoã pimaãri:

—Koerekereri, kirisaakipa ikara atoko inakari aua-pani? Kiãtokopa itxa ia aiko Teoso misãkiretiko irikini ôti manapi aimarotini ïkapani —itxana.

⁸ Ininiã Xesosi apakapapiretana:

—Erepaniko, xipokatxi ôti apokaãpotakasaaki, kãkiti nirekari imisirienetini hïte. Ito aãpirena auako. Kaiãopokori kiki säkire: “Teoso mereëkitikarano nota. Nota apokapeka uai,” itxamana. Paxirari ninoã säkire. !Himaãkatapena ninoã. !Himoianatapena ninoã. ⁹ Neenamtxiene hïkenakoenetakasaaki, !hïpïkarauatape. Iua atoko inakari merepanika auako. Iuasaaki xipokatxi ôti !apokapanika —itxa Xesosi.

¹⁰ —Äti uãka kamari neenamtxi äti uãkakata. Äti auïtetxi sotatoneakori neenamauata äti auïtetxi sotatoneakorikata. ¹¹ Iuasaaki xipokatxi ôti apisa, nota apokini apisa, itixi iakeëkatakato. Natxi auako. Itori amianari auako. Apaka kãkiti atamatakiti iaxiti kamapïkaretana.

¹² —Ikara inakari apisa, apanakini maïkaiko hïte. Himisiritaãkako. Xoteoakori anikaiko aiko Xoteo apotiitiniãtaãua Xoteoakori auïte apisatoõ apoïtiniina ïkapani. Hïtakaãka kateia äki. Ninoã anikaiko hïte itixi auakani auïteakorimoni hïte apoïtinina ïkapani. Iua atokokanerako hinaãkako nisãkire hãuikini xika.

¹³ Iuasaaki auïtetxiakori apisatoõ hãuakasaaki, hïsäpiretariko Teoso iokanapirena erekari. ¹⁴ Ninoã himisãkiretini apisa, maerekaxiniretika !hïtxape. Kona hïpïkarauatape, ¹⁵ kotxi ninoã apisatoõ hãuakasaaki, nota sikaimaroretai hïte, ininiã himokaiakariakori !iposotari apakapapiretiniina hïte. !Iposotarina isãpiretiniina: “Kona atão pisãkire,” !itxana. ¹⁶ Hinoroma, hïrimi, hïtariakorima, apanakini hinirimanema, haõki-manerema pakini sikaiko hïte himokaiakariakorimoni. Ätikaka hïte okaãkako iuasaaki. ¹⁷ Ikinimane omanataiko hïte nisãkire hãuikini xika. ¹⁸ Iuaritika Teoso !auiritari ätika hiãko maporokiko, kotxi Teoso iteene nïkatapitikaiko hïte. ¹⁹ Himïteenekiniãri ikinika

himisiritiko, ininiã Teoso txíkitakaiko átipirika iuakata hãuapininiika hinini íkapani —itxa Xesosi.

Xerosareë Xipokiko Pirena
(Mateo 24.15-28; Marko 13.14-23)

²⁰ Apikomoni Xesosi txari:

—Hãtamatakasaakiri sotatoakori ákitiniri Xerosareë, iuasaaki himarotariko pakotapaniri sitatxi xipokini.

²¹ Iuasaaki híte Xotéia tãpa auakani himitekako oxiratarimoni. Sitatxi hãuiniã, ininiã himitekako. Mapara hãuiniã, kona híkanapiripe sitatximoni, ²² kotxi iuasaaki kãkiti misiritiko õti apoka. Teoso sãkire iõkatsopatakori sãpiretapekari ikara õti apokini. ²³ Iuasaaki lerekapaniri sito kamixiro íkapani, kaxitakarero íkapani, kotxi omitekini ípakata. Xoteo auiniãtaã auapitikako iteene imisiritikona tíkane, kotxi iuasaaki Teoso oerekari iua omanãkare Xoteoakorimoni. ²⁴ Itomaneri kãkiti okaãkako saasara atoko inakaroã. Apanakini anikaãkako ikini uãka tixinemoni. Xoteo minakanuia xipokariko sitatxi Xerosareë. Teoso auiritana ninoa kaikotini iuaã. Eereka Teoso xipokariko ninoa tapara. Eereka !auaikana —itxa Xesosi.

Kãkiti Itari Iaxitikiri Kanapiriini
(Mateo 24.29-31; Marko 13.24-27)

²⁵ Apikomoni Xesosi txari:

—Nota uai apokini apisa, atokatxi, kasiri, iõriki pakini oerekariko kãkiti nota iposope uai napokini. Apaka potxoari uiniti auari tsakati mitari. Iua tsakati miramaneri iene. Ikara xika itixi auakani kamaxirexinirepeka itxanako. ²⁶ Kãkiti ákipa iotokako ipíkare xika. Itixi misiritiko xika ipíkarauata, kotxi iõriki, ikinika iaxiti auakani iakeékatako. ²⁷ Iuasaaki nota, hítari iaxitikiri katxakaãpota katxiãrikata. Iuasaaki ikinimane atapanoko nota. Iuasaaki kaposotiireno nota. Niotximerekata napoka uai. ²⁸ Ikara itixi misiritiko apokaãpotakasaaki, haiamatako. Hionakaãtako, kotxi paítiki nota kanapiriã híte napini íkapani. Iuasaaki nimakaxakai híte ikinika maerekati auiniãtaã —itxa Xesosi.

Piko Mina Pirena
(Mateo 24.32-35; Marko 13.28-31)

²⁹ Xesosi sãpiretari áti sãpirenatxi atão inakari oerekiko. Itxari:

—Híxinikari aamina piko inakori. Apanakini átião aamina apaka híxinika. ³⁰ Pooõporipeka onakasaaki, otomorekasaaki, “Kamoí apokanapanoka,” hítxa. ³¹ Iua atokokana ikara misirikaretxi mixikanani nisãpiretakiti hítikasaaki, iuasaaki himarotariko paítiki Teoso ikini mane auíte itxauako.

³² —Ia nisãkire atão. Itixi auakani !ixipoka ikinipoko nisãpiretakiti mapokakani apisa. ³³ Iaxiti xipokapitikako. Íkoraxiti apaka xipokapitikako. Iuaritika nota sãkire !ixipoka.

Iãtapakori Ōti Pirena

³⁴ —Erepaniko, maerekaxiniretika kona hítxape. !Hísarauatape. !Hípoãtape. Híparíkanoka !híxinikapeko, kotxi hísarauatiniã, hípoãtiniã, híparíkanoka híxinikiniã, !híxinikari nikanapiriini õti, kotxi íkora õti himimarotakani õtisaaki, napokako. Erepaniko, kotxi txikatoro atoko itxa napokini. Kãkiti !imarotapaniri napokini õti. ³⁵ Imakinika kãkiti itixi auakani imarotariko napokini iuasaaki. ³⁶ Hiãtapariko nikanapiriini. Átipirika himisãkiretariko Teoso. Hamanaãriko Teoso ikara inakari mamisiritakanii híte. Hamanaãriko Teoso himapãtauatakani íkapani hítari iaxitikiri apokasaaki iua apisatoõ hítimakasaaki —itxa Xesosi.

³⁷ Ikiniõtika Xesosi sari Teoso misãkiretiko aikotimoni Teoso sãkire oerekini íkapani. Ikiniõtika mapiãnikata Xesosi sari õtanoxiratarimoni, Oriva inakorimoni. ³⁸ Íkanõkapanika kãkiti apoka Teoso misãkiretiko aikotiã Xesosi sãkire ikenakotinina íkapani.

Satanasi Íroã Xotasi Xinireë

(Mateo 26.1-5, 14-16; Marko 14.1-2, 10-11; Xoão 11.45-54)

22 Kaiamapeka Pãskoa inakori kiiniriti apokini. Iua kiiniriti Xoteoakori nikari pão matireëkati.

² Iuasaaki sasetotxi auíteakori, kaiõkatsopareriakori pakini nirekari Xesosi okinina, txamari, ninoa píkari apanakini kãkiti, kotxi ninoa apokaerekatari Xesosi.

³ Iuasaaki Satanasi íroãtitaro Xotasi Isikariotxi inakori. Iua Xotasi Xesosi moianarikamara, apanakinikata.

⁴ Iuasaaki iua sari sasetotxi auíteakorimoni, Teoso misãkiretiko aikoti nĩkatakani auíteakorimoni. Iuasaaki isãkiauata ninoakata Xesosi imĩkapiritini íkapani. Iuasaaki ninoa xinikaxitita:

—Kiãtokopa itxatari Xesosi isikini atemoni?

⁵ Sasetotxi auíteakori enenĩka. Ninoa txari Xotasi moni:

—Pisikasaakiri Xesosi atemoni, aĩkitxitaiko pite —itxana Xotasimoni.

⁶ —Ateeneka —itxa Xotasi.

Ikara atoko inaãka atoko Xotasi iãtapari isikiniri õti manapi. Inirekari kãkiti mauakanisaaki, Xesosi imĩkapiritini.

Pãskoa Kiiniriti Kamiko

(Mateo 26.17-25; Marko 14.12-21)

⁷ Iuasaaki kãkiti parĩkauata Pãskoa kiiniriti ikaminina íkapani. Iua kiiniriti auakasaaki, itotarina pão matireëkati inikinina. Iuasaaki okarina soti auíte ákiri kiinirisaaki iniãkitina íkapani. ⁸ Xesosi paniãtana Xoão, Petro pakini:

—Hísaiko. Hãpotiitariko nipokori Pãskoa kiiniriti íkapani —itxa.

⁹ Ininiã ninoa:

—Namonipa akamatari kiiniri? —itxana.

¹⁰ Ininiã Xesosi:

—Xerosareëmoni hísa. Iuaã hítikari kiki kaminiri sito parĩka. Iua apaãntari áparaã. Kopiti ikiiã anikanãta.

Iua aókitaiko híte. Iuakata sa hítxako. Híiroã aapokotxi iua íroiniãtaã. ¹¹ Himisãkiretari kauiniri. Hítxariko iua: “Koerekareri nirekari imarotini: ‘Namonipa ianapokotakani kaikotiniãtaã iriko? Iuaã inirekari inapiniri Páskoã õti imoianariakorikata,’ hítxariko iua.”

¹² Iuasaaki kauiniri oerekai itanokiri koa mitari iuaã kiniri íkapani. Imakinika tiitxi iposope. Iuaãrako hãpotitari imakinika Páskoã kiiniriti íkapani —itxa Xesosi.

¹³ Ininiã sa itxana. Apoka itxarina ikinika Xesosi sãkire iaõka. Ininiã iuaã ninoa maiamatari kiiniri.

Xesosi Íto, Iarêka Pakini

(Mateo 26.26-30; Marko 14.22-26; 1 Koríto 11.23-25)

¹⁴ Ininiã Páskoã kiiniriti potarikasaaki, Xesosi imoianariakorikata topãka. ¹⁵ Ininiã Xesosi txana:

—Iteene ninirekari hítekata ninikiniri ia nipokori Páskoã kiiniritisaaki, natatsiirauatini apisa. ¹⁶ Ia atoko inakari nipokori ininikaikariko hítekata. Teoso ikini-manẽ auíte inakasaakia, iuasaakiikarako ninikapitikariko iuaíkana.

¹⁷ Eereka iua kosekari iãtatxi koana ovaã iãriãti. Ininiã itxa:

—Niri, erekapitikari ia pisikakiti —itxari Teoso.

Eereka itxana imoianariakori:

—Ia iãriã hãpakapako. Híkinika hiãtariko. ¹⁸ Atão nisãpiretai. !Niãtaikaroko ovaã, Teoso ikini-manẽ auíte iminakanisaakia. Teoso ikini-manẽ auíte inakasaakia, iuasaakiikarako iuaíkana niãtariko ovaã —itxa Xesosi.

¹⁹ Eereka ikosekari komiri:

—Erekapitikari ia komiri pisikakiti atemoni —itxari Teoso.

Eereka imapixinikaãpotari, sikaãpota itxana imoianariakori:

—Ia niíto okaãka híte íkapani. Ia komiri hinikasaaki, híxinikanoko nota. Híxinikari nipinini híte íkapani.

²⁰ Inikaãkarina atoko, ikosekaro ovaã. Isikana imoianariakori. Ininiã itxa:

—Ia niarêka xiketakariki makatxakariko híte maerekani. Teoso sãpiretapekari kãkiti ikamaenetakiti amaneri kãkiti íkapani. Ia niarêka oerekari kãkiti, Teoso kamapekari ikamaenetakiti. ²¹ Iua nimíkapiritakiri uatxa uai topãka notakata. ²² Nota hítari iaxitikiri okaãkako. Teoso sãkire iõkatsopatakori sãpiretapekari nipinini tĩkane. Nota hítari iaxitikiri mĩkapiritakariki iteene misiritaãkako —itxa Xesosi.

²³ Xesosi moianariakori ninoakakarika isãkirauatana:

—Kipa sikatariki Xesosi imokaiakariakorimoni? —itxanaãtana.

Kiripa Apiatakari?

²⁴ Ikara atoko inaãka atoko Xesosi moianariakori misãkiretakakaua.

—Kiripa apiatakari txatapaniuako ate sauaki? —itxana.

²⁵ Ininiã Xesosi:

—Xoteo minakanuia auíteakori itaparasãkiretita ipaniãtana Xoteo minakanuia iauítana nirekiki ikaminina íkapani, iuaritika ninoa sãkire, “Peerekaua ate. Ate

moianatari kãkiti,” itxana. ²⁶ Híte kona ninoa atoko kona hítxape. Atxiiti apiari pitxaua híte sauaki, ininiã amarini atoko pitxauako. Auítetxi pininiãua, nitiritxi atoko pitxauako. ²⁷ Kiripa apiatakari txataua? Auítetxi nipokori nikakarikani, apiatakari txataua? Iniriti nipokori kamakarikani apiatakari txataua? Ikini-manẽ kãkiti imarotari nipokori nikakari apiatakari itxaua. Txamari nota auakasaaki kãkiti sauaki, nitiritxi atoko nitxaua, kotxi kãkiti nimoianata.

²⁸ —Xoteoakori misiritakasaakino nota, kona híte takanapano. Atão nimoianariakori hítxaua. ²⁹ Niri, auítetxi txíkitakapekano nota. Ininiã iua atokokana nota txíkitakai híte auítetxi hininiãua. ³⁰ Nota auítetxi ninakasaaki, hinipokota, hiãta hítxako notakata. Auako auítetxi topãkini híte íkapani. Ininiã iuasaaki hípaniãtana tosi nirimãnetxi Isaeo auakani ikamakitina tĩkane —itxa Xesosi.

Xesosi Sãpiretari Petro Kipatiniri Iua

(Mateo 26.31-35; Marko 14.27-31; Xoão 13.36-38)

³¹ Xesosi sãkirauata Simão Petromoni:

—Simão, Simão, Satanasi amanaãpekari Teoso pite, apanakini apaka atamakaerekatini íkapani. Ahoisi misiritiko atoko inirekari imisiritinii pite. ³² Iuaritika, nota misãkiretapekari Teoso isikataparatiniri pixinire Simão, nisãkire atão pauikini íkapani. Pikerokariko pikamakiti, iuaritika pikanapiriãpitika nota sãkire iteene iuaíkana pauikini íkapani. Eereka pisikataparaxiniretanako pitariakori nota sãkire auiãkani —itxa Xesosi sãkire.

³³ Petro txari Xesosi:

—Niauíte, nota iposope nitxa kateiamoni nisini pitekata. Pitekata iposope nitxa nipinini —itxa.

³⁴ Xesosi txari:

—Atão nisãpiretai. Ia íkanõkati patari sãkirauatini apisapanikako, ipi ãti pakinikata, “!Nimarotari iua,” pitxanoko —itxa Xesosi.

Xesosi Ôtãkikana Imoianariakori

³⁵ Eereka iuaíkana Xesosi sãkirauata imoianariakorikata:

—Mitxi nota iokanatai kãkitimoni. Iuasaaki kona nisikai txineiro. Kona nisikai sako mata. Kona nisikai sapato, iuaritika minakati auinii atxiiti? Erekari hísiniki kinika hinirekakiti mauakanisaaki? —itxa Xesosi

—Minakati lauinaua ate —itxana.

³⁶ Ininiã Xesosi txana:

—Txamari uatxa pitxineirote, sakora pakini auiniã, panika. Iouata mitaro mauakanisaakii, pimãka inopinikiri pivéxitako iouata piãmotini íkapani. ³⁷ Teoso sãkire iõkatsopatakori kitxakapiriãka txari:

Imaíkaãka, kokaniri maíkiko atoko inaãkako.

Ininiã ikara nimaíkiko apokapitikako. Ikara nota pirena kitxakapiriãka atãopitika —itxa.

³⁸ Imoianariakori txari:

—Apiananiri, patamata. Uai aua ipi iouata aneena-mauatini íkapani.

Xesosi txari:

—!Apakata ikara atoko inakari hīsākire —itxa Xesosi.

Xesosi Misākiretiniri Teoso Xetsémani Inakoriātaā

(Mateo 26.36-46; Marko 14.32-42)

³⁹ Eereka ixirata auīte Oriva inakorimoni isa, kotxi ito-tapekari iuaā isini. Imoianariakori sari iuakata. ⁴⁰ Iuaā apokasaakina, Xesosi txana:

—Satanasi nirekari maerekati hīkamini. Ininiā himisākiretariko Teoso, iua sikataparatinii, Satanasi nirekakiti himakamakani īkapani —itxa Xesosi.

⁴¹ Ininiā iuaā itakanapana imoianariakori. Apikoxāki axapiti sa itxa. Iuaā ikapotoreēkaua, misākireta itxari Teoso. ⁴² Itxari:

—Niri, !pauiritapeno paītiki natatsiirauatini, iuaritika kona pikamapiri nota nirekaākiti. Pite nirekaākiti ninireka nikamini —itxa Xesosi.

⁴³ Iuasaaki Teoso nitiri iaxitikiri apoka iuamoni isikat- aparaxiniretiniri īkapani.

⁴⁴ Iuasaaki Xesosi xinire kamaxirepeka. Ākixinireē apokapeka itsii. Ininiā iteene imisākiretari Teoso. Ininiā iinīkakare arēkatxikata tapika ixitimoni.

⁴⁵ Teoso imisākiretaka atoko, ōkitikaua, imoianari- akorimoni isa. Iua apoka ninoamoni. Imakapoanātana, kotxi isāpakapekana imatinaniuatinina xika. ⁴⁶ Ininiā akiritana:

—Kinirepa himakanāta? Hōkitikaua. Himisākiretari Teoso, Satanasi nireēkiti himakamakani tīkane —itxa Xesosi.

Xesosi Maīkiko Pirena

(Mateo 26.47-56; Marko 14.43-52; Xoāo 18.1-11)

⁴⁷ Xesosi sākirauatakasaaki imoianariakorikata, ito- maneri kākiti Xotasikata apoka. Xotasi mīkiikana ninoa Xesosi oerekini īkapani. Iua Xotasi Xesosi moianarika- mara, apanakinikata. Xotasi apokasaaki apitxokari Xe- sosi. ⁴⁸ Ininiā Xesosi txari iua:

—Xotasi, pimīkapiritatari pitari iaxitikiri papitx- okasaaki? —itxa Xesosi.

⁴⁹ Xesosi moianariakori imarotakasaakiri kākiti nirekiniri Xesosi imaīkini, itxana:

—Apiananiri, erekari atxiīti uatxa aneenamauatini, aiouataneē —itxana.

⁵⁰ Ininiā āti Xesosi moianari sauakari sasetotxi auīte apiatakari nitiri kīpita ikikomoni. ⁵¹ Ininiā Xesosi:

—Hīītoka ikara. Iaōpe.

Eereka Xesosi takapiotaua ikīpitaā. Iuasaaki kakīpi- tapeka itxa iuaīkana. ⁵² Sasetotxi auīteakori, kiomātxi- akori pakini ina Xesosi imaīkinina īkapani. Xesosi txari ninoamoni:

—Kinirepa himinari iouata, piriri pakini himaīkinino īkapani? ⁵³ Ikiniōtika hītekata naua aiko Teoso mis- ākiretikoā. Iuasaaki kona hīte maīkano. Īkanōka hina, kotxi ipiaā hīkamari maerekati —itxa Xesosi.

Petro Kipatari Xesosi Imarotini

(Mateo 26.69-75; Marko 14.54, 66-72; Xoāo 18.15-18, 25-27)

⁵⁴ Ininiā ninoa maīkari Xesosi, anika itxarina sasetotxi auīte apiatakari aapokomoni. Īroāna aapoko āki. Ininiā

Petro sari ninoa tikini. ⁵⁵ Sasetotxi aapoko takote apo- ka. Iuasaaki mapara xamina pokitakori aua. Kākiti topākanāta xamina takote. Irokanātana. Ininiā Petro topāka ninoa takote. ⁵⁶ Iuasaaki ātokoro atamatari iua xamina kamaraā. Ininiā itakote oāpoka. Omixinitari iua:

—Ia kiki Xesosikata auakari —otxa.

⁵⁷ Txamari Petro txari:

—Ātokoro, kona nimarotari iua —itxa.

⁵⁸ Eereka āti atamatari iua. Itxari iua:

—Pite Xesosi moianarikaari? —itxari.

Txamari Petro:

—Konapitini —itxa.

⁵⁹ Āti oara napa atoko āti txari:

—Atāopitikara, ikira kiki Xesosi moianaripitikara, kotxi Kariréiakiri itxaua iua —itxa.

⁶⁰ Petro txari:

—Kona nimarotari ikara pisāpiretakiti.

Iuasaaki, isākirauatakasaaki, patari sākirauata.

⁶¹ Iuasaaki Xesosi saporitika, atamata itxari Petro.

Iuasaaki, Petro xinikari mitxi Xesosi sāpiretakiti: “Patari sākirauatini apisapanikako, ipi āti pakinikata, ‘!Nimaro- tari iua,’ pitxanoko” ininiri iaōka aua. ⁶² Ininiā eereka Petro sipe. Iteene txiapata itxa.

Sotatoakori Napetiniri Xesosi

(Mateo 26.67-68; Marko 14.65)

⁶³ Xesosi nīkatakani napetari, noropata itxarina Xe- sosi. ⁶⁴ Iuasaaki iaxirikaokitarina iua, ninoa imata- matakani īkapani. Iuasaaki noropata itxarina.

—Kimarorei pite. Kiripa noropatai? —itxana.

⁶⁵ Itomaneri maerekati sākiretxitiā itxitarina Xesosi. Inapetiniri liotoka.

Xesosi Xoteo Auīteakori Apisatoō

(Mateo 26.57-68; Marko 14.53-65; Xoāo 18.19-24)

⁶⁶ Īkanōkapanika kiomātxiakori, sasetotxi auīteakori, kaiōkatsopareriakori pakini apotiitaua. Iuasaaki Xesosi minaāka ninoamoni.

⁶⁷ —Pisāpiretaua ate, Teoso mereēkitikai pite? —itxa- rina.

Ininiā Xesosi apakapapiretana:

—Nisāpiretiniāi, !hāuikari nisākire. ⁶⁸ Nipimaraua-

tiniā, hīte !apakapapiretano. Apaka !hāuiritari nisikakiko. ⁶⁹ Paītiki hītari iaxitikiri topākako Teoso ka- posotiireri kikomoni —itxa Xesosi.

⁷⁰ Ininiā iuaīkana ninoa pimaāri:

—Teoso ākirikai pite? —itxarina.

Ininiā Xesosi apakapapireta:

—Atāopitikara hīsākire. Iuapitikarano nota —itxa.

⁷¹ —Iaōpekara. Akenakotapekari isākire. Ininiā apikomoni isākire kenakotakani !anirekaika, kotxi ate- ka kenakotapekari iua sākire maerekati —itxana.

Xesosi Pirato Apisatoõ

(Mateo 27.1-2, 11-14; Marko 15.1-5; Xoão 18.28-38)

23 Ininiã imakinika ninoa anikari Xesosi Piratomoni. ² Ininiã iuaã ikamarina aãpirena. Apoĩtarina Xesosi:

—Ate kenakopiretari oerekiniri kãkiti maerekati ikamini, kotxi iua õtãkikari kãkiti, kãkiti miĩkitxitakaniri Sesa, Homano auĩte apiari. Apaka itxa: “Teoso mereẽkitino nota. Auĩtetxi apiatakari nitxaua,” itxa iua sãkire.

Txamari na atãoni ikara atoko itxana ninoa. Ikara atoko ninoa apoĩtari Xesosi. Kona atão ninoa sãpiretakiti. ³ Ininiã Pirato pimaãri Xesosi:

—Pitekani Xoteoakori auĩte txataua? —itxari Xesosi.

—Iuapitkarano nota —itxa Xesosi.

⁴ Ininiã Pirato txana sasetotxi auĩteakori, kãkiti pakini:

—!Napokari maerekati ikamakiti —itxa.

⁵ Iuaĩkana apoĩtarina:

—Iua oerekana kãkiti maerekati ikamini auĩtetxiakorimoni. Kariréia tãpamonira ipotorika. Uatxa uaipekarari iua —itxana.

Xesosi Erotxi Apisatoõ

⁶ Pirato kenakotakasaakiri isãkirena, ipimaãna:

—Ia kiki Kariréiakirikani?

⁷ —Ari iuapitikara —itxana.

Ikara Pirato imarotakasaaki, iokanatarari Xesosi Erotximoni, kotxi Kariréia tãpa auakani auĩte itxaua Erotxi. Iuasaaki iua ianapokota Xerosareẽ. Ininiã Pirato iokanatarari Xesosi Erotximoni, kotxi Xesosi Kariréiakiri.

⁸ Erotxi kenakopiretapekari Xesosi pirena. Ininiã iua aõkitakasaakiri Xesosi, poxokope itxakata, kotxi inirekari Xesosi oerekiniri iposotiire. ⁹ Ininiã iteene ipimaãri Xesosi, ikamakiti imarotini ĩkapani. Txamari Xesosi !apakapiretari iua. ¹⁰ Iuasaaki sasetotxi auĩteakori, kaiõkatsoparerini pakini iteene apoĩtari Xesosi. Ikinika ninoa sãkire aãpirenanoka. ¹¹ Eereka Erotxi, isotatoneakori pakini napetari Xesosi. Ieretakarina auĩtetxi mãka maparakiri apiata inapetinirina ĩkapani.

—Hãtamatarari ere. Auĩtetxi itxaua —itxana.

Eereka iuaĩkana iokanatarina Piratomoni. ¹² Mitxi Erotxi, Piratokata omanatakakaua. Ikara õti ninoa apokaerekatakakaua.

Xesosi Okiko Nirekiko

(Mateo 27.15-26, 11-14; Marko 15.6-15; Xoão 18.39–19.16)

¹³ Ininiã eereka Pirato apotiitari sasetotxi auĩteakori, Xoteo auĩteakori, apanakini kãkiti pakini. ¹⁴ Ininiã itxa:

—Hĩte minari ia kiki notamoni. Hĩte apoĩtari iua imisirienetiniri kãkiti. Hĩte apisatoõ nipimaãpekari ikamakiti pirena. Notamoni kona maerekati !ikama.

¹⁵ Erotxipekana !apokari maerekati ikamakiti, ininiã iokanatarari iua notamoni iuaĩkana. Inipitikara iua erekari, txamari hĩte nirekari okiko maxikatĩka.

¹⁶ Ininiã nota paniãtari inoropatiko aãpitsa aamata kamakoriã. Eereka niokanatarari isini.

¹⁷ Iuasaaki Pãskoã kiiniritisaaki, auĩtetxiakori itotari isikakiniri ãtika kateia ãki auakari.

¹⁸ Ikara Pirato sãkire ikenakotakasaakina, ninoa akirikata:

—Hõkariko ere kiki. Hĩsikakariko Pahapasi —itxana.

¹⁹ Pahapasi kateia ãki aua, kotxi iua apanakinikata naiatarari auĩtetxiakori. Kokaniri apaka itxaua.

²⁰ Pirato nirekari Xesosi isikakini, ininiã iuaĩkana isãkirauata kãkitimoni. ²¹ Txamari ninoa akiripoakata:

—Aamina ĩpiriãmitakari nopini hĩtokakitariko.

Hõkariko aamina ĩpiriãmitakari nopini —itxakatana.

²² Pirato mitxi isãkirauata ipikata. Iuaĩkana isãkirauata:

—Kixikapa? Maerekati !ikama. Ixika !auari ipinini ĩkapani. Nipaniãtariko inoropatiko, eereka nisikakariko —itxari.

²³ Txamari iuaĩkana akiripoakatana:

—Hõkariko aamina ĩpiriãmitakari nopini.

Ninoa akiripoakatini xika Pirato kamari ninoa nirekakiti. ²⁴ Ininiã Pirato:

—Xesosi ipinako hinirekakiti iaõka —itxa Pirato.

²⁵ Iuasaaki isikakari Pahapasi kateia ãki auakari.

Neenamataxi kamakari, kokaniri apaka itxaua Pahapasi. Eereka isikari Xesosi sotatoakorimoni aamina ĩpiriãmitakari nopini okiko ĩkapani.

Xesosi Tokakitaãka Aamina ĩpiriãmitakari Nopini

(Mateo 27.32-44, 11-14; Marko 15.21-32; Xoão 19.17-27)

²⁶ Ininiã sotatoakori anikari Xesosi okiko ĩkapanimoni. Iuasaaki kimaporiãpo aõkitarina Simão, Sireni sitatxitikiri. Iuasaaki iua apoka sitatximoni. Sotatoakori mãkari iua. Aamina ĩpiriãmitakari itakana Simão tsotere nopini:

—Panika ia aamina ĩpiriãmitakari —itxarina.

Xesosi tikini sa itxa Simão. ²⁷ Xesosi tikini ia mirikini-ti kãkiti. ãtokaka sitoakoro sari apaka. Imatinaniu-atana, itxiapatana, kotxi imarotarina Xesosi paĩtiki ipinini. ²⁸ Xesosi kirioka ninoa sitoakoromoni. Itxana:

—Sitoãkini Xerosareẽ auakani anaakoro. Kona notani !himariaka. Hĩtekara himariakaua. Hamariteni ĩkapani hĩtxiapata, ²⁹ kotxi ãti õti apokasaaki, kãkiti sãkire: “Api-aerekata sito meeneto oniniua,” kotxi iuasaaki misirikaretxi apokasaaki, pamonõkoniri. ³⁰ Iuasaaki-ikarako kãkiti akiripoakatako ixirata auĩtemoni: “Ate nopini pirika. Pipataua,” itxanako, kotxi iuasaaki ninoa mokaiakariakori apokaãpota ninoa xipokini ĩkapani.

³¹ Nota aamina amaneri atoko nitxa. Hĩte aamina ĩsasaka atoko hĩtxa. Nota !ikamari maerekati, uaritika ia atoko nota ipina. Erepaniko aamina ĩsasaka atoko hĩtxa, ininiã ãti õtirako apiata himisiritiko —itxa Xesosi sãkire.

³² Ninoa anikari ipi maerekati kamakani Xesosikata ipininina ĩkapani. ³³ Apokasaakina “Kiitãtatxi” inakoriãtaã, itokakitarina Xesosi aamina ĩpiriãmitakari nopini. Iua atokokanera itxana maerekati kamakani. ãti

maerekati kamakari itakana Xesosi kikomoni, äti isanaremoni.

³⁴ Iuasaaki Xesosi txari:

—Niri !pimisiritapena ninoa, maerekati ikamakitina xika, kotxi !imarotarina ikamakitina —itxa Xesosi.

Iuasaaki sotatoakori kamari sarauatxi. Eereka imaktxakarina Xesosi mäka. Sarauatxi käiatakari apakapari imäka. ³⁵ Käkiti iuaä auakani itikari Xesosi. Sasetotxi auíteakori napetari iua. Itxana:

—Iua makatxakapekari apanakini imapinakanina !kapani. Teoso mereékiti ininiäua, kinirepa iuaka !imakatxakaua? —itxana.

³⁶ Iuasaaki sotatoakori apaka napetari iua. Katxioäri isikarina Xesosi iätini !kapani, txamari !iätari. ³⁷ Itxana:

—Pite Xoteo auíte pininiäua, ininiä aamina !piriämitakariä pimakatxakaua. Piteka pimakatxakauako —itxarina.

³⁸ Iuasaaki iökatakori takaäka ikii tanomoni:

—Xoteoakori Auíte —itxa iua iökatakori. Homano säkireë aua. Kreko säkireë aua. Xoteo säkireë pakini aua iuaä iökatakori.

³⁹ Maerekati kamakari Xesosi takote tokakitakori akiritari iua. Itxitari. Inapetari:

—Pite Teoso mereékiti pininiäua, !teroa piposotiire? Piteka pimakatxakaua. Ate apaka pimakatxaka —itxa.

⁴⁰ Äti maerekati kamakari iuaä tokakitakori ötäkikari iua:

—Kona pite p!katari Teoso? Ate apaka apinako.

⁴¹ Atäöpitikara ate misiritiko, kotxi maerekati akamapeka. Ere kiki !kamari maerekati —itxa.

⁴² Eereka itxari Xesosi:

—Xesosi, auítetxi pininiätaäua papokasaaki, pixinikano nota, kotxi ninirekari nisini pitekata iuaxiti —itxari.

⁴³ Xesosi apakapapiretari:

—Atäöpitikara nitxai, uatxa ia öti, pite sariko notakata iaxiti Erekaritäa.

Xesosi Ipinini Pirena

(Mateo 27.45-56; Marko 15.33-41; Xoäo 19.28-30)

⁴⁴ Ininiä apaniäxiti takote atokatxi piäkapeka. Ipi äti pakini oara ipiäka. ⁴⁵ Atokatxi !iponikaika. Iuasaaki mäkatxi mata mitari Teoso misäkiretiko aikotiä arökakari matsorakitaäka. Ipi matapeka itxa. ⁴⁶ Iuasaaki Xesosi akirikata:

—Niri, nisikai nixinire pin!katini !kapani.

Ikara atoko inaäka atoko, ipina. ⁴⁷ Sotato auíte itikasaakiri, ikenakotakasaakiri, itxa:

—Atäöpitikara ikira kiki atäo inakarinoka kamakari iua. Maerekati !ikama —itxa sotato auíte.

⁴⁸ Käkiti iuaä apotiitakaniaua ikara atamatakasaakina, itorotana iaritana ip!karauatini xika. Ininiä isipekana.

⁴⁹ Ikinika Xesosi aökimanere, sitoakoro Kariréiakini, iua tikini sikani pakini aua iuaä. Ikira atoko itikanätarina Xesosi okiko.

Xesosi Katiko Pirena

(Mateo 27.57-61; Marko 15.42-47; Xoäo 19.38-42)

⁵⁰ Iuasaaki iuaä aua Xosee inakori. Xoteo auíteakori ötäkikakari iua. Erekarini iua. Erekarinoka ikama. ⁵¹ Arimateia sitatxitikiri iua. Arimateia sitatxiti, Xotéia töpa aua. Iätapapikari Teoso ikinimane auíte ininiua. Mitxi ipe apanakini Xoteo auíteakori ötäkikakani nirekasaakiri Xesosi okinina, iuasaaki iua Xosee txari:

—Konapitini. !Apakata ikara atoko akamini —itxa.

⁵² Xesosi ipinaka atoko, Xosee sari Piratomoni.

Amanaäri Xesosi !to akauarimoni itakini !kapani. Ininiä Pirato sikari Xesosi !to iuamoni. ⁵³ Ininiä iua makatxakari Xesosi !to itokakitikoätaä. Iapirikari mäkatxi mataä, kai iriko äki taka itxari. Mitxi ip!kari !auapanika iua iriko äki. ⁵⁴ Ikara öti sesta veira. Ikinika sesta veira, Xoteoakori tomatini öti apisa, Xoteoakori aiamata tomatiko öti !kapani.

⁵⁵ Sitoakoro Kariréiakini Xesosikata !kani sari Xosee tikini kai irikomoni. Ninoa nirekari imarotiniri Xesosi !to takikoätaä. ⁵⁶ Eereka ninoa kanapiriä aapokomonina. Kamariäro, aätsopa ätiäo pakini apotiitana Xesosi !toä itakinina !kapani. Ininiä tomatiko öti tomata itxana, kotxi Teoso paniätakiti iaöka ikamana.

Xesosi Iua!kana Auäki Inini

(Mateo 28.1-10; Marko 16.1-10; Xoäo 20.1-10)

24 Tom!kosaaki !kanökapanika, sitoakoro sari kai irikomoni, kamariäro Xesosi !toä itakinina !kapani. ² Ninoa apokasaaki iuaä, atamatarina. !Katoreikari kai iriko. Kai tore makatxakapeëkaika. ³ Ininiä ninoa !roä, txama kona apokarina Xesosi !to. ⁴ Ininiä sitoakoro:

—!tapari Xesosi !to? Kanatokopa itxa? —itxanätana.

Iuasaakipeka ipi kiki tokiä. Itimana sitoakoro apisatoö. Pomëkari mäkarini ninoa. Mëkokari iotximere atoko itxa ninoa mäka. ⁵ Sitoakoro p!karauata, ininiä iäkana. Ixitipeka auakiitana. Ininiä ninoa kiki txana:

—Kinirepa hinitanätari auäki inakari ip!kani sauaki?

⁶ !Uaiikari iua. Ökitikapekaua. H!xinikari isäkire Kariréia h!tekata auakasaaki. ⁷ Ia atoko itxa isäkire: “H!tari iaxitikiri sikaäkako maerekanimoni. Eereka nipinako aamina !piriämitakari nopini. Eereka ipi äti ötisaaki iua!kana nökitikauako,” itxa Xesosi. H!xinikariko isäkire —itxana.

⁸ Ininiä ninoa sitoakoro:

—Ari ikara atokopitikara itxapeka isäkire —itxana.

⁹ Eereka ninoa sipeka. Ösi Xesosi moianariakorimoni isana. Apanakini käkiti iuaä aua apaka. Iuaä ninoa säpiretana ikinipoko itikakitina. ¹⁰ Maria Matarena, Xoanama, Maria Txiako inoroma, apanakini pakini säpiretari Xesosi moianariakori itikakitina. ¹¹ Txamari Xesosi moianariakori kona auikari ninoa säkire.

—Paxirari h!säkire —itxana.

¹² Petronoka auikari ninoa säkire, ininiä imiteëkata kai irikomoni. Iäka, iriko äki atamatini !kapani. Mäkatxi matanoka, Xesosi !toä Xosee iapirikakitinoka atamata.

Eereka aapokomoni ikanapiriã. Isikasaaki, itsorĩkaãñãta, Atamatakiti ixinikanãta.

Emaoso Kimaporiti Sikani

(Marko 16.12-13)

¹³ Ikara õti ipi Xesosi sãkire auiãkani iãpota Emaoso inakori aapokotxitimoni. Xerosareẽ pipotorikasaaki, ipi oara napa atoko papoka Emaoso. ¹⁴ Ninoa ipi sãkirauanãta isaãpotakasaakina. Isãkiretarina, ixinikarina Xesosi ipinini pirena. ¹⁵ Isãkirauanãtakasaakina, iuasaaki Xesosi ina ninoa tikini, ininiã iua sa ninoakata. ¹⁶ Txamari ninoa kona imarotari iua Xesosi ininiua. ¹⁷ Ininiã Xesosi:

—Kipa hĩte sãkirenãta? —itxa Xesosi.

Ininiã ninoa iotoka. Iuasaaki ninoa toõ oerekari imatinaniuatina. ¹⁸ Kiropasi inakori apakapapiretari:

—Ikinimane Xerosareẽ auakani imarotari Xesosi okiko pirena. Atxiĩti pite ãtiãtaã ĩkarikai? —itxari.

¹⁹ Ininiã Xesosi txari:

—Natokopa itxa iua? —itxa.

Ininiã ninoa:

—Xesosi Nasaree sitatxitikiri iua. Teoso sãkire sãporetakari itxaua. Teoso, kãkiti apaka apokaerekatari isãkire, ikamakiti pakini, kotxi paposotiireri isãkire, ikamakiti pakini. ²⁰ Sasetotxi auĩteakori, aãũteakori apaka sikari iua okiko ĩkapani, aamina ĩpiriãmitakari nopini ipinini ĩkapani. ²¹ Ate uãkatari iua kãkiti Isaeo auakani maerekani makatxaãkari ininiua. Kita mitxi iua ipina. ²² Mixikanani sitoakoro iua sãkire auiãkani sãkirauata atekata. Ininiã atsorĩkaãta. Isãpiretauana ĩkanõkapanika akauarimoni isinina. ²³ Txamari ninoa kona apokaikari Xesosi ĩto. Ninoa sãkire, aõkitana Teoso niriakori iaxitikini iuaã. Ninoa sãpiretana sitoakoro Xesosi iuaĩkana õkitikapekua. ²⁴ Eereka ãtikaka imoianariakori sari iuaã atamatinirina ĩkapani. Sitoãkini sãkire atãopitikara. Txamari !aõkitari Xesosi iuasaaki —itxa Kiropasi.

²⁵ Ininiã Xesosi txana ninoa:

—Mĩĩkiteni hĩtxaua. !Hinierekari hãuikiniri Teoso sãkire sãporetakani sãporetakiti imakinika Teoso sãkire, ²⁶ kotxi ninoa txari: “Teoso nirekari imereẽkiti atatsiirauatini, Teoso tixine ikanapiriĩni apisapanika,” itxa Teoso sãkire —itxa Xesosi.

²⁷ Iãpotakasaakina, Xesosi sãpiretana ninoa Teoso sãkire iuaka pirena. Merepanika iuaka oerekua Moisesi iõkatsopatakitiã, eereka Teoso sãkire sãporetakani iõkatsopatakitiã. Iuaka oerekua imakinika Teoso sãkire iõkatsopatakoriã auakariã.

²⁸ Iuasaaki ninoa apokaãpota Emaoso takote. Ninoamoni Xesosi nirekari apikomoni isini. ²⁹ Ininiã itxana:

—Kona pisipe apikomoni. Mapiãnikata, ininiã atekata pikaikota —itxarina.

Ininiã Xesosi ĩroã aapokotxiã ninoakata ikaikotini ĩkapani. ³⁰ Iitopãka ninoakata inipokotini ĩkapani. Iuasaaki Xesosi kosekari komiri.

—Teoso, erekapitikari pisikakiti atemoni —itxa.

Iuasaaki imapixinikari komiri, sika itxana ninoamoni.

³¹ Iuasaakipeka ninoa imarotari Xesosi ininiua.

Iuasaakipeka, ereẽkoka itxa. ³² Ininiã ninoa misãkiretakakua:

—Atãopitikara, kimaporĩã isãkirauaãpotakasaaki, Teoso sãkire oerekaruaãpotakasaaki, axinire poxokoniua iuasaaki —itxana.

³³ Iuasaakipeka ninoa aiamata. Ikanapiriãna Xerosareẽmoni. Iuaã apokana õsi Xesosi moianariakori, apanakinikata. ³⁴ Isãpiretana:

—Xesosi auãki inini pirena atãopitikara. Apiananiri õkitikapekua. Petromoni oerekepekua —itxana ninoa.

³⁵ Ininiã eereka Kiropasi imoianarikata sãpiretana kimaporĩ isinina pirena. Isãpiretana komiri Xesosi mapixinikini pirena, kotxi iuasaakiika ninoa imarotari iua Xesosi ininiua.

Xesosi Oerekua Imoianariakorimoni

(Mateo 28.6-20; Marko 16.14-18; Xoão 20.19-23; Átosi 1.6-8)

³⁶ Isãkirauatapanikana inakasaakina, Xesosi tokiã ninoa sauaki.

—Erekaxinire hĩtxako —itxa.

³⁷ Itikoãkatana. Ipĩkarauatana. Kamiri iuãkatarina.

³⁸ —Kinirepa hĩtikoka? Kinirepa kamaxirepeka hĩtxa ĩĩkiteta? ³⁹ Hãtamatariko niuako, nikiti pakini. Iuapitikarano nota. Himaãtakano. Kamiri !kaxiniri. Kamiri kona kapiri. Hãtamatano. Nĩĩtokara. Kamiri !nitxaua —itxa Xesosi.

⁴⁰ Ininiã oerekari iuako, ikiti pakini ninoamoni. ⁴¹ Ninoa iteene poxokoniua, txamari !iteene !auikapanikarina atão Xesosi ininiua. Ininiã iuasaaki Xesosi pimaãna:

—Nipokori aua hĩtemoni? —itxa.

⁴² Ininiã ninoa sikari ipixini ximaki kimitakori. Mapaã apaka isikarina. ⁴³ Ininiã iua nikari ninoa apisatoõ. Iuasaaki ninoa imarotari atão Xesosi ininiua, kotxi kamiri !inikari nipokori. ⁴⁴ Eereka iua misãkiretana ninoa:

—Mitxi hĩtekata nauakasaaki, nisãpiretai ikinipoko

nota pirena Teoso sãkire iõkatsopatakoriã. Noerekapekai hĩte Moisesini iõkatsopatakiti, Teoso sãkire sãporetakani iõkatsopatakiti. Xikari iõkatsopatakori apaka noerekapekai. Imakinika ninoa sãporetakiti nota pirena apokapeka.

⁴⁵ Iuasaaki isikaimaroretana ninoa Teoso sãkire iõkatsopatakori imarotinina ĩkapani, ininiã iuasaaki ninoa imarotari atão. ⁴⁶ Itxari:

—Kĩtxakapiriãka iõkatsopatapeẽkaika:

Teoso mereẽkiti atatsiirauatoko. Okaãkako. Ipi ãti õti-saaki õkitikauako.

⁴⁷ Kãkiti nisãkire auiãkani iaripiretariko niokanapirena erekari ikini itixiti. Merepanika Xerosareẽ auakanimoni isãpiretaãkako, eereka ikini itixiti auakanimoni isãpiretaãkako. Ninoa oerekariko kãkiti takanapiniri imaerekantina, ininiã iuasaakipeka Teoso makatxakariko maerekati ikamakitina. ⁴⁸ Hĩkinika hĩte itikapekari nipinini. Hãtamatano nota iuaĩkana auãki ninini. Ininiã iteene himarotari nota pirena apanakini hĩsãpiretini ĩkapani. ⁴⁹ Nota iokanatariko niri sikaene-

takiti, Erekar Matamatakoti, hītemoni. Uai sitatxi hīkaikotako. Hiātapariko iua apokini. Ininiā hāpaka-pariko Teoso posotiire itano ĩkari —itxa Xesosi.

Xesosi Anikaāka Teoso Tixinemoni

(Marko 16.19-20; Átosí 1.9-11)

⁵⁰ Xesosi anikari imoianariakori Petánia sitatxitimoni. Iuaā apokasaakina, Xesosi ōkitikauakotaua. Itxari Teoso:
—Niri, naia pinīkata. Pitakari erekari naiamoni —itxa.

⁵¹ Isākirauatakasaaki, anikaāka Teoso tixinemoni.

⁵² Iuasaaki ninoa:

—Peerekari Xesosi. Iuanoka Apiananiri —itxanātana. Eereka Xerosareē ikanapiriāna ipoxokoniritikana.

⁵³ Ikiniōtika isana Teoso misākiretiko aikotimoni. Iuaā ninoa misākiretari Teoso:

—Peerekai. Erekapitikari pikamakiti ate ĩkapani —itx-anātana ikiniōtika.

Ameē.

Xoão

Xesosi, “Teoso Säkire” Inakori

1 Itixi kamiko apisa iua “Teoso Säkire” inakori auapeka. Iua Teosokata aua. Iua Teoso txaua.

² Ikinipoko potarikikosaaki Teosokata auari iua “Teoso Säkire” inakori.

³ Teoso paniätari iua ikinipoko ikamini. !Auari iua makamakiniti. ⁴ Xesosi, “Teoso Säkire” inakori, kamari itanapokoka auäki inini. Iuanoka sikari ikinipoko auäki inini, kotxi iuanoka auapika. Iua tirikapi atoko itxa, kotxi iopinikari käkiti xiniremoni Teoso säkire imarotini ïkapani, ätipirika auini ïkapani. ⁵ Iopinikari ipiä. Ipiä kona xipokari iua tirikapi kamara.

⁶ Teoso iokanatarari isäkire säpiretakari tïkane kiki Xoão inakori. Iokanatarari iua käkitemoni, käkiti xinire iopiniäkari isäpiretini ïkapani. ⁷ Isäpirenauata, Teoso säkire ikinimane imarotini ïkapani, auikapiretinirina ïkapani. ⁸ Kona Xoãoni käkiti xinire iopiniäkari txaua. Xoão iokanataäka käkiti xinire iopiniäkari isäpiretini ïkapani. ⁹ Iua atão iopinikari käkiti xinire. Apoka ïkoraxiti, ikinipoko käkiti xinire iopinikini ïkapani.

¹⁰ Iua “Teoso Säkire” inakori aua ïkoraxiti. Iua kamari itixi, iuaritika ïkoraxiti auakani kona auikapiretari iua säkire. ¹¹ Iua apoka itixi ikamakitimoni, txamari käkiti ikamakini kona nirekari iua. ¹² Iuaritika apanakini nirekari iua, ininiä auikarina isäkire. Ininiä iua sika-posotiiretana ninoa Teoso anaakori ininiuana ïkapani. ¹³ Aponaniäkasaaki, Teoso anaakori !atxaua. Ateka Teoso anaakori akaminia !aposota. Kona käkitemoni txïtakaua Teoso anaakori aniniäua. Teosora kamari iua anaakori aniniua.

¹⁴ Käkiti itxapekaua iua “Teoso Säkire” inakori. Ateka-ta aua. Ate itikari iua. Peerekari iua. Peerekari iposotiire. Ikinipoko erekari aua iuamoni. Isäkire atãonoka itxa. Ikara atoko itxa, kotxi iri Teoso. Teoso äkiri imatonõkari itxaua Xesosi.

¹⁵ Xoão säpiretari Xesosi käkitemoni. Ia atoko isäpirenauata:

—Iua, hïtemoni nisäpiretakiti: “Nota tikinimoni apokakari, apiatako iua. Nota poiãoka, kotxi nota auini apisapanika auapeka iua.”

¹⁶ Ikinipoko erekari aua iuamoni, ininiä amakinika ate apakapari ikinipoko erekari iuamonikiri. Isikaäpotari erekari atemoni. ¹⁷ Aimarotari Teoso paniätakiti säkiretxiti, kotxi Moisesini oerekapekaua. Apiaerekata Xesosi Kristo oereëkiti, kotxi iua oerekaua Teoso iteene tiretiniua. Ikinipoko erekari isika atemoni. Maerekati kamakani atxaua, iuaritika Teoso tiretaua. Oerekaua

atão inakari aimarotini ïkapani. ¹⁸ Teoso atamatakari !auari. Imatonõkari Teoso äkiri, irikata auakari, iuara oerekaua Teoso aimarotini ïkapani, kotxi Teosotxikana iua.

Xoão Kapatxisareri Säpiretakiti

(Mateo 3.1-12; Marko 1.1-8; Arókasi 3.1-18)

¹⁹ Xoteo auïteakori Xerosareë sitatxiti auakani iokanatanana käkiti Xoãomoni. Iokanatanana sasetotxiakori. Iokanatanana sasetotxiakori moianatakani apaka Xoãomoni, ipimainirina ïkapani: “Kinakariparai pite?”

²⁰ Kona Xoão kipatarari isäpiretinina. Atão isäpiretana:

—Teoso mereëkiti käkiti iätapakiti, kona nitxaua nota —itxa.

²¹ Ininiä ipimaärina:

—Ikara atoko ininiä kiriparai? Eríasikani? —itxana.

—Kona iuano —itxa.

—Teoso säkire säpiretakari aiätapakitikani atxïiti? —itxana.

—Kona iuano —itxa.

²² —Ikara atoko ininiä, natokopa inakariparai pite? Ninoa ate iokanatakani nirekari imarotiniina pite. Natokopa inakaripa pite? —itxana.

²³ Ininiä Xoão:

—Teoso säkire säpiretakari Isaía inakori iõkat-sopatakiti txari:

Auako kiki äparaä makipakaniätaä. Isäpirenauatako. Itxariko: “Hõeretariko kimapori Apiananiri apokini apisapanika. Itïkaäpo erekari hïkamako iua napini ïkapani,”

itxa Isaía. Iua kiki äparaä makipakaniätaä kasäpirenari, iuakarano nota. Iua Isaía säpiretakitikarano nota —itxa Xoão.

²⁴ Pariseoakorira iokanatanana ninoa kiki Xoãomoni.

²⁵ Ipimaärina Xoão:

—Iua Teoso mereëkiti aiätapakiti piminakanisaakiaua, Eríasi inakori piminakanisaakiaua, Teoso säkire säpiretakari aiätapakiti piminakanisaakiaua, kinirepa pite patxisatarari käkiti? Kipaniäpa pite patxisarauata? —itxarina.

²⁶ —Äparaañanira nota patxisarauata. Hïte sauaki aua kiki himimarotakinini. ²⁷ Iuara, nota tikini apokakari, apiatakari iua. Minakati nitxaua nota, ininiä kona apakata napokini iua takote. Kona apakata ikiti mata tsapitsa nikoxirikini, kotxi minakati nitxaua —itxa Xoão.

²⁸ Ikara atoko Xoão säpiretana ninoa Xotão ipiniä Petãnia sitatxiti, ipatxisarauatiniätaä.

Soti Auíte Ākiri, Teoso Nakiti

²⁹ Katimatinīkata Xoão atapari Xesosi, iuamoni inini. Xoão sāpiretana apanakini itakote auakani:

—Hātapari. Erenapani soti auíte ākiri Teoso nakiti, kotxi ikinimane maerekani makatxaākari itxaua.

³⁰ Mitxi nisāpiretakitikara ere. “Kiki apokako nota tikini. Apiananiri iua, kotxi nota mauakanisaakipanika iua aua.” ³¹ Mitxi nota apaka kona nimarotari maerekantixi makatxaākari uāka. Nota patxisatari kākiti āparaā, kotxi iusaaki nisāpiretari iua pirena Isaeo tixini auakanimoni —Xoão txana ninoa.

³² Xoão sāpiretana apanakini itikakiti:

—Nota itikari iua Erekaru Matamatakoti Teoso tixinekiri katxakini. Kamo katxakini atoko itxa iua. Isari Xesosimoni, kaikota itxa iuakata. ³³ Ikara apisa kona nota imarotari iuāka. Āparaā nipatxisarauatini paniātakari sāpiretano: “Pitkariko Erekaru Matamatakoti katxakini. Kikimoni apokini pitkariko. Iua kiki patxisarauatini ātiāo, kotxi isikari Erekaru Matamatakoti patxisatakonimoni,” itxano. ³⁴ Notakara itikari ikara. Nota sāpiretari nitikakiti, ininiā nimarotapitikari ia kiki Teoso ākiri ininiua —itxa Xoão.

Merepitipanika Xesosi Moianariakori

³⁵ Katimatinīkata iuaīkana Xoão auanāta iuaā ipi imoianariakorikata. ³⁶ Iusaaki itikari Xesosi inapaāpotini, ininiā akiritari imoianariakori:

—Hātapari. Ere kiki, soti auíte ākiri Teoso nakiti itxaua —itxa.

³⁷ Ikara ikenakotakana atoko ninoa ipi imoianariakori sari Xesosi tikini. ³⁸ Ininiā Xesosi sapotorika, atapana iua tikini īkani.

—Kipa hinireka atxiīti? —itxana ninoa.

—Koerekareri, namonipa paua pite? —itxarina.

³⁹ —Masa, hātamata —itxa.

Ininiā isana iuakata, atamata itxarina iua auiniātaā. Iusaaki kikatapeka. Eereka īkanōkapeka ikanapiriāna.

⁴⁰ Ninoa Xoão moianariakori, Xesosikata sikani, Ātree, Ātree moianari pakini. Simāo Petro itari itxaua iua Ātree. ⁴¹ Eereka Ātree sari katimariā itari Simāomoni.

—Ate aōkitari Teoso mereēkiti aiātapakiti —itxa.

⁴² Ininiā Ātree anikari itari Simāo Xesosimoni. Xesosi atamatari Simāo.

—Pite Simāo, Xoão inakori ākiri. Uatxa pite Petro pinaākako —itxa.

Kai sorotxikana iuāka Petro.

Piripi, Natanaeo Pakini Xesosi Akiritini

⁴³ Katimatinīkata Xesosi nirekari Kariréia tōpamoni isini. Iuaā aōkitari Piripi inakori.

—Notakata masa. Nimoianari pitxapekauako —itxari.

⁴⁴ Iua Piripi aapoko Petsáita sitatxiti. Iuaā apaka aua Ātree, Petro pakini aapoko. ⁴⁵ Iusaaki Piripi nitari Natanaeo inakori. Apokasaakiri isāpiretari:

—Ate aōkitari kiki. Moisesini iōkatsopatakiti sāpiretakiti iua. Teoso sākire sāpiretakani iōkatsopatakiti sāpiretakiti aaōkita. Iuakara Xesosi txaua. Nasaree sitatxitikiri iua. Xosee ākiri iua Xesosi —itxari.

⁴⁶ —Nasaree sitatxitiā lauari erekari —itxa Natanaeo.

—Aupitika. Masa, maāpiākatari iua —itxa Piripi.

⁴⁷ Xesosi atapari Natanaeo iuamoni inaāpotini.

—Ere kiki atāo Xoteopitikara. Atāonoka ikama —itxa Xesosi.

⁴⁸ Ininiā iusaaki Natanaeo kenakotari Xesosi sākire. Iprimaāri Xesosi:

—Kiātokopa ininiāpa pimarotano nota? —itxari.

Xesosi txari iua:

—Piripi akiritinii apisapanikara, nimarotari piko kati patapi piitopākanāta.

⁴⁹ Ininiā Natanaeo apakapiretari:

—Koerekareri, Teoso ākiri pitxaua pite. Kākiti Isaeo tixini auakani auíte pitxaua —itxari Xesosi.

⁵⁰ Ininiā Xesosi:

—Pite aukari nisākire, kotxi nimitikakinitika nimarotari piko kati patapi piitopākanātini. Pite imarotapanikariko apia posotiiretxi. ⁵¹ Pite itikariko Teoso tixine osereēkiko. Pitkariko Teoso nitiriakori kanīkini. Pitkariko ninoa katxakini, pitari iaxitikiri nopini apokinina. Atāopitikara ikara atoko nitxai pite —itxari Natanaeo.

Xesosi Inoākari Āparaā, Iāriāpeka Itxīkitakini

2 Ipi ōti napaka atoko aua kiiniri tanirauatiko pirena kiiniriti Kanaa sitatxiti Kariréia tōpa. Xesosi inoro aua kiiniriātaā iusaaki. ² Kakiiniriteri kemaītxitari Xesosi, imoianariakori pakini. ³ Iāriā xipoka atoko Xesosi inoro:

—!Auaika iāriā —otxari Xesosi.

⁴ Ininiā Xesosi:

—Kinirepa ikara atoko pitxano? Niposotiire manapi !apokapanika —itxaro inoro.

⁵ Ininiā Xesosi inoro txana kaapokori nitiriakori:

—Ipaniātakiti iaōka hīkamako —otxa.

⁶ Iuaā kopiti aua, seisi pakini, mitari kopititi, kai kamakori. Naia kopiti āki aua āparaā Xoteoakori arokiniua īkapani. Iuaātaā ninoa arokaua. Kiomātxiakorini oerekinina atoko ninoa arokaua Teoso imisākiretinina apisa, ninoa Teoso apakapini īkapani. Ātika iua kopiti maīkari āparaā seī aríto.

⁷ Xesosi paniātana kaapokori nitiriakori:

—Hīxāpokakari naia kopiti āki āparaā —itxana ninoa.

Ininiā ninoa xāpokakari kopiti āki āparaā. Isonakatapeka apoka āparaā. ⁸ Ininiā Xesosi:

—Hīsorokaātari āparaā, sika hīttxari kakiiniriterimoni iātini īkapani.

Ininiā ninoa anikari āparaā kakiiniriterimoni. ⁹ Iua kakiiniriteri iātari. Iusaaki iāriāpeka itxapekaua āparaā.

—Amonipa ina ia iāriā? —itxa.

!Imarotari. Ninoa nitiritxi āparaā anikakani imarotari iua iāriā. Ininiā kakiiniriteri txari itanorouatakari:

¹⁰ —Kinirepa mixikanani ia iãriã apia erekari na pisikaua? Apanakini sikari iãriã apia erekari kiiniri potorikasaaki. Kãkiti kamitope inakasaakiika apanakini sikari iãriã poião erekari. Txamari uatxaika pite sikari apia erekari —itxari.

¹¹ Iuasaaki Xesosi mipotorikari iposotiire Kanaa sitatxiti Kariréia tãpa iua auakasaaki. Iposotiire oerekari Apiananiri ininiua. Ikara atoko ininiã, Xesosi moianariakori auikari Xesosi Teoso mereëkiti kãkiti iãtapakiti ininiua, kotxi ninoa itikari iposotiire.

¹² Ikara atoko inaãka atoko Xesosi, inoro, itariakori, imoianariakori pakini sari Kapanaoõ sitatxitimoni. Iuaã ikaikotana mapaõtipeka.

Pirãtxi Omitikiko Pirena

(Mateo 21.12-13; Marko 11.15-17; Arókasi 19.45-46)

¹³ Xoteoakori kiinirite Pãskoa inakori apisapanika, Xesosi sari Xerosareëmoni. ¹⁴ Isa Teoso misãkiretiko aikotimoni. Iuaã pirikeri ãki itikari pirãtxi vëtxitakani, kema auíte, soti auíte, kamoã pakini vëtxitakani. Itikari txineirota sikakani apaka. Amesa takote ninoa topãkanãta. Ivëtxitarona txineirota. Apakaparona ãti uãka txineirote, kotxi oa ãtoião, ininiã Xoteo txineirote isikana. ¹⁵ Ininiã Xesosi kosekari aãpitsa. Ípatari. Aãpitsaã omitikenatana ninoa pirãtxi vëtxitakani. Omitikenatana kema auíte, soti auíte Teoso misãkiretiko aikoti takote auakani. Ikakanapiriãri amesa txineirota apakapikoãtaã. Txineirota xikepoakatani. ¹⁶ Ipaniãtana kamoã vëtxitakani:

—Himakatxakariko kamoã. Hanikariko mapara. Niri aapoko ãki hívëtxirauatini !apakata. Kona uaini pirãtxi vëtxitiko —itxana ninoa.

¹⁷ Iuasaakipeka imoianariakori xinikari Teoso sãkire iõkatsopatakori:

Nota iteene turetari paapoko pite misãkiretiko aikoti. Iua xika nokaãkako, itxa Teoso sãkire iõkatsopatakori.

¹⁸ Eereka Xoteo auíteakori misãkiretari Xesosi:

—Teoso paniãtiniã ninoa kãkiti iua misãkiretiko aikotiã auakani pomitikenatani, poerekaua posotiiretxi Teoso paniãtinii aãuikini íkapani —itxana ninoa.

¹⁹ Xesosi apakapiretari:

—Hírrikariko ia Teoso aapoko. Ipi ãti pakini õtisaaki iuaĩkana nõkitikariko ia Teoso aapoko —itxa Xesosi.

²⁰ Ininiã ninoa:

—Anekani. Koarëta seisi anokanani iua aiko kamiko. Kiãtokopa pitxari ipi ãti pakini õtisaaki põkitikini iuaĩkana? Kona kíkitei pite pisãkire ikara atoko pinini —itxarina Xesosi.

²¹ Txamari Xesosi sãkire “Teoso aapoko” ixinikari íito. !Xinikari Teoso misãkiretiko aikoti. ²² Xesosi ipinaãka atoko, õkitikaãkaua atoko, iuasaakipeka imoianariakori xinikari ikara Xesosi sãkire. Iuasaaki ninoa auikari Xesosi sãkire. Auikarina Teoso sãkire iõkatsopatakori sãpiretiniri Xesosi atão Teoso ãkiri ininiua.

²³ Xesosi Xerosareë auakasaaki, Pãskoa kiiniriti auakasaaki, itomaneri kãkiti auikari Xesosi Teoso mereëkiti ninoa iãtapakiti ininiua. Ninoa itikari posoti-

iretxi ikamakiti, ininiã auikarina Xesosi sãkire. ²⁴ Txamari Xesosi !auikari kãkiti sãkire, kotxi imarotari ikini mane ãkixinire sãkire. ²⁵ Kãkiti ãkixinire sãkire !ipimaãri xatiki, kotxi imarotapekari kãkiti ãkixinire sãkire.

Nikotemo Pirena

3 ãti íkanõkati Nikotemo inakori motika Xesosi-moni. Iua Xoteoakori auíte itxaua. Pariseo itxaua apaka. ² Iua misãkiretari Xesosi:

—Koerekareri, ate imarotari koerekareri, Teoso iokanatakiti pininiua. Teoso pitekata mauakaniã, kona piposotari posotiiretxi pikamini, ininiã ate imarotari Teoso iokanatai pite kãkitimoni —itxa.

³ Ininiã Xesosi:

—Iuaĩkana iponaniãkarira sari Teoso auítetxi ininiã-taãua. Iuananira sari iuaxiti. Atãopitikara ikara atoko nitxai pite —itxa.

⁴ —Kiãtokopa pitxa auapekarikai iuaĩkana piponaniini? Kona piposotari pinoro ãko ãki iuaĩkana piĩroini. Kona piposotari iuaĩkana piponaniini —itxa Nikotemo.

⁵ Ininiã Xesosi:

—Atãopitikara ikara atoko nitxai. Piponaniãkasaaki, piri, pinorokata ãkirinanira pitxaua. Iua Erekari Matamatakoti iponaniãkitakiniã, Teoso ãkiri pitxaua. Kãkiti, iua Erekari Matamatakoti iuaĩkana iponaniãkitaãkitinaira, sari Teoso auítetxi ininiãtaãua. ⁷ Koniko pitsoríkaãtapeko. Piponaniãko ipikata. Ipikata pimiponaniãkaniã, kona pisari Teoso auítetxi ininiãtaãua. ⁸ Ítima xõkarauata inirekiniãtaã. Pikenakotari ixõkarauatini, iuaritika na pimarotari ítima sinimoni. Na pimarotari ítima ininimoni. Iua atokokana !kimarotikori Erekari Matamatakoti iuaĩkana iponaniãkitaãkiniri kãkiti —Xesosi txari Nikotemo.

⁹ Nikotemo apakapiretari:

—Nota !imarotari ikara pisãkire —itxa.

¹⁰ Ininiã Xesosi:

—Koerekareri apiari pitxaua. Kãkiti Isaeo tixini auakani poereka. Txamari pite !imarotari ikara atoko nininii pite. ¹¹ Atãopitikara ikara atoko nitxanãtai pite. Ate sãpiretari aimarotakiti, aĩtiãkiti pakini. Txamari !hinirekari hãuikapiretiniri asãpiretakiti. ¹² Íkorapokoriti pirena nisãpiretakasaakii, !pauikari nisãkire. Atauako pauikatari nisãkire Teoso tixine pirena nisãpiretakasaakii? ¹³ Kona kãkiti sapanika Teoso tixine. ãtino-ka sari iuaã, Teoso tixine potorikakarínoka, kãkiti itari iaxitikirinoka sari iuaã.

¹⁴ —Kítxakapiríka ãparaã makipakaniãtaã Moisesini õkitikari imini metao kamakori aãke mapotõkireë. Itano itakari. Kãkiti Teoso sãkire auĩkani imini akatsatani atamatari Moisesini õkitikakiti, ininiã kona ipinana. Iua atokokana kãkiti itari iaxitikiri õkitikaãkako. ¹⁵ Ininiãkara iua sãkire auĩkari kona ipinaika. Auapikako.

¹⁶ —Teoso iteene turetari ikini itixiti auakani, ininiã iokanatari imatonõkari imi kãkitimoni. Ininiã iua sãkire auĩkanirako kona ipinaikako. Átipirika auapikako. ¹⁷ Teoso iokanatari imi kãkitimoni ikini itixiti auakani-moni kona imisiritinina íkapanini. Iua iokanatari imi

käkiti maerekani imakatzakini ïkapani, ninoa imap-inakani ïkapani.

¹⁸ —Teoso äkiri säkire auiäkari kona iokanataäka käk-iti misiritikomoni. Iua Teoso äkiri säkire mauiäkati, iuarako sako käkiti misiritikomoni. Teoso äkiri säkire imauiakani xikara ikara atoko inaäkanako. ¹⁹ Teoso äkiri säkire mauiäkani misiritaäkako, kotxi atão inakari oerekakari käkiti xinire iopiniäkari apokapeka ïkoraxiti. Iua oerekari atão aimarotini ïkapani. Tirikapi atoko itxa, kotxi oerekaua atão. Ninoa mauikareni kona nirekari tirikapi. Inirekarina ipiä, kotxi maerekati ikamanātana. ²⁰ Maerekati kamakari kona nirekari tirikapi. Kona tirikapi takote kona aua, kotxi ipïkari ikamara. Ipïkari käkiti itikiniri maerekati ikamini. ²¹ Teoso säkire iaöka kamakarira sari ikamaraä, kotxi ikamara oerekari apanakini iua kamakiti atão inini Teoso nireëkiti iaöka inini —Xesosi txari Nikotemo.

Xesosi Apiari, Xoão Poiäori Inini

²² Ikara atoko inaka atoko Xesosi imoianariakorikata sari Xotéia töpamoni. Mapaöti ikaikota imoianariakorikata iuaätaä. Imoianariakori patxisatari käkiti iuaä. ²³ Xoão apaka patxisatari käkiti Enö inakoriätaä, Sarï inakoriätaä takote. Ipatxisarauata iuaätaä, kotxi iuaätaä äparaä kaiäopokori. Ikiniötika käkiti sari iuamoni iuaätaä, ininiä Xoão patxisatana. ²⁴ Iuasaaki Xoão kona takaäkapanika kateia äki.

²⁵ Iuasaaki Xoão moianariakori säkirauata apanakinikata käkiti arokiniua pirena, Teoso mis-äkiretiko aikoti äki iïroinina apisa pirena. ²⁶ Apokana Xoäomoni.

—Koerekareri, Xotão ipiniä iua kiki pite patxisatakiti, atemoni pisäpiretakiti, uatxa iua patxisarauatapeka. Ikinipoko käkiti sari iuamoni. Atemoni !erekari ipatxisarauatini —itxana.

²⁷ Xoão apakapapiretana ninoa:

—Erekapitikari ipatxisarauatini, kotxi Teoso paniätari iua. Teoso masakaniäri posotiiretxi käkitimoni, kona xatiki iposotari iparïkauatini Teoso ïkapani. ²⁸ Nota kona Teoso mereëkitino. Käkiti iätapakiti kona nitxaua nota. Teoso iokanatano nota Teoso mereëkiti apokini apisa. Ikara hïte imarotapeka. Ikara atoko nitxapekai hïte. Hïsäpiretari ikara apanakinimoni.

²⁹ —Maxinikari kiki ïtanorouatakasaaki. Sito amanaäkito iua nakiti otxaua. Imoianari topäka iua takote. Ipoxononiuaata ïtanorouatakari säkire ikenakotakasaaki. Iua atokokana nota poxononiuaata. Nota iua moianari atoko nitxaua. Xesosi iua ïtanorouatakari atoko itxaua. Käkiti iua nakiti itxaua. ³⁰ Xesosi api-ääpotako. Nota poiäöpotako.

³¹ —Iaxiti ïkari Apiananiri. Itixi auakani imarore poiäonoka, kotxi itixinoka imarotana. Teoso tixine ïkari Apiananiri itxaua. ³² Iua säpiretari itiäkiti. Ikenakotakiti isäpireta. Txamari käkiti !auikari isäpirena. ³³ Käkiti Api-ananiri säpirena auiäkani, imarotari Teoso säkire atão inini, ininiä apanakini apaka imarotari Teoso säkire atão inini. ³⁴ Iua Teoso iokanatakiti säpiretari Teoso säkire, kotxi Teoso sikari Erekari Matamatakoti iua-

moni, ininiä ikinipoko Erekari Matamatakoti posotiire aua iua Teoso iokanatakitimoni. ³⁵ Aïri Teoso tiretari imi. Isikari imi ikinipoko imoiaini ïkapani. ³⁶ Teoso äkiri säkire auiäkani auapikako Teosokata. Teoso äkiri säkire mauiäkani kona auapanina Teosokata. Teoso omanatapikanako ninoa ätipirika —itxa Xoão ninoa-moni.

Xesosi Misäkiretaro Samariakero

4 Käkiti säpiretari pariseoakori:

—Xesosi säkire auiäkani, iua patxisatakini, ito-maneri. Xoão patxisatakini poiäoka —itxana.

² (Ari, kona Xesosini patxisarauata. Imoianariakorira patxisatari käkiti.) ³ Xesosi imarotakasaakiri pariseoakori kenakopiretiniri iua, iuasaaki iua osipikari Xotéia töpa. Kiniräo kanapirikari Kariréia töpamoni.

⁴ Inirekari Samaria töpa ïpirixititini Kariréia töpa apokini ïkapani.

⁵ Samaria töpa ïpirixititakasaaki, apoka Sikaa sitatxiti takote. Iuaä aua itixi Xoseeni nakiti, iri Xakooni sikakiti kitxakapirïka. ⁶ Iuaä aua aariko Xakooni kisakakiti äparaä apaätiko. Iuaä Xesosi apokasaaki, iotoka, kotxi isäpakapeka ötakori ïpirixititini xika. Ininiä itiopäka aariko takote. Iuasaaki apaniäxitipeka.

⁷ Iuasaaki sito Samaria auakaro apoka iuaä, äparaä apaätakaro. Oäpokasaaki, Xesosi amanaäro äparaä: —Äparaä pisikano —itxaro.

⁸ Oa apokini apisapanika Xesosi moianariakori sari sitatximoni nipokori iamotinina ïkapani.

⁹ Oa sito apakapapiretari:

—Xoteo pitxaua pite. Samaria auakaro nitxaua nota. Kinirepa näparaäte pamanaäno? —otxa.

Ikara atoko otxa, kotxi Xoteoakori kona säkirauata Samaria auakanikata.

¹⁰ Ininiä Xesosi:

—Teoso sikakiti pimarotaäkamako, pitemoni äparaä amanaäkari pimarotaäkamako, notamonimarako pamanaäri äparaä, kotxi piätiniäri äparaä nota sikakiti, pauapika ätipirika —itxaro.

¹¹ —Kona katiui pite. Kiriäpa papaätari äparaä, kotxi päitanoirikori. Namonipa papokatari äparaä käkiti ätipirika auini inïkitaäkari? ¹² Kitxakapirïka äätokirini Xakoo sikaua ate ia aariko. Iua, imiakori, ipiraakori pakini iätari ia äparaä ia aarikoäkiri. Pite apiata atxiiti? —otxa.

¹³ Ininiä Xesosi:

—Käkiti ia irikoäkiri äparaä iätakari iuaïkana iposonatapanika. ¹⁴ Käkiti nota siäkiti äparaä iätakari apikomoni liposonataika. Äkixinire amomo atoko itxa äparaä nota siäkiti. Iua äparaä txïkitakari iua ätipirika auini Teosokata —itxaro.

¹⁵ —Iua äparaä pisikano nimaposonatakani tïkane, ininiä uai kona ninaika äparaä napaätini —otxa.

¹⁶ —Pakiritari pïtaniri. Uai piminari —itxa.

¹⁷ —Kona kïtanirino —otxa.

—Atäopitikara, “Kona kïtanirino,” pinini. ¹⁸ Sïko pakinipekara pïtaniri. Kiki uatxa pitekata auakari na atão pïtanirini. Inipitikara pisäkire —itxaro.

¹⁹ Ininiã oa:

—Teoso sãkire sãpiretakari pitxaua pite, kotxi pimarotari ikinipoko nikamakiti. ²⁰ Kitxakapirika ate kiomaneakorini apotiitaua Teoso imisãkiretinina iŕkapani ia oxiratari nopini. Txamari hite Xoteoakori txari: “Xerosareēnanira aãpotiitauako Teosokata” —otxa.

²¹ Ininiã Xesosi:

—Pauikariko nisãkire. Āti ōti apokako. Iuasaaki kona uai oxiratariãni, kona Xerosareēni kãkiti apotiitaua aĩri Teoso imisãkiretinina iŕkapani. ²² Hite Samaria tōpa auakani apotiitaua Teoso himisãkiretini iŕkapani. Txamari, kona atão himarotari iua. Ate Xoteoakori aimarotapitikari Teoso, kotxi Teoso sikakiti kãkiti maerekani makatxakakari Xoteo itxaua. ²³ Teoso keto apokapanika, ari apopeka, ininiã aĩri Teoso misãkiretakani atão inakani misãkiretari iua ãkixinireēna. Ninoa sãpiretari atão inakarínoka iuamoni. Aĩri nirekari kãkiti ikara atoko inakani misãkiretiniri iua. ²⁴ Teoso nirekari amisãkiretiniri iua aãkixinireē, kotxi Teoso iŕto iuvari. Inirekari kãkiti sãpiretiniri atão inakarínoka iuamoni —itxa Xesosi.

²⁵ Ininiã oa:

—Nimarotapitikari iua Teoso mereẽkiti aiãtapakiti, Kristo inakori, apokapitikako iŕkorapokoriti. Iua apokasaaki ikini sereti isãpiretauako —otxari.

²⁶ —Nota pimisãkiretakiti Teoso mereẽkiti hiãtapakitarano nota —itxaro.

Āti Takarauata, Āti Amarauata Inini Pirena

²⁷ Iuasaakipeka Xesosi moianariakori kanapiriã. Ākixinireēna ninoa tsoŕikaãna:

—Kinirepa Xesosi sãkirauata oa sitokata?

Kotxi oa Samaria auakaro. Iuaritika lipimaãrona: “Kiripa iŕkai?” kona itxarona. Kona ipimaãrina Xesosi: “Kinirepa pimisãkiretataro oa?” kona itxarina.

²⁸ Iuasaaki oa sito takanapari otii, sitatximoni kanapiriã otxa. Oãkiritari kãkiti iuaã auakani,

²⁹ —Masa. Maãpiãkatari kiki ikinipoko nikamakiti imarotakari. Iua Teoso mereẽkiti aiãtapakiti atxĩiti? —oa txana ninoa.

³⁰ Ininiã iua sitatxi auakani sari Xesosimoni. ³¹ Ninoa apokini apisapanika imoianariakori akiritari Xesosi:

—Koerekareri, pinipokota —itxarina Xesosi.

³² —Nipokori auape nota niãkiti tĩkane hite mimarotakinini —itxa Xesosi.

³³ Ininiã imoianariakori imisãkiretakakana:

—Kiripa sikatari nipokori Xesosi nikakiti? —itxana.

³⁴ Ininiã Xesosi:

—Nota kamari iua niokanatakiri nirekaãkiti. Ninirekari nikaminiri ikinipoko iua paniãtakiti. Ia nipaŕika. Nipaŕika nikiena atoko itxa, kotxi niokanatakiri paniãtakiti nikamini sikataparatanano, nipokori sikataparatinino atokotxikana. ³⁵ Kãkiti txari: “Ipi ipi pakini kasiriti auapanika takari iposope inini tĩkane, ininiã uatxa kona nipaŕikauata.” Ia atoko kona hĩtxape hĩsãkire. Himereka. Hãtamatariko takari. Nisãpiretai hite hĩtakare iposope haãpoko hanikini tĩkane. ³⁶ Iua atokotxikana Teoso sãkire takaãka kãkiti ãkixinireē.

Katakareri miparĩkatakari apakapari iparĩka iŕki. Iua anikari kãkiti Teoso aapokomoni, ãtipirika Teosokata auini iŕkapani. Ininiãkara katakareri, iua miparĩkatakari apaka poxokoniuatako. ³⁷ Aãtokirini txari: “Āti takarauata, ãtipekana apotiitari takari.” ³⁸ Ia sãkiretxiti atão, kotxi nota paniãtai hite mitxi himaparĩkauatakaniãtaã hamarauatini. Apanakini parĩkauatapeka iuaã. Ninoa takapekari Teoso sãkire kãkiti ãkixinireē. Pasãpaniri ninoa parĩka. Ninoa parĩkauata mitxi, ininiã uatxa hite parĩka poião kãkiti Teosomoni hanikini —itxa Xesosi.

Samaria Auakani Auikiniri Xesosi Sãkire

³⁹ Kaiãopokori Samariakini iua sitatxiti auakani auikari Xesosi sãkire, kotxi oa sito mitxi sãpiretana:

—Nikamakiti ikinika isãpiretano —otxana.

⁴⁰ Ininiã ninoa Samaria auakani apoka Xesosimoni.

—Atekata paua —itxarina Xesosi.

Ininiã Xesosi kaikota ipi ōti ninoakata. ⁴¹ Xesosi sãkire ikenakotakasaakina, apikomoni ninoa auikapiretari.

⁴² Ninoa misãkiretaro oa sito:

—Uatxa ate auikapiretari Xesosi sãkire, kona pite sãpirenaãnanini, ate auikapiretari. Ateka kenakotapekari iua sãkire, ininiãkara ate auikapiretari iua sãkire. Uatxa ate imarotari atão inini Teoso mereẽkiti ininiua Xesosi. Kãkiti itixi auakani maerekani makatxããkari itxaua iua —itxarona.

Auĩtetxi Ākiri Xesosi Makananitinini

⁴³ Iuaã ipi ōti inapaka atoko Xesosi sipeka. Karirėia tōpa isa. ⁴⁴ Mitxi Xesosi sãkire: “Teoso sãkire sãpiretakari paxitaãka, txamari Teoso sãkire sãpiretakari itixineē auakasaaki, kãkiti iuaãtaã kona auikari iua sãkire,” itxapeka Xesosi. ⁴⁵ Iuaritika Karirėia tōpa apokasaaki, kãkiti iuaã auakani ipoxokoniritika apakapari Xesosi, kotxi ninoa apaka sari iua Pãskoia kiiniriti Xerosareē sitatxitiã. Iuaãtaã itikarina Xesosi posotiire. Ininiãkara ipoxokoniritikana apakaparina Xesosi.

⁴⁶ Xesosi iuaĩkana sari Kanaa sitatxitimoni, Karirėia tōpa. Mitxi Xesosi inoãkapekari ãparaã iãriã ininiua iuaã. Xesosi apokasaaki Kanaa, auĩtetxi ãkiri amianata Kapanaoõ sitatxitikiri. ⁴⁷ Iua auĩtetxi kenakopiretari Xesosi Karirėia tōpa apokini, Xotėia tōpa osipikini. Inakasaaki Xesosimoni isa, aõkita itxari Xesosi. Aiatari: —Masa Kapanaoõmoni, naapokomoni. Namarite amianata. Pimakananitari iua. Ipinanapanoka —itxari Xesosi.

⁴⁸ Ininiã Xesosi:

—Nimakamakaniãri posotiiretxi, kona hite nirekari auikiniri nisãkire. Posotiiretxi hĩtikasaakinani, hite nirekari nisãkire hãuikini. Teoso takaõtxikare hĩtikasaakinani, hinirekari nisãkire hãuikini —itxa Xesosi iuamoni.

⁴⁹ —Masapoka naapoko. Pimasikanisaaki, namarite ipinapitikako —itxari.

⁵⁰ —Pisa paapokomoni. Pamarite kona ipina —Xesosi txari iua.

Iua kiki auikari Xesosi sãkire, ininiã isipeka. ⁵¹ Ipix-inipokoriti aõkitana initiriakori.

—Pamarite auapitikako —itxarina.

⁵² —Namonikitapa akananita? —itxana.

—Kita apaniãxiti apoomari iotoka —itxana.

⁵³ Iuasaaki iua kiki imarotari kita Xesosi sãkire man-apikara: “Pamarite kona ipina,” ininiri manapikara iotoka apoomari. Ikara atoko ininiã, ikinimane iua aapoko auakani, iua pakini auikari Xesosi sãkire.

⁵⁴ Ininiã ipikatapeka Xesosi kamari posotiiretxi Kariréia tõpa auakasaaki, Xotéia tõpa osipikasaaki.

Matípokotakati Xesosi Erekepeka Inĩkitakini

5 Ikara atoko inaãka atoko Xesosi sari Xerosareẽ sitatxitimoni, kotxi Xoteo kiinirite Teoso ãkapani aua iuasaaki. ² Xerosareẽ sitatxiti apanĩkaki, soti auĩte vëtx-itikoãtaã takote aua ipoa xapitikiri. Sĩko ãronakiko aua iuaãtaã. Xoteo sãkire Epiráiko. Epiráiko sãkireẽ iua ipoa uãka “Petésita.” ³ Ironakikoãtaã amianatakani nipokoni sirĩkanãta. Mõsiãreni, motĩkakani, matípokotakani pakini iuaã auanãta. Iãtapanãtarina ãparaã tokĩkaãtini. ⁴ Teoso nitiri apokanaka iuaãtaã. Iua apokasaaki itokĩkaãtakari ãparaã. ãparaã tokĩkaãtakasaaki, ãtika amianatakari ãkiika komokaãtakari erekepeka itxa. ⁵ Matípokotakati iuaã auanãtakari amianãtakari trĩta oito pakini anokanani amianata. ⁶ Xesosi atamatari iua iuaã isirĩkanãtini. Imarotari iua uatxakapokoni amiananãta. Ininiã Xesosi pimaãri:

—Ereka pinini pinireka? —itxari.

⁷ Amianatakari apakapapiretari:

—Ari, ninirekapitikamari, txamari kona kanikikono kãuaãriã ãparaã tokĩkaãtakasaaki. Nikomokaaritakasaaki, ãti komokape napisapanika —itxari Xesosi.

⁸ —Põkitikaua. Pisirimata pikoseka, sipeka pitxa —Xesosi txari.

⁹ Iuasaakipeka erekepeka itxa iua amianatakari. Isirimata ikoseka, tĩpokota itxapeka. Iua õti kãkiti tomatini õti. ¹⁰ Ininiãkara Xoteo auĩteakori txitari amianatakari erekepeka inakari:

—Uatxa kãkiti tomatini õtisaaki pite anikanãtari pisirimata. ãkora atoko ininiã, kãkiti !auritaãka —itxarina, kotxi ninoamoni iparĩkauata isirimata anikasaaki.

¹¹ Ininiã iua kiki:

—Erekepe ninĩkitaãkirira paniãtano: “Pisirimata pikoseka, sipeka pitxa,” itxano.

¹² Ininiã ninoa:

—Kiripa kiki paniãtai pisirimata pikosekini pisini ãkapani?

¹³ —!Nimarotari iuaãka —itxa.

Iuaãtaã ipoa xapitikiri takote kaiãopokori kãkiti auanãta, ininiã patimari Xesosi sipeka ninoa sauaki.

¹⁴ Erekepe Xesosi aõkitari iua kiki Teoso misãkiretiko aikotiã.

—Uatxa pitípokotapeka, ininiã maerekati pitakana-pako. Iuaãkana maerekati pikamakasaaki, atxĩiti amianari apiatakari inokai —Xesosi txari iua.

¹⁵ Erekepe iua kiki sari Xoteo auĩteakorimoni.

—Xesosira erekepeka txĩkitakano nota —itxari.

Xoteo Omanatiniri Xesosi

¹⁶ Tomatiko õtisaaki Xesosi makananitari iua amianatakari. Ikara xika Xoteo auĩteakori kinirão okaka txari Xesosi. ¹⁷ Xesosi imarotari Xoteo auĩteakori sãkire, ininiã itxana:

—Niri Teoso kamari erekari ikiniõtika. Iua atokotxikana nota. Kona niotoka erekari nikamini tomatiko õtisaaki —itxa Xesosi.

¹⁸ Ikara Xesosi sãkire xika Xoteo auĩteakori apiata omanatari Xesosi. Ninoamoni Xesosi kamari maerekati tomatiko õtisaaki amianatakari imakananitini. Xesosi sãkire: “Niri Teoso,” inini xika, apiata omanatarina iua, kotxi iua: “Teosotxikana nota” itxanãta iua Xesosi.

Xesosi Irikata

¹⁹ Ininiãkara Xesosi misãkiretana Xoteo auĩteakori:

—Atãopitikara nitxai hĩte. Nota Teoso ãkiri nitxaua.

Notanani !kakamareno. Nitikari niri kamanãtakiti, ininiã niri kamakiti iaõka nikama. Iuanokara nikama nota. Niri kamakitixikana nota kama apaka. ²⁰ Niri tiretano nota, ininiã ikini sereti ikamanãtakiti oerekano. Oerekapanikariko posotiiretxi apiapanikako nota kamini ãkapani, ininiãkara hĩte tsorĩkaãtako hĩtikasaakiri. ²¹ Niri õkitikari ipĩkani, iuaãkana aua inini tĩkane. Iua atokotxikana nota txĩkitakana kãkiti ninirekaãkini, iuaãkana auini ãkapani. ²² Teoso kona txari kãkitimoni: “Kona erekai pite, ininiã kãkiti misiritikomoni pisa,” kona itxa Teoso. Apanakinimoni kona Teoso txari: “Erekai pite, ininiã uai pina notakata pauini ãkapani,” kona itxa Teoso. Notakara iua ãkirikara txari ikara atoko inakari kãkitimoni, kotxi Teoso sikaposotiiretano nota ikara atoko inakari nisãpiretini kãkitimoni.

²³ Ikara atoko ininiãkara, kãkiti paxitano nota. Niri nirekari nota paxitiko, iua paxitiko atokotxikana. Nota mapaxitakani kona paxitari niri nota iokanatakari. ²⁴ —Atãoenepitikara nitxai hĩte. Nisãkire kĩpitakari, nota iokanatakari sãkire auĩãkari, auapika Teosokata. Kona Teoso misiritapaniriko iua. Kona ipinaika. Auapika Teosokata. ²⁵ Atãoene nitxai hĩte. Kãkiti xinire ipĩkari atoko itxa maerekati ikamakiti xika. Teoso ãkiri sãkire kãkiti kĩpitini õti apokapanikako. Ari iketo apokapeka. Nota sãkire kĩpitakani auapikako. ²⁶ Aĩri Teosonoka posotari itxĩkitakiniri ikinipoko auãki inini, kotxi iuanoka auapika. Isikaposotiiretano nota apaka ikinipoko nitxĩkitakini auãki inini.

²⁷ —Aĩri Teoso txano nota: “Kãkiti itari iaxitikiri pitxa, ininiãkara pitxariko nisãkire mauĩãkani: ‘Kona hĩte kĩpitari Teoso sãkire, ininiã kãkiti misiritikomoni hĩsa,’ pitxako. Pitxariko nisãkire auĩãkani: ‘Hĩte kĩpitari Teoso sãkire ininiã uai hina Teosokata hãuini ãkapani.’ Ikara atoko pitxariko kãkitimoni,” Teoso txano nota.

²⁸ —Kona hĩtsorĩkaãtapeko, ikara sãkiretxiti hĩkenakotakasaaki. ãti õti ipĩkani, katakoni, kenakotariko Teoso ãkiri akiritinina. ²⁹ Iuasaaki õkitikauanako. Ninoa erekari kamakani auapikako Teosokata. Ninoa maerekati kamakani misiritaãkako.

³⁰ —Notanani kona nitxari kākiti: “Pite sari kākiti misiritikomoni. Pitepekana inari uai Teosokata pauini ĩkapani.” Notanani kona ikara atoko nitxari kākiti. Teoso sãpiretakitinokara nitxa kãkitimoni, ininiãkara nisãkire kãkitimoni atãonoka, kotxi kona nota nirekaãkitini nikama. Niri nipaniãtakiri nirekaãkitinani- ra nikama —itxa Xesosi.

Xesosi Sãkire Atãoene Sãpiretakani

³¹ Apikomoni Xesosi sãpirenauata:

—Notaka sãpiretiniãua hĩtemoni, atxĩti kona kauikikono. ³² Ātipekana nota sãpiretakari aua. Ni-marotari atão inini iua sãpiretakiti. ³³ Hĩte iokanat-apekari himoianariakori Xoãomoni nota himarotini ĩkapani. Iua sãpiretapekana ninoa atãoene nota sãkire. ³⁴ Kona ninitanãtari kãkiti nisãkire atão inini sãpiretakani. Nota sãpiretai hĩte Xoão sãpiretakiti sãkiretxiti, himaerekani Teoso makatxakini ĩkapani, himapinakanani tĩkane.

³⁵ —Xoão tirikapi tirinakari poniãkari atoko itxa. Tirikapi iopinikari ikinipoko, tirikapi takote auakari aã-tamatini ĩkapani. Iua atokokana Xoão oerekari kãkiti atão inakari. Mapaõtinokara hĩte poxokiniuata iua sãkire hĩkenakotakasaaki.

³⁶ —Aua ãti nota sãpiretakari. Iua Xoão poiãoka. Ātipekana apiata. Nota kamakitikara apiata. Nikamaki-ti sãpiretari nota sãkire atão inini. Nikamakiti, niri paniãtakiti kãkiti itikasaaki, imarotari niri uaimoni ioka-natinino nota.

³⁷ —Niri, nota iokanatakari kãkitimoni, iua apaka no-ta sãpiretakari. Kona hĩte kenakotari Teoso sãkirauati-ni. Kona hĩte atamatari itoõ. ³⁸ Isãkire lauari hãkix-inireẽ, kotxi kona hãuikari nota sãkire iua iokanatakiti sãkire.

³⁹ —Hĩte atatsopatapikari Teoso sãkire iõkat-sopatakorĩ, hãuini ãtipirika Teosokata himarotini ĩka-pani. Ia Teoso sãkire iõkatsopatakorĩ nota sãpiretakari apaka itxaua. ⁴⁰ Txamari kona hinirekari nisãkire hãuikini. Kona hinirekari notamoni hinini, ãtipirika Teosokata hãuini ĩkapani.

⁴¹ —!Ninitari niuikiko. ⁴² Iteene nimarotai hĩte. Kona xapiti hĩtiritari Teoso hãkixinireẽ. ⁴³ Niri iokanatan- o nota uaimoni. Txamari kona hĩte apakapano nota Teoso iokanatakitalino. Teoso maiokanatakinitira hĩte apakapa. ⁴⁴ Hĩte potxitari ãti iuikinii. Txamari kona hĩkamari erekari Teosonoka iuikinii ĩkapani, ininiã kona hãuikari iua sãkire.

⁴⁵ —Kona notani sãpiretapaniri niri hĩte maerekani. Moisesira sãpiretariko himaerekani Teosomoni. Hĩte uãkatari iua sãpiretari hĩte ereka hinini, txamari iua sãpiretariko niri himaerekani. ⁴⁶ Moisesini sãkire iõkat-sopatakiti hãuikaãkamako, nota sãkire apaka hãuika-mako, kotxi Moisesini nota sãpiretakari apaka. Iua iõkatsopatapekari nota sãkire. ⁴⁷ Hĩte kona auikapire-tari Moisesini iõkatsopatakiti. Isãkire iõkatsopatakiti himauikakaniã, kiãtokopa hĩtxa nota sãkire hãuikini? —itxa Xesosi.

Sĩko Mio Kãkiti Xesosi Sikakienatini

(Mateo 14.13-21; Marko 6.30-44; Arókasi 9.10-17)

6 Eereka ãti õti Xesosi ĩpiriãtari Karirẽia poa. Ia ipoa uãka apaka Txiperiatxi poa inaãka. ² Kaiãopokori kãkiti sari iua tikini, kotxi ninoa itikapekari Xesosi makananirauatini. ³ Xesosi kanĩka mitaxiratarimoni. Iuaã iitopãka imoianariakorikata. ⁴ Xoteoakori kiinirite, Pãskoa inakori kiinirite apisapanika Xesosi sari iuaãtaã. ⁵ Iitopãkasaaki, Xesosi atapari itomaneri kãkiti apokaãpotini iuamoni. Ininiã ipimaãri Piripi: —Amonipa aiamotatariko komiri nakira kãkiti asikakienatini ĩkapani?

⁶ Xesosi ikara atoko txari Piripi, kotxi inirekari imaro-tiniri: “Atauako atxĩti Piripi auikari nivosotiire?” Xesosi imarotapekari iuaka ikamakiti tĩkane. ⁷ Ininiã Piripi apakapapireta:

—Txineiopokoni, tosẽtosi txineiro ota, kona apakata komiri aamotini, nakira kãkiti asikakienatini ĩkapani. !Apakata —itxari.

⁸ Iuasaaki ãti Xesosi moianari Simão Petro itari, Ātree inakori, txari Xesosi:

⁹ —Uai aua amarini. Auari ikiena. Sĩko komiri sevata inakori kamakori auari iua. Ipi ximaki axapitiri apaka auari iuamoni. Txamari kãkiti itomaneri sikakienatiko !apakata. Ia nipokori poiãoka —itxari.

¹⁰ Xesosi paniãtari imoianariakori:

—Nakira hĩpaniãta iitopãkinina —itxana. Sotonaikiperi auari iuaãtaã. Iua nopini iitopãkana. Sĩko mio apikomoni kikiakori aua. ¹¹ Xesosi kosekari komiri amarini nakiti. Iuasaakipeka imisãkiretari Teoso:

—Erekapitikari ia komiri auiniu ate.

Iua sikari imoianariakori. Eereka ninoa xanakari kãki-ti topãkakanimoni. Iua atokokanera itxarina ximaki. Ikinikana inirekaka iaõka auana ninoa.

¹² Ikinimane kamitopeka inakasaaki, ipaniãtari imoia-nariakori:

—Itetakori komiri, ximaki pakini hãpotiita. Kona hiomatapiriko —itxa.

¹³ Ininiã apotiitarina komiri itetakori. Tosi kotarina ixãpokakana komiri itetakori.

¹⁴ Xesosi posotiire ninoa kãkiti itikasaaki, ni-noakakarika isãkirauatana:

—Atãopitikara Xesosi aiãtapanãtakitikara, Teoso sãkire sãpiretakari inakorikara ere Xesosi —itxana.

¹⁵ Xesosi imarotapekari ninoa nirekiniri iauĩtetinirina iua. Iua kona nirekari ninoa auĩtetiniri iua. Ninoa ma-maĩkakaniri apisapanika, Xesosi sipeka iuanoka. Apikoxiti oxiratarimoni ikanĩka.

Xesosi Ipoa Nopini Inaãpotini

(Mateo 14.22-23; Marko 6.45-52)

¹⁶ Kikatapeka imoianariakori iokiriĩta ipoa tiniã. ¹⁷ Iereẽtauana kanaua ãki. ĩpiriããpotarina ipoa Ka-panaoõ sitatxiti manapi. ĩkanõkapeka inakasaaki kona Xesosi apokapanika ninoamoni. ¹⁸ Kataparari ĩtmatati apoka, ininiã tsakatipokoni. ¹⁹ Iuasaaki imekoãpotana.

Ipixiniãpeka apokasaakina, ataparina Xesosi ipoa nopi-ni it̃pokotini. Kanauamoni isaãpota. Ninoa p̃karauata, kotxi ninoa uãkatari kamiri.

²⁰ Xesosi akiritana:

—Notakara. Kona h̃p̃karauatape —itxana.

²¹ Ininiã apakaparina Xesosi ipoxokoniritikana. Iua morõkokaua kanauaã. Iereëtakasaakiua, iusaakipeka kanaua apoka imiriĩpe Kapanaoõ manapi.

Kãkiti Nitiniri Xesosi

²² Katimatinĩkata ipiniãmoni kaikotakani nitamari Xesosi. Ninoa imarotari ãtoka kanaua mitxi iuaã auini. Oa kanaua Xesosi moianariakori anikapeka. Ninoa imarotari Xesosi kona sari imoianariakorikata. Imarotarina ninoanani sini. ²³ Iusaaki kanuaniri Txiperiatxi sitatxitikini apokita Xesosi merepani Teoso misãkiretiniãtaã takote merepani komiri nikikoãtaã. ²⁴ Iusaaki kona ninoa apokari Xesosi, imoianariakori apaka. Ininiã ninoa iereëtaua kanaua ãki. Iuaĩkana ikanapiriãna. Ipoa ĩpiriãtana Kapanaoõ sitatxitimoni, Xesosi initinina ĩkapani.

Komiri Kãkiti Auapininiika Inini Tĩkane

²⁵ Ninoa apokari Xesosi ipoa ipiniã.

—Koerekareri, namonikitapa papoka uai? —itxarina.

²⁶ Ininiã Xesosi:

—Atão nisãpiretai h̃ite. H̃ite nikari komiri nisikakiti. Kamitopeka h̃itxa, ininiã nipokori ĩkapaninokara hinitanãtano nota. Kona hãuikari Teoso posotiireẽ nikaminiri iua posotiiretxi.

²⁷ Xesosi pinitana:

—Nipokorinoka Ih̃xinikape, kotxi nipokori okanani mauakati itxaua. H̃xinikariko ãtião nipokori, nota h̃itari iaxitiki siãkiti, kotxi nota sikari kãkiti, kãkiti auapininiika inini tĩkane. Teoso sikari ikinika iposotiire notamoni ninirekaãkiti nikamini ĩkapani —Xesosi txana ninoa.

²⁸ —Kiãtokopa atxatari Teoso nireẽkiti akamini? —itxana ninoa.

²⁹ —Ianoka Teoso nirekari h̃kamini. Iua nirekari hãuikiniri iua iokanatakiti sãkire —Xesosi txana ninoa.

³⁰ —Iuaĩkana posotiiretxi apiari pikaminiã, ininiãra aãuikari Teoso iokanatakiti pininiãua. Kinakaripa posotiiretxi pikamapanika? ³¹ Anirmaneni kitxakapirĩkarini ãparaã makipakaniãtaã auakasaakina, inikarina komiri iaxiti katxakakari. Teoso sãkire iõkatsopatakoriri txari:

Isikari komiri Teoso tixinekiri ninoamoni, —itxarina Xesosi.

³² Ininiã Xesosi:

—Atão nisãpiretaiko h̃ite. Kona Moisesini sikari komiri Teoso tixinekiri. Nirikara sikaãtari atão komiri iua tixinekiri kãkitimoni. ³³ Teoso tixine ĩkari, iua ãkiri, komiri atoko itxa, ikini itixiti auakani ĩkapani, kotxi iua sãkire auiãkani auapininiika Teosokata —itxana.

³⁴ —Ikiniõtika pisikaua ia komiri —itxarina.

³⁵ —Notakara iua komiri Teoso iokanatakiti nitxaua. Notakara sikari kãkiti auini ĩkapani. Iua nisãkire auiãkari ĩnatxitaika. ĩposonataika.

³⁶ —H̃ite aõkitapekano nota, txamari kona h̃ite auikapnikari nisãkire. Ikara atoko nitxapekai h̃ite.

³⁷ Imakinika kãkiti notamoni Teoso siãkini inapitikako notamoni. “H̃isipeka,” kona nitxana notamoni apoãkani. ³⁸ Nitakanapari Teoso tixine. ĩkorapokoriti napoka, nipaniãtakiri nirekaãkitinoka nikamini ĩkapani. Notaka nirekaãkiti na nikama. ³⁹ Niri nipaniãtakiri ĩnirekari ãtika kãkiti notamoni isiãkini ereẽkokini. Itixi xipokini õtisaaki, inirekari nota õkitikinina ninoa auapininiika inini tĩkane. ⁴⁰ Iua nipaniãtakiri nirekari nota imarotakani, nisãkire auiãkani, auapininiika inini. Itixi xipokini õtisaaki nõkitikana ninoa iuaĩkana auãki inini —itxa Xesosi.

⁴¹ Ninoa Xoteoakori kona apokaerekatari Xesosi sãkire, kotxi iua txari: “Nota iua komiri Teoso tixine ĩkari komiriti nitxaua,” ininiã ninoa tsoata. ⁴² Ininiã ninoa:

—Iua kiki Xesosi Xosee ãkiri. Aaõkitapekari iri, inoro pakini. Kinirepa “Teoso tixine ĩkarirano” itxape iua? —itxana, itsoatinina.

⁴³ Ininiã Xesosi txana:

—Kona himaxirauatape. Kona h̃itsoatape. ⁴⁴ Niri nipaniãtakiri akiritakitinanira posotari inini notamoni. Niri makiritakiniti kona posota inini notamoni. Itixi xipokini õtisaaki nõkitikana notamoni apoãkani iuaĩkana auinina ĩkapani. ⁴⁵ Kitxakapirĩka Teoso sãkire sãpiretakani iõkatsopatariri ia Teoso sãkire:

Teosorako oerekariko ikinipoko kãkiti. Niri sãkire k̃ipitakani, niri oereẽkini, apoka notamoni. ⁴⁶ Kona aua kãkiti niri atamatakari. Nota Teoso tixine ĩkari, notanokara atamatapekari niri.

⁴⁷ —Nota sãkire auiãkari, iuara auapininiika Teosokata. Ia nisãkire atão. ⁴⁸ Nota iua komiri nitxaua kãkiti auapininiika iñkitakakarino. ⁴⁹ Hinirimane kitxakapirĩkarini nikari komiri iaxiti katxaãkari ãparaã makipakaniãtaã. Iaxiti katxaãkari inikanimana, txanima ip̃pena. ⁵⁰ Kãkiti nikiniãri atão komiri Teoso tixine ĩkari kona ipina. ⁵¹ Iua komiri, Teoso tixine ĩkari nitxaua nota. Kãkiti auapininiika iñkitakakarino nota. Ia komiri niãkari auapininiika itxako. Ia komiri nisikakiti ia niĩtokara. Niĩto nisika kãkiti ikini itixiti auakani auapininiika inini tĩkane —itxa Xesosi.

⁵² Ikara atoko ininiã ninoa Xoteoakori taparakien-atakakaua:

—Natokopa itxa ia kiki ĩto isikiniua ate, anikiniri ĩkapani? —itxana.

⁵³ Ininiã Xesosi:

—Atãoenepitikara ikara atoko nitxai h̃ite. H̃itari iaxitiki ĩto himanikakanisaaki, iarẽka himiãtakanisaaki, kona h̃xinire auapani ãtipirika. ⁵⁴ Iua niĩto niãkari, niarẽka iãtakari, auapikako Teosokata. Xipokatxi õtisaaki nõkitikariko iua iuaĩkana auini ĩkapani. ⁵⁵ Niĩto atão komiri itxaua. Niarẽka atão iãriã itxaua. ⁵⁶ Niĩto niãkari, niarẽka iãtakari, aua nãkixinireẽ. Nota aua iua ãkixinireẽ. ⁵⁷ Niri, ãtipirika auapika inakari, iokanatano

nota ïkorapokoriti. Iuara sikano nota ätipirika nauini ïkapani. Iua atokotxikana nota sikari nota niäkari ätipirika auini ïkapani. ⁵⁸ Nota iua komiri Teoso tixine ïkari nitxaua. Komiri hïkiomaneakorini nikakiti ätiäo. Iua komiri nikakari ipïpe. Nota siäkiti komiriti niäkani, nisäkire auiäkani auapininiika Teosokata itxanako.

⁵⁹ Ikara atoko itxa Xesosi säkire aiko äki Xoteo apotitiniätaäua Kapanaoö sitatxiti oerekarauatakasaaki.

Apanakini Takanapiniri Xesosi

⁶⁰ Xesosikata sikani isäkire potxitakani, ikara isäkire ikenakotakasaakina, ipimarauatakakana:

—Pamimari ikara isäkire. Kipa imarotari ikara atoko inakari säkiretxiti? —itxana.

⁶¹ Masäpiretakotika Xesosi imarotari ikara atoko itsoatinina. Ininiä iua:

—Hinirekatari hïtakanapinino nota ia nisäkire xika?

⁶² Kiätokopa hïxinikakiti hïtikiniäno nota hïtari iaxitikirino kanïkini mitxi nauiniätaä? Atxiïti iuasaaki häuikatarini säkire? ⁶³ Iua Erekarari Matamatakotino kara sikari käkiti auini tïkane. Käkiti ïto tapara lauari. Ikara säkiretxi hïtemoni nisäpiretakiti, iua Erekarari Matamatakoti säkiretxikana. Nisäkire auikiko auäkitakari käkiti, ätipirika Teosokata auini ïkapani. ⁶⁴ Txamari auapitika hïte sauaki nisäkire mauïäkani —itxa Xesosi.

Merepitipanika Xesosi imarotapekari iua säkire mauïäkani tïkane. Xesosi imarotari apaka imïkapiritakiri tïkane.

⁶⁵ —Niri Teoso masikaposotiiretakiniti kona iposota apokini notamoni —itxa Xesosi.

⁶⁶ Ikara isäkire xika itori Xesosikata sikani takanapari iua. Kona inirekaikarina iuakata isinina. ⁶⁷ Ininiä Xesosi pimaäna imoianariakori tosi:

—Hïtepekana, hïte apaka nirekatari hïtakanapinino? —itxa Xesosi.

⁶⁸ Ininiä Simäo Petro apakapapiretari:

—Apiananiri, kirimonipa asa atxiïti? Pitenanira säpiretari käkiti auapininiika inini. ⁶⁹ Ate imarotari Teoso mereäkiti pininiua. Teoso äkiri, auapika inakari äkiri pitxaua pite —Petro txari Xesosi.

⁷⁰ Ininiä Xesosi:

—Nota mereëi hïte tosi kikiakori. Txamari hïte sauaki aua Satanasi nitiri —itxa Xesosi.

⁷¹ Iuasaaki Xesosi xinikari Xotasi Isikariotxi inakori, Simäo inakori äkiri. Xesosi moianarikamara iua, txamari imïkapiritariko Xesosi.

Xesosi Itariakori Mauïkakaniri Isäkire

7 Eereka Xesosi kaikotapanika Kariréia tïpa. Kona Xotéia tïpa !ikaikota iuasaaki, kotxi iuaä Xoteo auïteakori nirekari okiniri. ² Iuasaaki Xoteo kiinirite Papiri inakori kaiama atokopekari. ³ Ininiä Xesosi itariakori misäkiretari iua:

—Posipika uai. Pisäkire auiäkanimoni Xotéia auakanimoni pisa. Ninoa apaka nirekari itikiniri pikamakiti.

⁴ Käkiti nirekiniäri iteene imarotaäka, !ikipatarini ikamakiti. Pite kamanätari posotiiretxi uai Kariréia tïpa. Pisa

Xotéiamoni. Iuaä poerekari piposotiire ikinimane imarotini ïkapani —itxana.

⁵ Ikara atoko itxarina Xesosi, kotxi itariakori apaka iuasaaki kona auikapanikari isäkire.

⁶ Ininiä Xesosi apakapapiretana:

—Iuaä nisini keto kona apokapanika. Apakata ikiniötika Xotéia tïpamoni hïte sini, ⁷ kotxi käkiti !omanatai hïte. Notananira omanataäka, kotxi nisäpiretari maerekati käkiti kamakiti. ⁸ Erekarari hïte sini kiinirimoni. Kona nota sapani uatxa. Nisini manapi apokasaaki nisa —itxa Xesosi.

⁹ Itariakorimoni ikara inaka atoko, ikaikotapanika Kariréia tïpa.

Xesosi Sari Papiri Kiiniritimoni

¹⁰ Itariakori kiinirimoni ïkiikapeka. Ninoa tikinimoni isa Xesosi. Iuasaaki !kasäpirenari kiinirimoni isini tïkane. Ininiä käkiti mimarotakinitika isa.

¹¹ Xoteo auïteakori nitapiimari Xesosi kiinirisaaki. Ipi-maäri käkiti:

—Ïtapari Xesosi?

¹² Käkiti iuaä auakani säkirauata Xesosi pirenä.

Apanakini txari:

—Peerekari Xesosi.

Apanakinipekana:

—Kona erekarari. Imisirienetari käkiti —itxana.

¹³ Kona käkiti säkirauata Xesosi uäka Xoteo auïteakori takote, kotxi ipïkana.

¹⁴ Mapaötinoka kiiniri xipokini apisapanika, Xesosi sari Xotéia tïpamoni. Isari Teoso misäkiretiko aikotimoni. Iuaä oerekarauata. ¹⁵ Xoteoakori tsorïkaänäta Xesosi säkire ikenakotakasaakina:

—Kininiäpa ere kiki paimatireri. Kona apaiaökarauata —itxanätana.

¹⁶ Ininiä Xesosi apakapapiretana:

—Na nota imaroreni noerekai hïte. Iua niokanatakiri imarorera noerekai hïte. ¹⁷ Käkiti Teoso nirekaäkiti nirekaäkani imarotari noerekiniri Teoso imarorenoka. Ninoa imarotari nimoerekakaniri notaka nimarore.

¹⁸ Käkiti iuaka isäkire säpiretakari nirekari apanakini iuikiniri iua. Käkiti Teoso säkirenoka säpiretakari nirekari iuikiniri Teoso ipaniätakiri. Ikara atoko inakari käkiti säkire atäonoka. !Ikamari maerekati. ¹⁹ Moisesini oerekai hïte Teoso säkire, ipaniätakiti iökatsopatakori. Txamari kona hïte kamari Teoso paniätakiti. Kona ätika hïte kamari ipaniätakiti, kotxi hinirekari hïkinino nota —itxana ninoa.

²⁰ Ininiä ninoa apakapapiretari:

—Maerekati matamatakoti auäitotai pite. Kiripa kiniräo okaka txai pite? Iua maerekati matamatakoti xika ikara atoko pitxa pisäkire —itxarina.

²¹ Ininiä Xesosi:

—Nota kamari posotiiretxi tomatikoötxisaaki, iua kiki matïpokotakati nimumakanitakasaaki, ininiäkara hïte tsorïkaäta. Hïuäkatari nipaïkauatini. ²² Txamari hïte apaka païkauata tomatiko ötisaaki, kotxi hïkamari Teoso takaötxikare hamarite ïtoä tomatiko ötisaaki. Moisesini paniätai Teoso takaötxikare hïkamini

hamarite itoã oito õti iua auakasaaki. Ari hinirimane kitxakapirĩkarini, Moisesini apisapanika, oerekapekari ikara atoko inakari hĩkamini. ²³ Ininiã hĩte kamari Moisesi paniãtakiti tomatikoõtxitisaaki. Ikara atoko ininiã, kinirepa hĩte omanatano nota, iua kiki erekapeka nitxĩkitakini xika tomatikoõtxitisaaki? ²⁴ Iteene pimarotakanisaakiri ãti kamakiti, kona pakiritapiri: “Iua kamari maerekati,” kona pitxape. !Papoĩtapiri ãti. Atão inakarínoka pinita, atão pimarotini ĩkapani —itxa Xesosi.

Xesosikani Teoso Mereẽkiti Txataua?

²⁵ Apanakini kãkiti Xerosareẽ auakani txanãtari: —Ere kikikani ninoa kinirão okaenetakitikani? ²⁶ Hãtamatarari. Iua sãkirauanãta kãkiti apisatoõ. Kona kapĩkarerari iua. Auĩtetxiakori !kasãkirena. Atauako aãũiteakori auikatarari isãkire atxĩĩti? Atxĩĩti auikatarina Xesosi Teoso mereẽkiti aiãtapanãtakiti ininiãua? ²⁷ Atão Teoso mereẽkiti aiãtapanãtakiti apokasaaki, kona kimarotikori iua ininimoni. Ate amakinika imarotapitikari iua Xesosi ininimoni. Kariréiakiri iua, ininiã Xesosi Teoso mereẽkiti aiãtapakiti !itxaua —itxanãtana.

²⁸ Teoso misãkiretiko aikotiã Xesosi oerekarauanãtakasaaki, itaparasãkireritika ipimaãna kãkiti iuaã auakani:

—Atauako hĩte imarotatano nota? Atauako himarotatarari nota ininimoni? Kona notaka iokanataua kãkitimoni. Niokanataãka. Nota paniãtakari atãonoka isãkire. Kona hĩte imarotari iua. ²⁹ Nota imarotari iua, kotxi iua auiniãtaãkirikarano nota. Iuara iokanatanõ kãkitimoni —itxa Xesosi.

³⁰ Iuasaaki auĩtetxiakori nirekamari imaĩkinirina. Kona kamaĩkikori, kotxi imaĩkiko manapi kona apokapanika. ³¹ Ninoa auĩtetxiakori kona auikari Xesosi sãkire, iuaritika itomaneri kãkiti auikari Xesosi Teoso mereẽkiti kãkiti iãtapakiti ininiua.

—Iua kiki inipitikara Teoso mereẽkiti aiãtapakiti itxaua, kotxi ãti posotĩretxi apiari kamakari !auari —itxanãtana.

Sotatoakori Iokanatiko Xesosimoni

³² Pariseoakori kenakotakasaakiri kãkiti sãkire ikara atoko inakari, ninoa, sasetotxi auĩteakori pakini iokanatarari sotatoakori Xesosi imaĩkinina ĩkapani.

³³ Sotatoakori apokasaaki iuamoni, Xesosi txari kãkiti iuaãtaã:

—Mapaõtinoka hĩtekata nauako. Eereka nisa nĩpaniãtakirimoni. ³⁴ Hinitapiikamano, !hãpokapanino. Nisinimoni kona hĩte posotari hĩsini —itxa Xesosi.

³⁵ Auĩtetxiakori ninoakakarika isãkirauatana: —Amonipa isa atxĩĩti, ate mapokakaniãri iua? Atauako õtakoxiti isatako Xoteoakori iarikakanimoni, ãti uãka sauaki Xoteoakorimoni? Atauako oerekatarari Xoteo minakaniua? ³⁶ Kotxi iua sãkire: “Hinitanoko. !Hãpokano nota. Kona hĩte posotari nota sinimoni hĩsi-

ni,” itxa sãkireta. Ate limarotari isãkire —itxanãtakakana.

Ãparaã Kãkiti Auãkitaãkari

³⁷ Kiiniri mapotõkire õti apiapoxokonita. Iua õti Xesosi tima kãkiti sauaki. Itaparasãkireritika isãpirenauata ikinimane kenakotiniri ĩkapani:

—Piposonatakasaaki, notamoni pinako piãtini ĩkapani. ³⁸ Teoso sãkire iõkatsopatakori txari:

Nota sãkire auĩãkari ãkixinireẽ aua amomo atoko inakari. Iua ãparaã txĩkitakari kãkiti auãki inini. —itxa Xesosi.

³⁹ Iua Erekari Matamatakoti amomo atoko itxa. Xesosi sãkire auĩãkari apakapariko iua Erekari Matamatakoti. Iuasaaki Xesosi sãkirauatakasaaki, iua Erekari Matamatakoti kona siãkapanika kãkitimoni, kotxi Xesosi kona kanapiriãpanika Teoso tixinemoni.

⁴⁰ Ikara Xesosi sãkire ikenakotakasaaki itori kãkiti txari:

—Atãopitikara ikira kiki Teoso sãkire sãpiretakari aiãtapakiti itxaua.

⁴¹ Apanakini txari:

—Iua Teoso mereẽkiti aiãtapakiti itxaua.

Apanakinipekana:

—Teoso mereẽkiti aiãtapakiti, Kariréiakiri !itxaua.

⁴² Teoso sãkire iõkatsopatakori sãpiretari Teoso mereẽkiti aiãtapakiti, Taviini apika mekaniri itxaua. Iua iponaniãko Pereẽ sitatxiti Taviini auiniãtaã —itxana.

Ikara atoko itxanãtana, kotxi kona imarotarina Xesosi iponaniiniãtaã Pereẽ sitatxiti.

⁴³ Iuasaaki apanakini auikari Xesosi sãkire.

Apanakinipekana !auikari Xesosi sãkire. ⁴⁴ Apanakini nirekamari imaĩkiniri Xesosi iuasaaki, iuaritika iua maĩkakari !auari.

Sotatoakori Kanapiriã Xoteo Auĩteakorimoni

⁴⁵ Ininiã sotatoakori kanapiriã sasetotxi auĩteakorimoni, pariseoakori pakinimoni. Ininiã ipimaãna:

—Kinirepa kona himinari Xesosi uaimoni?

⁴⁶ —Apia imatiresãkireta iua. !Auari kãkiti iua atoko ina sãkiretakari, ininiãkara !apakata amaĩkiniri iua —itxana sotatoakori.

⁴⁷ Ininiã pariseoakori omanãkarauata.

—Atauako iua misirienetai hĩte apaka? Iua txĩkitakai hĩte isãkire hãuikini. ⁴⁸ !Auari auĩtetxi iua sãkire auĩãkari. !Auari pariseo iua sãkire auĩãkari. ⁴⁹ Kãkiti miĩkitetinanira auikari Xesosi sãkire. Xesosi sãkire auĩãkari kona imarotari Moisesini paniãtakiti. Ininiãkara Teoso misiritanako ninoa —itxa pariseoakori sãkire.

⁵⁰ Iuasaaki Nikotemo inakori iuaãtaã aua. Pariseo itxaua. Iua õti apisapanika iuara sari Xesosimoni ĩkanõka imisãkiretiniri ĩkapani. Ninoa ikara atoko isãkirauatakasaaki, Nikotemo misãkiretana ninoa:

⁵¹ —Kãkiti kamakiti isãpiretini apisapanika, “maerekati ikamakiti,” kona hĩtxape. Ikara atoko itxa Moisesini oerekasaakia ate —itxana.

⁵² Ininiã ninoa pariseoakori:

—Atxiiti pite Kariréiakirikai apaka, Xesosi atoko? Iteene patatsopatariko Teoso sãkire iõkatsopatakori. Iua iteene patatsopatakasaaki, iusaakiikarako pimarotariko lauari Teoso sãkire sãpiretakari, Kariréia tõpakiri —itxarina iua.

⁵³ Eereka ikinimane sari aapokomonina.

Sito Õtaniri Minakotikatika Sirĩkakaró

8 Iusaaki Xesosi sari Orivanape Xiratamoni. Oriva txipokori. ² Katimatinĩkata ikanapiriã Teoso misãkiretiko aikotimoni. Iusaaki ikinipoko kãkiti apotitaau iuamoni. Ininiã Xesosi topãka, Teoso sãkire isãpiretini ĩkapani. ³ Iusaaki kaiõkatsopareriakori, pariseoakori pakini minaro sito iuamoni. Ninoa apokaro oa sito õtaniri minakotikatika osirĩkini. Itakarona oa ikinimane apisatoõ.

⁴ —Koerekareri, aãpokaro oia sito õtaniri minakotikatika osirĩkini. ⁵ Moisesini sãkire iõkatsopatakori paniãtaua ikara atoko inakaro kai soroã oõkaãka. Pitepekana, kiãtokopa atxataro oa? —itxana Xesosi moni.

⁶ Ikara atoko ipimaãrina Xesosi, kotxi inirekarina Xesosi kerokiniri isãkire. Inirekarina Moisesini paniãtakiti iaõka imakamakaniã, ininiã maerekati ikamapeka. Txamari !kasãkireri Xesosi. Iokirita, iõkata itxari kipatxi iuakokiã. Imakenakotakiniti atoko itxa. ⁷ Ipimarauatapanikana, ininiã Xesosi õkaõkitaua.

—Maerekati makamakaturako ĩkiika kiporonakiniro aroa kai soroã —itxa Xesosi.

⁸ Eereka Xesosi iuaĩkana iokirita, iõkata itxari kipatxi.

⁹ Ninoa ikaraene ikenakotakasaakina, iua apiata kiomãtxi inakariua sipeka. Eereka iua tikini auakari apaka sipeka. Ikara atoko itxaãpotana ikinikana isinina. Eereka Xesosinoka kaikota oa sitokata. ¹⁰ Xesosi õkaõkitaua, atamata itxaro oa sito. Oanoka kaikota iuaã.

—Ītapari pimaerekani sãpiretakani? —itxaro.

¹¹ —Apiananiri, isipekana nimaerekani sãpiretakani —otxari.

—Nota apaka kona sãpiretari pimaerekani. Pisipeka. Maerekati kona pikamapinikako —itxaro.

Kãkiti Xinire Iopiniãkari

¹² Eereka Xesosi iuaĩkana oerekari kãkiti.

—Nota ikini itixiti auakani tirikapite atoko nitxaua, kotxi noerekari Teoso sãkire notakata sikani. Teoso pimarotakani ipiaã sikani itxauana. Notakata sikanipekana !itĩpokota ipiaã. Nota sikana ninoa ãtipirika auinina ĩkapani —itxa Xesosi.

¹³ Ininiã pariseoakori misãkiretari Xesosi:

—Kona ate auikapiretari pisãkire, kotxi pitenani sãpiretari pisãkire. Ikara atoko ininiã, kona aimarotari atãoene inini pisãkire. Āti sãpiretiniãri pite sãkire iaõka, aãuikari atxiiti —itxarina Xesosi.

¹⁴ Ininiã Xesosi:

—Nota sãkirekara ikara atoko nitxai hĩte, iuaritika atãoenekara ikara atoko nitxai hĩte, kotxi nota imarotari nininimoni, nimarotari nisinimoni. Kona hĩte imarotari nota ininimoni. Kona hĩte imarotari nota sinimoni. ¹⁵ Kãkiti hĩtxaua, ininiã hãpoĩrauata, kotxi !himarotari atão. Kona nota txari kãkitimoni: “Pite, peerekai pite. Pitepekana, !erekai pite.” !Ikara atoko !nitxari kãkiti. ¹⁶ Iuaritika nisãpiretakasaakiri kãkiti kamakiti, atãonoka nitxa nisãkire, kotxi kona notananini sãpirenauata. Niri niokanatakiri sãpiretakitixikana nisãpireta. ¹⁷ Kitxakapirĩka hĩteka kiomanekorini sãkire iõkatsopatakori txari:

Kãkiti itikakitixikana ãti itikakiti. Ninoa ipi sãkire ãtinoka auiniã, ininiã ninoa sãkire atãonoka itxa, itxa hĩkiomane sãkire. ¹⁸ Nota sãpiretari nota pirena. Niri niokanatakiri apaka sãpiretari nota pirena nisãkiretxikana, ininiã ipi auape —itxa.

¹⁹ —Naniparari piri? —itxarina.

—Kona himarotano nota. Niri apaka kona himarota. Nota himarotaãkamako, niri apaka himarotamako.

²⁰ Ikara atoko Xesosi sãkirauata. Txineiro Teoso ĩkapani sikikoãtaã takote Xesosi oerekarauata Teoso misãkiretiko aikotiã. Xesosi ikara atoko isãpirenauata, iuaritika kona kamaĩkikori, kotxi imaĩkiko manapi kona apokapanika.

Xesosi Sinimoni Kãkiti Masikani

²¹ Iuaĩkana Xesosi misãkiretari kãkiti:

—Nisipiriko. Eereka hinitapiimano. Nota sinimoni !hãuiritaãka hĩsini. Hĩpinakasaaki, himaerekanikatika hĩpinako —itxa Xesosi.

²² Xoteo auĩteakori napetari:

—Atauako iuaka okatauako? Kotxi iua txari: “Nota sinimoni kona hãuiritaãka hĩsini” —itxana ninoa.

²³ Iuaĩkana Xesosi sãkirauata ninoamoni:

—Īkoraxitikinirai hĩte. Nota itanokiri. Hĩte ĩkora itixikinirai hĩte. !Īkoraxitikirino nota. ²⁴ Ikara atoko ininiãkara, nota txai hĩte: “Hĩpinakasaaki himaerekanikatika hĩpinako,” nitxai. Himauiakanisaakiri nisãkire nota pirena, hĩpinakasaaki himaerekanikatika hĩpinako. Kona Teoso makatxakinii himaerekani —Xesosi txana ninoa.

²⁵ —Kiriparai pite? —itxarina Xesosi.

—Merepitipanika nisãpiretakitara iuakarano nota.

²⁶ Nisãpiretakiti tĩkane hĩte maerekani nisãpiretini tĩkane kaiãopokori. Nota iokanatakari atãoenekara isãkire. Iua sãpiretakitinokara nisãpiretari kãkiti itixi auakani —itxa Xesosi.

²⁷ Ninoa !imarotari Xesosi iokanatakari aĩri Teoso.

²⁸ Ininiã Xesosi txana:

—Nota hĩtari iaxitikiri hõkasaaki, nĩto itano hõkitikasaaki, iusaakiikarako himarotano kinakaripa nota. Iusaaki himarotariko notaka sãkire Inisãpireta. Niri oereëkitinokara nisãpireta. ²⁹ Iua niokanatakiri notakata aua. Niri !itakanapano nota, kotxi inireëkitinokanitakama —itxa Xesosi sãkire.

³⁰ Xesosi ikara atoko ina sãkiretakasaaki, itomaneri kãkiti auikari isãkire.

Õpoĩkakoni Pirena

³¹ Ininiã Xesosi sãkirauata Xoteoakorimoni iua sãkire auiãkanimoni.

—Nisãkire iaõka hĩkamakasaaki, atão nimoianariakori hĩtxauako. ³² Atão nimoianariakori hinakasaakia, himarotari atãonoka inakari. Atãonoka inakari himarotakasaaki, õpoĩkakoni atoko hĩtxaua.

³³ Ninoa apakapapireta:

—Apraõni apika mekanirireua ate, ininiã anirekinimoni asa. Nitiritxi iamotakoni !txaua. Kinirepa õpoĩkakoni atoko pitxĩkitakaua? —itxana.

³⁴ Ininiã Xesosi:

—Atãonoka nitxai hĩte. Maerekanitxi nitiri atoko itxa kãkiti maerekati kamakari. ³⁵ Nitiritxi iamotakori ãtipirika !uari ipatrãote aapoko. Patrão ãkiri auapika ãtipirika iri aapoko. ³⁶ Nota Teoso ãkiri txĩkitakasaakiri kãkiti õpoĩkakori atoko ininiua, maerekanitxi nitiri !itxakauako. Iuasaaki iposotari erekari ikamini.

Apraõni Apika Mekaniriakori

³⁷ —Nimarotari Apraõni apika mekaniriakori hininiua, txamari hinirekari hõkinino. Nisãkire himauĩãkani xika hinirekari hõkinino. ³⁸ Nota sãpiretai hĩte nota iri oerekakiti. Hĩte kamari hĩte iri paniãtakiti —itxa Xesosi.

³⁹ —Apraõni ate iri —itxana ninoa.

Ininiã Xesosi:

—Apraõni apika mekaniriakori hininiãua, Apraõni kamakiti atoko hĩkamamako. ⁴⁰ Atãonoka nisãpiretai hĩte. Teoso sãpiretakinokara nisãpiretai, iuaritika hinirekari hõkinino. Apraõni !kamari ikara atoko inakari. ⁴¹ Hĩte kamari hĩte iri kamakiti atoko inakari —itxa Xesosi.

—Teosonanira ate iri. Ate atãopitika iua anaakori atxaua —itxana.

⁴² —Teoso atão hĩri ininiãua, nota hĩtiretamako, kotxi Teoso auiniãtaã nota ina uaimoni. Kona notaka iokanataua. Teosora iokanatanano nota uaimoni.

⁴³ Kininiãpa !hĩkitetatarari ikara atoko nininii? !Himarotari nisãkire, kotxi kona xatiki hinirekari nisãkire iaõka hĩkamini. ⁴⁴ Satanasira hĩri. Hĩte nirekari maerekati, Satanasirekãkiti iaõka hĩkamini. Kitxakapirĩka itixi kamiko atokopanika kokaniri itxaua Satanasire. Iua !inirekari atãoene isãpiretini. !Iposotari atãoene isãpiretini. Aãpirenanokara iua imarota, kotxi aãpirenaãri itxaua iua. Aãpirenaãri iri itxaua iua Satanasire.

⁴⁵ Nisãkire atão, ininiãkara hĩte !auikari nisãkire. ⁴⁶ Hĩte ãtika itikatarari maerekati nikamini? ãtika !itikari maerekati nikamini, kotxi kona maerekati kona nikama. Ininiã kinirepa kona hĩte auikari nisãkire? ⁴⁷ Teoso anaakori kĩpitari iua sãkire. Hĩte kona kĩpitari iua sãkire, kotxi iua anaakori !hĩtxaua hĩte —Xesosi txana ninoa.

Xesosi Apraõ Apisapanika Auini

⁴⁸ Ininiã Xoteoakori txari Xesosi:

—Ate sãkire atão. Samariakiri pitxaua pite. Maerekati Matamatakoti auãtotai pite —itxana.

Ninoa akiriũãkatari Xesosi “Samariakiri,” kotxi Xoteoakori omanatana Samariakini. ⁴⁹ Ininiã Xesosi:

—Maerekati Matamatakoti kona auãtotano nota.

Nota paxitari niri, txamari hĩte kona paxitano nota.

⁵⁰ Kona notani nitari kãkiti nota iuikakani tĩkane. Nirira nirekari kãkiti iuikinino nota. Nirira imarotari nisãkire atãonoka inini. ⁵¹ Nota sãkire iaõka kamakari !ipina. Ikara atãoene.

⁵² Xoteoakori apakapapiretari:

—Uatxa aimarotari maerekati matamatakoti auãtotai pite, kotxi Apraõni ipĩpe. Teoso sãkire sãpiretakinini apaka ipĩpe. Kinirepa pite sãkire: “Nota sãkire iaõka kamakari !ipina,” pitxa? ⁵³ Aĩrini Apraõni ipĩpe. Pite apiata atxĩti? Teoso sãkire sãpiretakinini apaka ipĩpe. Kiriparai pite? —itxarina Xesosi.

⁵⁴ Ininiã Xesosi:

—Notaka niuikinina !apakata. Nirira iuikano nota. Hĩte sãkire: “Ateosone iua,” txamari nota irira iua.

⁵⁵ Kona himarotari Teoso. Notananira imarotari Teoso. Nota “kona Teoso nimarota,” nininiã, hĩte atokokamarako nitxamako. Aãpirenaãri nitxamauako. Nota imarotapitikari iua. Nota kĩpitari isãkire. ⁵⁶ Hĩri Apraõ poxokoniuata, nota uai apokini ikenakoenetakasaaki. Iua itikari nota uai apokini, ininiã iua poxokoniuata.

⁵⁷ Ininiã ninoa Xoteoakori: —Pite sĩkoẽta anokanani !apokapanika, iuaritika paõkitatarari Apraõ? Paxirari pisãkire —itxarina.

⁵⁸ —Apraõ apisapanikara nota aua. Ikara atãoene nitxai hĩte —itxa Xesosi.

⁵⁹ Ikara isãkire ikenakotakasaakina, ikosekarina kai soro Xesosi ikiporonakinina !kapani, okinina !kapani. Xesosi kipataua. Osipikari Teoso misãkiretiko aikoti. Inapaãpota ninoa sauaki.

Mõsiãreti Xesosi Erekepeka Inĩkitakini

9 Xesosi tĩpokotakasaaki, itikari mõsiãreti. Iua ponaniãkasaaki, mõsiãreti itxapekaua. ² Xesosi moianariakori pimaãri iua:

—Koerekareri, kiripa kamari maerekati iua mõsiãreti inini? Iuakani? Irikani? Inorokani?

³ Ininiã Xesosi:

—Kona iua maerekani xikani mõsiãreti itxaua. Kona iri maerekani xikani, kona inoro maerekani xikani mõsiãreti itxaua. Kona maerekanitxi xikani mõsiãreti itxaua. Iua mõsiãreti Teoso posotiire kãkiti imarotini !kapanira. ⁴ Kãkiti parĩkauata pokamara. Mapiãpeka inakasaaki, kona kãkiti posotaikari iparĩkauatini. Iua atokokana akamariko niokanatakiri paniãtakiti aãuapanika anakasaaki. Apinaka atoko kona akamaikari Teoso paniãtakiti !korapokoriti. ⁵ !korapokoriti nauakasaaki, niopinikana ikinimane ãkixinire Teoso imarotininina !kapani —itxa Xesosi.

⁶ Ikara inaãka atoko ienemaã ixiti oakaka Xesosi. Ikamari ãkape, minapa itxari mõsiãreti oki nopini.

⁷ Iokanatarari:

—Parokari poki Siroee poamoni —itxari mõsiãreti.

Iuaã auari ipoa xapitikiri kākiti kamakiti. Iua ipoa uãka “Siroee.” Iua uãkatxikana “Tokanatakori” itxaua. Iua sari Siroeemoni. Arokatoõtaua. Iuasaakipeka kōsiärepeka itxa.

⁸ Apoko takote auakani, kākiti mitxi mōsiäreti itikakani pakini, ninoa misäkiretakakaua:

—Ikira kiki mitxi iitopākanātapika inakarikani, kākiti txineirote amanaānātapika inakarikani, ikira kiki? —itxana.

⁹ Apanakini apakapapiretari:

—Ari, iuapitikara.

Apanakinipekana apakapapiretari:

—Kona. Kona iuani. Āti kiki iua mōsiäreti atoko inakarira.

Iua mitxi mōsiäreti apakapapiretari:

—Ari, iuapitikarano nota —itxa.

¹⁰ Ininiã ninoa:

—Kiãtokopa pitxa uatxa kōsiärepeka pitxapeka? —itxarina.

¹¹ —Iua Xesosi inakori kamari ākape, nokiã minapa itxari. Ipaniãtano: “Āparaã Siroee inakorimoni pisa. Iuaã parokatoõtaua,” itxano nota. Ininiã nisa. Narokatoõtaua. Iuasaakipeka nota kōsiärepekanono —itxa.

¹² —Namoniparari iua? —itxarina.

—A, meta —itxa iua mitxi mōsiäreti.

Pariseoakori Mitxi Mōsiäreti Inakarikata

¹³ Ninoa anikari iua mitxi mōsiäreti pariseoakorimoni. ¹⁴ Iua õti Xesosi kamakasaakiri ākape mōsiäreti kōsiärepeka inĩkitakini ĩkapani tomatiko õtisaaki iuasaaki. ¹⁵ Ninoa anikasaakiri iua mitxi mōsiäreti inakari pariseoakorimoni, pariseoakori apaka pimaãri iua:

—Kininiãpa uatxa kōsiärepeka pitxa? —itxana.

—Ākapeãra noki nopini iminapa. Eereka narokatoõtaua. Uatxa kōsiärepeka nitxa —itxa.

¹⁶ Pariseoakori ātikaka txari:

—Iua kiki, ākape mōsiäreti oki nopini minapakari, kona iua kamari Teoso paniãtakiti, kotxi iparĩkauata tomatiko õtisaaki. !Apakata ikamakiti.

Pariseoakori ātikakapekana sãkirauata:

—Maerekati kamakari kona kamari ikara atoko inakari posotiiiretxi, mōsiäreti kōsiärepeka inĩkitakini.

Ininiã pariseoakori taparakienatakakaua ikara xika.

¹⁷ Iuaĩkana pariseoakori misäkiretari iua kiki:

—Kiãtokopa inakaripa iua kiki pite makananitikari? —itxarina iua.

—Teoso sãkire sãpiretakari itxaua iua.

¹⁸ Xoteo auĩteakori kona auikari isãkire, mitxi mōsiäreti eereka kōsiärepeka inakari sãkire. Ininiã ninoa akiritari iri, inoro pakini.

¹⁹ —Hĩte sãkire hamarite auakasaaki mōsiäreti itxapekaua. Hamaritekani ere? Kiãtokopa uatxa kōsiärepeka itxa? —itxana.

²⁰ —Ari, ate ākiripitikara. Iponaniãkasaaki, mōsiäretepeka itxaua. ²¹ Kona ate imarotari kiriãpareuako uatxa kōsiärepeka itxa. Kona ate imarotari kiriuako kamari kōsiärepeka inini. Hĩpimaãri iua, kotxi

mitapekari iua. Iuaka apakapapiretai hĩte —iri, inoro pakini txana ninoa.

²² Iri, inoro pakini ikara atoko itxana Xoteo auĩteakori ipĩkinina xika. Xoteo auĩteakori sãpiretapekari kākiti: “Kākiti Xesosi sãkire auĩkani, Teoso mereẽkiti ininiua auĩkani, kākiti iãtapakiti ininiua auĩkani, kona auiritããkaikana ĩroinina aiko Xoteo apotiitiniãtaãua.”

²³ Ininiã pĩkaretxi xika iri, inoro pakini txari: “Hĩpimaãri iua. Mitapekari iua,” itxana ninoa.

²⁴ Ininiã iuaĩkana pariseoakori akiritari iua kiki mitxi mōsiäreti inakari.

—Atãonanira pisãpiretako Teoso apisatoõ. Ate imarotari maerekatinoka ikamini Xesosi, kotxi imakananirauata tomatiko õtisaaki —itxarina.

²⁵ Ininiã iua:

—Kona nimarotari maerekati ikamini. Kona nimarotari erekari ikamini. Mitxipeka mōsiäreti nitxaua. Uatxa kōsiärepeka nitxaua. Ikaranoka nimarota —itxana ninoa.

²⁶ —Kiãtokopa itxai kōsiärepeka inĩkitakiniãi?

²⁷ Iua mitxi mōsiäreti inakari apakapapiretari:

—Nisãpiretapekai hĩte mixikanani, txamari !hãuikari nisãkire. Kinirepa hinirekatari iuaĩkana nisãpiretini? Atauako hĩte apaka nirekari iua sãkire hãuikini? —itxana.

²⁸ Ininiã itxitarina:

—Pitera auikari iua sãkire. Ate auikari Moisesini sãkire. ²⁹ Aimarotari Teoso misäkiretari Moisesini. Iua Xesosi kamari maerekati. !Aimarotari amonikiripa iua ina —itxana.

³⁰ Iua kiki apakapapiretari:

—Anekani. Kona hĩte imarotari amonikiriuako iua ina. Iuara kamaõsiãretano nota. ³¹ Teoso kona maãkatari maerekati kamakari amanaãkiti. Teoso teosonetakani amanaãkiti imaãkatapitika. Iua nirekaãkiti kamakari amanaãkiti imaãkatapitika.

³² Mitxipeka mōsiäreti kōsiärepeka inĩkitaãkari kona auari. Itixi kamikosaakipanika !auari kōsiärepeka inĩkitaãkari. Uatxaikara auape. ³³ Xesosi Teoso iokanatakiti iminakanimauako, !ikamamariko posotiiiretxi —itxa iua.

³⁴ Ininiã pariseoakori:

—Pite maerekatipeka auakarikai. Ātipirika pite kamari maerekati. Maerekatinoka pĩkiteta. Iuaritika pinirekatari ate poerekini? Konapitini. Kona ate nirekari ikara pisãkire. Pisipiniikaua. Kona uai pikanapiripinika. Ate kona nirekari pite uai kākiti apotiitiniãtaãua aikoti pinini —ninoa txari iua.

Ininiã aiko porikiti iokanatarina.

Mitxi Mōsiäreti Inakari Auikiniri Xesosi Sãkire

³⁵ Xesosi kenakopiretari iporikiti iokanatiko mitxi mōsiäreti inakari, ininiã Xesosi nitari iua. Apokasaakiri, itxari:

—Atauako pauikatari Teoso ākiri sãkire? —itxari.

³⁶ —Kipa iua? Nimarotiniãri, nauikapitikariko —itxa.

³⁷ —Pite aõkitapekari Teoso ākiri. Iuapitikara misãkirenãtai pite uatxa —itxa.

³⁸ —Apananiri, nota auikari pite Teoso äkiri pininiua. Ininiä iua kapotoreëkaua Xesosi apisatoõ.

³⁹ —Ïkorapokoriti napoka Teoso säkire auikäni ipinimoni nitakinina ïkapani. Isäkire mauikäni ipinimoni nitakinina ïkapani napoka ïkorapokoriti. Apanakini nisikaposotiireta, Teoso säkire auikinina ïkapani. Mitxi ninoa mösiäreti atoko itxauana, kotxi mitxi !imarotari-na Teoso. Ninoa auikapiretakasaakiri Teoso säkire, kösiärereri atoko itxapekauana. Apanakinipekana atão minakati isäkirena: “Nimarotapitikari Teoso.” Ninoa uäkatarı kösiärereri atoko ininiuana. Txamari kona atão ninoa nirekari imarotiniri Teoso. !Nisikari posotiiiretxi ninoamoni, Teoso säkire auikinina ïkapani. Käkiti iua atoko inakari mösiäreti atoko itxaua —itxa Xesosi.

⁴⁰ Ätikaka pariseoakori Xesosi takote auakani kenakotari.

—Atauako atekani apaka mösiäreti atoko atxaua? —itxana.

⁴¹ —“Mösiäreni atoko atxaua,” hininiä hīsäkire, ininiä atão hīsäkire. Txamari hīte txari: “Kösiäreua ate,” hītxama. Iua atoko hininiä hīkamapitikari maerekati, kotxi kona häuikari Teoso säkire —Xesosi txana ninoa.

Soti Auīte Pitikiri

10 Xesosi säkirauatakasaaki, ia atoko itxa isäpirena:

—Atäopitikara ia atoko nitxapaniiko hīte. Soti auīte ïroä pirikeri itoremoni. Itoremoni mīïroäkani kīitiriri itxauana, kotxi ätiätaä ikanīka ïroini ïkapani. ² Pirikeri toremoni ïroäkari soti auīte pitikiri. ³ Initiri osereëri pirikeri tore iua ïkapani. Soti auīte kenakotari ipitikiri säkire. Ipitikiri imarotari ikinipoko ipiraakori uäka akiritinina ïkapani. Iuara anikana inipokotinina ïkapani.

⁴ Porikiti auakasaakina, iua saäpota ninoa apisa. Iua tikini isana ninoa. Ninoa imarotari iua säkire ene. ⁵ Ninoa kona sari kākiti imimarotakininitina tikini. Ipitikiri minakotika akiritakasaakina, imitekana. Kona imarotarina imapitikiritakininitina säkire.

⁶ Ikara säpirenatxi atão inakari oerekiko Xesosi säpiretari pariseoakori. Txamari ninoa kona imarotari Xesosi ikara atoko inakari isäpirena.

Xesosi Soti Auīte Pitikiri Erekari Itxaua

⁷ Xesosi iuaīkana säkirauata.

—Inipitikara nota pirikeri tore nitxaua, soti auīte ïroini ïkapani. ⁸ Nota apisa apoäkani, atão minasäkiretakani kīitiririni itxauana. Soti auīte kona maäkatarı ninoa säkire. ⁹ Nota itore nitxaua. Käkiti ïroiniätaä tore nitxaua. Nota makatxakari uai ïroäkari maerekani, auapininiika inini ïkapani. Iïroä, ipokīka itxapika. Kona kapīkareri. Natxi !auari. ¹⁰ Kīitiriri apoka iitiriuatini ïkapani, okaniuatini ïkapani, imisirikarauatini ïkapani. Notapekana apoka kākiti auapininiika inini ïkapani, kākiti auini ereka inini ïkapani.

¹¹ Pitikiritxi erekari nitxaua nota. Pitikiritxi erekari ipina ipiraakori mapinakani ïkapani. ¹² Nitiritxi soti auīteakori pitikiri !itxaua. Anäpa auīte kaneenamari

apokasaaki, iua miteka. Itakanapanako soti auīteakori. Ininiä anäpa maīkari soti auīte, oxikepoata itxana.

¹³ Iua nitiritxi mitekako, kotxi txineiro ïkapaninokara iparīkauata. Kona atão itiretari soti auīte.

¹⁴ —Soti auīte pitikiri erekari nitxaua nota. Atão nimarotari nipiraakori. Ninoa apaka atão imarotano nota. ¹⁵ Iua atokokana niri imarotano nota. Nota apaka imarotari niri. Nota ipinako soti auīteakori nota nakiti mapinakani ïkapani. ¹⁶ Nota aua apanakini soti auīteakori apaka. Uatxa ia pirikeri äki !auapanikana. Niminanako ninoa apaka ia pirikeri äki auinina ïkapani. Ninoa auikari nīsäkire. Ininiä ninoa imakinika aua ätika pirikeri äki. Ätikarako ninoa pitikiri.

¹⁷ —Niri taretano, kotxi nauiritari nipinini, iuaīkana nōkitikiniua ïkapani. ¹⁸ Käkiti !iposotari okinino nota nimanirekasaakiri nokiko. Nota sikariko nīto nokiko ïkapani. Ninirekasaaki manapı nipina. Ninirekasaaki manapı nōkitikaua. Ikara atoko niri paniätano nota —itxa Xesosi.

¹⁹ Ikara Xesosi säkire Xoteoakori kenakotakasaaki, itaparakienatakakauana. Apanakini potxitari Xesosi säkire. Apanakini kona potxitari.

²⁰ Apanakini txari:

—Satanasi nitiri auaītotari iua.

Ätipekana txari:

—Imapitxirita. Kinirepa hīkenakotatari mapitxirita takari säkire? —itxana ninoa.

²¹ Apanakini txari:

—Satanasi nitiri auaītotakiti !ikara atoko itxa säkireta. Satanasi nitiri kona kösiärepeka txīkitakari mösiäreti —itxana.

Xoteoakori !Auikari Xesosi Säkire

²² Mitaäsaaki Xoteoakori kamari kiiniri Xerosareë. Iuasaaki ixinikarina Teoso misäkiretiko aikoti merepaniko kamiko. ²³ Iuasaaki Xesosi tīpokota aiko Teoso misäkiretikoätaä, Saromäoni inakoriätaä. ²⁴ Iuaä Xoteoakori apotiitaua iuamoni. Iuasaaki ninoa txari iua:

—Pite Teoso mereëkiti pininiäua, pisäpiretaua. Akokaxiti anirekari aimarotiniri ikara —itxarina.

²⁵ Xesosi apakapapiretana:

—Nisäpiretapekai hīte. Kona häuikari nota säkire. Niposotiire nikamakiti niri uäkaä oerekepekai hīte.

²⁶ Nisäpiretapekai hīte, txamari kona häuikari nota säkire, kotxi nisoti auītene kona hītxaua. ²⁷ Nisoti auītene imarotari nisäkire. Nota imarotana ninoa. Ninoa kapokitano nota. ²⁸ Nitxīkitakana ninoa ätipirika auinina. Nota kamari ninoa imipīkanina tīkane. Kona kamakatkakikona nota nīkatakini. ²⁹ Niri sikana ninoa notamoni. Apiatakari itxaua iua. Ininiä äti kona posotari imakatkakinina niri nīkatakini. ³⁰ Niri, nota pakini ätika atxaua.

³¹ Ikara atoko Xesosi inakasaaki, Xoteoakori morökari kai soro ikiporonakinirina ïkapani. ³² Xesosi säkirauata ninoamoni:

—Kaiãopokori erekari niri nakiti noerekapekai hïte. Kinakarixikapa hinireka hïkiporonakinino nota? —itxa Xesosi.

³³ Xoteoakori apakapapireta:

—Kona akiporonakai erekari pikaminiã. Akiporonakai, “Teosorano nota” pinini xikara. Pite kiki, iuaritika “Teosorano,” pitxa. Ininiã maerekati pikamapeka Teosomonikari.

³⁴ Xesosi apakapapiretana:

—Kitxakapirïka Teoso sãkire iõkatsopatakori txari: Nitxai: “Teosoakori hïtxaua hïte.”

³⁵ Aimarotari Teoso sãkire iõkatsopatakori ätipirika atão inini. Teoso akiriuãkatana ninoa isãkire apakapakani “teosoakori.” ³⁶ Ininiã kinirepa hïte kamaãkaretxitano. Niri mereẽno nota inireẽkiti nikamini ïkapani. Iokanatano ïkorapokoritimoni. Ininiã kinirepa hãpoïtano Teoso nimisãkirepiretini, “Teoso äkirirano” ninakasaaki? ³⁷ Nimakamakaniãri niri nirekaãkiti, iusaaki kona hãuikari nota sãkire. ³⁸ Nikaminiãri inirekaãkiti, iuaritika himauikakaniãri nisãkire, hãuikariko niposotiire. Hïtikakiti hãuika. Ininiã himarotariko, hãuikariko, niri, nota pakini ätika aniniua —itxa Xesosi.

³⁹ Tuasaakipeka pariseoakori omanãkarauata. Iuaïkana inirekarina imaïkinirina Xesosi. Txamari iusaakipe isipe.

⁴⁰ Iuaïkana Xesosi kanapiriã Xotão ipiniãmoni. Iuaã ikaikota Xoão kapatxisarerini patxisarauatiniãtaã. ⁴¹ Itomaneri kãkiti sari iuamoni. Ininiã ninoa txa:

—Xoão kona kamari posotiiretxi, iuaritika ikinika isãpiretakiti Xesosi pirena atão inakarinoka isãpireta.

⁴² Ininiã itori kãkiti iuaãtaã auikari Xesosi sãkire.

Arásaro Ipinini

11 Kiki Arásaro inakori aua ipi itaro, Maria, Mata pakini. Ninoa aua Petãnia aapokotxiti. Iusaaki Arásaro amianata. ² Xesosi ipinini apisa, oa Maria arokari Xesosi kiti kamariãroã, oiãkoã kaxipota otxari. Oa Maria itari Arásaro amianata. ³ Iua amianatakasaaiki, Maria, Mata pakini iokanapireta Xesosimoni:

—Apiananiri, pitiretakiti amianata —otxari.

⁴ Ninoa iokanapirena ikenakotakasaaki, iua txa:

—Amianari inokari Arásaro kona ipinini ïkapanini. Teoso posotiire oerekini ïkapanira iua amianari inokari iua. Kãkiti: “Teoso äkiri peerekari” iniko ïkapanira iua amianata.

⁵ Xesosi tiretari Mata, oïtaro Maria, Arásaro pakini.

⁶ Ikenakotakasaakiri Arásaro amianatini, iua napanikari ipi õti iuaxiti. ⁷ Eereka itxana imoianariakori:

—Iuaïkana Xotéia tõpa masa.

⁸ Ininiã imoianariakori:

—Koerekareri, kitapani iuaã Xoteoakori nirekari kai soroã ikiporonakinii pite. Iuaritika pisatapanikako iuaãtaã? —itxarina.

⁹ Ininiã Xesosi:

—Pokamara tosi oara aua kãkiti parïkauatini ïkapani. Pokamara ïpokotakari kona mãkitita, kotxi atokatxi

iopinikari ikinipoko. ¹⁰ Txamari ïkanõka ïpokotakari mãkitita, kotxi atokatxi kamara lauari.

¹¹ Ininiã Xesosi:

—Amoianari Arásaro imakanãta. Nota õpirïkariko iua —itxa Xesosi.

¹² Ininiã Xesosi moianariakori txa:

—Imakanãtiniã, erekaãpopokari uatxa —itxana.

¹³ Xesosi imarotari Arásaro ipinini, txamari imoianariakori uãkatari Arásaro atão imakini.

¹⁴ Ininiã Xesosi txana ninoa atão imarotinina ïkapani: —Arásaro ipïpe. ¹⁵ Erekapitikari iuaã nimauakani, kotxi eereka hïte auikariko nota sãkire. Masa iuaxiti. Maõkitari iua —itxa Xesosi.

¹⁶ Tomee Txítximo inakori misãkiretana apanakini Xesosi moianariakori:

—Masa iuakata apinini ïkane.

Ikara atoko itxa isãkire, kotxi iuaxiti Xoteoakori nirekari okiniri Xesosi.

Kãkiti Auãki Inïkitaãkari

¹⁷ Xesosi apokasaaki iuaxiti ipi ipi pakini õti napapeka. Ininiã iusaaki Arásaroni katapeẽkaika. ¹⁸ Petãnia Xerosareẽ takote. ¹⁹ Apanakini kãkiti apoka Mata, Maria pakinimoni. Ninoa moianatana, kotxi itarina !auaika.

²⁰ Mata kenakopiretari Xesosi apokaãpotini. Ininiã oa sari oaõkitiniri ïkapani. Maria kaikota oaãpoko äki.

²¹ Xesosimoni Mata apokasaaki, otxari iua:

—Apiananiri, pite uai auaãkamako, kona nitari ipinamako. ²² Iuaritika nimarotapitikari, pamanaãkiti Teoso sikapitikai —otxa.

²³ Ininiã Xesosi txaro:

—Pitari iuaïkana auapanikako.

²⁴ Ininiã Mata:

—Nimarotari itixi xipokini õti nitari iuaïkana auapanikako. Ipïkani õkitikiniua õti, iua õkitikaua —otxa Mata.

²⁵ Ininiã Xesosi sãkirauata:

—Nota ipïkari õkitikakarirano nota. Kãkiti auãki inïkitaãkarirano nota. Nota sãkire auãkari ipininiã, iuaritika iuaïkana auapanikako. Kona ipinaika. ²⁶ Nota sãkire auãkari auapanikako iuaïkana. !ipinaikako. Pauikatari ikara atoko nininii? —itxa Xesosi.

²⁷ Ininiã Mata:

—Apiananiri, nauikapitikari. Teoso mereẽkiti pitxaua. Teoso äkiri pitxaua. Teoso iokanatakiti itiximoni ïkari pitxaua. Ikara nauikapitika —oa txari iua.

Xesosi Txiapatini

²⁸ Eereka Mata sari oïtaromoni. Oãkiritaro oa, mapara omisãkiretini ïkapani.

—Koerekareri apope. Iua akiritai —otxa Mata.

²⁹ Maria kenakotari ikara inakasaaki, katimariã õkitikaua, iuamoni sa otxa oa. ³⁰ Iusaaki Xesosi !apokapanika aapokotxiãtaã. Ikaikotapanika mitxi Mata apokiniãtaã. ³¹ Maria katimaritika õkitikasaakiua, Xesosimoni osini ïkapani, Xoteoakori, oaãpoko äki

auakani, oa mīkapiritakani, sari oa tikini. Ninoa uākatari akauarimoni osini otxiapatini ĩkapani.

³² Maria apoka Xesosimoni. Oātamatakasaakiri iua, iua apisatoō okapotoreēkaua. Otxari:

—Uai pauaākamako, kona nitari ipinamako —otxa.

³³ Xesosī atamataro otxiapatini. Xoteoakori oakata apokakani txiapata apaka, ininiā Xesosī iteene matinaniuata ākixinireē. ³⁴ Iua pimaāna:

—Nanipa hīkatatari? —itxa.

Ininiā ninoa:

—Apiananiri, masa. Patariko iuaā —itxana.

³⁵ Iuasaaki Xesosī txiapata.

³⁶ —Hātamataro Xesosī. Iua turetāpitikari Arásaroni —itxa Xoteoakori.

³⁷ Ātikaka Xoteoakori txa:

—Mōsiāreti kōsiārepeka itxīkitakapeka. Atxīiti iua uai apokaākamako, kona Arásaro ipinamako —itxana.

Xesosī Ōkitikiniri Arásaroni

³⁸ Ininiā Xesosī iteene matinaniuata ākixinireē. Iuasaaki isa akauarimoni. Ninoa takari ipīkari kai auīte āki. Kai auīte itotaāka.

³⁹ Ininiā Xesosī txari:

—Himakatxakari akauari tore —itxa.

Mata, Arásaroni itaro txari Xesosī:

—Apiananiri, ipaiakapeka. Ipi ipi ōti pakinipeka ikatiko, ininiā pataparasakari —otxari Xesosī.

⁴⁰ Ininiā Xesosī:

—Nota sāpiretāpekai: “Nota sākire pauikiniā, pitikariko Teoso posotiire” —itxaro.

⁴¹ Ininiā imakatkakarina kai. Iuasaakipeka Xesosī ionakaāta iaxiti.

—Niri. Ereka, kotxi pikenakotari nisākire. ⁴² Nimarotari ātipirika pikenakotiniri nisākire. Ikara atoko nitxa sākireta kākiti uai auakani kenakotiniri ĩkapani, kotxi ninirekari ninoa auikiniri pite iokanatinino nota uai—moni —itxa.

⁴³ Ikara atoko inaāka atoko akirikatari:

—Arásaro, pōkitikaua. Pipokīka.

⁴⁴ Ininiā iuasaakipeka Arásaro pokīka. Imakinika iito mākatxi mataā iapirikaāka. Itoō apaka iapirikaāka mākatxi mataā.

Ininiā Xesosī:

—Himakatxakari iapirikiko.

Xesosī Okaenetiko Pirena

(Mateo 26.1-5; Marko 14.1-2; Arókasi 22.1-2)

⁴⁵ Xoteoakori Mariamoni ĩkani itikari ikara atoko inakari, ininiā auikarina Xesosī Teoso ākiri ininiua.

⁴⁶ Ātikaka Xesosī kamakiti itikakani kanapiriā pariseoakorimoni. Isāpiretana Xesosī ōkitikiniri Arásaro. ⁴⁷ Ininiā pariseoakori, sasetotxi auīteakori pakini apotiitaua. Imisākiretakakana:

—Kiripa ate kama? Ia kiki kamari itori posotiiretxi.

⁴⁸ Aāuiritiniāri iua ikara atoko ikamini, ikinipoko kākiti auikari iua sākire. Ininiā iua tikini isana. Ikara atoko ininiā, Homanoakori xipokari Teoso misākiretiko aikoti ate nakiti, ate tixine apaka —itxana.

⁴⁹ Iuasaaki Kaipasi inakori sasetotxiakori auīte apiatakari inakari iua. Itxana:

—Hīte kona kimarorepanikai. ⁵⁰ Erekarī āti kiki ipinini ikinimane mapinakani ĩkapani. Ikara atoko ininiā, kona ikinipoko anirimane ipinako —itxa Kaipasi.

⁵¹ Īkorakanani sasetotxi auīte apiatakari itxaua Kaipasi. Ia atoko itxa: “Xesosī ipinako Xoteoakori mapinakani ĩkapani. ⁵² Kona ninoa ĩkapaninanini ipinako. Teoso anaakori iarikakani ĩkapani apaka ipinako. Ininiā iuasaakirako iua apotiitari ikinipoko ninoa. Ininiā Teoso anaakori itxauanako,” itxa Kaipasi sākire.

⁵³ Iuasaaki eereka imapapiretarina Xesosī okinina tīkane. ⁵⁴ Ikara atoko ininiā, Xesosī kona saika Xotéia tōpamoni. Isari Eparaīi sitatxitimoni, āparaā makipakaniātaā takote. Iuaā ikaikota imoianariakorikata.

⁵⁵ Iuasaaki imatokoāpotarina Páskoa kiiniriti. Iuasaaki itomaneri Xoteoakori Xerosareē tōpa auakani sari Xerosareē sitatxitimoni. Iua kiiniri apisapanika, isana iuaā oerexiniretinuana ĩkapani. Iuasaaki amanaārina Teoso imakatkakiniri maerekati ikamakitina. ⁵⁶ Iuaā Xoteoakori nitari Xesosī. Ninoakakarika ipimaākakana:

—Atauako kiinirimoni inapani atxīiti?

⁵⁷ Sasetotxi auīteakori, pariseoakori pakini paniā—tapekari kākiti:

—Himarotakasaakiri Xesosī auiniātaā, hīsāpiretauako ate, ininiā amaīkariko iua.

Maria Takari Kamariāro Xesosī Kitiā

(Mateo 26.6-13; Marko 14.3-9)

12 Seisi ōti Páskoa kiiniriti apisa, Xesosī sari Petānia sitatxitimoni. Iuaā aua Arásaro, Xesosī ōkitikakiti Arásaro ipīkasaaki. ² Iuaā ikamaāka nipokori Xesosī ĩkapani. Mata sikari nipokori kākitimoni. Iuasaaki Arásaro apanakinikata topāka Xesosikata. ³ Iuasaaki Maria kosekaro kamariāro koana. Oia atāo nato kamakoro. Ipixini kiro ominani aua. Kona koketakoroni. Natonokara. Pakaronero, iuaritika okitakaro Xesosī kitimoni. Oiākoā okaxipokari. Iuasaaki aapokotxi āki omarinokara itxaua.

⁴ Txamari Xotasi Isikariotxi inakori !apokaerekatari kamariāro Xesosī kitiā okitakini. Iua Xotasi Simāo ākiri. Xesosī moianari itxaua, txamari imīkapiritariko Xesosī.

⁵ Ininiā Xotasi txari:

—Kākiti parīkauata tresētosi pakini ōti oia atoko inakaro kamariāro iamotiko ĩkapani. Kinirepa kona ovētixitaāka? Kinirepa txineiro mauakinitimoni !osika? —itxa Xotasi.

⁶ Ikara atoko itxa, kotxi kītiriri itxaua. Iua nīkatāro nino txineirote. Iua itotapekari txineiro iitirīkini. Iua !imaākatana txineiro mauakinitini.

⁷ Xesosī apakapapiretari:

—Kona hītxitapero Mariapani. Onīkatāro kamariāro ia ōti notamoni otakini ĩkapani, kotxi oxinikari nikatiko ōti ĩkapani. ⁸ Minakati mauinakini auapikako hītekata. Txama nota !auaikako hītekata —itxa Xesosī.

Xoteo Auñteakori Nirekari Okiniri Arásaro

⁹ Itomaneri Xoteoakori kenakopiretakasaakiri Xesosi Petánia sitatxitiã auini, ininiã iuaã isana Xesosi aõkitinina ñkapani. Kona iuananini ninoa nirekari aõkitinina. Arásaro Xesosi õkitikakiti apaka ninoa nirekari atamatinina. ¹⁰ Ininiã sasetotxi auñteakori nirekari Arásaro apaka okinina, kotxi kaiõopokori kãkiti auikari Xesosi sãkire Arásaro sãpiretakiti ikenakotakasaakina. Itakanaparina sasetotxiakori sãkire auikinina. ¹¹ Arásaro iuañkana auiniã, ininiã itomaneri Xoteoakori asikaãpotari iauñtena, Xesosi sãkire auikinina ñkapani.

Xesosi Xerosareẽ Apokaãpotini

(Mateo 21.1-11; Marko 11.1-11; Arókasi 19.28-40)

¹² Katimatinñkata, itomaneri kãkiti Páskoa kiiniritimoni sikani, kenakopiretari Xesosi apokaãpotini Xerosareẽmoni. ¹³ Ininiã Xerosareẽkini sari aõkitinirina iua. Kinari tape anikana, Xesosi apiãkatakasaakina. Akirikatana:

—Peerekari Teoso. Teoso takari erekari Isaeo auakani auñtemoni, Apiananiri uãkaã ñkarimoni —itxana.

¹⁴ Mitxipe Xesosi iokanitari imoianariakori xomẽta ãkiri initinina. Ninoa apokasaakiri, iminarina Xesosi-
moni. Ininiã Xesosi topãka iua nopini. Iua nopini Xesosi sari Xerosareẽmonikari. Kitxakapirñka Teoso sãkire iõkatsopatakori txari:

¹⁵ Kãkiti Xerosareẽkini kona hñpñkaruatape. Erepani hñauñte. Xomẽta nopini iitopãkako, itxa Teoso sãkire kitxakapirñka. Ikara iaõka apokapeka, kotxi Xesosi apoka xomẽta nopini.

¹⁶ Iuasaaki imoianariakori kona xinikari Teoso sãpiretakiti kitxakapirñka auakari. Xesosi ipinaka atoko, õkitikaãkaua atoko, iuasaakiika ninoa xinikari ikara Teoso sãkire. Ininiã iuasaakiika imarotarina Teoso sãpiretakiti.

¹⁷ Mitxi kãkiti akauari takote auakani, ninoa itikari Xesosi õkitikiniri Arásaro. Ninoa iaripiretari Xesosi kamakiti. ¹⁸ Ininiã kãkiti apiãkatari Xesosi, kotxi ninoa kenakoenetapekari Arásaro õkitikini. ¹⁹ Ininiã pariseoakori misãkiretakakaua:

—Hãtamata. Kiripa aposota akamini? Ikinimane kãkiti nirekari iua.

Ininiã pariseoakori xikotari Xesosi.

Ãtikaka Krekoakori Nitari Xesosi

²⁰ Ãtikaka Krekoakori apoka Xerosareẽmoni Páskoa kiiniriti ñkapani, kotxi ninoa nirekari Teoso imisãkiretinina. ²¹ Apokasaakina iuaãtaã, isana Piripimoni. Iua Petsáita aapokotxitikiri, Kariréia tõpa auakari. Ininiã apokasaakina Piripimoni, ipimaãrina:

—Ate nirekari Xesosi aaõkitini.

²² Ininiã Piripi sari ãtreemoni, isãpiretiniri ñkapani. Eereka isana Xesosimoni. ²³ Ininiã apokasaakina, Xesosi txana ninoa:

—Kaiamapekari nota hñtari iaxitikiri sini niri tixinemoni ikinipoko erekari napakapini ñkapani. ²⁴ Atão nisãpiretai. Nota kimi oki atoko. Kãkiti matakakaniãro oa, ãtika okinoka auapika. Pitakiniãro, opitxaka. Ininiã kaiãori oki aua. Ikara atoko nota. Nimapñkaniã, ininiã notanokara auari. Nipininiã, ininiã itomaneri kãkiti sari niri tixinemoni. ²⁵ Pite ãtipirika kaminiãri piteka nireẽkitinoka, ininiã pinireẽkiti xipokapitikako pitekata. Pite nireẽkiti xipokiniã, nota sãkire pauikini xika, pite auapininiika txako Teosokata. ²⁶ Kãkiti nirekiniãri iparñkauatini nota ñkapani, imoianatanoko. Iua atoko ininiã, nota auiniãtaã iua apaka auako. Kãkiti parñkauatiniã nota ñkapani, ininiã niri paxitariko iua.

Xesosi Sãpiretari Ipinini

²⁷ Xesosi misãkiretari Teoso:

—Uatxa kona erekaxinireno, ininiã kiãtokopa nitxanisãkire pitemoni? Atxñti nipaniãtai: “Niri, pimakatxakinanoko nimapinakanani ñkapani.” Ikara atoko ñnipaniãtai, kotxi nipinini ñkapanira napoka ñkorapokoritimoni.

²⁸ Ininiã niri, poerekari kãkiti ikinimane auñte pininiãua —itxa Xesosi.

Iuasaakipeka iaxitikiri txari:

—Noerekapekari kãkiti ikinimane auñte nininiãua. Eereka iuañkana noerekapanikariko ikara —itxa Teoso.

²⁹ Kãkiti iuaãtaã auakani kenakotari iaxitikiri sãkire.

Txamari itxana:

—Ikarokirauata.

Apanakini txari:

—Teoso nitirira sãkirauata iuakata —itxana.

³⁰ Xesosi txana ninoa:

—Ikara sãkirauata kona nota ñkapanini. Hñte ñkapanira isãkirauata. ³¹ Iposope ikini itixiti auakani misiritiko imaerekanina xika. Iposope ikini itixiti auakani auñte Satanasi inakori xipokiko. ³² Nota aamina ñpiriãmitakari nopini nõkitikikosaaki, iuasaaki nikosekanako kãkiti notamonikari.

³³ Ikara atoko itxa, kãkiti imarotiniri aamina ñpiriãmitakari nopini ipinini.

³⁴ Apanakini kãkiti apakapiretari:

—Teoso sãkire kitxakapirñka iõkatsopatakori oerekaua Teoso mereẽkiti ãtipirika auini. ñIpinini. Txamari pite sãpiretaua ipinini aamina ñpiriãmitakari nopini? Kipa iua añtari iaxitikiri pisãpiretakiti? —itxana ninoa.

³⁵ Ininiã Xesosi:

—Tirikapi kamara atoko nitxa. Hñtekata nauakasaaki, noerekai hñte atão inakari. Uatxa tirikapi kamara hñtekata auapanika. Pañtiki nota sipe. Tirikapi auakasaaki, pauapikako tirikapi kamaraã. Ininiã ipiã kona apoka hñtemoni. Kãkiti mauikaniãri nota sãkire, ñkanõka ñpokotakani atoko itxana. ñImarotarina isininimonina. ³⁶ Tirikapi hñtemoni auakasaaki, hñuikariko iua sãkire. Ikara atoko ininiã, “pokamarari anaakori” hñtxaua —itxa Xesosi.

Ikara atoko inaka atoko isipeka. ñIsãpiretari isinimoni.

Xoteoakori Kona Auikari Xesosi Säkire

³⁷ Xoteoakori itikari ikinipoko posotiiretxi Xesosi kamakiti. Iuaritika kona ninoa auikari iua säkire. ³⁸ Ikara atoko ininiã, kitxakapirika Teoso säkire säpiretakari Isaía inakori iökatsopatakiti, iusaaki apopeka. Isaía txari:

Apiananiri, käkiti !auikapiretari asäkire ninoamoni asäpiretakiti. !Auikari piposotiire poereëkiti ninoamoni, itxa Isaía. ³⁹ Iua atoko ininiã, Xoteoakori kona posotari auikiniri Xesosi säkire, kotxi iuaikana Isaía txari:

⁴⁰ Teoso mösiãretakana ninoa. Kaikokii itxikitakana. Itikakitina kona iikitetana ninoa. Ikiãna kona !imarotarina. Ininiã ninoa kona apokapaniko notamoni erekapeka ininina nitxikitakini ikapani, itxa Teoso Isaía iökatsopatakitiã.

⁴¹ Kitxakapirika Xesosi uai apokini apisa Isaía iökatsopatari ia säkiretxiti. Iusaaki Teoso oerekari Isaía Xesosi posotiire, apaka ikinika Xesosi kamakiti tñkane.

⁴² Iuaritika itomaneri Xoteo auñteakori auikari Xesosi säkire. Txamari !isäpiretarina apanakini, kotxi ninoa pñkari pariseoakori. Pariseoakori imarotakasaakiri Xesosi säkire auikani ininiuana, !auritaikana ninoa ãroini aiko Xoteoakori apotiitiniãtaãua. ⁴³ Iua atoko ininiã, ninoa apia nirekari käkiti iuikinina. Poiãoka ninoa nirekari Teoso iuikinina.

Xesosi Iuaikana Säkirauata Xoteoakorimoni

⁴⁴ Xesosi itaparasäkireritika txari:

—Käkiti auikiniãri nota säkire, kona nota säkirenanini ninoa auika. Niri säkire apaka auikana, kotxi iua iokanatano nota uaimoni. ⁴⁵ Natamatakiri apaka atamatar niri. ⁴⁶ Tirikapi atoko nitxa nñkasaaki kãkitimoni. Nota säkire auikani kona kaikota ipiaã. ⁴⁷ Käkiti nisäkire kenakotakani mauikakaniãri nisäkire, kona nimisiritari iua imaerekani xika. Kona käkiti nimisiritini ikapanini nina uaimoni. Nina käkiti maerekani nimaktxakini ikapanira.

⁴⁸ —Nota manirekakati, nisäkire manirekakati apaka, auapeka imisiritiko mereëkari. Nisäpiretakiti, iuarako itixi xipokini õtisaaki säpiretari imisiritiko.

⁴⁹ —Notaka säkire !nisäpiretai. Niri säkirera nisäpiretai. Niri iokanatano nota uaimoni. Iua paniãtakiti isäpiretakiti nisäpiretai hñte. ⁵⁰ Nimarotari käkiti auikiniãri niri paniãtakiti auapininiika itxako. Nota säpiretari niri sikapiretinino iaõka.

Xesosi Arokari Imoianariakori Kiti

13 Pãskoa inakori kiiniriti apisapanika, Xesosi imarotari pañtiki itixi itakanapini irimoni isini ãkapani. Iua tiretapikana käkiti iua nakiti. Ninoa itiretiniritika ipinako Xesosi.

² Xesosi imoianariakorikata inipokotini apisapanika Satanasi sikanireõtapekari Xotasi Isikariotxi Xesosi imñkapiritini ikapani. Iua Xotasi, Simão ãkiri. Eereka inirekari isikiniri Xesosi imokaiakarimoni. ³ Xesosi

imarotapekari iri sikiniri ikinipoko posotiiretxi Xesosi-moni. Imarotapekari Teosomoni ipotorikini. Imarotapekari iuamoni ikanapiriini. ⁴ Iuaritika inipokotaka atoko, õkitikaua. Imaktxakari imãka inopini auakari. Eereka ipomakitari mãkatxi mata nitiritxi parñka atoko ikamini ikapani. ⁵ Eereka itakari ãparaã tiitxi ãki. Ininiã arokana imoianariakori kiti. Eereka mãkatxi mataã ikaxipokaãpotana.

⁶ Simão Petro takote apokasaaki, Petro txari:

—Konapitini, Apiananiri. Ninitiri !pitxaua. Ininiã kona parokapiri nikiti —itxari.

⁷ Ininiã Xesosi:

—Uatxa kona pimarotari nikamakiti. Pimarotariko ãti õti.

⁸ —Koniko pite arokapaniri nota kiti —itxa Petro.

Ininiã Xesosi:

—Pimauiritakaniãno pikiti narokini, ininiã kona ni-moianari pitxaukauako —itxa Xesosi.

⁹ —Ikara atoko ininiã, kona nikitinani paroka. Niuako, nikii, imakinika paroka —itxa Petro.

¹⁰ Ininiã Xesosi:

—Käkiti kipaãtakaniua poirepe itxana. Itñpoko-takasaaki, iuaikana itxiko apoka iuamoni. Iusaaki ikitinokara arokaãka. Hñte himakinika poirepeka, kotxi nimaktxakapekari himaerekani. ãtinokara kona poireri, kotxi imaerekani auapanika.

¹¹ Xesosi imarotapekari iua mñkapiritakari, ininiã itxa: “Himakinika poirepeka. ãtinokara kona poireri,” itxana.

¹² Ninoa kiti arokaãka atoko, ieretakari imãka inopinikiri. Ikanapiriã amesamoni. Ipimaãna:

—Kinirepa narokatari hñkiti? ¹³ Hñte akiriuaãkatano nota “koerekareri.” Apaka hãkiriuaãkatano “Apiananiri.” Atãõpitikara hñsäkire, kotxi ikara inakari nitxaua.

¹⁴ Hñiauñte, hñereëkiri nitxaua. Iuaritika narokari hñkiti.

Hinitiri atoko niparñkauata. Ininiã hãrokakititakakauako, käkiti nitiri atoko hininiua. ¹⁵ Noerekapekai hñte erekari hñkamini. Uatxa hñkamariko nota kamakiti atokokana. ¹⁶ Atão inakari nitxai. Nitiritxi iamotakori poiãori. Iauñte apiari. Apaka käkiti iokanatakari apiata. Iokanatakiti poiãori. ¹⁷ Uatxa hñte imarotari atão inakari hñkamini. Hñkaminiãri, hñpoxokoniua.

¹⁸ —Kona himakinikani ikara atoko nitxai. Nimarotari nimereëkini, txamari ia Teoso säkire iökatsopatakori iaõka apokapitikako. Itxari:

Notakata komiri nikakari, iuakarako kamari maerekati notamoni. ¹⁹ Uatxa iua himarotini apisapanika nisäpiretai hñte. Ininiã nisäkire iaõka apokasaaki, himarotariko Teoso ãkiri nininiua nota. ²⁰ Atão inakari nisäpiretai. Käkiti nota iokanatakiti hñtemoni hãpakapiniã, nota apaka hãpakapa. Hãpakapiniãno nota, hãpakapari apaka nota iokanatakari hñtemoni —itxa Xesosi.

Xotasi Mñkapiritiniri Xesosi

(Mateo 26.20-25; Marko 14.17-21; Arókasi 22.21-23)

²¹ Xesosi ikara isäpiretaãka atoko, ãkixinireë imatina-niua. Itxana:

—Ari, ätikara hïte sauaki mïkapiritano nota.

²² Ininiã imoianariakori atamatakakaua.

—Kiripa ikara atoko txatoko? —itxana.

²³ Iuasaaki Xesosi moianari itiretakiti papïkaïtota iuamoni. ²⁴ Ininiã iuasaaki Simão Petro ieki itxa isona iuamoni. Ininiã Petro:

—Pipimaãri iua: “Ïkiripa ikara atoko txatariko iua?” —itxari.

²⁵ Ininiã Xesosi tiretakiti pimaãri Xesosi:

—Kiripa ikara atoko txatai? —itxari.

²⁶ Ininiã Xesosi:

—Komiri niãkakiti nisikakitikarako ikara atoko txanoko.

Ininiã iuasaaki iãkari komiri. Eereka isikari Xotasi Isikariotximoni. Iua Xotasi Simão äkiri. ²⁷ Xotasi komiri inikasaaki, Satanasi ïroã ixiniremoni. Ininiã Xesosi txari Xotasi:

—Kinirão kamaka pinakiti pikamapoka —itxari.

²⁸ Iuaã auakani äkixinireë:

—Kinirepa ikara atoko itxatari Xotasi?

²⁹ Xotasi nïkataro ninoa txineirote. Ininiã ninoa äkixinireë:

—Atxïiti iokanataro iua komiri iamotini ïkapani.

Ätipekana:

—Atxïiti iokanataro iua matiinimoni txineiro isikini ïkapani —itxanãtana äkixinireëna.

³⁰ Komiri apakapaãka atoko, inikaãka atoko isipe Xotasi. Mapiãpe inakasaaki.

³¹ Xotasi sipeka inaãka atoko, Xesosi txana ninoa:

—Uatxa kãkiti itikariko kãkiti itari iaxitikiri posotiire.

³² Kãkiti atamatariko Teoso posotiire imimoni auakari. Ininiã Teoso txari: “Erekapitikari namarite.” Iuasaaki Teoso oerekari kãkiti iua apokaerekatiniri imi. Ikara atoko ininiã, oerekari imi ereka inini.

³³ —Nitiretakini, païtikinoka nauini hïtekata. Eereka hinitapiimano nota, txamari nota sinimoni kona hïposotari hïsin. Ikara atoko nitxapekana Xoteoakori. Iuatxikana uatxa nisãpiretai hïte. ³⁴ Ininiã uatxa nisãpiretaiko hïte Teoso paniãtakiti amaneri: “Hïtiretakakaua, nota hïte nitiretini atokokana.” ³⁵ Ikara atoko hïkaminiã, ikinimane imarotariko nota moianariakori atão hininiãua.

Xesosi Sãpiretari Petro Kipatiniri Iua

(Mateo 26.31-35; Marko 14.27-31; Arókasi 22.31-34)

³⁶ Simão Petro pimaãri:

—Koerekareri, nanipa pisatoko?

Xesosi apakapapiretari:

—Nota sinimoni kona uatxa apakata hïsin. Äti ötirako hïsa hïte.

³⁷ Iuaïkana Petro:

—Apiananiri, kinirepa kona pitekata nisa uatxa? Nipinapitikamako pitekata —itxa Petro.

³⁸ —Atãopitikani notakata pipinini pinirekaka? —itxari.

—Atão nisãpiretai. Ia ïkanökatu patari säkiruatini apisapanikako, “!Nimarotariko iua,” pitxanoko ipi äti pakinikata —itxa Xesosi.

Xesosi Pinitari Imoianariakori

14 —Kona himatinaniuatape. Kona himaãkapeua. Hãuikariko Teoso säkire. Apaka hãuikariko nota säkire. ² Niri auiniãtaã aua kaiãopokori aapokotxi. Ikara atoko iminakanimako, nisãpiretapiimaiko hïte. Iuaã nisa hãuiniãtaã nikamini ïkapani. ³ Iuaã nisa hãapoko nikamini ïkapani. Eereka nikanapiriã. Nanikai hïte notakata hãuini ïkapani. Ininiã hïte apaka aua nota auiniãtaã. ⁴ Hïte imarotariko nota sini kimaporiti —itxa Xesosi.

Teoso Kimapore Itxaua Xesosi

⁵ —Kona aimarotariko pisinimoni. Natokopa ininiãpa aimarotariko pite sini kimaporiti? —itxa Tomee.

⁶ Ininiã Xesosi txari:

—Teosomoni sikari kimaporiti nitxaua. Atãonoka nisãkire. Atãonoka nikamakiti. Nitxïkitakari kãkiti auapininiika inini. Notamoni apokakarinanira sari nirimoni. ⁷ Atão nota himarotiniã, ininiã himarotariko niri apaka. Uatxa himarotapekari iua. Hãtamatapekari iua —itxa Xesosi.

⁸ —Apiananiri, poerekari piri atemoni. Ikaranoka anireka —itxa Piripi.

⁹ Ininiã Xesosi:

—Piripi, kona mixaikani hïtekata nauama nota, iuaritika kona himarotapanikano nota? Nota aökitakari, aökitapekari niri. Kinirepa, “Piri poerekaua,” pitxa?

¹⁰ Kona pite auikapanikari niri auini nota äki? Nota apaka aua niri äki.

—Hïtemoni nisãpiretakiti kona nota säkirenanini. Niri paniãtakitira. Niri nota äki auakari iuara kamari ikinipoko nikamakiti. ¹¹ Hãuikariko nisãkire niri äki nauini. Niri nota äki auini apaka hãuika. Hïmauikaniãri nisãkire, ininiã hãuikari nikamakiti.

¹² Atão nisãpiretai. Nota säkire auiaãkani kamariko nota kamakiti atokokana. Apaka ninoa kamakiti apiata, kotxi nirimoni nisako. ¹³ Nota uãkaã hamanaãkiti nota sikai hïte. Ikara atoko ininiã, oerekaãka niri ereka ininiua. ¹⁴ Ikinipoko nota uãkaã hamanaãkiti, nota sikapitikai hïte. ¹⁵ Nota hïtiretiniã, hïkamariko nipaniãtakiti —itxa Xesosi.

Erekari Matamatakoti Apokaenetini

¹⁶ —Namanaãriko niri äti kötäkikareri iokanatinu hïtemoni. Iuakara auapininiika txako hïtekata. ¹⁷ Iua Erekari Matamatakoti atãonani ina säkiretakari. Kãkiti Teoso säkire mauiaãkani kona apakapari iua, kotxi kona atamatarina iua. Apaka kona imarotarina iua. Hïtepekana imarotariko iua, kotxi hïtekata aua. Iua aua hïte äkixinireë.

¹⁸ —Ininiã kona nitakanapai hïte. Nikanapiriãpanikako hïtekata nauini ïkapani. ¹⁹ Païtiki atoko kãkiti ïkoraxiti auakani kona atamataikanoko nota. Hïte atamanoko. Hïte auapanikako, kotxi nota apaka auapanikako. ²⁰ Iuaïkana auapanika ninakasaaki, himarotari

tariko niri āki nauini. Hīte apaka auako nota ākixinireē. Nota aua hīte ākixinireē apaka. Txapaniko.

²¹ —Iua nisākire auiākarira nipaniātakiti kamakarira tiretano nota. Nota tiretakari niri tireta. Nota apaka tiretari iua nitiretakiri. Ikara atoko ininiā, noerekariko apikomoni nisākire iuamoni.

²² Āti Xotasi, kona Xotasi Isikariotxi inakorini, txari Xesosi:

—Kinirepa atenani poerekari Teoso ākiri pininiua? Kinirepa kona poerekari ikara apanakinimoni? —itxa.

²³ Xesosi apakapapiretari:

—Kākiti tiretiniāno, ikamari nisākire iaōka. Niri tiretariko iua. Niri, nota pakini apokako iuamoni. Iuakata aāuako. ²⁴ Nota matiretakani kona nīkatari nisākire.

Nisākire hīkenakotakiti kona nota sākireni. Niri niokanatakiri sākirera.

²⁵ —Hītekata nauakasaaki, ikara sākiretxi nisāpiretai.

²⁶ Niri iokanatariko kōtākikareri, Erekar Matamatakoti inakori hītemoni. Erekar Matamatakoti oerekaiko hīte ikinipoko niuākaā. Himaxinīkaretakiti iuaīkanako iua oerekaiko. Ikinipoko nisāpiretakiti oerekaiko.

²⁷ —Nisini apisapanika nikamaerekaxiniretai. Nota xinire ereka inini atokotxikana nikamaerekaxiniretai. Nisākire mauīākani kona posotari kamaerekaxiniretiniri āti nota kamaerekaxiniretini atoko. Kona himaākapeua. Kona hīpīkarauatape. ²⁸ Hīte kenakotapekari nisākire ia atoko nininii hīte: “Nisapitikako, iuaritika nikanapiriāpanikako hītekata nauini īkapani.” Hītiretiniāno, hīpoxokoniuata nirimoni nisini īkapani, kotxi poiāori nitxaua nota. Apiatakari itxaua niri.

²⁹ Ikara nisāpiretakiti apokini apisa nisāpiretai hīte. Ikara nisāpiretakiti iaōka apokasaaki, hīte auikari nisākire. ³⁰ Apikomoni iteene nisāpiretinii lapakata. Īkorapokoriti auakani auīte Satanasi inakori paītiki apokako notamoni, iuaritika liposotari itxīkitakinino ipaniātakiti nikamini. ³¹ Iteene ninirekari imakinika kākiti imarotiniri nitiretiniri niri. Apaka nikamari ikinipoko niri paniātakiti —itxa Xesosi.

Eereka Xesosi txari:

—Maōkitikaua. Masipeka.

Xesosi Atāo Itīkaretsa Itxaua

15 Ininiā eereka Xesosi txari:
—Atāo itīkaretsa nitxaua nota. Itīkaretsa nīkatakari itxaua niri. ² Isauakaro ota marito, kotxi kona kariro oa. Ota iriuataropekana iua kisauakaro omapotōkirenoka, iteene oriuatini īkapani. ³ Hīte poiरेpeka hītxa. Nisākirenanira oeretai hīte. ⁴ Okanotsa atokokana hītxa. Nota itīkaretsa atoko nitxaua. Ininiā hīpitxaka notamoni. Ikara atoko hininiā, hīkaikotata notakata. Ininiā nota kaikotapika hītekata. Ikara atoko hininiā, hīriuatapitika. Ikara atoko hininiā, erekarinanira hīkama. Hīriuatiniā, ininiā erekar hīkama. Notamoni himapitxakakaniā, kona hīposotari hīkaminiri erekar. Kona hīriuata, kotxi nota tapara lapokari hītemoni. !Karii hīte. Okanotsanoka auiniā, kona kariro. Notakata hāuapininiika hininiā, amāitiiri auapitika.

⁵ —Nota itīkaretsa nitxaua. Hīte nikanotsa hītxa. Notamoni pitakakari ātipaniriko oripaniko. Notakata himauakaniā, kona xapitiki kona hīposota hīkamini.

⁶ Nota sākire mauīākati okanotsa ipinakari atoko itxa. Txiarokakari atoko itxa. Kākiti apotiitari okanotsa ipinakari. Eereka okari xaminaā arikini īkapani. Iua atokokana aīri Teoso misiritari isākire mauīākani. ⁷ Notamoni hīpitxakaniā, hīkenakotiniāri nipaniātakiti, hinirekaākiti hamanainiāno, ininiā nisikapitikai hīte.

⁸ Ito hīriuatiniā, kākiti txariko niri: “Peerekai.” Hīte iriuatiniā, ininiā hīte atāo oerekariko apanakinimoni atāo nimoianariakori hininiua.

Hītiretakiniua Pirena

⁹ —Niri tiretinino atokotxikana, nitiretai hīte. Kona hītakanapapiri nitiraōki. ¹⁰ Hīkīpitiniāri nisākire, ininiā nitiraōki kaikotapika hītekata. Nota atokokanerako hītxa. Nota kīpitari niri sākire, ininiā niri tiraōki kaikotapika notakata.

¹¹ —Ikara atoko nitxai hīte, nipoxokoni hītemoni kaikotini īkapani. Ikara atoko ininiā, poxokonitxi xāpokako hīxiniremoni. ¹² Ia nipaniātakiti: “Nota tiretinii atokotxikana, hītiretakakauako.” ¹³ Pipininiā pimoianariakori mapinakani īkapani, ininiākara iteene pitiretana ninoa. Ikara tiraōkitxi apiatakari. ¹⁴ Nipaniātakiti hīkaminiā, atāo nimoianariakori hītxa. ¹⁵ Uatxa !nixinikaikari nitiritxi hininiua, kotxi nitiritxi kona imarotari iauīte xinikakiti. Uatxa atāo nimoianariakori hītxa, kotxi ikinipoko niri oerekakiti nisāpiretapekai hīte. ¹⁶ Kona hīteni mereēno nota. Notara mereēi hīte hīriuatini īkapani. Ninirekari hīriuatini. Ninirekari kākiti nota sākire hīsāpiretakini txipokori maxipokakati atoko ininina. Ikara atoko ininiā, hamanaāriko niri hinirekakiti nota uākaā, ininiā niri sikapitikai hīte. ¹⁷ Ia nipaniātai hīte hītiretakiniua.

Xesosi Moianariakori Omanatakani

¹⁸ Iuaīkana Xesosi pinitari imoianariakori:

—Apanakini omanataiko hīte. Ininiā hīxinikariko ia nisākire. Merepitpanika ninoa omanatano nota.

¹⁹ Teoso sākire himauikakaniā, Teoso sākire mauīākani tiretapitikai hīte, kotxi ninoa atoko hītxa. Txamari ninoa nakiti !hītxa. Hīte kona īkoraxiti auakani !hītxaikaua. Nimereēpekai hīte. Nimaktxakapekai ātiāo parīkatxi hīkamini īkapani. Iua xika Teoso sākire mauīākani omanatai. ²⁰ Hīxinikariko ia nisāpiretakiti. Nitiritxi poiāoka itxaua. Iauīte apiatakari itxaua. Kākiti misiritiniāno nota, nota atokokanerako imisiritai hīte apaka. Nisāpiretapekai hīte. Nota sākire apamonīkiniāna, ininiā hīte sākirekanera ninoa apamonīka apaka.

²¹ Imisiritaina, kotxi hīte auikari nota sākire. Himisiritāākako, kotxi kona imarotarina niokanatakiri. ²² Nota uai mapokakaniā, nimasākirauatakaniā, kona imarotarina maerekati ikamakitina. ²³ Nota omanatakani apaka omanatari niri. ²⁴ Niposotiire nikamakiti apanakini kona posotari ikamini. Noerekari ninoa niposotiire, ininiā uatxa maerekati auari ninoamoni, kotxi !auikari

nota sãkire. Ikinika itikapekari posotiiiretxi nikamakiti, iuaritika ninoa omanatano nota, niri apaka.

²⁵ —Uatxa apopeka Teoso sãkire iaõka. Teoso sãkire iõkatsopatakori txari:

Maxikatĩlka ninoa omanatano.

²⁶ Kõtãkikareri kona apokapanika. Niokanatariko nirikata auakari, Erekar Matamatakoti. Iua potorika niri auiniãtaã. Atão ene sãkiretakari itxaua. Isãpiretariko nota sãpiretakiti, nikamakiti pakini. ²⁷ Ininiã hĩte apaka sãpiretariko nota kamakiti, nisãpiretakiti pakini apanakinimoni, kotxi merepitipanika nipotorikasaaki hĩte auapika notakata. Ininiã himarotapitikano nota.

16 Xesosi sãkirauatapanika:
—Ikara atoko nitxai hĩte atão himarotini ĩkapani, ininiã kona hĩtakanapari nisãkire. ² Āti õti Xoteo auĩteakori omitikenataiko hĩte aiko Xoteo apotiitiniãtaãua. Āti õti apokapanikako ia nisãpiretakiti. Iuasaaki ninoa xinikariko hĩte okiko ereka inini. Ninoamoni hĩte okiko Teoso paniãtakiti iaõka. Txamari kona Teoso paniãtari ikara atoko inakari. ³ Ikara atoko inakari ikamanako, kotxi kona imarotano nota, niri pakini. ⁴ Ikara atoko nitxai hĩte, kotxi ikara atoko inakari apokasaaki, hĩxinikariko nisãkire. Merepanika nimoianatakasaakii, kona ikara atokoni !nitxai hĩte, kotxi nota auapanika hĩtekata —itxa Xesosi.

Erekar Matamatakoti Parĩka

⁵ Xesosi sãkirauatapanika:

—Paĩtiki nisipekako niokanatakirimoni. Kona hĩpimaãpeno: “Nanipa pisa?” Kona hĩtxapeno. ⁶ Ikara atoko nisãpiretapekai, ininiã uatxa kona erekaxinirei hĩte. ⁷ Iuaritika nitxai hĩte atão nisãkire. Apiaerekata nota sini. Nota masakianiã, iua Kõtãkikareri kona apoka hĩtemoni. Nisiniã, niokanatariko iua hĩtemoni. ⁸ Iua Kõtãkikareri apokasaaki, oerekariko ĩkorapokoriti auakani maerekani. Oerekariko Teosonoka txĩkitakiniri kãkiti atão inakari ikamini. Oerekariko kãkiti misiritiko imaerekani xika. Iua Erekar Matamatakoti oerekariko ikara atoko inakari. ⁹ Iua oerekariko maerekati kãkiti kamakiti, kotxi ninoa !auikarina nisãkire. ¹⁰ Iua oerekariko Teosonoka txĩkitakiniri kãkiti atão inakari-noka ikamini, kotxi nota sipekako nirimoni. Nota !auika uai noerekarauatini ĩkapani. Paĩtiki kona hĩte atamataikanoko nota. ¹¹ Iua Erekar Matamatakoti oerekariko maerekati kamakani misiritiko, kotxi ĩkorapokoriti auakani auĩte Satanasi inakori misiritiko mereeẽkapeka.

¹² —Auapanika apikomoni nisãpiretakiti tĩkane hĩtemoni. Txamari !apakata apikomoni nisãpiretinii, kotxi !himĩteenekari apikomoni nisãpiretinii. ¹³ Iua Erekar Matamatakoti, atãoene sãpiretakari, iua ĩkasaaki, iua oerekaiko ikinipoko atão sãkiretxiti. Kona iua sãkireni isãpiretaiko hĩte. Iaxiti auakari sãkirera, niri sãkirera, isãpiretaiko. Isãpiretaiko hĩte katana Teoso kamakiti tĩkane apaka. ¹⁴ Erekar Matamatakoti oerekaiko ereka ninini, kotxi iua apakapariko nisãkire, eereka isãpiretaiko hĩtemoni. ¹⁵ Ikini sereti niri nakiti nota nakiti apaka. Ininiã nota txai hĩte, “Erekar Matamatakoti apaka-

pariko nota nakiti. Ininiã eereka isikai hĩtemoni himarotini ĩkapani.”

Matinanitxi, Eereka Poxokonitxi Apoka Inini

¹⁶ —Paĩtiki kona hãtamataikanoko nota. Eereka iuaĩkana hãtamatanoko, kotxi nirimoni nisako —itxa Xesosi.

¹⁷ Imoianariakori txanãta:

—Kiripa itxanãta Xesosi? “Paĩtiki kona hãtamatanoko. Eereka iuaĩkana hãtamatanoko nota, kotxi nirimoni nisako.” Kiripitipa itxanãta Xesosi? —itxana imoianariakori.

¹⁸ —Kirisaakipa apokatako ikara inaãtakiti? Kiripa ikara isãkire: “Paĩtiki,” Xesosi sãkire atemoni? Ikara isãkire kona ate imarotari xatiki —itxanãtana.

¹⁹ Xesosi imarotari ninoa nirekari ipimainiri iua. Ininiã Xesosi txana:

—Hĩte nirekari hĩpimainino nota, kotxi nisãpiretai paĩtiki kona hãtamatinino, eereka iuaĩkana hãtamatanoko. ²⁰ Atãopitikara ia atoko nitxai hĩte. Hĩtxiapatako. Himatinaniuatako. Iuasaaki apanakini kãkiti ĩkorapokoriti auakani poxokoniuatako. Himatinaniuatako, eereka hĩpoxokoni apokapitikako.

²¹ —Hĩte sito atoko hĩtxauako. Sito oãuaenetanapanoka onakasaaki, oa omaãkapekaua. Imi auaka atoko, kona oxinikaikari otsii. Poxokope otxa, kotxi auapeka amarini. ²² Ikara atoko itxako hĩtemoni apaka. Uatxa kona erekaxinirei hĩte. Iuaĩkana naõkita-panikaiko hĩte. Iuasaakirako hĩpoxokoniuatako. Iuasaaki kãkiti kona posotari ixipokiniri hĩpoxokoni. ²³ ĩkora õti apokasaaki, kona hĩpimaãikano nota. Iuasaaki hamanaãri niri hinirekakiti nota uãkaã, ininiã iua sikai hamanaãkiti. ²⁴ Uatxapiima kona hamanaãpanikari hinirekakiti nota uãkaã. Hamanainiãri, hãpakapapitikariko. Ininiã hĩpoxokoni apokapitikako hĩtemoni.

Imoianariakori Auikari Xesosi Sãkire

²⁵ —Mĩtxi niomaãtari ipixini nisãkire, kãkiti mimarotakaniri ĩkapani. Āti õti kona niomaãtaikari atão. Nisãpiretaiko niri iteene himarotini ĩkapani. ²⁶ Iuasaaki hinirekakiti hamanaãno nota uãkaã. Kona nota amanaãri niri hinirekakiti isikinii. Hĩte amanainiãri, isikapitikai. ²⁷ Niri tiretai hĩte, kotxi hĩte tiretano nota. Hĩte auikari iua iokanatinino nota uaimoni. Ininiã iua tiretapitikai hĩte. ²⁸ Niri iokanatanoko ĩkorapokoriti. Paĩtiki nitakanapari ĩkorapokoriti nirimoni nisini ĩkapani —itxa Xesosi.

²⁹ Imoianariakori txari:

—Uatxa pisãkire atãoenepitika. Sãkiretxi piomaãtakiti kona auaika, kotxi uatxa aimarotari pisãkire. ³⁰ Uatxa aimarotari pite imarotini imakinika. Kona apakata apikomoni apimarauatini, kotxi uatxa aũikari Teoso auinimoni ĩkari pininiua pite —itxarina Xesosi.

³¹ Xesosi apakapapiretana:

—Uatxa hãuikari nisãkire —itxa Xesosi.

³² —Uatxa Teoso ketotiniiri manapi apope h̄arikini ĩkapani. Imakinika h̄ite takanapanoko. Notanani kaikota. Iuaritika kona notananini kaikota, kotxi niri aua notakata. ³³ Ikara atoko nis̄piretai, kotxi ninirekari erekaxinirepeka hinini. ĩkorapokoriti h̄auakasaaki, k̄akiti misiritapitikai h̄ite. Iuaritika h̄ipoxokoniuatoko, kotxi nota tapara apiata. Maerekanitxi tapara poiãoka —itxa Xesosi.

Xesosi Mis̄kiretari Teoso Iuaka ĩkapani

17 Xesosi ionakaãta iaxiti. Iuasaaki is̄piretari ia is̄kire Teosomoni:

—Niri, piketotini manapi apopeka. Pisikariko pitoximere iuaĩkana nota pamaritemoni, ininiãkara nota oerekari k̄akiti pite iotximere, ² kotxi pite sikano nota piposotiire ikinimane auĩte nininiua ĩkapani. Ininiã nikamari ikinimane k̄akiti pite sikakini auapininiika ininina ĩkapani. ³ K̄akiti imarotiniã pite, imarotiniãno nota Xesosi Kristo piokanatakiti, ninoa auapininiika, kotxi pite atão Teoso pitxaua. Pitenanira atão Teoso pitxaua. ⁴ Noerekari ĩkorapokoriti auakani pite Api-ananiri pininiua, kotxi nikamapekari parĩkatxi pipaniãtakiti. ⁵ Ininiã niri, uatxa piotximere pisikano, pitemoni napokasaaki. Itixi kamiko apisapanika pitekata nauakasaaki, niotximere aua. Iua niotximeretxikana pisikano iuaĩkana —itxa Xesosi.

Xesosi Mis̄kiretari Teoso Imoianariakori ĩkapani

⁶ Xesosi s̄akirauatapanika irimoni:

—Nota s̄apiretari piuãka k̄akitimoni, ninoa itixi auakani notamoni pisikakini. Mitxi pite nakitiakori itxauana. Pite sikana ninoa notamoni, ininiã ninoa kamari pis̄kire iaõka. ⁷ Uatxa imarotarina ikinika napakapakiti pite s̄ikinino. ⁸ Nis̄piretapekana ninoa pis̄kire, ininiã auikarina pis̄kire. Imarotapitikarina pitemoni nipotorikini. Ininiã auikarina pite iokanatinino nota k̄akitimoni.

⁹ —Nimis̄kiretai pite ninoa ĩkapani. Kona nimis̄kiretai nota s̄akire mauiãkani ĩkapani. Nimis̄kiretai ninoa notamoni pisikakini ĩkapaninoka, kotxi pite nakitiakori itxauana. ¹⁰ Ikinika nota nakiti pite nakiti itxaua apaka. Ikinika pite nakiti nota nakiti itxaua. Ninoa pisikakini oerekari apanakini Apiananiri nininiua. Ininiã iuasaaki apanakini txari: “Peerekari Xesosi.” ¹¹ Uatxa !nikaikotãkako ĩkorapokoriti. Txamari ninoa kaikotapanika uai. Nota sipekako pitemoni, ininiãkara pinĩkatana ninoa notamoni pisikakini, kotxi pite niri pitxaua, erekarinoka kamakarii pite, kaposotiirei pite. Pite sika-posotiiretano nota. Ninirekari ninoa ãtika atoko ininiuana, nota pitekata ãtika atoko aniniua atokokana. ¹² Itixi ninoakata nauakasaaki, ninĩkatana ninoa pite uãkaã, piposotiireẽ. Ninoa notamoni pisikakini ninĩkatapitika. Kona ãtika nomaiãta. Xotasinoka pĩpinanaka, kotxi pĩpinanakakani ãkiri itxaua iua. Ipĩpinanaka, kotxi kitxakapirĩka Teoso s̄akire iõkatsopatakori s̄apiretapekari ikara apokini apisapanika.

¹³ —Uatxa nota sipeka pitemoni. Ikara atoko itxa nis̄kire k̄akitikata nauapanika ninakasaaki, nota poxokoni ninoa ãkixinire auini ĩkapani. ¹⁴ Nisikapekari pis̄kire ninoamoni, ininiãkara nis̄kire mauiãkani omanatana ninoa, kotxi nis̄kire auĩãkani ĩkorapokoriti auakani !itxauana ninoa. Iua atokotxikana kona ĩkorapokoriti auakarino nota. ¹⁵ Nimis̄kiretai pinĩkatatinina ninoa, Satanasi mamaĩkakanina ĩkapani. Kona ninirekari mauikareni sauaki auakasaakina pimakatxakinina. ¹⁶ ĩkorapokoriti auakani !itxauana. Nota iua atokotxikana. ¹⁷ Pimakatxakana ninoa pite nakitiakori ĩkapani. Pis̄kireẽ pimakatxakana, kotxi pis̄kire atão. ¹⁸ Nota pis̄kire mauiãkanimoni piokanatinini atokokana, niokanatanana ninoa pis̄kire mauiãkanimoni. ¹⁹ Ninoa ĩkapani notaka nisikaua pitemoni pinirekakiti nikamini ĩkapani. Ininiãkara ninoaka apaka sikaua pitemoni pinirekakiti ikaminina ĩkapani.

Xesosi Mis̄kiretari Teoso Is̄kire Auiãkani ĩkapani.

²⁰ —Kona nimoianariakorinani ĩkapanini nimis̄kiretai pite. Apaka nimis̄kiretai imakinika nis̄kire auiãkani ĩkapani, katana nimoianariakori s̄akire auiãkani ĩkapani apaka. ²¹ Nota amanaãi ninoa xinire ãtika atoko ininina ĩkapani. Nota aua pite ãkixinireẽ. Pitepekana aua nota ãkixinireẽ. Iua atokotxikana ate aua ninoa ãkixinireẽ. Ikara atoko ininiã, nota s̄akire mauiãkani ĩkorapokoriti auikapanikariko pite iokanatinino nota. ²² Ininiã erekari notamoni pisikakiti, pitoximere, nisikapekana ninoa. Ininiã ninoa xinire ãtika atoko itxauana, ate ãtika aniniua atokokana itxana ninoa. ²³ Nota aua ninoa ãkixinireẽ. Pite aua nota ãkixinireẽ. Ikara atoko ininiã peerekari, kotxi ãtika itxaua ixinirena. Ikara atoko ininiã nis̄kire mauiãkani imarotariko pite iokanatinino nota. Apaka ninoa imarotari nota pitiretini atokotxikana, pitiretinina ninoa apaka.

²⁴ —Niri, ninirekari ninoa notamoni pisikakini notakata auini ĩkapani. Ninirekari ninoa atamatiniri ikinipoko erekari notamoni pisikakiti, niotximere pisikakiti, kotxi pite taretano nota itixi kamiko apisa. ²⁵ Niri, atão inakarinoka kamakarii pite. K̄akiti ĩkorapokoriti auakani kona imarotai pite. Iuaritika nota imarotai pite. Ninoa imarotari pite iokanatinino nota k̄akitimoni. ²⁶ Nis̄piretapekai pite k̄akitimoni. Apikomoni nis̄piretapanikariko pis̄kire. Ininiã pitiraõki notamoni auakari ninoamoni auako. Ininiãkara nota aua ninoa ãkixinireẽ.

Xesosi Maĩkiko Pirena

(Mateo 26.47-56; Marko 14.43-50; Arõkasi 22.47-53)

18 Teoso imis̄kiretaka atoko, Xesosi ĩpiriãtari s̄o-toãri Setorõ inakori. Iuaã aua amãtiirinape. Ininiã Xesosi sari iuaã imoianariakorikata. ² Xotasi, Xesosi mĩkapiritakari, imarotari Xesosi imoianariakorikata itotiniri iuaãtaã isinina. ³ Ininiã Xotasi sari amãtiirina- napemoni ãtikaka sotatoakorikata, Teoso mis̄kiretiko aikoti nĩkatakanikata. Sasetotxi auĩteakori, pariseoakorikata sari iuaãtaã apaka. Ikeekotxi, tirikapi pakini anikana. ⁴ Xesosi imarotari ikinika iuamoni ikamakitina

tĩkane. Imarotapekari ninoa nirekakari okinirina iua.

Iuaritika isari ninoamoni. Ipimaãna:

—Kiripa hinitanãta?

⁵ Ininiã ninoa:

—Xesosi Nasareekirira anita —itxana.

Ininiã Xesosi:

—Iuakarano nota.

Iuasaaki Xotasi, Xesosi mĩkapiritakari, aua ninoakata.

⁶ Xesosi “iuakarano nota” inakasaaki, osipikana, ixitipe irika itxana.

⁷ Iuaĩkana Xesosi pimaãna:

—Kipa hinitanãta?

—Xesosi Nasareekirira —itxana.

⁸ —Nitxapekai, iuakarano nota. Nota hinitiniã, hãuiritana nimoianariakori sini —itxa Xesosi.

⁹ Ikara atoko itxa, mitxi isãkire apokini ĩkapani. Mitxi itxari Teosomoni: “Kona nomaiãtana nimoianariakori notamoni pisikakini. Kona ãtika !nomaiãta.”

¹⁰ Eereka Simão Petro inakori kosekari iouata auĩte. Isauakari Maoko inakori ikikomoni ikĩpita. Iua sasetotxi auĩte apiatakari nitiri.

¹¹ Xesosi txari Petro:

—Pitakaro iouata auĩte omata ãki. Apakatapitika nota kaminiri niri paniãtakiti. Niri nirekapitikari natatsi-itiniri nipinini kãkiti ĩkapani —itxa Xesosi.

Xesosi Anasi Apisatoõ

¹² Eereka sotatoakori, apaka sotatoakori auĩte, Teoso aikote nĩkatakani pakini maĩkari Xesosi. Iaxirika itxarina. ¹³ Merepanika anikarina Xesosi Anasi inakorimoni. Iua Anasi Kaipasi imatikiri. Iuasaaki iua Kaipasi sasetotxi auĩte apiatakari itxaua. ¹⁴ Iua Kaipasi õtãkikapekana Xoteo auĩteakori. Ia atoko itxa isãkire: “Apiaerekata ãti kiki ipinini ikinimane mapĩkani ĩkapani,” itxa Kaipasi õtãkikare.

Petro Kipatari Xesosi Imarotini

(Mateo 26.69-75; Marko 14.54, 66-72; Arókasi 22.54-62)

¹⁵ Simão Petro, ãti Xesosi moianari pakini asikatikinitari Xesosi Anasi aapokomoni anikikosaaki. Mitxipeka sasetotxiakori auĩte apiatakari aõkitapekari iua ãti Xesosi moianari. Ininiã iua ĩroã sasetotxiakori auĩte apiatakari aapoko Xesosikata. ¹⁶ Petro kaikota iporikiti itore takote. Eereka imoianari sari iporikiti. Imisãkiretaro ĩronakikoãtaã tore nĩkatakaro. Ininiã oãuiritari Petro ĩroini.

¹⁷ Oa txari Petro:

—Pite ikira Xesosi moianarikai? —otxari.

—Kona —itxaro.

¹⁸ Iuasaaki katxĩkareri aua, ininiã nitiritxiakori, Teoso misãkiretiko aikoti nĩkatakani pakini kamari xamina. Xamina ĩtinipoki irokanãtauana. Petro ninoakata aua iuasaaki.

Xesosi Sasetotxiakori Auĩte Apisatoõ

(Mateo 26.57-68; Marko 14.53-65; Arókasi 22.54, 66-71)

¹⁹ Iroko ãki Xesosi sasetotxi auĩteakorikata aua.

Ininiã sasetotxiakori auĩte apiatakari misãkiretari Xesosi:

—Pisãpiretano pimoianariakori, pisãkire poerekakiti pakini —itxari.

²⁰ Xesosi apakapapiretari:

—Ãtipirika nisãpiretapikai hĩte. Nitotari noerekaruaatini aiko Xoteo apotiitiniãtaãua, Teoso misãkiretiko aikotiã apaka. Kona nikipatari nisãkire. Ikinipoko kenakotari noereẽkiti. ²¹ Ininiã kinirepa hĩpimaãno? Hĩpimaãna nisãkire kenakotakani. Ninoara imarotari noereẽkiti —itxa Xesosi.

²² Xesosi ikara atoko isãkirauatakasaaki, Teoso misãkiretiko aikoti nĩkatakari aritoõtari Xesosi.

—Atokope. Kona ikara atoko pitxape sasetotxi auĩte apiatakarimoni —itxari.

²³ Ininiã Xesosi:

—Nikerokiniãri nisãkire, pisãpiretano nikerokakiti, txamari kona nikerokari. Atão nisãkire, ininiã kinirepa piaritano? —itxa Xesosi.

²⁴ Eereka Anasi iokanatarari Xesosi iaxirikiko. Eereka anikarina sasetotxi auĩte apiatakarimoni, Kaipasi inakorimoni.

Iuaĩkana Petro Kipatari Xesosi Imarotini

(Mateo 26.71-75; Marko 14.69-72; Arókasi 22.58-62)

²⁵ Petro iporikiti aua iuasaaki. Ininiã apanakini pimaãri:

—Ikira kiki moianarikai pite? —itxarina.

Ininiã iua:

—Kona —itxa.

²⁶ ãti sasetotxi auĩte apiatakari nitiri, Petro kisaauakãpitatakiti nirimane iua. Iua pimaãri Petro:

—Pitekani amãtiirinapeãtaã nitika iuakata? —itxari.

Iuaĩkana Petro txari:

—Kona notani.

²⁷ Iuasaakipeka patari sãkirauata. Iuasaakipeka mitxi Xesosi sãpiretakiti iaõka auape.

Xesosi Pirato Apisatoõ

(Mateo 27.1-2; Marko 15.1-5; Arókasi 23.1-5)

²⁸ ĩkanõkapanika ninoa takanapari Kaipasi aapoko, Anikarina Xesosi Homano auĩte auinimoni, kãkiti misiritiko imarotiko pakitamoni. Xoteo auĩteakori kona nirekari aiko ãki ĩroinina. Kona inirekarina ãti uãka takote iitopãkinina. ãti uãka takote iitopãkiniãna, kona apakata nipokori inikinina Pãskoã kiiniritiã. ²⁹ Ininiã Pirato pokĩka porikiti Xoteo imisãkiretini ĩkapani. Ininiã Pirato txana ninoa:

—Kixikapa himinatari ikira kiki notamoni? —itxana.

³⁰ Ininiã ninoa txari:

—Maerekati imakamakaniã, kona ate minari iua pite-moni.

³¹ Ininiã Pirato:

—Hĩteka xinikari maerekati ikamakiti, ininiã ixika auiniã hĩteka misiritari iua. Hĩkiomaneakorini sãkire iaõka himisiritari iua —itxa Pirato.

Xoteoakori apakapapiretari:

—Kona apakata aõkiniri iua, kotxi hĩte Homanoakori lauritaua aõkiniri kãkiti. Pitenokara apakata okiniri iua —itxana.

³² Ikara atoko inaãka, mitxi Xesosi sãkire iaõka apokini ĩkapani, kotxi mitxi isãpiretapekari aamina ĩpiriãmitakari nopini ipinini.

³³ Pirato ĩroã kãkiti misiritiko imarotiko pakita ãki iuaĩkana. Ipĩkapiretari Xesosi. Ipimaãri:

—Pitekani Xoteoakori auĩte txataua? —itxari.

³⁴ Ininiã Xesosi txari: —Piteka sãkirekani ikara? Atxiĩti apanakini sãkire atokotxikana pipimaãno atxiĩti? —itxa Xesosi.

³⁵ Pirato apakapapiretari:

—Xoteokani nitxataua? Konapitini. Piteka nirimane, pinirimane auĩteakori pakini sikai pite notamoni pimisiritiko tĩkane. Kixikapa? Kipa maerekati pikamakiti? —itxa Pirato.

³⁶ Ininiã Xesosi:

—Auĩtetxi nininiãtaãua kona ĩkorapokoritini. Nitixine ĩkorapokoriti inaãkamako, ninitiriakori neenamauatamako, ininiã Xoteoakori kona maĩkamanoko. Auĩtetxi nininiãtaãua ãtiãtaãra —itxa Xesosi.

³⁷ Pirato txari Xesosi:

—Ininiã auĩtetxikani pitxataua?

Ininiã Xesosi: —Atãopitikara pisãkire auĩtetxi nininiua. Niponaniã ĩkorapokoriti auĩtetxi nininiua ĩkapani. Itixi napoka atãoene nisãpiretini ĩkapani. Atãoene nirekakani auikari nisãkire —itxa Xesosi.

³⁸ Ininiã Pirato:

—Kiripa atãoene txaua?

Xesosi Okiko Nirekiko

(Mateo 27.15-31; Marko 15.6-20; Arókasi 23.13-25)

Ereka Pirato iuaĩkana mapara isa Xoteoakori imisãkiretini ĩkapani. Itxari:

—Kona nota apokari maerekati ikamakiti. ³⁹ Hĩte itotari maerekati kamakari kateia ãki auakari nisikakini Pãskoia kiiniritisaaki. Hĩte nirekatari nisikakiniri ikira Xoteoakori auĩte? —itxa Pirato.

⁴⁰ Ikinimanekana akiripoakatana:

—Kona iuani. Pahapasira anireka.

Txamari iua Pahapasi kokaniri. Iua naiatapekari Homanoakori.

19 Ininiã Pirato paniãtari sotatoakori noropatini Xesosi. ² Ininiã sotatoakori kamari saporĩeta atoko inakari, kotipiaro kamakori. Ieretakari Xesosi kiĩã. Auĩtetxi mãka poporeri itakana Xesosi nopini. Ikara atoko ininiã, inapetarina Xesosi. ³ Ikara atoko itxana inapetinirina:

—Aãũite —itxarina Xesosi inapetinina.

—Xoteo auĩtekai pite —itxarina.

Ininiã iuasaaki iaritarina itoõ.

⁴ Iuaĩkana Pirato sari mapara iuaĩkana Xoteoakori imisãkiretini ĩkapani.

—Hĩtakaõtxikari. Hĩtemoni nimirari iua, kotxi ninirekari himarotini, ĩnapokari maerekati ikamakiti. ⁵ Ininiã Xesosi apoka mapara. Saporĩeta kotipiaro kamakori ikiiã, auĩtetxi mãka pakini aua iuamoni. Ininiã Pirato txari:

—Hãtamatarari iua.

⁶ Sasetotxi auĩteakori, Teoso misãkiretiko aikoti nĩkatakani pakini atamatakasaakiri, ninoa akiripoakata:

—Hõkariko iua. Hõkariko iua. Aamina ĩpiriãmitakari nopini hĩtokakitariko —itxana.

Ininiã Pirato:

—Hĩteka anikari. Hĩteka okari iua aamina ĩpiriãmitakari nopini, kotxi kona napokari maerekati ikamakiti.

⁷ Ininiã Xoteoakori:

—Akiomane sãkire paniãtari kãkiti iua atoko inakari okiko, kotxi iua sãkire: “Teoso ãkirirano nota,” itxa —itxana Xoteoakori Piratomoni.

⁸ Xoteoakori sãkire ikenakotakasaaki, apia pĩkareta Pirato. ⁹ Ininiã iuaĩkana ĩroã kãkiti misiritiko imarotiko pakita ãki. Ipimaãri Xesosi:

—Nanipa pina?

Txamari !kasãkireri Xesosi.

¹⁰ Ininiã Pirato:

—Kona pinirekatari pimisãkiretinino? Pixinikariko ia nisãkire. Nota posotari nisikakinii. Apaka nota posotari nokinii aamina ĩpiriãmitakari nopini —itxa Pirato sãkire.

¹¹ Xesosi apakapapiretari:

—Kona pite auari posotiiretxi pokinino ĩkapani. Ikara inakari piposotiire auiniã, Teosonanira sikai ikara posotiiretxi. Nota sikanapakani pitemoni kamari apia-ta maerekati.

¹² Pirato ikara atoko inakari ene ikenakotakasaaki, iua ãkixinireẽ ixinikari:

—Kiatokopa atxiĩti nisikakari Xesosi?

Inirekari Xesosi isikakini. Txamari Xoteoakori akiripoakata:

—Pisikakiniãri ikira kiki, kona Sesa moianari !pitx-aikauako. Iua sãkire: “Auĩtetxi apiananiri nitxaua.” Sesanoka auĩtetxi apiananiri —itxana Xoteoakori.

¹³ Pirato ikara atoko inakariene ikenakotakasaaki, iminari Xesosi iporikitimoni. Ininiã Pirato topãka. Iuaã kãkiti misiritiko isãpiretiniãtaã. Kãkiti takauãkatari iuaã “Kimapori kai kamakori” inaãka. Xoteo sãkireẽ “Kap-ataa.” Iuaã auĩtetxi iokanatarari maerekati kamakari imisiritikomoni. ¹⁴ Iuasaaki apaniãxiti takote. Iua õti Pãskoia kiiniriti potarikini õti apisa. Iuasaaki Pirato txari Xoteoakorimoni:

—Hãtamata, hãũite.

¹⁵ Ininiã iuaĩkana ninoa akiripoakata:

—Piokanatariko ere. Piokanatariko ere. Hõkariko aamina ĩpiriãmitakari nopini —itxana sasetotxi auĩteakori.

Ininiã Pirato:

—Hinirekatari nokiniri hãũite aamina ĩpiriãmitakari nopini?

Ininiã ninoa:

—Ātikara ate auíte. Sesanokara ate auíte —itxana nino.

¹⁶ Ininiā Pirato sikari Xesosi sotatoakorimoni aamina ĩpiriāmitakari nopini okiko tĳkane.

Xesosi Tokakitaāka Aamina ĩpiriāmitakari Nopini
(Mateo 27.32-44; Marko 15.21-32; Arókasi 23.26-43)

Ininiā anikarina Xesosi. ¹⁷ Xesosi anikari aamina ĩpiriāmitakari iuaka okiko tĳkapani. Isana ixirata “Kiitātati” inakorimoni. Xoteo sākireē, “Kóokota,” inakori.

¹⁸ Iuaā aamina ĩpiriāmitakari nopini itokakitaāka Xesosi. Apaka ipi kiki tokakitaāka iua takote. Āti Xesosi kikomoni. Āti isanaremoni. ¹⁹ Pirato paniātari iōkatsopari aamina ĩpiriāmitakari nopini tokakitiko. Ia atoko itxa iōkatakiti: “Xesosi Nasareekiri, Xoteoakori Auíte.” ²⁰ Itomaneri Xoteoakori atatsopatarari iua, kotxi Xesosi okikoātaā sitatxi takote. Sitatxi sikani napaāpotakasaa-ki, atamatarina iua iōkatsopari. Ia iōkataāka Xoteo sākireē, Kreko sākireē, Homano sākireē pakini ikini-
mane imarotiniri tĳkapani. ²¹ Ininiā sasetotxi auíteakori txari Pirato:

—Kona piōkatsopatapiri, “Xoteoakori auíte.” Piōkatsopatariko iuanoka uākatari Xoteoakori auíte ininiua —itxana.

²² Ininiā Pirato:

—Auape niōkatsopatakiti. Kona iuaĳkana niōkatsopatarari —itxa Pirato.

²³ Xesosi itokakitakana atoko, sotatoakori kosekari Xesosi māka. Imatsorakitatarina. Imāka mata imatsorakitana nino ipi ipi pakini apakapini tĳkapani. Āti sotato apakapari ipixini, āti sotato apakapari ipixini, itxaāpota. Xesosi māka, āti imāka patapi auakari, imatsorakitatarina, kotxi iotsare lauari. Peerekari. ²⁴ Sotatoakori itxakakana:

—Kona amatsorakitari ia. Sarauatxi atoko makama, imāka anikakari aimarotini tĳkapani.

Ininiā iuasaaki Teoso sākire iōkatsopatakori kitxakapirĳka iaōka apoka. Iua txari:

Nino xanakari nimāka. Isarauatana nimāka anikakari imarotinina tĳkapani. Teoso sākire iaōka sotatoakori kama.

²⁵ Iuasaaki aamina ĩpiriāmitakari takote oāua Maria, Xesosi inoro oĳtarokata. Iuaā apaka oāua Maria Matarena inakoro. Iuaā apaka oāua āto Maria, Krópasi inakori ĳtanoro. ²⁶ Xesosi atamatakasaakiro inoro iua takote, atamatakasaakiri imoianari itiretakiti apaka, itxaro inoro:

—Nitiretakito, ere Xoão, pamarite itxaua.

²⁷ Imoianaripekana itxa:

—Aroa pinoro otxaua.

Ininiā eereka iua anikaro oa aapokomoni iuakata oāuini tĳkane.

Xesosi Ipinini Pirena

(Mateo 27.45-56; Marko 15.33-41; Arókasi 23.44-49)

²⁸ Eereka Xesosi imarotari iparĳka xipope. Ikinika Teoso sākire iōkatsopatakori iaōka apokini tĳkapani, itxari:

—Niposonata.

²⁹ Iuaātaā aua tiitxi. Iua tiitxi āki aua iāriā katxioāri.

Ininiā iuasaaki iokomokarina mapoa atoko inakari iāriāmoni. Aākeē itakarina, Xesosi namaā taka itxarina. Iua aāke isopo inakorike. ³⁰ Iātaka atoko itxari:

—Ikinika nipaĳka uatxapeka xipopeka.

Inaāka atoko iokirikiita, iokanata itxari ixinire irimoni. Iuasaakipeka ipina itxa.

Sotato Iorotari Xesosi Iomĳtiā

³¹ Iua ōti sesta veira, kākiti tomatiko ōti apisa. Xoteo auíteakori paniātari Pirato aamina ĩpiriāmitakariā auakani tapike kapatakiko, katima ipĳka ininina tĳkapani, ĳtona makatxakiko tĳkapani apaka. Tomatiko ōti-
saaki kona nino nirekari ipĳkari ĳto kaikotini iuaā.

³² Ininiā sotatoakori sari iuaā. Ikapatakarina Xesosi takote auakani tapike. ³³ Txamari sotato atamatakasaakiri Xesosi, !auaika. Ipĳpeka. Ininiākara kona ikapatakari itapike. ³⁴ Sotato iorotari Xesosi itanapitaā iomĳtiā. Iuasaaki iarēka, āparaā pakini xiketa.

³⁵ Notara itikari Xesosi ipinini, ininiā atāopitikara nisāpiretakiti. Nisāpiretari ikinika nitikakiti. Nimarotari nisākire atāo inini, ininiā nisāpiretai ia atatsopatakani, hĳte apaka auikiniri tĳkapani. ³⁶ Teoso sākire iōkatsopatakori kitxakapirĳka txari:

Kona ātika iua api !kapatakaāka.

Ininiākara kona Xesosi api kapatakaāka, Teoso sākire iōkatsopatakori iaōka apokini tĳkapani. ³⁷ Āti Teoso sākire iōkatsopatakori txari:

Nino atamatariko iorotakitina.

Xesosi Katiko Pirena

(Mateo 27.57-61; Marko 15.42-47; Arókasi 23.50-56)

³⁸ Eereka Xosee, Arimateia sitatxitikiri, amanaāri Xesosi ĳto Piratomoni. Iua Xosee auikari Xesosi sākire, txamari ikipatari Xesosi sākire auikini, kotxi ipĳkari Xoteo auíteakori. Amanaāksaakiri Xesosi ĳto, Pirato txari:

—Ari, panikari iua.

Ininiā Xosee anikari Xesosi ĳto. ³⁹ Iuasaaki imoianari Nikotemo inakori. Iua Nikotemo mitxipeka sari Xesosi-
moni tĳkanōka imisākiretiniri tĳkapani. Iua moianatari Xosee, Xesosi ĳto apakapakaasaaki. Nikotemo anikari aātsopa aroesi inakori, miha inakori pakini ikoke Xesosi ĳtoā taākori tĳkane. Trĳta sĳko kiro pakini iua ikoke anika. ⁴⁰ Nino ipi iapirikari Xesosi ĳto mākatxi mataā ikokekata. Ikara atoko Xoteo kamari ipĳkari ĳtoā ikatiko apisa.

⁴¹ Xesosi aamina ĩpiriāmitakari nopini takikoātaā, iuaā takote aua amātiirinape. Amātiirinapeātaā aua akauari amanepanika inakari. Kona ipĳkari ĳto takaāka-panika iuaā. ⁴² Iua akauari kona ōtakori, ininiā itakari-
na Xesosi ĳto iuaā, kotxi Xoteo tomatini ōti apokana-panoka.

Akauariã Xesosi Ìto Mauakani

(Mateo 28.1-8; Marko 16.1-8; Arókasi 24.1-12)

20 Tomíko ìkanõkapanika, Maria Matarena sari akauarimoni. Oãpokasaaki, oãtamatarari akauaritore kai auíte kamakori makatxakapeëkaika. ² Ininiã omiteka Simão Petromoni. Xesosi moianari itiretakitimoni apaka osa. Oãkiritana:

—Apiananiri ìto makatxakaãka akauariã. Kona aimarotari namonireuako itakapirina —otxana.

³ Ininiã Petro, àti Xesosi moianarikata sari akauarimoni. ⁴ Imitekana. Iua àti Xesosi moianari miteka kati-maritika, ininiã inapari Petro. Ininiã iua apoka Petro apisa. ⁵ Iãka aariko àki atamatini ìkapani. Atamatari mākaxi mata, ipíkari iapirikiko. Kona ìïroã. ⁶ Iuasaaki Petro apoka iua tikini. Ìïroã aariko àki. Atamatari mākaxi mata. ⁷ Atamatari mākaxi mata, mitxi Xesosi kiiã iapirikiko. Iporiimatataãka. Ikikomoni aua àti mākaxi mata. Isanaremoni aua àti mata. ⁸ Ininiã iua mitxi apoãkari ìroã, atamata itxari. Ininiã auikari Maria sãkire. Iuasaakiika auikari Xesosi õkitikiniua. ⁹ Iuasaaki ninoa kona iteene imarotapanikari Teoso sãkire iõkat-sopatakori kitxakapiríkari, kotxi Teoso sãkire sãpiretpekari Xesosi ipinini, eereka õkitikiniua. ¹⁰ Eereka Petro àti Xesosi moianarikata kanapiriã aapokomoni-na.

Xesosi Oerekaua Maria Matarenamoni

(Mateo 28.9-10; Marko 16.9-11)

¹¹ Maria Matarena kaikota aariko iriko takote. Otxia-panãtakasaaki, amaãtiki opapíkakiita oiãkakiita aariko iriko àki oãtamatinini ìkapani. ¹² Oãtamatana ipi Teoso nitiriakori iaxitikini. Imãkana kasarori. Iitopãkana mitxi Xesosi ìto auiniãtaã. Àti mitxi Xesosi kii auiniãtaã, àti mitxi ikiti auiniãtaã. ¹³ Itxarona:

—Kinirepa pitxiapanãta? —itxana.

Ininiã oa:

—Imakatxakaãka niauíte ìto. Kona nimarotari ìto takikoãtaã —otxana.

¹⁴ Iuasaaki oporikimoni osapotorika. Oãtamatarari Xesosi, txamari !oimarotari.

¹⁵ Ininiã Xesosi:

—Kinirepa pitxiapanãta? Kiripa pinita? —itxaro.

Ouãkatari Xesosi amãtiirinape nĩkatakari ininiua.

Ininiã otxari:

—Pite makatxakiniãri iua ìto, ininiã pisãpiretano ìto pitakiniãtaã. Ininiã nanikariko àtiãtaã —otxari.

¹⁶ Ininiã Xesosi txaro:

—Maria.

Ininiã okirioka iuamoni. Otxari osãkireë:

—Haponii.

Popíkari sãkireë, “Noereëkiri,” otxa.

¹⁷ Ininiã Xesosi txaro:

—Kona pimaãtakapeno, kotxi nirimoni kona nis-apanika. Pisa nitariakorimoni. Pitxanako: “Nota sariko nirimoni, hĩte iritxikana apaka. Nisariko ni-Teosonemoni, hĩTeosonetxikana apaka,” itxa.

¹⁸ Ininiã Maria Matarena sari Xesosi moianariakori-moni:

—Natamatapekari aãuíte —otxana.

Ininiã osãpiretana ikinika Xesosi sãkire.

Xesosi Oerekaua Imoianariakorimoni

(Mateo 28.16-20; Marko 16.14-18; Arókasi 24.36-49)

¹⁹ Iua Tomíko ìkanõkati Xesosi moianariakori apoti-itaia. Iuasaaki itotarina ikinika aapokotxi tore, kotxi ipíkana Xoteo auíteakori. Iuasaaki Xesosi tokiã aapokotxi àki ninoa sauaki.

—Erekaxinire hĩtxako —itxana ninoa.

²⁰ Ikara inaka atoko oerekari iuako karo. Oerekari itanapita karo. Ininiã Xesosi atamatakasaaakina, imoianariakori iteene poxokoniua. ²¹ Iuaíkana Xesosi txana:

—Erekaxinire hĩtxako. Niri iokanatinino atokotxikana, niokanatai hĩte niri nireëkiti hĩkamini ìkapani.

²² Iuasaaki ixõkana. Itxana:

—Hãpakapariko Erekari Matamatakoti. ²³ Apakata pisãpiretiniri nota sãkire auiãkari, imaerekani makatx-akaãkapeka. Apakata pisãpiretiniri nota sãkire mauiãkani, imaerekani !imakatxakaãka —itxa Xesosi.

Xesosi Oerekaua Tomeemoni

²⁴ Xesosi imoianariakorimoni oerekasaakiaua, Tomee Txítximo inakori kona aua ninoakata. ²⁵ Ininiã apanakini sãpiretari Tomee:

—Ate aõkitari Xesosi —itxana.

Ininiã iua:

—Iuako karo nimatamatakaniã, iuako karo nimakaa-iakaniã niuakokiã, kona nauikari hĩte sãkire. Itanapita karo nimakaaiakaniã, kona nauikari hĩsãkire —itxa Tomee.

²⁶ Àti semanati napaka atoko, Xesosi moianariakori apotiitaua iuaíkana aapokotxi àki. Iuasaakiika Tomee aua ninoakata. Aapokotxi tore itotaãka, iuaritika Xesosi tokiã ninoamoni:

—Erekaxinire hĩtxako —itxana ninoa.

²⁷ Iuasaaki itxari Tomee:

—Patamata niuako. Pikaaiakariko piuakokiã nitokakiti karoã. Nitapanita iorotikomoni pitakari piuakoki. Kona mauikaretika !pitxape. Pauikariko nisãkire —itxari.

²⁸ Ininiã:

—Niauíte, niTeosone —itxa Tomee.

²⁹ Ininiã Xesosi:

—Uatxa pite auikari auãki ninini, kotxi patamatano. Kãkiti nota maõkitakani auikiniãri nisãkire, apakapari apiata erekari Teoso sikakiti —itxa Xesosi.

³⁰ Xesosi kamari apikomoni iposotiire imoianariakori sauaki. Iposotiire ikamakiti imakinika kona iõkat-sopataãka ia iõkatsopariã. ³¹ Ia niõkatsopata Xesosi Teoso mereëkiti, Teoso àkiri ininiua hãuikini ìkapani. Ikara atoko hãuikiniã, hãuapininiika hĩtxako Xesosi posotiireë.

Xesosi Oerekaua Setxi Imoianariakorimoni

21 Āti ōti Xesosi oerekaua iuaīkana imoianariakorimoni ipoa Txiperfátxi inakori tiniā. Ia atoko iua oerekaua:

² Iuaā aua Simão Petro. Iuakata aua Tomee Txítximo inakori. Natanaeo, Kanaa aapokotxitikiri, Kariréia tōpa auakari apaka aua iuakata. Sepeteo anaakori apaka aua iuakata. Apikomoni ipi Xesosi moianariakori apaka aua iuaā. ³ Simão Petro txana:

—Nota okatsaātako —itxa.

Ininiā apanakini:

—Ari, ate apaka okatsaātako pitekata —itxana. Ininiā isana. Kanauaā iereētuaana. Īkanōka okatsaātana, txamari līmaīkarina ximaki. ⁴ Īkanōkapanika Xesosi ikipatxitemoni tīpokonāta, txamari līmarotarina Xesosi iuaā auini.

⁵ Xesosi akiritana:

—Namariteakori, kaiomaāi ereē? —itxana.

—Kona kaiomaāua —itxarina.

⁶ Ininiā Xesosi paniātana:

—Hītakariko hetxi hīkikomoni. Ereē hāpokariko ximaki —itxa Xesosi.

Ininiā ninoa okari hetxi ikikomoina. Eereka kona iposotaikarina ikosekinirina hetxi kanaua āki, ximaki itori imaīkinina xika. ⁷ Xesosi moianari itiretakiti txari Petromoni:

—Aūūtekara.

Ikara inakari sākiretxiti ikenakotakasaaki, Petro ieretakari imāka, mitxi imaktxakakiti, oka itxaua ipoamoni Xesosimoni isini īkapani. ⁸ Apanakini kanauaā ina. Ikosekaāpotarina hetxi. Iuasaaki ximaki xāpoka hetxiā. Itakoā lītakori, atxiīti seī metronoka. ⁹ Ikanīkiītakasaakina, atamatarina xamina. Ximaki iropike nopini auape. Apaka auari komiri.

¹⁰ Xesosi txana:

—Himinari ximaki himaīkakiti mapake.

¹¹ Ininiā Petro kosekari hetxi imiriī. Xāpoākata ximaki. Sētosiōēta tres ximaki mitapoakari aua. Kaiāopokori ximaki, iuaritika hetxi kona tsorakita. ¹² Xesosi akiritana:

—Uai hina. Manipokota.

Kona ātika imoianari kona kataparaxinire ipimainiri iua: “Kiriparai” ininiri iua, kotxi ninoa imarotari iua Api-ananiri ininiua. ¹³ Ininiā Xesosi apoka ninoamoni. Ixanakari komiri, ximaki pakini, sika itxana ninoamoni.

¹⁴ Ikara ōti apisapanika, Xesosi ipinaka atoko, ōkitikaua atoko, oerekapekaua ipikata imoianariakorimoni.

Xesosi Misākiretari Petro

¹⁵ Inipokotaka atoko Xesosi pimaāri Simão Petro:

—Simão, Xonasi ākiri, kipa apiata tiretano nota, pitekani, nakirakani? —itxa Xesosi.

Ininiā Petro txari:

—Ari, Apiananiri, pimarotari nota apokaerekatiniī —itxa Petro.

Ininiā Xesosi:

—Poerekari nisākire soti auīte anaakorimoni, ninakitiakorimoni.

¹⁶ Iuaīkana ipimaāri:

—Simão, Xonasi ākiri, atāo pitiretatano nota? —itxa Xesosi.

—Ari, Apiananiri, pimarotari napokaerekatiniī —itxa Petro.

Ininiā Xesosi:

—Pinīkatana soti auīte, ninakitiakori —itxa Xesosi.

¹⁷ Iuaīkana ipimaāri:

—Simão, Xonasi ākiri, pitiretatano nota?

Ininiā Petro matinaniuata ixinireē, kotxi Xesosi pimaāri ipi āti pakinikata “Pitiretatano nota.”

Ininiā Petro:

—Apiananiri, pite imarotari ikinipoko. Pimarotapitakari nitiretinii pite.

Ininiā Xesosi:

—Poerekari nisākire soti auīte ninakitiakorimoni.

¹⁸ Atāo nitxai. Ātokoripanika pinakasaaki, piteka pieremākataua. Pisari pinirekinimoni. Kiomātxi pinakasaaki, pitamēkakanoketauako, ininiā āti ieremākatai. Eereka anikai pimanirekakanimoni —itxa Xesosi.

¹⁹ Ikara atoko Xesosi sākire, kotxi ikara atoko itxako Petro ipinini. Petro ipinini iteene paxitariko Teoso, ininiā kākiti txariko: “Peerekari Teoso.” Ininiā Xesosi:

—Pikapokitano nota. Ninireēkiti pikamako —itxa Xesosi Petromoni.

Xesosi Iteene Tiretakiti

²⁰ Petro kirioka. Atapari Xesosi moianari, itiretakiti nino tikini inini. Iuakara mitxi Xesosikata iitopāka Páskoa kiiniritisaaki. Iuasaaki ipimaāri Xesosi: “Niauīte, kiripa mīkapiritai?” ²¹ Petro atapakasaakiri Xesosi tiretakiti ninoa tikini inini, ipimaāri Xesosi:

—Natokopa itxatako ere ipinini?

²² Ininiā Xesosi:

—Nota nirekiniāri iua auapanika inini nikanapiriākasaaki, kona nisāpiretai pite. Kona pixinikapiri iua. Pixinikari piteka kaminiri nota nireēkiti —itxa Xesosi.

²³ Ininiā iaripireta Xesosi sākire auīākanimoni, iua imoianari itiretakiti imapinakani Xesosi kanapiriini apisa. Txamari Xesosi !isāpiretari imapinakani. Iua txari: “Nota nirekiniāri iua auapanika inini nikanapiriākasaaki, kona nisāpiretai,” itxa Xesosi.

²⁴ Nota ikara Xesosi moianari itiretakiti nitxaua. Nota itikari imakinika Xesosi kamakiti. Ininiā nota iōkat-sopatarī ikamakiti, isākire pakini. Ininiā aimarotari atāo nisāpiretakiti.

²⁵ Auapanika itori Xesosi kamakiti. Ikinika ikamakiti !kaiōkatikopanikari. Ikinika niōkatsopatiniā, !apakata, kotxi itixi kona apakata kaiāopokori aātsopa auini.

Átosi

Xesosi Kanapiriini Iaxiti

1 Ereëkai Teópiro, Teoso tiretakari. Merepitipanika niökatsopatakiti aätsopaä txari ikinipoko Xesosi kamakiti, isäpiretakiti pakini. **2** Niökatsopatakiti mapotökire auari Xesosi iaxiti sini pirena. Isini apisa isäpiretana iokanatakini Erekar Matamatakoti paniätakiti.

3 Ipinääka atoko iuaikana iuaka oerekaua ninoamoni, ininiä imarotarina atäopitika iua ökitikapekaua. Koarëta pakini öti iua auanäta ninoakata. Iuasaaki isäpiretana Teoso auítetxi ininiäua pirena. **4** Imakinika apotiitakasaakia itxana ninoa:

—Kona hítakanapapiri Xerosareë sitatxiti. Aíri iaxitikiri iokanaenetakiti hiätapako. Iua mitxi hitemoni nisäpiretakiti. **5** Atäopitikara Xoäoni patxisatai híte äparaaä. Mapaöti napaka atoko, Erekar Matamatakoti apokako hitemoni. Iuasaaki hípatxisataäkako Erekar Matamatakotiä —itxa Xesosi säkire.

6 Ininiä imoianariakori apotiitakasaakia Xesosikata, ipimaärina iua:

—Aäüíte, uatxa iuaikana pisikatari atixine atemoni, Isaeo apika mekaniriakorimoni? —itxarina.

7 Ininiä Xesosi txana ninoa:

—Kona híte imarotiniiri íkapanini. Aírinanira imarotapaniri híte tixine hitemoni isikini öti. **8** Erekar Matamatakoti apokasaakirako hitemoni, häpakapariko posotiiretxi. Ininiä híte nota kamakiti atamatakani hitxauako. Hísäpiretariko hítiäkiti, himarotakiti pakini Xerosareë sitatxiti auakanimoni, imakinika Xotéia tópa auakanimoni, Samaria tópa auakanimoni, ikini itixiti auakanimoni pakini hísäpireäpotariko —itxa Xesosi ninoamoni.

9 Ikara atoko inaäka atoko, ninoa okiä atamatari iua anikiko iaxiti. Katxiäri äki isa, ininiä kona ninoa itikaikari. **10** Iaxiti ionakaätakasaakina, apoka ipi kiki katsopiri mäkatamani ninoa takote. **11** Ninoa txana:

—Kiki Kariréiakini, kinirepa hionakanäta iaxiti? Íkora Xesosi iaxiti sikari, isini atokotxikana ikanapiriini —itxana ninoa.

Itanokiri Koaä Apotiitakaniaua

12 Ininiä Oriva xirataätaä ipotorikana. Ikanapiriäna. Xerosareëmoni isana. Oriva kona ötakori. Käkiti Oriva xirata potoriakani sini Xerosareëmoni tako atokokanera Xoteo kiomaneakorini auiritari käkiti sini tomatiko ötisaaki.

13 Xerosareë sitatxiti apokasaakina, íiroäna aapokotxi äki. Ininiä isana itanokiri koaä. Petroma, Xoäoma, Txiakoma, Ätreema, Piripima, Tomeema, Patoromeoma, Mateoma, Txiakoma (Aopeo äkiri), Simäoma (Homano omanatakari), Xotasima (äti Txiako itari) pakini aua iuaätaä. **14** Ätipirika ninoa apotiitaua Teoso imisäkiretinina íkapani. Apaka sitoakoro Xesosi säkire auiäkani, Maria Xesosi inoro, Xesosi itariakori pakini apotiitaua ninoakata. Ninoa misäkiretakasaakiri Teoso, ätika käkiti xinirenoka atoko itxana. Ininiä erekarinoka auana ninoamoni. Kona omanatakauana.

Matxia Mereíko Pirena

15 Iuasaaki sětovítxi pakini Xesosi säkire auiäkani aua. Petro ökitikaua ninoa sauaki. **16** Ininiä itxa:

—Nitariakori, hítakaötxikari Teoso säkire kitxakapiríka Taviimoni isäpiretakiti. Tavii iökatsopatari Xotasini pirena, Xesosi maíkkani oerekakari pirena, kotxi Erekar Matamatakoti kamaimaroretari iua Tavii. Atäo ikara Teoso säkire kitxakapiríkar apokapeka uatxa.

17 Iua Xotasini atekata auakari iua. Ate paríka atoko ikama.

18 —Iuaritika isikari Xesosi imokaiakariakorimoni. Txineiro apakapakitoä iamotaäka itixi. Iuaä ipípe. Itano okaua. Ixiti apokasaaki, iokirikiita. Ixoreka itikako. Iuasaaki itikapitsa poäpekatani. **19** Imakinika Xerosareë auakani kenakopiretari Xotasini ipinini. Ininiä ninoa akiritari iuaätaä itixi uäka “Aseotama.” Popíkar akiritari “Arëkatxi Tixini.”

20 —Xikari iökatsopatakoriä iökatsopatapeëkaika ia Xotasi pirena:

Iua aapoko takanapaäkako. Kona auiritaäka käkiti auini iuaätaä. Iparíka sikaäkako ätimoni, itxa Teoso säkire.

21 —Ininiä amereëriko äti kiki atekata sikari tíkane. Amereëriko kiki mitxi Xesosikata sikari, mitxi amoianari ikiniötika Xesosikata aäuakasaaki. **22** Amereëriko kiki Xoäoni patxisarauatini itiäkari, imakinika Xesosi kamakiti itiäkari, iaxiti isini itiäkari, kotxi anirekari iua amereëkiti Xesosi ökitikiniua imarotakari ate atoko inakari —itxa Petro.

23 Ininiä imereërina ipi kiki, Xosee Pasapasi inakori. Apanakini akiritari iua Xósito. Äti kiki uäka Matxia inakori. **24** Iposo atoko imisäkiretarina Teoso:

—Pite imarotari ikinimane käkiti äkixinire. Poerekaua íkiripa naia kiki pimereëkiti **25** atekata paríkauatakari tíkane, Xesosi iokanatakiti tíkane, kotxi Xotasini

takanapari ikara paríkatxi imaerekani xika, maerekani misiritikoátaã isini íkapani —itxana Teosomoni.

²⁶ Iposo atoko ikamarina sarauatxi atoko inakari imoianarina imarotini íkapani. Ikara atoko ininiã, imereërina Matxia. Ininiã Xesosi iokanatakiti itxaua. Ikara õti atoko, iua moianatari apanakini õsi Xesosi iokanatakini.

Pētekósitxi Kiiniriti Ōti

2 Pētekósitxi kiiniriti õti (takari merepitipanika nikiko õti) apokasaaki, Xesosi sãkire auiaãkani átika kãkiti xinire atoko itxauana. Imakinika apotiitauana.

² Katimaritika iaxiti íkari kataparari ítimati atoko inakari xãpoka aapokotxi áki Xesosi moianariakori topãkiniãtaã. ³ Ininiã iusaaki xamina tirika atoko inakari tokiã. Imakinikana ikiãna apoka. ⁴ Erekari Matamatakoti íroã ikinika ákixinireë. Iusaakipeka ninoa sãkirauata áti uãka sãkireë, kotxi Erekari Matamatakoti kamaimaroretana.

⁵ Iusaaki Xerosareë sitatxitiã auanãta ikini uãkati kãkiti Xoteoakori. Ninoa Teoso sãkire kípitakani. ⁶ Ikenakotakasaakirina iaxiti íkari ítima atoko inakari, apotiitauana mirikiniti kãkiti. Ininiã itikokitatana, kotxi ikenakotarina apanakini sãkirauatini isãkireëna. ⁷ Itsoříkaãtana:

—Kiãtokopa ininiãpa imarotatarina ate sãkire. Hãtamata, Kariréiakinikara sãkirauanãta ateka sãkireë.

⁸ Kiãtokopa itxa akenakotiniri ateka sãkire? —itxana ninoa.

⁹ Iuaãtaã auari kaiãopokori kãkiti áti uãka. Auari Patxiakinima, Métxiakinima, Erãokinima, Mesopotámiakinima, Xotéiakinima, Kapatósiakinima, Põtokinima, Ásiakinima, ¹⁰ Piríxiakinima, Pãpíriakinima, Exitokinima, Arípiakinima, Sireni takotekinima, Homakinima pakini aua. Apanakini Homakinima atão Xoteoakori. Apanakini mamakaua, ininiã Xoteo itxapekauana.

¹¹ Kretakinima, Arápiakinima pakini aua iuaã.

Ininiã ninoa txa:

—Ate kenakotari Kariréiakini sãkirauatini ateka sãkireë. Isãpiretarina ikinipoko erekari Teoso Apiananiri kamakiti —itxana.

¹² Ininiã ninoa tsoříkaãta. !Imarotarina.

—Natokopa itxana imarotininirina ate sãkire? —itxana.

¹³ Apanakini kãkiti napetana:

—Poãtakanira ninoa —itxana.

Petro Apakapapiretakiti Kãkitimoni

¹⁴ Iusaaki Petro, õsi Xesosi iokanatakiniakata misãkiretana iuaã apotiitakaniua. Itxari:

—Xotéia auakanii, ikinika Xerosareë sitatxiti auakanii, hãtakaõtxikariko nisãkire himarotini íkapani.

¹⁵ Hũuãkatana naia kikiakori poãtini. Kona ipoãtana, kotxi atokatxi inaãpotapanika. ¹⁶ Ia uatxa hãtamatakiti kitxakapiríka Teoso sãpiretapekari Xoeomoni. Iua Xoeo Teoso sãkire sãpiretakari sãpiretapekaua. Iua txari:

¹⁷ Teoso txari: “Xipokatxi õti iatokopeka inakasaaki, niokanatarari Erekari Matamatakoti ikini kãkitimoni. Pa-

mariteakori sãpiretariko nisãkire apanakinimoni. Átokoriakori atamatariko itapone atoko inakari Teoso sikakiti pokamarasaaki. Iusaaki nisãkire nisãpiretana. Kiomãtxiakori taponetariko nota oerekakiti. Iusaaki nisãpiretariko nisãkire ninoamoni.

¹⁸ Íkora õtisaaki ninitiriakori, niniteroakoro pakini-moni niokanatarari Erekari Matamatakoti. Ninoa sãpiretariko nisãkire.

¹⁹ Iaxiti noerekariko niposotiire kãkiti mimarotakiniti. Íkorapokoriti apaka noerekariko niposotiire Apiananiri nininiua imarotini íkapani. Arëkatxi, xamina, katxiãri pakini apokako.

²⁰ Atokatxi piãkako. Kasiri arëkatxi atoko itxako. Apiananiri apokini apisapanikarako auako ikara atoko inakari. Peerekapaniri Apiananiri apokini õti. Íkora õti apiatakari, kotxi iusaaki Apiananiri oerekauako kãkitimoni.

²¹ Ininiã Apiananiri akiritakani makatxakaãkako imapinakanini íkapani,”

itxa Apiananiri Xoeomoni.

²² Petro sãkirauatapanika:

—Kãkiti, Isaeokini, híkenakotariko nisãkire. Híte apisatoõ Teoso oerekapekari Xesosi, Nasaree sitatxitikiri. Teoso merekiti itxaua, kotxi ikamari Teoso posotiire kãkiti mimarotakiniti Teoso himarotini íkapani. Himarotapekari ikara. ²³ Xesosi sikaãka imokaiakariakorimoni, kotxi Teoso nirekari ikara atoko iniko. Teoso imarotapekari ikara atoko inakari apokini õti. Hítekara, apanakini maerekati kamakanikata maíkarí Xesosi. Aamina ípiriãmitakari nopini hítokakitari, oka hítxapiri iuani. ²⁴ Iuaritika ipinaka atoko, iuaíkana Teoso õkitikari iua. Teoso sikakari iua ipíkitxi mamisiritakaniri íkapani. Ipíkitxi !iposotari ixipokiniri iua, kotxi Apiananiri itxaua.

²⁵ —Kitxakapiríka Tavii sãpiretari Xesosi pirena. Itxari: Nota itikapikari Apiananiri nota apisatoõ. Iua aua nikikomoni. Ininiã !nimakatxaãka.

²⁶ Ininiã nixinire poxokoniuatapeka itxa. Nisãkire poxokoni apaka aua. Níito auãki inakasaaki, iãtapari Teoso sikaenetakiti.

²⁷ Apiananiri kona takanapano nota ipíkanii auiniãtaã. Apiananiri !auritano Erekari Kamakari paiakini.

²⁸ Apiananiri oerekapekano mapíkanii kimaporite. Iua notakata aua, ininiã nipoxokoniuata, itxa Xesosi Taviiimoni kitxakapiríka.

²⁹ Ininiã Petro sãkirauatapanika:

—Kikiakori, hãuiritano nisãpiretiniri Tavii pirena. Tavii anirimane kitxakapiríka auakari. Iuani ipípe, ikatapeëka. Uatxa atemoni auapanika iua akauare. ³⁰ Iua Teoso sãkire sãpiretakari. Atão iua imarotari Teoso sãkire. Teoso sãpiretapekari iua apika mekani Teoso merekiti itxauako. Tavii imarotari Teoso merekiti õkitikaãkapanikako auítetxi ininiua tíkane. Teoso sãpiretari imerekiti topãka auítetxi itopanere nopini. Ininiã atão auítetxi itxaua.

³¹ —Tavii imarotari ikara atoko inakari Xesosi apokini apisapanika, kotxi iõkatsopatari Xesosi ipinini pirena, iuaíkana õkitikiniua pirena apaka. Iua txari:

Ipīkani auiniātaā likaikota. Iīto !ipaiaka, itxa Tavii kitxakapirīka.

³² —Iua Xesosi ipinaka atoko, Teoso ōkitikari iua. Ate amakinika Xesosi ōkitikiniua itikakani atxaua. ³³ Ininiā uatxaika Xesosi topāka Teoso kikomoni. Ikara atoko Xesosi Apiananiri itxaua. Apakapari Erekarī Mata-matakoti, Teoso sikaenetakiti. Iposo atoko, iokanatarī Erekarī Matamatakoti atemoni. Iuakara uatxa hātama-ta ikamakiti. Hīkenakotari iua sākire uatxa.

³⁴ —Tavii !isari iaxiti auītetxi ininiua ūkapani, iuaritika iōkatsopatarī:

Apiananiri misākiretari niauīte: “Nota kikomoni pi-itopākīniritika ³⁵ nixipokariko pimokaiakariakori. Nika-mariko ninoa pikiti pitakiniātaā atoko ininiua,” Api-ananiri txari niauīte.

³⁶ —Ininiā Isaeo auakanii, himarotariko ia. Hīte okari Xesosi, iuaritika Teoso kamari iua auītetxi ininiua. Teoso mereēkiti itxaua —itxa Petro.

³⁷ Iuasaaki Petro sākire ikenakotakasaakina, ākix-inireēna tsīitxi apoka iouata iorotiniri tsii atoko itxa. Maerekaxiniretinoka itxana. Eereka itxana ninoa:

—Kiripa akama? —itxana.

³⁸ Petro apakapapiretana:

—Himaerekani hītakanapa. Hīte imakinika hīpatxisa-taākako Xesosi Kristo uākaā, ininiā Teoso makatxakari himaerekani. Iuasaakiko hāpakapari Erekarī Mata-matakoti Teoso sikakiti. ³⁹ Kotxi ikara Teoso sikaenetakiti hīte ūkapani, hamarite ūkapani, apanakini ōtako auakani apaka ūkapani. Ikara Teoso sikaenetakiti ikini-mane kākiti Teoso akiritakini ūkapani —itxa Petro.

⁴⁰ Petro iteene ōtākikana ninoa, kotxi inirekari atāo ikaminina, ininiā itokata ōtākikana ia atoko:

—Ūkorapokoriti auakani maerekati kamakani itxauana. Himaktxakaua. Hītakanapariko himaerekani. Hāuikariko Xesosi sākire —Petro txana ninoa.

⁴¹ Ūkora ōti, tres mio kākiti ipoxokoniritikana auikari Petro sāpiretakiti. Iuasaaki ipatxisataākana.

Xesosi Sākire Auiākani Moianatakakiniua

⁴² Eereka ikiniōtika apaiaōkarina Xesosi iokanatakini oerekakiti. Ātipirika itiretakakauana. Ātipirika ikamari-na kiiniri komiri imapixinikiniua Xesosi ipinini ixinikini-na ūkapani. Ātipirika imisākiretarina Teoso. ⁴³ Ikinimane tsorīkaānāta, kotxi Xesosi iokanatakini kamari ito posotiiretxi kākiti mimarotakinini, apanakini Teoso imarotini ūkapani.

⁴⁴ Teoso sākire auiākani apotiitapikaua. Ninoa xanakari ikiniua inakitina. ⁴⁵ Ivētxitarina itiina, ininiā ti-itxi ūki isikana matxineirotenimoni. ⁴⁶ Ikiniōtika aiko āki Teoso misākiretikoātaā apotiitapikauana. Ninoa aapoko āki ikamarina komiri mapixinikiko kiiniriti. Ātipirika ninoa apotiitaua ipoxokoniritikana nipokori inikinina ūkapani. Ākixinirena erekapitikari. ⁴⁷ Ixikarau-atana Teoso ūkapani. Imakinika kākiti apokaerekatana ninoa. Ininiā ikiniōtika Teoso makatxakari kākiti maerekani. Ininiā Teoso sākire auiākani apiaāpota.

Petro, Matīpokotakati Pakini

3 Āti ōti mapiātiki Petro, Xoāo pakini sari Teoso misākiretiko aikotimoni Teoso imisākiretinina ūkapani. ² Iuasaaki ikiniōtika kākiti anikari matīpokotakati Teoso misākiretiko aikoti toremoni. Itore uāka “Peereri.” Iuaā matīpokotakati amanaāri txineiro iuaā napakanimoni. Iponaniākasaaki matīpokotakati itxaua iua. ³ Ininiā Petro, Xoāo pakini ūroākasaaki, iua amanaāri txineiro:

—Txineiro hīsikano —itxa.

⁴ Ininiā Petro, Xoāo apaka atamatari iua. Ininiā Petro txari:

—Patamataua.

⁵ Ininiā iua matīkati atamatana ninoa. Iuākatari txineiro isikinina iuamoni. ⁶ Ininiā Petro:

—Kona auari txineiro atemoni. Kona pirata aua atemoni. Oro apaka lauari. Iuaritika nota auakiti nisikapitikai. Xesosi, Teoso mereēkiti, Nasareekiri, iua uākaā pōkitikauako. Pitīpokotako —Petro txari iuamoni.

⁷ Ininiā Petro māikari iuako ikikomoni ōkitikiniua ūkapani. Iuasaakipeka ikiti, ikitinota pakini kataparapeka itxa. ⁸ Ininiā okakataua, tīpokota itxa. Ūroā Petro, Xoāo pakinikata Teoso misākiretiko aikoti āki. Iroākasaaki, okaāpokataua. Itīpokoāpokata.

—Ari, peerekari Teoso —itxanāta.

⁹ Ikinimane itikari iua tīpokotini. Ikenakotari ixikarau-atini Teosomoni. ¹⁰ Ikinimane imarotari iua kiki aiko ūronakikoātaā “Peereri” inakoriātaā topākanātakari, txineiro amanaānātakari iua. Ininiā ninoa:

—Anekani. Kiripa atxiiti? Mitxi matīpokotakati. Uatxa itīpokotape. Kanatokopa itxa? —itxana.

Petro Sāpiretakiti Kākitimoni

¹¹ Apanakini kenakopiretana ninoa, ininiā imitekana ninoamoni matīpokotakati pirena imarotinina ūkapani. Iuasaaki ninoa auiniātaā akiritaāka “Saromāo pakita.” Iuaā Petro, Xoāo pakini aua mitxi matīpokotakatikata. Iua māīkakanokeāpotana Petro, Xoāo pakini. ¹² Iua Petro atapana kākiti ninoamoni ūkani. Itxana:

—Isaeo auakanii, kinirepa hīte tikoka ere kiki tīpokotini hātamatakasaaki? Kinirepa hīte itikaua ate? Na ate posotiireēni kamari iua tīpokotini. Ate ereka anini kona kamari iua tīpokotini. ¹³ Apraāoni, Isakini, Xakooni pakini Teosone, aīriakorini kitxakapirīkarini Teosone, iuara oerekapikaua imi Xesosi ereka inini. Teoso ākiripitikara itxaua. Iua posotiire auapitika. Iuakara hīsika okiko ūkapani. Eereka Pirato inakori nirekasaakiri isikakiniri. Hīte !nirekari iua sikakiniri Xesosi. ¹⁴ Iuasaaki hīte kona nirekari erekarinoka kamakari. !Nirekari iua atāo inakarino kamakari. Hīte amanaāri Pirato isikakiniri kokaniri hītemoni. ¹⁵ Ininiākara hīte okapiri kākiti auāki inini kamakari. Iuaritika ipīkani sauaki Teoso ōkitikari iua. Ate itikari atāopitikara iua ōkitikiniri.

¹⁶ —Ia kiki hītikakiti himarotakiti kataparapeka itxa, kotxi iua auikari Xesosi posotiire. Iua auikari Xesosi

sáikire erekapeka inini íkapani. Hátamatari híte apisatoõ iua ereka inini.

¹⁷ —Ininiã uatxa nitariakori, nimarotari híte, híte auíteakori pakini okapiri Xesosi atão himimarotakani xika. ¹⁸ Kitxakapiríka Teoso sáikire sápiretakani oerekapekaua Kristo misiritiko. Ikara imisiritiko auapeka. ¹⁹ Ikara atoko ininiã, hítakanapariko himaerekani. Erekarí kimaporiti hinitako, ininiã Teoso makatxakari himaerekani. ²⁰ Iuasaaki Apiananiri kamapoxokonitai. Isikataparatai. Iuasaaki iua iokanatarí Xesosi imereékíti hítemoni. ²¹ Merepanika iua Xesosi kaikota iaxiti. Teoso kamariko imakinika amaneri. Iuasaaki Xesosi apoka iuaíkana. Iua atokokana itxana Teoso sáikire sápiretakani kitxakapiríka. ²² Kitxakapiríka Moisesi txari:

Apiananiri híteosone iokanatariko isáikire sápiretakari hítemoni nota iokanatarí atokokana. Hinirimane itxaua iua. Híkenakotariko ikinika isápiretakiti hítemoni.

²³ Ikinimane iua sáikire makenakotakati xipokaãkako.

²⁴ —Teoso sáikire sápiretakari Samoeo inakori, eereka ikinikana Teoso sáikire sápiretakani pakini sápiretapedakari Teoso iokanatiniri imereékíti kákitimoni íkorasaaki. ²⁵ Teoso sáikire sápiretakani anaakorirai híte, ininiãkara isáikire ninoamoni, iuatxikana isáikire hítemoni uatxa. Itxari Apraõni:

Áti pimekaniri sikariko erekari ikini itixiti auakani moni,

itxa Teoso. Ininiã ikara Teoso sikaenetakiti híkiomaneakorinimoni, hítemoni apaka isikaeneta.

²⁶ Ininiã Teoso iokanatarí iua ákiri Xesosi hítemoni merepitipanika. Iokanatarí iua hítemoni erekari hítemoni isikini íkapani, himaerekani hítakanapini íkapani —itxa Petro.

Petro, Xoão Pakini Xoteo Auíteakori Apisatoõ

4 Petro, Xoão pakini sákirauatapanika kákitimoni inakasaaki, sasetotxiakori, Teoso misákioretiko aikoti níkatarkari, satoseoakori pakini apoka ninoamoni. ² Ininiã ninoa naiataua, kotxi Petro, Xoão pakini sápiretari kákiti ipíkani ókitikiniua pirena, kotxi ninoa txari:

—Xesosi ipinaka atoko, iuaíkana iua ókitikaua, ininiã ipíkani ókitikauako.

³ Ininiãkara ninoa maíkana Xoão, Petro pakini. Iuasaaki mapiãnikata, ininiã itakana kateia áki íkanõka iuaã inapinina íkapani. ⁴ Iuaritika itomaneri Petro sáikire kenakotakani auikapiretari iua sáikire. Síko mio kikiakori aukari Teoso sáikire Petro sápiretakiti.

⁵ Katimatiniãkata Xoteo auíteakori, kiomãtxiakori, kaiókatsopareriakori pakini apotiimanetaua Xerosareë. ⁶ Sasetotxiakori auíte apiatakari Anasi inakori iuaã aua. Inirimane Kaipasi inakori, Xoão inakori, Arexãtri inakori pakini aua iuaã apanakini sasetotxiakori auíte nirimanekata. ⁷ Xoão, Petro pakini minaãka ninoa apisatoõ. Ipimaãrina:

—Kiposotiireëpa hókitikari matípokotakati? —itxana.

⁸ Erekarí Matamatakoti moianatarí Petro. Ininiã iua txana ninoa:

—Aãuíteakori, akiomaneakori, ⁹ hinirekarí asápiretinii uatxa erekari akamakiti matíkatimoni. Hinirekarí himarotiniri erekapeka inini. ¹⁰ Ininiã ikinika híte, ikinika Isaeo tixini auakani apaka, himarotariko ia. Xesosi Nasareekiri posotiireëra ia kiki híte apisatoõ timakari makananitaãka. Iuara híte oka aamina ípiriãmitakari nopini. Iuara Teoso ókitika iuaíkana ipíkani sauaki.

¹¹ Kitxakapiríka Teoso sáikire iókatsopatakori sápiretari Xesosi híte manirekakani, kotxi itxari:

Kai aapokotxi kamakanii, !hinirekarí áti kai soro. Iua kai himanirekakiniti apiari itxapekaua. Apanakini kai soro maíkakari itxaua.

¹² —Xesosinokara makatxakari kákiti maerekani. Kona áti maerekanitxi makatxakakari !auari ikini itixiti. Teoso sikari iuanokara kákitimoni imaerekani imaktxakani íkapani —itxa Petro.

¹³ Ninoa tsoříkaãñãtana Petro sáikire ikenakotakasaakina, kotxi Petro, Xoão pakini sákirauata itaparaxinireritika. Mitxi kona ninoa apaiaókarauata, iuaritika ninoa imarotari atão isákirauatini. Ninoa xinikari:

—Ixí. Ninoa minakani. Iuaritika kíkitena, kotxi Xesosi moianariakori itxauana —itxana.

¹⁴ Ininiã !kasáikirena, kotxi matíkati típokotapeka ninoa apisatoõ. ¹⁵ Ininiã ipaniãtana Petro, Xoão pakini mapara isinina, ninoa auítetxiakori ininimoniuaana isákirauatinina íkapani. ¹⁶ Ininiã auítetxiakori txari:

—Kanatokopa atxatana ninoa? Kotxi ikinimane Xerosareë auakani imarotari itxíkitakinirina matíkati erekape inini. Atãopitikara ninoa kamari posotiiretxi.

!Aposotari akipatiniri ia sákiiretxiti, kotxi ikinipoko imarotapekari matíkati típokotini. ¹⁷ Kona anirekarí ikara pirena apikomoni iaripiretini kákiti sauaki. Ininiã atxanako ninoa: “Na apikomoni Xesosi pirena híspiretapinikariko.”

¹⁸ Ininiã iuaíkana akiritana. Eereka itxana:

—Kona híspiretapinikariko apikomoni Xesosi pirena. Kona hõerekapiriko iuaíkana Xesosi pirena —itxana.

¹⁹ Ininiã Petro, Xoão pakini apakapapiretana:

—Kiripa atão akípitini? Hítekani? Teosokani? Kipa erekari? Híte mereëri. ²⁰ Kona aposotari atakanapiniri asápiretiniri aítikakiti, akenakotakiti pakini —itxana.

²¹ Ininiã iuaíkana auítetxiakori txitana. Iposo atoko auiritana isinina, kotxi maerekati !ikamana. !Imisiritana, kotxi ipíkarina kákiti. Ikinimane kákiti txari:

—Peerekari Teoso kamakiti matíkati íkapani —itxana.

²² Íkora kiki makananitakori koarëta anope iuasaaki.

Xesosi Sáikire Auiãkani Misákioretiniri Teoso

²³ Xoão, Petro pakini sikakikosaaki, ninoa kanapiriã imoianariakorimoni. Ikinika sasetotxi auíteakori sáikire, kiomãtxiakori sáikire pakini ikinika isápiretana. ²⁴ Ikara ikenakotakasaakina, ikinikana misákioretari Teoso. Ininiã itxana:

—Apiananiri, ikinika posotiiretxi auari pitemoni. Pite nanira Teoso pitxaua. Pite kamari iaxiti, itixi, potxoari uiniti pakini. Imakinika iaxiti auakani, itixi auakani,

potxoari uiniti auakani pakini pikama. ²⁵ Kitxakapiríka Erekarí Matamatakoti kamaimaroretari pinitiri aãtokiri Tavii. Ininiã itxari:

Kinirepa kãkiti Teoso manirekaãkani omanãkarauata? Kinirepa kãkiti maxikatíika xinikari maerekati ikamini átimoni?

²⁶ Auítetxiakori apotiitaua neenamati ikaminina íkapani. Ninoa apotiitaua Apiananiri inaiatinina íkapani, imereëkiti apaka inaiatinina íkapani, itxa Tavii.

²⁷ —Atãopitkara Erotxi, Põsio Pirato pakini apotiitaua Xoteo minakonikata, Xoteoakori pakinikata. Ninoa apotiitaua uai ia sitatxitiã. Isãkirauatana pamarite Xesosi okinina íkapani. Txamari pite mereëri iua erekarionoka kamakari. ²⁸ Mitxi pite imarotari imakinika ninoa kamakiti tíkane. Kãkiti kamari pinirekakiti, kotxi kaposotiirei. ²⁹ Ininiã aãuíte, pixinikariko ikara maerekapirenati. Pisikataparaxiniretaua ate pinitiriakoriua pisãkire asãpiretini íkapani. ³⁰ Pamarite erekari kamakari Xesosi posotiireë pimakananitanake amianatakani. Kãkiti maposotakinini pikamako. Posotiiretxi pikamako pisãkire aãerekini íkapani. Ikara pikamako pamarite Xesosi posotiireë —itxana ninoa Teosomoni.

³¹ Teoso imisãkiretaãkana atoko, ninoa apotiitiniã-taãua iakeka. Erekarí Matamatakoti apoka ikini-manemoni. Ininiã itaparaxinireritikana isãpiretarina Teoso sãkire kãkitimoni.

Teoso Sãkire Auiãkani Moianatari Itariakori

³² Ikinika Teoso sãkire auiãkani átika kãkiti xinire atoko itxauana. Kona itxana: “Nota nakitira ia,” kona itxana. Kapotxinaniri !auari. Ninoa xanakari ikinika itina. ³³ Xesosi iokanatakini itaparaxinireritikana txari ikinimanemoni:

—Xesosi Apiananiri iuaíkana õkitikaua ipinaka atoko. Ate imarotari, kotxi ate aõkitari iua ipinaka atoko —itxana kãkitimoni.

Ininiãkara Teoso sikari ikinika erekari ninoamoni.

³⁴ Ninoa sauaki tiitxi amonitakari !auari. Kikio ipi auiniãri, kakikioteri vëtxitari átika. Aapokotxi ipi auiniãri, kaapokori vëtxitari átika. Oa txineiro ninoa sika ³⁵ Xesosi iokanatakinimoni. Eereka ninoa xanakaro oa txineiro matiitinimoni.

³⁶ Iuasaaki aua Xosee. Sasetotxi, Arevii apika mekaniri itxaua. Xipri inakori pokomiríitkiri iua. Xesosi iokanatakini takauãkatari iua Panapee inaãka. Popíkari sãkireë iuãka: “Kasikapoxokoniri,” kotxi átipirika isikapoxokonitari kãkiti. ³⁷ Iua vëtxitari átika ikikiote. Iua kikio íki isika Xesosi iokanatakinimoni.

Ananíasi, Sapira Pakini

5 Iuasaaki auari Ananíasi inakori, ítanoro Sapira inakoro pakini. Iua vëtxitari kikio. ² Ikaikotakaro ipixini kikio íki. Ipixininoka isika Xesosi iokanatakinimoni. Sapira imarotari õtaniri kamakiti. Txamari iua sikasaakiro oa txineiro Xesosi iokanatakinimoni, itxari: —Ikinika kikio íki asika Teosomoni —itxa.

³ Iuasaaki Petro txari:

—Ananíasi, kinirepa pauiritari Satanasi misirienetini maerekati pikamini íkapani? Erekarí Matamatakotira pimisirieneta, kotxi ipixini kikio íki kaikota pitekata. Kinirepa pisãpiretari ikinika txineiro pisikini Teosomoni? ⁴ Kikio pivëtxitini apisapanika, íkora kikio pite nakiti. Eereka pivëtxitakasaakiri, õkora txineiro pite nakito. Ininiã kinirepa pitxari: “Íkinika nisika Teosomoni?” Kona kãkitini pimisirieneta. Teosora pimisirieneta —Petro txari.

⁵ Iuasaakipeka Ananíasi iripe. Ipípe. Ininiã ikara kenakotakani píkarauakata. ⁶ Iuasaaki átokoriakori iapirikari Ananíasini íto mãkatxi mataã ikatinirina íkapani. Eereka anikarina, kata itxarina iuani.

⁷ Ipi oara, áti oara pakini napaka atoko iua ítanoro apoka. Kona oimartapanikari õítanirini ipinini. ⁸ Ininiã Petro txaro:

—Pisãpiretano. Oia txineironokani híkikiote íki hã-pakapakito aua? Atão pisãpiretano? —itxaro.

Ininiã oa:

—Ari aroanokara ate apakapakito aua —otxari.

⁹ Ininiã Petro:

—Híte uãkatari Erekarí Matamatakoti auiritai himisirienetiniri iua? Uatxaika íronakikoãtaã pítanirini katakani apokapeka. Ininiã ninoa anikapitikai pite apaka —itxaro.

¹⁰ Iuasaakipeka õrípe, pípe otxa. Iuaíkana ninoa átokoriakori íroã. Apokarona oani, ininiã anikarona. Ikatarona õtanirini takote. ¹¹ Ininiã ikinipoko Xesosi sãkire auiãkani, apanakini ikara kenakoenetakani pakini píkarauata.

Amianatakani Makananitiko

¹² Iuasaaki Xesosi iokanatakini kamanãtari posotiiretxi, kãkiti mimarotakinini pakini kãkiti sauaki. Ikinioítika Xesosi sãkire auiãkani apotiitaua Teoso misãkiretikoãtaã, “Saromão pakita” akiritakori. ¹³ Xesosi sãkire mauíãkani apokaerekatana ninoa, txamari ipíkarena xika linirekarina imoianatinina. ¹⁴ Iuaritika apikomoni kãkiti apotiãpotaua ninoakata, kotxi kikiakori, sitoakoro pakini auikari Apiananiri sãkire.

¹⁵ Iuasaaki Xesosi iokanatakini makananitana amianatakani, ininiãkara kãkiti anikana amianatakani kimaporimoni. Sirimatatxi nopini itakana ninoa kimaporiãtaã. Ininiã kãkiti xinikari: “Petro napakasaaki, isanõka amianatakanimoni apokiniã, imakananitaãkana.” ¹⁶ Ininiã kaiãopokori kãkiti Xerosareë takotekini apoka. Ninoa minana amianatakani, apaka kãkiti maerekani matamatakoni misiritakini pakini. Ininiã Xesosi iokanatakini makananitana imakinikana.

Xesosi Iokanatakini Misiritiko

¹⁷ Iuasaaki sasetotxi auíte apiatakari, imoianariakorikata, satoseoakorikata xikotana Xesosi iokanatakini. ¹⁸ Ininiã ninoa mãíkana. Eereka kateia áki taka itxapena ninoa. ¹⁹ Iua íkanõkati Teoso nitiri iaxitikiri

matakakari kateia tore. Eereka anika itxana iporikiti. Itxana:

²⁰ —Hísa Teoso misäkiretiko aikotimoni. Iuaã hísäpiretariko Teoso säkire kãkitimoni kãkiti auini amaneri inini íkapani —itxa Teoso nitiri.

²¹ Ininiã íkanökapanika ninoa sari Teoso misäkiretiko aikotimoni. Teoso nitiri säkire iaõka ikamana. Iuaã isäpiretarina Teoso säkire kãkitimoni.

Iuasaaki sasetotxi auíte apiatakari, imoianariakorikata píkapiretana Xoteoakori kõtãkikarerini, Xoteo kiomaneakori pakini, ininiã imakinika ninoa apakítakana Xesosi iokanatakini. ²² Ininiã apanakini sari kateiamoni apinina íkapani. Txamari apokasaakina iuaã, !auaikana Xesosi iokanatakini. Ininiã ikanapiriãna auítetxiakorimoni isäpiretinina íkapani. ²³ Ininiã itxana: —Ate apokasaaki kateia tore, itotaãkapanika. Kateia nítakani auanãta itore takote. Txamari itore amatakakasaaki, kãkiti !auaika iriko äki —itxana.

²⁴ Ininiã sasetotxi auíte apiatakari, Teoso aikote nítakani auíte, sasetotxiakori pakini kenakoentakasaakiri ikara säkiretxiti:

—Anekani? Nãpa ninoa atxiíti? Kiripa apikomoni auatako? —itxana.

²⁵ Iuasaakipeka kiki apoka. Isäpiretana:

—Híkenakotariko nisäkire. Ninoa kikiakori kateia äki hítakani Teoso misäkiretiko aikoti äki aua. Oerekanãtarina Teoso säkire kãkitimoni —itxana.

²⁶ Ininiã Teoso misäkiretiko aikoti nítakani auíte, iniriakorikata sari iuaã. Ninoa minana Xesosi iokanatakini iuaíkana auítetxiakorimoni. Imaíkasaakina, kona iaritatana, kotxi ipíkarina kãkiti kai soroã kiporonakinina. ²⁷ Ninoa apokasaaki, ipaniãtana Xesosi iokanatakini Xoteoakori kõtãkikarerini apisatoõ itimინina. Sasetotxi auíte apiatakari txana:

²⁸ —Mitxi ate paniãtai Xesosi säkire himasäpiretakani kãkitimoni. Txamari hõerekapanikari iua säkire ikinimane Xerosareë auakanimoni. Ate xika Xesosi ipina, hítxanãta ikinimanemoni —itxa sasetotxi auíte.

²⁹ Ininiã Petro, apanakini Xesosi iokanatakiniakata apakapiretari:

—Ate kípitari Teoso paniãtakiti. Kona kãkiti paniãtakiti akípita. ³⁰ Teoso, akiomaneakorini Teosone, õkitikari Xesosi iuaíkana auini íkapani. Hítera okari iua Xesosi aamina ípiriãmitakari nopini. ³¹ Iuaritika Teoso takari Xesosi ikikomoni. Itxíkitakari iua auítetxi ininiua. Kãkiti maerekani makatxaãkari itxaua. Ininiã Isaeo auakani takanapiniãri imaerekani, Xesosi makatxakari ninoa maerekani. ³² Ikara ate imarota. Apaka Erekar Matamatakoti imarotari ikara. Teoso sikari iua Erekar Matamatakoti isäkire kípitakanimoni —itxa Petro ni-noamoni.

³³ Ikara ikenakotakasaakina, iteene omanãkaruatana. Ininiã ninoa:

—Mãokana —itxana.

³⁴ Iuasaaki Kamarieo inakori õkitikaua kõtãkikarerini sauaki. Pariseo itxaua. Teoso paniãtakiti oerekakari itxaua. Ikinimane paxitari iua. Ininiã iua txari:

—Hanikana naia mapara atenoka asäkirauatini íkapani —itxa.

³⁵ Ininiã eereka itxana:

—Isaeo tixini auakanii, híkitetariko híkamakiti ninoa Xesosi moianariakorimoni. ³⁶ Akokaxiti auari Teota inakori. Iua txari: “Auítetxi apiatakari nitxaua nota,” itxa. Iuasaaki koatrosëtosi kikiakori moianatari iua. Auikarina iua säkire. Txamari okapeëka iuani. Eereka iukata sikani iarikape. Iua auítetxi ininiua xipope. Isäkire !auikaãkaika.

³⁷ —Teotani ipinaka atoko Xotasi Kariréiakiri apoka. Iuasaaki auítetxiakori iaõtari ikinimane kãkiti.

Kaiãopokori kãkiti auikari iua Xotasi säkire, ininiã ninoa moianatari iua. Iua Xotasi imoianariakorikata nirekari ixipokinina auítetxiakori. Txamari iua apaka okapeëka, ininiã imoianariakori iarikape.

³⁸ —Ininiã uatxaikara nõtãkikai híte: “Hítakanapanako ninoa Xesosi iokanatakini. Hísikakanako ninoa, kotxi atxiíti ninoa !ikamari Teoso paniãtakiti, ininiã paítiki ninoa säkire apaka !auaika. ³⁹ Txamari, ninoa kaminiãri Teoso paniãtakiti, erepaniko, kotxi atxiíti hinaiatari Teoso” —itxa Kamarieo.

Iuasaaki ninoa Xoteo õtãkikakani kípitari Kamarieo säkire. ⁴⁰ Akiritana Xesosi iokanatakini iuaíkana íiroinina. Ipaniãtari ninoa xirokitatiko. Ininiã ninoa:

—Xesosi säkire kona hísäpiretapinikako —itxana.

Eereka sikaka itxana isinina íkapani. ⁴¹ Isikasaakina, ipoxokoniuatana.

—Teoso apokaerekataua ate, kotxi auiritari amisiritiko Xesosi säkire aũukini xika —itxana.

⁴² Ininiã ikiniõtika oerekaruatana Teoso misäkiretiko aikoti äki, kãkiti aapoko äki apaka. Isäpiretarina erekari pirena Xesosi Teoso mereëkiti ininiua pirena.

Setxi Kikiakori Mereíko

6 Xesosi säkire auíãkani apiaãpota. Iuasaaki Xoteoakori Kreko säkire imarotakani taparakienatana apanakini Xoteoakori. Itxana:

—Atekata auakani sitoakoro tikinitakoni kona apakapari nipokori ikiniõtika apanakini tikinitakoni apakapiniri atoko —itxana ninoa.

² Ininiã Xesosi iokanatakini tosi pakini píkapiretana ikinimane Xesosi säkire auíãkani. Itxana:

—Kona erekari ate takanapiniri Teoso säkire aðerekiní asikakienarauatini íkapani. ³ Ininiã setxi kikiakori himereëko, ikara paríkatxi ikaminina íkapani. Himereëna Erekar Matamatakoti paniãtakitinoka kamakani. Himereëna kimarorerini. Ininiã asikana ia paríkatxi ikaminina, sitoakoro tikinitakoni isikakienatinina íkapani. ⁴ Ininiã atepekana, Teoso amisäkireta. Isäkire aðereka. Ikaranoka akamako ikiniõtika —itxana.

⁵ Ikinimane Xesosi säkire auíãkani apokaerekatari Xesosi iokanatakini säkire, ininiã ninoa mereëri Estevão. Iua iteene auikari Teoso säkire. Erekar Matamatakoti paniãtakitinokara ikama. Apaka imereëna Piripima, Porókoroma, Nikanooma, Tximoma, Pamenama, Nikoraoma pakini. Iua Nikorao Átxiokiakiri itxaua. Mitxi Xoteo minakatua iua, eereka imamakaua. Xoteopeka

itxapekaua. ⁶ Xesosi sākire auiākani minana ninoa Xesosi iokanatakinimoni. Ininiā Xesosi iokanatakini misākiretari Teoso. Iuakona itakana ninoa nopini, ikara Teoso parīka ikaminina tīkane.

⁷ Ikara atoko ininiā, Teoso sākire iaripireta apikoxiti. Ininiā mokatanitika kaiāori Xerosareē auakani auikari Xesosi sākire. Ito sasetotxiakori apaka kīpitari Xesosi sākire.

Estevão Maĩkiko

⁸ Estevão iteene auikari Xesosi sākire. Teoso posotiire aua iuamoni. Kaposotiireri iua, ininiā ikamari kākiti mimarotakinini. Ikamari posotiiretxi, Teoso posotiire oerekini ĩkapani. ⁹ Txamari ātikaka kikiakori !inirekari iua. Ninoa āti Xoteo apotiitiniātaāua aikoti sikani. Ninoa “Ninoaka nireēkiti kamakani” akiritaākana. Ninoa Sireni sitatxitikini, Arexātria sitatxitikini, Sirisia tixinikini, Ásia tixinikini pakini. Ninoa iteene misākiretakakaua Estevãokata, kotxi lauikarina iua sākire.

¹⁰ Txamari Estevão sākirauataka atoko, !kasākireikana, kotxi Erekar Matamatakoti sikaimaroretari iua Estevão. ¹¹ Ininiā ninoa sikari txineiro apanakini kikiakorimoni Estevão apoĩtinina ĩkapani. Ininiā ninoa txineiro apakapakani txari:

—Ate kenakotari iua, Moisesini imisākirepiretini, Teoso apaka imisākirepiretini —itxana.

Txamari na atāoni isākirena. ¹² Ikara isākirena xika, kiomātxiakori, kaiōkatsopareriakori, apanakini kākiti pakini naiataua, ininiākara imaĩkarina Estevão, kōtākikarerinimoni anika itxarina iua.

¹³ Eereka iminana apanakini, Estevão imisākirepiretinina ĩkapani. Ninoa txari:

—Ia kiki misākirepiretapikari Teoso misākiretiko aikoti. Apaka kona inirekari Moisesi paniātakiti. ¹⁴ Ate kenakotari iua sākire: “Xesosi Nasareekiri xipokariko Teoso misākiretiko aikoti. Ixipokariko akiomaneakorini sākire Moisesini paniātakiti.”

Ikara atoko aāpirena ikamana ninoa. ¹⁵ Ikinimane ninoa kākiti ōtākikakani atamatari Estevão toō. Teoso nitiri iaxitikiri toō atokokana itxa Estevão toō.

Estevão Sākirauata Kōtākikarerimoni

7 Ininiā sasetotxiakori auĩte apiatakari txari Estevão:

—Atāokani ninoa sākire?

² Estevão txari:

—Nikiomaneakori, nitariakori pakini, hīkenakotanoko. Teoso iaxitikiri oerekaua aātokirini Apraāonimoni. Mesopotámia tixini auakasaaki, Araā tixini auini apisapanika, Teoso motika iuamoni.

³ Iuasaaki Teoso txari iua: “Pitakanapariko pitixine, pinirimane pakini. Āti tixinimoni pisako. Noerekiniimoni pisako,” itxa Teoso. ⁴ Ininiā sipe itxa Apraāo. Itakanapari Kaotéia inakori tixini. Araā tixinimoni iua sipe. Araā auakasaaki irini ipĩpe. Irini ipinaka atoko, Teoso mĩpiri iua uaimoni uatxa aāuiniātaā. ⁵ Apraāo auakasaaki, Teoso !isikari uai tōpa iuamoni iua nakiti

inini ĩkapani. Kona ipixini metro isika iuamoni inakiti inini ĩkapani. Isikaenetari uai tōpa iua, imekaniriakori pakinimoni. Txamari !keeneri iua iuasaaki. ⁶ Teoso txari Apraāomoni: “Pamariteni, pimekaniriakori, papika mekaniriakori auako āti kākiti tixine. Iuaāraako imisiritapeēkanako koatrosētosi anokanani. Iparĩkauatana apanakini ĩkapani maxikatĩka. Ininiā iteene imisiritiko aua.”

⁷ —“Ininiākara nimisiritariko ninoa misiritakani. Eereka Apraāo apika mekaniriakori takanapariko iuaā, uaimoni kanapiriā itxanako. Ininiā ĩkorapokoriti ninoa parĩkauatako nota ĩkapani,” itxa Teoso. ⁸ Ininiā Teoso txari: “Hĩte kitsotakariko ikini hamariteni tsiki mata. Ikara nitakaōtxikare hātamatakasaaki, hĩxinikariko nisikaenetakiti,” itxa Teoso. Eereka Apraāo ākiri aua, Isaki inakori. Oito ōtipeka auini ōti inakasaaki, Apraāo kitsotakari itsiki mata. Isaki aneēkasaaki, imi Xakoo inakori aua. Eereka Xakoo anaakori auapeka tosi pakini. Ikara tosi imiakori aātokiriakorini iriakori itxauana.

Xosee Pirena

⁹ —Xakoo anaakori xikotari itarina Xosee inakori. Ininiā itariakori vētxitari iua Exito sikanimoni. Iuaritika Teoso auapika iuakata. ¹⁰ Imisiritiko auakasaaki, Teoso moianatari iua imapinakanini ĩkapani. Iuasaaki Exito auakani auĩte Paraoo inakori. Teoso sikaimaroretari Xosee, ininiā Paraoo potxitari iua, ininiā Paraoo txari iua: “Exito auakani auĩte pitxauako. Naapoko auakani pinĩkata apaka,” itxa Paraoo Xoseemoni.

¹¹ —Eereka makienanitxi aua Exito tixiniā, Kanaā tixiniā apaka, ininiā ikinimane natxita. Aātokiriakorini apaka !auari nipokori. !Apokari nipokori. ¹² Ininiā Xakoo kenakoenetari triko auini Exito tixini. Ininiā ipaniātana tesi imiakori Exito tixinimoni isinina. Mitxi !isana Exitomoni.

¹³ —Ininiā iuaĩkana āti ōti isana Exitomoni, kienatxi iamotinina ĩkapani. Iuasaaki Xosee oerekaua ninoamoni. Iuasaaki Paraoo imarotari Xosee nirimane.

¹⁴ Ininiā Xosee pĩkapiretari iri Xakoo, itariakorikata, inirimanekata. Setēta sĩko pakini kākiti sari Exito tixinimoni, kotxi aua ikinipoko nipokori iuaā.

¹⁵ —Ininiā Xakoo apanakinikata sari Exitomoni. Iuaā mapakanani atoko Xakooni ipĩpe. Eereka aātokiriakorini ipina iuaātaā apaka. ¹⁶ Ninoa ipĩkasaakina, iĩtona anikapeēka Sikeē tixinimoni. Iuaākiri akauaritiā ikata inapeēkana. Apraāoni auapanika inakasaaki, iamotari iua akauari Emoo ākiriakorimoni.

Moisesi Pirena

¹⁷ —Itixi Teoso sikaenetakiti Apraāomoni kaiamapeka Xoteoakorimoni inakasaaki, kākiti Isaeokini kaiāopokoikana Exito tixiniā. ¹⁸ Itokanani napaka atoko, āti Exito auakani auĩte Xoseeni mimarotakati aua. ¹⁹ Iua auĩtetxi misiritari anirimanekorini. Ininiā sotatoakori mixirika itxapena amarini xapitiri. Eereka oka itxapena.

²⁰ —Iuasaakiikara Moisesi iponaniã. Moisesi amarini-panika inakasaakia peerepatikiri. Ipi, äti pakini kasiriti iri, inoro pakini nĩkataru iua nino aapoko. ²¹ Eereka nino takanapari iua Paraoo äkeru kipaãtiniãtaãu takote. Ininiã oa apokari iua amarini. Oanikari oaãpokomoni. ²² Exito auakani imarore ikinipoko oerekaãka iuamoni. Kasãkireri iua. Kakamareri iua.

²³ —Koarëta anokanani inakasaaki, inirekari inirimanane Isaeokini aokitini. ²⁴ Inirimanemoni isikasaaki, itikari Exito auakari xirokitatiniri kiki Isaeokiri, ininiã ixikatxitari. Iua aritapiri Exito auakari, oka itxapiri iuani. ²⁵ Iuasaaki Moisesi uãkataru inirimanane Isaeokini imarotini Teoso nirekari Moisesi makatxakinina nino, Exito auakani mamisiritakanina ĩkapani. Txamari ninoa ĩmarotari ikara. ²⁶ Apikomoni äti öti, iua sari inirimanemoni. Iuaã iua apokana ninoa neenamuanãtini, inaiapoatakauana. Ininiã Moisesi ötäkikana nino. Itxana: “Kikiakori hĩtaritakakaua. Kinirepa himisir-itakakaua?”

²⁷ —Inirimanane misiritakari katika txari Moisesi: “Kipa txai pite ate auĩte pininiua? Kipa txai pite ate ötäkikakari pininiua? ²⁸ Kita Exitokirini pokini atokokana pokatanoko nota?” itxa. ²⁹ Ikara säkiretxiti ikenakotakasaaki, Moisesi takanapari Exito tixini. Mĩtxiaã tixinimoni isa. Iuaã ĩtanorouata. Ipi imiakori aua iuamoni.

³⁰ —Koarëta anokanani äparaã makipakaniãtaã iua aua iuasaaki. Teoso nitiri iaxitikiri motika Moisesimoni ixirata Sinai inakoriãtaã. Iuasaaki iua atamataru aanaia tirinini, txama ĩrika. ĩIxipoka. ³¹ Ikara itikasaaki, Moisesi tsorĩkaãta, ininiã aanaia takote isa iteene atamatin ĩkapani. Iuasaakipeka ikenakotari Apiananiri säkirauatini: ³² “Piki maneakori Teosonekarano nota. Apraã, Isaki, Xakoo pakini Teosonekarano nota,” itxa Teoso. Iuasaaki Moisesi kikananaka ipĩkare xika. Ipĩkari Teoso säkirauatini manapi atamatini.

³³ —Ininiã Apiananiri txari iua: “Pikitimata pimakatxaka, kotxi uai pitiminiãtaã nota auanãta. ³⁴ Nitikana ninakitiakori Exito tixiniã. Exito auakani misiritapena ninoani. Nikenakotari ökinina. Nota inari nisikakinina ĩkapani. Ininiãkarako Exito tixinimoni niokanatai pite,” Apiananiri txari Moisesi.

³⁵ —Iua Moisesi Isaeokini manirekakiniti, kotxi nino txari: “Kipa txai pite ate auĩte pininiua? Kipa txai pite ate ötäkikakari pininiua?” itxarina. Iuakara Teoso iokanatakiti ninoamoni nino auĩte ininiua ĩkapani, nino imakatxakini ĩkapani, kotxi Teoso nitiri aanaiaã tirinakariã auakari iokanataru iua ninoamoni.

³⁶ —Eereka iua makatxakana nino Exito tixini. Oerekari Teoso posotiire kãkiti maposotakiniti Exito tixiniã. Oerekari Teoso posotiire potxoari uiniti, Põkamarari inakoriã. Äparaã makipakaniãtaã apaka oerekari Teoso posotiire koarëta anokanani iuaãtaã.

³⁷ —Ia Moisesikara säpiretana Isaeokini: “Teoso iokanatariko isãkire säpiretakari hĩtemoni nota iokanatin atokokana. Hĩte nirimanekeara iua. Hĩkenakotariko iua säkire,” itxa Moisesi. ³⁸ Moisesi aua Teoso nakitikorikata äparaã makipakaniãtaã. Aãtokiriakorini aua

iuakata. Apaka Teoso nitiri iaxitikiri aua iuakata. Iua Teoso nitiri misãkiretari Moisesi ixirata Sinai inakoriãtaã auakasaaki. Iua apakapari Teoso säkire, atemoni isikini ĩkapani. Iua Teoso säkire txĩkitakari iua säkire auĩãkani ätipirika auini Teosokata.

³⁹ —Aãtokiriakorini kona nirekari inĩkaenetinirina Moisesi säkire. ĩInirekarina iua. Inirekarina Exitomoni ikanapiriinina. ⁴⁰ Iuasaaki nino paniãtari Arão: “Teosoakori kamakoni pikaminaua, ate mĩkiikakani tĩkane. ĩKora Moisesi Exito tixini amakatxakakiri, ĩtapari iua? ĩAimarotari iua auiniãtaã,” itxarina Arãomoni. ⁴¹ Ininiã nino kamari kema auĩte äkiri atoko inakari oro kamakori iteosonetinina ĩkapani. Eereka okarina soti auĩte teoso ikamakitina isikinina ĩkapani. Kiiniri ikamana. Ipoxokoniuatana, kotxi ninoaka kamari iteosonena. ⁴² Txamari Teoso atão inakari takanapana nino. Ininiã iteosonetarina iaxiti auakani iõriki, kasiri, atokatxi pakini. Teoso säkire säpiretakani kitxakapirĩka iõkatsopataru ia säkiretxiti:

Hĩte Isaeokini, koarëta anokanani äparaã makipakaniãtaã hãuakasaaki, ĩhõkari pirãtxi nota ĩkapani.

⁴³ Iuasaaki hĩte anikari papiri aamata kamakori hĩteosone Moroki inakori ĩkapani. Apaka iõriki atoko inakari hĩteosone Hẽpaã inakori hĩkamakiti hanika hĩtekata iuasaaki. Hĩte kamari Moroki, Hẽpaã pakini hĩteosonetini ĩkapani. Ikara xika nota iokanataiko hĩte äti kãkiti tixinimoni. Papirõnia sitatxiti apikoxiti niokanatai hĩte.

Teoso Papire Pirena

⁴⁴ —Aãtokiriakorini auari papiri aamata kamakori Teoso misãkiretiko papire äparaã makipakaniãtaã auakasaakina. Moisesi kamari iua papiri Teoso paniãtakiti iaõka, kotxi Teoso oerekari Moisesi iua papiri kamiko. ⁴⁵ Moisesi ipinaka atoko apanakini aãtokiriakorini apakapari iua papiri irina sikakiti. Ininiã iuasaaki nino anikari iua papiri, Xosoeekata isikasaakina, äti uãka tixine imixirikasaakina, kotxi Teoso omitikana nino äti uãka, aãtokiriakorini apokasaaki iuaã. Iua papiri kaikota iuaã. Auapanika iuaã Tavii aãtokiriakorini auĩte inakasaakia. ⁴⁶ Teoso apokaerekataru Tavii, ininiã Tavii nirekari Xakoo Teosone misãkiretiko aikoti ikamini. ⁴⁷ Txama Teoso ĩauiritari Tavii kaminiri. Ininiã Saromão, iua äkiri kamari Teoso misãkiretiko aikoti.

⁴⁸ —Teoso Apiananiri kona aua aapokotxi kãkiti kamakiti äki, kotxi Teoso säkire säpiretakari kitxakapirĩka txari:

⁴⁹ Apiananiri txari: “Niitopãkiniãtaã iaxiti itxa. Itixi nikitiniãtaã. Ininiã kanatokopa itxa aapokotxi hĩkamini nota ĩkapani? Namonipa nauiniãtaã?”

⁵⁰ Kotxi notakara kamari ikinipoko,” itxa.

Erekari Matamatakoti Manirekakani

⁵¹ Estevão säkirauatapanika:

—Hĩte kona kinirão kenakotaka txari Teoso säkire. Hĩtsiki mata kisauakaãkapitika, txamari kona hĩke-

nakotari Teoso sákire hākixinireē. Ātipirika kona hinirekari Erekaru Matamatakoti paniātakiti hīkamini. Hātokiriakorini kitxakapirīka atokotxikana hīte. ⁵² Hātokiriakorini misiritana ikinimane Teoso sákire sápiretakani. Ninoa okana iua sákire sápiretakani, Erekarinoka Kamakari sápiretakani. Ninoa Teoso sákire sápiretakani sápiretari Erekarinoka Kamakari āti ōti uai apokini. Īkorasaaki hītera mīkapiritari iua. Hītera okari iua Erekarinoka Kamakari. ⁵³ Hītekara apakapapekari Teoso sákire Teoso nitiriakori mīkiti. Iuaritika Ihīkamari ipaniātakiti —itxa Estevão.

Estevão Kīporonakiko

⁵⁴ Xoteoakori kenakotakasaakiri Estevão sákire, omanākarauatana. Akatsakatsirītauana omanākarena xika. ⁵⁵ Iuaritika Erekaru Matamatakoti iteene sikataparaxiniretari Estevão. Iuasaaki iua ionakaāta iaxiti. Atamatari Teoso iotximere. Atamatari Xesosi timini Teoso kikomoni. ⁵⁶ Ininiā itxa:

—Hātamata. Natamatari iaxiti xorekini. Aītari iaxitiki tima Teoso kikomoni —itxa Estevão.

⁵⁷ Iuasaaki Xoteoakori totari ikenakokina iuaōāna. Iteene ninoa akiripoakata. Eereka ninoa ikinika miteka iuamoni. ⁵⁸ Imaīkarina. Ikosekaāpotarina sitatxi mapotōkire. Iuaāta ipotorikana ikiporonakinirina iua kai soroā. Iuasaaki itikarauatakani takari imākana Saoro inakori kiti takote inīkatini īkapani. ⁵⁹ Ikiporonakasaakirina, Estevão akiritari Teoso. Itxari:

—Apiananiri Xesosi, papakapariko nixinire.

⁶⁰ Iuasaaki ikapotoreēkaua. Itaparasaākiriritika akiritari Teoso:

—Apiananiri, pimaxinīkaretariko ia maerekati ninoa kamakiti —itxa.

Iuasaakipeka ipīpe.

Xesosi Sákire Auiākani Misiritiko

8 Estevão ipīkasaaki Saoro aua iuaā.

—Ari erekapitiki ipinini —itxa Saoro.

Estevão ipinini ōtisaakipeka ipotorika Xesosi sákire auiākani misiritiko Xerosareē. Ninoa iteene misiritaāka, ininiā ikinimane Xesosi sákire auiākani Xerosareē auakani iarika itxapena. Xotēia tōpamoni, Samaria tōpamoni pakini iarikana. Xesosi iokanatakininoka kaikota Xerosareē. ² Estevão ipinaka atoko kikiakori Teoso sákire auiākani katari iuani. Iteene itxiapatana.

³ Iuasaaki Saoro potorika ixipokinina Xesosi sákire auiākani. Ninoa aapokomoni isaāpota. Kikiākini, sitoakoro apaka ikosekaītota, taka itxana kateia āki.

Piripi Samariamoni Sini

⁴ Teoso sákire auiākani iarikasaaki, isápiretarina Teoso sákire ikini aapokotxitiā. ⁵ Piripi sari Samaria sitatxitimoni. Iuaā iua sápiretari kākiti Xesosi Teoso mereēkiti ininiua. ⁶ Isákire ikenakotakasaakina, posotiiretxi ikamakiti itikasaakina, iteene ikenakotarina isákire. Imixinikarina isápiretakiti. ⁷ Maerekani mata-matakoni kākiti auaītotakini takanapari kākiti.

Akiripoakatana ipokīkasaakina. Kaiāopokori matīpokatani apaka makananitaāka. ⁸ Ininiā Samaria auakani iteene poxokoniuata.

Mīiti Simão Inakori

⁹ Iuasaaki Samaria sitatxitiā aua kiki Simão inakori. Mīiti itxaua iua. Imisirienetana kākiti Samaria auakani. Ininiā ikinimane tsorīkaāta, ikamakiti atamatakasaaki. Iua iuikaua.

—Kimaroreno nota —itxa.

¹⁰ Ininiā ikinimane kīpitari iua sákire. Auītetxiakori, poiāorini pakini kīpitari isákire. Ininiā itxana:

—Iua Simão auari Teoso posotiire. Kaposotiireri iua —itxana.

¹¹ Ininiā ikīpitarina isákire, kotxi itokatapeka itikarina ikamakiti kākiti mimarotakiniti. ¹² Ninoa auikasaakiri Piripi sápiretakiti erekari pirena, Teoso auītetxi ininiāua pirena, Xesosi Kristo posotiire pirena pakini, kikiakori, sitoakoro apaka patxisataāka. ¹³ Iuasaaki Simão apaka auikari. Ipatxisataāka. Ininiā isari Piripi sinimoni, kotxi itsorīkaāta, posotiiretxi kākiti mimarotakiniti itikasaaki.

¹⁴ Xesosi iokanatakini Xerosareē auakani kenakopiretari Samaria auakani auikiniri Teoso sákire. Ininiā ninoa iokanataru Petro, Xoāo pakini Samariamoni. ¹⁵ Iuaā apokasaakina, imisákiretarina Teoso, Erekaru Matamatakoti isákire auiākani apakapini īkapani. ¹⁶ Erekaru Matamatakoti kona apokapanika ninoamoni iuasaaki. Apiananiri Xesosi uākaānanira ipatxisataākana. ¹⁷ Ininiā Petro, Xoāo pakini takari iuakona ninoa nopini. Iuasaakipeka apakaparina Erekaru Matamatakoti.

¹⁸ Simão itikasaakiri Erekaru Matamatakoti apokini kākitimoni, kinirāo sikaka itxaro txineiro Petro, Xoāo pakimomoni. ¹⁹ Ininiā itxa:

—Īkora hīposotiire hīsikano, niuako kākiti nopini nitakasaaki, Erekaru Matamatakoti ninoamoni apokini īkapani —itxa.

²⁰ Txamari Petro txari:

—Pite, pitxineirotekata samakauako, kotxi pite uākatari pitxineirote iamotiniri Teoso posotiire. ²¹ Kona xapiti pitemoni auapani ia parīkatxi, kotxi pākixinire na atāo Teoso apisatoō. ²² Ininiā pitakanapariko ikara pimaerekani. Pamanaāri Apiananiri pimaerekani imaktxakini īkapani. Atxiīti iua maxinīkaretari pixinikakiti pākixinireē. ²³ Nota imarotai pite. Pākixinireē xāpoākata maerekatinoka. Pimaerekani maīkai. !Auiritai pisini pinirekinimoni —itxa Petro.

²⁴ Ininiā Simão apakapapiretari:

—Pimisākiretariko Teoso nota īkapani. Ikara atoko pisápiretakiti na ninireka —itxa Simão.

²⁵ Petro, Xoāo pakini sápiretari Xesosi kamakiti ninoa īkapani. Isápiretarina Apiananiri sákire. Eereka ikanapiriāna Xerosareēmoni. Ikanapiriāpotakasaakina, isápiretarina Teoso iokanapirena erekari kaiāopokori aapokotxi auakanimoni Samaria tōpa.

Piripi Etxiópiakirikata

²⁶ Eereka Apiananiri nitiri iaxitikiri misākiretari Piripi: —Paiamatako. Atokatxi pokikinimoni pikikomoni pisako. Pisa kimaporimoni, āparaā makipakaniātaā. Iua kimapori Xerosareē Kasa tixinimoni sikari.

²⁷ Ininiā aiama, sipe itxari. Ipixinipokoriti aōkitari Etxiópia tixinikiri. Etxiópia auakani auite ōtākikakari itxaua. Paimatireri iua. Ikinimane kamari iua paniātakti. Etxiópia auakani auite sito Kātasi inakoro.

Kaiāopokoro otxineirote, otii pakini. Iua kiki parīka ikinipoko oa nakiti inīkata oa īkapani. Mitxi iua sari Xerosareēmoni Teoso imisākiretini īkapani. ²⁸ Ikanapiriākasaaki, mitekaī āki iitopākasaaki, atatsopatarī Isaía iōkatsopatakiti. Isaía Teoso sākire sāpiretakari kitxakapiriīka. ²⁹ Iuasaaki Erekarī Matamatakoti txari Piripi:

—Pisa okira mitekaīmoni. Pikaikota oa takote.

³⁰ Ininiā Piripi miteka iuamoni. Ikenakotakasaakiri Isaía iōkatsopatakiti atatsopatini, Piripi pimaāri:

—Pimarotatarī ere patatsopatakiti? —itxari.

³¹ Ininiā iua:

—Natokopa ininiāpa nimarotari? Kipa oerekano? —itxari.

Ininiā aiatarī Piripi mitekaī āki iuakata iitopākini īkapani. ³² Iua iōkatsopatarī ia Teoso sākire:

Soti auite okikomoni anikiko atoko itxa iua. Soti auite ākiri piti kisauakikosaaki, !kasākireri iua. Iua soti auite ākiri atoko itxa iua, kotxi iua apaka !kasākireri.

³³ Inapetaāka iua. !Atāoni kākiti kama iuamoni. Okaākape. !Auari iua ākiri.

Ikara atoko itxa Teoso sākire, Isaía iōkatsopatakiti.

³⁴ Ininiā iua Etxiópiakiri pimaāri Piripi:

—Pisāpiretano, natokopa itxa Teoso sākire sāpiretakari sākire? Kipa soti auite atoko inakari? Kipa okaāka? Iuakani? Ātikani?

³⁵ Ininiā Piripi oerekari ikara Teoso sākire iōkatsopatakori.

—Xesosira ikara atoko inaāka —itxa.

Ininiā apikomoni isāpiretari Teoso iokanapirena erekari, Xesosī pirena.

³⁶ Isaāpotakasaakina, apokana āparaā auiniātaā. Ininiā iua kiki txari:

—Uai aua āparaā. Apakata nipatxisatiko?

³⁷ Ininiā Piripi txari iua:

—Apakatapitika pipatxisatiko iteene pauikiniāri Xesosī sākire pākixinireē.

Ininiā iua apakapapireta:

—Nota auikapitikari Xesosī Teoso mereēkiti, Teoso ākiri ininiāua.

³⁸ Ininiā iua Etxiópiakiri paniātari mitekaī anikakari iotokini. Iuasaaki Piripi, iua Etxiópiakiri apaka katxaka, imaāta itxana. Ininiā Piripi patxisatari iua kiki.

³⁹ Ikanīkītakasaakina, Erekarī Matamatakoti anikari Piripi. Ininiā iua kiki kona atamataikari Piripi. Ininiā iāpotapitipo. Ipoxokoninoka itxa. ⁴⁰ Iuasaaki Asoto sitatxitipeka itokiā Piripi. Isaāpotakasaaki, ikinika aapokotxitiā isāpiretari Teoso sākire. Teoso sākire isāpiretiniritika Sesaréia sitatxitimoni apokako.

Saoro Auikiniri Xesosī Sākire

(Átosi 22.6-16; 26.12-18)

⁹ Iuasaaki Saoro okaenetapikana Apiananiri sākire auīākani. Ininiā iua sari sasetotxi auite apiatakari-moni. ² Amanaāri aātsopa Saoro parīka sāpiretiko aāt-sopati. Iua nirekari sasetotxi auite iōkatsopatiniri ikara, Saoro anikini īkapani. Inirekari isikiniri iua aāt-sopa ikinika aiko Xoteo apotiitiniātaāua nīkatakani-moni Tamásiko sitatxiti, kotxi Saoro nirekari imaīkinina Xesosī sākire auīākani, kikiakori, sitoakoro pakini, Tamásiko sitatxitiā apokakini. Inirekari anikinina Xerosareēmoni.

³ Iua apokaāpotakasaaki Tamásiko sitatxitimoni, kati-maritika iotximeretxi iaxitikiri ākitari. ⁴ Irika xitipe. Ininiā ikenakotari sākiretxi:

—Saoro, Saoro, kinirepa pimisiritano? —itxa ikenakotakiti.

⁵ Ininiā iua:

—Kiriparai Apiananiri?

Ininiā:

—Xesosira nota. Pimisiritakitikarano —itxa Xesosī.

⁶ Ikikinana, iteene ipīkarauatiniā.

—Apiananiri, kipa pinireka nikaminii? —itxa.

Ininiā Apiananiri:

—Pōkitikaua, sitatxi pisa. Iuaā āti sāpiretai pikamakiti tīkane —itxa Xesosī.

⁷ Imoianariakori iotoka. Ipīkarauatana. Masākireni-noka itxana. Ninoa kenakotari iaxitikiri sākire, txamari latamatarina.

⁸ Eereka Saoro ōkitikaua, xorekaāta itxa, txamari imosiāretapeka iua. Ininiā imoianariakori anikari iua. Ikanōpiāpotarina Tamásikomoni. ⁹ Ipi, āti pakini ōti mōsiāretika itxa. Iuasaaki linipokota. !Iāta.

Ananási Makananitiniri Saoro

¹⁰ Tamásiko sitatxiti aua kiki Xesosī sākire auīākari, Ananási inakori. Iuasaaki Teoso sākiraauata Ananásikata itaponemoni. Itaponē Apiananiri akiritari iua:

—Ereēkai Ananási —itxa.

Ininiā:

—Uaikarano nota, Apiananiri —itxari Teoso.

¹¹ Apiananiri txari:

—Paiamatako. Kimapori Ereīka āpori kimaporitimonī pisako. Xotasi aapokomoni pisa. Iuaā pinitari Taaso sitatxitikiri Saoro inakori. Uatxiikara isākiraunāta notakata. ¹² Saoro taponetai pite. Iua atamatai pite apokini iuamoni, piuako inopini pitakini īkapani iuaīkana kōsiārepeka inini īkapani —itxa Teoso.

¹³ Ininiā Ananási:

—Apiananiri, kākitipokoni sāpiretano ikara kiki pirena. Pamonōkoniri iua. Imisiritapekana pite nakitiakori Xerosareē sitatxiti auakani. ¹⁴ Sasetotxiakori auite paniātari iua imaīkinina piuāka akiritakani uai Tamásiko sitatxiti auakani —itxa Ananási.

¹⁵ Ininiā Apiananiri txari:

—Pisako iuamoni. Nota mereëpekari iua kiki, nota paríka ikamini íkapani. Iua sãpiretariko nota sãkire Xoteo minakonimoni, auítetxiakorimoni, Isaeo tixini auakanimoni pakini. ¹⁶ Noerekariko Saoro iteene atatsiirauatini nota sãkire auikini xika —itxa Teoso.

¹⁷ Ininiã Ananíasi sari Xotasi aapokomoni. Íiroã. Eereka iuako itaka Saoro nopini.

—Nitari Saoro, Apiananiri Xesosi, paõkitakitira kimaporiã, iuara iokanatano nota pitemoni kõiãrepeka iuaíkana pinini íkapani. Iokanatano nota pitemoni Erekar Matamatakoti papakapini íkapani —itxa.

¹⁸ Iuasaakipeka oki nopini auakari katxaka. Ximaki tãta atoko itxa. Kõiãrepeka itxa. Eereka õkitikaua. Iuasaaki ipatxisataãka. ¹⁹ Inipokotaka atoko, itapara auapeka.

Saoro Tamásiko Sitatxiti Auakasaaki

Saoro kaikota Tamásiko mapaõti Xesosi sãkire auíãkanikata. ²⁰ Iua sari aiko Xoteo apotiitiniãtaãua. Iuaã oerekarauata. Oerekari Xesosi Teoso ãkiri ininiãua. ²¹ Isãkire kenakotakani tsoríkaãta.

—Iua Saoro okana Xesosi uãka akiritakani Xerosareë auakani. Iua ina uaimoni Xesosi uãka akiritakani imaíkini íkapani, sasetotxi auíteakorimoni anikinina íkapani —itxana.

²² Saoro oerekarauatakasaaki, imaroãpotari Teoso imarore. Teoso sikaposotiireãpotari iua. Ininiã iteene imarotari Teoso sãkire, apanakini oerekini íkapani. Iua atoko ininiã, itaparaxinireritika oerekari Xoteoakori Tamásiko sitatxiti auakani Xesosi Teoso Mereëkiti ininiãua. Ininiã ninoa !imarotari apakapapiretinirina iua.

²³ Mapaõti atoko Xoteoakori sãkirauatakaka Saoro okinina íkapani. ²⁴ Saoro sãpiretaãka Xoteo aiamatapeka okinirina iua. Ninoa iãtapapikari sitatxi íronakikoãtaã okinirina tíkane. Íkanõka, pokamara iãtaparina iua.

²⁵ Iuasaaki íkanõka Xesosi sãkire auíãkani anikari iua sitatxi pirikeremoni. Iuaã Saoro ieretakaua kotari ãki. Pirikeri sonaã iokatxakarina Saoro kotari ãki sitatxi mapara. Iposo atoko imiteka Xerosareëmoni.

Saoro Xerosareë Apokini

²⁶ Saoro apokasaaki Xerosareë, inirekari Xesosi moianiakori imoianatini. Txama ikinikana píkari iua. Kona lauiritarina iua moianatinina ninoa, kotxi lauikarina iua atão auikiniri Xesosi sãkire. ²⁷ Iuaritika Panapee anikari iua Xesosi iokanakinimoni. Isãpiretana ninoa:

—Kimaporiã isikasaaki, Saoro aõkitari Apiananiri. Apiananiri misãkiretari iua. Tamásiko sitatxiti auakasaaki, itaparaxinireritika isãpiretari Xesosi sãkire kãkitimoni —itxa Panapee.

²⁸ Panapee sãkire ikenakotakasaakina, auikarina Saoro sãpiretakiti. Ininiã Saoro kaikota Xerosareë Xesosi sãkire auíãkanikata. Inirekinimoni isa Xerosareë. Isinimoni itaparaxinireritika isãpiretari Apiananiri Xesosi sãkire. ²⁹ Isãkirauata Xoteoakorikata, Kreko sãkire imarotakanikata. Inirekarina ninoa imarotiniri Xesosi

sãkire. Txamari inirekarina okinirina iua. ³⁰ Iuasaaki Xesosi sãkire auíãkani imaropiretari ninoa okaenetiniri Saoro, ininiã anikarina sitatxi Sesaréia inakorimoni. Eereka iokanatarina iua Taaso inakori sitatxitimoni.

³¹ Iuasaaki Xesosi sãkire auíãkani !imisiritaãkaika. Xotéia tõpa, Kariréia tõpa, Samaria tõpa pakini !auaika Xesosi sãkire auíãkani misiritiko iuasaaki. Erekar Matamatakoti sikataparaxiniretana ninoa. Kãkiti itoãpotari auikiniri Xesosi sãkire. !Ikamarina maerekati, kotxi iteene ipíkarina Apiananiri.

Enéias, Tókasi Pakini

³² Petro ianaxititakasaaki, iua sari Teoso sãkire auíãkanimoni Arita sitatxiti auakanimoni. ³³ Iuaã aõkitari kiki Enéias inakori. Iua matípokotakati itxaua. Oito anokananipeka !õkitikaua. ³⁴ Petro txari iua:

—Enéias, Xesosi Kristo makananitai. Põkitikaua. Pípirikari pisirimata —itxari matípokotakati.

Iuasaakipeka õkitikaua. ³⁵ Ikinipoko Arita sitatxiti auakani, Sarõ sitatxiti auakani pakini atamatari iua Enéias, ininiã itakanaparina imaerekanina. Iníkapiretarina Apiananiri sãkire.

³⁶ Áti sitatxiti Xopi inakoriã oãua sito Teoso sãkire auíãkaro, Tapita inakoro. Kreko sãkireë ouãka Tókasi otxaua. Oa kamapikari erekari. Omoianatana matxineiroteni.

³⁷ Arita auakani auikasaakiri Apiananiri sãkire, oa Tókasi amianata. Eereka oani opípe. Opípeka atoko, arokaítotaron, taka itxarina oíto itanokiri kooã. ³⁸ Xopi sitatxiti Arita sitatxiti takote, ininiã Xesosi sãkire auíãkani Xopi sitatxiti auakani kenakoenetari Petro Arita sitatxiti auiniã, iokanatana ipi kiki Petromoni, apinirina íkapani. Iokanapiretana:

—Pinapokako uai. Katima pitxako —itxana.

³⁹ Ininiã Petro aiamata. Ninoakata isa. Iua apokasaaki, anikarina itanokiri kooã. Ikinipoko tikinitakoni txiapanáta Petro takote. Ninoa oerekari Petro mãkatxi Tókasini kamakiti ninoa íkapani oãuakasaaki. ⁴⁰ Ininiã Petro iokanatana ninoa mapara. Eereka ikaportoreëkaua. Isãkirauata Teosokata. Eereka oamoni ikirioka. Itxaro:

—Tapita põkitikaua.

Iuasaakipeka xorekaãta otxa. Oãtamatakasaakiri Petro, oitopãka. ⁴¹ Ininiã imaíkaro ouako oõkitikiniua íkapani. Eereka iua akiritana Xesosi sãkire auíãkani, tikinitakoni pakini, oa auãki onini oerekini íkapani.

⁴² Ikini Xopi auakani imaropiretari Tókasi iuaíkana auãki onini, ininiãra itomaneri kãkiti auikari Apiananiri sãkire. ⁴³ Petro kaikota iuaã Xopi sitatxiti mapaõti. Iua kaikota Simão inakorikata. Iua Simão aamata kamakari.

Konério Tapone Pirena

10 Iuasaaki Sesaréia sitatxiti aua kiki Konério inakori. Áti uãka iua. Homano itxaua. Seí pakini sotato auíte iua. Kãkiti akiritana ninoa sotatoakori Itáriakini. ² Iua Konério kamari Teoso sãkire iaõka. Iua,

ikinipoko aapoko auakanikata paxitari Teoso. Imisäkiretapikari Teoso. Isikana matiitimoni inirekakitina.³ Áti õti kikatapeka inakasaaki itaponeuata.

Itaponeẽ itikari Teoso nitiri apokini iuamoni. Itxari:

—Konério —itxa.

⁴Teoso nitiri atamatakasaaki, ipĩkarauata.

—Apiananiri, kipa pinireka? —itxa Konério.

Ininiã Teoso nitiri txari:

—Teoso kenakotapekari pisäkire iuamoni. Itikapekari pisikarauatini matiinimoni. Teoso xinikapitikai.

⁵Ininiãkara átikaka kikiakori piokanata Xopimoni Simão Petro uaimoni imininina ĩkapani. ⁶Iua kaikota áti Simãokata, aamata kamakarikata. Iua aapoko potxoari uiniti takote aua. Iua Simão Petro sãpiretaiko pikamakiti tĩkane —itxa Teoso nitiri.

⁷Eereka iua Teoso nitiri sipe. Iposo atoko Konério akiritana ipi iniritiakori, átika isotatone pakini. Iua sotoato kamari Teoso sãkire iaõka. Iua auapika Konériokata, inireẽkiti ikamini tĩkane. ⁸Ininiã Konério sãpiretana ninoa ikinipoko Teoso nitiri sãpiretakiti. Iposo atoko iokanatanana Xopimoni.

Petro Tapone Pirena

⁹Katimatinĩkata Konério iokanatakini potorika. Apaniãxiti inakasaaki ninoa apokaãpota sitatxi Petro auiniãtaã. Iuasaaki Petro kanikauata aapokotxi nopini Teoso imisäkiretini ĩkapani.

¹⁰Iuasaaki Petro natxita. Inirekari inipokotini. Nipokori kamikosaaki, itaponeuata. ¹¹Itaponeẽ atamatari iaxiti xorekini. Aamata mitamatari katxakaãpota iuamoni. Imapotomatare ipi ipi pakini iaxirikaãka. Iua aamata katxaka xitimoni. ¹²Iua aamata áki aua ikini sereti kaxipirini. Aua pirãtxi. Aua ĩtopa auakani. Aua imini. Aua araãkani. ¹³Ininiã Petro kenakotari itanokiri sãkirauatini:

—Petro, põkitikaua. Pokari ia, pinikini ĩkapani —itxari Petro.

¹⁴Petro Xoteo itxaua, ininiã kona ikinika !inika. Ininiã Petro txari:

—Konapitini Apiananiri. Kona ninikari ikinipoko naia kaxipirini. Manaiatini. Pamininiri —itxa.

¹⁵Iuaĩkana itanokiri sãkirauata:

—Nota oeretakiti kona kamininiri kona pitxape —itxa.

¹⁶Ipi, áti pakinikata iua aamata katxaka ikara atoko. Iposo atoko ikanĩkaxitita Teoso tixinemoni.

¹⁷Ininiã Petro ákixinireẽ ixinikaxitita:

—Kanatokopa itxa ikara nitapone?

Iuasaakipeka Konério iokanatakini apokapekari Simão aapoko. Apokana Simão aapoko toremoni.

¹⁸Akiritana:

—Ereẽkai. Simão Petro uai aua atxĩĩti? —itxana.

¹⁹Iuasaaki Petro xinikapanikari itapone. Erekari Matamatakoti txari:

—Ikiraãkarana ipi, áti pakini kãkiti nitanãtai. ²⁰Põkitikaua. Pikatxaka xitimoni. Pisa ninoakata, kotxi niokanatanana ninoa uaimoni —itxa Erekari Matamatakoti.

²¹Ininiã Petro sari Konério iokanatakiniimoni:

—Notakara hĩte nitanãta. Kipa ĩkai hĩte?

²²Ninoa apakapapiretari iua:

—Konério, aãũte iokanataua ate. Erekari iua. Ika-mari Teoso sãkire iaõka. Ikinipoko Xoteo apokaerekatari iua. Teoso nitiri iaxitikiri paniãtari iua pite akiritini, pisäkire ikenakotini ĩkapani —itxana.

²³Ininiã Petro:

—Hĩĩroã. Uai himaka —itxa.

Konério Aapoko Auakasaakina

Katimatinĩkata Petro sari ninoakata. Apanakini Xesosĩ sãkire auĩãkani Xopikini sari apaka. ²⁴Katimatiniĩkata apokana Sesaréia sitatxiti, Konério auiniãtaã. Iua Konério apotiitapekana inirimane, aõkimanere pakini Petro iãtapinina ĩkapani. ²⁵Petro ĩroãkasaaki Konério aapoko, iua aõkitari Konério. Iuasaaki Konério kapotoreẽkua Petro apisatoõ. ²⁶Txamari Petro txari iua:

—Põkitikaua. Kiki pite atoko inakarikarano nota.

²⁷Isãkirauatakasaakina, Petro ĩroã. Aõkitari ito kãkiti apotiitakaniua. ²⁸Ininiã itxana:

—Hĩte imarotari ate kiomanekorini !auiritari Xoteo moianatiniri áti uãka. !Auiritaãka ate ĩroini hĩte atoko inakari aapoko. Iuaritika Teoso txano nota: “Na pakiritapiri áti uãka kanaari,” itxano. ²⁹Ininiã hĩte pĩkapi-retakasaakino nota, nimarotari atão nisini hĩtemoni.

Ininiã, kinirepa hĩte apakĩtakano nota? —Petro txari Konériomoni.

³⁰Konério apakapapiretari:

—Ipi, ipi pakini õti apisapanika nauanaãta naapoko.

Iuasaaki kona ninikari nipokori, Teoso nimisäkiretini ĩkapani. Kikatapeka inakasaaki, nimisäkiretakasaakiri Teoso, katimaritika kiki tokiã nota apisatoõ. Pomẽkoriri imãka. ³¹Itxano: “Konério, Teoso kenakotapekari pamanaãkiti. Ixinikari pisikarauatini matiinimoni.

³²Átikaka kiki piokanata Xopi sitatxitimoni Simão Petro inakori uaimoni imininina ĩkapani. Iua aua áti Simãokata, aamata kamakarikata. Simão aapoko potxoari uiniti takote.” ³³Iuasaaki nota apakĩtakai pite.

Peerekari papokini atemoni. Uatxa ate uai aua Teoso apisatoõ Teoso paniãtakiti pitemonikiri akenakotini ĩkapani. Ininiã pisãpiretauako —itxa Petromoni.

³⁴Ininiã Petro txari:

—Uatxa nimarotari atão inakari. Teoso sikari erekari ikininapemoni. Inirekari ikini uãka apokini iuamoni, inakitiakori ininiuana ĩkapani. ³⁵Teoso apakapari ikini itixiti auakani, iua paxitakani, atão inakari kamakani. Apakapari Xoteoakori. Apakapari Xoteo minakaniua apaka. ³⁶Himarotari Teoso iokanapirena Isaeo auakanimoni. Ikara erekari pirena sãpiretaua Xesosĩ Kristo xipokari Teoso omanatiniri kãkiti imaerekani xika, kãkiti erekaxinire inini ĩkapani. Ikinimane auĩte itxaua Xesosĩ. ³⁷Ikara Teoso iokanapirena himarota, kotxi iaripireta ikini Xotéia tãpa. Merepitipanika iaripireta Kariréia tãpa, Xoão patxisarauataka atoko. ³⁸Himarotari Xesosĩ Nasareekiri pirena. Himarotari Teoso sikari Erekari Matamatakoti iuamoni. Iteene isikapotsiire-

tari iua. Ikini tōpati isa erekari ikamini ĩkapani. Imakananitana Satanasi misiritakini, kotxi Teoso aua iuakata. ³⁹ Ateka itikari ikinipoko ikamakiti Xoteoakori tixine iua auakasaaki, Xerosareē sitatxiti auakasaaki apaka. Eereka aamina ĩpiriāmítakari nopini ninoa okari iuani.

⁴⁰ —Iuaritika ipi āti pakini ōtisaaki Teoso ōkitikari iua. Iuaka oerekaua kākítimoni ipĭpekarīika iuaĭkana aua inini. ⁴¹ Kona ikinipokoni atamatari iua. Teoso mereēkininanira atamatari iua. Iuaritika kaiāori iua atamatakani. Ininiā ate atamatari iua. Iua ōkitikaua atoko ate nipokota, iāriā aāta iuakata. ⁴² Iokanataua ate Teoso sākire asāpiretini ikini kākítimoni. Teoso mereēri iua, kākíti misiritiko mereēkari ininiua ĩkapani. Auākipanika inakani, ipĭkani pakini misiritiko mereēkari itxaua. ⁴³ Ikinipoko Teoso sākire sāpiretakani sāpiretari iua pirena. Ninoa txari: “Iua sākire auĭkani maerekani makatxakaāka” —itxa Petro.

Xoteo Minakanīua Patxisatiko

⁴⁴ Petro sākiraumatapanika inakasaaki, Erekari Mata-matakoti apoka ikinika Petro sākire kenakotakanimoni. ⁴⁵ Ininiā Petro moianariakori Xesosi sākire auĭkani kisauakatsikimatatakoni tsorīkaāta, kotxi Teoso sikari Erekari Matamatakoti Xoteo minakonimoni apaka. Ninoa tsiki mata likisauakaāka, iuaritika Erekari Mata-matakoti apoka ninoamoni. ⁴⁶ Ikenakotarina Xoteo minakanīua sākiraunanāta āti uāka sākireē.

—Peerekari Teoso. Apiananiri itxaua —itxanātana Xoteo minakanīua.

⁴⁷ Ininiā Petro txari:

—Ninoa Xoteo minakanīua apakapapekari Erekari Matamatakoti ate apakapiniri atokokana. Ininiā apakatapitika ninoa patxisatiko āparaaā. Kona kākítini iotokakana ipatxisatikona.

⁴⁸ Ininiā iua paniātana ninoa patxisatiko Xesosi Kristo uākaā. Iuasaaki ninoa aiatarī Petro:

—Atekata mapaōti pikaikota —itxarina.

Ininiā Petro kaikota ninoakata.

Petro Sāpiretakiti

11 Xesosi iokanatakini, Teoso sākire auĭkani Xotēia tōpa auakani apaka kenakotari Xoteo minakanīua auĭnirina Teoso sākire. ² Ininiā Petro kanapiriāksaaki Xerosareēmoni, kisauakatsikimatatakoni apoĭtari iua.

³ —Pite imaka itsiki mata makisauakakoni aapoko āki. Ninoakata pinipokota pitxa. !Apakata pikamakiti —itxarina.

⁴ Ininiā Petro sāpiretari ikinipoko itiākiti, ikenakotakiti pakini.

⁵ —Xopi sitatxiti nauakasaaki, Teoso nimisākiretakasaaki, nitaponemoni natapari mākatxi mata atoko inakari iaxiti katxakaāpotini. Ipi, ipi pakini imapotomatare iaxirikaāka. Iua apoka nota takote. ⁶ Iteene nimixinitari mākatxi mata āki auakani. Natamatari ikini sereti kaxipirini. Aua pirātxi. Aua ĩtopa auakani. Aua

imini, araākani pakini. ⁷ Iuasaaki nikenakotari sākiretxi iaxitiki: “Pōkitikaua. Oka, nika pitxako,” itxa. ⁸ Txamari nitxari iua: “Apiananiri, konapitini. !Ninikari nipokori mauritakoti ia atoko inakari, kotxi pamininiri,” nitxari.

⁹ —Iuaĭkana iaxitiki sākiraauata: “Teoso oeretakiti kona kamininiri kona pitxape.” ¹⁰ Ipi āti pakinikata iua aamata katxaka ikara atoko. Eereka ikinika kosekaāka iaxiti.

¹¹ —Iuasaakipeka ipi, āti pakini kikiakori Sesarēiakini apoka aapokotxi nikaikotiniātaā. Iokanataākana notamoni. ¹² Ininiā Erekari Matamatakoti paniātano: “Pisa ninoakata. Kona pipĭkarauatape,” itxa. Naia seisi aĭtariakori Xopikini moianatano nota iuasaaki. Ininiā ate ĩroā Konério aapoko. ¹³ Ininiā iua sāpiretaua ate, Teoso nitiri iaxitiki apoka iuamoni aapoko āki. Iua Teoso nitiri txari iua: “Piokanatarī kikiakori Xopimoni Simāo Petro inakori apinina ĩkapani. ¹⁴ Iua sāpiretaiko pite maerekani makatxakiko, paapoko auakani maerekani makatxakiko apaka.”

¹⁵ —Nipotorikasaaki nisākirauatini, Erekari Mata-matakoti apoka ninoamoni merepanika atemoni apokini atokotxikana. ¹⁶ Iuasaaki nixinikari Apiananiri sākire. Iua txari: “Xoāo patxisarauata āparaaā. Hĭte patxisataākako Erekari Matamatakotiā.” ¹⁷ Ininiā Teoso sikari Erekari Matamatakoti ninoamoni, atemoni isikini atokotxikana Xesosi Kristo Apiananiri sākire aāuikasaaki. Ikara atoko ininiā, !apakata Teoso ninaiatini —itxa Petro.

¹⁸ Petro sākire ikenakotakana atoko, !itsoataikana.

—Peerekari Teoso —itxana.

—Ininiā Teoso auiritari Xoteo minakanīua apaka imaerekanina itakanapinina, Teosokata ātipirika auinina ĩkapani —itxana.

Teoso Auĭkani Ātxiokia Sitatxiti Auakani

¹⁹ Estevāo ipinaāka atoko, Xesosi sākire auĭkani misiritaāka, ininiā ninoa iarika. Iariākani sari maioakari. Penísia tixinima, Xipri pokomiriĭtima, Ātxiokia sitatxitima pakinimoni isana. Ninoa oerekari Teoso sākire Xoteomoninani. ²⁰ Ninoa ātikaka Xiprikini, Sirenikini pakini sari Ātxiokia sitatxitimoni. Iuaā isāpiretarina Teoso iokanapirena erekari, Xesosi Apiananiri pirena, Xoteo minakonimoni ninoa apaka imarotini ĩkapani. ²¹ Apiananiri sikaposotiiretana ninoa. Ininiākara itomaneri kākiti auikari Apiananiri sākire. Maerekati itakanapana. Ikamarina Apiananiri nireēkiti.

²² Ikara apopireta Xesosi sākire auĭkanimoni Xerosareē sitatxitiā. Ininiā ninoa iokanatarī Panapee Ātxiokia sitatxitimoni. ²³ Iuaā iua apokasaaki, imarotakasaakiri ninoa apakapiniri erekari Teoso sikakiti, ipoxokoniua. Isikataparaxiniretana. Ōtākikana Apiananiri paniātakitinoka ikaminina ikini itaparaxiniretikana. ²⁴ Erekari Panapee. Ikinika Erekari Mata-matakoti paniātakiti ikama. Auikari Xesosi sākire ikini ixinireritika. Ikara atoko ininiā, itomaneri kākiti auikari Apiananiri sākire.

²⁵ Eereka Panapee sari Taaso sitatxitimoni, Saoro ininini ĩkapani. ²⁶ Itaōkitakasaakiri, iminari iua Ātxiokia si-

tatxitimoni. Áti anokanani ikaikotana iuaã Xesosi sãkire auiãkanikata. Oerekarina Teoso sãkire ito-maneri kãkitimoni. Xesosi sãkire auiãkani Átxiokia sitatxiti auakani merepitipanika takauãkataãka, “Kristopiki.”

²⁷ Iuasaaki átikaka Teoso sãkire sãpiretakani Xerosareëkini sari Átxiokia sitatxitimoni. ²⁸ Ninoa átika Ákapo inakori ókitikaua. Erekar Matamatakoti sãkire isãpireta:

—Natxinoka auako ikini itixiti —itxa.

Ikara isãkire apokapeka Kráotxio Homano auíte inkasaaki.

²⁹ Ininiã ikinika Xesosi sãkire auiãkani nirekari txineiro iokanatinini itariakorimoni Xotéia tõpa auakanimoni. Ito auinina, ito iokanatanana. Poiãonoka auinina, poiãonoka iokanatanana. ³⁰ Panapee, Saoro pakini anikari isikakitina. Isikaro oa txineiro Xotéia tõpa auakani ótãkikakanimoni.

Xesosi Sãkire Auiãkani Misiritiko Iuaãkana Apokini

12 Iuasaaki auítetxi, Erotxi inakori, misiritana Xesosi sãkire auiãkani. Átikaka itaka kateia áki. ² Iua okapiri Txiako iouata mitaroã. Iua Txiako Xoão itari. ³ Erotxi imarotakasaakiri Xoteoakori apokaerekatini Txiakoni okiko, ipaniãtari Petro maãkiko. Imaãkari Petro Xoteoakori kiiniritesaaki, pão miãtiãkati kiiniritisaaki. ⁴ Petro imaãka atoko itakari iua kateia áki. Ipaniãtari tesiseisi sotatoakori nãkatiniri iua. Kiiniri xipoka atoko Erotxi nirekari imereiniri imisiritiko ikini-mane apisatoõ. ⁵ Ininiã Petro kateia áki kaikota. Iuasaaki Xesosi sãkire auiãkani átipirika misãkiretari Teoso Petro ãkapani.

Petro Sikakaãka

⁶ Íkanõka, imisiritiko imarotini óti apisapanika, kateia áki Petro imakanãta ipi sotato apanãkaki. Iaxirikiko tsapi metao kamakori ipi. Aua apaka apikomoni sotatoakori kateia toreãtaã, Petro mamitekakani ãkapani. ⁷ Patimari Teoso nitiri tokiini. Tirikapi ponika kateia áki. Iuasaakipeka Teoso nitiri õpirãkari Petro.

—Põkitikaua. Katima pitxako —itxari.

Iuasaakipeka itsapi iaxirikiko iuakoãkiri katxaka.

⁸ Teoso nitiri paniãtari:

—Pimãka pieretaka. Pikiti mata pitaka, ininiã Petro takari. Pimãka pinopinikiri apaka pitaka, eereka pisa notakata —itxa.

⁹ Ininiã Petro sari iua tikini. Kateia ipokãkana. Iuasaaki Petro uãkataritaponeuatini. !Imarotari atão Teoso nitiri mipokãkiniri iua. ¹⁰ Eereka inapari ipi sotatoakori auiniãtaã, apoka itxana itore maparakiri metao kamakori. Iuaãtaã napakari sari sitatximoni. Ikara itore iuaka matakakaua. Ininiã ninoa pokãka. Iua ahoa mapotõkire apokasaakina, katimaritika Teoso nitiri takanapari iua. ¹¹ Iuasaaki Petro imarotapekari:

—Na nitaponeni itxa. Atãopitikara Apiananiri iokanataritini itixinekiri nota imakaxakani ãkapani. Pataparari Erotxi, iuaritika Apiananiri makatxakano.

Xoteoakori nirekari okinino, iuaritika Apiananiri makatxakano —itxa.

¹² Ikara ixinika atoko, isari Maria aapokomoni. Xoão Marko inakori inoro oa Maria. Iuaã itomaneri kãkiti apotiitapekaua, Teoso imisãkiretinina ãkapani. ¹³ Maria aapoko apokasaaki, akirita. Átokoro Hotxi inakoro sari itoremoni. Okenakotari Petro sãkire. ¹⁴ Oimaro-takasaakiri Petro mapara apokini, omiteka iriko áki aapokotxi áki auakanimoni. Opoxoniuata, txamari omaxinãkaretari itore oatakakani Petro ãkapani. Ininiã otxari apanakinimoni:

—Aapokotxi toreãtaãpekari Petro —otxa.

¹⁵ Ininiã ninoa:

—Pimapitxirita.

—Atãopitikara nisãkire —otxa oa.

Ininiã ninoa:

—Petro kamiritekara.

¹⁶ Ninoa ikara atoko inaãtakasaaki, Petro mapara akirinãtapanikana ninoa. Eereka ninoa matakakari itore, atamata itxarina.

—Kanatokopa pitakanapari kateia? —itxarina.

¹⁷ Ininiã iuakoã ipinitana:

—Hãkenakotari nisãkire —itxana.

Eereka isãpiretana:

—Apiananiri makatxakano nota kateia áki. Ikinika ikara hããpiretariko Txiako, apanakini aãtariakori pakini —itxa.

Iuasaaki isipe. Átiãtaã isa.

¹⁸ Katimatinãkata sotatoakori kateia nãkatakani tsoãkaãta:

—Íteri iua Petro? Kanatokopa itxa Petro pokãkini? —itxana.

Initapiimarina Petro. ¹⁹ Ininiã Erotxi paniãtana initiko, txamari lapokarina. Erotxi pimaãna sotatoakori Petro nãkatakani, Petro sinimoni imarotinina ãkapani, txamari ninoa !imarotari Petro sinimoni. Ininiã eereka ipaniãtari ninoa sotatoakori okiko Petro mitekini xika.

Ikara atoko inaãka atoko Erotxi sipeka. Xotéia tõpa ipotorika. Sesaréia sitatxitimoni isa.

Erotxi Ipinini Pirena

²⁰ Erotxi omanatanana Txiro sitatxiti auakani, Sitoõ sitatxiti auakani pakini. Ninoa nirekari iua omanatinina xipokini, kotxi ninoa apakapari nipokori Erotxi tixinekiri. Ininiã ninoa sãkirauata Parásito inakorikata. Iua Parásito nãkataritari Erotxi aapoko, itii pakini. Paimatireri iua. Ninoa sãkirauatakasaaki iuakata, iua auikari ninoa sãkire. Eereka Erotximoni isana neenamtxi xipokini ãkapani. ²¹ Erotxi ketotari ikinimane kãkiti imisãkiretinini ãkapani. Iketo óti apokasaaki ieretakari imãka ereri inakari, auítetxi mãka. Eereka iitopãka auítetxi itopanere nopini. Iuaã iua misãkiretana kãkiti. ²² Ininiã kãkiti txari:

—Teosora sãkirauanãta. Na kãkitini —itxana.

²³ Iuasaakipeka Teoso nitiri iaxitikiri okari Erotxi, kotxi iua auiritari kãkiti iteasonetiniri iua. Ininiã tsoni sotakiperi nika txari íto. Ikara atoko inikoã ipípe.

²⁴ Iuasaaki Teoso sáikire iaripireta. Ininiã itomaneri káikiti auikari Teoso sáikire.

²⁵ Panapee, Paoro pakini paríka Xerosareë sitatxitiã xipokaãka atoko, Átxiokia sitatxitimoni kanapiriã itxana. Anikarina Xoão Marko ninoakata.

Panapee, Saoro Pakini Mereíko

13 Xesosi sáikire auiãkani sauaki Átxiokia sitatxitiã aua Teoso sáikire sápiretakani, Teoso sáikire oerekakani pakini. Aua Panapee. Aua Simão “Pomamari.” Aua Arósio Sirenikiri. Aua Manaeë. Auítetxi Erotxi inakori xapitipanika inakasaaki, iua Manaeë xapitipanika inakasaaki, imakananitaãka Erotxikata. Apaka Saoro aua Átxiokia sitatxitiã. ² Áti õti Xesosi sáikire auiãkani iuaãtaã takanapari inipokotinina Apiananiri imisáikiretinina íkapani. Iuasaaki Erekar Mata-matakoti txana ninoa:

—Himakatxakana Panapee, Saoro pakini paríkatxi ikaminina nota íkapani —itxa Erekar Matamatakoti.

³ Ininiã ninoa takanapari inikini Teoso imisáikiretini íkapani. Iposo atoko itakarina iuakona Panapee, Saoro pakini nopini. Iokanatana ninoa Erekar Matamatakoti paniãtakiti ikaminina íkapani.

Xipri Pokomiríiti Pirena

⁴ Erekar Matamatakoti iokanatana Panapee, Saoro pakini, ininiã ninoa sari Sereósia sitatxitimoni. Iuaã ninoa iereëtaua maporo áki. Isana Xipri pokomiríitimoni. ⁵ Saramina sitatxitiã apokasaakina, isápiretarina Teoso sáikire aiko áki Xoteo apotiitiniãtaãua. Xoão Marko inakori moianatana ninoa iuasaaki.

⁶ Xipri pokomiríiti ípirixititana. Paposi sitatxitimoni isana. Iuaã itaõkitarina kiki Xoteo. Miíiti itxaua. Iuãka Paxesosi. Áti iuãka Erimasí.

—Teoso sáikire sápiretakarikarano nota —itxa iua.

Txamari na atão isáikire. ⁷ Iua moianatari Xipri auakani auíte Séxio Paoro inakori. Paimatireri iua Séxio Paoro. Iua akiritana Panapee, Saoro pakini iuamoni Teoso sáikire ikenakotini íkapani. ⁸ Txamari Erimasí linirekana ninoa. !Inirekari Séxio Paoro auikiniri atão Teoso sáikire.

⁹ Iuasaaki Erekar Matamatakoti iteene sikaimaroretari Saoro (ãti iuãka Paoro,) ininiã iteene atamatari iua miíiti. ¹⁰ Itxari iua:

—Pite Satanasí ákiri pitxaua. Pite atão kamakari mokaiakari pitxaua. Pite kamari ikini sereti maerekati. Ikara atoko ininiã, pimisirienetari káikiti. Atão inakari Apiananiri sáikire pite nirekari pimamakini. ¹¹ Ikara pimarekani xika Teoso misiritaito pite uatxa. Mõsiãreti pitxauako. Kona patamatapaniri atokatxi mapaõti.

Iuasaakipeka katxiãri atoko inakari, ipiã apaka apoka Erimasimoni. Ininiã iua nitari áti anikakiri íkapani.

¹² Séxio Paoro atamatakasaakiri Erimasí misirititiko, iua auikari Teoso sáikire. Itsoríkaãta:

—Peerekari Paoro oerekakiti sáikiretixi Apiananiri pirena isápiretakiti —itxa.

Átxiokia Sitatxiti Pisítxia Tixini

¹³ Iposo atoko Paoro imoianariakorikata iereëtaua maporo áki. Paposi itakanapana. Pexi sitatxitimoni, Pápiria tixini isana. Pexi sitatxiti auakasaakina, Xoão Marko takanapana ninoa, Xerosareëmoni ikanapiriini íkapani. ¹⁴ Eereka iuaíkana maporo áki iereëtauana. Isana Átxiokia sitatxitimoni, Pisítxia tixinimoni. Átxiokia sitatxiti auakasaakina tomatiko õtisaaki íroãna aiko Xoteo apotiitiniãtaãua. Iuaã iitopãkana. ¹⁵ Teoso paniãtakiti aãtsopateë, Teoso sáikire sápiretakani iõkat-sopatakiti aãtsopateë pakini atatsopataãka atoko auítetxiakori iuaãtaã auakani txana ninoa:

—Áitariakori, ate nirekari híšákiruatini, híšáikire auiniã, naia káikiti híšikataparaxiniretini íkapani —itxana.

¹⁶ Ininiã Paoro õkitikaua. Ókatari iuako ninoa sákiruatini iotokakinina íkapani. Ininiã itxa:

—Nitariakori Isaeo auakanii, apaka híte Xoteo minakanuia Teoso paniãtakiti kamakanii, híkenakotariko nisáikire. ¹⁷ Isaeo auakani Teosone mereëna aãtokirikorini Exito tixini auakasaakina, áti uãkataka auakasaakina. Itxíkitakana ninoa itomane ininina. Iuasaaki Exito auakani misiritana. Ininiã eereka Teoso makatxakana iposotiireë, ininiã itakanaparina Exito tixini.

¹⁸ —Eereka, koarëta ano Teoso míteenekana ninoa áparaã makipakaníãtaã, kotxi ikamapikarina maerekati iuaã. ¹⁹ Eereka ixipokana setxi pakini áti uãka Kanaã tixini auakani. Eereka isikari iua itixi ninoamoni átipirika iuaã auinina íkapani. ²⁰ Eereka Teoso sikana kõtãkikarerini Isaeo auakani auíteakori tíkane. Áti kõtãkikareri aua. Eereka iua ipina. Eereka átipekana kõtãkikareri aua. Eereka iua ipina. Itxaãpotana koatrosëtosi síkoëta anokanani. Imapotõkire, Samoeo inakori Teoso sáikire sápiretakari ninoa õtãkikakari itxaua.

²¹ —Eereka ninoa nirekari auítetxi apiatakari ninoa auíte ininua íkapani. Ininiã Teoso sikana ninoa Saoo inakori, Kixi ákiri. Iua atokiri kitxakapiriã Pëxamí inakori. Iua Saoo ninoa auíte apiatakari koarëta anokanani. ²² Eereka Teoso makatxakari Saoo. Itxíkitakari Tavii ninoa auíte apiatakari ininua. Teoso sápiretari Tavii pirena: “Káikiti Tavii Xesee ákiri atoko inakari ninireka, kotxi iua kamari ikinika ninireëkiti,” itxa Teoso.

²³ —Teoso sikaenetari áti, Tavii apika mekani Isaeo auakanimoni. Isaeo auakani maerekani makatxaãkari itxauako. Iua Xesosikara. Iua káikiti maerekani makatxaãkari txaua. ²⁴ Xesosi paríka ipotorkini apisapanika, Xoão sápiretari ikinimane Isaeokini imaerekanina itakanapinina, eereka ipatxisataãkana. ²⁵ Xoão paríka ixipokasaaki, ipimaãna ninoa: “Kipa híuãkatatano nota? Nota kona iua hiãtapakitini. Iuaritika iua ina nota tikini. Nota poiãori, ininiã !apakata iua takote napokini ikiti mata nimakatxakini íkapani, kotxi iua Apiananiri,” itxa Xoão.

²⁶ Paoro sákiruatapanika:

—Nitariakori, Apraão apika mekaniriakorii, apaka hïte Xoteo minakanuia Teoso paniãtakiti kamakanii, hïkenakota. Hïtemonikari Teoso iokanitari iokanapirena kãkiti maerekani makatxakiko pirena.²⁷ Xerosareẽ auakani, ninoa auïteakori pakini kona imarotari Xesosi Teoso ãkiri ininiua. Ninoa atatsopatarari Teoso sãkire sãpiretakani sãkire ikini tomatiko õti, iuaritika !imarotarina ninoa sãkire.²⁸ Ninoa kona apokari ixika Xesosi okiko ïkapani, iuaritika ipaniãtari Pirato okiniri.²⁹ Ninoa kamari Xesosimoni ikinipoko mitxi Teoso sãkire iõkatsopatakori iaõka. Iposo atoko imakatxakarina iua aamina ïpiriãmitakariã. Ikata itxarina kai iriko ãki.³⁰ Iuaritika Teoso õkitikari iua ipïkitximonipeka auakaripeka.³¹ Õkitikaãka atoko, ito õti kãkiti atamatarari iua. Kariréiakini, iuakata Xerosareẽmoni sikani aõkitari iua. Ininiã Xesosi iuaïkana auini pirena sãpiretakani itxauana ninoa Xesosi aõkitakani. Isãpiretarina apanakini Isaeo auakani.

³² —Ininiã uatxa ate sãpiretari Teoso iokanapirena erekari hïtemoni. Ikara sãkiretxiti Teoso kamaenetakiti aãtokiriakorinimoni kitxakapirïka.³³ ïkorsaaki Teoso kamapekari ikara ikamaenetakiti ate ïkapani, ninoani apika mekaniriakori ïkapani, kotxi iua õkitikari Xesosi ipïkasaaki, iuaïkana auãki inini ïkapani. Kitxakapirïka Teoso sãkire iõkatsopatakori Xikari ipiãtaã sãpiretari Xesosi õkitikiniua õti, kotxi itxari:

Pite namarite. Ia õti noerekari kãkiti pite iri nininiua nota.

³⁴ —Kitxakapirïka Teoso sãpiretapekari iua õkitikiniua Xesosi ipïkasaaki, iuaïkana imapinakani tïkane, kotxi isãkire iõkatsopatakori txari:

Nikamaenetakiti Taviiimoni pitemonikara nikama. Ikara erekari nikamapitikako pitemoni.

³⁵ Teoso sãkire iõkatsopatakori Xikari tesiseisiãtaã txari:

Teoso kona auiritari Erekarari Kamakari ïto paiakini.

³⁶ —Kitxakapirïka Tavii auakasaaki, ikamari Teoso nireëkiti, kotxi inirimane auïte itxaua. Eereka ipïpe. Ikatapeëka. Inirimanekata ikatapeëka, ininiã ïto paia-ka.³⁷ Xesosipekana, Teoso õkitikari iua. Iua ïto kona paiaka.³⁸ Ininiãkara nitariakori himarotariko ia.³⁹ Xesosi sãkire auïãkani maerekani makatxakaãka. Erekarini ninoa. Moisesi paniãtakiti kamiko kona makatxakari kãkiti maerekani.⁴⁰ Erepaniko. Kitxakapirïka Teoso sãkire sãpiretakani sãkire iaõka atxiïti apoka hïtemoni, kotxi⁴¹ ia atoko itxana:

Hïkenakota, hïte Teoso sãkire napetakanii. Hãtamarariko niposotiire, iuaritika hïpinako, kotxi !hãuikari nïparïka hïte sauaki. ãti sãpiretiniãri nïparïka, iuaritika !hãuikari.

Ikara atoko itxa Paoro sãkire ninoamoni.

⁴² Xoteoakori pokïkasaaki Xoteo apotiitiniua aapokotxiti, iuasaaki Xoteo minakanuia aiatana Paoro, Panapee pakini iuaïkana tomatiko õti ïkari Teoso sãkire isãpiretinina ïkapani.⁴³ Kãkiti apotiitakanuia potorika atoko, itomaneri Xoteo, Xoteo minakanuia Teoso sãkire auïãkani pakini sari Paoro, Panapee pakinikata. Paoro, Panapee pakini misãkiretana ninoa.

Õtãkikana ninoa, ikiniõtika atão ikaminina, kotxi Teoso iteene turetana ninoa.

⁴⁴ Ininiã ãti tomatiko õtisaaki ikinimane iua sitatxiti auakani apoka Apiananiri sãkire ikenakotinina ïkapani.⁴⁵ Xoteoakori atapari itomaneri kãkiti apokaãpotini Paoro, Panapee pakini sãpiretakiti ikenakotinina ïkapani. Ininiãkara ninoa xikotana Paoro, Panapee pakini. Imisãkirepiretana ninoa:

—Na atão Paoro sãkire. !Apakata isãkire —itxanãtana.

⁴⁶ Iuasaaki Paoro, Panapee pakini itaparaxinireritikana isãkirauatana.

—Ate sãpiretari Teoso sãkire hïte Xoteoakorimoni merepitipanika. Ikara atão. Txamari hïte linirekari. Hïte atxiïti !nïrekari ãtipirika auãki hinini? Ikara atoko ininiã, ate sariko Xoteo minakonimoni,⁴⁷ kotxi Apiananiri paniãtaua ate ia atoko:

Tirikapi atoko inakari hïtxauako Xoteo minakanuia ïkapani nisãkire atão ninoa imarotini ïkapani, ninoa maerekani nimakatxakini ïkapani, ikini itixiti auakani ikara imarotini ïkapani, —itxa Paoro.

⁴⁸ Xoteo minakanuia kenakotakasaakiri ikara Paoro sãkire, ipoxokoniuatana. Ininiã ninoa:

—Peerekari Apiananiri sãkire —itxanãtana.

Teoso mereëri kãkiti ãtipirika iuakata auini ïkapani, ininiã iuasaaki kãkiti kenakotakasaakiri Paoro sãkire, ninoa Teoso mereëkini auikari iua sãkire.

⁴⁹ Iuasaaki Teoso sãkire iaripireta ikinipoko iua tixini.

⁵⁰ Txamari Xoteoakori !apokaerekatarari Xoteo minakanuia auikiniri Xesosi sãkire. Ininiã isãpiretarina aãpirena sitoakoro apiatakani Teoso paxitakanimoni, sitatxi auakani auïteakorimoni pakini. Ininiã ikara xika ninoa omanatana Paoro, Panapee pakini. Ininiã iokanatanã ãtiãtaã isinina.⁵¹ Ininiã Paoro, Panapee pakini takanapari iuaã. Itakanaparina kipatxi ikiti mataã auakari apaka, kotxi kona ninoa nirekaikari Teoso sãkire. Ininiã isana Ikónio sitatxitimoni.⁵² ãtxiokia sitatxiti auakani Xesosi sãkire auïãkani poxokoniuata. Iteene ikamarina Erekarari Matamatakoti nireëkiti.

Ikónio Pirena

14 Paoro, Panapee pakini auakasaaki Ikónio sitatxitiã, isana aiko Xoteo apotiitiniãtaãua. Isãpiretarina Teoso sãkire kãkitimoni, ininiã kaiãopokori Xoteoakori, Xoteo minakanuia pakini auikapiretari Teoso sãkire.² Txamari apanakini Xoteoakori Teoso sãkire mauïãkani kamaomanãkaretana Xoteo minakanuia. Ininiã ninoa omanatana Teoso sãkire auïãkani.³ Xesosi iokanatakini Paoro, Panapee pakini okanani auana Ikónio sitatxiti. Ninoa sãpiretari Apiananiri pirena itaparaxinireritikana. Isãpiretarina Apiananiri sakiniri ikinipoko erekari maerekanimoni. Apiananiri oerekari isãkirena atão inini, kotxi isikaposotiiretana ninoa, posotiiretxi, kãkiti mimarotakinini pakini ikaminina.⁴ Kãkiti sitatxi auakani omanatakakana. Apanakini auikari Xoteoakori sãkire. Apanakini auikari Xesosi iokanatakini sãkire.

⁵ Ininiã Xoteo minakaniua, Xoteoakori pakini, ninoa auíteakorikata imisãkiretakakaua Xesosi iokanatakini imisiritinina ĩkapani, kai soroã ikiporonakinina ĩkapani. ⁶ Paoro, Panapee pakini kenakotakasaakiri ikiporonakikona pirena, imitekana. Arisitara sitatxitimoni, Tepi sitatxitimoni, Arikaónia tixini isana. ⁷ Iuaã isãpiretarina Teoso iokanapirena erekari kãkitimoni.

Arisitara Pirena

⁸ Arisitara sitatxiti aua kiki petokakititari iusaaki. Matĩpokotakati. Iponaniãkasaaki, ipetokakititapeka. ⁹ Ikenakotakasaakiri Paoro sãkire, Paoro atamatari iua. Iusaaki Paoro imarotari iua kiki auikapiretiniri Xesosi sãkire erekape inini ĩkapani. Ininiã iteene atamatari iua. ¹⁰ Itapasãkিরeritika Paoro txari iua: —Põkitikaua. Pitima —itxari. Ininiã iusaakipeka õkitikaua, tĩpokota itxa. ¹¹ Iuasaa ki kãkiti itikari Paoro kamakiti. Ininiã ninoa akirikata isãkireña, Arikaónia tixini auakani sãkireẽ: —Teosoakori apoka atemoni. Kikiakori atoko itxana ninoa.

¹² Ninoa takauãkatari Panapee, Xópite ininiua. Itakauãkatari Paoro Mekório ininiua, kotxi apiata isãkirauata. Panapee poiãoka isãkirauata. Xópite, Mekório pakini teosoakori kamakoni uãka. ¹³ Sitatxi ĩronakikoãtaã takote aua Xópite misãkiretiko aikoti. Xópite misãkiretakani auíte iusaaki minari kema auíteakori, aãui kaiãori pakini sitatxi ĩronakikoãtaãmoni. Iuaã iua apanakini kãkitikata nirekari kema auíte okinina Paoro, Panapee pakini ĩkapani, iteosone ĩkapani okinirina atokotxikana. ¹⁴ Panapee, Paoro pakini imarotakasaakiri ikamakitina tĩkane, imatsorakitarina ninoaka mãka, kotxi Teoso !itxauana.

Ninoa kãkiti itomanerimoni imitekana. Itapasãkিরeritikana itxana:

¹⁵ —Kãkiti, kinirepa ĩkora atoko hĩtxa? Hĩte kikiãkini atokokanera atxa ate. Ate uai apoka teoso kãkiti kamakiti hĩtakanapini ĩkapani, atão Teoso himarotini ĩkapani, kotxi atão Teoso auapininiika inakari itxaua. Iua kamari iaxiti, iaxiti auakani, itixi, itixi auakani, potxoari uiniti, potxoari uiniti ãki auakani pakini. ¹⁶ Kitxakapĩka Teoso auiritana ikinipoko kãkiti inirekaãkitina ikaminina. ¹⁷ Iua Teoso ininiua sãpiretakari kaiãopokori auapika, kotxi erekari Teoso sikakiti kãkitimoni oerekari iua Teoso ininiua. Teoso sikari ãparaã iaxitikiri kãkitimoni. Iua ãparaã oerekari iua Teoso ininiua. Takari kikiõ auakari iua sikakiti erekari apaka oerekari kãkiti iua Teoso ininiua. Teoso sikari nipokori ikini sereti kãkitimoni. Ikara oerekari iua Teoso ininiua. Iua sikapoxokonitari aãkixinire. Ikara apaka oerekari iua Teoso ininiua.

¹⁸ Ikara atoko itxana Paoro, Panapee pakini, iuaritika kãkiti nirekapanikari okiniri kema auíte Paoro, Panapee pakini ĩkapani. Itapararitika Paoro, Panapee pinitana ninoa, ininiã !ikamarina. ¹⁹ Eereka Xoteoakori Átxiokia sitatxitikini, Ikónio sitatxitikini pakini apoka Arisitara sitatxitimoni. Ninoa kãkiti misãkiretana Arisitara auakani. Imisãkireporetana Paoro, Panapee pakini,

ininiã Arisitara auakani auikari ninoa sãkire. Ininiã ikiporonakarina Paoro kai soroã. Eereka ikosekaĩtotarina iua sitatxi mapotõkire. Ninoa uãkatari iua ipĩpe. ²⁰ Iuaritika Xesosi sãkire auĩãkani apotiitakasaakiuu iuakata, Paoro õkitikaua. Sitatximoni kanapiriã itxa. Katimatinĩkata Paoro, Panapeekata sari Tepi sitatxitimoni.

Ikanapiriãna Átxiokiamoni, Síria Tixiniã

²¹ Paoro, Panapee pakini sãpiretari Teoso iokanapirena erekari Tepi sitatxiti auakanimoni. Ninoa oerekari kaiãopokori kãkiti. Eereka Arisitara, Ikónio, Átxiokia pakini sitatxitimoni ikanapiriãna. ²² Iuaã oerekana kãkiti Teoso sãkire iteene imarotinina ĩkapani. Ôtãkikana ninoa Teoso sãkire iaõka ãtipirika ikaminina. Ia atoko Paoro, Panapee pakini oerekana ninoa: “Teoso aãuítetakasaaki, amisiritiko kaiãopokori amĩteenekako.”

²³ Ikinipoko Xesosi sãkire auĩãkani apotiitiñãtaãua Paoro, Panapee pakini mereña ninoa ôtãkikakani. Ninoa kõtãkikarerini iteene auikari Apiananiri sãkire. Paoro, Panapee pakini misãkiretari Teoso ninoa ĩkapani. Nipokori itakanapa Teosokata isãkirauatini ĩkapani iusaaki.

²⁴ Eereka isipekana. ĩpirixitarina Pisĩtxia tixini. Eereka Pãpĩria tixinimoni isana. ²⁵ Isãpiretarina Teoso iokanapirena erekari Pexi sitatxiti auakanimoni. Eereka isana Atária tixinimoni. ²⁶ Iuaã iereẽtaua maporo ãki Átxiokia sitatxitimoni isinina ĩkapani. Iuaã Átxiokia sitatxitiã mitxipeka ninoa iokanataãka Teoso parĩka ikaminina ĩkapani. Iuaãtaã Xesosi sãkire auĩãkani misãkiretari Teoso ninoa ĩkapani, Teoso iteene nĩkatinina ĩkapani. Ikara parĩkatxi iposope ninoa kamini.

²⁷ Átxiokia sitatxiti apokasaakina, Xesosi sãkire auĩãkani imakinika apotiitaua ninoakata. Ininiã Paoro, Panapee pakini sãpiretari ikinika Teoso kamakiti. Isãpiretarina Teoso auiritinina Xoteo minakaniua apaka auikiniri Xesosi sãkire. ²⁸ Paoro, Panapee pakini auapokota iuaã Átxiokia sitatxitiã Xesosi sãkire auĩãkanikata.

Teoso Takaõtxikare Pirena

15 Átikaka kikiakori Xotéia tõpakini apoka Átxiokia sitatxitimoni. Ninoa oerekana Xesosi sãkire auĩãkani:

—Moisesini paniãtaua Teoso takaõtxikare aĩtoã atakini. Txamari hĩte !hĩtakari, ininiã Teoso !imakatxakari himaerekani —itxana ninoa.

² Paoro, Panapee pakini txana ninoa:

—Na atão hĩte sãkire. Teoso takaõtxikare ninoa ĩtoã !auari, iuaritika Teoso makatxakapekari ninoa maerekani —itxana.

Ininiã itaparakienatakakauana ikara sãkiretxiti xika, ininiã ninoa mereña Paoro, Panapee, átikaka Xesosi sãkire auĩãkani Átxiokia auakani apaka Xerosareẽmoni isinina ĩkapani.

—Iuaã hīsāpiretariko ikara sākiretxiti Xesosi iokanatakini moni, kiomātxiakori pakini moni. Ninoa sāpiretaua atāo —itxana.

³ Iuasaaki Xesosi sākire auiākani takapiretanapana ninoa, ininiã Paoro, Panapee, apanakini pakini potori-ka. Ninoa ĩpirixititakasaakiri Penisia tixini, Samaria tōpa pakini, Paoro sāpiretana ikinimanemoni:

—Xoteo minakaniua takanapapekari imaerekani. Inirekarina Teoso paniātakitinoka ikaminina.

Ininiã Xesosi sākire auiākani poxokoniua ikara pirenakenakotakasaakina.

⁴ Eereka Paoro apanakinikata apoka Xerosareēmoni. Xesosi iokanatakini, kiomātxiakori, apanakini Xesosi sākire auiākani pakini apakapana ninoa. Paoro, Panapee pakini sāpiretari Teoso kamakiti Xoteo minakonimoni. ⁵ Iuasaakipeka ātikaka pariseoakori, Xesosi sākire auiākani, apakapapiretana:

—Ninoa Xoteo minakaniua apakapapitikariko Teoso takaōtxikare. Ninoa kamapitikariko Moisesini paniātakiti. Hīsāpiretanako —itxana.

Xesosi Iokanatakini Kiomātxiakorikata

⁶ Ininiã ninoa Xesosi iokanatakini, kiomātxiakorikata apotiitaua, Xoteo minakaniua ĩtoã Teoso takaōtxikare takiko pirenaisākiretinina ĩkapani. ⁷ Ninoa iteene sākiraumatata atoko, iua Petro ōkitikaua, misākireta itxana ninoa:

—Nitariakori hīte imarotari Teoso mereēno nota. Hīte sauaki uatxakapokoikani iua mereēno nota, iua iokanapirena erekari nisāpiretini ĩkapani Xoteo minakonimoni, ikenakotinina ĩkapani, auikinirina ĩkapani. ⁸ Teoso imarotari kākiti ākixinire sākire. Iua sikari Erekari Matamatakoti Xoteo minakonimoni. Ininiākara aimarotari Teoso apakapari Xoteo minakaniua, kotxi isikari Erekari Matamatakoti ninoamoni, atemoni isikini atokotxikana. ⁹ Amaerekani ate ākixinireē Teoso makatxakini atokokanera, Teoso makatxakari imaerekanina ākixinireēna, kotxi ninoa auikari Xesosi sākire. ¹⁰ Hīte txīkitakari Teoso omanākarauatini. !Erekari hīkamakiti. Hīte nirekari Xesosi sākire auiākani kaminiri ikinika Moisesi paniātakiti, txamari akiomaneakorini kitxakapirīka !liposotari ikaminirina Moisesi paniātakiti. Ate apaka !aposotari. ¹¹ Moisesini paniātakiti kamiko !imakatxakari kākiti maerekani. Amaerekani makatxakaãka, kotxi Xesosi Apiananiri iteene tiretaua ate, ininiã aũuikari isākire. Ikara atokokana Xoteo minakaniua maerekani makatxakaãka apaka —itxa Petro.

¹² Panapee, Paoro pakini sāpiretana ninoa Teoso kamakiti Xoteo minakonikata auakasaakina, Teoso kamakiti kākiti maposotakinini, posotiiretxi. Ikara isāpiretakasaakina, ikinimane iuaã apotiitakaniua tsorīkañāta. Masākireninoka itxana. ¹³ Panapee, Paoro pakini sākiraumatata atoko, Txiako txari:

—Nitariakori hīkenakotari nota sākire. ¹⁴ Simão Petro uatxananira isāpiretaua Teoso tiretinina Xoteo minakaniua, kotxi ninoa sauaki imereēna kākiti inakitiakori ĩkapani. ¹⁵ Teoso sākire sāpiretakani kitxakapirīkarini

iōkatsopatapekari ikara atoko inakari sākiretxiti. Ninoa iōkatsopatapekari:

¹⁶ Apiananiri txari: “Eereka nikanapiriã. Noerekai nisāpirena amaneri, notamoni hāpokini ĩkapani. Hīauīte Taviini auakasaaki, pamimari hāpokini notamoni. Ikara atoko inakari uatxa xipope, apokotxi irikakari xipokakari atoko itxa. Apokotxi amaneri atoko nikamako, ininiã apakatapitika kākiti apokini notamoni.

¹⁷ Ininiã ikini uākati nitanoko nota. Xoteo minakaniua nota akiritakini ninakitiakori nitanoko nota.”

¹⁸ Ikara atoko itxa Apiananiri kitxakapirīka kākiti imarotini ĩkapani, itxa Teoso sākire iōkatsopatakori.

¹⁹ —Ininiã notamoni, !erekari apianātinina ninoa Xoteo minakaniua, Teoso sākire auiākani, ate kiomaneakorini paniātakiti ikaminina. Ikara atoko inakari pamimari. ²⁰ Maōtākikana ninoa. Maiōkatsopata ninoamoni: “!Hinikapiri nipokori teoso kamakorimoni siākori. Hītanoro minakotokatika !hīsirīkape. Hītaniri minakotikatika hīsirīkape. !Hinikapiri nipokori manotsātakori xini. Arēkatxi !hiātape, !hinikape.” Ikara nokara maiōkatsopata ninoamoni. ²¹ Ikaranoka aiōkatsopata, kotxi apikomoni Moisesini paniātakiti atatsopataãka aiko āki Xoteoakori apotiitiniãtaãua ikini ōti tomatiko ōtisaaki. Moisesini sākire sāpiretaãka ātipirika ikininape sitatxiti, ninoa iteene imarotini ĩkapani —itxa Txiako ninoamoni.

Iokanatsopatakina Xoteo Minakonimoni

²² Ninoa Xesosi iokanatakini, kiomātxiakori apaka, ikinimane Xesosi sākire auiākani apaka, ninoa apokaerekatari ātikaka kiki imereinina Ātxiokia sitatxitimoni Paoro, Panapee pakinikata isinina ĩkapani. Ninoa mereēri Xotasi inakori, Sírsi inakori pakini. Iua Xotasi uãka Pasapasi inaãka. Xesosi sākire auiākani iteene paxitana ninoa ipi. ²³ Xesosi iokanatakini, apanakini pakini iokanatariaatsopa iōkatsopatakina Xotasi, Sírsi pakini anikiniri. Ia atoko itxa iua iōkatsopari:

Ate hītariakori, Xesosi iokanatakini, kiomātxiakori apaka, aiokanatsopata hīte aītariakorimoni Xoteo minakonimoni, Ātxiokia sitatxiti auakanimoni, Sírsi tixini auakanimoni, Sírsi tixini auakani pakini moni aiokanatsopata. Ereēkai hīte.

²⁴ Ate kenakoenetari Xesosi sākire auiākani uai auakani sari hītemoni. Ninoa txai hīte: “Hītakariko Teoso takaōtxikare hītoã. Hīkamari Moisesini paniātakiti. Ikara himakamakanisaaki, Teoso limakatxapaniri himaerekani.” Ikara atokora itxaina hīte. Ininiã hīte kamaxirexinirenoka hītxa. Uatxa kona hīte imarotari atāo hīkamini. Kona ateni paniātana ninoa ikara atoko inakari isāpiretiniina hīte. ²⁵ Ininiākara ate apotiitaua. Akinika ate apokaerekatari kikiakori amereēkini hītemoni aiokanatinini Panapee, Paoro pakinikata. Panapee, Paoro pakini ate tiretakini. ²⁶ Ninoa kikiakori amereēkini sipeka monōkoriaãtaã Apiananiri Xesosi Kristo paniātakiti ikaminina ĩkapani.

²⁷ Ate iokanatarari Xotasi, Sírası pakini ninoakata hñte-moni. Hāpisatoō ninoa sāpiretaiko ate iokanatsopatak-itixikana. ²⁸ Erekari Matamatakoti apokaerekatakiti sākiretxiti, ate apokaerekatakiti sākiretxiti apaka asāpiretai hñte uatxa. Paniātakori apia mimari !apaniā-tai hñte. Ianokara apaniātakiti sākiretxiti hñkamako: ²⁹ “!Hinikapiri nipokori teoso kamakorimoni sikakori. Arēkatxi !hiātape, !hinikape. !Hinikapiri nipokori man-otsaātakori xini. !Hñsirīkape sitokata pñtanoro minakotokatika. !Hñsirīkape kikikata pñtaniri minakotikatika.” Iuanokara himakamakaniā, peerekari. Ereēpiko, itxa ninoa iōkatsopatakiti.

³⁰ Paoroma, Panapeema, Xotasima, Sírasima pakini iokanataāka Átxiokia sitatxitimoni. Ninoa iuaā apokana. Apotiitana ikinimane Xesosi sākire auīākani, ninoamoni sika itxarina iua iōkatsopari. ³¹ Atat-sopatakana atoko ipoxokoniuatana, kotxi erekapire-nari ninoa iokanapirena. ³² Xotasi, Sírası pakini Teoso sākire sāpiretakani itxauana. Ninoa iteene sākirauata ninoa Xoteo minakanuia isikataparaxiniretinina ĩka-pani. Ininiā ninoa Xoteo minakanuia apikomoni auika-rina Xesosi sākire. ³³ Xotasi, Sírası pakini kaikota iuaā-taā mapaōti. Eereka Xesosi sākire auīākani takanapa-piretana, Xesosi iokanatakinimoni ikanapiriinina ĩka-pani.

—Hñsipiniikaua erekaxinire hinini —itxana.

³⁴ Iuaritika Sírası apokaerekatarari iuaā ikaikotini.

³⁵ Paoro, Panapee pakini kaikotapanika Átxiokia sitatxi-ti. Ninoa apanakinikata oerekari Apiananiri sākire iua sākire auīākanimoni. Isāpiretarina iua sākire isākire mimarotakanimoni apaka.

Paoro, Panapee Pakini Iarikini

³⁶ Eereka mapaōtipeka inapaka atoko, Paoro mis-ākiretari Panapee:

—Makanapiriā ikininape aapokotxitimoni mitxi Api-ananiri sākire asāpiretinimoni. Mamotikaētana añtari-akori atauako erekana atxiiti —itxari Panapee.

³⁷ Panapee nirekari Xoāo Marko inakori anikini ni-noakata. ³⁸ Txamari Paoro !nirekari anikiniri iua.

—Pāpíría tixini aūakasaaki, iua Xoāo Marko asikaua. !Nirekaikari atekata iparīkauatini —itxa.

³⁹ Ikara xika itaparakienatakauana. Eereka iarikana. Panapee anikari Xoāo Marko. Maporo āki iereētana Xipri inakori pokomiriñtimoni isinina ĩka-pani. ⁴⁰ Paoro mereēri Sírası, iuakata isini ĩkapani. Iuaātaā Xesosi sākire auīākani misākiretari Teoso, Paoro, Sírası pakini ĩkapani, Teoso inñkatinina ĩkapani. Eereka Paoro potorika Sírasikata. ⁴¹ ĩpirixitarina Síria tixini, Sírisia tixini pakini. Aapokotxi apokasaakina, isāpiretari Xesosi sākire iuaātaā auakanimoni. Isikata-paraxiniretana Xesosi sākire auīākani. Ininiā ninoa apia auikari Xesosi sākire.

Tximótxio Moianatana Paoro, Sírası Pakini

16 Paoro sari Tepi sitatxiti. Eereka Arisitara sitatxiti isa. Iuaā aua kiki, Xesosi sākire auīākari, Tx-

imótxio inakori. Inoro Xoteo otxaua. Oa apaka auikari Xesosi sākire. Iri kona Xoteoni. Áti uāka Kreko itxaua.

² Xesosi sākire auīākani, Arisitara auakani, Ikónio auakani apaka sākire: “Peerekari Tximótxio.” ³ Paoro nirekari anikiniri Tximótxio iuakata imoianari ĩkapani. Ininiā iua takari Teoso takaōtxikare Tximótxio ĩtoā, kotxi Xoteoakori iuaātaā auakani imarotari Tximótxio iri Kreko ininiua. ⁴ Paoro imoianariakorikata saāpota ikininape sitatxitimoni. Kākiti aapoko apokaāpotakasaakina, isāpiretarina ninoa Xesosi iokanatakini sākire, kiomātxiakori sākire pakini. Isāpiretarina ikinimane kākitemoni. Ninoa sākire aāt-sopaā iōkatsopatakori sākiretxiti isāpiretana ninoa. Paoro imoianariakorikata otākikana ninoa ikara isākirena auikinina ĩkapani. ⁵ Ininiā ikiniōtika kākiti api-aāpotape auikiniri Xesosi sākire. Itomanepeka auikari Xesosi sākire.

Paoro Taponetari Masetónia Auakari

⁶ Paoro imoianariakorikata ĩpirixitiāpotari Piríxia tixi-ni, Karásia tixini pakini. Iuasaaki Erekari Matamatakoti !auiritana ninoa Xesosi sākire isāpiretinina Ásia tixiniā.

⁷ Ninoa apokasaaki Mísia tixini takote, inirekamarina Pitxínia tixini isinina. Erekari Matamatakoti !auiritana isinina Pitxínia tixinimoni. ⁸ Ininiā ninoa ĩpirixititari Mísia tixini. Apokana Tóatxi sitatxiti.

⁹ Iua ĩkanōkati Paoro taponeuata. Itaponetari kiki Masetónia tixini auakari. Itimanāta. Amanañtari: —Uaimoni pina Masetónia tixini. Pimoianataua ate —itxari.

¹⁰ Ininiā Paoro taponeuataka atoko, ate xinikari: —Masapoka Masetónia tixinimoni, kotxi atāoka Api-ananiri akiritaua ate Teoso iokanapirena erekari kākiti ikiraākinimoni asāpiretini ĩkapani.

Ininiā aiamata Masetóniamoni asini ĩkapani.

Arítxia Auikari Xesosi Sākire

¹¹ Tóatxi ioporokote ate iereētana maporo āki. Asapi-tipo Samotirásia ipokomiriñti. Pokatimari oti ate sari Niāpori sitatxiti. ¹² Iuaā apotorika. Asari Piriposi sitatxi-timoni, Masetónia tixiniā. Masetónia tixiniā iua sitatxi mitari. Piriposi atoko inakari lauari. Iuaā auana kaiāopokori kākiti Homa sitatxitikini. Ate napari ma-paōti iuaā.

¹³ Tomatiko otisaaki sitatxi ĩtinikata ate sari uini ĩtinikata. Ate uākatari uini ĩtinikata Xoteoakori apoti-itiniāua Teoso imisākiretinina ĩkapani. Ininiā ate apoka iuaā. Atāopitika ate uākatikiti. Aāpokaro Xoteoakoro. Iuaā apotiitauana Teoso imisākiretinina ĩkapani, ininiā añtopāka, ninoakata asākirauatini ĩkapani. ¹⁴ Sito Arítx-ia inakoro aua ninoa sitokata. Oa txiñta poporeri vēxti-takaro otxaua oa. Txiatxira sitatxitikero oa. Teoso mis-ākiretakaro oa. Iuasaakipekara okenakotari asākire. Iuasaaki Apiananiri iteene kamaimaroretaro oa Paoro sāpiretakiti, ininiā oa auikari isāpiretakiti. ¹⁵ Ininiākara oa, oaāpoko auakani apaka, patxisataāka. Eereka oa aiataua oaāpoko āki akaikotini:

—Masa naapoko, hīkaikotini īkapani. Hītemoni atāo nauikiniāri Apiananiri sākire, ininiā notakata hīkaikota —otxa.

Ikara atoko oa aiataua oakata akaikotini, ininiākara akaikota oaāpoko.

Paoro, Sírası Pakini Kateia Āki Auini

¹⁶ Āti ōti Teoso misākiretiko aikotimoni asikasaaki, ataōkitaro ātokoro iamotakoro. Maerekati mata-matakoti auāītotoaro oa. Iua maerekati matamatakoti imarotari kākiti kamakiti apisapanika. Oa amotakani apakaparo ito txineiro oimarore īki. ¹⁷ Oa ātokoro ospika Paoro tikini, ate tikini apaka. Oākiritaipika:

—Naia kikiakori Teoso nitiriakori. Apiananiri nitiriakori itxauana naia. Oerekauana amaerekani makatxakiko, Teosomoni asini īkapani —otxaāpokata.

¹⁸ Itanaōtika ikara atoko oākirināta. Ininiā Paoro maerekaxiniretinoka itxa oākiritakiti xika. Āti ōti isapotrika, paniāta itxari maerekati matamatakoti:

—Xesosi Kristo uākaā nota paniātai, pitakanapiniro aroa ātokoro —itxa.

Iuasaakipeka maerekati matamatakoti takanaparo.

¹⁹ Oa amotakani ikara imarotakasaaki, otsopa imapakapapekaniika oimarore īki, ininiā imaīkarina Paoro, Sírası pakini. Ikosekaītota, anikana sitatxi apanīkaki auītetxiakorimoni. ²⁰ Iuaā apokana. Isāpiretarina Homanoakori:

—Naia kikiakori Xoteo itxauana. !Erekari ninoa oerekapiretakiti, ininiā sitatxi auakani omanākarauata ninoa sāpiretakiti xika. ²¹ Ate amakinika Homano atxaua. Aimarotapekari aāuiākiti aāuite paniātakiti. Txamari naia oerekaua ipinimonipo inakari akamini īkapani. Naia oerekaua āti uāka auīākiti sākiretxiti. !Auiritaāka aāuikiniāri naia oerekapiretakiti. !Auiritaāka akaminiri —itxana.

²² Iuasaaki kākitipokoni iuaā apotiitakaniu nirekari Paoro, Sírası pakini iāsokinina. Ninoa auītetxiakori matsorakitari Paoro māka, Sírası māka apaka, imaktxakinina īkapani. Ipaniātarina apanakini aāpit-sā ixirokitatiko. ²³ Ixirokitatapeēkana atoko, kateia āki okaākana Paoroni, Sírasini pakini. Auītetxiakori paniātari iua kateia nīkatakari, inapokopiretiniri imasikakakoni tīkane. ²⁴ Ininiākara kateia nīkatakari okaraītota Paoro, Sírası pakini kateia irikoākixiti. Ieretakari ninoa kiti isīkatatxi taopata kamapakotatakori āki, imaktxakakanina īkapani.

²⁵ Īkanōka Paoro, Sírası pakini misākirenātari Teoso. Ixikarauanātana Teoso īkapani. Apanakini kateia āki auakani kenakonātari. ²⁶ Iuasaaki katimaritika itixi iakeēkata iteene. Kateia patapi apaka iakeēkata. Iuasaakipeka kateia tore takaka. Itxikikona metao kamakori, pirikeri āki auakani itxikikona, karakitakata, katxaka itxa metao. ²⁷ Iuasaaki kateia nīkatakari meraka. Iua amatarari kateia tore takakapeka, ininiā iuākatari ikinimane kākiti inīkatakini mitekapeka. Ninoa mitekaākamako, iua auīte okamariko iua, iparīka imakamakani xika. Ininiā ikosekaro iouata mitaro iua-

ka iorotiniua īkapani. ²⁸ Okaaritakasaakiau, Paoro akirikata:

—Kona pokapeua. Uaikareua ate amakinika —itxa.

²⁹ Iua kateia nīkatakari amanaāri tirikapi. Katimaritika īroā. Ipamaka Paoro, Sírası pakini apisatoō. Ikikinanaākata. ³⁰ Eereka imipokīkana ninoa. Iua:

—Kiatokopa nikama, nimaerekani Teoso makatxakini īkapani? —itxana ninoa.

³¹ Ninoa:

—Pauikariko Apiananiri Xesosi sākire, ininiākara Teoso makatxakari pimaerekani, paapoko auakani maerekani apaka —itxari.

³² Eereka Paoro, Sírası pakini sāpiretari Apiananiri sākire iuamoni, iua aapoko āki auakanimoni apaka. ³³ Iuasaaki imaropirīkata kateia nīkatakari arokari ninoa karo. Eereka iua imiakorikata, itanorokata patxisa-taāka. ³⁴ Eereka anikana Paoro, Sírası pakini aapoko āki. Isikakienatana. Iua imiakorikata, itanorokata poxokoniuata, kotxi iuasaaki ninoa auikari Teoso sākire.

³⁵ Katimatinīkata auītetxiakori iokanatana initiriakori kateiamoni, Paoro, Sírası pakini isikakini īkapani. Ninoa apokasaaki, itxana kateia nīkatakariimoni:

—Pauiritana Paoro, Sírası pakini isinina.

³⁶ Ininiā iua kateia nīkatakari sāpiretari Paoro:

—Niauīteakori iokanapireta notamoni hīte nisikakini īkapani. Ininiākara hīsipiniikaua erekaxinirepeka hinini —itxana.

³⁷ Txamari Paoro txari auītetxiakori nitiriakorimoni:

—Ari, Homanoakorikareua ate, iuaritika auītetxiakori Homanoakori iaritataua ate ikinimane apisatoō. Maxikatīka ninoa iaritataua ate. !Akamari maerekati. Eereka kateia āki ninoa okaua ateni. Uatxa ninoa nirekari iokanatinuia ate ikinimane mimarotakinipani. Konapitini. Ninoapitakarako inari uai. Ninoa makatxakaua ate uai —itxa Paoro ninoamoni.

³⁸ Ninoa kikiakori kanapiriā iauīteakorimoni. Isāpiretarina Paoro iokanapirena. Ninoa auīteakori imaropiretakasaakiri Paoro, Sírası pakini Homano ininiuana, ninoa pīkarauata, kotxi ninoa maxikatīka misiritana Paoro, Sírası pakini. ³⁹ Ininiākara ninoa sari Paoromoni, Sírası pakinimoni. Ninoa:

—Ate !imarotari hīte Homano hininiua. Aimarotaāka-mariko !amisiritamaiko —itxana.

Eereka ninoa auītetxiakori mipokīkana Paoro, Sírası pakini.

—Sitatxi hītakanapako —itxana.

⁴⁰ Ininiā Paoro, Sírası pakini takanapari kateia. Arítxia inakoro aapokomoni isana. Iuaā aōkitana kākiti Xesosi sākire auīākani. Paoro, Sírası pakini sikataparaxiniretana ninoa. Eereka isipekana, iua sitatxiti itakanapini-na.

Tesarónika Sitatxiti Pirena

17 Paoro, Sírası pakini napari Āpīpori sitatxiti.

Apikomoni inaparina Aporónia sitatxiti. Eereka apokana Tesarónika sitatxiti. Iuaā aua aiko Xoteo apotiitiniā-taāua aikotimoni isini. Ininiākara iua sari iuaā. Ipi āti

pakini õti tomatiko õti, isari iuamoni. Iuasaaki Teoso sãkire iõkatsopatakori isãpireta kãkitimoni iuaãtaã auakanimoni. Ninoa pimarauata, ininiã iua sãpirenauata. ³ Ininiã Paoro txari:

—Teoso sãkire iõkatsopatakori oerekaua ate: Teoso mereẽkiti misiritaãkapitikako, okaãkapitikako. Eereka õkitikapitikauako, iuaĩkana auãki inini ĩkapani. Ia Xesosi hĩtemoni uatxa nisãpirenãtakiti Teoso mereẽkitipitikara iua —Paoro txana ninoa.

⁴ Átikaka Xoteoakori auikari Paoro sãkire, ininiã Paoro, Sírası pakini moianariakori itxapekauana. Kaiãopokori Akaia tixini auakani Teoso sãkire auĩãkani, auikari Paoro sãkire apaka. Kaiãopokoro sitoakoro, auĩtetxiakori ĩtanoroakoro, auikari Paoro sãkire apaka.

⁵ Xoteoakori, Paoro sãkire mauĩãkani, xikotari Paoro. Ininiã ninoa apotiitana kãkiti kaneenamarini, ma-parĩkauatakani ahoaãtaã auakani. Apotiitana kãkitipokoni. Ininiã ninoa akiripoakata, imiteẽkatana. Ikini mane sitatxi auakani kenakotari. Neenamati atoko itxakatana. Imitekana Xasão inakori aapokomoni. ĩroãkatana itapararitikana, Paoro, Sírası pakini initini. Inirekarina imipokĩkinirina ninoa kãkiti apotiitakanimoni apisatoõ. ⁶ Txamari Paoro, Sírası pakini !auari iuaã. Ininiã ikosekaĩtotarina Xasão. Apanakini Xesosi sãkire auĩãkani apaka ikosekaĩtotana. Iauĩteakorimoni anikana. Isãpiretarina iauĩteakorimoni:

—Paoro, Sírası pakini kamari maerekati. Ikini itixiti ikamarina maerekati. Ininiã ninoa uai ate sitatxineẽpekarana uatxa. ⁷ Ia Xasão apakapana ninoa. Iua aapoko ikaikotana ninoa. !Ikamarina aãũite Sesa inakori paniãtakiti, kotxi ninoa oerekari kãkiti ãti auĩtetxi ininiãua, Xesosi inakori —itxana iauĩteakorimoni.

⁸ Ikara sãkiretxiti ikenakotakasaakina, kãkiti apotiitakaniua akiripoakata. Auĩtetxiakori !imarotari ikamakitina tĩkane. ⁹ Eereka auĩtetxiakori misãkiretana Xasão, apanakinikata:

—Hĩĩkitxitana hĩsikakiko ĩkapani. Eereka auiritaina hĩsini.

Ininiã eereka auiritana isinina.

Peréia Sitatxiti Pirena

¹⁰ Kikatapeka inakasaaki, Xesosi sãkire auĩãkani iokanataka Paoro, Sírası pakini Peréia sitatxitimoni. Iuaã Peréia sitatxiti ninoa apoka atoko, ĩroãna aikoã Xoteo apotiitiniãtaãua. ¹¹ Kãkiti iuaã auakani iteene nirekari Paoro sãpirena ikenakotinina. Tesarónika auakani !atokoni itxana ninoa. Ikiniõtika ninoa atatsopataru Teoso sãkire iõkatsopatakori, kotxi inirekarina imarotinirina:

—Paoro sãkire atão atxĩti? —itxana.

¹² Ininiã kaiãopokori Xoteoakori auikari Xesosi sãkire. Kaiãopokoro sitoakoro Akaia tixini auakani apaka auikari Xesosi sãkire. Naia sitoakoro auĩtetxiakori ĩtanoroakorokara. Kaiãopokori kikiakori Akaia tixini auakani apaka auikari Xesosi sãkire. ¹³ Eereka Xoteoakori Tesarónika sitatxiti auakani kenakopiretari Paoro sãpiretiniri Xesosi sãkire Peréia sitatxitiã. Ininiã ninoa sari Peréia sitatxitimoni. Apokaãkana atoko,

itxĩkitakarina kãkiti ahoaãtaã apotiitakaniua Paoro omanatinina ĩkapani. ¹⁴ Ikara atoko ininiã, Xesosi sãkire auĩãkani iokanataru Paoro potxoari uinitimoni. Sírası, Tximótxio pakini kaikotapanika Peréia sitatxiti. ¹⁵ Paoro moianatakani anikari iua Atena sitatxitimoni. Eereka ninoa kanapiriã Peréia sitatxitimoni. Paoro iokanapireta Sírası, Tximótxio pakinimoni:

—Katimariã hinako —itxa.

Atena Sitatxiti Pirena

¹⁶ Ininiã Atena sitatxitiã Paoro iãtapari Sírası, Tximótxio pakini apokini. Iuasaaki Paoro itikari kaiãopokori teoso kãkiti kamakiti. Sitatxi xãpoka kãkiti teosonenoka. Ia xika Paoro matinaniuata. ¹⁷ Ininiãkara Paoro oerekari Teoso sãkire Xoteoakorimoni aiko ãki Xoteo apotiitiniãtaãua. Xoteo minakaniua, Teoso sãkire auĩãkani apaka, Paoro oerekari Teoso sãkire iuaãtaã. Ninoa pimarauata, ininiã imisãkiretakakana Teoso sãkire ixinikinina ĩkapani. Ikiniõtika Paoro oerekari Teoso sãkire kãkitimoni, nipokori iamotikoãtaã sikanimoni. ¹⁸ Kãkiti kaxinikaxitirerini, Epikoreo inakoni, Esitóiko inakoni apaka sãkirauata Paorokata. Paoro sãpiretana ninoa Xesosi pirena. Isãpiretana Xesosi ipinini, eereka õkitikiniua, iuaĩkana auãki inini pirena. Ininiã átikaka:

—Natokopa itxa ikara inakari sãkiretxiti? Uuato sãkire atoko itxa. !Kĩĩkiteri iua —itxana.

Apanakinipekana txari:

—Isãpiretari ãti itixiti auakani teosone pirena.

Paoro Sãpirenauata Ariópako Inakoriãtaã

¹⁹ Eereka ninoa kaxinikaxitirerini anikari Paoro aiko kãkiti apotiitiniãtaãua, imirĩ nopini Ariópako inakoriãtaã. Iuaã ninoa txari:

—Ate nirekari aimarotiniri poerekakiti sãkiretxiti. Mitxi kona ate kenakotari ikara atoko inakari sãkiretxiti. ²⁰ Ipxini poerekakiti sãkiretxiti !aimarotapanika. Ipinimonipo itxa poerekakiti. Ininiã pisãpiretaua. Poerekaua, aimarotini ĩkapani —itxarina Paoro.

²¹ Ikara atoko itxana, kotxi ikiniõtika Atena sitatxiti auakani, apaka ãti itixiti ĩkani Atena kaikotakani nirekari ãtiãtaãkiri sãpiretakiti imarotinina ĩkapani, ininiã ikiniõtika amaneri sãkiretxiti ikenakonãtana.

²² Paoro ikinimane apisatoõ itima, imirĩ Ariópako inakoriãtaã. Iua txana ninoa:

—Kikiakori, Atena sitatxiti auakanii, nitikapekari hĩteosone kaiãopokori, ininiã nimarotari iteene hĩpaxitiniri hĩteosone. ²³ Ahoaãtaã ninapaãpotakasaaki, natamatari kaiãopokori hĩteosone misãkiretikoãtaã. Iuasaaki natamatari ãti hĩteosonemoni sikakori takikoãtaã. Iuaã natatsopataru iõkatakori: “Uai Teoso mimarotakoti misãkiretikoãtaã.” Iua hĩteosonetakiti, himimarotakinini, iuapitikara uatxa nota sãpiretai hĩte.

²⁴ —Iua Teoso kamari itixi. Ikinipoko itixi nopini auakari apaka ikama. Iua Apiananiri. Iua itixi auakani auĩte itxaua iua. Iaxiti auakani auĩte apaka itxaua iua. !Ikaikota kãkiti kamakiti aikotiã. ²⁵ Ikinipokokara

auapeka Teosomoni, ininiã linirekari kãkiti kamakiti iua auini ïkapani. Teosopitikara txïkitakari kãkiti auãki inini. Iuakara sikaxiniretari kãkiti. Teosokara sikari ikinipoko kãkiti auakiti. ²⁶ Merepitipanika kãkiti !auari, eereka Teoso kamari kiki Atão inakori. Ikini uãkati kãkiti atokiri itxaua iua Atão. Teoso iokanatana ninoa ikini itixitiã auinina. Kãkiti mauakani apisapanikara, imereëri kãkiti iponaniini õti tïkane. Iaõtari kãkiti auiniãtaã tïkane. ²⁷ Ikara atokora itxa Teoso kamakiti. Teoso txïkitakari kãkiti nitiniri Teoso. Initaãpotakasaakirina, atxïiti ninoa apokari Teoso, kotxi kona õtakoni aua Teoso. ²⁸ Áti txapekari: “Teoso txïkitakaua auãki anini, atïpokotini ïkapani. Iua matxïkitakaniãua auãki anini, !aãuari.” Kaxikarerini hïte sauaki auakani txapekari: “Teoso anaakori ate apaka txaua.” ²⁹ Teoso anaakori aniniãua, ininiãkara aimarotari kona kãkiti kamakiti atoko inakarini !itxaua Teoso. Kona oro kamakorini !itxaua. Kona pirata kamakorini !itxaua. Kona kai kamakorini !itxaua Teoso. Konapitini. ³⁰ Mitxipe kãkiti !imarotari atão inakari. Iuasaaki Teoso !imisiritana kãkiti imimarotakanisaakina. Txamari uatxaua ikaniãtari ikininape kãkiti ikini itixiti auakani imaerekanina itakanapinina ïkapani. ³¹ Ikara atoko Teoso txari ikinimane kãkiti, kotxi iua ketotapekari áti õti kãkiti misiritiko õti. Xesosi Teoso mereëkiti iuakarako sãpiretariko kãkiti misiritiko ikara õti apokasaaki, kotxi iua imarotari atão inakari. Aimarotari Xesosi Teoso mereëkiti ininiãua, kotxi Teoso õkitikari iua, iuaïkana auãki inini ïkapani —Paoro txana ninoa.

³² Xesosi iuaïkana auãki inini pirena ikenakotakasaakina, átikaka napetari Paoro. Apanakini:

—Ate nirekari pisãpirena iuaïkana akenakotini —itxarina Paoro.

³³ Ininiã Paoro sipe. ³⁴ Apanakinipekana auikapitikari Paoro sãkire. Txionísio inakori, Atena sitatxiti auakani auïte, auikari isãkire. Apaka sito Tamari inakoro auikari isãkire.

Korïto Sitatxiti Pirena

18 Eereka Paoro takanapari Atena sitatxiti. Korïto sitatxitimoni isa. Iuamoni apoka. ² Iuaã aõkitari kiki Ákira inakori. Iua Xoteo. Põto inakoriãtaã iua iponaniã. Itãria tixini ïkari. !Okanani apoka Korïto sitatxiti. Apoka !tanorokata, Pirisira inakorokata. Ninoa takanapari Itãria tixini, kotxi Itãria auakani auïte Krãotxio inakori paniãtana ikinimane Xoteoakori, Homa sitatxiti itakanapinina. Paoro ianapokota Ákira, Pirisira pakinimoni. ³ Eereka ikaiakota ninoakata, kotxi ninoa parïka iua Paoro parïkatxikana. Papiri aamata kamakori kamakani ninoa. Ininiã Paoro kaikota Ákirakata, iuakata iparïkauatini ïkapani. ⁴ Ikiniõtika tomatiko õti, Paoro sari aiko Xoteo apotiitiniãtaãua. Iuaã Xoteoakori, Krekoakori pakini apotiitaua. Paoro oerepiretana ninoa Xesosi sãkire, isãkire auikinina ïkapani.

⁵ Sírasi, Tximótxio pakini takanapari Masetónia tixini. Korïto sitatxiti apoãkana atoko, Paoro takanapari iparïka papiri aamata kamakori ikamini, Teoso sãkire kãkiti-

moni ikiniõtika isãpiretini ïkapani. Iua oerekana Xoteoakori Teoso mereëkitipitikara iua Xesosi. ⁶ Txamari ninoa Xoteoakori omanatari Paoro. Ninoa misãkirepiretari Xesosi, ininiã Paoro kamaãkaretxitana ninoa Xesosi imisãkirepiretinina xika. Iõkokari imãka ninoa apisatoõ aãpani katxakini ïkapani, omanãkare oerekini ïkapani. Ininiã Paoro txana:

—Teoso !apakapai hïte Xesosi sãkire himauikakani xika. Kona nota xikani, kotxi nisãpiretapekamai hïte. Ininiã uatxaua nisãpiretariko Xesosi sãkire Xoteo minakonimoni. Xoteoakorimoni !nisãpiretaikariko —itxa Paoro.

⁷ Ininiãkara Paoro takanapana ninoa. Isari Txísio Xósite inakorimoni iua aapoko ikaiakotini ïkapani. Xoteo minakatiua iua. Teoso misãkiretakari iua. Iua aapoko aiko Xoteo apotiitiniãtaãua takote aua. ⁸ Aiko Xoteo apotiitiniãtaãua sikani auïte Krispo inakori auikari Apiananiri Xesosi sãkire. !tanoro, imiakori apaka, auikari Xesosi sãkire. Kaiãopokori kãkiti Korïto auakani kenakotari Paoro sãpirena, ininiã eereka ninoa auikapiretari. Ipatxisataãkana.

⁹ Áti !kanõkati Teoso txïkitakari Paoro itaponeuatini. Itaponemoni Apiananiri misãkiretari iua:

—!Pipïkarauatape. Nisãkire pisãpiretapitipo kãkitimoni. !Piotokape. ¹⁰ Kotxi nota auapika pitekata. Pikarotakiri !auari, kotxi kaiãopokori kãkiti nota nakitiakori !korapokoriti auari —itxa Paoromoni.

¹¹ Ininiã Paoro kaikota iuaã áti ano, ipixini ano pakinikanani Teoso sãkire oerekini ïkapani.

Xoteoakori Anikari Paoro Káriomoni

¹² Eereka iuaã Akaia tixini auakani auïte áti !roã, Kãrio inakori. Iua Homano itxaua. Homanoakori auïtetari iua. Iuasaaki Xoteoakori apotiitaua. Ninoa maïkari Paoro. Anikarina aiko kãkiti misiritiko sãpiretikoãtaã.

¹³ Iuaã ninoa txari Káriomoni:

—!a kiki na atão oerekari kãkiti Teoso paniãtakiti kamiko. Ipinimonipo itxa iua oerekakiti. Na aãtokiriakorini oerekakiti atokoni itxa. !Auiritaãka Paoro oerekapiretakiti —itxana.

¹⁴ Paoro sãkirauatini apisapanika, Kãrio txana Xoteoakori:

—Nisãpiretai hïte Xoteoakori. Paoro kamaãkamariko maerekati, nota kenakotamariko apikomoni hïssãkiremako. ¹⁵ Txamari !ikamari maerekati. Hïte taparakienatakakaua hãuikapiretakiti xika, hãtokiriakorini oerekapiretakiti xika. Hïte Xoteoakori. Nota áti uãka nitxaua, ininiã hïtekara xinikari atão inakari. Kona notani sãpiretai hïte auiaãkiti —itxa Kãrio.

¹⁶ Ininiã omitikana ninoa, aiko kãkiti misiritiko sãpiretikoãtaã õpõkikinina ïkapani. ¹⁷ Iuasaaki Krekoakori maïkari Sóseni inakori. Iuani Xoteoakori apotiitiniãtaãua sikani auïte. Krekoakori xirokitatari aãkeë aiko kãkiti misiritiko sãpiretikoãtaã apisatoõ. Txamari Kãrio !limaãkatari.

Paoro Kanapiriã Átxiokia Sitatxitimoni

¹⁸ Eereka Paoro kaikotapanika mapaõti iuaã Korïto sitatxiti Xesosi sãkire auiãkanikata. Eereka iua takapiretanapana ninoa. Isipe Pirisira, Ákira pakinikata. Iereëtauana maporo äki, Síria tixinimoni isinina ïkapani. Sëkireia sitatxiti apokana. Iuaã Paoro säpiretari Teoso ikamaenetakiti Teoso ïkapani. Eereka ikixatari ikii ikamaenetakiti ixinikini ïkapani. ¹⁹ Ninoa apoka Épeso sitatxiti. Iuaã Paoro takanapana Pirisira, Ákira pakini. Paoro ïroã aiko äki Xoteo apotiitiniãtaãua. Iuaã apakapiretakakaua Xoteoakorikata Teoso sãkire isäpiretinina. ²⁰ Ninoa misãkiretari Paoro ninoakata apikomoni ikaikotini ïkapani. Txamari Paoro !nirekari ikaikotini.

²¹ —Nisariko kiiniri Teoso misãkiretiko aikotiã Xerosareë. Eereka Teoso nirekiniãri, uai nikanapiriã hïtemoni —itxa Paoro.

Eereka isipe. Iereëtaua maporo äki. Épeso sitatxiti itakanapa. ²² Sesaréia sitatxiti apoka Paoro. Eereka isa Xerosareëmoni. Iuaã apokasaaki, ianapokota Xesosi sãkire auiãkanimoni. Eereka isa Átxiokia sitatxitimoni. ²³ Iuaã ikaikota mapaõti. Eereka isipe. Karásia tixini, Piríxia tixini apaka ïpirixitiãpota. Aapokotxi apokaãpotakasaaki, isikapoxokonitana ikinimane Xesosi sãkire auiãkani.

Aporo Pirena

²⁴ Iuasaaki Xoteo Aporo inakori sari Épeso sitatxitimoni. Iua iponaniã Arexãtria sitatxitiã. Paimatireri iua. Imarotari Teoso sãkire iõkatsopatakori imakinika. ²⁵ Iua oerekapeëkaika Xesosi sãkire, ininiã atão Xesosi sãkire isäpireta kãkitimoni. Ipoxoniritika isäpirenauata. Txamari kãkiti patxisatiko pirena !liteene imarotapanika. Xoão kapatxisarereri oerekapiretakitanira imarota. ²⁶ Iua Aporo säpirenauata itaparaxinireritika aiko äki Xoteo apotiitiniãtaãua. Iuasaaki Pirisira, Ákira pakini kenakotari isãkire. Eereka anikarina aapokomonina. Oerekarina apikomoni Teoso sãkire imarotini ïkapani. ²⁷ Eereka Aporo:

—Ninirekari Akaia tixinimoni nisini —itxa.

Ininiã Xesosi sãkire auiãkani:

—Ari, erekapitikari pisini.

Ininiã Xesosi sãkire auiãkani, Épeso auakani, iokanatsopatarari itariakorimoni Akaia tixini auakanimoni. Itxana iõkatsopariã: “Hãpakapariko aïtari Aporo inakori.” Aporo apokasaaki Akaia tixini, iteene imoianatana Xesosi sãkire auiãkani. Ninoa auikari Xesosi sãkire, kotxi Teoso iteene turetana ninoa. ²⁸ Ikinimane apisatoõ Aporo oerekana Xoteoakori, Xesosi sãkire mauiãkani, Xesosi atãopitika Teoso mereëkiti ininiua. Teoso sãkire iõkatsopatakoriã iua oerekana Xesosi Teoso mereëkiti ininiãua. Ininiã Xoteoakori !kasãkirena.

Paoro Épeso Sitatxiti Auakasaaki

19 Aporo Korïto sitatxiti auakasaaki, Paoro ïpirixititari Épeso tãpa Épeso sitatxiti apokini ïkapani.

Iuaã aõkitana kãkiti Xesosi sãkire auiãkani. ² Paoro pi-maãna ninoa:

—Xesosi sãkire hãuikasaaki, hãpakapatari Erekar Matamatakoti? —Paoro txana ninoa.

Ininiã ninoa:

—Kiripitipa iua Erekar Matamatakoti? !Aimarotari —itxana.

³ Ininiã Paoro:

—Kanatokopa inakariãpa hïte patxisataãka, Erekar Matamatakoti himimarotakani?

Ininiã ninoa:

—Ari, Xoão patxisarauatini atoko inakarikanera ate patxisataãka —itxarina Paoro.

⁴ Ininiã Paoro:

—Xoão patxisatana kãkiti maerekati takanapakani. Itxana ninoa: “Hïteko iteene auikapiretariko nitikini apokakari, Kristo Xesosi inakori,” Xoão txari kãkiti —itxa Paoro.

⁵ Ikara ikenakotaãkana atoko, ninoa patxisataãka Xesosi Apiananiri uãkaã. ⁶ Iuasaaki Paoro takari imakinika iuako ninoa nopini. Iuasaakipeka ninoa apakapari Erekar Matamatakoti. Iuasaaki ninoa sãkirauata kãkiti äti uãka sãkireë. Isäpiretarina Teoso sãkire kãkitimoni. ⁷ Ninoa kikiakori atxiïti tosi pakini.

⁸ Ipi äti pakini kasiriti ikiniõtika aiko Xoteo apotiitiniãtaãua Paoro säpirenauata itaparaxinireritika.

Apanakinikata imisãkirenãtakakauana. Paoro nirekana ninoa auikinirina Teoso sãkire, Teoso auïtetxi ininiãua pirena. ⁹ Txamari ätikaka ninoa !nirekari auikapiretinirina, kotxi !nirekarina ikara atoko inakari sãkiretixiti. Ninoa misãkirepiretari Xesosi sãkire ikinimane kãkiti apisatoõ. Ininiãkara Paoro takanapana ninoa. Anikana Xesosi sãkire auiãkani iuakata. Ikiniõtika Txirano inakori oerekarauatiniãtaã Paoro oerekari Teoso sãkire kãkitimoni. Ninoa pimaaãpotakakaua Teoso sãkire imarotininina ïkapani. Apakapireãpotakakauana.

¹⁰ Iuaã Paoro oerekarauata ipikanani, ininiã ikinimane kãkiti Ásia tixini auakani kenakotari Xesosi Apiananiri sãkire. Xoteoakori, Krekoakori pakini kenakotari.

Sepa Anaakori Pirena

¹¹ Teoso sikaposotiiretari Paoro posotiiretixi ipini-monipo inakari ikamini. ¹² Ikara atoko ininiã ikii mata, imãka iparïkauatini ïkapani apaka anikaãka amianatakani erekape ininina. Maerekani matamatakoni auãtiniãri kãkiti, Paoro mãka ninoa kãkiti apakapakasaaki, maerekani matamatakoni sipe.

¹³ Iuasaaki apanakini Xoteoakori, miïtiakori, maerekani matamatakoni omitiãkani, sari kãkitimoni maerekani matamatakoni omitikinina ïkapani. Xesosi pirena ikenakotana. Ininiã eereka ninoa txari maerekani matamatakoni:

—Apaniãtai hïsipiniikaua Xesosi uãkaã, Paoro säpiretakiti Xesosi uãkaã —itxana ninoa.

¹⁴ Iuasaaki aua kiki Xoteo, Sepa inakori. Sasetotxiakori auïte itxaua. Iua anaakori kiki setxi pakini. Sepa anaakori paniãtana maerekani matamatakoni sini Xe-

sosi uăkaă. ¹⁵ Txamari äti öti maerekati matamatakoti apakapapiretana ninoa:

—Nota imarotari Xesosi. Nimarotari Paoro. Hïte !ni-marota. Kiniparai hïte? —itxa maerekati matamatakoti.

¹⁶ Iuasaakipeka kiki maerekati auăitotakiti okakataua ninoa nopini. Apiataparata iua maerekati. Iuasaaki iua äsokitakatapena ninoani. Ininiä ninoa miteëkata, kasarapekana, kakaropekana itxapena.

¹⁷ Ikinimane kăkiti Épeso sitatxiti auakani kenakopiretari ikara ene. Xoteoakori, Krekoakori apaka kenakopiretari ikara ene, ininiäkara ipïkarauatana. Ikara atoko ininiäkara Xesosi uăka apiata ipaxitaăka.

¹⁸ Kaiäopokori Xesosi săkire auiaăkani apotiitaua. Ikinimane apisatoö isăpiretarina maerekati mitxi ikamakitina. ¹⁹ Apanakini kasikpöererini apaka apoka iuaă. Iminarina sikapöerexi apaiaökirino tsopa. Ikinimane apisatoö iotikarina. !Inirekaikarina maerekati ikamini-na. Iaötarina ikara aätsopa ïki. ïki sïkoëta mio txineiro ota pirata kamakoro. Kaiäopokoro txineiro. ²⁰ Ikara atoko ininiäpanirako Apiananiri săkire iaripiretako ikini itixiti. Kaiäopokori kăkiti apiata auikaäpotari Apiananiri săkire.

²¹ Eereka Paoro äkixinire txari:

—Nïpirixititariko Masetônia tixini, Akaia tixini pakini. Iposo atoko Xerosareëmoni nisako. Iposo atoko Homa sitatxitimoni nisako —itxa äkixinireë.

²² Tokanatana imoianariakori, Tximótxio, Erásito inakori pakini Masetônia tixinimoni. Paoro kaikotapani-ka Ásia tixiniä.

Neenamtxi Épeso Sitatxiti Auini

²³ Iuasaaki Paoro Épeso sitatxiti auakasaaki, kăkiti Xesosi oerekapiretakiti manirekakani mis-äkiirepireäpotari Paoro, kotxi !nirekarina Xesosi oerekapiretakiti. ²⁴ Iuasaaki kiki Temétxio inakori aua iuaă. Ikamari aiko axapitipikiri inakari. Krekoakori teosone Txiana inakoro misăkiretiko aikoti atoko inakari ikama. Kaiäopokori ikama pirata kamakori ivëxtitini ïkapani. Iua, initiriakori apaka apakaparo txineiropokoni iparïkana ïki. ²⁵ Iua Temétxio pïkapiretana ikinimane initiriakori, ninoa kamakitikana kamakani apaka. Temétxio txana:

—Kikiakori, hïte imarotari kaiäopokori txineiro aăpakapa aparïka ïki. ²⁶ Hïte kenakotapekari Paoro săpirenătakiti. Paoro txanăta: “Kăkiti kamakiti kona teoso !itxaua.” Kona ia töpananini, kona Épesonanini, ikara atoko itxa. Ikini itixiti Ásia tixini auakanimoni ikara atoko itxa. Kaiäopokori kăkiti Paoro săkire auiaăkani auapeka. Kaiäopokori kăkiti !nirekaikari teoso ate kamakiti. ²⁷ Atxiïti kăkiti misăkirepiretari ate kamakiti. Atxiïti !nirekaikari aparïka. !Ikarananini. Atxiïti kăkiti !ipaxitaikari ateosone Txiana misăkiretiko aikoti. Ininiä atxiïti kăkiti misăkirepiretaro oa Txiana. Ikinimane Ásia tixini auakani teosonetaro oa. Ikini itixiti auakani teosonetaro oa —itxa Temétxio ninoamoni.

²⁸ Ninoa kenakotakasaakiri ikara săkiretixiti, omanăkarauatana. Ninoa akirikata:

—Txiana, Épeso auakani teosone. Apiananiro oa —itxanătana ninoa.

²⁹ Ikinimane kăkiti sitatxi auakani miteëkata, akiri-äpokatana. Imaïkarina Paoro moianariakori, Kaio inakori, Arisitako inakori pakini. Ninoa Masetônia tixinikini. Ikosekaïtokatana. Imimiteëkatana. Kăkiti apotiitiniätaăua aicotimoni anikaăkana, miïroă itxana.

³⁰ Ikara Paoro imarotakasaaki, inirekari ïroini kăkitikata isăkirauatini ïkapani, txamari Xesosi săkire auiaăkani !auiritari iua ïroini. ³¹ Ätikaka Ásia tixini auakani auïteakori, Paoro tiretakani, iokanapireta Paoromoni: —Kona piïroäpeko kăkiti apotiitiniätaăua aikoti äki —itxarina iokanapirena.

³² Aiko äki ikinimane akiripoanankata. Apanakini akirikatakiti ipinimonipo. Apanakinipekana akirikatakiti ipinimonipo itxanătana, kotxi kaiäopokori kăkiti txari:

—Kixikapa aăpotiitaua?

!Imarotarina ixika. ³³ Xoteoakori iuaă apotiitakaniua katikari Arexătri inakori ikinimane apisatoö, isăkirauatini ïkapani. Iuasaaki ökitikari iuako kăkiti iotokini ïkapani, isăkire ikenakotinina ïkapani. ³⁴ Txamari ninoa imarotakasaakiri Arexătri Xoteo ininiäua, akiripoakatana ipi oara:

—Txiana, Épeso auakani teosone, Apiananiro —itxanătapikana.

³⁵ Eereka auïtetxi inakariua apoka ninoa apisatoö. Iua posotari ninoa iotokakini. Itxarina:

—Ikini itixiti auakani imarotari atenokara Épeso auakaninokara nïkatiniri ateosone Txiana misăkiretiko aikoti. Apiananiro oa. Ninoa imarotari atenokara nïkatiniri kai oa ïto atoko inakari iaxiti katxakakaro. ³⁶ Ikinimane imarotapekari ikara inakari, ininiäkara hïtotokako. Iteene hïxinikariko hïkamakiti ïkane. Maxikatïka !häkirinătape. ³⁷ Kotxi hïte minana naia kikiakori uaimoni, txamari !ïtiriïkarina tiitxi ateosone misăkiretiko aikoti äki auakari. !Imisăkirepiretarona ateosone. ³⁸ Temétxio, iuakata parïkauatakani pakini, nirekiniäri naia kateiamoni isinina, auapitika aiko kăkiti misiritiko săpiretikoătaă. Auapitika aauïteakori. Iuaă erekari isăpiretinirina maerekati naia kamakiti.

³⁹ Iuaïkana hïtsoatiniä, sitatxi auakani auïteakori apotitakasaakiaua, hïsäpiretana ninoa himapokaerekatakiniti ninoa ötäkikinii ïkapani. ⁴⁰ !Apakata mixikanani himitekini, häkiripoakatini atoko hïkamini. Maxikatïka häkiripoanăta. Ixika !auari. Atxiïti Homanoakori auïte txitaua maerekati akamakiti xika —itxana ninoamoni.

⁴¹ Eereka ipaniătana ninoa sini.

Masetônia Tixini, Akaia Tixini Pakini

20 Ninoa kăkiti apotiitakaniua aapokomonina ikanapiriăka atoko, Paoro pïkapiretana Xesosi săkire auiaăkani. Imisăkiretana. Ikamapoxokonitana. Iposo atoko itakanapapiretana. Isipe Masetônia tixinimoni. ² İpirixititari Masetônia tixini. Aapokotxi apokaäpotakasaaki, isăpireäpotari Xesosi săkire kăkiti-moni. Isikataparaxiniretana. Eereka Akaia tixinimoni apoka. ³ Iuaă ikaikota ipi äti pakini kasiriti. Eereka

Paoro kaimapeka maporo áki iereētiniua Síria tixini-moni isini íkapani. Iuasaaki, ikenakopiretari Xoteoakori okaenetiniri iua. Ininiākara Paoro:

—Masetónia tixinimonikanerako nikanapiriáko —itxa Paoro.

⁴ Sópato inakori Peréia sitatxitikiri sari iuakata. Piho inakori ákiri itxaua. Arisitako inakori, Sekōto inakori, Tesarónika sitatxitikini, ninoa apaka sari Paorokata. Kaio inakori Tepi sitatxitikiri apaka sari Paorokata. Txíkiko inakori, Tópimo inakori Ásia tixinikini, Tx-imótxio inakori pakini moianatari Paoro.

⁵ Iuasaaki nota Arókasi inakori iuakata naua. Paoro imoianariakorikata íkiika isinina. Nota, nimoianariakorikata sari Paoro tikini. Tóatxi sitatxiti Paoro iátapaua ate. ⁶ Pão miátiákati nikiko óti napaka atoko, Piriposi sitatxiti aiereétaua maporo áki Tóatxi sitatxiti asini íkapani. Síko pakini óti napaka atoko Tóatxi aápoka. Iuaá aaókitana Paoro imoianariakorikata. Iuaá anapari áti semanati.

Paoro Txíkitakari Ipíkari Iuaíkana Auáki Inini

⁷ Tomatiko ótisaaki Xesosi sákiere auíákani apotiitaua komiri ixanakinina íkapani, Xesosi ipinini ixinikinina íkapani. Iuasaaki Paoro oerekanátari Teoso sákiere. Apaíkanókepeka isápirenauatapanika, kotxi katimat-iníkatata isipe. ⁸ Ate apotiitiniátaáua aiko inopinita auakari iriko áki. Iuaá auari kaiáopokori tirikapi poniákari, ininiákara papatakari. ⁹ Iuasaaki átokori Etxiko inakori topákanáta inopinita auakari sonaá. Paoro sápirenauanátapika, ininiákara itapo inokaápotari iua Etxiko. Eereka imaka. Iuasaaki ixipotorika. Xitipeka apoákata. Ninoa miteékata iuamoni isinina, txamari !auaika. ¹⁰ Ininiá Paoro katxaka, sa itxa iuamoni. Isiríka iua ipíkari nopini, imaarata itxari.

—!Hípíkarauatape. Auákipanikari —itxana ninoa.

Ininiá iuaíkana iua átokori auákipeka itxa. ¹¹ Iposo atoko Paoro kaníka iuaíkana inopinita irikomoni. Komiri inika. Iposo atoko iuaíkana ninoakata isáki-rauanátiniritika katimata itxa. Ikatimataáka atoko isipe Paoro. ¹² Eereka anikarina iua átokori aapokomoni. Ninoa iteene poxokoniuaata iua auákipanika inini.

Miretomoni Sikiko Pirena

¹³ Iuasaaki Paoro paniátaua ate:

—Híte sari maporoá Asosi sitatxitimoni. Imiriírako nota sari. Iuaá nota iereétaua hítekata —itxaua ate.

Ininiá ate sari iua apisa. ¹⁴ Asosi sitatxiti Paoro aóki-taua ate. Iereétaua maporo áki. Iposo atoko asa Mitxireni sitatxitimoni. ¹⁵ Iuaátaá aápokasaaki, iuaíkana apotorika. Áti óti napaka atoko, anapari Kio inakori takote pokomirií. Áti óti napaka atoko, Samosi inakori pokomirií aápoka. Iuaíkana áti óti napaka atoko, aápoka Mireto sitatxiti. ¹⁶ Iuasaaki Paoro !inirekari Épeso ioporokoti apokitini, kotxi !inirekari auapokotini Ásia tixiniá. Ikatimaritaua, kotxi iposotiniári, inirekari Xerosareé apokini. Pétékósitxi kiiniriti apisapanika apokini inireka.

Xesosi Sákiere Auíákani Auíteakori Ótákiikiko

¹⁷ Ininiá Paoro Mireto sitatxiti auakasaaki, iokanapireta Épeso sitatxitimoni. Ipíkapioretana Xesosi sákiere auíákani auíteakori. ¹⁸ Ninoa apokasaaki, Paoro misákioretana ninoa:

—Himarotari merepitipanika Ásia tixini napokasaaki, eereka hítekata nauakasaaki, himarotari ikiniótika nauini hítekata. ¹⁹ Iuasaaki nipaíkauata Apiananiri nirekakiti nikamini. Na niuikaua. Iteene nitxiapata. Xoteoakori nirekari okinino, ininiá nimaxirexinire auapitika iuasaaki, uaritika nikamari Apiananiri paniátakiti.

²⁰ Himarotari na nikipatari ipixini Teoso sákiere. Nisápiretapekai híte imakinika Teoso sákiere híte ereka hinini íkapani. Kákiti apotiitiniátaáua noerekai Teoso sákiere. Apaka nisari áti haápokomoni, eereka áti haápokomoni, eereka áti haápokomoni, nitxaápota Teoso sákiere noerekini. ²¹ Xoteoakori, Xoteo minakaniau apaka nisápiretari nimarotakiti Teoso oerekakiti maerekanitxi itakanapinina íkapani, Teoso paniátakiti ikaminina íkapani. Nisápiretari nimarotakiti Teoso oerekakiti, Xesosi Apiananiri sákiere auikinina íkapani.

²² —Ininiá nota sariko Xerosareé, kotxi Erekar Mata-matakoti paniátano nota iuaá nisini. !Nimarotari kiatokouako ninaákanapaniko iuaá. ²³ Ikini sitatxiti nauakasaaki, Erekar Matamatakoti pinitano: “Piteniko takapeékako kateia áki iuaá. Iuaá pimisiritiko auapitikako,” itxano. Iuananira nimarota Xerosareé napokasaaki. ²⁴ Ikara nimisiritiko sákiertxiti kona mamakari nixinikakiti, kotxi kona nitiretari nauini íkorapokoriti. Xesosi Apiananiri paniátakiti paríkatxiti ninireka nikamini. Nipoxokoniritika nauini mapotókierepe nitxako. Xesosi paniátano Teoso iokanapirena erekari Teoso tiraóki nisápiretini kákiti.

²⁵ —Nisápiretapekari Teoso auítetxi ininiáua pirena híte sauaki nauakasaaki. Uatxa nimarotari híte híkinika kona hátamataikanoko nota. ²⁶ Ininiá híxinikapikariko nisákiere iaóka uatxa nisápiretakiti. Kákiti híte sauaki auakari pípínanakiniá, Teoso kimapore imimaro-takaniá, kona nota xikani. ²⁷ Kotxi nisápiretapekai hítemoni imakinika Teoso iokanapirena. ²⁸ Erepaniko, katokinani hítxako maerekati apokini hítemoni. Erekar Matamatakoti sikapekari kákiti hítemoni Xesosi sákiere hōerekini íkapani, ininiákara hiníkatana ninoa. Soti auíte níkatani atokokana hítxauako. Ninoa hípi-raakori atoko. Ininiá híttiretanako ninoa kákiti, kotxi Teoso nakitiakori itxauana. Teoso ákiri ipina ninoa íkapani, iua nakitiakori ininiuana íkapani. ²⁹ Nimarotari kákiti apokapitikako hítemoni nota sini tikini. Ninoa nirekari ixipokirinina híparíka Teoso íkapani. Xapakori patari imaíkini monókoni atoko itxako ninoa híte sauaki imonókoni apokini. Ininiá erepaniko. Katokinani hítxako. ³⁰ Áti óti kákiti híte oereékini sápiretakiti na atáoni. Koketakori sákiertxiti isápiretana apanakini Xesosi sákiere auíákani. Ikara xika apanakini auikari ninoa sákiere, ininiákara isanako ninoakata. !Auikaikarina híte sákiere. ³¹ Ininiákara erepaniko. Híxinikariko ipi anokanani áti anokanani pakini nota ótákiikanáta híte.

Noerekanātai hīte Teoso sākire ūkanōka, pokamara pakini. Ikiniōtika noerekai hīte. Nitxiapata nōtākikasaakii, kotxi nitiretai.

³² —Uatxa nisikai hīte Teosomoni, iua nīkatinii ūkapani. Nitakanapari Teoso sāpirena hītekata, kotxi iua sāpiretari isikini ikinipoko erekari. Iuara sikaposotiiretai hīte. Iuara sikai hīte erekari inīkatakiti, inakitiakorimoni isikini ūkapani. ³³ !Nixikotari apanakini. !Nimaākatari itxineirote, imākana pakini. ³⁴ Hīte imarotapitikari notaka parīkauata imakinika ninireēkiti, ni moianariakori nireēkiti apaka niamotini ūkapani.

³⁵ Ikara atoko aparīkauatiniā, atiretana kākiti maposotakaniua. Nota parīka oerekapekai hīte ikara atoko hīkamini. Maxinikari Xesosi Apiananiri sākire. Iua txari: “Teoso takari erekari kākitimoni iua amonitakiti apakapasaaki. Teoso takari apia erekari sikarauatakari-moni,” —Paoro txana ninoa Épesokinimoni, Teoso sākire auīākani auīteakorimoni.

³⁶ Iuasaaki Paoro kapotoreēkaua ninoakata. Imisākiretarina Teoso. ³⁷ Ninoa ikinimane txiapakata. Imaarākarina Paoro, apitxoka itxarina. Itakapiretanaparina. ³⁸ Apiata imatinanina, kotxi Paoro sāpiretana ninoa, !aōkitaikarina iua. Isana iuakata maporomoni.

Paoro Sari Xerosareēmoni

21 Maporo aāpokasaaki, ate takapiretanapana ninoa Épesokini. Eereka asipeka. Kosi pokomiriītimoni asakatapitipo. Iuaā aāpoka. Katimatinīkata asa Hotxi ioporokotemoni. Eereka Pátara sitatxitimoni asa. ² Iuaā aāpokaro āto maporo Penísia tixinimoni sikaro, ininiā aiereētaua atoko ate potorika asini. ³ Apaniāxiti apokasaaki, aātamatarari Xipri pokomiriīti. Anapari Xipri pokomiriīti asanaremoni. Asari Síria tixinimoni. Aāpokita Txiro sitatxiti, kotxi iuaā tiitxi maporo āki auakari kaikota. ⁴ Iuaā ate aōkitari kākiti Xesosi sākire auīākani, ininiā akaikota ninoakata āti semanati. Ninoa txari Paoro:

—Xerosareēmoni !pisipe, kotxi Erekari Matamatakoti sāpiretapekaua ate pimisiritiko tīkane aua iuaātaā —itxarina.

⁵ Apotorikini ōti apokasaaki, ate sipe iuaīkana maporomoni. Ninoa ikinika, ūtanoroakorokata, imiakorikata, isana atekata sitatxi ūtiniā ioporokomoni. Akinika akapotoreēkaua ikipatxiteē, misākireta atxari Teoso. ⁶ Atakapiretanapana iposo atoko, ate iereētaua maporo āki. Ninoa kanapiriā aapokomonina.

⁷ Ininiā Txiro sitatxiti atakanapa. Iuaīkana apotorika. Eereka aāpoka Pitoremaita sitatxiti. Iuaā ate misākiretana kākiti Xesosi sākire auīākani. Akaikota āti ōti ninoakata. ⁸ Katimatinīkata iuaīkana apotorika asini. Eereka aāpoka Sesaréia sitatxiti. Iuaā Piripi inakori aapokomoni asa. Teoso sākire sāpiretakari itxaua Piripi. Xesosi moianariakori Xerosareē auakasaakina, ninoa mereēri iua Piripi, apikomoni kikiakori seisi pakini, ninoa imoianatinina ūkapani. Ate kaikota Piripi aapoko. ⁹ Piripi auari ipi ipi pakini imiakoro ātokoropanika. Ninoa apaka sāpiretari Teoso iokanapirena kākitimoni. ¹⁰ Ate auanapa iuaā mapaōti. Iuasaaki

Teoso sākire sāpiretakari Ákapo inakori Xotéia tōpa potorikakari apoka Piripi aapoko. ¹¹ Ikosekari Paoro makiomatate. Iītxikari iuako ikitikata. Itxari:

—Erekari Matamatakoti txari: “Xoteoakori Xerosareē auakani iaxirikapiriko ia makiomataretxi nakititakari ia atokokanerako iaxirikiko. Eereka isikarina Xoteo minakonimoni” —Ákapo txaua ate.

¹² Ikara akenakotakasaaki, ate apanakini iuaā auakanikata txari Paoro:

—Paoro koniko !pisipe Xerosareēmoni —atxari.

¹³ Txamari Paoro:

—Kinirepa hītxiapanāta? Hīte kamamatinanitano nota. !Nimaākatari niaxirikiko Xerosareē. !Nimaākatari nokiko apaka Apiananiri Xesosi nauikini xika —itxaua ate.

¹⁴ !Ikīpitari asākire. Ininiā ate:

—Iaōpe. Ikara atoko ininiā, ate nirekari Teoso nireēkiti kamiko —atxa.

¹⁵ Mapaōti inapaka atoko, aāiamata Xerosareēmoni asini ūkapani. Eereka apotorika asini. ¹⁶ Apanakini Xesosi sākire auīākani Sesaréiakini sari atekata apaka. Menasō inakori aapoko ninoa anikaua ate, kotxi iuaā anirekari akaikotini. Menasō Xipri pokomiriītikiri. Okananipeka iua auikari Xesosi sākire.

Paoro Apoka Xerosareē

¹⁷ Xerosareē aāpokasaaki, Xesosi sākire auīākani apakapaua ate ipoxokoniritikana. ¹⁸ Katimatinīkata Paoro sari atekata Txiakomoni aianapokotini ūkapani. Ikinimane Xesosi sākire auīākani auīteakori aua iuaātaā. ¹⁹ Paoro misākiretana. Isāpiretana imakinika Teoso kamakiti Paoro parīkaā Xoteo minakaniua sauaki iparīkauatakasaaki. ²⁰ Ikara ikenakotakana atoko, ninoa txari:

—Peerekari Apiananiri —itxana.

Eereka itxarina Paoro:

—Aītari, pimarotari kaiāopokori Xoteoakori auikiniri Xesosi sākire. Ninoa auikari Moisesini oerekakiti sākiretxiti apaka. ²¹ Apanakini sāpiretapekana ninoa: “Paoro oerekanātana Xoteoakori, Xoteo minakaniua sauaki auakani, Moisesini oerekakiti itakanapinina ūkapani. Oerekanātana ninoa Teoso takaōtxikare imiakori ūtoā imatakakani ūkapani. Oerekanātana ninoa aātokiriakorini oerekakiti itakanapinina ūkapani.” Ikara atoko itxanātana ninoa. ²² Ninoa limarotapanikari pite uai apokini, ininiākara natokopa atxatari akaminiri, kotxi anirekari ninoa imarotiniri apanakini sāpiretakiti poxiene inini. Anirekari ninoa imarotiniri pite auikapitikari Moisesini oerekakiti. ²³ Ininiākara ia pikama. Naia ipi ipi pakini kikiakori misākiretari Teoso. Isāpiretarina Teosomonikari ikamaenetakitina tīkane. ²⁴ Ininiā pisa naiakata Moisesini oerekakiti iaōka hīkamini ūkapani, ininiākara hīkipaātaua Teoso ūkapani. Pite iīkitxitari naia kii kixatiko ūkapani. Ikara atoko ininiā, ikinimane imarotariko poxienetapa apanakini sāpiretakiti. Ninoa imarotariko Moisesini paniātakiti pikamini. ²⁵ Ni-noapekana, Xoteo minakaniua Xesosi sākire auīakanipekana, ate iokanatsopatapeka ninoamoni. Asāpire-

tana ate xinikakiti: —!Hinikapiriko nipokori teoso kākiti kamakitimoni sikakori. !Hinikapiri arēkatxi. Manotsaātakori xini !hinikape. !Hīsirīkape pītanoro minakotokatika. !Hīsirīkape pītaniri minakotokatika. Ikara atoko atxa ate ninoamoni aiokanatsopatini —itxarina Paoro.

²⁶ Ininiā Paoro anikana ninoa kikiakori. Katimatinīkata ninoa kipaātaua Teoso īkapani Moisesini oerekakiti iaōka ikaminina īkapani. Eereka Paoro īroā Teoso misākiretiko aikotiā. Isāpiretari sasetotxi ninoa keto ītona arokiko xipokini ōti, kotxi iuasaakiko sasetotxi apakapari ninoa sikakiti Teosomoni.

Paoro Maīkiko

²⁷ Iua semanati kaimapeka ixipokini inakasaaki, ātikaka Xoteoakori Ásia tixinikini atamatari Paoro Teoso misākiretiko aikoti āki. Ninoa misākirepiretari Paoro ikinimane kākiti iuaā apotiitakanimoni, ininiā ninoa sākire xika ikinimane omanatari Paoro. Eereka imaīkarina Paoroni. ²⁸ Ásia tixinikini akiripoata:

—Hīte Xoteoakori himoianataua ate. Ia kikiraa oerekari ikini itixitikini omanatinina Xoteoakori. Iara oerekari kākiti Moisesi paniātakiti imakamakani. Oerekari kākiti mapaxitakaniari ia Teoso misākiretiko aikoti. Īkorasaaki !ipaxitari ia aiko, kotxi imīīroāna Xoteo minakaniua aiko āki, ininiākara itxikotari ia aiko Teoso nakiti —itxanātana ninoa.

²⁹ Ikara itxana, kotxi mitxi itikarina kiki Xoteo minakatiua Tópimo inakori Épeso sitatxitikiri Paorokata tīpokotini sitatxi apanīkaki. Txamari Paoro !anikari iua aiko āki. Ininiā iuākatari Paoro anikapekari iua aiko āki. ³⁰ Ininiā iua Paoro maīkiko pirena iaripireta. Ikininape sitatxi auakani kenakoenetakasaakiri ikara, imitekana aikomoni. Imaīkarina Paoro. Ikosekaītotarina. Teoso misākiretiko aikotiā imipokiākatari Paoro. Iuasaakipeka aiko tore totaākapeka. ³¹ Kākiti iuaā apotiitakaniua nirekari okiniri Paoro. Sotatoakori Homano inakaniua ninoa auīte kenakoenetari ikini-manē Xerosareē auakani neenamauatini.

³² Iuasaakipeka sotatoakori auīte anikana sotatoakori. Imitekana Paoromoni. Kākiti atapakasaakina sotatoakori auīte sotatoakorikata, iuasaakiika iotoka Paoro iaritatinina.

³³ Ininiā sotatoakori auīte maīkari Paoro. Ipaniātana sotatoakori Paoro iaxirikini ipi kohētxiā. Iposo atoko ipimaāna kākiti itakote auakani:

—Kiripa ia kiki? Kixikapa ia atoko inaāka? —itxana ninoa.

³⁴ Ininiā ātikaka iuaā auakani, ia xikara. Apanakinipekana āti xikara, itxaāponātana isākirena. Sākiretixi kaiāopokori ininiā, iua !imarotari atāo ixika. Ikara atoko ininiā, sotatoakori auīte paniātana sotatoakori, ninoa aapokomoni anikinirina Paoro. ³⁵ Sotato aapokokiri kanikoatxiā apokasaakina, sotatoakori ōtanōkari Paoro īto, kākiti mamaīkakaniri īkapani.

³⁶ Kotxi kaiāopokori kākiti itikini īkani akiripoakata: —Hōkariko. Hōkariko —itxanātana.

³⁷ Paoro sotatoakori aapoko āki īīroānapanoka inakasaaki, Paoro txari sotatoakori auīte:

—Apakata pite nimisākiretini?

Ininiā sotato auīte tikoka.

—Pite imarotari Krekoakori sākire —itxari Paoro.

³⁸ —Kona piteni Exito tixinikiri pitxataua? Kona piteni kitatiki kamanātari neenamati auītetxiakori pomantini? Kona piteni anikatana ipi ipi pakini mio kokanirini ixaminakitekatanā āparaā makipakaniātaā? —ipimaāri Paoro.

³⁹ Ininiā Paoro:

—Kona notani. Xoteo nitxaua. Nota Taaso sitatxitikirirano nota. Taaso sitatxiti, sitatxi apiari inakari, Sirísia tixinikiri. Pauritano nakira kākiti nimisākiretini —itxari iua.

⁴⁰ Ininiā sotatoakori auīte:

—Ari, pimisākiretana.

Inakasaakiri Paoro tima kanikoatxiā. Iuasaaki ōkitikari iuako kākiti akiritini iotokini īkapani, isākire ikenakotinina īkapani. Ikinipoko iotokasaaki, iua sākirauata ninoakata Xoteo sākireē, Epiráiko sākireē.

Paoro Misākiretari Xerosareē Auakani

22 Ininiā Paoro:

—Nitariakori, niriakori, hīkenakotariko nisākire. Na maerekati na nikama. Erekarinokara nikama —itxa.

² Ninoa kenakotakasaakiri ninoaka sākireē, Epiráiko sākireē isākirauatini, !akiritaikana. Itsorīkaātana.

³ Ininiā Paoro:

—Xoteopitikarano nota. Niponaniā Taaso sitatxiti, Sirísia tixiniā. Eereka uai Xerosareē sitatxiti napoka. Uaikara naneē. Iuasaaki koerekareri kimatireri Kamarieo inakori oerekano imakinika. Iua oerekano akiomaneakorini kitxakapirīkarini paniātakiti imakinika. Nota parīkauata Teoso īkapaninokara, hīte parīkauatini atokotxikana. ⁴ Mitxipeka nota kapokotanā kākiti Xesosi sākire auīākani, Xesosi kimaporeē sikani. Nimaīkana, kateia āki oka nitxana. Kiki, sito pakini nimaīka. Nota xika ninoani ipīpe. ⁵ Sasetotxiakori auīte apiatakari, Xoteo auīteakori pakini imarotari atāopitika nisākire. Ninoakara sikano aātsopa iōkatsopatakittina auītetxiakorimoni Tamásiko sitatxiti auakanimoni nanikini īkapani. Iua aātsopa auiritano Xesosi sākire auīākani nimaīkini. Ininiā nota sari iuaā Xesosi sākire auīākani nimaīkini īkapani, Xerosareēmōni nimikanapiriinina īkapani imisiritikona tīkane.

⁶ —Apaniāxiti Tamásiko sitatxiti takote napokaāpotakasaaki, patimari iotximere iaxitikiri apokota notamoni. ⁷ Xiti nirika. Nikenakotari nakiriuākatiko: “Saoro, Saoro, kinirepa pite misiritano nota?” itxano.

⁸ —Ininiā nota: “Apiananiri, kiriparai pite?” nitxari.

—Ininiā iua: “Nota Xesosi Nasaree sitatxitikirikarano nota. Pimisiritakittikarano nota,” itxano.

⁹ —Nimoianariakori atamatari iua iotximere, ininiā ipīkarauatana. Na ikenakotarina nota misākiretakari.

¹⁰ Ininiā nota: “Apiananiri, kipa pinireka pitemōni nikaminī?” nitxari.

—Ininiã Apiananiri: “Ereë pitima. Tamásikomoni pisa. Iuaãtaã pisãpiretaãkako imakinika Teoso nireëkiti pikamini ïkapani,” itxa Apiananiri notamoni.

¹¹ —Iua iotximere xika mösiãreti nitxaua. Ininiã ni-moianariakori kanõpiãpotano. Anikanona Tamásikomoni. ¹² Iuaãtaã aua kiki Ananíasi inakori. Iua kamapikari akiomaneakorini kitxakapirïkarini paniãtakiti. Ikinimane Xoteoakori Tamásiko auakani iteene paxitari iua. ¹³ Iua ina notamoni. Nota takote apoka itxa. Itxano: “Nitari Saoro, kõiãre pitxako,” itxano nota.

—Iusaakipeka nota kõiãrepeka nitxa. Natamatari iua. ¹⁴ Iua: “Akiomaneakorini Teosone mereëi pite inirekakiti pimarotini ïkapani. Teoso mereëi pite Erekarinoka Kamakari patamatini ïkapani. Teoso mereëi pite Erekarinoka Kamakari sãkire pikenakotini ïkapani. ¹⁵ Pitekarako sãpiretariko itanapoko kãkitimoni atão Xesosì pirena, patamatakiti, pikenakotakiti pakini. ¹⁶ Ininiã kona okanani pitxape. Põkitikaua. Pipatxisataãkako. Pakiritariko Apiananiri uãka, ininiã iua makatxakari pimaerekani,” Ananíasi txano nota.

¹⁷ Eereka nikanapiriã Xerosareëmoni. Teoso misãkiretiko aikotimoni nisa. Iuaã Teoso nimisãkirenãtakasaaki, nitaponetari Apiananiri. ¹⁸ Natamatari iua. Itxano nota: “Katima pitxako. Xerosareë posipika uatxapeka. Uai auakani !auikapaniri nota pirena pisãpiretakiti,” itxa.

¹⁹ Ininiã nota: “Apiananiri, nota nitapekana kãkiti pisãkire auikani ikini aikoti Xoteo apotiitiniãtaãua. Niãsokapekana. Kateia ãki nitapekana. Ninoa imarotapitikari ikara nikamakiti. ²⁰ Pite sãkire sãpiretakari Estevão inakori okikosaaki, nota aua iuaã. Iusaaki ninïkatari kokanirini mãka inopinikiri. Nota apokaerekatari okinirina iuani.”

²¹ —Ininiã Apiananiri: “Pisipeka. Ötakoxiti niokanatai Xoteo minakonimoni,” itxano —itxa Paoro kãkitimoni.

Paoro Homano Itxaua

²² Iusaakipeka Xoteo minakonimoni isini xika, kãkiti iuaã apotiitakaniau !inirekaikarina Paoro sãkire inekotininina. Omanãkarauata. Akiripoakatana:

—Hõkariko. !Erekari auapanika inini —itxana.

²³ Akiripoakatana. Iõkokarina imãkana inopinikiri. Kipatxi okarapekatana apaka, kotxi omanãkarauata.

²⁴ Ininiã sotatoakori auïte paniãtana sotatoakori anikiniri Paoro aiko kaikori ãki, sotatoakori aapoko ãki. Ipaniãtana Paoro ixirokitatiko tïkane, kotxi inirekari imarotini Paoro omanatiko xika. ²⁵ Paoroni ïtxikasaakina ixirokitatiko ïkapani, Paoro pimaãri sotato itakote timakari:

—Erekari atxïiti hïte xirokitatiniri kiki Homano inakori maxikatïka? Homano nitxaua. Kixikapa hïte nirekari hïxirokitatinino? —Paoro txari iua.

²⁶ Ininiãkara sotato sari iauïtemoni.

—Iua kiki amaïkakiti Homano itxaua iua, ininiãkara erepaniko iuamoni pikamakiti tïkane —itxari.

²⁷ Ininiã sotatoakori auïte sari Paoromoni.

—Pisãpiretano. Homanokani pitxataua? —itxari Paoro.

Ininiã Paoro:

—Iuapitikanano nota.

²⁸ Sotatoakori auïte txari:

—Nota Homano nitxaua, kotxi niïkitxitari aãtsopa ïki Homano nininiuã ïkapani. Pakaroneri.

Ininiã Paoro:

—Niponaniãkasaaki Homano nitxapekua —itxa.

²⁹ Iusaaki Paoro xirokaaritakani patimari isinina. Sotatoakori auïte pïkarauata, Paoro Homano ininiuã imarotakasaaki, kotxi iua paniãtana sotatoakori ïtxikiniri Paoro.

Paoro Xoteo Auïteakori Apisatoõ

³⁰ Katimatinïkata sotatoakori auïte koxirikari Paoro. Inirekari imarotini Xoteo apoïtiniri, ininiã ipïkapiretana sasetotxi auïteakori, Xoteo auïteakorikata. Ipaniãtari Paoro itimini ninoa apisatoõ.

23 Ininiã Paoro iteene mixinitoõtana Xoteo auïteakori.

—Nitariakori, erekari nikaminiritika, uatxa uai naua. Teoso nireëkitinoka ninireka nikamini. Teoso imarotari ikara, kotxi imarotari nixinikakiti nãkixinireë —itxa.

² Sasetotxiakori auïte apiatakari Ananíasi inakori !ipotxitari Paoro sãkire, ininiã ipaniãtari Paoro takote auakani aritiniri Paoro sona. ³ Ininiã Paoro:

—Teosokarako aritaiko pite. Aapokotxi tare txïtatakorri atoko pitxa pite, kotxi mapara peerekai, txamari pãkixinireë maerekatnoka. Pite topãkanãta ereë nota pikenakotini ïkapani akiomaneakorini paniãtakiti iaõka pikamini ïkapani, txamari pipaniãtari niaritiko. Akiomaneakorini na paniãtari ikara atoko inakari. Pite kona kamari ninoa paniãtakiti —Paoro txari iua auïtetxi.

⁴ Paoro takote auakani txitari Paoro:

—!Erekari pimisãkirepiretiniri sasetotxi auïte apiatakari Teoso nakiti —itxana.

⁵ Ininiã Paoro:

—Nitariakori, !nimarotari iua sasetotxi auïte apiatakari ininiuã, kotxi Teoso sãkire iõkatsopatakori txari: “Kona pimisãkirepiretapiri hïauïte.”

⁶ Paoro atamatana kãkiti iuaã apotiitakaniau. Apanakini satoseoakori itxauana. Apanakini pariseoakori itxauana. Ininiã itapararitika isãpiretana:

—Nitariakori, pariseokarano nota. Pariseo ãkirikarano nota. Uai nota minaãka hïte apisatoõ, kotxi nota auikari ipïkanipeka õkitikiniua, iuaïkana auãki ininina ïkapani —itxana ninoa.

⁷ Iusaakipeka pariseoakori, satoseoakori pakini taparakienatakakaua, kotxi pariseoakori auikari Paoro sãkire. Satoseakori !auikari Paoro sãkire. ⁸ Kotxi satoseoakori !auikari ipïkari õkitikiniua, iuaïkana auãki inini ïkapani. Kona auikarina Teoso nitiriakori iaxitikini auini. Kona auikarina matamatakoni auini. Pariseoakori auikari ipïkari õkitikiniua, iuaïkana auãki inini ïkapani. Auikarina Teoso nitiriakori auini. Auikarina matamatakoni auini apaka. ⁹ Iusaaki ikinimane apia

akiripoakata. Itaparakienatakakauana. Pariseoakori, kaiōkatsoparerini inakoni, ōkitikaua. Itapararitika itxana:

—Atemoni ia kiki !ikamari maerekati. Atxiiti mata-matakoti, atxiiti Teoso nitiri iaxitikiri sākirauata iuakata. Ininiākara !apakata anaiatiniri Teoso —itxana.

¹⁰ Ninoa iteene taparakienatakakauana, ininiā ineenamauaaritana. Sotatoakori auīte pīkari ninoa okiniri Paoro, ininiā ipaniātana sotatoakori:

—Hīsako kākiti sauaki apanīkaki. Iuaā himakaxakariko Paoro. Hanikariko sotatoakori aapokomoni —itxana.

Ininiā anikarina iuaā.

¹¹ Āti ūkanōkati Apiananiri apoka Paoromoni. Paoro takote itima. Itxari:

—Kataparaxinire pitxako. Pisāpiretapekari nota pirenauai Xerosareē. Apaka pisāpiretariko nota pirenaua sitatxiti —itxari.

Xoteoakori Nirekari Okinirina Paoro

¹² Katimatinīkata apanakini Xoteoakori apotiitaua. Ixinikarina Paoro okini ūkapani. Ninoa txari:

—!Anipokotapani, !aātapani, Paoro aōkini apisa —itxana.

¹³ Ninoa Xoteoakori koarēta apikomoni. ¹⁴ Eereka ninoa sari sasetotxi auīteakorimoni, kiomātxiakori pakinimoni. Ninoa txana:

—Ate okaenetari Paoro. !Anipokotapani iua aōkini apisa. ¹⁵ Ininiā hīte aāuīteakori amanaāriko sotatoakori auīte, imininiri Paoro uai. Hīsāpiretariko sotato auīte, hinirekari apikomoni hīpimainiri Paoro. Iuasaaki ate iātapariko kimaporiā aōkiniri ūkapani —itxana ninoa.

¹⁶ Paoro itaro ākiri kenakoenetari Paoro okaenetiko, ininiākara ūroā sotatoakori aapoko, sāpireta itxari iritanirimoni. ¹⁷ Ininiā Paoro misākiretari sotato auīte poiāori.

—Panikari ia ātokori hīauītemoni. Iminapiretakiti inireka isāpiretiniri iua —itxa.

¹⁸ Ininiā sotato auīte poiāori anikari iua auītemoni.

—Ate maīkakiti Paoro misākiretano nota, ia ātokori pitemoni niminini, kotxi inirekari isākirauatini pitekata —itxari.

¹⁹ Ininiā apiari anikari iuakoā ninoanani auiniātaā. Ininiā iua:

—Kipa pinireka pisāpiretinino? —itxari.

²⁰ Ininiā iua ātokori apakapapiretari:

—Xoteo auīteakori nirekari amanainii katana poka-mara Paoro panikini ninoamoni. Isāpiretainako pite, inirekapanikarina apikomoni Paoro sākire ikenakotini-na. Txamari paxirari ninoa sākire. ²¹ !Pauikapena, kotxi koarēta apikomoni kikiakori kipatauako kimaporiā Paoro iātapinina, okinirina ūkapani. Ninoa kikiakori txapeka !inipokotaikana, liātaikana, Paoro imokakinina apisa. Ninoa iposopeka kimaporiā iātapinirina Paoro. Ninoa iātapari ninoa nirekakiti pikamini —itxari sotato auīte.

²² Ininiā sotato auīte:

—!Pisāpiretapiri notamoni pisāpiretakiti apanakini-moni.

Ininiā iokanataru ātokori ikanapiriini aapokomoni.

Paoro Iokanataāka Périsi Inakorimoni

²³ Iposo atoko sotato auīte pīkapiretana ipi sotatoakori auītetxi poiāoni inakaniua. Imisākiretana:

—Hāpotiitana tosētosi sotatoakori ikitiā sikani, setēta sotatoakori kavaro nopini sikani, tosētosi sotatoakori meretaua anikakani pakini. Iposope hītxako ia ūkanōkati novi oara hīpotorikini Sesarēia sitatxitimoni hīsini ūkapani. ²⁴ Kavaroakoro hīsikari Paoro, oa nopini isini ūkapani. !Hāuiritapiri Paoro okiko. Hanikari Paoro Homanoakori auītemoni Périsi inakorimoni —itxana ninoa.

²⁵ Iposo atoko sotato auīte iōkatsopata:

²⁶ Nota Krāotxio Arisia inakorino iōkatsopata apiarimoni, pite Périsi aāuītemoni. Ereēkai. ²⁷ Ia kiki Paoro inakori Xoteoakori maīkakiti. Ninoa nirekari okiniri. Nota, nisotatoneakorikata makatxakari iua, kotxi Homano itxaua. ²⁸ Ninirekari nimarotiniri kixikapa ninoa nirekari okiniri Paoro, ininiākara nanikari iua Xoteoakori auīteakori apotiitiniātaāua. ²⁹ Iuaā nimarotari ixika !uuri kateia āki ikaikotini ūkapani. Ixika !uuri ipinini ūkapani. Ninoa apoītari iua ninoa atokiriakorini paniātakiti imakamakani xika. ³⁰ Nikenakopiretari Xoteoakori okaenetiniri Paoro, ininiā niokanataru iua pitemoni. Nipaniātana Paoro apoītakani isāpiretinini Paoro kamakiti. Iananirako niōkatsopata. Ereēpiko, itxa sotato auīte sākire Périsimoni.

³¹ Sotatoakori auīte paniātiniri atokokana sotatoakori anikari Paoro. ūkanōka anikarina Ātxipatirixi sitatxitimoni. ³² Katimatinīkata sotatoakori ikitiāna sikaninani-ra kanapiriā sotato aapokomoni. Kavaro nopini sikani anikari Paoro apikomoni. ³³ Anikarina Sesarēia sitatxitimoni. Isikarina Paoro iōkatsoparikata auītetximoni, Périsi inakorimoni. ³⁴ Ininiā iua atatsopataru iua iōkatsopari. Iposo atoko ipimaāri Paoro:

—Kitixinepa paua? —itxari iua.

Ininiā Paoro:

—Sirisia tixinikirirano —itxa.

³⁵ Ininiā Périsi txari:

—Pikamapiretakini apokasaaki, nikemariko pisākire —itxa.

Ininiā ipaniātana sotatoakori:

—Erotxini kamakiti aikoti āki hinīkatariko Paoro.

Paoro Apoītiko Pirena

24 Sīko ōti auakasaaki, sasetotxiakori auīte api-atakari Ananíasi inakori sari Sesarēia sitatxitimoni. Apoka iuaā kiomātxiakorikata, kiki Tétoro inakorikata apaka. Iua Tétoro kākiti ūkapani kasākireri kākiti misiritiko mereēkari apisatoō. Ninoa apoka Périsi apisatoō Paoro apoītini ūkapani. ² Ninoa apokasaaki, sotato minari Paoro Périsi apisatoō. Iposo atoko Tétoro akiritaāka isākirauatini ūkapani. Ininiā Tétoro apoītari Paoro:

—Périsi, apiari pitxaua. Auñtetxi kimatireri pitxaua, kotxi mapakanani atixine neenamatzí !auari. Mitxi kaiãopokori maerekati kamakori. Uatxa maerekati poiãõpota, kotxi pite kamari erekari kãkiti ïkapani. ³ Erekapitikari pikamakiti ate ïkapani. Ate apokaerekatari. ⁴ Kona ninirekari niomakotetini pite, ininiãkara nisãkire poiãõka apikomoni nisãpiretai, ininiã pikenakotari nisãkire.

⁵ —Ia kiki !erekari. Pamonõkoniri. Itxïkitakari Xoteoakori neenamauatini ikini itixiti. Kiki Nasaree sitatx- itikiri sãkire auñãkani auñte itxaua iua Paoro. ⁶ Teoso misãkiretiko aikoti imapaxitakanisaaki, ate maïkari iua. Akiomaneakorini oerekini atoko atxamariko Paoro. ⁷ Txamari iuasaakipeka sotatoakori auñte Arísia inakori apoka iuaã. Imaktxakari Paoro itapararitika ate saua- ki. ⁸ Eereka Arísia paniãtaua pitemoni ainini. Pite pi- maãriko Paoro, ininiã pimarotari asãpiretakiti inipitika inini —Tétoro txari Périsi.

⁹ Iuasaaki Xoteoakori iuaã auakani:

—Ari, inipitikara isãkire —itxarina Périsi.

Paoro Sãkire Périsi Apisatoõ

¹⁰ Iposo atoko Périsi paniãtari Paoro isãpirenauatini. Ininiã Paoro: —Nimarotapitikari kona uatxakani ate tixine auakani misiritiko mereëkari pitxaua. Ininiãkara nota apokaerekatari pitemoni nisãpiretiniri nikamakiti. ¹¹ Tosi õti pakini napakari nisa Xerosareëmoni Teoso nimisãkiretini ïkapani. Pipimaãri apanakini atãokani nisãkire. ¹² Nanera !ikenakotari nota txitiniri ãti Teoso misãkiretiko aikoti ãki. Ikininape Xoteo apotiitiniã- taãua aikoti ãki !atamatarina neenamatzí nikamãki- takini. ãtiãtaã apaka !atamatarina nitxïkitakiniri kãkiti neenamatzí ikaminina. ¹³ Nanera maxikatïka kamapiretano nota. !Itikanona nota maerekati nikami- ni. ¹⁴ Nota auikari Xesosi sãkire. Ia atão. Naneramoni Xesosi sãkire na atão. Nota parïkauata ate atokiriakori- ni Teosone ïkapani Xesosi sãkire nikïpitakasaaki. Moi- sesini paniãtakiti apaka nauika. Teoso sãkire sãpire- takanini iõkatsopatakiti apaka nauika. ¹⁵ Nanera auikari Teoso õkitikinina ikininape kãkiti ipïkani. Erekarini, maerekani apaka õkitikauako iuañkana auãki ininina ïkapani. Nota apaka auikari ikara. ¹⁶ Ikinioñtika ninirekari atãonoka nikamini Teoso ïkapani, kãkiti ïka- pani apaka.

¹⁷ —Ninapapekari mapakanani ãtiãtaã, eereka nikanapiriã Xerosareëmoni. Iuaã nisa txineiro niniri- manemoni matxineirotenimonini nanikini ïkapani. Apa- ka iuaã ninirekari nisikaenetakiti Teosomoni nisikini. ¹⁸ Nisikaenetakiti Teosomoni nisikasaaki Teoso mis- ãkiretiko aikoti ãki, nikipaãtaua Moisesini oerekakiti iaõka. Iuasaaki Xoteoakori Ásia tixinikini itikano nota. Kãkiti apotiitakaniua !auari notakata iuasaaki. Neena- matxi !auari iuasaaki. ¹⁹ Ninoa itikano. Maerekati nika- maãkamako, kinirepa kona ninoa apoka uai uatxa pite isãpiretinina ïkapani? ²⁰ Ninoa uai mapokakanisaaki, pipimaãna nanera ikenakotakitina, itikakitina nota Xoteo auñteakori apisatoõ nauakasaaki. Kipa atxïiti ni- maerekani iuasaaki? Iuasaaki kona nikamari

maerekati. ²¹ Atxïiti iuasaaki nanera !apokaerekatari nisãkire, kotxi nitxana: “Nota auikari ipïkani õkitikinina, iuañkana auãki inini ïkapani. Ikara nauikakiti sãkiretxiti xika hñte mañkano nota.” Atxïiti nanera !apokaerekatari ikara nisãkire —itxa Paoro sãkire Périsimoni.

²² Périsi iteene imarotapekari Xesosi oerekakiti sãkiretxiti. Iua misãkiretana ninoa:

—Sotatoakori auñte Arísia inakori apokapanikako uai. Iuasaakiko nisãpiretari kiãtokopa nitxatari Paoro. Uatxa xipope asãkire —itxa Périsi.

²³ Ipaniãtari sotato auñte poiãõri inakori Paoro nïkatakari ïkane:

—Pinïkatariko Paoro. Pauiritariko inirekiniãtaã isini. Pauiritariko inirimane apokini iuamoni. Pauiritariko inirekakiti isikinirina —itxa Périsi.

Paoro Sãkirauata Périsi, Tosira Pakinikata

²⁴ Mapaõti napa atoko Périsi ïtanorokata Tosira in- akorokata apoka Paoro auiniãtaã. Xoteo oa. Périsi pïkapiretari Paoro. Iua apokasaaki, Paoro sãpiretana ninoa Kristo Xesosi sãkire auikiko, ininiã ninoa kenako- tari. ²⁵ Paoro sãpiretari Teoso sãkire atão inakari kamiko pirena. Isãpiretari Teoso sãkire ïtotxi nireëkiti amakamakani. Isãpiretari kãkiti misiritiko itixi xipokini õti apokasaaki. Ininiãkara Périsi pïkarauata.

—Iaõpe. Pisipe. ãti õti nipañka mauakanisaaki, iuañkana nipïkapiretai —itxari.

²⁶ Périsi nirekari Paoro sikiniri txineiro iuamoni, isikakiniri ïkapani. Ininiãkara itokata ipïkapiretari Paoro iuakata isãkirauatini.

²⁷ Ipikanani napa atoko Póσιο Pésito inakori auñtetxi txapekaua, ininiã Périsi sipe. Périsi nirekari Xoteoakori apokaerekatiniri iua, ininiã isini apisa !isikakari Paoro, ininiã Paoro kaikotapanika kateia ãki.

Paoro Amanãri Sesakata Isãkirauatini

25 Pésito aua Sesaréia sitatxiti ipi ãti pakini õti, eereka isari Xerosareëmoni. ² Iuaã sasetotxi auñteakori, Xoteo auñteakori pakini kamapiretari Paoro Pésitomonini. ³ Ninoa iteene amanaãri Pésito:

—Pikamariko ate nireëkiti. Piminariko Paoro uai Xerosareëmoni —itxana.

Ikara ninoa nireka, kotxi okaenatarina Paoro ipix- inipokoriti. ⁴ Txamari Pésito apakapapiretana:

—Kona, Sesaréia sitatxitikarako aua Paoro. Mapaõti napa atoko nota kanapiriã iuamoni. ⁵ Hinirekiniãri, ãtikaka hñte sari iuamoni notakata. Iuaã hñsãpiretari Paoro kamakiti maerekati —Pésito txana ninoa.

⁶ Pésito napari ipi semanati Xerosareë. Eereka ikanapiriã Sesaréiamoni. Katimatinïkata ïroã aiko kãkiti misiritiko sãpiretikoãtaã. Iuaã ipïkapiretari Paoro.

⁷ Paoro apokasaaki, Xoteo Xerosareëkini ãkitari iua. Apoñtarina iua maerekati kaiãopokori ikamakiti, txam- ari imaerekani itikakari !auari, kotxi !ikamari maerekati. ⁸ Eereka Paoro:

—Maerekati na nikama. Xoteoakori aãtokiriakorini paniãtakiti nikamapitika. Teoso misãkiretiko aikoti ni-

paxitapitika. Homano auíte paniätakiti, Sesa inakori paniätakiti nikamapitika —itxa.

⁹ Pésito nirekari Xoteoakori apokaerekatiniri iuaka, ininiä ipimaäri Paoro:

—Pinirekatari Xerosareë pisini? Iuaärako nota kenakotariko nanera säkire, pite säkire apaka —itxa.

¹⁰ Txamari Paoro:

—Konapitini. Homano nitxaua. !Apakata Xerosareë Xoteoakori apisatoõ nisäkire kenakotiko. Uaikara Homanoakori auíte Sesa nirekari Homano säkirauatini käkiti misiritiko säpiretakani apisatoõ. Erekari uai pikenakotiniri nisäkire. Pite iteene imarotari kona xatiki maerekati nikama Xoteoakorimoni. ¹¹ Ixika auiniä nipinini ikapani, maerekati nikaminiä, ininiä apakata nipinini. Txamari nanera na atäo apoïtano nota, ininiä naneramoni nisikanapakiri !auari. Ninirekari Sesamoni nisini —itxa Paoro säkire.

¹² Ininiä Pésito säkirauata iua õtäkikakanikata Paoro Sesamoni isini ikapani. Eereka apakapapiretari Paoro:

—Pite nirekari Sesamoni pisini, ininiärako iuamonirako pisa —itxari Paoro.

Pésito Säkirauata Akiripakata

¹³ Mapaõti napa atoko auítetxi Akiripa inakori apoka Sesaréia itaro Perenisi inakorokata. Ninoa ianapokota Pésitomoni. ¹⁴ Mapaõti napa atoko Pésito säpiretari Paoro Akiripamoni:

—Uai aua kiki kateia äki Périsi takakiti Paoro inakori.

¹⁵ Xerosareë napokasaaki, sasetotxi auíteakori, Xoteo auíteakori apaka apoïtari iua. Inirekarina nota paniätiniri iua okiko. ¹⁶ Txamari nisäpiretana: “Homanoakori kona okari käkiti äti apoïtakiti, iua apoïtakiti säkire imakenakotakani apisa. Merepanika erekari iua apokini iua apoïtakanikata käkiti misiritiko mereëkari apisatoõ, ninoa säkire käkiti misiritiko mereëkari kenakotiniri ikapani,” nitxana.

¹⁷ —Paoro omanatakani uai apokasaaki, katimatiniäkata niïroã käkiti misiritiko säpiretikoãtaã. Iuaä nipikapiretari Paoro, ininiä iua apoka iua omanatakani apisatoõ. ¹⁸ Ninoa säkirauata. Apoïtarina Paoro. Niuaëkatari ninoa säpiretiniri maerekati Paoro kamakiti. ¹⁹ Txamari ninoa auiaëkiti säkiretxiti xika ninoa omanatari Paoro. Kiki ipikari Xesosi inakori xikara apoïtarina. Paoro auikari Xesosi iuaikana auäki inini. Ninoa !auikari Xesosi õkitikiniua.

²⁰ —Iuasaaki na nimarotari nikamakiti tïkane. Ininiä nipimaäri Paoro: “Na pinirekatari Xerosareë pisini? Iuaä pite apoïtakani, pite pakini kenakotaäkako,” nitxari Paoro. ²¹ Txamari iua apakapapiretano: “Kona. Sesamonira ninireka nisini,” itxano nota. Ininiä notara paniätari iua kateia äki ikaikotiniritika niokanatariko Sesamoni —itxa Pésito.

²² Ininiä Akiripa:

—Nota nirekari nikenakotiniri iua kiki säkire —itxa. Ininiä Pésito:

—Katanarako pikenakotari iua säkire —itxa.

Akiripa, Perenisi Pakini Apoka Pésitomoni

²³ Katimatinïkata Akiripa, Perenisi pakini apoka, ito- maneri initiriakorikata. Peeremäkapokona. Iïroãna käkiti apotiitiniätaãua. Sotato auíteakori, sitatxi auakani auíteakori pakini iïroã. Eereka Pésito pïkapiretari Paoro, ininiä Paoro minaäka. ²⁴ Ininiä Pésito:

—Pite, Akiripa, hïte atekata apotiitakaniua apaka, hätamataria kiki. Ikinimane Xoteoakori uai auakani, Xerosareë auakani apaka !apokaerekatari ia. Isäpiretanona ia maerekati ininiua. Ninoa amanaãno ia okiko.

²⁵ Notamoni maerekati !ikama ia. Notamoni ixika !auari ipinini ikapani. Eereka ia amanaãno apiari Sesamoni isini, ininiä nota auiritari isini. ²⁶ Txamari !nimarotari ixika niökatsopatinini Sesamoni. Ininiäkara nimirari Paoro hïte apisatoõ isäkire hïkenakotiniri ikapani. Akiripa, apiari pitxaua pite, ininiä ninirekari pite säpiretinino nota niökatsopatakiti tïkane. Ia hïkenakotaka atoko hïsäpiretano Sesamoni niökatsopatinini ikapani.

²⁷ !Apakata kateia äkikiri Sesamoni niokanatinini ixika nimasäpiretakaniä, kotxi Sesa nirekari imarotiniri ikamakiti xika.

Paoro Säkirauatini Akiripa Apisatoõ

26 Eereka Akiripa paniätari Paoro:
—Nauritai pisäpiretininiua pimaïkiko xika.

Ininiä Paoro õkatari iuako isäkire isäpiretinini ikapani. Iposo atoko Paoro säkirauata, maerekati imakamakani ninoa imarotini ikapani.

² —Aãuíte Akiripa, notamoni erekari pite apisatoõ nisäpiretiniri Xoteoakori apoïtinino. ³ Kotxi pite iteene imarotari ate atokiriakorini oereëkiti, Xoteoakori paniätakiti. Ininiä namanaäi pikenakotiniri nisäkire imakinika.

⁴ —Xoteoakori imarotano nota ätokoripanika ninakasaakia, nitixine nauakasaaki. Eereka Xerosareë nauakasaaki ninoa imarotano. Imarotarina ikiniõtika nauini. ⁵ Mixakapokoni ninoa imarotano nota. Imarotarina pariseo nininiãua. Ikara isäpiretaina, inirekiniãna. Käkiti pariseo inakari iteene auikari ate atokiriakorini oereëkiti säkiretxiti.

⁶ —Xoteoakori uatxa omanatano nota, kotxi nauikari Teoso sikaenetakiti ate atokiriakorimoni apokapeka uatxa. ⁷ Ate nirimane, tosi pakini nirimanetxi, iätapari ikara Teoso sikaenetakiti apokini õti. Ninoa parïkauata Teoso ikapani ïkanõka, pokamara pakini. Niauíte Akiripa, ikara Teoso sikaenetakiti xika Xoteoakori maïkano nota. ⁸ Kinirepa hïte !auikari Teoso posotiniri ipikari õkitikini, iuaikana auäki inini ikapani?

⁹ —Mitxipeka nota omanatari Xesosi Nasareekiri, hïte omanatiniri atokokana, ininiä nikapokotari isäkire auiaëkani. ¹⁰ Xerosareë nauakasaaki, nikapokotari isäkire auiaëkani. Sasetotxi auíteakori auiritano käkiti Teoso nakitiakori kateia äki nitakini. Kaiãopokori nita- ka kateia äki. Xoteo auíteakori nirekasaakiri okinina, nota apaka nirekari. ¹¹ Nisari Xoteo apotiitiniua aikotimoni ikininape Xesosi säkire auiaëkani nimisiritini ika-

pani. Ninirekari Xesosi sākire auikiko xipokini. Iteene nomanatana, ininiākara nisari apanakini sitatxitimoni ninoa nikapokotini ũkapani.

¹²—Ikara xika nisari Tamásiko sitatxitimoni. Sasetotxi auŕteakori auiritano nisini. Ipaniātanona Xesosi sākire auiaĕkani nimaĕkini. ¹³Ipixinipokoriti, apaniāxiti iotximere iaxitikiri apoka notamoni. Atokatxi iotximere poiāoka. Ikara iotximere apiata. Iua iotximere āki nota nimoianariakorikata aua. ¹⁴Ate iriākata xitipe. Iuasaakipeka nikenakotari nakiritiko: “Saoro, Saoro,” itxano Epiráiko inakori sākiretxitiā. “Kixikapa pimisiritano nota? Piteka pimisiritaua, nota pimisiritakasaaki. Atxiĕti kema auŕteka karotaua ipitikiri aāketeē. Iua kema auŕte atoko pitxa,” itxano.

¹⁵—Ininiā nota: “Apiananiri, kiriparai pite?” nitxari. —Ininiā iua: “Xesosira nota, pimisiritakitikarano nota. ¹⁶Pitima. Nota oerekaua pitemoni, pite nimereini ũkapani, ninitiri pininiua ũkapani. Uatxa pitikakiti pisāpiretako apanakinimoni. Pisāpiretapanikariko ikinimane kākiti apikomoni noerekakiti ũkane. ¹⁷Ninĕkataiko pite Xoteo sauaki pauakasaaki, Xoteo minakaniua sauaki pauakasaaki apaka. Xoteo minakonimoni niokanatai pisini. ¹⁸Kākiti ipiāā sikani atoko itxana, kotxi ũmarotarina Teoso sākire. Mōsiāreni atoko ninoa, kotxi ũatamatarina Teoso kimapore. Ininiākara pitekara oerekanako Teoso sākire ikimapore imarotininina ũkapani, ipiā itakanapininina, ikamaramoni isininina ũkapani. Ininiākara ũkamaikari Satanasi paniātakiti. Teoso paniātakitinoka ikamana eereka. Ininiā ninoa auikariko nisākire, ininiākara nota makatxakariko ninoa maerekani. Ininiā Teoso nakitiakori ninoa apaka txauana,” Xesosi txano nota.

¹⁹—Niauŕte Akiripa, ikara atoko ininiāra, nikamapekari imakinika Xesosi paniātakiti, iaxiti iotximere apokasaaki nikenakotakiti. ²⁰Nisāpiretari Xesosi sākire merepitipanika kākiti Tamásiko sitatxiti auakanimoni, eereka nisāpiretari Xerosareē auakanimoni. Eereka nisāpiretari ikinimane Xotéia tōpa auakanimoni. Eereka nisāpiretari kākiti Xoteo minakonimoni. Nisinimoni nisāpireāpotana ninoa: “Himaerekani hĕtakanapako. Hāuikariko Teoso sākire. Erekarinoka hĕkamako, ininiākara aimarotapitikari maerekati hĕtakanapini,” nitxana. ²¹Ikara atoko nitxana ikinimane nisāpiretini. Ikara nisākire xika Xoteoakori maĕkano nota Teoso misākiretiko aikoti āki nauakasaaki. Kinirāo okaka itxanona. ²²Uatxa nauapanika, kotxi Teoso nĕkatano nota. Ininiā ia ŕti Xesosi sākire nisāpireta hĕte apiarinimoni, hĕte poiāorinimoni apaka. Moisesini sāpiretakiti iaōka nisāpireta. Teoso sākire sāpiretakani sāpiretakiti iaōka nisāpireta. Ninoa sāpiretari Teoso mereĕkiti apokini. ²³Ninoa txari: “Teoso Mereĕkiti apokako. Iua misiritaākakako. Iuakarako ŕkitikaua ipinaka atoko. Iuaĕkana auāki itxako. Mitxi ipinakariko ũkitikaua. Merepanika iua ŕkitikaua. Iuara sāpiretariko Xoteoakori maerekani makatxakiko, Xoteo minakaniua maerekani makatxakiko apaka,” itxana Teoso sākire sāpiretakani. Ninoa sāpiretakiti iaōka nota sāpiretai apaka —itxa Paoro.

²⁴Paoro ikara atoko inakasaaki, Pésito akiritari: —Paoro, ũkĕkitei. Pimapitxiriāpota iteene papaiaōkaruatini xika —itxa.

²⁵Ininiā Paoro: —Niauŕte Pésito, kona nimapitxirita nota. Atāopitikara nisākire nikama. Erekariko nisākire. ²⁶Niauŕte Akiripa, pimarotapekari nota sāpiretakiti, ininiā kataparaxinireno nimisākiretinii. Pimarotari Xesosi pirena, kotxi Xesosi ipĕkasaaki, kona kipatakoriātaāni ipina. ²⁷Niauŕte Akiripa, pite auikatari Teoso sākire sāpiretakani sākire? Nota imarotari pite auikiniri.

²⁸Ininiā Akiripa: —Pite sākire txĕkitakaaritano nota Xesosi sākire nauikini —itxari.

²⁹Ininiā Paoro: —Teoso imarotari. Ninirekari pite, hĕte hĕkinika uatxa nisākire kenakotakani pakini iteene hāuikiniri Xesosi sākire nota auikiniri atokotxikana. Txamari kona nota nirekai hĕte kateia āki hāuini nota atoko —itxa Paoro sākire.

³⁰Paoro sākirauataka atoko auŕtetxi Akiripa, itaro Perenisi, Pésito, ikinimane ninoakata ũkani pakini, itimana. ³¹Iporikiti ipokĕkasaakina, imisākiretakakana: —!Auari ikira kiki okiko xika. !Auari kateia āki itakiko xika.

³²Ininiā Akiripa txari Pésito: —Ikira kiki mamanaākaniāri Sesamoni isini, isikakaākapiimako.

Paoro Potorika Homamoni Isini

27 Eereka Pésito sāpiretaua ate iketo apope Itária tixinimoni aĕpiriātini. Paoro apanakini maĕkakoni apaka sikaāka Xório inakorimoni. Iua Xório seĕ pakini sotato auŕte itxaua. Sesa sotatone itxaua. ²Ate iereĕtaua maporo āki, Ataramĕtxio sitatxitikero āki. Ásia tixinimoni sikaro oa maporo. Kiki, Arisitako inakori sari atekata. Iua Tesarónika sitatxitikiri, Masetónia tixinikiri iua Arisitako. Ininiā ate sipe. ³Katimatinĕkata ate apoka Sitoō ioporokoti. Xório tiretari Paoro, ininiā auiritari iua aōkimaneremone isini iuaā, inirekakiti apakapini ũkapani. ⁴Eereka ate potorika iuaā. Iuasaaki ŕtima inataparata aāpisamoni, ininiā maporo iopiriāri Xipri pokomiriĕti ŕtima manapakaniātaā. ⁵Ate ĕpiriātari potxoari uiniti. Sirísia tixini takote anapa. Pāpírĕia tixini takote anapa. Ate apoka Miha sitatxiti, Arísia tixiniā. ⁶Iuaā sotato auŕte apokaro maporo Arexātria sitatxitikero, Itária tixinimoni sikaro. Iua iereĕtakaua ate oa maporo āki.

⁷Iuaĕkana apotorika. Iuasaaki ŕtima inataparata aāpisatoō, ininiā ianaritika asaāpota mapaĕtipeka, ininiā eereka aāpoka Sinito sitatxiti apisatoō. ŕtima tapara xika !aposotaika apikomoni asini anirekinimoni, ininiā aiopiriāri Kreta pokomiriĕti ŕtima manapakaniātaā. Iuaā anapari Saomona pokomiriĕti. ⁸Ianaritika asaāpota imiriĕ takote. Aāpoka ioporoko “Ioporoko Erekariko” akiritikoātaā, Araséa sitatxiti takote.

⁹Iuaā aāuapokota. Pamondkoniri apikomoni asini. Kiiniri Teoso ũkapani kākiti manipokotakani inapapeka,

ininiã imarotaãka ðtima kataparari kaiamapeka apokini. Ininiã Paoro ðtãkikana ninoã:

¹⁰—Apikomoni asiniã, pamonõkoniri. ðtima kataparari kasaikamaro maporo atiikata. Kãkiti ipinako —itxa Paoro.

¹¹Txamari sotatoakori auñte !auikari Paoro sãkire. Iua auikapiretari kamaporoteri sãkire, maporo nãkatakari pakini sãkire. ¹²Kaiãopokori maporo ãki parĩkauatakani txari:

—Ia ioporoko kona erekari mitaã anapini. Masa apikomoni. Atxiñti aposota Penisi sitatxitimoni aãpokini. Iuaã manapakakari mitaã —itxana.

Penisi sitatxiti Kreta inakori pokomirĩiti ioporokoti. Atokatxi ereëkokini manapi aua Penisi sitatxiti.

ðtima Kataparari Pirena

¹³Iuusaaki ðtima poiãoka apokaãpota ate tikinimoni, ininiã ninoã uãkatari:

—Uatxaika erekapekari Penisi sitatxitimoni asini —itxana.

Ininiã ðtanõkarina kai, maporo mañkiko, ininiã potorika atxa. Kreta mirĩiti takote anapaãpota. !Anirekari potxoari uiniti apanĩkakiã asini, kotxi pamonõkoniri iuaã. ¹⁴Txamari patimari ðtima iteene inataparata Kreta pokomirĩitiki. ðtima uãka “Atokatxi Pokĩkini-monikiri.” ¹⁵Ininiã ðtima apoka maporomoni. Pataparari. !Aposotari ðtima ininimoni asini, ininiãkara aãuiritari ðtima anikiniro maporo ðtima sinimoni.

¹⁶Aiopiriãri Kaota inakori pokomirĩiti. Iua pokomirĩi xapitiri. Iua pokomirĩiti ðtima kimaporeã aua, ininiã iuusaaki pokomirĩi anapakasaaki ðtima poião taparata, ininiãkara aõtanõkaro kanaua maporo kapokiã-monikiri. ¹⁷Akosekaãpotari kanaua maporo ãki aere-takini ðkapani. Ininiã ninoã iapiripoataro maporo aãpitsaã ðtima katakakitapetiniri monõkoni. Ninoã pĩkari ðtima anikiniro maporo ikipatxite apanĩkakiãkirimoni. Iua ikipatxite Arĩpia tixini takote. Ininiã ikaxitakarina mãkatxi mata maporo aniãkari. Mãkatxi mata kaikotiniã maporo nopini, patimaua ðtima anikiniua. Ikara atoko ininiã, auiritarina ðtima anikiniua. ¹⁸ðtima inataparatanika, ininiã katimatinĩkata ninoã okaãpotari tiitxi maporo ãki auakari potxoari uinitimoni maporo sakikini monõkoni. ¹⁹Katimatinĩkata okarina maporo tii potxoari uinitimoni.

²⁰Mapaõti !aãtamataikari atokatxi. !Aãtamataikari iõriki. ðtima inataparatanika, ininiã auãkatari apinini.

²¹Mapaõtipeka maporo ãki parĩkauatakani kona inikaikana. Ininiã Paoro misãkiretana:

—Kinirepa hñte kona kĩpitari nisãkire? Kinirepa hñte takanapari Kreta pokomirĩiti? Hĩkĩpitaãkamariko nõtãkikini, tiitxi kona hõkamako. ²²Iuaritika kataparaxinire hñtxako. Nisãpiretai, kona kãkiti !lipina. Maporonanira sakika. ²³Nota Teoso nakiti nitxaua. Iua ðkapani niparĩkauata. Minipani iua nitiri iaxitikiri oerekaua notamoni. ²⁴Teoso nitiri akiritano: “Paoro, !pipĩkarauatape. Pite apokapitikako Sesa apisatoõ. Peerekari Teoso. Itiretai pite, ininiãkara ninoã pitekata sikani !lipinapani,” itxano. ²⁵Ininiã kataparaxinire hñtx-

ako, kotxi nota auikari Teoso sãkire. Ikamapitikariko nisãpiretinii iaõka. ²⁶ðtima okaroko maporo ipokomirĩi —itxa Paoro sãkire ninoamoni.

²⁷Ipi semanati ðtima inataparata. Anikaro maporo potxoari uiniti Metxitehãneo inakori !piriãtini. Eereka apanĩkanõka maporo ãki parĩkauatakani uãkatari imirĩi takotepeka aãpokini. ²⁸Ininiã ninoã okari kai iokaritsaã !panaã imarotinina ðkapani. Trĩta seisi metro !panaã. Eereka apikomoni iaõtarina !panaã, vĩtxi setxi metronoka. ²⁹Ininiã ipĩkarauatana maporo kai mitarimoni oãpokini monõkoni. Ininiã maporo kapokiãmoni ikaxitakarina ipi ipi pakini kai iokaritsaã maporo mañkiko. Eereka imisãkiretarina Teoso pañtiki ikatimatinĩ ðkapani. ³⁰Maporo ãki parĩkauatakani nirekari maporo itakanapinina. Iokaxakarina kanaua potxoari uinitimoni. Ninoã txaua:

—Iuañkana kai aiokatxaka uai maporo !kiinaã. Txamari na atão isãkirena. Inirekarina maporo itakanapinina kanaua ãki. ³¹Iuusaaki Paoro txana sotato auñte, sotatoakori pakini:

—Nakira kikiakori maporo ãki makaikotakaniã, hñte ipinako —itxa.

³²Ininiã sotatoakori tsotakari aãpitsa kanaua mañkakari, ininiã ðtima anikari iua kanaua.

³³Iuusaaki imaropirĩkata. Paoro ðtãkikana ikinimane inipokotini ðkapani:

—Ipi semanati hiãtapanãtari ðtima napini. Ipi semanati hñteni kona xatiki hinipokota. ³⁴Ininiã hinipokotako uatxa, hiãtapara apokini ðkapani himapinakani !kapani. Hĩkarotiko !auapani. Hiãko ãtika kona katxakapani —itxa.

³⁵Eereka Paoro kosekari komiri. Ikinimane apisatoõ isãkirusata Teosokata. Iposo atoko imapixinikari komiri porĩ, nika itxari. ³⁶Ininiã ikinimane kataparaxinirepe itxana, ininiã inipokotana. ³⁷Tosẽtos setẽta seisi pakini kãkiti maporo ãki auakani iuusaaki.

³⁸Iteene inipokotakana atoko, okarina triko potxoari uinitimoni maporo poana onini ðkapani.

Maporo Sakikini Pirena

³⁹Katimatinĩkata maporo ãki parĩkauatakani atamatarari imirĩi, txamari !imarotarina itixi uãka. Atamatarina ikipatxite, ininiã ninoã:

—Iuaã kipatxi nopini maanikaro maporo, aposotiniã —itxana.

⁴⁰Ininiã itsotakarina aãpitsa maporo tsapi. Kai kaikota ipatapiã. Ikoxirikarona aãpitsa mekotxi mañkiko, maporo oerekaãtiko. Iposo atoko õkitakarina mãkatxi mata maporo !kiiãtinimoni auakari, ikipatxitemoni maporo ðtima anikini ðkapani. Ininiã ikipatxitemoni asaãpota. ⁴¹Txamari ipixinipokoriti maporo atxapaã ikipatxite nopini. Maporo !kiiãtinimoni atxapaã. !Osai-ka. Tsakati kataparari xika maporo kapokiãtinimoni txirakiãpota.

⁴²Sotatoakori kinirão okaka txana ikinimane mañkakoni. !Inirekarina ninoã mitekini imirĩimoni anokinina. ⁴³Sotatoakori auñte !nirekari Paoro okiko, ininiã !auritana. Ipaniãtana ikinimane:

—Himarotiniári hanokini, ininiã hïte merepanika hïkomokako. Hanoka ikipatxitemoni. ⁴⁴ Eereka, hïte mi-mataanoreni hïkomokako. Himaïkariko maporo txirata, ininiã hanoka ikipatxitemoni —itxana.

Ikara atoko aniniã, amakinika aãpoka ikipatxitemoni.

Máota Pokomirïiti Pirena

28 Imirïipekua amakinika, eereka aimarotari Máota inakori pokomirïiti aãpokini. ² Iuaã auakani apakapaua ipoxokoniritikana. Iuasaaki ãparaã potorika ikipini. ãparaã kipini xika patxïkareri, ininiã iuaã auakani kamari xamina, ate irokini ïkapani.

³ Iuasaaki Paoro apaka apotiitari xamina. Xamina pok-iã itakasaakiri, xamina pataka ðpðkikari imini xamina iriko ãki auakari. Akatsatari Paoro uako. ⁴ Ninoa ipokomirïi auakani atamatari imini Paoro uakoã iarðkimi. Ininiã imisãkiretakakana:

—Ikira kiki kokaniri atxïiti. !Ipinã potxoari uiniti, iuaritika inapakakiniri !auari. Uatxaika ipinapitikako —itxakakana.

⁵ Paoro ïkokari imini xamina pokimoni arikini ïkapani. !Katsiiri iuamoni. ⁶ Ninoa iãtapanãtari iuako ananapoa-tini. Iãtaparina iua mokatanitika ipinini. Mapa oara napa atoko lipina, ininiã ninoa:

—Kona kokaniri ikira. Teoso itxaua —itxanãtana.

⁷ Iuaãtaã takote aua kikio Pópirio inakori nakiti. Máota pokomirïiti auakani auïte itxaua. Iua apakapaua ate ipoxokoniritika. Akaikota iua aapoko ipi ãti pakini ðti.

⁸ Iuasaaki iri sirïkanãta. Apoomata. Itikanãta. Ininiã Paoro sari iuamoni. Akiritari Teoso iua ereka inini ïkapani. Itakari iuako inopini. Iuasaakipeka erekapeka itxa iua. ⁹ Eereka amianatakani iua pokomirïiti auakani sari Paoromoni, ininiã iua makananitana ninoa. ¹⁰ Ninoa sikaua tiitxipokoni. Apotorikasaaki ãto maporo ãki, isikauana imakinika anireëkiti.

Paoro Homa Sitatxiti Isini

¹¹ Ate napari ipi ãti pakini kasiriti iuaã. Eereka aiereë-
tauã maporo ãki, Arexãtria sitatxitikero ãki. "Itaritxi Ipi" akiritaãka maporo uãka. Mitaãsaaki oa maporo kaikota Máota pokomirïiti. ¹² Apotorika iuaã. Eereka aãpoka Sirakosa inakori sitatxiti. Iuaã akaikota ipi ãti pakini ðti.

¹³ Eereka iuaïkana maporo potorika. Aãpoka Héxio sitatxiti. Katimatiniãkata ïtima atikinimonikari ina, ininiã patimari asini. Katimatiniãkata aãpoka Posoori sitatxiti.

¹⁴ Iuaã aðkitana kãkiti, Xesosi sãkire auiaãkani. Ninoa amanaãua ãti semanati anapini ninoakata. Eereka iuaïkana aiereëtauã maporo ãki. Iuaïkana apotorika. Homa sitatxiti aãpoka.

¹⁵ Xesosi sãkire auiaãkani, Homa auakani, kenakoentari aãpokaenetini, ininiã inana ate aðkitinina ïkapani. Apanakini aðkitaua ate kienatxi amotikoãtaã takote, Ápio inakoriãtaã takote. Apanakini aðkitaua ate kãkiti imakiniãtaã, "Ipi Áti Aapokotxiti" inakoriãtaã. Paoro aðkitakasaakina ninoa, ipoxokoniua.

—Peerekari Teoso, kotxi naia inari notamoni —itxa Paoro.

Homa Sitatxiti Paoro Apokini

¹⁶ Homa sitatxiti aãpoka atoko, Paoro auiritaãka inirekiniãtaã auini. Átika sotato kaikotapika iukata isinimoni imarotini ïkapani.

¹⁷ Ipi ãti pakini ðti napaka atoko, Paoro pïkapiretana Xoteoakori auïteakori. Ninoa apotiitakasaakia, Paoro misãkiretana ninoa.

—Nitariakori, !nikamari maerekati Xoteoakorimoni. Nauikapitikari akiomaneakorini oerekakiti sãkiretxiti. Iuaritika nimaïkaãka Xerosareë. Nisikanapaãka Homanoakorimoni. ¹⁸ Homanoakori pimaãno nimaïkiko xika. Eereka inirekarina isikakinino, kotxi ninoa imarotari ixika !auari nipinini ïkapani. ¹⁹ Txamari Xoteoakori !inirekari Homano sikakinino, ininiãkara nakiritari Sesa nisãkire ikenakotini ïkapani. !Ninirekari nimisãkirepiretiniri ninirimane Xoteoakori. ²⁰ Ikara atoko ininiã, nipïkapiretai hïte nimisãkiretini ïkapani. Teoso mereëkiti sãkire, Xoteoakori iãtapakiti sãkire nauikini xika, nota maïkaãka.

²¹ Ininiã ninoa:

—Ate !apakapari iðkatsopari Xotéia tðpakiri pite maerekani pirena. Aïtariakori iuaã ïkani !iminapiretari maerekati pikamakiti pirena. ²² Ate nirekari akenakotini pite auiaãkiti sãkiretxiti, kotxi akenakoenetapekari apanakini sãkire: "Xesosi sãkire na atão" —itxana ninoa.

²³ Ininiã ninoa ketotari ãti ðti Paorokata aðkitakakini-uana. Iketotiniri manapi itomaneri kãkiti sari Paoro auinimoni. Paoro ïkanðkapanika sãkirauatapitipo. ïkanðkapeka auakapanika isãpirenauatini. Isãpiretana Teoso auïtetxi ininiãua.

—Atão Teoso ãkiripitikara Xesosi —itxa Paoro sãkire.

Isãpiretana ninoa Moisesi iðkatsopatakiti, Teoso sãkire sãpiretakani iðkatsopatakiti apaka, atão Teoso ãkiripitikara Xesosi ininiua ninoa imarotini ïkapani. ²⁴ Apanakini auikari Paoro sãkire. Apanakini !inirekari auikinirina Paoro sãkire. ²⁵ Ininiã ninoa taparakien-atakakaua Xesosi sãkire auikakani mauikarenikata. Ipotorikinina apisa, iuaïkana Paoro misãkiretana ninoa:

—Erekari Matamatakoti sãkirauata atão hiniri-manekata kitxakapirïka. Ipaniãtari Teoso sãkire sãpiretakari Isaia inakori isãpiretiniri Teoso sãkire hiniri-manemoni. ²⁶ Itxari:

Hïsa kãkitimoni. Hïsaãpiretanako ninoa: "Hïkenakotari nisãkire átipirika, txamari !hinirekari himarotiniri nisãkire. Átipirika hïtikari nikamakiti, txamari !hinirekari hãuikiniri nota kaminiri ia atoko inakari."

²⁷ Kotxi kãkiti ãkixinireë !inirekarina imarotinirina nisãkire. !Inirekarina ikenakotinirina nisãkire. !Inirekarina itikinirina nikamakiti. Inirekiniãrina, itikapitakarina nota kamakiti. Inirekiniãrina, atão ikenakotarina nisãkire. Ákixinireëna imarotaãkamariko nota sãkire, inamanako notamoni, ininiã nota txïkitakamanako ninoa ereka ininina, itxa Teoso sãkire.

²⁸ Paoro sãkirauata iuaïkana ninoakata:

—Ninirekari himarotiniri Teoso iokanapirena erekari kãkiti maerekani makatxakiko pirena iokanapire-taãkapeka Xoteo minakonimoni. Ninoakara auikapitkariko Teoso sãkire.

²⁹ Ikara Paoro sãpiretaãka atoko, ninoa Xoteoakori sipeka. Isikasaakina, iteene itaparakienatakakauana Paoro sãkire ikenakotinina xika.

³⁰ Paoro kaikota iuaã ipi anokanani. Iĩkitxitari kaapokori iua aapoko Paoronoka auini iƙapani. Paoro ipoxokoniritika apakapana ikinimane iuamoni sikani.

³¹ Isãpiretana ninoa Teoso auĩtetxi ininiãua. Oerekana ninoa Xesosi, Teoso mereẽkiti ininiãua, Apiananiri ininiãua. Isãkirauata itaparaxinireritika kãkitimoni. Auiritaãka ikinipoko imarotakiti isãpiretini.

Homano

1 Nota Paoro iokanatsopata hītemoni. Xesosi Kristo nitirikarano nota. Teoso mereēno nota iua iokanatakiti kākitemoni nininiua īkapani. Iua akiritano nota, Teoso iokanapirena erekari kākitemoni nisāpiretini īkapani. Ikara paīkatxinoka inireka nikamini. ² Kitxakapirīka Teoso sākire sāpiretakani sāpiretau Teoso sikaenetakiti, iua iokanapirena erekari. Teoso sākire iōkatsopatakoriā ikara atatsopataāka.

³ Ia Teoso iokanapirena erekari sāpiretau aāuīte Xesosi Kristo Teoso ākiri ininiua. Kākiti itxapekaua. Iuasaaki Tavii apika mekaniri itxaua. ⁴ Iuaritika Teoso ākiri itxaua. Erekari Matamatakoti oerekari kākiti Teoso ākiri ininiua Xesosi, kotxi ōkitikari Xesosi ipīkaripeka. Iuaīkana aua itxa. Ikara posotiiretxi apiari oerekari kākiti Xesosi Teoso ākiri ininiua. ⁵ Xesosi Kristo sikaua ikinipoko erekari. Ininiā iokanataua ikini itixitimoni, kākiti isākire asāpiretini īkapani, isākire auikinina īkapani, isākire iaōka ikaminina īkapani. Ikara atoko aparīkauata Kristo īkapani.

⁶ Hītepekana, Teoso akiritai hīte apaka Xesosi Kristo nakitiakori hininiua īkapani. ⁷ Ininiā nota iokanatsopata hītemoni Teoso tirketanimoni, Homa sitatxiti auakanimoni. Teoso akiritai hīte iua nakitiakori hininiua īkapani. Aīri Teoso, Apiananiri Xesosi Kristo apaka sikari ikinipoko erekari hītemoni. Ikamaerekaxiniretai hīte.

Paoro Nirekari Isini Homa Auakanimoni

⁸ Merepanika nitxari niTeosone: “Erekapitikai, kotxi Homa auakani iteene auikari pisākire. Ikini tōpati auakani kenakopiretari ninoa auikiniri pisākire,” nitxari Teoso Xesosi Kristo uākaā. ⁹ Nisākirauatakasaaki Teosokata, nimisākiretari Teoso hīte īkapani. Ātipirika nimisākiretari Teoso hīte īkapani. Teoso imarotari ikara nisākire atāo inini. Nota paīkauata Teoso īkapani. Iuanoka ninireka nikamini. Nisāpiretari iua iokanapirena erekari imi pirena kākitemoni. ¹⁰ Nimisākiretakasaakiri Teoso, nitxari: “Pauiritiniāno, ninirekari paītiki Homa auakanimoni nisini. Mitxi !apakata ninoa moni nisini. Pinirekiniāri iuaā nisini, pimoianatano ninoamoni napokini īkapani,” nitxari. ¹¹ Iteene ninirekari naōkitinii hīte, kotxi ninirekari Teoso kamataratiniri hākixinire nisākireē. ¹² Ininiā nota kamataraxiniretaiko hīte, kotxi himarotari nota iteene auikiniri Xesosi sākire. Apaka hīte kamataraxiniretano nota, kotxi hīte apaka iteene auikari Xesosi sākire.

¹³ Nitariakori, ninirekari himarotiniri itokatapiima namamatama hītemoni nisini īkapani, txamari iuasaaki

!apakata nisini. Itomaneri kākiti Xoteo minakanuia ātiātaā auakani auikari Xesosi sākire. Ininiā iua atokotxikana ninirekari kaiāopokori kākiti hīte sauaki auakani apaka auikiniri Xesosi sākire. ¹⁴ Nisāpiretari Teoso sākire ikininapemoni. Nisāpiretari sitatxi auakanimoni. Nisāpiretari ītopa auakanimoni apaka. Nisāpiretari iōkatsopari imarotakanimoni. Nisāpiretari iōkatsopari mimarotakanimoni apaka. Ikara niparīka. ¹⁵ Ininiā iposope nitxa nisāpiretiniri Teoso iokanapirena erekari hīte Homa sitatxiti auakanimoni apaka. Ikinika nitaparaā nisāpiretai.

¹⁶ Na nipētauata Kristo iokanapirena erekari nisāpiretinii, kotxi iua iokanapirena oerekaua Teoso posotiire iua sākire auīākani maerekani imaktxakini īkapani. Kaposotiireri iua, ininiā imaktxakari ikinimane maerekani, iua sākire auīākani maerekani. Ikara ikaminana Xoteoakori merepanika. Eereka ikaminana Xoteo minakanuia apaka. ¹⁷ Teoso iokanapirena erekari sāpiretau Teoso txīkitakiniri kākiti atāo inakaranoka ikamini. Teoso sākire auikikoānokara, kākiti txīkitakaāka atāo inakaranoka ikamini. Teoso sākire iōkatsopatakori txari:

Kākiti atāo inakaranoka kamakani auini erekari, kotxi ninoa auikari Teoso sākire.

Kākiti Kamakiti Maerekati

¹⁸ Teoso iaxiti auakari oerekaua iua omanākaruatini kākiti maerekani xika, ininiākara iua misiritariko kākiti, kotxi kākiti !nirekari Teoso paniātakiti ikamini. Ikamarina maerekatinoka. Maerekati ikamakasaakina, ikipatarina atāo inakari. ¹⁹ Kākiti ikara atoko inakani Teoso misiritanako ninoa, kotxi apakata ninoa atamatiniri iua kamakiti. Teosora oerekapekari ikamakiti kākitemoni iua imarotinina īkapani. ²⁰ Teoso kamari itixi, ininiā kākiti atamatakasaakiri Teoso kamakiti, imarotari kiātokopa itxa Teoso. Matamatakoti itxaua Teoso, iuaritika kākiti atamatakasaakiri ikamakiti, imarotari iua posotiire auapika inini. Imarotari iua Teoso ininiua. Kākiti imarotari ikara atoko inakari itxaua Teoso, iua kamakiti atamatakasaakina. Ininiākara kākiti imarotapitikari Teoso auini. Ininiākara na atāo kākiti sākire: “Na nimarotari Teoso auini inini.”

²¹ Kākiti imarotari Teoso auini, iuaritika !isāpiretarina Teoso: “Atāo Teoso pitxaua,” !itxarina. !Isāpiretarina Teoso: “Erekapitikari pikamakiti ate īkapani,” !itxarina. !Kiīkitena. !Imarotaikarina atāo inakari, kotxi ākixinireēna maerekatinoka aua. ²² Ninoa sākire: “Kimaroreua ate,” txamari !kiīkitena. ²³ Teoso mapinakati-

moni !itxana: “Pitenokara Teoso txaua,” !itxarina. Kākiti ipinapitika, iuaritika kamakori kākiti atoko inakari imisākiretana: “Pite ateosone,” itxana. Kamakori kotipiriki atoko inakari, kamakori pirātxi atoko inakari, kamakori imini atoko inakari pakini ninoa misākireta: “Hīte ateosone,” itxana.

²⁴ Ininiākara Teoso takanapana ninoa. Auiritana maerekati ikaminina ākixinirena nirekaākiti. Itxiko atoko itxa imaerekanina iitona nireēkiti. Ninoaka na paxitauana iitona, kotxi āti sirīka ātikata. ²⁵ !nirekarina auikininirina atāo inakari Teoso sākire. Inirekarina auikininirina atāo minakati. Teoso kamakitimoni itxana: “Pite ateosone. Aparīkauata pite īkapani,” itxana. Ikinipoko kamakarimoni !itxana: “Pite aTeosone. Aparīkauata pite īkapani,” !itxana. Atāo inakari kamakani ātipirika txari ikinipoko kamakari: “Peerekai pite.” Ameē.

²⁶ Ikara kākiti maerekani xika, Teoso takanapana ninoa. Auiritana maerekati kākiti kapēta txīkitaākari, iitona nireēkiti ikaminina. Ininiā sito na nirekaikari kikikata osirīkini. Sito nirekari āto sitokata osirīkini. !Apakata. Ikara maerekati itxaua. ²⁷ Iua atokokana kiki !inirekaikari sitokata isirīkini. Kiki nirekari āti kikikata isirīkini. !Apakata. Ikara maerekati itxaua. Ininiākara iitona misiritaākako imaerekanina xika.

²⁸ Ninoa imaroreē !nirekarina imarotininirina Teoso, ininiā Teoso takanapana. Auiritana ixinikininirina atāo minakati. Maerekatinoka ixinikakitina, ininiā ikamarina atāo minakati. ²⁹ Ākixinireēna aua ikini sereti maerekati. Iitona nireēkitinoka ikamana. Ātipirika ikamapikarina maerekati. Apanakini nakiti tiitxi atamatakasaakina, inirekarina. Ikamarina maerekati apanakinimoni. Ākixinireēna ixikotarina āti. Kokaniri itxauana. Ineenamauatapikana. Apanakini imisiriene-tana. Ixinikarina apanakini kamakiti maerekatinoka. Aāpirena ikamana. ³⁰ Imisākirepiretarina āti. Omanatarina Teoso. !Ipaxitarina apanakini imisākiretakasaakina. Iuikauana. Ātipirika: “Paimatireua ate,” itxanātana. Ixinikapikarina: “Natokopa itxa apikomoni maerekati akamini.” !Ikīpitarina iri paniātakiti, inoro paniātakiti pakini. ³¹ !Kīkitena. !Ikamarina ikamaenetakitina. !Itiretarina inirimane. !Nirekarina neenamtxi ixipokinina. !Iamonīkana apanakini. ³² Teoso sākire txari: “Kākiti ikara atoko inakani ipinapitikako. Ninoa ipinini atāo.” Ikara Teoso sākire imarotapiikamana, iuaritika ikamapanikarina ikara maerekati. Apaka apokaerekatarina apanakini, maerekati ikamakasaaki.

Teoso Misiritari Maerekati Kamakani

2 Atxiīti hīte txari: “!Erekana ninoa, kotxi ninoa kamari maerekati,” hītxa. !Apakata ikara atoko hini-ni, kotxi hīte apaka kamari maerekati ninoa kamakiti atokotxikana. Ininiā !apakata kākiti akiritiniri āti kākiti maerekati kamakari ininiua. ² Apakatapitika Teoso akiritiniri kākiti maerekati kamakari ininiua, kotxi iua imarotari atāo. Ininiā maerekati kamakari apakapari atāo imisiritiko imaerekani iaōka. ³ “Ninoa maerekati kamakani misiritaākako,” hinakasaaki, hixinikari hīte

apaka kamari maerekati ninoa kamakiti atokotxikana. Ininiā hīte apaka !hinapakapaniri Teoso misiritinii hīte. ⁴ Atxiīti na hīte maākatari Teoso, kotxi hīte txari: “Teoso katiraōkiri itxaua,” hītxa. Atxiīti na himaākatari Teoso, kotxi iusaaki limisiritapanikai hīte. Atxiīti na himaākatari Teoso, kotxi Teoso ātipirika mīteenekai hīte. Teoso nirekari hītakanapiniri maerekati hīkamakiti, erekarinoka hīkamini īkapani. Ininiā iua tiretai hīte. Ikara hīte imarotamako.

⁵ Txamari hīte paikoxinirei. Na hinirekari himaerekani hītakanapini. Ininiā himisiritiko apiaāpotako. Kākiti misiritiko ōti apokasaaki, Teoso misiritapitikaiko hīte. Iusaaki kākiti imarotariko Teoso omanākare imaerekani xika, kotxi Teoso atāo imarotari kākiti kamakiti. ⁶ Ikamakiti erekari ininiāua, Teoso sikari erekari iuamoni. Txamari ikamakiti maerekati ininiāua, Teoso misiritariko iua. ⁷ Aua kākiti ātipirika erekari kamakani. !Isāpaka erekari ikamini. Inirekarina Teoso: “Erekapitiki,” ininina. Inirekarina Teoso paxitinina. Inirekarina auinina ātipirika. Kākiti ikara atoko inakani Teoso txīkitakana ātipirika auinina īkapani. ⁸ Apanakinipekana kamari inireēkitinoka. !Nirekarina atāo imarotininina. Maerekatinoka inirekana ikaminina. Teoso omanatana kākiti ikara atoko inakani. Teoso misiritanako ninoa. ⁹ Ikinipoko kākiti maerekati kamakani maxikaākako. Atatsirauatako. Merepanika Xoteo misiritaākako, eereka Xoteo minakanua apaka misiritaākako.

¹⁰ Teoso txanako kākiti erekari kamakani: “Erekapitiki hīte.” Ikara atoko itxanako merepanika Xoteoakori, eereka Xoteo minakanua apaka. Teoso paxitanako ninoa. Ikamaerekaxiniretanako. ¹¹ Teoso misiritana ikini kākiti maerekati kamakani. !Auiritari apanakini maerekati kamakani napakakiniri imisiritikona. Apanakini maerekati kamakani imisiritini atokokana, imisiritari ikinipoko maerekati kamakani.

¹² Xoteo minakanua !auari Moisesi sākire Teoso paniātakiti iōkatsopatakori. Ninoa kamari maerekati, ininiā Teoso paniātakiti imimarotakanisaaki ipinana. Xoteoakori aua Teoso paniātakiti iōkatsopatakori. Ninoa apaka kamari maerekati. Ininiā Teoso misiritana ninoa, isākire iōkatsopatakori iaōka imakamakani xika. ¹³ Teoso kamaerekatari isākire iaōka kamakani. Pike-nakotakasaakiri Teoso sākire, txamari !pikamari isākire iaōka, iusaaki Teoso !ikamaerekatai pite. ¹⁴ Xoteo minakanua !auari Teoso sākire iōkatsopatakori. Iuaritika atxiīti ikamarina Teoso paniātakiti iōkatsopatakori iaōka, kotxi ikamarina ākixinirena sākire iaōka. !Auari Teoso sākire iōkatsopatakori ninoamoni, iuaritika Teoso paniātakiti auape ākixinireēna. ¹⁵ Teoso paniātakiti iaōka ikamakasaakina, oerekarina imarotininirina atāo inakari ākixinireēna. Ākixinirena sākire sāpiretana atāo. Ātikata itxana: “Pite kamari maerekati. !Apakata.” Ātikata erekari ikamakasaakina, “Pite kamari erekari. Erekapitiki.” Itxa ākixinirena sākire. ¹⁶ Kākiti kamakiti imarotiko ōti apokako. Iusaaki Teoso paniātariko Xesosi Kristo sāpiretiniri kākiti kamakiti. Kākiti kamakiti apanakini mimarotakiniri apaka isāpireta. Iusaaki isāpiretari kākiti misiritiko imaerekani xika. Teoso

iokanapirena erekari nisāpiretakiti oerekepekari ikara atoko inakari.

Xoteoakori Auari Teoso Paniātakiti Iōkatsopatakori

¹⁷ Hītepekana, hīte txari: “Ate Xoteo atxaua. Teoso apakapapitikaua ate, kotxi isikari ipaniātakiti iōkatsopatakori atemoni. Atenoka Teoso anaakori atxaua,” hītixa. Ininiā hīteka iuikaua. ¹⁸ Hīte imarotari Teoso nireēkiti hīkamini. Himarotari Teoso paniātakiti iōkatsopatakori, ininiā himarotari erekari apiari hīkamini. ¹⁹ Hītixari: “Atera oerekari Teoso kimapore, ikimapore mimarotakanimoni. Mōsiāreni atoko itxana ninoa,” hītixa. “Ate imarotari Teoso sākire, ininiā ate imarotari apanakini aōerekini. Ininiā ate tirikapi atoko atxaua. Apanakini ipiā sikani atoko itxana ninoa.” Ikara atoko hītixa hīte. ²⁰ Hītixari: “Koerekarerini atxaua. Kākiti mīikiteni oereēkani atxaua. Ate oerekari kākiti poiāo imarotakani. Ate imarotari ikinipoko. Aimarotari atāo, kotxi Teoso sākire iōkatsopatakori aua atemoni.” Ikara atoko hītixa hīte. ²¹ Hīte Xoteo inakaniua oerekari apanakini. Kinirepa kona hīteka oerekaua apaka? Hīte ōtākikari apanakini: “!Pīitiriuatape”. Kinirepa hīte na takanapari hītiriuatini? ²² Hīte ōtākikari apanakini: “!Pisiriūkape pītanoro minakotokatika.” Kinirepa hīte apaka sirīka hītanoro minakotokatika? Hīte omanatari teoso kamakori, ininiā kinirepa hītirīkari ninoa teosone aikoti tii? ²³ Hīte iuikaua, kotxi Teoso sākire iōkatsopatakori aua hītemoni, txamari apanakini na paxitari Teoso hīte xika, kotxi kona hīte kamari Teoso sākire iaōka. ²⁴ Teoso sākire iōkatsopatakori txari:

Hīte Xoteo xika, Xoteo minakaniua misākirepiretari Teoso, itxa Teoso sākire iōkatsopatakori.

²⁵ Teoso takaōtxikare aua hīitoā. Teoso paniātakiti hīkaminiā, erekapitikari Teoso takaōtxikare hīitoā auini. Teoso paniātakiti iōkatsopatakori himakamakaniā, Teoso takaōtxikare mauakiniti atoko hītixaua. ²⁶ Xoteo minakatiua, Teoso takaōtxikare iitoā mauakini, Teoso sākire iaōka ikaminiā, Teoso txariko: “!Iua Xoteo atokotxikana itxa. Nitakaōtxikare iitoā auakiti atokotxikana itxaua.” ²⁷ Hīte Xoteoakorimoni aua Teoso paniātakiti iōkatsopatakori, iuaritika !hīkīpitari Teoso sākire. Teoso takaōtxikare auapitikama hīitoā, iuaritika !hīkīpitari Teoso sākire. Xoteo minakaniua !auari Teoso takaōtxikare iitoāna, iuaritika ninoa kamari Teoso paniātakiti iōkatsopatakori. Ikara atoko ininiā, ninoa oerekai himaerekani.

²⁸ Kiripa atāo Xoteo? Kiripa Teoso nakiti txataua? Kirimonipa aua Teoso takaōtxikare atāo inakari? Teoso takaōtxikare iitoā auakini, na ikinikani atāo Xoteo itxauana. ²⁹ Teoso paniātakiti iōkatsopatakori !oerekaua Teoso nakiti aniniua. Xoteo atāo inakariua, Teoso nakiti itxaua ākixinireē. Teoso takaōtxikare aua iua ākixinireē. Erekar Matamatakoti takari Teoso takaōtxikare iua ākixinireē. !Inirekari kākiti iuikiniri. Inirekari Teoso iuikiniri.

Teoso Kamari Ikamaenetakiti

3 Atxiīti hīte txano nota: “Teoso apakapari Xoteo. Teoso apakapari Xoteo minakaniua apaka, ininiā !apiaerekata Xoteo aniniua. !Aapiaerekata Teoso takaōtxikare aītoā auini.” Atxiīti ikara atoko hītixa. Txamari na atāo. ² Apiaerekatapitika Xoteo aniniua, kotxi Teoso merepitipanika sāpiretari iuaka sākire Xoteomoni, ninoa iōkatsopatiniri !kapani, inīkatinirina !kapani. ³ Iuaritika apanakini Xoteo !auikari Teoso sākire. Ikara xika atxiīti Teoso !ikamari ikamaenetakiti? ⁴ Ikamapitikari. Atxiīti paxirari ikinimane sākire. Iuaritika Teoso sākire atāonoka. Teoso sākire iōkatsopatakori txari:

Teoso sākirauatakasaaki, ikinimane imarotari isākire atāo ininiua. Isāpiretakasaakiri kākiti imisiritiko imaerekani xika, iuasaaki imarotaākako Teoso kamakiti atāo inini.

⁵ Atxiīti kākiti txano nota: “Atāo minakati akamakasaaki, apanakini apia imarotari Teosonoka kaminiri atāo inakari. Ininiā erekari akaminiri atāo minakati apanakini imarotiniri Teosonoka kaminiri atāo inakari. Ininiā !apakata Teoso misiritiniua ate, maerekati akamini xika.” Atxiīti aua kākiti ikara atoko ina sākiretakani. ⁶ Apakatapitika Teoso misiritiniri maerekati kamakari. Iua kamari atāonoka, ininiā apakatapitika imisiritiniri ikinimane maerekati kamakani.

⁷ Atxiīti kākiti txaua: “Atāo minakati asāpiretakasaaki, apanakini imarotari Teoso sākirenoka atāo ininiua. Atāo aminasākiretakaniā, apanakini kākiti txari: ‘Teosonoka ereka,’ itxana. Ininiā !apakata Teoso misiritiniua amaerekani xika.” Atxiīti aua kākiti ikara atoko ina sākiretakani. ⁸ Ikara atāo ininiā, maerekati makama erekari apokini !kapani. Txamari ikara sākiretxiti na atāo. Iuaritika apanakini apoītapekaua ate ikara atoko asāpiretini. Ininiā atāopitika ninoa misiritiko, isākirena xika.

!Auari Kākiti Erekar

⁹ Hīxinikariko ikinika ikara nisāpiretakiti. Atauako Xoteo apiaerekata? Atauako Xoteo minakaniua poiāo ereka? Kona ikara atokoni itxa. Noerekapekai hīte, Xoteo minakaniua atokokana itxa Xoteo, kotxi ikinimane kamari maerekati. Akinika !aposotari atakanapiniri maerekati akamini. ¹⁰ Teoso sākire iōkatsopatakori txari:

!Auari atāo inakari kamakari. Ātika !auari.

¹¹ Teoso nireēkiti imarotakari !auari. Teoso nirekakari !auari.

¹² Ikinimane kaporiūkari Teoso. Ikinimane kerokari ikamakiti. Erekar kamakari !auari. Ātika !auari.

¹³ Kākiti sākire maerekati, itotxi arakakari saka atoko itxa. Itotarina imisirienetinirina apanakini. Kākiti sākire imini tsiīā atoko itxa.

¹⁴ Ātipirika imisākirepiretarina āti, kotxi inīkatarina omanākaretxi ākixinireēna.

¹⁵ Maxikatīka inirekarina okinirina āti.
¹⁶ Isinimonina imaxikana apanakini. Maerekaxinireni-noka itxīkitakana apanakini.
¹⁷ !Imarotarina neenamtxi itakanapinina.
¹⁸ !Ipxitarina Teoso. !Ipīkarina iua.
 Itxa Teoso sākire iōkatsopatakori.
¹⁹ Aimarotari Teoso sikari ikinika ipaniātakiti iōkatsopatakori atemoni Xoteoakorimoni, inireēkiti aimarotini īkapani. Ininiā !apakata ate, Xoteo minakaniua pakini: “!Nimarotari Teoso nireēkiti,” anini, kotxi isāpiretapekari inireēkiti akamini tīkane. Ininiā atāopitikara Teoso misiritinina ikinimane maerekati kamakani. ²⁰ Ikinika Teoso paniātakiti iōkatsopatakori !aposota akamini, ininiā Teoso kona kamaerekataua. Teoso paniātakiti iōkatsopatakori oerekaua maerekati kamakani aniniua.

Natokopa Itxa Teoso Kamaerekatini Kākiti?

²¹ Uatxa Teoso oerekapekaua itxīkitakiniri kākiti atāo inakari kamakani ininiua. Teoso paniātakiti ikinika !ikama kākiti, iuaritika itxīkitakaākana atāo inakari kamakani ininiuana. Kitxakapirīka Moisesi, Teoso sākire sāpiretakani apaka sāpiretari ikara. ²² Teoso txīkitakari kākiti atāo inakari kamakani ininiuana, Xesosi Kristo sākire auikasaakina. Itxīkitakari Xoteo, Xoteo minakaniua pakini atāo inakari kamakani ininiuana, Xesosi sākire auikasaakina. Xoteo minakatiua Teosomoni, Xoteotxikana itxaua. ²³ Kotxi ikinimane kamari maerekati, ininiā !aposota aāpokini Teoso iotximeremoni.
²⁴ Maerekati kamakaniua ate, iuaritika Teoso sikari ikinipoko erekari maxikatīka atemoni, ininiā Teoso kamaerekataua ate, kotxi Kristo Xesosi iīkitxirauata ate īkapani ipīkasaaki. Ininiā Teoso !imisiritaikaua amaerekani xika. ²⁵ Teoso sikari Xesosi ipinini kākiti īkapani. Xesosi ipīkasaaki, Teoso makatxakari maerekati akamakiti. !Imisiritaikaua ate, kotxi aāuikari Xesosi ipinini iīkitxitari Teoso, maerekati akamakiti. Teoso sikari Xesosi ipinini ate īkapani. Ikara oerekaua atāo inakarinnoka ikamini. Mitxipitipanika Teoso !imisiritana kākiti imaerekanina xika. Iātapari iketo manapi apokini, kotxi iamoniakari kākiti. ²⁶ Teoso sikari Xesosi, ininiā ipīpe kākiti īkapani, ininiā uatxa Teoso misiritari kākiti maerekati ikamini xika, ininiā aimarotari Teoso atāo inakarinnoka kamakari itxaua iua, kotxi !auiritari maerekati kamakari inapakakini. Erekari Teoso, ininiā iua posotari ikamaerekatiniiri kākiti Xesosi sākire auīākani.
²⁷ Ininiā !apakata aāuikiniua, kotxi !auari aparīka aka maerekatakari, ininiā !apakata aāuikiniua Teoso paniātakiti iōkatsopatakori akamakasaaki. Teosora kamaerekataua, Xesosi sākire aāuikasaaki. ²⁸ Teoso paniātakiti iōkatsopatakori kamakari atxīiti !ikamaerekataāka, kotxi !auikari Xesosi sākire. Xesosi sākire auikakarinnoka ikamaerekataāka. ²⁹ Atauako Teoso Xoteo Teosonenanini itxataua? Konapitini. Xoteo minakaniua Teosonekanera apaka itxaua Teoso.
³⁰ Teoso ātinoka aua. Iua kamaerekatana Xoteo, Xesosi sākire auīākani. Iua kamaerekatana Xoteo minakaniua

apaka, Xesosi sākire auikasaakina. ³¹ Ikara atoko ininiā, atxīiti kākiti txari: “Teoso kamaerekataua ate, kotxi aāuikari Xesosi sākire, ininiā Teoso paniātakiti iōkatsopatakori !itxaika. Ininiā !akamaikari,” itxa kākiti sākire atxīiti. Konapitini. Xesosi sākire aāuikasaaki, anirekari iteene akaminiri Teoso sākire paniātakiti iōkatsopatakori.

Atāo Inakari Kamakari Apraāo

4 Maxinikari Apraāo aīri kitxakapirīkari. Natokopa itxa iua imarotakiti, Teoso kamaerekatiniiri kākiti?
² Apraāo kamakiti erekari kamaerekataākamariko iua, ininiā iua iuikamauako. Txamari iua iuikiniua !auari Teoso apisatoō. ³ Teoso sākire iōkatsopatakori txari: Apraāo auikari Teoso sākire, ininiākara Teoso txīkitakari iua atāo inakari kamakari ininiua.
⁴ Parīkauatakari ipatrāote sikari iparīka īki iuamoni. Maxikatīka !iīkitxitari iua. Isikari, kotxi iparīkauata.
⁵ Kākiti auikiniāri Teoso kamaerekatiniiri maerekati kamakari, iua kākiti !iuikari iuaka parīka. Imarotari iparīka !ikamaerekatari iua. Teoso txīkitakari ikara atoko inakari kākiti atāo inakari kamakari ininiua, kotxi iua auikari Teoso sākire. ⁶ Kitxakapirīka Tavii txari ikara atoko. Iua sāpiretari kākiti Teoso sikakiti erekari apakapakani. Teoso txīkitakari iua atāo inakari kamakari ininiua. Na iparīkani txīkitakari iua atāo inakari kamakari ininiua. ⁷ Tavii txari:
 Teoso makatxakasaakiri kākiti maerekani, !atamataikari maerekati ikamakiti. Teoso takari ikinipoko erekari kākiti ikara atoko inakarimoni.
⁸ Teoso !iaōtari iua kamakiti maerekati. Teoso takari ikinipoko erekari iuamoni.
 Itxa Tavii kitxakapirīka.
⁹ Atxīiti pite txari: “Atauako ia erekari Teoso sikakiti, Tavii sāpiretakiti, kākiti Teoso takaōtxikare auaītotakiti īkapaninani?” Konapitini. Ia erekari Teoso sikakiti Teoso takaōtxikare mauaītotakini īkapani apaka. Nisāpiretapekai ia Teoso sākire iōkatsopatakori:
 Apraāo auikari Teoso sākire, ininiākara Teoso txīkitakari iua atāo inakari kamakari ininiua, itxa Teoso sākire iōkatsopatakori. ¹⁰ Kirisaakipa Teoso txīkitakari Apraāo atāo inakari kamakari ininiua? Atauako Teoso takaōtxikare Apraāo iōtā auakasaakikani? Konapitini. Takaōtxikari Apraāo iōtā takiko apisapanikara, itxīkitakari Apraāo atāo inakari kamakari ininiua. ¹¹ Merepanika Teoso txīkitakari Apraāo atāo inakari kamakari ininiua, eerekaikara itakari itakaōtxikare iōtā. Ikara Teoso takaōtxikare oerekari, mitxipeka Teoso txīkitakari Apraāo atāo inakari kamakari ininiua, kotxi iua auikari Teoso sākire. Apraāo auikari Teoso sākire, Teoso takaōtxikare iōtā auini apisapanika. Ininiā Apraāo ikini Teoso sākire auīākani iri atoko itxaua. Atxīiti Teoso takaōtxikare iōtāna !auari. Iuaritika ninoa iri atoko itxaua Apraāo. Teoso txīkitakari ikinimane iua sākire auīākani atāo inakari kamakani ininiuana. ¹² Apraāo Teoso takaōtxikare auaītotakini iri atoko itxaua, ninoa auikiniāri Apraāo sākire Apraāo auikiniri atokotxikana, kotxi Teoso auikari

Teoso sākire Teoso takaõtxikare iitoã auini apisapani-ka.

¹³ Teoso sikaenetari itixi Apraãomoni, imekaniriakori pakinimoni. Ikara atoko Teoso sākire, kotxi Apraão auikari Teoso sākire. Iua auikari Teoso sākire, ininiã Teoso txikitakari iua atão inakari kamakari ininiua. Apraão kamakiti erekari !itxikitakari Teoso sikaenetiniri itixi Apraãomoni. ¹⁴ Käkiti erekari kamakari Teoso sākire mauiaãkati !apakapari Teoso sikaenetakiti, kotxi !auikari Teoso sākire. Teoso sikari isikaenetakiti iua sākire auiaãkanimoninani. ¹⁵ Teoso paniãtakiti iõkatsopatakori makamakati misiritaãkako. Teoso paniãtakiti iõkatsopatakori mauakaniã, maerekati !auari. Txamari auapitika Teoso paniãtakiti iõkatsopatakori.

¹⁶ Ininiã kãkiti auikasaakiri Xesosi sākire, apakapari Teoso sikaenetakiti. Maerekati kamakani kãkiti, iuaritika apakaparina Teoso sikaenetakiti, kotxi Teoso nirekari ikinipoko erekari isikini kãkitimoni. Ininiã ikini-maner Apraão apika mekaniriakori apakapapitikari Teoso sikaenetakiti. Xoteoakori Teoso paniãtakiti iõkatsopatakori auakini apakapari. Xoteo minakanuia Teoso sākire Apraão auikini atoko inakani apaka apakapari. Ate amakinika iri atoko itxaua Apraão. ¹⁷ Teoso sākire iõkatsopatakori txari:

Teoso txari Apraão: "Nota txikitakaiko pite itori ãti uãka iri pininiu."

Ininiã Teosomoni iua aïri atoko itxaua, kotxi Apraão auikari Teoso sākire. Teoso txikitakana ipïkani iuaïkana auãki inini. Iua kamari mitxi mauakati auini.

¹⁸ Apraão kiomãtxipeka inakasaaki, kona keeneri. Iuaritika auikari Teoso sākire. Iãtapari Teoso sikaenetakiti apokini. Ininiã apanakini ãti uãka iri atoko itxapekaua Teoso sākire iaõka. Teoso sākire iõkatsopatakori txari:

Papika mekaniriakori kaiãopokopaniriko.

¹⁹ Apraão seï anokanani inakasaaki, imarotari iito ipinanapanoka inini. Imarotari Sara !oposotaikari keene onini. Iuaritika iteene auikari Teoso sākire. ²⁰ !Iotoka auikiniri Teoso sakiniri isikaenetakiti iuamoni. Iua auikari Teoso sākire itaparaxinireritika. "Teoso posotari ikinipoko ikamini," itxa. ²¹ Iua iteene imarotari Teoso posotiniri isikiniri isikaenetakiti. ²² Apraão auikari Teoso sākire, ininiãkara Teoso txikitakari iua atão inakari kamakari ininiua. ²³ Na Apraãonanini Teoso txikitakata atão inakari kamakari ininiua. ²⁴ Iua txikitakaua ate apaka atão inakari kamakani aniniua, aãuikiniãri Teoso sākire. Aãuïte Xesosi ipïkasaaki, Teoso õkitikari iua iuaïkana auini ïkapani. ²⁵ Teoso sikari Xesosi kãkitimoni ipinini ïkapani maerekati akamakiti xika. Teoso õkitikari iua iuaïkana auãki inini ïkapani, ate ika-maerekatini ïkapani.

Teoso !Omanataikaua Ate

5 Ininiã Teoso kamaerekataua, kotxi aãuikari isãkire, ininiãkara aãuïte Xesosi Kristo iotokakari Teoso omanatiniua ate. Teoso !omanataikaua ate. Uatxa apakapaua ate. ² Aãuikasaakiri Xesosi sākire, iuasaaki aimarotari ikinipoko erekari Teoso sikakiti ate-

moni ikiniõtika. Iteene apoxokoniuaata, kotxi aiãtapari Teoso aaõkitini, iua iotximere aãtamatinini ïkapani.

³ Apanakini misiritakasaakia, apoxokoniuaata apaka, kotxi Teoso oerekaua amïteenekiniri amisiritiko.

⁴ Amisiritiko amïteenekiniã, aimarore apiaãpota.

Aimarore apiaãpotakasaaki, aiãtapariko erekari apokini atemoni. ⁵ Erekari apokini aiãtapiniã, aãpakapapitikariko erekari, kotxi aãkixinireë aimarotari Teoso iteene tiretiniua. Erekari Matamatakoti Teoso sikakiti atemoni, oerekaua Teoso tiraõki aãkixinireë.

⁶ Erekari akamini amaposotakanisaaki, Teoso amanirekakanisaaki, Kristo ipina ate ïkapani. Iua ipina iketo õti manapi. ⁷ Atxiiiti kãkiti ipina atão inakari kamakari ïkapani iua mapinakani ïkapani? Atxiiiti !ipina iua ïkapani. Atxiiiti kãkiti ipina ãti erekari kamakari ïkapani, iua mapinakani ïkapani? Atxiiiti ipina iua ïkapani. ⁸ Teoso oerekaua ate, iua iteene tiretiniua ate, kotxi Kristo ipina ate ïkapani maerekati akamapanika anakasaaki.

⁹ Kristo ipinini kamaerekataua ate, ininiã uatxa Teoso apakapaua ate. Apikomoni Kristo kaminua, kotxi Teoso !omanataikaua. !Imisiritaikaua. ¹⁰ Ate Teoso omanatakani anakasaakia, Teoso ãkiri ipina ate ïkapani. Ininiã Teoso mokaiakari !atxaikaua. Iua apakapaua. Iua apakapaua, ininiã amaerekani imaktxaka, ininiã aãuapininiika, kotxi iua õkitikaua auapininiika anini ïkapani Teosokata, kotxi Kristo auini auapika.

¹¹ Teoso kamari ikara ate ïkapani. Apikomoni iua kamapanikauako ate, kotxi iua kamapoxokonitaua, kotxi aãuïte Xesosi Kristo mikanapiriãua ate Teosomoni.

Adão, Kristo Pakini

¹² Maerekanitxi apoka itixi kiki ãtika xika, Adão inakori xika. Maerekati ikamakiti xika ipina. Ininiã ikinimane kãkiti ipina, kotxi ikinimane kãkiti kamari maerekati.

¹³ Teoso paniãtakiti iõkatsopatakori apokini apisapani-ka, kãkiti kamari maerekati, iuaritika Teoso !imisiritana ninoa maerekati ikamakitina xika, kotxi iusaaki !isãpiretapanikari ipaniãtakiti. ¹⁴ Adão auakasaaki atoko, Moisesi auakasaaki manapi, iusaaki Teoso paniãtakiti iõkatsopatakori !apokapanika, iuaritika ikinimane ipina. Atxiiiti kãkiti !ikamari maerekati Adão maerekani atoko, kotxi iua !ikamari Teoso paniãtakiti, iuaritika ikinimane ipina. Kiki Adão inakori axinikasaa-ki, aimarotari iua Xesosi atoko ininiua.

¹⁵ Txamari aimarotari iua na Xesosi !atokoni itxaua, kotxi ãtika kiki maerekani xika, itori kãkiti ipina. Iua sikari ipïkitxi kãkitimoni. Kiki ãtipekana, Xesosi Kristopekana, iua sikari erekari Teoso siãkiti itori kãkitimoni imapinakanina ïkapani. Teoso siãkiti iïki !auari. !Erekari Adão sikakiti. Peerekari Xesosi Kristo siãkiti.

¹⁶ Kiki ãtika Adão inakori kamari maerekati. ãtinoka maerekati ikama, ininiã eereka Teoso sãpiretari imaerekani. Eereka Teoso misiritari iua. Teoso siãkiti !ikara atokoni itxa. Kãkiti maerekati itori ikamakasaaki, kiki ãtipekana Xesosi sikari Teoso siãkiti kãkitimoni, ininiã ikamaerekatana kãkiti. Iusaaki imaktxakari nino maerekani. ¹⁷ Kiki ãtika, Adão inakori maerekani

xika, Teoso txīkitakari ikinimane ipinini. !Erekari iua kiki kamakiti. Āti kiki, Xesosi Kristo inakori kamakiti peerekari. Iua txīkitakari kākiti ākixinire katapara inini maerekati imakamakani ūkapani. Kākiti ikara atoko inakari Teoso sikari ikinipoko erekari. Itori isika. Itxīkitakari iua atāo inakari kamakari ininiua. Ia iparīka ūki lauari.

¹⁸ Adāo kamari ātinoka maerekati, iuaritika iua maerekati txīkitakari Teoso misiritinina ikinika kākiti. Iua atokokana Xesosi kamakiti ātika txīkitakari Teoso kamaerekatinina kākiti ninoa ātipirika auini ūkapani. Iuasaaki atāonoka ikamakiti. ¹⁹ Kiki ātika Adāo inakori na kamari Teoso sākire iaōka, ininiā itxīkitakari kākiti itomaneri maerekati ikaminina. Kiki ātipekana Xesosi inakori kamari Teoso sākire iaōka, ininiā itxīkitakari kākiti itomaneri atāo inakari kamakani ininiuana.

²⁰ Teoso sikari ipaniātakiti iōkatsopatakori Moisesimoni. Iuasaaki kākiti imarotari maerekati itori ikamakitina, ininiā maerekanitxi apiaāpota, kotxi Teoso paniātakiti iōkatsopatakori auape. Maerekanitxi apiaāpota, iuaritika erekari Teoso sikakiti kākitemoni apiata.

²¹ Maerekanitxi txīkitakari kākiti ipinini. Erekari Teoso sikakiti kākitemoni txīkitakari kākiti auini ātipirika imaxipokakani tīkane, kotxi aāuŭte Xesosi Kristo txīkitakari kākiti atāo inakari kamakari ininiua. Ininiākara kākiti auapininiika, kotxi Xesosi Kristo kamaerekatana.

!Anirekaikari Maerekati Akamini

6 Ininiā erekari atxīiti apikomoni maerekati akamini, ikinipoko erekari Teoso sikakiti apiata auini ūkapani? ² Konapitini. Teoso makatxakapekari amaerekani, kotxi iuasaaki !anirekaikari apikomoni maerekati akamini. Anireēkiti maerekati akamini xipope, kākiti ipinini atoko itxa ixipokini. Ininiā !apakata apikomoni maerekati akamini. ³ Apatxisatiko oerekari Kristo Xesosi nakitiakori aniniua. Iuakata apinini atoko itxa apatxisatiko. Himarotapekari ikara. ⁴ Apatxisatiko oerekari Kristokata ikatakoni atoko aniniua, ininiā !anirekari apikomoni maerekati akamini. Kristo iri Teoso posotiire ōkitikari imi, iuaīkana auāki inini ūkapani. Peerekari iposotiire. Ininiā apatxisatiko oerekari Xesosi ōkitikiko atokokana Teoso ōkitikaua ate aāuini amaneri inini ūkapani.

⁵ Aāuapika Kristokata, ininiā ātika atoko atxaua iuakata aāuini, ininiā Kristo ipinini atokokana mitxi aāuini xipope. Kristo iuaīkana auini atokokana, aāuini amaneri. Peerekari, kotxi aāuapika Kristokata, ātika atoko aniniua iuakata. ⁶ Mitxi anireēkiti xipope, kotxi Kristo makatxakari amaerekani aamina ūpiriāmitakari nopini ipīkasaaki ate ūkapani. Ininiā mitxi anireēkiti posotiire !auaika. Ixipokaākapeka, kotxi mitxi anireēkiti maerekatina. Ininiā maerekanitxi nitiriakori atoko !atxaua. Aimarotari ikara. ⁷ Maerekanitxi na paniātakari kākiti ipīkari.

⁸ Kristokata ipīkani atoko aniniā, aimarotari iuakata aāuini apaka. ⁹ Ipīkasaaki ōkitikaāka, ininiā !ipinaika. Aimarotari ikara. Ipīkitxi na kaposotiireikari iuaīkana Kristo ipinini ūkapani. ¹⁰ Iua ipina maerekanitxi posoti-

ire ixipokini ūkapani. Iuasaakipeka maerekanitxi posotiire xipoka. Uatxa Kristo auapininiika Teosokata, iri nireēkitinoka ikamini ūkapani. ¹¹ Iua atokotxikana anireēkiti maerekati xipope. Uatxa !anirekaikari maerekati akamini. Uatxa aāuapininiika Teosokata, iua nireēkitinoka akamini ūkapani, kotxi Kristo Xesosikata aāuapika.

¹² Ininiā na hāuiritapiri hīto paniātinii maerekati hīkamini. Na hīkamapiri maerekati hīto nireēkiti. ¹³ Na hāuiritapiri hīto kaminiri maerekati. Na hāuiritapiri hōki kaminiri maerekati. Na hāuiritapiri hinama kaminiri maerekati. Na hāuiritapiri hīuako kaminiri maerekati. Na hīkamapiri maerekati hīto nireēkiti. Hīteka hīsikauako Teosomoni, kotxi mitxi ipīkani atoko hītxaua, eereka Teoso txīkitakari auāki iuaīkana hinini, ininiā hīsikari hīto ikinika Teosomoni. Atāo inakarino-ka hīkamako hōkiā, hinamaā, hīuakoā, imakinika hītoā. ¹⁴ Uatxa maerekanitxi apatrāote atoko !itxaua. Uatxa amisiritiko !auaika, Teoso paniātakiti iōkatsopatakori amakamakaniā, kotxi ikinipoko erekari Teoso sikakiti aāpakapakasaaki, iuasaaki imakatsakari amisiritiko.

Atāo Inakari Nitiriakori

¹⁵ Ininiā atxīiti hītxano nota: “Maerekati makama, kotxi amisiritiko !auaika Teoso paniātakiti iōkatsopatakori amakamakaniā, kotxi ikinipoko erekari Teoso sikakiti aāpakapakasaaki, imakatsakari amisiritiko. Ininiā makamari maerekati,” atxa atxīiti. Konapitini. ¹⁶ Himarotari, hāuiritiniāri kākiti paniātinii iua nireēkiti hīkamini, ininiā iua hīpatrāote atoko itxaua. Iua nitiriakori atoko hītxaua, kotxi hīkamari iua paniātakiti. Maerekanitxi hīpatrāote ininiāua, hīkamari maerekati, ininiā hīpina. Ininiā kona hāua Teosokata ātipirika. Teoso hīpatrāote ininiāua, iua paniātakiti hīkama, ininiā atāo inakarino-ka hīkama. ¹⁷ Nitxari Teoso: “Erekapitikari atemoni pikamakiti.” Ikara atoko nitxari Teoso, kotxi mitxi maerekanitxi nitiriakori atoko hītxaua. Uatxa maerekanitxi nitiriakori !hītxaua, kotxi iteene hīkīpitari hōerekiko. ¹⁸ Teoso makatxakapekai hīte, ininiā uatxa maerekanitxi nitiriakori !hītxaua. Uatxa Teoso nitiriakori hītxaua, ininiā atāo inakarino-ka hīkama. ¹⁹ Ikara atoko nitxa sākireta hītemoni, kotxi himarotari nitiritxi, patrāo pakini pirena. Himarotakiti poiāoka. Mitxi hāuiritari hīto kaminiri maerekati inireēkiti. Hāuiritari hīto apikomoni maerekati ikamaāpotini. Apiaāpota maerekati hīkamakiti. Iuasaaki hīto maerekanitxi nitiri atoko itxaua. Uatxa hīsikari hīto Teosomoni atāo inakari nitiri ininiua ūkapani, ininiā hīkamari atāo inakarino-ka. Ininiā Teoso nakitiakorino-ka hītxaua.

²⁰ Maerekanitxi nitiriakori hinakasaakia, atāo inakari nitiriakori na hītxaua, ininiā atāo inakari na paniātai hīte atāo inakarino-ka hīkamini. ²¹ Īkiripa erekari hāpakapa, maerekati mitxi hīkamakasaaki? Kona kapakapare. Uatxa hīpētata maerekati mitxi hīkamakiti xika. Maerekati kamiko xika kākiti ipina, ininiā kona aua Teosokata ātipirika. ²² Uatxa

maerekanitxi na paniātaikai hīte. Uatxa Teoso nitiri-akori hītxapekua, ininiā hīkamari ikinipoko Teoso īkapani. Ininiā hāuapininiika hītxako Teosokata ātipirika. ²³ Maerekanitxi kākiti patrāote atoko itxa. Ikitxitari kākiti parīkatxi īki, txamari ipīkitxi itxaua parīkatxi īki. Teoso sikakiti atemoni ātiāo. !Aparīkauata Teoso sikakiti aāpakapini īkapani, iuaritika isikaua aāuini ātipirika inini īkapani, kotxi aāuīte Xesosi Kristo ipina ate īkapani.

Tanirauatakarō Atoko Atxa

7 Nitariakori, hīte hīkinika imarotari paniātakori iōkatsopatakori, ininiā himarotari nisākire. Kākiti auapanika inakasaaki, ikīpitariko paniātakori iōkatsopatakori. ² Noerekaiko hīte. Paniātakori iōkatsopatakori paniātaro sito okaikotini oītanirikata iua auapanika inakasaaki. Iua ipininiā, iua paniātakori na paniātaikaro oa. ³ Ōtaniri auapanika inakasaaki, ātikata oāuiniā, kanokarero otxaua. Ōtaniri ipininiā, paniātakori iōkatsopatakori na paniātaikaro oa, ininiā apakata ātikata oītaniriuatini. Ikara atoko oniniā, kanokarero !otxaua.

⁴ Nitariakori, oa sito atokotxikana ate amakinika. Kristo ipina ate īkapani, ininiā Moisesi paniātakiti iōkatsopatakori kona paniātaikaua, kotxi uatxa Kristo nakitiakori atxaua. Uatxa Teoso ōkitikakiti Kristo nakitiakori atxaua. Iua nakitiakori atxaua, ininiā erekari akama Teoso īkapani. ⁵ Mitxi anireēkiti maerekati paniātaua maerekati akamini. Aīto nirekari maerekatinoa ikamini, kotxi paniātakori iōkatsopatakori txari: “Kona hīkamapiri maerekati.” Ininiā iusaaki apiata anirekari maerekati akamini, kotxi maerekatinoa kamakani atxaua. Ininiā apina, ininiā kona aāuapika Teosokata. ⁶ Mitxi paniātakori iōkatsopatakori nirekari ipaniātiniua. Uatxa paniātakori iōkatsopatakori na paniātaikaua. Ikara kitxakari. Uatxa amaneri, kotxi uatxa aparīkauata Teoso īkapani. Erekari Matamatakoti oerekaua aparīkauatini Teoso īkapani.

Teoso Paniātakiti Iōkatsopatakori

⁷ Ininiā natokopa itxa uatxa axinikakiti? Teoso paniātakiti iōkatsopatakori maerekati itxaua atxīiti? Konapitini. Maerekati !itxaua. Teoso paniātakiti iōkatsopatakori mauakanimako, nota !imarotamariko maerekati nikamini. Teoso paniātakiti iōkatsopatakori txari:

Kona pinirekapiri āti nakiti, ininiā āti nakiti ninirekiniā, nimarotari nikaminiri maerekati. ⁸ Maerekati xika na nota nirekari ikara Teoso paniātakiti nikamini. Ininiā iteene ninirekari apanakini nakiti. Ninirekari apanakini nakiti, kotxi Teoso paniātakiti iōkatsopatakori txari:

Kona pinirekapiri āti nakiti. Teoso paniātakiti iōkatsopatakori mauakaniā, iusaaki maerekati !auari. ⁹ Teoso paniātakiti iōkatsopatakori nimimarotakanisaaki, na nimarotari maerekati nikamini. Niuākatari nākixinire auāki inini. Teoso paniātakiti

iōkatsopatakori nimarotakasaaki, nimarotari maerekati nikamini. Iusaaki nimarotari nipinini maerekati xika. ¹⁰ Iusaakipeka nimarotari nākixinire ipīkari atoko inini. Teoso paniātakiti iōkatsopatakori oerekari kākiti erekari ikamini, iua auini īkapani. Txamari Teoso paniātakiti iōkatsopatakori oerekano nota nipinini nimaerekati xika. ¹¹ Maerekati ninireēkiti misirienetano. Imisirienetano, ininiā na nikamari Teoso paniātakiti iōkatsopatakori iaōka. Ininiā nikamari maerekati. Ininiā maerekati xika nipina.

¹² Teoso paniātakiti iōkatsopatakori !auari maerekati, kotxi Teoso kamari. Atāonoka itxa Teoso paniātakiti. Erekari. ¹³ Atxīiti erekari txīkitakano nipinini? Konapitini. Maerekanitxi txīkitakano nipinini. Maerekanitxi txīkitakano Teoso paniātakiti iōkatsopatakori erekari nimakamakani, ininiā nikamari maerekati, ininiā iua maerekanitxi txīkitakano nipinini. Ininiā aimarotari maerekanitxi kona xatiki apakata. Maerekatinoa, kotxi maerekanitxi txīkitakano nipinini. Teoso paniātakiti iōkatsopatakori oerekaua ikara atoko inakari.

¹⁴ Aimarotari Teoso paniātakiti iōkatsopatakori iaxiti īkari ininiua. Txamari nota uaikirino. Maerekanitximoni vētxitakori atoko nitxaua, maerekanitxi nitiri atoko nininiua īkapani. ¹⁵ Na nimarotari nikamakiti, kotxi na nikamari notaka nireēkiti. Nikamari nimanirekakiniti, nomanatakiti. ¹⁶ Ininiā maerekati nimanirekakiniti nikamakasaaki, iusaaki nimarotari Teoso paniātakiti iōkatsopatakori ereka inini. ¹⁷ Ininiā na notani kamari maerekati. Maerekati nākixinireē auakarira txīkitakari nikaminiri iua maerekati. ¹⁸ Nimarotari erekari !auari nākixinireē. Maerekatinoa aua nākixinireē, kotxi ninirekari erekari nikamini, txamari !niposotari. ¹⁹ Na nikamari erekari ninireēkiti. Nikamapikari maerekati nimanirekakiniti. ²⁰ Ininiā nimanirekakiniti nikaminiā, kona notani kamari. Maerekati nākixinireē auakarira txīkitakano iua maerekati nikamini.

²¹ Ininiā ia sākiretxiti atāo: Ninirekasaakiri erekari nikamini, maerekatinoa niposota nikamini. ²² Nākixinireē iteene ninirekari Teoso paniātakiti iōkatsopatakori iaōka nikamini. ²³ Txamari aua āti ninireēkiti nīito āki. Iua nīito nireēkiti nirekari ixipokiniri nākixinire nireēkiti. Iua nīito nireēkiti xika nikamari maerekati nireēkitinoka. !Niposotari erekari nikamini. Kateia āki iaxirikakoni atoko nitxa. ²⁴ !Erekano nota. Maerekati kamakarino nota. Kipa makatxakano, maerekati nīito nireēkiti nimakamakani īkapani? Nīito txīkitakano nipinini. Kipa moianatano? ²⁵ Aāuīte Xesosi Kristokara moianatano. Iuara makatxakano nimapinakanani īkapani. Peerekari Teoso, kotxi iua kamari ikara atoko nota īkapani.

Ininiā uatxa ia atoko inakari nisāpiretai. Nākixinireē ninirekari Teoso paniātakiti iōkatsopatakori nikamini. Txamari nīitoā maerekanitxi nireēkitinoka niposota nikamini.

Erekari Matamatakoti Txīkitakari Aākixinire Auāki Inini

8 Ininiā uatxa Teoso !itxaikaua ate: “Maerekati hīkamakiti xika nimisiritaiko hīte,” !itxaikaua ate, kotxi

Kristo Xesosi nakitiakori atxapekua. !Akamaikari aïto nireëkiti. Erekar Matamatakoti sikaposotiiretaua iua nireëkiti akamini. ² Erekar Matamatakoti nireëkiti akama, ininiã iua txïkitakari aãkixinire auãki inini, kotxi Xesosi Kristo nakitiakori atxaua. Erekar Matamatakoti makatxakano maerekani nireëkiti nikamini, ininiã na nipina. ³ Aïto maerekani xika Teoso paniãtakiti iõkatsopatakori !iposotari imaktxakiniri amaerekani, kotxi !aposotari akaminiri iua paniãtakiti. Iuaritika Teoso makatxakari amaerekani, kotxi iua iokanitari imi atemoni. Imi ïto ate ïto atoko, maerekati kamakari ïto atoko itxa. Teoso iokanitari imi atemoni ipinini ïkapani, amaerekani imaktxakini ïkapani. Ininiã ixipokari maerekati posotiire aïtoã auakari. ⁴ Teoso kamari ikara, ininiã Xesosi kamari ikinika Teoso paniãtakiti iõkatsopatakori iaõka ate ïkapani, kotxi ipaniãtakiti atão inakarinoa. Ininiã !akamaikari maerekati aïto nireëkiti. Akamari Erekar Matamatakoti nireëkiti.

⁵ ïtotxi nireëkiti kamakani xinikapikari ïtona nireëkitinoka. Erekar Matamatakoti nireëkiti kamakani xinikapikari Erekar Matamatakoti nireëkitinoka. ⁶ Kãkiti xinikiniãri ïto nireëkitinoka, ixinikakiti txïkitakari iua ipinini, ininiãkara kona auapika Teosokata. Kãkiti auiritiniãri Erekar Matamatakoti txïkitakiniri ixinikiniri Erekar Matamatakoti nireëkitinoka, iua auapininiika Teosokata. Erekar xinireri iua. ⁷ Kãkiti xinikiniãri ïto nireëkitinoka, Teoso mokaiakariakori itxauana, kotxi !inirekarina Teoso paniãtakiti iaõka ikaminina. !Iposotarina Teoso paniãtakiti iaõka ikaminina. ⁸ ïtotxi nireëkitinoka kamakani !iposotari ikamapoxokonitirina Teoso.

⁹ Hïtepekana, Erekar Matamatakoti hãkixinire auiniã, hïkamari iua paniãtakiti. !Hïkamari maerekati hïto paniãtakiti. Erekar Matamatakoti kãkiti ãkixinireë mauakanisaaki, na Kristo nakitiakori !itxauana, kotxi Erekar Matamatakoti Kristo nakiti itxaua. ¹⁰ Hïto ipinapitikako maerekati xika, iuaritika hïxinire auãkiri itxaua Kristo hãkixinireë auiniã. Hïxinire auãkiri itxaua, kotxi Kristo kamari atão inakarinoa ate ïkapani.

¹¹ Teoso õkitikari Xesosi, iua ipïkasaaki. Erekar Matamatakoti Teoso nakiti hãkixinireë auiniã, Teoso Kristo õkitikakari, txïkitakariko hïto ipinakari uaiãkana auãki inini, kotxi Erekar Matamatakoti Teoso nakiti aua hãkixinireë.

¹² Ininiã nitariakori, auapitika akamakiti tïkane Teoso ïkapani. !Auari akamakiti tïkane aïto nireëkiti akamini ïkapani. ¹³ Hïto nireëkiti hïkaminiã, hïxinire ipïkari atoko itxa, ininiã ãtipirika kona hãua Teosokata. Hamanainiãri Erekar Matamatakoti maerekati hïto kamakiti ixipokini, iusaaki hãuapika ãtipirika Teosokata.

¹⁴ Erekar Matamatakoti nireëkiti kamakani, Teoso anaakori itxauana, kotxi Erekar Matamatakoti Teoso nakiti. ¹⁵ Iua Erekar Matamatakoti Teoso sikakiti hïtemoni. !Itxïkitakai nitiritxi kapïkareri hininiua. Itxïkitakai Teoso anaakori hininiua. Erekar Matamatakoti posotiireë aãkiritari aïri Teoso: "Papai, niri," atxari. ¹⁶ Erekar Matamatakoti sãpiretaua aãkixinireë Teoso anaakori

aniniua. ¹⁷ Teoso anaakori aniniãua, aãpakapariko erekar Teoso nïkatakiti ate ïkapani. Kristo apakapari erekar Teoso nïkatakiti iua ïkapani, ininiã ate apakapari iuakata. Kristo misiritaãkapeka. Ate misiritiko apaka auiniã Kristo sãkire aãuikini xika, Kristo ikinimane auïte inakasaakiua, ate apaka aua iuakata iusaaki. Aãtamatarari iua iotximere. Peerekari iusaaki iuakata aãuini.

Aãpakapariko Ikinipoko Erekar

¹⁸ Uai itixi aãuakasaaki, aãtatsiirauata. Eereka !axinikaikari mitxi aãtatsiirauatini, kotxi Teoso oerekauako ikinipoko erekar. Iusaaki peerekari. ¹⁹ Ikinipoko Teoso kamakiti iãtapari ipoxokoniritika Teoso keto õti. Iusaaki aimarotari Teoso anaakori. ²⁰ Kotxi ikinipoko Teoso kamakiti misiritaãkapeka, ixipokaãpotini tïkane. Ikinipoko Teoso kamakiti ixinireka !ixipokaãpota. Teoso txïkitakari ikinipoko xipokaãpotini. Iuaritika aimarotari, ipïkitxi xipokini õti apokapitikako. ²¹ Ikinika Teoso kamakiti iãtapari iua õti. Iusaakiko itixi amaneri itxauako. !Ixpokaika. Iusaaki ikinika amaneri. !Ixpokaika. Teoso anaakori misiritiko !luaika. Peerekari iusaakiko.

²² Aimarotari uatxapiikama ikinika Teoso kamakiti atatsiirauata, amarini tsiu sito atatsiitini atokokana. ²³ Na itixi Teoso kamakitinanini atatsiirauata. Aãkixinire apaka akiripireta, kotxi anirekar Teoso keto apokini. Iusaaki iua apakapaua ate iua anaakori. Iusaakiko aïto amaneri isikaua. Iusaakiko aïto !kaxiporeikari. Merepanika Teoso sikakiti auapeka atemoni, kotxi iua sikapekari Erekar Matamatakoti atemoni. ²⁴ Teoso makatxakapekari amaerekani, aãuikasaakiri isãkire. Ininiã aiãtapari apikomoni isikaenetakiti atemoni. !Aãtamatapapanikari isikaenetakiti, ininiã aiãtapapanikari. Aãuikapitikari isikaenetakiti isikiniua, ininiã atão aãuikiniri. ²⁵ Aiãtapari aãpakapakiti tïkane. !Aãpakapanikari, iuaritika aiãtapari apoxokoniritika, kotxi aimarotapitikari ikara apokini.

²⁶ Erekar Matamatakoti moianataua, kotxi na kataparaxinireua. !Aimarotari aamanaãkiti tïkane, Teoso amisãkiretakasaaki. Iuaritika, Erekar Matamatakoti misãkiretari Teoso ate ïkapani. Asãkireë !aposotari asãpiretiniri Teoso ikinika anireëkiti, ininiã Erekar Matamatakoti misãkiretari Teoso ate ïkapani. Ipinimoni itxa isãpiretiniri Teoso. Kãkiti sãkireë !isãkirauata Teosokata. ²⁷ Teoso imarotari kãkiti ãkixinire, ininiã iua imarotari Erekar Matamatakoti xinikakiti, kotxi Erekar Matamatakoti misãkiretari Teoso, Teoso nakitiakori ïkapani. Erekar Matamatakoti amanaãri Teoso, Teoso nireëkiti ikaminana inakitiakori.

Teoso Iteene Tiretiniua

²⁸ Aimarotari ikiniõtika erekar ikaminua ate, kotxi iua tiretakani, iua mereëkini atxaua ate. Iuaritika aãtatsiirauatini auapitika. Iuaritika iusaaki apaka erekar ikaminua. Iua mereëua, kotxi inirekar imereiniua. ²⁹ Itixi kamiko apisapanika Teoso imarotapekua ate.

Iua mereëpekaua ate, iua anaakori kaiãopokori aniniua ïkapani. Imereëpekaua, imi Xesosi atoko aniniua ïkapani. Ininiã Xesosi aïtari apiari. ³⁰ Teoso akiritana imereëkini. Apaka ikamaerekatana iua mereëkini. Apaka itanapoko erekari isika ninoa ikamaerekatakinimoni.

³¹ Teoso kamari ikinipoko ikara erekari ate ïkapani, ininiã natokopa itxa axinikakiti? Teoso kataparari moianatapitikaua, ininiã ate omanatakani tapara poiãoka. ³² Teoso sikari ikinipoko atemoni. Imi apaka isika atemoni, kotxi ipina ate akinika ïkapani. Isikari imi atemoni, ininiã aua atxiïti iua masakakiniti atemoni? !Auari. Ikinipoko erekari isikapitikaua atemoni. Ikarone !auari. ³³ Aua atxiïti Teoso mereëkini maerekani sãpiretakari? !Auari. Teosora sãpiretari ninoa maerekani mauakani, kotxi iua kamaerekatapekana ninoa. ³⁴ Aua atxiïti Teoso mereëkini misiritiko sãpiretakari? !Auari. Kotxi Kristora misãkiretari Teoso ate ïkapani, kotxi Teoso ikikomoni auakari itxaua. Iua ipina ate ïkapani, ininiã eereka Teoso õkitikari iua, auapika inini ïkapani. Iuara misãkiretari Teoso ate ïkapani. ³⁵ Ininiã kipa atxiïti iotokakatari Kristo tiretiniua? !Auari, kotxi amaxikikosaaki, Kristo tiretapanikaua. Amauarenisaaki, Kristo tiretapanikaua. Amisiritikosaaaki, Kristo tiretapanikaua. Natxi auakasaaki, Kristo tiretapanikaua. Amamãkanisaaki, Kristo tiretapanikaua. Monõkori auakasaaki, Kristo tiretapanikaua. Neenamtxi auakasaaki, Kristo tiretapanikaua. ³⁶ Teoso sãkire iõkatsopatakori txari:

Pisãkire aũukini xika, pamonõkoniri ikiniõtika. Aõkiko monõkoni auapika. Soti auïte apanakini okini atoko, apanakini nirekari okiniua ate, itxa Teoso sãkire iõkatsopatakori. ³⁷ Maerekati ikara atoko aua, iuaritika iteene akãiata, kotxi atiretakari sikataparataua. ³⁸ Ia nimarota. Kristo tiretiniua iotokakakari !auari. Apĩkasaaki, itiretapanikaua. Aũapanika inakasaaki, itiretapanikaua. Teoso nitiriakori iaxitikini !iotokakari itiretiniua. Satanasi nitiriakori !iotokakari itiretiniua. ïkorasaaki auakani, katana auakani apaka !iotokakari Kristo tiretiniua. !Auari posotiiretxi, Kristo tiretiniua iotokakakari. ³⁹ Iaxiti apiko nopinixiti auakani, iaxiti patapi auakani apaka, !iotokakari Kristo tiretiniua. Hinitiniãri Teoso tiretiniua iotokakakari, !hãpokari. Hinitiniãri ikinika Teoso kamakiti auiniãtaã, iuaritika kona hãpokari Teoso tiretiniua iotokakakari. !Auari. Aũuïte Kristo Xesosi oerekaua Teoso iteene tiretiniua.

Teoso Mereëna Xoteoakori Inakitiakori ïkapani

9 Atão nisãkire. Kristo nakiti nitxaua, ininiã na nisãpiretari misirieneretxi. Nãkixinireë nimarotari nisãkire atão inini, kotxi Erekar Matamatakoti oerekari nisãkire atão inini. ² Ia nisãkire atão. Iteene nimatinaniuatapika. Nãkixinireë maerekaxiniretinoka nitxa, ninirimane Kristo sãkire mauikakani xika. ³ Ninirekamari Teoso misiritinino nota, ninoa nitariakori imamisiritakani ïkapani. Ninirekamari Kristo manirekakanino nota, ninirimane Kristo nakitiakori

ininiua ïkapani. Niposotiniãri ikara atoko nikamini, nikamari ninirimane ïkapani. Txamari !niposotari. ⁴ Ninirimane Isaeo apika mekaniriakori itxauana. Teoso nirekana ninoa iua anaakori ininiuana. Teoso oerekari iposotiire ninoamoni. Isãpiretana ninoa ikamaenetakiti ninoa ïkapani. Isikari ipaniãtakiti iõkatsopatakori ninoamoni. Oerekana ninoa kiiniri atão ikaminina, iuakata isãkirauatakasaakina. Teoso sãpiretana ninoa ikamakiti ïkane ikinimane kãkiti ïkapani. ⁵ Ninirimane apika atokiriakorini Apraõoma, Isakima, Isaeoma pakini. Kristo uaimoni iponaniãkasaaki, ninoa apiko mekaniri itxaua, iuaritika Teoso itxaua. Ikini-mane auïte itxaua. "Peerekai," matxari iua ãtipirika. Ameë.

⁶ Atxiïti Teoso kona kamari ikamaenetakiti Isaeo apika mekaniriakori ïkapani? Ikamapitikariko. Txamari kona ikinikani Isaeo apika mekaniriakori Teoso nakiti !itxauana. ⁷ Kona ikinikani Apraõo apika mekaniriakori atão Teoso anaakori !itxauana, kotxi Teoso txari Apraõo:

Papika mekaniriakori atão inakani Isaki mekaniriakori itxauana.

⁸ Teoso sãpiretari Isaki auini, iua auini apisapanika. !Isãpiretari ãti Apraõo ãkiri Isimaero inakori auini, iua auini apisapanika. Isimaero iponaniã, kotxi Apraõo sirĩka Isimaero inorokata. Ininiã kãkiti Isimaero atoko, Teoso anaakori !itxauana. Teoso sãpiretari Apraõo iua keene inini, ininiã isikaenetakininoka atão Apraõo apika mekaniriakori itxauana. ⁹ Teoso sikaenetari Apraõo keene inini. Itxari:

Niketo manapi nikanapiriãko. Iuasaaki Sara keen-eroko. Kiki oenetako.

¹⁰ Apikomoni nisãpiretai. Hepeka anaakori iri ãtika. Aãpika atokirini itxaua Isaki inakori. ¹¹ Oa anaakori iponaniã ipipe. Iponaniinina apisapanika, maerekati ikaminina apisapanika, erekari ikaminina apisapanika, Teoso sãpiretaro oa:

Merepanika iponaniãkari eereka iponaniãkari nitiri itxauako.

Ininiã Teoso mereëri iua eereka iponaniãkari Xakoo inakori apiari inini ïkapani, iua auini apisapanika. Ininiã na Xakoo kamakitini txĩkitakari Teoso mereiniri iua. Teoso mereëri iua, kotxi inirekari ikara atoko inini.

¹³ Teoso sãkire iõkatsopatakori txari:

Xakoo nitireta. Isao nomanata.

¹⁴ Ikara atoko ininiã, kanatokopa itxa axinikakiti? Atauako Teoso na kamari erekari? Ikamapitikari erekari. ãtipirika Teoso kamari erekari. ¹⁵ Teoso txari Moisesi:

Ninirekiniãri ãti niamonĩkini, niamonĩkari.

Ninirekiniãri ãti nimoianatini, nimoianatari.

¹⁶ Ikara atoko ininiã, anireëkiti !itxĩkitakari Teoso mereiniua. Akamakiti !itxĩkitakari Teoso mereiniua. Imereëua, kotxi iamoniãkari. ¹⁷ Teoso txari Paraoo isãkire iõkatsopatakoriã:

Nota txĩkitakai auïtetxi pininiua, niposotiire noerekini ïkapani, niuãka ikini itixiti auakani imarotini ïkapani,

itxa Teoso sākire iōkatsopatakori. ¹⁸ Ininiā Teoso nirekiniāri iamoniāri āti, iua amoniāri iua. Apaka nirekiniāri, itxikitakari āti ākixinire kaikoxinire inini, Teoso nireēkiti imanirekakani tīkane.

Teoso Omanākare, Iamoniāre Pakini

¹⁹ Atxīiti hīte txano nota: “Teoso ikara atoko ininiā, na ate xikani kaikoxinireua ate. !Aposotari akaminiri Teoso manirekakiniti,” atxīiti hītxano. ²⁰ Txamari lapakata ia atoko hinini. Kiriparai hīte ikara atoko ina sākiretakani Teosomoni? Kākiti hītxaua. Teoso kamakiti pitxaua. Atauako kamakori posotatari ikamakirimoni: “Kinirepa pikamano nota ia atoko ninini?” !Apakata ikara atoko hinini hīkamakirimoni. ²¹ Hīxinikari kiki titixi kamakari. Ikamari inireēkiti. Atxīiti āti porī katsariā, ikamari ipi kopiti. Atxīiti ianaka ikamari āti kopiti, peereri inini, kiiniri tīkapani. Atxīiti ātipekana ikama patimari poiāo ereri, ikiniōtika iāriā iātiko tīkapani.

²² Ikara atoko itxa Teoso kaminiri kākiti. Teoso kamari apanakini kākiti Teoso omanākare imarotinina tīkapani imaerekanina xika. Iuasaaki oerekana iposotiire imarotirinina tīkapani. Teoso omanatana ninoā, iuaritika imīteenekana. Kona uatxa ixipokana ninoā. Txamari iketo manapi ixipokanako ninoā. Uatxa imīteenekapanikari ninoā maerekani. ²³ Apaka ikamari apanakini iua amoniākani. Uatxa imīteenekari iua omanatakini maerekani, kotxi inirekari iua amoniākani imarotiniri iua ereka inini, kotxi peerekari iua. Iteene itiretari iamoniākani. Ikamana ninoā erekari isikakiti apakapinina tīkapani. ²⁴ Hīte, ate pakini, iua amoniākani atxaua. Iua akiritakini atxaua. Na Xoteonanini akirita. Akiritana Xoteo minakaniua apaka. ²⁵ Teoso sākire iōkatsopatakori, Oséia iōkatsopatakitiā, Teoso sāpiretari ikara. Itxari:

Kākiti mitxi nota nakitiakori minakonimoni nitxako: “Uatxa nota nakitiakori hītxapekauako.” Ninoā mitxi nimatiretakinitimoni nitxako: “Uatxa nota tiretakini hītxapekauako,” nitxako.

²⁶ Mitxi Teoso txana ninoā: “Na nota nakitiakorini !hītxaua.” Ikara Teoso sākiretiniātaā, iuaātaātxikana: “Teoso ātipirika auāki inakari anaakori hītxaua,” inaāka ninoamoni, itxa Teoso sākire iōkatsopatakori.

²⁷ Apaka Teoso sākire iōkatsopatakoriā, Isaía txari: Isaeo apika mekaniriakori kaiōpokori, potxoari uiniti kipatxite atoko itxana, txamari poiāonoka makatxakaāka imapinakani tīkapani.

²⁸ Patimari Teoso xipokiniri iparīka imisiritiniri kākiti imaerekani xika, itxa Isaía. ²⁹ Mitxipeka Isaía txari:

Apiananiri kaposotiireri nīkatari apanakini aāpika mekaniriakori imapinakani tīkapani. Ininiā atenape auapanika. Teoso manīkatakanimauako, axipokapimako kākiti Sotoma sitatxiti auakani xipokini atoko, kākiti Komoha sitatxiti auakani xipokini atoko atxapimako, itxa Isaía sākire.

Xoteo Mauikakaniri Teoso Sākire

³⁰ Ininiākara aimarotari ia: Xoteo minakaniua manitakanisaakiri Teoso txīkitakinina atāo inakari kamakani ininiuana, iuasaaki Teoso txīkitakana atāo inakari kamakani ininiuana, kotxi auikarina Teoso sākire. ³¹ Txamari Xoteoakori nitaāpotari paniātakori ninoā atāo inakari kamakani txīkitakakari, txamari !apokarina.

³² Kinirepa !apokarina ikara? Kinirepa Teoso na txīkitakana ninoā atāo inakari kamakani ininiuana? Kotxi !auikarina isākire. Inirekarina iparīkana txīkitakinina atāo inakari kamakani ininiuana. !Inirekarina auikinirina Xesosi sākire. Ninoamoni Xesosi kai kimapori nopini auakari atoko itxa, kotxi kai xika kākiti mākitita.

³³ Teoso sākire iōkatsopatakori kitxakapirīkari sāpiretari ia kai pirena. Itxari:

Pikenakotariko ia: Nota iokanatakiti kākitimoni kai atoko itxa. Nitakari iua kai Siāo sitatxitiā Xoteoakori kimaporeē. Iua kai xika kākiti mākitita. Iua kai xika kākiti irika. Iuaritika iua sākire auīākani !lipētauata nota apisatoō.

10 Nitariakori, nākixinireē iteene ninirekari Teoso makatxakiniri ninirimane maerekani, Isaeo apika mekaniriakori maerekani. Nimisākiretari Teoso ninoā maerekani makatxakiko tīkapani. ² Nimarotari ninirimane iteene nirekiniri iparīkauatini Teoso tīkapani. Txamari ninoā kerokari, kotxi !imarotarina atāo iparīkauatini Teoso tīkapani. ³ !Imarotarina Teoso txīkitakiniri kākiti atāo inakari ikamini. Ninoāka nirekamari atāo inakari ikaminina, Teoso apakapinina tīkapani. Ininiā !auiritarina Teoso txīkitakinina ninoā atāo inakari ikaminina. ⁴ Kristo kamari ikinipoko Teoso paniātakiti iōkatsopatakori iaōka, ininiā iuanoka txīkitakari ikinimane kākiti iua sākire auīākani atāo inakari ikaminina.

Apiananiri Akiritakani

⁵ Kitxakapirīka Moisesi sāpiretari atāo inakari akamini Teoso paniātakiti. Iuasaaki itxari:

Ikinika Teoso paniātakiti iōkatsopatakori ikiniōtika pikaminiā, pauapininiika pitxako, itxa Moisesi sākire. ⁶ Txamari !aposotari ikara atoko akamini. Aūikasaakiri Xesosi sākire, iua txīkitakaua atāo inakari akamini. Ininiākara !apakata pākixinireē pixinikiniri: “Kīpa atxīiti posotari iaxiti apiko nopinixitimoni isini, Kristo notamoni iminini tīkapani?” ⁷ !Apakata pākixinireē pixinikiniri: “Kīpa atxīiti posotari ipīkani auiniātaā isini, Kristo notamoni iminini tīkapani?” ⁸ Xesosi sākire auape hītemoni. Na hīsa ātiātaā iua sākire himarotini tīkapani. Hinamaāpekari. Hākixinireēpekari. Xesosi sākire auikiko asāpiretapikari kākiti. Ia atoko asāpiretari kākiti: ⁹ Pinamaā, “Xesosi niauīte” pininiā, pākixinireē pauikiniāri Xesosi ipinini Teoso ōkitikiniri iua, iuasaaki pimaerekani makatxakaākako. ¹⁰ Kotxi aākixinireē Xesosi sākire aūikiniā, ikamaerekataua. Anamaā “Maerekati kamakarino nota,” aniniā, iua

makatxakari amaerekani. ¹¹ Teoso sākire iōkatsopatakori txari:

Iua sākire auīākari pētauatini !auari.

¹² Iua Kristo sākire auīākari atxīiti Xoteo itxaua. Atxīiti Xoteo minakatiua itxaua. Xoteo auīte itxaua Kristo. Xoteo minakaniua auīte apaka itxaua. Ikinimane auīte itxaua Kristo Apiananiri. Isikari itanapoko erekari ikini-mane iua akiritakanimoni. ¹³ Teoso sākire iōkatsopatakori txari:

Ikinimane akiritiniāri Apiananiri uāka imaerekanina imaktxakini ūkapani, iuasaaki imaktxakaākakko imaerekanina.

¹⁴ Kiātokopa itxa ninoa akiritiniri iua, isākire imauikakanisaaki? Kiātokopa itxa ninoa auikiniri isākire, imakenakotakanisaakirina? Kiātokopa itxa ninoa kenakotiniri isākire, imasāpiretakonisaakina?

¹⁵ Kiātokopa itxa Teoso iokanapirena sāpiretiko, ate maiokanatakaniāri iua sākire sāpiretakani kākitemoni? Teoso sākire iōkatsopatakori txari:

Erekapitikari Teoso iokanapirena erekari sāpiretakani apokini kākitemoni, kotxi isāpiretarina Teoso kamaerekaxiniretiniri kākiti. Isāpiretarina erekari Teoso sikakiti kākitemoni. Ikara iminapiretakitina kamapoxokonitari kākiti.

¹⁶ Txamari na ikinimane kākitemoni auikari Teoso iokanapirena erekari. Kotxi kitxakapirīka Isaía txari:

Apiananiri, asāpiretamari piokanapirena kākitemoni, txamari !auikarina, itxa Isaía. ¹⁷ Kākiti kenakotakasaakiri Teoso iokanapirena, Teoso txīkitakari kākiti auikiniri isākire. Kristo sākire akenakotakasaaki, akenakotari Teoso iokanapirena.

¹⁸ Txamari nota pimaāi: "Atauako Xoteo kona kenakotari Teoso iokanapirena?" Ikenakotapitikarina, kotxi Teoso sākire iōkatsopatakori txari:

Iaxiti apiko nopinixiti auakari oerekari Teoso ikini itixiti auakani. Teoso sākire atoko itxa iaxiti apiko nopinixiti auakari oerekakiti.

¹⁹ Iuaīkana nipimaāi: "Atauako Xoteo !imarotari Teoso iokanapirena?" Imarotapitikarina. Moisesi sāpiretipekari Teoso sākire. Itxari:

Nimakatxakari Xoteo minakaniua maerekani, ininiā nitxīkitakaiko hīte hīxikotinina ninoa mitxi nota nakitiakori minakaniua. Nitxīkitakai hīte homanākarauatini, ninoa mitxi mimaroreni xika.

²⁰ Isaíapekana sāpiretari Xoteo minakaniua pirena. Isāpiretari Teoso sākire itaparaxinireritika:

Teoso txari: "Ninoa nota manitakani aōkitano nota. Nimotika nota makiritakanimoni."

²¹ Apikomoni isāpiretari Teoso sākire Xoteo kamakiti:

Teoso txari: "Ikiniōtika namanaāri ninoa kanapiriini notamoni, txamari !ikīpitarina nisākire. !Ikamarina nisākire iaōka. Inireēkitinoka ikamana."

Xoteo, Teoso Sākire Auīākani

11 Ininiā nipimaāi: "Atauako Teoso !inirekaikari Xoteoakori?" Inirekapitikana. Nota apaka Xoteo nitxaua. Apraō apika mekaniri nitxaua. Pēxamī apika

mekaniri nitxaua. ² Teoso !itakanapari Xoteoakori. Iua mereēna ninoa itixi kamiko apisapanika. Himarotari Teoso sākire iōkatsopatakori, Eríasi tsoatakasaaki Teosomoni Xoteo maerekani isāpiretakasaaki. ³ Iuasaaki Eríasi txari:

Apiananiri, ninoa okapekari kākiti pisākire sāpiretakani. Ikapirinikarina amesa pinakiti pitemoni sikakori takikoātaā. Notanoka pisākire sāpiretakarino auapanika. Ninoa asikatikinitano nota okinino ūkapani, itxa Eríasi. ⁴ Kanatokopa Teoso apakapapiretari Eríasi? Teoso txari:

Kona pitenanini auikari nisākire. Nota nīkatari setxi mio kikiakori nota nakitiakori. Ninoa kona teosonetari kākiti kamakiti Paaō inakori. Kona ikapotoreēkauana iua apisatoō,

Teoso txari Eríasi. ⁵ Ikara atokotxikana uatxa. Aua apanakini kākiti Teoso mereēkini. Imereēna ninoa, kotxi iua nirekari ikinipoko erekari ikaminina ninoa.

⁶ Maerekati kamakani kākiti, iuaritika Teoso mereēua ate. Isikari ikinipoko erekari ate ūkapani maxikatīka. Aparīka !itxīkitakari iua sikiniri ikinipoko erekari atemoni. Aparīka txīkitakiniāri ikinipoko erekari isikiniua, ininiā kona maxikatīka isikarauata atemoni.

⁷ Ininiā kanatokopa atxa asākire apikomoni? Xoteoakori kona apakapari inireēkitina. Inirekarina Teoso apakapinina ninoa erekarini ininiuana. Teoso mereēkininoka apakapari ikara inakari.

Apanakinipekana Teoso !aurita atāo imarotinina. Mōsiāreni atoko itxana. ⁸ Teoso sākire iōkatsopatakori txari:

Teoso txīkitakari ninoa ākixinire imakakari atoko inini, iua sākire imimarotakanina ūkapani. Kokipitikamana, iuaritika !atamatarina Teoso kimapore. Kakenakopipitikamana, iuaritika !inirekarina Teoso sākire ikīpitinina. Uatxapiima ikara atoko itxapanika, itxa Teoso sākire iōkatsopatakori. ⁹ Kitxakapirīka Tavii txari Teosomoni:

Ninoa kiena kaiāopokori. Inipokotakasaakina, iuākatarina pite apokaerekatina ninoa, kotxi kaiāopokori ikienana. Ikienana takapiri atoko itxa imaīkinina ninoa. Itxīkitakana ikerokinina. Ikara xika ninirekari pimisiritinina.

¹⁰ Ninirekari ninoa mōsiāreni atoko ininiuana, ininiā na atāo atamatarina pikimapore. Kākiti tiitxi minari porikitakani atoko pitxīkitakanako ninoa ātipirika, itxa Tavii sākire.

Xoteo Minakaniua Maerekani Makatxakiko

¹¹ Iuaīkana nipimaruata: "Atauako Xoteoakori maerekani xika Teoso xipokana ninoa?" Konapitini. Xoteoakori kamari maerekati, ininiākara Teoso sāpiretari Xoteo minakaniua imaerekanina imaktxakini, Xoteo xikotinina ūkapani, iuaīkana Teosomoni ikanapiriinina ūkapani. ¹² Xoteoakori kamari maerekati, ininiākara Teoso sikari erekari kīkiri apanakini itixi auakanimoni. Xoteo mapakapakinini Xoteo minakaniua apakapa erekari kīkiri. Ininiā Xoteo kanapiriākasaaki Teosomoni, iuasaaki apiaerekata Teoso sikakiti kākitemoni.

¹³ Uatxa nota misäkiretai hïte Xoteo minakanuia, kotxi Teoso iokanatanota nota hïtemoni isäkire nisäpiretini ïkapani. Niuikari hïtemoni niokanatikota. ¹⁴ Ikara atoko ininiä, atxiïti ninirimane Xoteo xikotai hïte, ininiä atxiïti apanakini ninoa kanapiriä Teosomoni, imaerekanina Teoso makatxakini ïkapani. ¹⁵ Teoso takanapakasaakiri Xoteo, iua apakapari Xoteo minakanuia, ininiä ninoa Xoteo minakanuia kanapiriä Teosomoni. Teoso iuaïkana apakapakasaakiri Xoteoakori, iusaakiko peerekari. Ipïkani iuaïkana auäki inini atoko itxako.

¹⁶ Komiri akamakasaaki, ipixini Teosomoni asikasaa-ki, aimarotari ikinipoko iua komiri iua nakiti ininiua. Aamina kotsa Teoso nakiti ininiä, imina pori apaka iua nakiti. ¹⁷ Xoteoakori oriva mina takakori atoko itxa, takakori Teoso nakiti. Ätikaka ipori kapatakaäka. Oriva ïtopakiri pori apaäka. Iapitaka inaäka ikapatakikoötaä. Aneë takari katiä. Takari sikakienatari ïtopakiri pori. Hïte Xoteo minakanuia iua oriva ïtopakiri pori atoko hïtxaua. Häpakapari Teoso sikakiti, kotxi hïte apotiitaua Xoteoakorikata, Teoso nakitiakorikata. ¹⁸ Hïte Xoteo minakanuia, kona hïuikapeua Teoso apakapini hïte. "Iua aäpori kapatakiko atoko, Teoso takanapana Xoteoakori, ate apakapini ïkapani," kona hïtxape, kotxi aäpori atoko hïtxaua. Na aäpori sikataparatarari aäkot-sa. Aäkotsa sikataparatarari aäpori. Ininiä hïte apakapari Teoso sikakiti, kotxi häpotiitaua Xoteokata.

¹⁹ Atxiïti hïte Xoteo minakanuia txano nota: "Iua aäpori kapatakaäkori atoko Teoso takanapari Xoteoakori. Äti aäpori iapitakiko atoko, Teoso apakapaua ate," hïtxano atxiïti. ²⁰ Atäöpitikara. Teoso takanapari Xoteoakori, kotxi ninoa !auikari isäkire. Iua apakapai hïte, kotxi hïte auikari iua säkire. Iuaritika !hïuikapeua ikara atoko hinakasaaki. Erepaniko. ²¹ Teoso takanapari Xoteoakori, takari pori sauakakori atoko. Ininiä erepaniko, kotxi ïtopakiri aäpori atoko hïtxaua. Atxiïti äti öti okanapai hïte apaka.

²² Aimarotari katiraöki ininiua Teoso. Aimarotari apaka kataparaxinireri ininiua. Kataparaxinireri iua, käkiti kamakasaakiri maerekati. Katiraöki iua, itiraöki hinirekasaaki. Itiraöki himanirekakaniä, hïte apaka mapara hïkaäka, iua aäpori sauakakori atokokana. ²³ Xoteo takanapiniäri imauikakaniri Xesosi säkire, auikiniäri iuaïkana isäkire, Teoso iuaïkana mikanapiriäna, kotxi Teoso kaposotiireri ikara atoko ikamini.

²⁴ Hïte ïtopakiri pori sauakakori takarimoni iapitaäkori atoko hïtxaua. Kona ixinireka aua ikara atoko. Pami-mari ikara atoko. Xoteo atäo oriva takakori atoko itxauana. Ininiä na kamimari mitxi auiniätaä iuaïkana Teoso takinina ninoa, iuaïkana imikanapiriinina ninoa iuamoni.

Xoteo Maerekani Makatxakaäkanapanikako

²⁵ Nitariakori ninirekari himarotiniri apanakini himarotakiniti, ininiä na hïuikaua. Xoteo !inirekari auikiniiri Teoso säkire uatxa, iuaritika na ikara atoko !itxapani ätipirika. Ikini itixiti auakani Teoso nireëkini Xoteo minakanuia kanapiriäksaaki Teosomoni,

iusaakiko Xoteo kanapiriäko Teosomoni. ²⁶ Ininiä iusaaki ikinimane Xoteo kanapiriäko Teosomoni. Iusaaki Teoso makatxakari ninoa maerekani. Teoso säkire iökatsopatakori kitxakapiriäka auakari ikara atoko itxa. Itxari:

Xoteo itxauako maerekanitxi makatxakakari. Imakatxakariko ikinika maerekati Xoteoakori kamakiti, Teoso manirekakiniti. Iusaaki Teoso nireëkitinoka inirekanako.

²⁷ Nimakatxakariko maerekati ninoa kamakiti, kotxi kitxakapiriäka nikamaenetari ikara atoko inakari, itxa Teoso säkire iökatsopatakori.

²⁸ Xoteoakori !inirekari Teoso iokanapirena erekari, ininiä Teoso takanapana ninoa. Ininiä Teoso iokanapirena erekari säpiretaäka hïte Xoteo minakonimoni. Uatxa Teoso mokaiakariakori atoko itxauana Xoteoakori, iuaritika Teoso mereëna ninoa. Apraäo, Isaki, Xakoo pakini apika mekaniriakori itxauana, ininiäkara Teoso tiretapanikana ninoa. ²⁹ Teoso kona mamakari isäkire. Käkiti iua mereëkini ätipirika iua mereëkini itxauana. Isiäkiti erekari käkitimoni !imakatxaka iuaïkana. ³⁰ Hïte Xoteo minakanuia kitxakapiriäka !hïkipitari Teoso säkire, iuaritika uatxa Teoso amonïkai hïte, kotxi Xoteo kona kipitari Teoso säkire uatxa. ³¹ Uatxa Xoteoakori kona kipitari Teoso säkire. Teoso amonïkapekai hïte Xoteo minakanuia, ininiä Teoso iuaïkana amonïkanako Xoteoakori apaka. ³² Ikinimane käkiti na kipitari Teoso säkire. Kona aposotari akipitiniri Teoso säkire. Teoso txïkitakaua ikara atoko anini, kotxi inirekari aimarotiniri maerekati kamakani aniniua, iuaritika !imisiritaua. Iamonïkaua.

Peerekari Teoso

³³ Peerekari Teoso. Atäonoka ikama. Paimatireri iua. Käkiti !imarotari ikamakiti tïkane. Käkiti !imarotari inireëkiti tïkane. ³⁴ !Kimarotikori Teoso xinikakiti. !Kötäkikikori Teoso. ³⁵ Teosomoni ikinipoko aua, ininiä kipa asika atxiïti iuamoni? Asikiniri !uari. Ininiä !uari ate nakiti, iuaïkana Teoso sikiniua ïkapani. ³⁶ Kotxi Teosokara kamari ikinipoko. Ikinipoko aua Teoso posotiireë. Ikamari ikinipoko iua ïkapani. Ätipirika matxariko Teoso: "Peerekai pite." Ameë.

Teosomoni Sikakori Auäkiri

12 Ininiä nitariakori Teoso amonïkapitikaua. Ininiä nota iteene ötäkikai hïte. Hïteka hïsikaua Teosomoni. Teosomoni sikakori auäkiri atoko hïtxauako. Ininiä iua nakitinoka hïtxaua. Ikara atoko hïkaminiä, Teoso apokaerekatari. Ikara atoko inakari akaminari Teoso, ikara atäo. ² !Hïkamapinikariko Teoso säkire mauïäkani kamakiti atoko. Häuiritariko Teoso txïkitakiniri hïxiniäkiti ereka inini, ininiäkara ipinipo hïtxako. Iusaakiko himarotari Teoso nireëkiti. Himarotari Teoso nireëkiti ereka inini. Himarotari hïkamakiti tïkane iua apokaerekatini. Himarotari atäo hïkamini.

³ Teoso sikari ikinipoko erekari notamoni, ininiä nisäpiretari iua säkire hïtemoni. Ininiä nota ötäkikai

hīte hīkinika. Na hūikapeua. Hīteka atāo himarotauako. Hīteka hātamakauako. Teoso tūkitakai hāuikiniri isākire. Iteene hāuikiniāri iua sākire, iteene hīteka himarotaua. ⁴ Kākiti ito ātika, iuaritika itotxiā auakari kaiāopokori. Aua ikanoke, itapike, oki, ikenakoki txaāpota. Ikinika iparīka aua. Ikanoke parīka ātiāo. Oki parīka ātiāo. Itxaāpota. ⁵ Iua atokokana atxa. Itotxi ātika atoko atxa, iuaritika itoua ate. Kanoketxi, tapiketxi, okītxi, kenakokitxi, itotxiā auakari atoko ate. Kristokata aāpotiitaua. Anakititakakaua. ⁶ Nota parīka Teoso īkapani ātiāo. Āti parīka Teoso īkapani ātiāo. Āti parīka Teoso īkapani ātiāo, itxaāpota. Teoso sikari erekari ikininapemoni, ikara iparīka ikamini īkapani. Atxiīti Teoso sikaimaroretai iua sākire apanakinimoni pisāpiretini īkapani, ininiākara Teoso sākire pauikini iaōka pisāpiretari Teoso sākire kākitemoni. ⁷ Teoso sikaimaroretiniāi apanakini pimiparīkatini, ininiā pimiparīkatari apanakini. Teoso sikaimaroretiniāi isākire poerekini, ininiā poerekarauatako. ⁸ Teoso sikaimaroretiniāi āti pisikataparaxiniretini, ininiā pisikataparaxiniretariko āti. Teoso nirekiniāri pisikiniri apanakini amonitakiti ninoamoni, ininiā ito pisikako pipoxokoniritika. Teoso sikaimaroretiniāi auītetxi pininiu, ininiā auītetxi erekari pitxauako. Teoso nirekiniāi apanakini piamonīkini, ininiā pipoxokoniritika piamonīkanako.

Tiraōkitxi

⁹ Atāo pitiretariko apanakini pākixinireē. Pomanatariko maerekanitxi. Na piotokakapiri erekari pikamini. ¹⁰ Iteene hīretakakauako, kotxi Kristo tūkitakapekaua aītaritakakiniua. Piteka pipaxitiniua atokokana, apiata pipaxitariko āti. ¹¹ Pitaparaxinireritika piparīkauatako. Na piarinouatape. Piparīkauatako Teoso īkapani pipoxokoniritika pākixinireē. ¹² Pipoxokoniuatako, kotxi pimarotari Teoso kaminiri ikamaenetakiti. Pimīteenekariko pimisiritiko. Ātipirika pimisākiretariko Teoso. ¹³ Nipokori kaamatiniā pitariakorimoni, tiitxi kaamatiniā pitariakorimoni, auiniā pitemoni, pisikanako. Papakapanako pipoxokoniritika ikinimane Xesosi sākire auīākani paapoko apoākani, ātiātaā īkani.

¹⁴ Pamanaāri Teoso erekari ikaminina pite misiritakani. Ari, pamanaāri Teoso erekari ikaminina ninoa. Na pamanaāpiri Teoso maerekati isikinina ninoa. ¹⁵ Pipoxokoniuatako poxokorinikata. Pitxiapata kamatinirinikata. ¹⁶ Āti pitiretini atokotxikana, ikinimane pitiretako. Na piuikapeua. Pisākirauatako kākiti matxineirotenikata, katxineiroteni pimisākiretini atokotxikana. "Kimaroreno nota," na pitxape.

¹⁷ Kākiti kaminiāri maerekati pitemoni, na pikamapiri maerekati iuamoni. Atāonoka pikama ikinimane īkapani. ¹⁸ Pinirekariko pauini kākiti sauaki ereka inini, ininiā maxikatīka kona pitxitapiri āti. ¹⁹ Nitiretakini, na hīxikatxitapiri āti. Teosora xikatxitariko, kotxi Teoso sākire iōkatsopatakoru txari:

Nota parīka āti nixikatxitini. Notara misiritari maerekati kamakari,

itxa Apiananiri sākire. ²⁰ Ari, kona pixikatxitapiri āti. Pikamariko ātimoni ia Teoso sākire iōkatsopatakoru iaōka:

Pomanatakiri natxitiniā, pisikakienatari iua. Iposonatinīā, pisikari iātini. Ikara atoko pikaminiā, ipētauata maerekati pitemoni ikamini, itxa Teoso sākire iōkatsopatakoru. ²¹ Na paunitapiri maerekati piauīte atoko ininiu. Erekari pikamakasaaki, maerekati iokanatapeēkaika.

Aūūteakori Nirekakiti Akīpitini

13 Akīpitariko aūūteakori nirekakiti, kotxi Teosora auiritana ninoa auītetxiakori ininiuana. Teosora takari ninoa auītetxiakori aūūteakori ininiuana īkapani. ² Aūūteakori nirekakiti amakamakaniā, Teoso nirekakiti apaka !akama, kotxi Teoso tūkitakana ninoa aūūteakori ininiuana. Ninoa paniātakiti amakamakaniā, amisiritaākako. ³ Erekari kamakani lipīkari iauītena. Maerekati kamakaninani pīkana ninoa. Pinirekatari pimipīkakaniri piauīte? Ininiā erekari pikamako, ininiā iua txaiko: "Erekai pite." ⁴ Teoso nitiri itxaua piauīte, erekari pitemoni ikamini īkapani. Txamari maerekati pikaminiā, erepaniko. Pipīkariko iua, kotxi iposotari imisiritinii. Iua Teoso nitiri itxaua kākiti maerekati kamakani imisiritini īkapani. ⁵ Ininiākara pikamariko piauīteakori nirekakiti, kotxi pimakamakanisaakiri, pimisiritiko auapitika. Apaka pikamariko ninoa nirekakiti, kotxi pimarotari pākixinireē ikara atoko atāo pikamini.

⁶ Piauīteakori Teoso nitiriakori itxauana, ininiā erekari apaka pisikiniri txineiro ninoamoni iparīkana ikaminina īkapani. ⁷ Ininiākara pīkitxitana ninoa amanaākiti, sitatxi pauini īkapani, pitii papakapini īkapani. Pipaxitanako ninoa. Pikamariko ninoa nirekakiti.

Hīretakakiniua Īkapani

⁸ Pīkitxitariko ikinika piamotakiti. !Erekari pimaīkitxitakaniri āti. Ātinoka tēpito erekari. Ia tēpito na txineironi. Ia tēpito atiraōki. Ia atoko inakari tēpito xipokini kona erekari. Ātipirika hīretakakauako. !Erekari pixipokiniri pitiretiniri āti. Āti tirketakari kīpitapekari Teoso paniātakiti iōkatsopatakoru. ⁹ Teoso paniātakiti iōkatsopatakoru txari: "!Pisirīkape pītanoro minakotokatika. Na pokaniuatape. Na pītiriuatape. Na pinirekapiri apanakini tii." Akīpitari ikara Teoso paniātakiti iōkatsopatakoru, apanakini ipaniātakiti apaka, ia Teoso paniātakiti ātika akīpitiniā. Ia Teoso paniātakiti paniātaua: "Piteka pitiretinia atokotxikana, pitiretariko āti." ¹⁰ Pitiretiniaāri āti, maerekati !pikaminiri iua. Ininiā āti pitiretiniaā, pikamari Teoso paniātakiti iōkatsopatakoru ikinika.

¹¹ Matiretari āti, kotxi aimarotari kaiaapekari Kristo kanapiriini. Ininiā pimerekako. Kona pimakapeko. Piparīkauatako Teoso īkapani, kotxi itixine Xesosi anikiniua ōti apokaāpotanapanoka. Akokaxiti aūūkari Xesosi sākire. Uatxa paītiki ikanapiriā. ¹² Īkanōkari xipokaāpotanapanoka. Pokamara apokaāpotana-

panoka Kristo kanapiriākasaaki. Maerekati ipiākasaaki kamakori atoko itxa, ininiā maiotokakari ikara akamini. Matakanapari maerekati. Makamari erekari, kotxi erekari akamakiti kapakaua, ininiā maerekati !imaīkua. Pokamarari atoko itxa erekari akamakiti. ¹³ Pokamara kākiti kamari atāo inakarinoka apanakini apisatoō. Makamari ikara atoko inakari ātipirika. !Erekari kiiniri maerekati akamini. !Erekari apoātini. !Erekari asiriīkini sito aītanoro minakotokatika. !Erekari akaminiri maerekati aīto nireēkiti. !Erekari aneena-mauatini. !Erekari axikotiniri āti. ¹⁴ Ikara atoko inakari akamini !erekari. Makamari ia atoko inakari: Maa-manāāri Apiananiri Xesosi Kristo kapakiniua, sotato māka paikori sotato īto kapakini atoko. !Hīxinikapiri: "Kanatokopa nitxa nikaminiri niīto nireēkiti?" Kotxi maerekatinaoka aīto nireēkiti.

Kona Hītaparakienatakapeua

14 Hāuiritariko Xesosi sākire poiāonoka auīākari hītekata apotiitiniua. Na hītxitapiri iua, ixinikakiti na hīte xinikakiti atoko iminakanisaaki. ² Kākiti iteene auikiniāri Xesosi sākire, atxīiti inikari itanapoko nipokori. Āti kākiti poiāonoka auikiniāri Xesosi sākire, atxīiti inikari takarinoka. ³ !Erekari ikinipoko niākari sāpiretiniri takarinoka niākarimoni: "Pikerokari" ininiri. Apaka !erekari takarinoka niākari sāpiretiniri ikinipoko niākarimoni: "Pikerokari" ininiri, kotxi Teoso apakapapekari iua. ⁴ Kinakariparai pite āti nitiri pinitakarīi: "Pikerokari" ātimoni inakari. Ikerokiniāri, iua patrāote pinitamariko. Maerekati !ikama, kotxi Apiananiri moianatari iua.

⁵ Atxīiti āti sākire: "Ia ōti erekari iteene axinikiniri Teoso." Atxīiti ātipiekana: "Ikinioṭtika erekari iteene axinikiniri Teoso." Hākixinireē hīxinikariko: "Natokopa itxa atāo nikamini?" ininiā eereka atāo hīkamini tīkane himarotape. ⁶ Hīte: "Ia ōti apiaerekata iteene axinikiniri Teoso," hininiā, ininiā ikara atoko hīxinika Teoso hīpaxitini īkapani, ininiā erekapitikari. Ikinipoko niākari nikari ikinipoko, Teoso ipaxitini īkapani, kotxi apisapanika itxari Teoso: "Erekapitikai ia nipokori pisikinino niniākiti īkapani," itxari. Ikinipoko maniākati apaka auikari Teoso nirekiniri iua nikiniri takarinoka. Iua apaka txari Teoso inipokotini apisapanika: "Erekapitikai ia kienatxi pisikinino niniākiti īkapani," itxari. Ininiā iua apaka paxitari Apiananiri. ⁷ Kona ateka auītetaua. Kona aāua ateka īkapaninanini. Kona apina ateka īkapaninanini. ⁸ Auapanika anakasaaki, aparīkauata Apiananiri īkapani. Apīkasaaki, apina Apiananiri īkapani. Ininiā auapanika anakasaaki, apīkasaaki apaka, Apiananiri nakiti atxaua. ⁹ Kristo ipina, eereka ōkitikaua iuaīkana, auapanika inakani auīte ininiua īkapani, ipīkani auīte apaka ininiua īkapani. ¹⁰ Ininiā !apakata pitxitiniri pitari. "!Kīīkitei," kona pitxapiri, kotxi akinika aāpokako Teoso apisatoō. Iuasaaki iua sāpiretariko akamakiti, erekari inini atxīiti, maerekati inini atxīiti. ¹¹ Teoso sākire iōkatsopatakori txari:

Nota Apiananiri, ātipirika auakari nitxaua. Ikinimane kākiti kapotoreēkauako nota apisatoō. Ikinimane txanoko nota Teoso nininiua.

¹² Ininiā iuasaakiikarako akinika asāpiretari Teoso ikini-ka akamakiti īkorapokoriti aāuakasaaki.

Masikataparaxiniretakakaua

¹³ Ininiā hītotokakariko hītaparakienatakakiniua. Hākixinireē hīttxako: "!Nitxīkitakapaniri nitari kerokiniri ikamakiti. !Nitxīkitakapaniriko nitari kaminiri maerekati," hīttxako. ¹⁴ Xesosi Apiananiri nakiti nitxaua, ininiākara nimarotari, apakatapitika Teoso sākire auīākari nikiniri ikinipoko nipokori, kotxi nipokori maerekati !auari. Iuaritika kākiti auikiniāri iua nipokori maerekati inini, !apakata inikiniri. ¹⁵ Hinikiniāri ikinipoko nipokori, atxīiti hītari ākixinire maxirauata, ininiā na atāo hītiretari iua. Kristo ipina iua hītari īkapani, ininiā hītakana-pariko iua nipokori hinikini, kotxi atxīiti iua !auikaikari Xesosi sākire, iua nipokori hinikini xika. ¹⁶ Erekari auakasaaki, !hāuiritapiri āti sāpiretinii ikara erekari maerekati inini. ¹⁷ Teoso aāuīte ininiāua, kona nipokorinanini, kona iātakorinanini, axinika. Teoso aāuīte ininiāua, axinikari Erekari Matamatakoti sikakiti atemoni. Iua txīkitakaua atāonoka akamini. Ikamaerekaxiniretaua. Isikapoxokonitaua. Teoso aāuīte ininiāua, ikara atoko itxa aāuini. ¹⁸ Ikara atoko aparīkauatiniā Kristo īkapani, Teoso apokaerekataua. Kākiti apaka apokaerekataua.

¹⁹ Ininiākara manirekari kākiti auini ereka inini, neenamati mauakani īkapani. Masikataparaxiniretakakaua. ²⁰ Na himisiritapiri Teoso parīka nipokori xika. Ikinipoko nipokori erekari hinikini, txamari hīte nikakiti txīkitakiniāri āti takanapiniri Kristo, hīkerokari. ²¹ Hītari kerokiniāri ikamakiti hīte niākiti xika, api-aerekata himanikakaniri iua nipokori. Hītari kerokiniāri ikamakiti hīte iātakiti xika, apiaerekata iua iāriā himiā-takani. Na xatiki hīttxīkitakapiri hītari kaminiri maerekati. ²² Hītemoni ikinipoko nipokori nikiko erekari, txamari na hīsāpiretapiri apanakini. Erekari Teosonoka imarotiniri. Hīxinikasaakiri hīkamakiti atāo inini, hākixinireē himarotakasaakiri hīkamakiti atāo inini, iuasaaki hīpoxokoniua. Ininiā kona hīteka apoī-taua. ²³ Hinikasaakiri nipokori, hākixinireē: "Erekari atxīiti ia nipokori ninikini?" hinakasaaki, iuasaaki Teoso txai: "Maerekati pikama," kotxi kona pauikari pikaminiri erekari. Himauikakaniāri hīkamakiti ereka inini, ininiā maerekati itxaua hīkamakiti.

Āti Nireēkiti Kamiko Pirena

15 Atxīiti ikinipoko Teoso sākire aāuika, ininiā amoianatariko Teoso sākire poiāonoka auīākari, imaposotakiniri ikamini īkapani. !Erekari ateka nireēkitinoka akamini. ² Erekari akaminiri aītari nireēkiti, iua amoianatini īkapani, Teoso sākire iteene auikini īkapani. ³ Kristo apaka !ikamari iuaka nireēkiti. Iua kamari Teoso nireēkiti, kotxi Teoso sākire iōkatsopatakoriā Kristo txari iri:

Käkiti misäkirepiretakasaakii pite, notara ninoa misäkirepireta.

⁴ Ikinika Teoso säkire iökatsopatakori iökatsopataäka ate oerekiko ĩkapani. Teoso säkire iökatsopatakori aäuikasaaki, aiätapari apoxokoniritika erekari apokini. Aimarotari erekari apokapitikako. Teoso säkire iökatsopatakori sikataparaxiniretaua.

⁵ Teoso sikataparataua, ininiä apoxokoniritika aiätapari erekari apokini. Isikataparaxiniretaua. Ninirekari Teoso txĩkitakiniri hĩte nireēkiti ätinoka inini, Kristo Xesosĩ nireēkiti iaōka hĩkamini. ⁶ Erekarĩ hinireēkiti häkixinireē ätinoka inini. Erekarĩ hĩsäkire ätinoka inini. Ikara atoko hininiä, hĩkinika txari Teoso: “Peerekai pite,” kotxi iua aäüite Xesosĩ Kristo iri itxaua.

Xoteo Minakanĩua Poxokoniuatini

⁷ Häpakapariko äti, Kristo apakapiniĩ atokokana, ininiä käkiti txari Teoso: “Peerekai pite,” txariko.

⁸ Nisäpiretai. Kristo Xoteoakori nitiri atoko itxapekaua. Ikara oerekari Teoso sikiniri isikaenetakiti. Teoso sikaenetakiti Apraäomoni, Isakimoni, Xakoo pakini-moni, isikaenetakiti apokapeka Xesosĩ ĩkorapokoriti apokasaaki. ⁹ Kristo Xoteoakori nitiri atoko itxapekaua, ininiä Xoteo minakanĩua txari: “Kaamonĩkareri Teoso. Peerekari iua,” itxana. Teoso säkire iökatsopatakori txari:

Xoteo minakanĩua auiniätaä nitxariko Teoso: “Peerekai pite.” Nixikarauata pite ĩkapani, kotxi peerekai pite.

¹⁰ Iuaĩkana Teoso säkire iökatsopatakori txari:

Hĩte Xoteo minakanĩua hĩpoxokoniuatako Xoteoakorikata, Teoso nakitiakorikata.

¹¹ Iuaĩkana Teoso säkire iökatsopatakori txari:

Hĩte hĩkinika Xoteo minakanĩua, “Peerekari Api-ananiri” hĩtxako. Hĩkinika itixi auakanĩi hĩxikarauatako Teoso ĩkapani.

¹² Iuaĩkana Teoso säkire iökatsopatakoriä Isaía txari:

Auako Xesee apika mekaniri. Xoteo minakanĩua aüite itxauako. Ninoa imarotariko isäkire iaōka ikamini, itxa Teoso säkire iökatsopatakori.

¹³ Teosora txĩkitakai himarotiniri isäkire iaōka ikamini. Ninirekari iua iteene kamapoxokonitiniĩ hĩte. Ninirekari ikamaerekaxiniretinii hĩte, kotxi häuikari iua säkire. Ininiä himarotari häpakapapitikariko Teoso säkire iaōka. Erekarĩ Matamatakoti posotiireē himarotari ikara.

Paoro Teoso Iokanapirena Erekarĩ Säpiretakari Xoteo Minakonimoni

¹⁴ Nitariakori, nota imarotari ereka hinini. Nimarotari hĩte iteene kimarore hinini hōerekakakiniua ĩkapani.

¹⁵ Iuaritika ia niökatsopatakitiä nōtäkikapekai hĩte nitaparaxinireritika. Himarotakiti, iuaĩkana nisäpiretai, iuaĩkana hĩxinikiniri ĩkapani. Teoso sikari erekari notamoni, ininiä ikara atoko niökatsopata hĩtemoni.

¹⁶ Teoso sikari erekari notamoni, kotxi itxĩkitakano Xesosĩ Kristo nitiri nininiua. Ipaniätano nĩparĩkauatini Xo-

teo minakanĩua ĩkapani. Sasetotxi apakapari käkiti mĩkiti, ininiä sika itxari Teosomoni. Ikara atoko itxa sasetotxi parĩka. Nota sasetotxi atoko nitxaua.

Nisäpiretari Teoso iokanapirena erekari Xoteo minakonimoni, ininiä ninoaka sikaua Teosomoni inireēkiti ikaminina ĩkapani. Teoso apakapari ikara atoko inakari ninoaka iuamoni sikakanĩua. Erekarĩ Matamatakoti kamaerekatarĩ käkiti Teoso apakapiniĩ ĩkapani.

¹⁷ Ininiä Teoso ĩkapani nĩparĩkauatakasaaki, niuikari Xesosĩ Kristo. ¹⁸ Nota kona iuikaua, kotxi Kristo posotiireē Xoteo minakanĩua kamari Teoso nireēkiti. Kristo paniätano nota iua säkire nisäpiretinina Xoteo minakanĩua. Ipaniätano inireēkiti nikamini Xoteo minakonikata nauakasaaki, ininiäkara ninoa auikari nisäkire. Ininiä ikamarina Teoso nireēkiti. ¹⁹ Erekarĩ Matamatakoti posotiireē noerekari Teoso takaōtxikare ninoamoni. Noerekari posotiiretxi käkiti maposotakiniti ninoamoni. Ininiäkara ninoa kamari Teoso säkire iaōka. Kristo iokanapirena erekari ikinika nisäpiretaperikari käkiti Xerosareē sitatxiti auakani. Eereka käkiti apikoxiti auakani nisäpireta. Eereka käkiti apikoxiti auakani nisäpireta. Nitxaäpota käkiti nisäpiretini. Imapotökire Irĩria tixinipeka napoka, Kristo iokanapirena erekari nisäpiretini ĩkapani. ²⁰ Ätipirika ninirekari nisäpiretiniri Kristo iokanapirena erekari Kristo mimarotakoniätaä. Ininiä kona nĩparĩkauata Teoso ĩkapani äti parĩkauatiniätaä, kotxi äti säpiretaperikari Kristo iokanapirena käkiti iuaätaä. ²¹ Kotxi Teoso säkire iökatsopatakori txari:

Mitxi iua masäpiretakoni imarotariko iua säkire. Mitxi iua säkire makenakotakani imarotariko iua säkire, itxa Teoso säkire iökatsopatakori.

²² Kaiökataikani ninirekamari nisini hĩtemoni, txamari kona apakata, kotxi iusaaki nisäpiretari Kristo säkire Kristo säkire mimarotakanimoni.

Paoro Seenetini Homamoni

²³ Itokanani ninirekamari naökيتينii hĩte. Uatxaika apakata nisini hĩtemoni, kotxi nixipokapekari nĩparĩka ĩkorapokoriti. ²⁴ Nirekari Espänia tixinimoni nisini. Iuaä nisikasaaki, ninirekari naökيتينii hĩte. Ninirekari mapaöti nikaikotini hĩtekata, kotxi nipotxitari hĩtekata nauini. Ninirekari hĩte moianatinino Espäniamoni nisini ĩkapani, ininiä eereka Espänia tixinimoni nisa.

²⁵ Uatxa hĩtemoni nisini apisapanika, nisa Xerosareē-moni, kotxi ninirekari nanikiniro txineiro käkiti Teoso nakitiakori iuaä auakani nisikini ĩkapani. ²⁶ Kristo säkire auäkäni, Xoteo minakanĩua Masetônia tixini auakani, Akaia tixini auakani pakini sikaro oa txineiro. Inirekari-na nisikiniro Teoso nakitiakorimoni, matxineirotenimoni, Xerosareē sitatxitiä. ²⁷ Ninoa poxokoniuata oa txineiro isikinina Xerosareē auakanimoni. Erekarĩ oa txineiro isikinina, kotxi Xoteoakori Kristo säkire auäkäni sikari Teoso sikakiti Teoso iokanapirena erekari Xoteo minakonimoni. Ininiä erekari Xoteo minakanĩua sĩkiniri ipixini itxineirotena Teoso sikakito, Xoteoakorimoni. ²⁸ Ininiä oa txineiro nanika Xerosareē

auakanimoni. Ninoamoni txineiro nisika atoko, ininiã eereka nipotorika Espániamoni nisini. Espánia napokini apisapanika nisako hitemoni. ²⁹ Ereë napokasaaki, nisãpiretai ikini sereti erekari Kristo sikakiti hitemoni.

³⁰ Nitariakori nota amanaãi hite, himisãkiretiniri Teoso nota ikapani. Hikenakotatari namanaãkiti? Himisãkiretariko Teoso nota ikapani. Xesosi Kristo aãuïte itxaua, ininiã namanaãi himisãkiretiniri Teoso nota ikapani. Erekar Matamatakoti txikitakaua atiraõkiuatini, ininiã himisãkiretari Teoso nota ikapani. Ikara atoko hïkaminiã, Teoso sikataparatanonimisiritiko auakasaaki. ³¹ Kristo sãkire mauïãkani Xotéia tõpa auakani nirekari imisiritinino nota. Himisãkiretari Teoso ninoa mamisiritakanino ikapani. Himisãkiretari Teoso, Teoso nakitiakori Xerosareë auakani apokaerekatiniro txineiro Xoteo minakanuia iokanatakito. ³² Ininiã Teoso nirekiniãri, napoka hitemoni nipoxokoniritika. Ininiã asikapoxokonitakakaua. ³³ Teoso akamaerekaxiniretakiri aua hitekata. Ameë.

Paoro Akiriuãkaãpotana Ixinikakini

16 Niokanataro aïtaro Pepi inakoro hitemoni. Peerekaro oa. Omoianatana Xesosi sãkire auïãkani Sëkireia sitatxiti auakani. ² Apiananiri nakito otxaua, ininiã hãpakaparoko hïpoxokoniritika, kotxi iua nakitiakori apaka hïtxaua. Onirekiniãri himoianatiniro, himoianataroko, kotxi omoianatapekana ito-maneri kãkiti. Omoianatapekano nota apaka. ³ Hïspiretanako Pirisira, oïtaniri Ákira pakini nixinikamanapitinina ninoa. Ninoa parïkauatapeka Kristo Xesosi ikapani notakata. ⁴ Okaãkanapanokana nota imoianatinina xika. Peerekana, kotxi erekari ikaminanona. Xoteo minakanuia, ikini Teoso misãkiretikoãtaã apotiitakanuia apaka imarotari erekari Pirisira, Ákira pakini kamakiti nota ikapani. ⁵ Xesosi sãkire auïãkani apotiitaua ninoa aapoko Teoso imisãkiretinina ikapani, ininiã hïspiretanako nixinikamanapitinina ninoa. Hïspiretariko nitiretakiti Epeneto inakori nixinikamanapitiniri iua. Ásia tixiniã iua merepitipanika auikari Kristo sãkire. ⁶ Hïspiretaroko Maria nixinikamanapitiniro oa. Oa iteene parïkauata ate ikapani. ⁷ Hïspiretanako ninirimane Átoróniko, Xónia pakini nixinikamanapitinina ninoa. Mitxipe ninoa aua notakata kateia ãki. Teoso kãkitimoni iokanatakini iteene imarotana Átoróniko, Xónia pakini. Ninoa ipi auikari Kristo sãkire, iua sãkire nauikini apisapanika.

⁸ Hïspiretariko Ápirato nixinikamanapitiniri iua. Nitiretari iua. Nitari itxaua, kotxi Apiananiri anaakori atxaua. ⁹ Hïspiretariko Opano nixinikamanapitiniri iua. Iua parïkauata Kristo ikapani atekata. Hïspiretariko nitiretakiti Esitaki nixinikamanapitiniri iua. ¹⁰ Hïspiretariko Aperi nixinikamanapitiniri iua. Imisiritiko sauaki iua !ikipatari Kristo sãkire auikini. Hïspiretanako Arisitõporo aapoko auakani nixinikamanapitinina ninoa. ¹¹ Hïspiretariko ninirimane Erotxião nixinikamanapitiniri iua. Hïspiretanako Apiananiri nakitiakori Nasiso aapoko auakani nixinikamanapitinina ninoa.

¹² Hïspiretanako sitoakoro Tipena, Tiposa pakini nixinikamanapitinina ninoa. Ninoa parïkauatapitipo Apiananiri ikapani. Hïspiretaroko nitiretakito Pesitxi nixinikamanapitiniro oa. Oa apaka parïkauatapitipo Apiananiri ikapani. ¹³ Hïspiretanako Hopo, inoro pakini nixinikamanapitinina ninoa. Apiananiri mereëri iua. Iua inoro tiretano nota, ninoro tiretinino atokotxikana. ¹⁴ Hïspiretanako Asïkiriti, Pirekõtxi, Émisi, Pataropa, Émasi, ikinika aïtariakori ninoakata apotiitakanuia pakini nixinikamanapitinina ninoa. ¹⁵ Hïspiretanako Piróroko, Xória, Nereo, Nereo itaro, Orïpa, ikinika Teoso nakitiakori ninoakata apotiitakanuia pakini nixinikamanapitinina ninoa.

¹⁶ Himaaratakakauako, kotxi aïtaritakakaua. Kristo nakitiakori ikini Teoso misãkiretikoãtaã apotiitakanuia xinikamanapitai hite.

Paoro Ôtãkikare Mapotõkire

¹⁷ Nitariakori iteene nõtãkikai hite. Erepaniko kãkiti neenamati nireëkani. Ninoa nirekari Kristo sãkire auïãkani omanatinina apanakini Kristo sãkire auïãkani. Na atão ninoa oerekakiti sãkiretxiti, ininiã atxïiti kãkiti takanapari Kristo sãkire auikini ninoa oerekakiti xika. Kristo sãkire nota oerekakiti hitemoni atão. Ninoa oerekakiti koketakori sãkiretxiti. Ninoa moianariakori kona hïtxapeua. ¹⁸ Kãkiti ikara atoko inakani kona parïkauata aãuïte Kristo ikapani. Ninoa parïkauata iïtona nireëkiti ikapani. Imisirienetarina kãkiti sãkire auïãkani. Imisirienetarina kãkiti ikara atoko inakani, kotxi kãkiti potxitari isãkirena. Kãkitimoni peerekari ninoa sãkire. ¹⁹ Ikinika kãkiti imarotari hite kaminiri Kristo sãkire iaõka, ininiã nota iteene poxokoniuata hite ikara atoko hininiã. Ninirekari kiïkite hinini erekari hïkamini ikapani. Ninirekari himimarotakaniri maerekati hïkamini. ²⁰ Teoso akamaerekaxiniretakiri, païtiki xipokariko Satanasi posotiire, ininiã hïposotari hïokanatiniri Satanasi isini.

Aãuïte Xesosi Kristo aïtipirika sikari ikinipoko erekari hitemoni.

²¹ Tximótxio, notakata parïkauatakari, xinikamanapitai hite. Ninirimane Arósio, Xasão, Sosipato pakini xinikamanapitai hite apaka.

²² Nota Tésio inakori iõkatsopari ia iõkatsopari Paoro ikapani. Nota apaka xinikamanapitai hite, kotxi Apiananiri nakiti nitxaua.

²³ Nota Paoro aua Kaio aapoko. Kristo sãkire auïãkani apotiitaua iua aapoko Teosokata isãkirauatinina ikapani. Iua nirekari himarotininiri iua xinikamanapitinii hite. Erásito inakori apaka xinikamanapitai. Txineiro nïkatakari iua. Sitatxi auakani sikakito inïkata iua. Aïtari Koato inakori xinikamanapitai hite apaka.

²⁴ Aãuïte Xesosi Kristo aïtipirika sikari ikinipoko erekari hitemoni. Ameë.

²⁵ "Peerekari Teoso," matxako. Iua posotari ikamataparaxiniretinii hite, ininiã kona hïotokakari hãuikiniri Kristo sãkire. Teoso iokanapirena erekari nota sãpiretakiti, Xesosi Kristo sãkire pakini sãpiretari ikara atoko inakari. Ikara Teoso sãkire kitxakapirïka !kimarotikori.

Uatxa imarotapeēkaika. ²⁶ Īkorsaaki asāpiretapekari ikara Teoso sākire, Teoso sākire sāpiretakani iōkatsopatakiti kitxakapirīka. Uatxa aimarotari ninoa sāpiretakiti. Teoso auapika inakari paniātari isākire sāpiretiko ikini itixiti auakanimoni. Ininiā apakata ikini-

mane auikiniri isākire. Apakata ikinimane kaminiri inireēkiti iaōka.

²⁷ Iuanani Teoso txaua. Iuanokara imarotari atāo ikinipoko. Ātipirika matxariko iua: “Peerekai pite, kotxi peerekari Xesosi Kristo.” Ameē.

1 Korīto

¹ Nota Paoro, Xesosi Kristo iokanatakitino. Teoso akiritano iua iokanatakiti nininiua ūkapani, kotxi inirekari iokanatinino kākitimoni isākire nisāpiretini ūkapani. Aītari Sóseni inakori aua notakata uai. ² Niokanatsopata hītemoni, kākiti Xesosi sākire auiākani Korīto sitatxiti auakanimoni. Kristo Xesosi makatxakakini hītxaua Teoso ūkapani. Teoso akiritai hīte iua nakitiakori hininiua ūkapani. Apaka niokanatsopata ikini tōpati auakanimoni, aāuīte Xesosi Kristo uāka akiritakanimoni. Ate auīte Xesosi, ninoa auīte apaka itxaua. ³ Aīri Teoso, Apiananiri Xesosi Kristo pakini sikari ikinipoko erekari hītemoni. Ninoa kamaerekaxiniretai hīte.

Paoro Misākiretari Teoso Korīto Auakani ūkapani

⁴ Ātipirika nimisākiretari Teoso ia atoko: “Peerekai pite, kotxi Xesosi Kristo sikari ikinipoko erekari Korīto auakanimoni. Ikara erekari pite sikakiti. ⁵ Peerekai pite, kotxi pite kamaerekatari ninoa auini. Pite oerekana ninoa sākire atāo inini ūkapani. Pite kamaimaroretana. Ininiā ninoa sākire apiaerekata. Ninoa imarore api-aāpota.” Ia atoko nimisākiretari Teoso.

⁶ Hītemoni asāpiretakiti Kristo pirena auapeka hākix-inireē. Ininiā iteene hāuikari Kristo sākire. ⁷ Ininiā hīatapakasaakiri aāuīte Xesosi Kristo kanapiriini, ikini sereti erekari Teoso sikakiti aua hītemoni iua parīka hīkamini ūkapani. ⁸ Hīte isikataparaxiniretiniritika ikanapiriini ōti apokako. Ininiā maerekati hītemoni lauari aāuīte Xesosi Kristo apokasaaki. ⁹ Teoso kamariko ikara hītemoni, kotxi ikinika isākire iaōka ikamako. Iuakara akiritai hīte, himoianatiniri imi aāuīte Xesosi Kristo.

!Homanatakakapeua

¹⁰ Nitariakori, aāuīte Xesosi Kristo posotiireē nōtākikai. Hīsākire ātinoka hītxako. !Ninirekari homanatakakiniua. Ninirekari ātika hīxinikakiti auini. Ninirekari ātika hinirekakiti auini. ¹¹ Nitariakori, Kroee aapoko auakani sāpiretano hītekakarika hina-iatakakiniua. ¹² Kotxi apanakini hīte txari: “Paoro sākire era nota kīpita.” Ātipekana: “Aporo sākire era nota kīpita.” Ātipekana: “Petro sākire era nota kīpita.” Ātipekana: “Kristo sākire era nota kīpita.” ¹³ !Apakata ikara atoko hīkamini. Kristo !ikairikaāka. Kona Paoro ipina aamina ūpiriāmitakari nopini hīte ūkapani. Kona Paoro uākaā hīpatxisataāka.

¹⁴ Nisāpiretari Teoso ereka inini, kotxi kona notani patxisatai hīte. Krispo, Kaio pakininanira nipatxisata.

Apikomoni !nipatxisatari kākiti. ¹⁵ Ininiā kona kākiti sāpiretari nipatxisatiniri kākiti nota uākaā. ¹⁶ Ii. Nimax-inīkaretari. Nipatxisatari Esitépana, iua aapoko auakani pakini. Apikomoni nipatxisatakini !nixinikaika. ¹⁷ Kristo kona iokanatano nipatxisarauatini ūkapani. Iokanatano Teoso iokanapirena erekari nisāpiretini ūkapani. !Inirekari kākiti sākireē, kākiti imaroreē nisāpirenauatini, kotxi kākiti imarore !isāpiretari Kristo ipinini aamina ūpiriāmitakari nopini amaerekani imakatxakini ūkapani.

Teoso Imarore

¹⁸ Teoso sākire mauiākani uākatari !kīikiteri kākiti Kristo ipinini aamina ūpiriāmitakari nopini sāpiretakani. Atepekana, Kristo ipinini sāpiretiko oerekari Teoso posotiire, kotxi Kristo ipinini makatxakari amaerekani.

¹⁹ Teoso sākire iōkatsopatakori kitxakapirīka txari: Nixipokariko ūkorapokoriti kimarorerini imarore. Nixipokariko kīikiterini iikite.

Itxa Teoso kitxakapirīka. ²⁰ Ūtapari kimaroreri? Ūtapari apaiaōkarauatakari? Naniparari kaxinikareri ūkorapokoritikiri? Teoso oerekapekari ūkorapokoritikiri imarore mīikiteti imarore atoktxikana inini.

²¹ Paimatireri Teoso, kotxi !auiritari ūkorapokoriti auakani imarotiniri iua ninoaka imaroreē. Apanakini-moni Kristo sākire sāpiretiko !kīikiteri, iuaritika Teoso apokaerekatari imakatxakiniri kākiti maerekani, Kristo sākire sāpiretiko auikasaakina.

²² Xoteoakori nirekari atamatiniiri Teoso takaōtxikare, isākire auikinina ūkapani. Krekoakoripekana nirekari imaroretxi apiari imarotini. ²³ Iuaritika ate sāpiretari Kristo ipinini ūpiriāmitakari nopini amaerekani imakatxakini ūkapani. Xoteoakori !inirekari ikara asākire auikinina. Krekoakoripekana uākatari ikara asākire mīikiteti sākire inini. ²⁴ Iuaritika Teoso akiritakini aua Xoteoakori, Krekoakori pakini. Ninoamoni Kristo parīka oerekari Teoso posotiire. Iua parīka oerekari Teoso imarore. ²⁵ Kākiti uākatari Teoso imarore !kīikiteri, iuaritika axapitiki Teoso imarore apiata. Ikinipoko kākiti imarore poiāoka. Axapitiki Teoso tapara apiata. Ikinipoko kākiti tapara poiāoka.

²⁶ Nitariakori, Teoso akiritakasaakii, hīxinikari kākiti xinikakiti atokokana. Natokopa itxa hīte iusaaki? Iusaaki !kimarorei. !Kaposotiirei iusaaki. Auītetxi !hītxaua iusaaki. Itori hīte ikara atoko inakani iusaaki. ²⁷ Teoso mereēri kākiti. Ūkorapokoriti auakani uākatari ninoa kākiti Teoso mereēkini mīikiteni ininiua. Imereēna ninoa, kimaroreni ūkorapokoriti auakani pē-

tauatini īkapani. Īkorapokoriti auakani uākatari ninoa kākiti Teoso mereēkini iōkapetakani ininiu. Imereēna ninoa, katapararini īkorapokoriti auakani pētauatini īkapani. ²⁸ Iua mereēri kākiti. Īkorapokoriti auakani uākatana ninoa Teoso mereēkini minakani ininiuana. Imereēri apanakini manirekakini. Imereēri kākiti omanatakoni. Kinirepa Teoso mereēri kākiti ikara atoko inakani? Teoso oerekari kākiti, kākiti uākatakiti apiari inini na atāo. ²⁹ Ikara atoko ininiā, kākiti !iposotari iuikiniua Teoso apisatoō. ³⁰ Teosora txīkitakaua Xesosi Kristo nakitiakori aniniu. Kristo nakiti aniniāua, aimarotari imaroretxi atāo inakari. Kristo txīkitakaua atāo inakari akamini Teoso apakapiniua īkapani. Iua txīkitakaua Teoso nakitiakori aniniu īkapani. Īkitxi-rauata ate īkapani ipīkasaaki.

³¹ Teoso sākire iōkatsopatakori txari:

!Apakata piuikiniua. Apakatapitika piuikiniri Api-ananiri.

Xesosi Ipinini Īpiriāmitakari Nopini

2 Nitariakori, napokasaaki hītemoni, nisāpiretai Teoso sāpiretakiti. Kona nisāpiretai notaka sākire nimatire. Iuasaaki kona noerekai notaka imarore. Teoso sākirenoka nisāpiretai hīte. ² Hītekata nauakasaaki, na ninirekari āti imaroretxi nimarotini. Ninirekari Xesosi Kristonoka nisāpiretinii. Apiata ninirekari nisāpiretinii iua ipinini kākiti īkapani Īpiriāmitakari nopini. ³ Hītekata nauakasaaki kona kataparaxinireno. Nikikinanaka nipīkarauatini xika. ⁴ Iuasaaki kona kākiti imaroreēni nisākirauata. Kona kākiti imaroreēni ninirekari hāuikiniri Teoso iokanapirena nisāpiretakiti iuasaaki. Teoso iokanapirena nisāpiretakasaaki, kākiti imarotari Erekarī Matamatakoti posotiireē nisākirauata. ⁵ Ininiā kona kākiti imaroreēni hāuikari Teoso iokanapirena. Hāuikari Teoso iokanapirena Teoso posotiireē.

Erekari Matamatakoti Imarore

⁶ Teoso sākire auīākani iteene ākixinireē aneēkani imarotari Teoso iokanapirena asāpiretakiti kimatireri inini. Ikara imaroretxi kona īkorapokoriti auakani imaroreni. Kona auītetxiakori imaroreni ikara imaroretxi. Kotxi ninoa imarore paītiki !auaika. ⁷ Asāpiretari Teoso imarore mitxi kākiti mīmarotakiniti, kotxi Teoso kipatari. Itixi kamiko apisa Teoso nirekaua asāpiretiniri ikara imarore kākitimoni ate iotximere aāpakapini īkapani. ⁸ Auītetxiakori īkorapokoriti auakani !imarotari ikara Teoso imarore. Ninoa imarotaākamari, ininiā !okamarinako Apiananiri kaiotximereeri aamina Īpiriāmitakari nopini. ⁹ Kītxakapirīka Teoso sākire iōkatsopatakori txari:

Kākiti oki !amatapanikari Teoso kamakiti tīkane iua tīretakani īkapani. Kākiti kenakoki !ikenakotapanikari Teoso kamakiti tīkane iua tīretakani īkapani. Kākiti !ixinikapanikari Teoso kamakiti tīkane iua tīretakani īkapani.

¹⁰ Iuaritika Teoso oerekapekaua Erekarī Mata-matakotiā. Ikinipoko imarotakari itxaua Erekarī Mata-matakoti. Ikinipoko kipatakori Teoso imarore imarota. ¹¹ Kākiti ākixinirenoka imarotari iuaka ixiniākiti. Āti !imarotari iua xiniākiti. Iua atokokanera Erekarī Mata-matakotinoka imarotari Teoso xiniākiti, kotxi Teoso itxaua iua. ¹² Kona ate apakapari ātiāo matamatakoti īkorapokoritikiri. Ate apakapari Erekarī Matamatakoti, Teoso iokanatakiti atemoni, ininiākara aposotari aimarotiniiri Teoso sikakiti atemoni. Itori isikakiti.

¹³ Atemoni isikakiti asāpireta. Kona kākiti imaroreēni asāpiretari kākiti. Erekarī Matamatakoti oerekaua asāpirenauatini. Ate amatari Teoso oerekakiti isākire iōkatsopatakoriā, eereka ātiātaā isākire iōkatsopatakoriā aāmatari iua oerekakiti, ininiā iuasaaki aimarotari atāo. Ikara atoko aōerekai hīte. ¹⁴ Erekarī Mata-matakoti mauakiniti !apakapari Erekarī Matamatakoti oerekakiti, kotxi iuamoni ikara sākiretxi mīkiteti sākire. !Iposotari imarotiniiri Erekarī Matamatakoti sāpiretakiti, kotxi Erekarī Matamatakoti !auari iuamoni. ¹⁵ Erekarī Matamatakoti auakasaakiri kākiti, iuasaaki iposotari ataerekatiniri imakinika, ininiā kākiti Erekarī Mata-matakoti mauakiniti !iposotari apoītiniri iua.

¹⁶ Teoso sākire iōkatsopatakori txari:

Kiripa imarotari Apiananiri xiniākiti iua oerekini īkapani? Iuaritika Kristo oerekaua iuaka xiniākiti.

Teoso Nitiriakori Atxaua

3 Nitariakori, hīte !ikamari ikinipoko Erekarī Mata-matakoti nireēkiti. Hīkamari hīteka nireēkiti īkorapokoriti auakani kamini atokokana. Ininiākara nisākirauata hītekata amarinikata nisākirauatini atoko, kotxi poiāonoka hāuikari Kristo sākire. ² Tinitxiā atoko inakari nisākire nisikai. Xinitxi atoko inakari nisākire kona nisikai, kotxi !himīteenekari nisākire kamimari. Uatxapiima hīte !iposopanika noerekakiti kamimari himarotini. ³ Īkorapokoriti auakani xinikini atoko hīxinikapanika. Ikara xika hīxikotakakaua. Hina-iatakakaua. Homanatakakaua. Hīteka nireēkiti hīkama, īkorapokoriti auakani kamini atokokana. ⁴ Kotxi ātikaka hīte txari: "Paoro sākire nikīpita." Apanakini txari: "Aporo sākire nikīpita." Ikara atoko hininiā, kākiti īkorapokoritikini sākire atoko hīsākirauata. !Kīkitepanikai.

⁵ Kiripa Paoro? Kiripa Aporo? Kristo nitiriakorinoka atxaua. Iua sākire sāpiretakininoka atxaua. Hīte auikapekari Kristo sākire asāpiretakasaakii. Apiananiri sikari parīkatxi ikininapemoni akamini īkapani. ⁶ Ia atoko itxa parīkatxi Teoso sikakiti: Merepanika nota sāpiretari Teoso sākire kākitimoni, takariki nitakini atokokana. Eereka Aporo oerekari ninoa kākiti apikomoni Teoso sākire. Āparaā takari nireēkiti atoko itxa apikomoni Teoso sākire isāpiretakiti. Nota, Aporo pakini parīkauata ikara atoko, iuaritika Teosonoka aneēkakari takari. Iuanokara txīkitakari kākiti auikiniri isākire. ⁷ Takariki taākari, āparaā siākari pakini minakati ninoa, kotxi Teosonoka aneēkakari takari.

⁸ Teoso sākire merepanika sāpiretakari nirekari

iparīkauatini Teoso īkapani. Teoso sākire apikomoni sāpiretakari apaka nirekari iparīkauatini Teoso īkapani. Ininiā Teoso sikariko ninoa parīka īki ninoamoni iparīkana iaōka. ⁹ Teosokata parīkauatakani atxaua. Teoso kikiote atoko hītxaua. Apaka Teoso aapoko atoko hītxaua.

¹⁰ Teoso sikapekano ikinipoko erekari niparīka iua īkapani nikamini. Aapokotxi kamiko apisa aapokotxi kamakari kimaroreri takari kaikori, inopini aapokotxi ikamini īkapani. Iua aapokotxi kamakari kimaroreri atoko nitxaua. Merepanika nota parīkauata Kristo sākire nisāpiretini. Kaikori aapokotxi kamakari takakiti atoko itxa ikara iua sākire. Eereka apanakini oerekarauata apikomoni. Ninoa parīka aapokotxi kamiko kaikori nopini atokokana itxa. Erepaniko aka-makasaakiri ikara parīkatxi. ¹¹ Kaikori, aapokotxi kamakari takakiti atoko itxa Xesosi Kristo sākire. Āti kaikori kākiti sākire !uari. Auape kaikori Xesosi Kristo sākire, kotxi kataparari. ¹² Xesosi Kristo sākire aāuikasaaki, kaikori aāuini īkapani iposope. Aapokotxi iua kaikori nopini atoko itxa aparīka. Aparīka atxiīti oro atoko itxa. Atxiīti pirata atoko itxa. Atxiīti kai erekari atoko itxa. Atxiīti aamina atoko itxa. Atxiīti aātsopa atoko itxa. Atxiīti katsotati atoko itxa aparīka.

¹³ Itixi xipokini ōti kākiti imarotariko natokopa itxa iparīka, kotxi iusaakiko arikatxi ataerekatari iparīka. ¹⁴ Iparīka marikakaniā, apakapari iparīka īki. ¹⁵ Iparīka arikiniā, !apakapari iparīka īki. Iuaritika Teoso auiritari iua auini ātipirika Teosokata, txamari iua xipokaarita.

¹⁶ Kona hīte imarotapanikari Teoso misākiretiko aikoti hininiua? Kona hīte imarotapanikari Erekari Matamatakoti auini hīto āki? ¹⁷ Kākiti xipokiniāri Teoso misākiretiko aikoti, Teoso xipokariko iua. Teoso misākiretiko aikoti iua nakiti. Hītera Teoso misākiretiko aikoti hītxaua.

¹⁸ Kona hīteka misirienetapeuako. Atxiīti ātikaka kākiti hīte sauaki uākatari kimaroreni ininiua, kotxi imarotarina īkorapokoriti auakani imarore. Īkorapokoriti auakani uākatari Kristo sākire auiākari mīikiteti ininiua. Ininiā erekape kākiti īkorapokoriti auakani akiritinii mīikiteti hininiua, kotxi iusaakiko kimaroreri atāo inakari hītxaua. ¹⁹ Teosomoni !kiīkiteri īkorapokoriti auakani imarore. Teoso sākire iōkatsopatakori txari:

Teoso maīkari kimarorerini īkorapokoriti auakani ni-noaka imaroreē.

²⁰ Apaka Teoso sākire iōkatsopatakori txari:

Apiananiri imarotari īkorapokoriti kimarorerini imarore !itxapō.

²¹ Ininiā !apakata kākiti iuikiniua imarore xika. Ikinika aua hītemoni. ²² Paoro aua hītemoni. Aporo aua hītemoni. Petro aua hītemoni. Itixi aua hītemoni. Hāuini, hīpinini apaka aua hītemoni. Uatxa auakari, katana auakari apaka aua hītemoni. Ikinipoko aua hītemoni.

²³ Kotxi hīte Kristo nakiti hītxaua. Kristo, Teoso nakiti itxaua.

Kristo Iokanatakini Kākitimoni

⁴ Erekari kākiti imarotini auītetxiakori aminakaniua. Kristo nitiriakori atxaua. Teoso iokanapirena nīkatakani atxaua. Iua sikari iokanapirena atemoni apanakini asāpiretini īkapani. Iua Teoso iokanapirena !imarotaāka mitxi. ² Nitiritxi atāo inakari ātipirika kamari iauīte paniātakiti. ³ !Nimaākatari hīte ataerekatinino nota. !Nimaākatari apanakini ataerekatinino apaka. Kona notaka ataerekataua apaka. ⁴ Nākixinireē maerekati !uari, iuaritika nikamapekari maerekati. Apiananirinokara ataerekatano. ⁵ Ininiā !hīsāpiretapiri: “Kona erekari iua parīka. Peerekari ikara parīka,” kona hītxape Apiananiri apokini apisa. Apiananiri apokini hiātapako. Iua oerekariko ipiāmoni iomaātakori. Oerekariko kākiti nirekakiti ākixinireēna iparīkauatakasaakina. Iusaaki Teoso txariko kākiti: “Erekapitikari pikamakiti,” itxa.

⁶ Nitariakori, ikara nota pirena, Aporo pirena pakini nisāpiretai atāo inakari himarotini īkapani, āti apiata himiukakani īkapani. Ininiā hīkamariko Teoso sākire iōkatsopatakori iaōka, kotxi !apakata kākiti iteene iuikiniri āti, ātipekana imanirekakani inini. ⁷ Pite apiananitakari !uari. Himapakapakinini !uari. Kapakapare hininiā, kinirepa mapakapareni sākirauatini atoko hītxa? ⁸ Ikinipoko hinireēkiti auapeka hītemoni atxiīti? Katiipekai hīte. Ate ereē mauakanisaaki, atxiīti hīteka kamari auītetxi hininiua. Ninirekari auītetxi atāo hininiua, ininiā ate auītetxi atxaua hītekata. ⁹ !korasaaki neenamati xipoka atoko, auītetxi kāiatakari kanapiriā isotatonekata. Ninoa mapotōkire kākiti auītetxi maīkakini minaāka apanakini atamatinina īkapani, inapetinina īkapani. Eereka okaākana ninoa kākiti. Nota xinikari Teoso nirekari ate iua iokanatakini ikara kākiti maīkakoni atoko aniniua. Ikinimane atamataua. Kākiti, Teoso nitiriakori iaxitikini apaka atamataua apinini-moni asini. ¹⁰ Hītemoni, mīikiteni ate txaua, Kristo īkapani aparīkauatakasaaki. Hītemoni, kimarorei hīte, Kristo īkapani hīparīkauatakasaaki. Hītemoni, !kaposotiireua ate. Hītemoni kaposotiirei hīte. Hīte paxitaāka, txamari ate omanataāka. ¹¹ Uatxapiima Kristo sākire ate auikini xika anatxita. Aposonata.

!Kamākaua. Amisiritaāka. !Kaapokoua. ¹² Iteene aparīkauata anireēkiti aamotini īkapani. Kākiti takasaakiri maerekati atemoni, ate amanaāri Teoso erekari ninoamoni itakini īkapani. Amisiritikosaaki, iusaaki amīteenekari. ¹³ Apanakini misākirepiretakasaakia, erekari ate apakapapiretana ninoa. Uatxapiima apanakinimoni īkorapokoriti txiko atoko atxaua. Kasakari atoko atxaua ninoamoni.

¹⁴ Kona niōkatsopata ikara hīpētatuatini īkapani. Niōkatsopata ikara nipinitinii īkapani monōkori apokini apisa, kotxi namariteni nota tirketakini atoko hītxaua.

¹⁵ Hītemoni tesi mio Teoso sākire oereēkani auaākamako, iuaritika poiāo hīri atoko inakari aua. Notara hīri atoko nitxapekaua, kotxi hāuikari Teoso iokanapirena erekari noerekasaakii Kristo Xesosi posotiireē. ¹⁶ Ininiā nōtākikai: Nota kamakiti atokotxikana hīkamako.

¹⁷ Ikara ĩkapani niokanataru Tximótxio ĩtemoni. Iua namarite nitiretakiti atoko. Iua kamari Apiananiri paniātakiti iaōka. Iua txīkitakai ĩxinikiniri nikamakiti ikiniōtika Kristo posotiireē. Ikini tōpati Kristo sākire auĩākani apotiitiniātaāua, noerekari kākiti erekari ikamini ikiniōtika, erekari nota kamini atokotxikana.

¹⁸ Ātikaka ĩte iuikaua, kotxi ĩūākatari nota mapokakani ĩtemoni. ¹⁹ Txamari Teoso auiritiniāno, paĩtiki napokako ĩtemoni. Iuasaakiko !ninirekari nimarotiniri ninoau iuikakaniua sākire. Napokasaaki ereē, ninirekari nimarotiniri Teoso posotiire. ²⁰ Teoso auĩtetxi ininiātaāua kona sākiretxinani aua. Iposotiire apaka aua. ²¹ Kiripa ĩte nireka? Hinirekatari ninoropatinii aĩkeē, ereē napokasaaki? Hinirekatari nitiretinii, nimatxitakanii, ereē napokasaaki?

Maerekati Xesosi Sākire Auiākani Sauaki

5 Isāpiretaāka kākiti ereē kaminiri maerekati ĩtotxi nireēkiti āti kākitikata. Iua kākiti maerekani apiari, kotxi iua sirīka iri ĩtanorokata. Teoso sākire mauĩākani kamari maerekati, iuaritika ninoau !kamari ikara atoko inakari maerekati, kiki ĩte sauaki auakari kamakiti atoko. Ninoau !ninirekari isākiretinirina ikara atoko inakari maerekati. ² Iuaritika ĩte iuikaua. !Himataniuata himaerekani xika. Apiaerekata ĩkora iri ĩtanorokata sirīkakari ĩokanatinii itakanapini. ³ Nĩto kona ereē aua, iuaritika nixinikakiti auapitika ereē ĩtekata, ininiā nota ereē ĩtekata nauini atokokana, nimereēpekaru iua maerekati kamakari misiritiko. ⁴ Aāũite Xesosi Kristo uākaā ĩpotiitakasaakiua, nota aua ĩtekata nixinikakiti. Iuasaaki himarotakasaakiri Xesosi Kristo posotiire, ⁵ ĩsikiriko iua Satanasi moni iua ĩto ipinini ĩkapani, ixinire ereka inini Xesosi kanapiriākasaaki.

⁶ !Apakata ĩuikiniua. Himarotari axapiti pāo tireēkari tirekakari itori pāo. Iua atokokana ātika maerekati kamakari txīkitakari kaiāopokori kākiti kaminiri maerekati. ⁷ Ininiā ĩokanapariko maerekati mitxi ĩkamakiti, amaneri hinini ĩkapani. Ininiā pāo miātiākati atoko ĩtxaua, kotxi ikoke !auari. Kitxakapirīka kākiti okari ipira soti auĩte, ininiā Teoso nitiri na-paāpotakasaaki ninoau nopini, kona okana ninoau. Kristo, apira soti auĩte atoko itxa. Iua ipina ate mapinakani ĩkapani. ⁸ Pāska kiiniritisaaki, Teoso !auiritari pāo ātikakari nikiko, kotxi maerekati pāo tirekakari atoko itxa. Ininiā maōkanapari maerekati mitxi akamakiti. Pāo miātiākati atoko matxaua, ininiā makamari erekari. Masākiretari atāo inakarinoka. ⁹ Niokanatsopatapeka ĩtemoni himapotiitakaniua maerekati kamakanikata, ĩtotxi nireēkiti kamakanikata. ¹⁰ Na nixinikari ĩkorapokoriti maerekati kamakani. Maerekati ĩtotxi nireēkiti kamakani, kamanarerini, kamisirienenerini, kamakori teosonetakani pakini ĩkorapokoriti auakani na nixinikanāta. !ĩposota ĩtakanapinina ninoau, kotxi auapikana. ĩpīkasaakinokara, ĩtakanapana ninoau. ¹¹ Uatxa niokanatsopata ĩtemoni, himapotiitakaniua maerekati kamakanikata, "Xesosi sākire auĩkarirano" inakanikata. ĩtanoro minakotokatika sirīkakani, kamanarerini, kamakori

teosonetakani, āti misākirepiretakani, ipoātakani, kamisirieneneri pakini ĩtakanapako. Kona hinipokotape ikara atoko inakanikata.

¹² Kona nota parīkani Xesosi sākire mauĩākani misiritiko nisāpiretini. ĩte parīkakara Xesosi sākire auĩākani misiritiko ĩsāpiretini. ¹³ Teosokara sāpiretariko Xesosi sākire mauĩākani misiritiko. ĩte iokanatariko maerekati kamakari ĩte sauaki auakari isini.

Āti Naiatakasaakiri Āti

6 Xesosi sākire auĩākari naiatinii āti Xesosi sākire auĩākari, !apakata Xesosi sākire mauĩākani apisatoō anikiko. Hanikana ninoau Xesosi sākire auĩakanimoni maerekati kamakari misiritiko himarotini ĩkapani. ² Kona himarotapanikari Xesosi sākire auĩākani mereēriko Xesosi sākire mauĩākani misiritiko āti ōti? ĩkamariko ikara atoko inakari xipokatxi ōtisaaiki, ininiā ĩposotapitikari uatxa himereiniri kākiti misiritiko, āti naiatakasaakiri āti. ³ Atxiĩti ĩte kona imarotapanikari himereiniri Satanasi nitiriakori misiritiko āti ōti? Ininiā ĩposotapitikari himereiniri kākiti misiritiko ĩkorapokoriti uatxa. ⁴ Txamari neenamati ĩte sauaki auiniā, hanikatari kākiti Teoso sākire auĩākani mapaxitakanimoni? !Apakata, kotxi ninoau !imarotari Teoso paniātakiti. ⁵ Ikara atoko nitxai nikamapētatinii ĩkapani. Atxiĩti kona ĩposotatari ĩpokiniri kimaroreri ĩte sauaki neenamati xipokini ĩkapani? Atxiĩti kona ātika aua? ⁶ Txamari āti Xesosi sākire auĩākari anikari āti Xesosi sākire auĩākari Xesosi sākire mauĩākani apisatoō maerekati kamakari misiritiko himarotini ĩkapani. Ikara atoko !apakata.

⁷ Ininiā iteene ĩkerokari, kotxi hanikari ĩtari kākiti misiritiko mereēkarimoni. Erekae ĩuiritiniri ĩtari kaminiri maerekati ĩtemoni. Erekae ĩuiritiniri ĩtari ĩtirīkiniri ĩtari. ⁸ Txamari ĩitriuata. ĩkamari maerekati. ĩtariakorimonira ĩkamari ikara. !Apakata. ⁹ Kona himarotapanikari atāo minakati kamakani !isari Teoso auĩtetxi ininiātaāua? Kona ĩteka himisirienetapeua. Ia atoko inakari kākiti !isari Teoso auĩtetxi ininiātaāua: maerekati ĩtotxi nireēkiti kamakani, kamakori teosonetakani, ĩtanoro minakotokatika sirīkakari, kiki sito ininiua nirekakari, kiki āti kikikata sirīkakari. Ninoau !isari Teoso auĩtetxi ininiātaāua. ¹⁰ Kiĩtiriniri, kamanarerini, poātakani, āti misākirepiretakani, kamisirienenerini pakini !isari Teoso auĩtetxi ininiātaāua. ¹¹ Ikara atoko mitxi ĩtxaua ĩte apanakini. Iuaritika himaerekani makatxakaākepeka. Teoso kamari ĩte inakitiakori hinini. Apiananiri Xesosi kamaerekatai. Ereka Mata-matakoti, aTeosone nakiti, iua apaka txīkitakai ĩte atāo inakari kamakani hininiua.

Maerekati ĩtotxi Nireēkiti

¹² Nota posotari ikinipoko nikamini, txamari kona erekari ikinipoko nikamini. Nota posotari ikinipoko nikamini, txamari kona ninirekari nikamakiti nauĩte ininiua. ¹³ Nipokori kamaāka tikakotxi ĩkapani. Tikakotxi nirekari nipokori. Txamari Teoso xipokariko

nipokori, tikakotxi pakini. Teoso linirekari akaminiri maerekati aīto nireēkiti āti kākiti itokata. Apiananiri kamari aīto iua nireēkiti akamini itkapani. Aīto Apiananiri nakiti.

¹⁴ Teoso ōkitikari Apiananiri ipīkani sauaki. Iua atokokana iua ōkitikaua ate iposotiireē.

¹⁵ Ininiā !apakata Kristo ito hīsikini sito kanokareromoni. !Apakata. ¹⁶ Kiki sirīkasaaki kanokarerokata, iusaaki ātinoka itotxi atoko itxauana ninoa. Teoso sākire iōkatsopatakori sāpiretaua:

Kiki sirīkini sitokata, ātika itotxi atoko itxauana.

¹⁷ Kākiti moianatakasaakiri Apiananiri, ātika xiniretxi atoko itxauana ninoa xinire.

¹⁸ Atokata hīsirīkini hinirekasaaki, himitekako. Kona hīkaikotape iuaā. Apanakini maerekati kākiti kamakiti !imisiritari hīito. Imisiritari hākixinire. Hīkamakasaakiri maerekati hīito nireēkiti sitokata, himisiritari hīito, hākixinire pakini. ¹⁹ Kona himarotapanikari hīito Erekarī Matamatakoti misākiretiko aikoti atoko ininiua? Hīte itoākarari iua. Teoso sikari iua hītemoni, ininiā hīito kona hīte nakiti. ²⁰ Teoso iamotapekai hīte Xesosi ipīkasaaki, ininiā hīito itki auapitika. Ininiā uatxa iua nakiti hītxaua. Ininiā uatxa hīitoā hīpaxitariko Teoso.

Itanorouatiko Sākiretxiti

7 Uatxa napakapapiretariko mitxi hiōkatsopatakiti notamoni. !Erekarī kiki kaxirotiniro sito. ² Txamari inirekasaakiri sitokata isirīkini, erekari kiki auini iuka itanorokata. Erekarī sito auini oaka ōtanirikata. ³ Ininiā erekari kiki sikiniri iito itanoromoni. Erekarī sito sikiniri oīto oītanirimoni. ⁴ Itanorotxi ito kona oa nakitinanini. Ōtaniri nakiti apaka oīto. Apaka itaniritxi ito kona iua nakitinanini. Itanoro nakiti apaka iito. ⁵ Kona hītxape: “Kona ninirekari nisirīkini pitekata,” kona hītxape. Hinirekasaakiri nipokori himanikakani Teoso himisākiretini itkapani, atxiiti iusaaki !hinirekari hīsirīkini hītanorokata. Hītanoro apaka kona nirekari osirīkini hītekata iusaaki, Teosonoka hīxinikini itkapani. Ininiā ikara atoko hīkaminiā erekari, txamari paītiki eereka iuaīkana hīsirīkako hītanorokata. Ininiā ikara atoko Satanasi kona sikanireōtai maerekati hīito nireēkiti hīkamini āto sitokata hīsirīkini. ⁶ Ikara nota ōtākikai hīte. Kona nipaniātai ikara hīkamini. ⁷ Notamoni erekari nota atoko hinini. Iuaritika ikinimane aua Teoso siākiti iparīka kamini itkapani. Teoso sikari āti isikakiti ātimoni. Ātiāo isikakiti isika ātimoni.

⁸ Uatxa nimisākiretanako mītanirini, mītanoroni, tikinitakoni pakini. Erekarī himītaniriuatakani, himītanorouatakani nota atoko hinini. ⁹ Txamari himapostataniāri hītakanapiniri hīito nireēkiti, erekari hītanorouatini, erekari hītaniriuatini, kotxi kapatakari atoko itxa hīito nireēkiti.

Hīkamari Atāo Hītaniriuatakasaaki

¹⁰ Ia nipaniātana kākiti itaniriuatakani: !Apakata sito takanapiniri oītaniri. Kona notani paniātai. Apiananiri-rapaniātai. ¹¹ Otakanapiniāri oītaniri, !apakata

iuaīkana oītaniriuatini. Erekarī oītanirimoni iuaīkana okanapiriini. Iua atokotxikana !apakata kiki takanapiniri itanoro. ¹² Nōtākikari apanakini. Apiananiri paniātakiti apanakini itkapani !auari, ininiā nota ōtākikana ninoa ia atoko: Xesosi sākire auiākari auiniā itanoro Xesosi sākire mauīākato, oa nirekiniāri okaikotini iuakata, !apakata iua iokanatiniro oa otakanapiniri iua. ¹³ Iua atokotxikana, Xesosi sākire auiākaro auiniā oītaniri Xesosi sākire mauīākati, iua nirekiniāri ikaikotini oakata, !apakata otakanapiniri iua. ¹⁴ Iusaaki itaniritxi Xesosi sākire mauīākati apakapari Teoso sākire itanoro kamakiti ereka atamatakasaaki. Iua atokotxikana, itanorotxi Xesosi sākire mauīākato apakapari Teoso sākire ōtaniri kamakiti ereka oātamatakasaaki. Imakamakaniārina ikara atoko, !erekana imiakori. Irītxi, inorotxi pakini kaminiāri nōtākikakiti iaōka, erekana imiakori. ¹⁵ Xesosi sākire mauīākati nirekiniāri itakanapiniri itanoro, oa auiritariko isini. Xesosi sākire mauīakato nirekiniāri otakanapiniri oītaniri, iua auiritaroko osini. Ikara atoko ininiā, ninoa sikakapeēkaika. Ikara atoko ininiā erekari, kotxi Teoso !inirekari aneenamautini ikara xika. ¹⁶ Pite itanorotxi, pimarotatarī? Atxiiti pītaniri auikari Xesosi sākire imaerekani makatxakiko itkapani, Xesosi sākire pisāpiretakasaakiri iua. Pite itaniritxi, pimarotatarī? Atxiiti pītanoro auikari Xesosi sākire omaerekani makatxakiko, Xesosi sākire pisāpiretakasaakiro oa.

Teoso Akiritakasaakiri Kākiti

¹⁷ Ininiā ikininape kamariko iparīka Teoso sikakiti iuamoni, kotxi Apiananiri akiritaua ikara parīkatxi akamini. Ikara nipaniātari ikinimane Teoso mereēkini apotitiniātaāua. ¹⁸ Teoso akiritakasaakiri kiki, Teoso takaōtxikare iitoā auiniā, !apakata Teoso takaōtxikare makatxakiko. Teoso akiritakasaakiri kiki, Teoso takaōtxikare iitoā mauakaniā, !apakata Teoso takaōtxikare iitoā takiko. ¹⁹ Teoso takaōtxikare hīitoā auiniā, ikara kona txīkitakai Teoso anaakori hininiua. Teoso takaōtxikare hīitoā mauakaniā, ikara apaka kona txīkitakai Teoso anaakori hininiua. Teoso nireēkiti iaōka kamiko txīkitakai Teoso anaakori hininiua. ²⁰ Teoso akiritakasaakii, iusaaki mitxi hīparīka hīkamapanikako. ²¹ Teoso akiritakasaakii, nitiritxi amotakori hininiāua, ininiā kona maerekaxinireti hītxapeua nitiritxi hininiua xika. Iuaritika hīauīte sikakiniāi, ininiā hīsako. ²² Apiananiri akiritiniāri nitiritxi amotakori, Apiananiri sikakakiti itxaua iua. Apiananiri akiritiniāri nitiritxi minakatua, Apiananiri nitiri iamotakiti itxaua iua. ²³ Xesosi amotakini hītxaua, ininiā iuaīkana kākiti nitiri iamotakoni !hītxapeuako. ²⁴ Nitariakori, Teoso akiritakasaakii, iusaaki mitxi hīparīka hīkamapanikako.

Mitxitakani, Tikinitakoni Pakini

²⁵ Uatxa nōtākikai hīte mitxitakani. Apiananiri kona sāpiretano ipaniātakiti hīte itkapani, iuaritika nisāpiretani nixinikakiti, kotxi Apiananiri amonīkapekano, ininiā kākiti posota auikiniri nisākire. ²⁶ Itkorasaaki pa-

monōkoniri Xesosi sākire auiākanimoni, ininiā notamoni apiaerekata kākiti mītanorouatakani. ²⁷ Hītanorouatapeka hininiā, kona hītakanapapero hītanoro. Mītanorouatakatipanika hininiā, kona hinitapero hītanoro. ²⁸ Iuaritika hītanorouatiniā, maerekati !hīkama. Kākiti !tanorouatiniā, apokapitikako ninoa maxikiko. Kona ninirekari ikara atoko hīte !kapani.

²⁹ Nitariakori, poiāo ōtinoka aua aparīkauatini Apiananiri !kapani. Ininiā hīte kītanororini parīkauatako Teoso !kapani mītanoroni parīkauatini atokotxikana. ³⁰ Txiapatakari parīkauatako Teoso !kapani, kākiti matxiapatakati parīkauatini atokokana. Poxokori parīkauatako mapoxokoniti parīkauatini atokokana. Tiitxi amotakari parīkauatako Teoso !kapani, tiitxi mauakiniti parīkauatini atokokana. ³¹ !korapokoriti tiitxi auakini !ixinikapiriko itiina, kotxi !korapokoriti kākiti potxitakiti xipokaāpota.

³² Ninirekari erekaxinire hinini. Kiki mītanoroti posotari ixinikiniri kanatokopa iparīkauatini Apiananiri ikamapoxokonitini !kapani. ³³ Txamari kiki kītanorori xinikari parīkatxi !korapokoritikiri, kotxi inirekari ikamapoxokonitiniro !tanoro. ³⁴ Mītanirito, mitxitakaro pakini nirekari oparīkauatini Apiananiri !kapani, kotxi onirekari oīto, oxinire pakini osikini iuamoni. Txamari sito kītaniriro xinikari parīkatxi !korapokoriti auakari, kotxi onirekari ōtaniri okamapoxokonitini. ³⁵ Ikara atoko nisāpiretai hīte, hīte ereka hinini !kapani. Kona ninirekari nimauritakanii erekari hāpakapini. Ninirekari atāonoka hīkamini. Ninirekari hīparīkauatini Apiananirinoka !kapani.

³⁶ !tokoro iri atxīiti !auritapanikaro oa !taniriuatini, txamari oaneēpeka. !tokori nirekiniāri itakiniro oa, erekari iua auiritiniri iua. !kamari maerekati. Erekari iua auiritinina ninoa !taniriuatini. ³⁷ Atxīiti !tokoro iri ākixinireē !nirekaro oa !taniriuatini. Atxīiti !isikaentaro oa !timoni. Iua xinikakiti omītaniriuatakani !kapani pataparari ininiā, ākixinireē imarotiniāri inireēkiti oa mītaniriuatakani, ininiā iua kiki kamari erekari. ³⁸ Oa sikakari oītaniriuatini !kapani kamari erekari. Iuaritika oa masikakati oītaniriuatini !kapani kamari apiaerekata.

³⁹ Teoso paniātakiti iōkatsopatakori paniātaro sito kaikotini oītanirikata iua auapanika inakasaaki. Iua ipininiā, apakata oītaniriuatini onirekakitikata. Txamari Apiananiri sākire auiākarikatanoka apakata oītaniriuatini. ⁴⁰ Notamoni oa apia poxokoniuata omītaniriuatakaniā iuaīkana. Ikara atoko inakari nōtākikaro sito, kotxi nimarotari Erekari Matamatakoti Teoso nakiti aua notamoni.

Nipokori Teoso Kamakori Sikiko

8 Uatxa nisāpiretai nipokori sikiko teoso kākiti kamakitimoni. Amakinika aimarotari ikara. Ikara inakari aimarotapeka ate. Kākiti imaroretxi auiniā iuikaua. Apiaerekata kākiti auini tiraōkitxi, kotxi isikataratari kākiti xinire. ² “Kimaroreno nota” inakari !uari imaroretxi. Kaiāopokori imaroretxi imimarotakiniti

aua. ³ Iuaritika kākiti tiretiniāri Teoso, Teoso imarotari iua.

⁴ Maxinikari nipokori teoso kamakorimoni sikakori. Aimarotari teoso kākiti kamakiti !kamamareri. Aimarotari ātika Teoso atāo inakari aua. ⁵ Aua kākiti kamakiti. Kākiti takauākatari “teoso” itxaua. Kākiti takauākatari teoso iaxiti auakani, !korapokoriti auakani apaka. Kaiāopokori ikara atoko inakari teosoakori aua. Kaiāopokori ikara atoko inakari auītetxiakori aua.

⁶ Atemoni ātika Teoso aua. Iua aīri iaxitikiri. Iua kamari ikinipoko. Aparīkauata iuanoka !kapani. Ātika aūiite aua, Xesosi Kristo. Ikini sereti kamakari iua. Iua posotireē aūiini aua.

⁷ Apanakini !marotapanikari kākiti kamakiti teoso minakaniu, kotxi mitxi iteene itotarina teoso kākiti kamakiti. Ininiā inikasaakirina nipokori teoso kamakorimoni siākori, iuākatarina ikara nipokori teoso atāo inakarimoni siākori. Iuasaaki ninoa uākatari maerekati ikaminina, kotxi ākixinireēna !iteene imarotarina atāo inakari. ⁸ Txamari nipokori !itxīkitakaua Teosomoni asini. Ikara nipokori anikini !imisiritaua. Apaka !kamari ereka anini.

⁹ Iuaritika erepaniko. Hinirekiniāri ikara nipokori hinikini, hīxinikariko apanakini Teoso sākire poiāonoka auiākani. Ninoa imarotiniāri hīte nikiniri ikara nipokori, ininiā ninoa apaka nikari, txamari iuasaaki ninoa kamari ākixinirena manirekakiniti. ¹⁰ Teoso sākire poiāonoka auiākari atamatiniāi Teoso sākire iteene imarotakari nikiniri nipokori teoso kamakori misākiretiko aikotiā, isikataparaxiniretari iua apaka nikiniri nipokori teoso kamakorimoni siākori. ¹¹ Ininiā pimarore xika, atxīiti pitari Teoso sākire poiāonoka auiākari sari imisiritikomoni. Kristo ipina iua !kapani apaka. ¹² Ikara maerekati hītarimoni hīkaminiā, hīkarotari ākixinire. Hīteri ākixinire hīkarotakasaaki, hīkamari maerekati Kristomoni. ¹³ Ininiā nipokori ninikini txīkitakiniāri nitari kaminiri maerekati, itixi auapanika inakasaaki kona ninikaikari iua nipokori, kotxi kona ninirekari nitari kaminiri maerekati.

Teoso Iokanatakini Kākitimoni

9 Teoso iokanatakiti nitxaua. Ninireēkiti nijosotamikamini. Naōkitapekari Xesosi Kristo aūiite. Iparīka nikamakasaaki, hīte auikari Apiananiri sākire. ² Atxīiti apanakini !auikari Teoso iokanatakiti nininiu. Hītera auikari Teoso iokanatakiti nininiu. Hītera oerekari Apiananiri iokanatakiti nininiu, kotxi hīte auikari Apiananiri sākire, nota sāpiretakasaakii hīte.

³ Kākiti mauikakaniāri Teoso iokanatakiti nininiu, napakapapiretana ninoa ia atoko: ⁴ Apakata atxīiti aāpakapiniri nipokori, iāriā pakini aparīkauatini !kapani?

⁵ Apakata atxīiti ate anikiniro ātanoro Teoso sākire auiākaro atekata, apanakini Teoso iokanatakini, Apiananiri itariakori, Petro pakini anikinina ninoa !tanoro atokotxikana? ⁶ Atxīiti apakata Panapee, nota pakini noka parīkauatini anikakiti aāpakapini !kapani?

⁷ Sotato sikasaaki ineenamauatini !kapani, iuaka !iamotari anikakitina. Aua atxīiti ova takakari. Ova

itakakiti matximakati aua? !Auari. Kona auari kema auīte piratakari ipira tiniā miātakati.

⁸ Ikara nisākire kona kākiti sākirenanini. Iua atokotxikana Teoso sākire. ⁹ Moisesi iōkatsopatapekari Teoso paniātakiti. Ia atoko itxa:

Kona hīitxikari kema auīte nama trikopani ika-makasaaki. Hāuiritariko inikini.

Teoso tiretatari kema auīte? Itiretapitikari. ¹⁰ Apiata isāpiretari ikara kākiti parīkauatakani īkapani. Ininiā takarauatakari takarauata, kotxi inirekari ikiena inikini. Kienatxi apakari apari ikiena, kotxi inirekari ikiena inikini. ¹¹ Katarakeri takarauatini atokokana, ate takari Teoso sākire hāixinireē. Katarakeri nikari ikiena itakakiti, ininiā atxiīti apakata ate apakapiniri kienatxi hīte sikakiti? Kotxi ate parīkauata hīte īkapani.

¹² Apakatinīā apanakini apakapiniri iparīkana īki hīte sikakiti, ininiā apiata apakata ate apakapiniri ate parīka īki, iuaritika kona aamanaāri hīsikiniāua ate parīka īki. Amīteenekari ikinipoko, kotxi !anirekari aiotokakiniri Kristo iokanapirena erekari hīkenakotini.

¹³ Himarotari Teoso misākiretiko aikoti āki parīkau-atakani iuaātaā apakapari ikiena. Teosomoni sikakori takikoātaā parīkauatakani apaka apakapari ipixini iuaātaā siākori inikinina īkapani. ¹⁴ Iua atokotxikana Apiananiri paniātari iua iokanapirena erekari sāpiretakani apaka apakapiniri iparīkana īki.

¹⁵ Ikara atōpitikara, iuaritika kona nipaniātai ikara atoko hīkamini. Kona niōkatsopatari ikara, niparīka īki notamoni hīsikini īkapani. Niparīka īki namanainii apisa erekape nipinini. Niuikari niparīkauatini hīte īkapani hītxineirote nimapakapakanisaaki. ¹⁶ Teoso iokanapirena erekari noereka, iuaritika !apakata niuikiniua, kotxi Teoso sikari ia parīkatxi notamoni. Nimsiritiko auapitika, Teoso iokanapirena erekari nimasāpiretakaniā. ¹⁷ Teoso iokanapirena erekari nisāpiretiniāri kākiti, nāixinireē iteene ninirekiniāri ikara nikamini, ininiā napakapapitikariko niparīka īki. Nimanirekakaniāri ikara nikamini, iuaritika nikamari, kotxi Teoso sikari ikara parīkatxi notamoni nikamini īkapani. ¹⁸ Ia atoko nīkitxitiko: Teoso iokanapirena erekari nisāpiretakasaaki, kona minakati napakapa. Ikara atoko kamapoxokonitari nāixinire, kotxi māīkitika nisāpiretai Teoso sākire. Teoso iokanapirena erekari sāpiretakari nitxaua, ininiā niposotiire auapitika hīkitxitinino nota nipaniātinīāi hīte, iuaritika !nirekari ikara atoko nikamini nota nireēkiti napakapini īkapani.

Parīkatxi Ikinimane īkapani

¹⁹ Ninireēkiti nikama. Kākiti nitiri iamotakori !nitxaua. Iuaritika notaka nitxīkitakaua ikinimane nitiri nininiua, Teoso sākire apikomoni kākiti auikini īkapani. ²⁰ Xoteoakori sauaki niparīkauatakasaaki, Xoteo auini atoko nitxa nota auini. Ikara atoko ininiā, Xoteoakori auikari Xesosi sākire. Moisesi paniātakiti iaōka kamakani sauaki nauakasaaki, ninoauini atokokana nitxa nota auini, kotxi ninirekari Moisesi sākire auīākani auikiniri Xesosi sākire. ²¹ Xoteo minakaniua !imarotari Moisesi paniātakiti. Ininiā ninoakata nauakasaaki, kona ni-

paniātari Moisesi paniātakiti ikaminina, Xesosi sākire auikinina īkapani. Iuaritika nikamari Teoso paniātakiti, kotxi iuatxikana Kristo paniātakiti nikamini. ²² Kākiti mataparaxinirenikata nauakasaaki, nota apaka kona kataparaxinireno, Xesosi sākire auikinina īkapani. Ikini kākiti sauaki nauakasaaki, nikamari kākiti auini atoko nitxa nota auini, ininiā ikinipoko niposotakiti nikama apanakini maerekani makatxakiko īkapani. ²³ Ikara atoko nikama Teoso iokanapirena erekari nisāpiretini īkapani. Nikamari ikinipoko, Teoso iokanapirena erekari nisāpiretini īkapani. Ikara atoko ininiā, nota apaka apakapari Teoso iokanapirena erekari hītekata.

Saporiēta Apakapari

²⁴ Himarotari mitekatxi. Kākiti miteēkani miteka, iuaritika ātinoka apakapari imitekini īki. Merepitipanika mitekatxi mapotōkire apokakarimoka apakapari imitekini īki. Ininiā miteēkari atoko hītxako. Hīsapitipo. Teoso parīka hīkamapitipo hīparīka īki hāpakapini īkapani. ²⁵ Ikini miteēkari parīkauatapitipo iito tapara iteene auini īkapani. !Auiritari iito misiritakari. Ikara atoko ikama, saporiēta imitekini īki apakapini īkapani. Ikara saporiēta kona okanani aua. Oxipokapitikako. Ate parīkauatapitipo ātiāo aāpakapakiti aāpakapini īkapani. Ikara aāpakapakiti lixipoka. ²⁶ Miteēkari isinimoni mimarotakati atoko !nitxaua. Nimarotari nisini-
moni. Nisapitipo mitekatxi mapotōkiremoni. Maxikatīka !nineenamauata. Na neenamauata nisanōkakata. ²⁷ Nitxīkitakari niito ninitiri ininiua, nota nireēkiti ikamini īkapani, kotxi nisāpiretapekari ikara apanakinimoni, ininiākara kona ninirekari nimapakapakaniri notaka parīka īki.

Kākiti Isaeokini Aōerekini Pirena

10 Nota nirekari hīxinikiniri kitxakapirīka, aātokirikorini takanapakasaakiri Exito tixini, ikinika ninoaua katxiāri patapi. Iua katxiāri oerekana isinimonina. Apaka ikinika ninoaua napari potxoari uiniti āki. ² Ninoaua sari Moisesikata, ininiā katxiāri patapi auakasaakina, potxoari uiniti patapi auakasaakina, iuasaaki ninoaua patxisatiko atoko aua iuasaaki. ³ Ninoaua ikinikana nikari xinitxi Teoso iokanatakiti. ⁴ Ninoaua ikinikana iātari āparaā Teoso sikakiti. Ninoaua iātari āparaā kai auīteākiriā. Kristo iua kai auīte āparaā portorikiniātaā atokokana. Iua sari ninoakata. ⁵ Txamari Teoso !apokaerekatari kaiōpokori ninoaua, ininiā ipinana. Iitona iarika āparaā makipakanīātaā.

⁶ Uatxa axinikana ninoaua, ininiā aimarotari amanirekakaniri maerekati ninoaua nirekiniri atoko. ⁷ !Hīteosonetapiri kākiti kamakiti, ninoaua apanakini teosonetiniri atokokana, kotxi Teoso sākire iōkatsopatakori txari:

Ninoaua topāka inipokotinina īkapani, iātinina īkapani, eereka ōkitikauana isarauatinina īkapani teoso ika-makitina apisatoō.

⁸ !Apakata aanokarauatini ninoaua apanakini anokarauatini atoko, kotxi āti ōtinokara vītxi tres mio ninoaua okaā-

ka ūkora maerekati xika. ⁹!Apakata aātamakaereka-
tiniri Kristo ninoa apanakini kitxakapirīka ata-
makaerekatiniri atoko, kotxi iua xika imini okana ni-
noa. ¹⁰!Hītsoatape, ninoa apanakini kitxakapirīka tsoa-
tini atokokana, kotxi eereka Teoso nitiri xipokana ni-
noa.

¹¹ Ikara imisiritikona apoka ninoamoni apanakini
pinitiko ūkapani. Ikara imisiritikona iōkatsopataāka ate
pinitiko ūkapani, kotxi itixi mapotōkire ōti apokaāpota.
¹² Hītemoni ereka hinini, ininiā erepaniko, kotxi atxīti
paŕitiki hīkamari maerekati. ¹³ Hīte atamakaerekataāka
ikinimane atamakaerekataāka atokotxikana. Iuaritika
Teoso litakanapai hīte. Kona iua auiritari hāta-
makaerekatiko himamīteenekakiniti. Iuusaaki oerekai
himitekini, ininiā hīposotari himīteenekiniri.

Teoso Kākiti Kamakiti

¹⁴ Ininiā nitariakori nota tirketakini, himiteka teoso
kākiti kamakiti hītakanapini. ¹⁵ Hīte kākiti kimarorerini,
ininiā iteene himixinikariko nisākire. ¹⁶ Iāriā aātakasaa-
ki, akinika aāpotiitakasaakiua, axinikari Xesosi ipinini.
Iuusaaki atxari Teoso: "Erekapitikai, kotxi Xesosi arēka
xiketa ate ūkapani." Amaxiōpekitaakasaakiri komiri,
anikasaakiri, aāpitiitakasaakiua, axinikari Kristo ūto
noropatiko ate ūkapani. ¹⁷ Iuusaaki itomaneua ate,
iuaritika ātika komiri atokokana atxaua. Ātika ūtotxi
atokokana atxaua, kotxi amakinika anikari ātika
komiri. Ikara komiri Kristo ūto atokokana itxaua.

¹⁸ Hīxinikanako kākiti Isaeokini ūkorapokoritikini. Ni-
noa sikari Teoso xinitxi. Eereka ninoa nikari ikara
xinitxi. Inikasaakirina ikara xinitxi, iuusaaki ninoa
oerekari iTeosonetinirina iua. ¹⁹ Kiripa ninireka
nisāpiretinii? Nisāpiretari teoso kākiti kamakiti kona
kakamareri. Iua teoso siākori kona itxa. ²⁰ Iuaritika
erepaniko. Ikara atāo maerekati. Xoteo minakaniua
sikakiti teoso kākiti kamakitimoni ninoa sika Satanasi
nitiriakorimoni. Kona Teoso atāo inakari isikana isiāk-
itina. Ininiā na ninirekari hīte moianatiniri Satanasi ni-
tiriakori. ²¹ Kona hīposotari Apiananiri iākoanaā hiātini,
apaka Satanasi nitirini iākoanaā hiātini. Kona hīposo-
tari Apiananiri kiena hinikini, apaka Satanasi nitirini
kiena hinikini. ²² Atauako anirekatari akaminiri Teoso
naiatinia? Ate tapara apiata atxīti?

Xesosi Auiākani Kamakiti

²³ Nota posotari ikinipoko ninireēkiti nikamini, txam-
ari kona ikinika erekari nikamini. Ikinipoko ninireēkiti
nuposotapitika nikamini, txamari kona ikinipoko ka-
mari nākixinire aneini. ²⁴!Hinitapiriko hīteka nireēkiti
hāpakapini. Himoianatariko āti iua nireēkiti apakapini.

²⁵ Hīposotari hinikiniri nipokori amotakoriātaā
auakari. Iuusaaki kona hīpimaāpiri: "Ia nipokori
sikaākapeka teoso kākiti kamakitimoni?" !hīt-xapeko.
Kotxi himarotakasaakiri hinikiniri nipokori teoso kākiti
kamakitimoni sikiko, hākixinire karotaāka atxīti.

²⁶ Teoso sākire sāpiretaua:

Itixi Apiananiri nakiti itxaua, ikinika itixi auakani paki-
ni.

²⁷ Xesosi mauīākani aiatakasaakii hīte hinipokotini ni-
noakata, hinirekiniāri hīsa. Hinikariko isikakitina. Kona
hīpimaāpiri: "Ia nipokori teoso kākiti kamakiti
sikaākapeka?" kona hīt-xape, hākixinire himakaro-
takaniri ūkapani. ²⁸ Txamari apanakini kākiti iuaā
sāpiretakasaakii: "Ia nipokori sikaākapeka teoso kākiti
kamakitimoni," itxa. Iuusaaki kona hinikapiri, kotxi atx-
īti hīkaroxiniretari ikara kākiti mataparaxinireti, kotxi:

Itixi Apiananiri nakiti itxaua, ikinika itixi auakani paki-
ni.

²⁹ Na nitxai: "Kona hinikapiri ikara, hīteka ākixinire hi-
makarotakani ūkapani," !nitxai. Nitxai: "Hinakapiri ikara,
āti kākiti ākixinire himakarotakani ūkapani." Nota ākix-
inireē nota nireēkiti nikamini ūkapani erekari. Āti kākiti
ākixinireē nota nirekakiti nikamini ūkapani !erekari,
ininiā iuamoni ikara nikamakasaaki, nikamari
maerekati. Kinirepa !apakata nikaminiri nota ākixinire
auiritakiti? ³⁰ Napakapakasaakiri nipokori, ininiā
iuusaaki nimisākiretari Teoso erekari isikakiti. Ininiā
kinirepa nimisākirepiretaāka?

³¹ Nisāpiretai hīte. Hinikasaaki, hiātakasaaki,
ikinipoko hīkamakasaaki, hīkamari ikinika Teoso ere-
ka inini imarotiko ūkapani. ³² Kona hīt-xīkitakapiri, Xo-
teoakori, Xoteo minakaniua, kākiti Xesosi sākire
auīākani pakini kaminiri maerekati. ³³ Ninirekari ikini-
mane kākiti nireēkiti nikamini, ikinika nikamakasaaki.
!Ninirekari erekari notanani ūkapani. Ninirekari erekari
itomaneri ūkapani, imaerekanina Xesosi makatxakini
ūkapani.

Sitoākini Xesosi Sākire Auiākani

11 Hīkamariko nota kamakiti atoko inakari. Kristo
kamakiti atoko nota kamini atokotxikana hīka-
mako. ² Nitariakori, peerekai hīte, kotxi iteene hīx-
inikano nota. Peerekai hīte, kotxi hīkamapanikari no-
ereēkiti nisāpiretakiti iaōka.

³ Ninirekari himarotiniri ia: Kiki auīte Kristo itxaua.
Sito auīte kiki itxaua. Kristo auīte Teoso itxaua. ⁴ Ininiā
kiki ikii māka imamakatkakaniā Teoso imisākire-
takasaaki, apaka Teoso sākire oerekasaaki, kona ipaxi-
tari iauīte Kristo.

⁵ Sito okii māka mauakaniā Teoso omisākiretakasaa-
ki, apaka Teoso sākire oerekasaaki, kona opaxitari
oauīte oitaniri. Okii māka omatakakaniā, oa kii
kixākakori atoko itxa. ⁶ Okii māka omanirekakaniā,
ininiā okisauakaiākotaākako. Opētatuatiniā, okii
kixākiko xika, oiāko kisauakiko xika, ininiā iuusaaki okii
māka otaka. ⁷ Kiki misākiretakasaakiri Teoso, kona
erekari itakiniri ikii māka, kotxi Teoso atoko itxa iua.
Ikamaāka Teoso ereka oerekini ūkapani. Sito kamaāka
ōtaniri ereka oerekini ūkapani. ⁸ Merepitipanika Teoso
kona kamari kiki sito ūtoā. Teoso kamaro sito kiki ūtoā.

⁹ Kiki kona kamaāka sito ūkapani. Sito kamaāka kiki ūka-
pani. ¹⁰ Ininiā oa takari okii māka. Ikara atoko ininiā,
oerekari oauītetiniri oitaniri. Iuusaaki Teoso nitiriakori
iaxitikini apaka imarotari oauītetiniri oitaniri.

¹¹ Kiki, sito pakini Apiananiri sākire auikasaaki, sito nirekari kiki. Kiki nirekaro sito. !Apakata sitonoka auiniā. !Apakata kikinoka auiniā. ¹² Kotxi sito ina kiki ūtoā. Eereka ikinipoko kiki iponaniā sito ūtoā. Ikara atoko itxapitikama, Teoso kamari ikinipoko. ¹³ Hīteka hīxinikapiretari ia: Sito kii māka mauakaniā, iusaaki atāokani Teoso omisākiretini? ¹⁴ Kākiti itotakiti oerekaua kiki ūtanoiākori pētatico. ¹⁵ Sito auiniā oiāko paŋtanori, oŋuikari oiāko, kotxi oiāko sikaāka okii ipatakari ūkapani. ¹⁶ Kākiti nirekiniāri inenamauatini iākotxi pirena xika, ininiā kona ate, ikinika Teoso sākire auīākani pakini !auari ikara. Ininiā !apaniātai ikara atoko inakari hīkamini.

Xesosi Ipinini Xinikiko Kiiniriti

¹⁷ Uatxa niōkatsopatakitiā kona niuikai, kotxi hāpoti-itakasaakiaua, apia erekari kona hīkama. Apiata maerekati hīkama. ¹⁸ Merepanika nikenakopiretari hāpotiitakasaakiaua Teoso misākiretiko aikotiā hīta-parakienatakakiniua. Nixinikari ipixini ikara nikenakopiretakiti atāo inini. ¹⁹ Apanakini oerekakiti atāo minakati auapitika hīte sauaki. Akenakotakasaakiri nino oerekakiti, aimarotari Teoso !apokaerekatana nino. Iua apokaerekatana iua sākire atāo inakari oerekakani. ²⁰ Hāpotiitakasaakiaua, kona atāo hīkamari kiiniri, Apiananiri ipinini xinikiko kiiniriti. ²¹ Kotxi hinikasaaki, himixirikari hīkiena apanakini nikiniri apisapanika. Ininiā apanakini natxita, apanakini poāta iusaaki. ²² Auapitika haāpoko hinikini ūkapani, hiātini ūkapani. Hāpotiitakasaakiaua, homanatarari apanakini Xesosi sākire auīākani. Hīkamapētatarari aŋtariakori matii-ni. Kiripa nitxai hīte? Atxiīti hinirekari niuikinii? Kona xatiki niuikai hīte.

²³ Apiananiri sāpiretakiti notamoni, iua atokotxikana nisāpiretapekai hīte. Ia nisāpiretai: Ūkanōka Apiananiri Xesosi mīkapiritiko ōtisaaki, iua kosekari komiri.

²⁴ Iusaaki imisākiretari Teoso: "Erekapitikari ia komiri pisikakiti atemoni," itxa. Iposo atoko imaxiōpekari iua komiri, sika itxari imoianariakorimoni. Itxana: "Apakapa, nika hītako. Ia niīto okaāka hīte ūkapani. Ia komiri hinikasaaki, hīxinikanoko nota. Hīxinikari nipinini hīte ūkapani," itxa. ²⁵ Nino nipokotaka atoko, mitxi komiri ikosekini atokokana, ikosekari iākoanatxi. Iusaaki itxana: "Ia iākoanatxi oerekari Teoso kamapekari ikamaenetakiti amaneri, kotxi niarēka xiketa hīte ūkapani. Ia iāriā hiātakasaaki, hīxinikanoko nota. Hīxinikariko nipinini hīte ūkapani," itxa Xesosi.

²⁶ Ia komiri hinikasaaki, ia iākoanatxiākiri hiātakasaaki, hōerekari Apiananiri ipinini kākiti ūkapani. Ikara hōerekiriniritika iua ūkorapokoriti kanapiriāko.

²⁷ Maxikatīka kākiti nikiniāri ia komiri, maxikatīka iā-tiniāri Apiananiri iākoanaākiri, ikamari maerekati, kotxi !ipaxitari Apiananiri ūto, iarēka pakini. ²⁸ Ia komiri hinikini apisapanika, ia iākoanatxiākiri hiātini apisapanika, erekari hīxinikiniri hāxixinireē auakari.

Maerekati auakasaaki, hamanaāri Teoso imakatax-akiniri ūkapani. Eereka ia komiri hinika, ia iāriā hiāta.

²⁹ Maxikatīka hinikiniāri, hiātiniāri, ininiā hīteka akiri-

tari himisiritiko apokini, kotxi kona hīpaxitari Apiananiri ūto. ³⁰ Ikara xika itomaneri hīte sauaki iōkapeta. Ikara xika apanakini amianata. Ikara xika apanakini ipīpeka.

³¹ Amaerekani anitiniā, aamanainiāri Teoso makatax-akiniri amaerekani, ininiā amisiritiko kona apoka.

³² Txamari Apiananiri apokiniāri amaerekani, imisirita-ua ate uatxa, amaerekani atakanapini ūkapani, ininiā eereka !imisiritaikaua iua sākire mauīākanikata.

³³ Ininiā nitariakori, hāpotiitakasaakiaua Xesosi ipinini xinikiko kiiniriti ūkapani, hiātapanana apanakini. ³⁴ Hinatx-itiniā, hinipokotako hāpoko. Ininiā hāpotiitakasaakiaua !hīkamari maerekati, ininiā Teoso !imisiritai. Apikomoni nōtākikai ereē napokasaaki.

Erekari Matamatakoti Sikakiti Kākitimoni

12 Nitariakori, ninirekari himarotiniri Erekari Matamatakoti sikakiti. !Apakata himimarotakaniri.

² Mitxi Xesosi sākire mauīākani hinakasaakiaua, himisirienetaāka, ininiā hāuikari teoso kamakori masākireti teoso atāo inakari ininiua. Ikara himarotape. ³ Kākiti sāpiretiniāi hīte: "Maerekati kamakari itxaua Xesosi," ininiā iusaaki himarotari Erekari Matamatakoti !auari iuamoni. Kākiti sāpiretiniāi hīte: "Apiananiri itxaua Xesosi," ininiā iusaaki himarotari Erekari Matamatakoti auapitika iuamoni, kotxi ikara iua oerekakiti.

⁴ Erekari Matamatakoti siākiti ikini sereti aua, iuaritika Erekari Matamatakoti ātinoka aua. ⁵ Ikini sereti parīkatxi Teoso ūkapani aua, iuaritika Apiananiri ātinoka aua. ⁶ Ikini sereti Teoso kamakiti aua kākiti ūkapani, iuaritika Teoso ātinoka aua.

⁷ Erekari Matamatakoti iuaka oerekaua kākitimoni, ikinimane ereka inini ūkapani. ⁸ Iua Erekari Matamatakoti sikari apanakinimoni isākire kīkiterini ininiuana ūkapani. Iua Erekari Matamatakoti sikari apanakinimoni isākire kimarorerini ininiuana ūkapani. ⁹ Iua sikari apanakinimoni Teoso sākire iteene auikini-na ūkapani. Isikari apanakinimoni amianatakani imakananitinina ūkapani. Erekari Matamatakoti ātinoka aua, iuaritika ikini sereti isika kākitiimoni. ¹⁰ Apanakini isikaposotiireta posotiiretxi ikaminina ūkapani. Apanakini isikaimaroreta Teoso sākire isāpiretinina ūkapani. Apanakini isikaimaroreta Erekari Matamatakoti sākirauatakasaaki imarotinina ūkapani, maerekati matamatakoti sākirauatakasaaki imarotinina ūkapani apaka. Apanakini isikaimaroreta ikini sereti kākiti sākire isākiretinina. Apanakini isikaimaroreta ikara sākiretxi mimarotakoti ikenakotakasaakina, isāpiretinirina iua kenakotakani nino sākireē nino apaka imarotiniri ūkapani. ¹¹ Ātinoka Erekari Matamatakoti aua. Iuanokara parīkauata ikara atoko. Isikari ikara isikakiti kākitiimoni inireēkiti iaōka.

Kristo Ūto Pirena

¹² Kākiti ūto ātinoka aua, iuaritika aua ikii, ikanoke, iuako, itapike, ikiti, txaāpota. Itori ikara atoko inakari

aua itotxiā, iuaritika ātinoka itotxi aua. Iua atokokana itxa Kristo ito. Xesosi sākire auīākani Kristo ito atoko itxauana. ¹³ Atxiīti Xoteoakori atxaua. Atxiīti Xoteo minakaniua atxaua. Atxiīti nitiritxi amotakoni atxaua. Atxiīti nitiritxi minakatiua atxaua. Iuaritika ātika itotxi atoko atxaua, kotxi Erekar Matamatakoti ātinoka inakari apoka atemoni. Iua apotiitaua ātika itotxi atoko anini itkapani. Iua aua aākixinireē.

¹⁴ Kākiti ito ātinoka aua, iuaritika aua ikii, ikanoke, iuako, itapike, ikiti, txaāpota. Itotxiā kaiāopokori aua. ¹⁵ Ininiā !apakata kiitxi sāpiretiniā: "Uakōtxi !nitxaua, ininiā itotxiā auakari !nitxaua." Ikara atoko isāpiretiniā, iuaritika itotxiā auakaripitikara kiitxi. ¹⁶ Kenakokitxi sāpiretiniāri: "Okitxi !nitxaua, ininiā itotxiā auakari !nitxaua." Ikara atoko isāpiretiniā, iuaritika itotxiā auakaripitikara kenakokitxi. ¹⁷ Itotxi okitxinoka auiniā, kanatokopa itxa kākiti kenakorauatini? Itotxi kenakokitxinoka auiniā, kanatokopa itxa kākiti imixikarauatini? ¹⁸ Teoso kamari ikinika itotxiā auakari. Iua inireēkiti iaōka ikaminana ninoa. ¹⁹ Ātinoka itotxi auakiti auiniā, itotxi !auari. ²⁰ Itotxiā auakani itori aua, iuaritika itotxi ātinoka aua.

²¹ Okitxi kona posotari isāpiretiniari uakōtxi: "Kona nota nirekai pite." Apaka kiitxi kona posotari isāpiretiniari kiitxi: "Kona nota nirekai pite." ²² Kona ikara atoko itxa. Atxiīti auākatari āti aīto auakari !itxa, kotxi !katarari, iuaritika ikara mauakaniā, aīto !iparīkauata atāo. ²³ Kākiti taretari iītoā auakari poiāori kākiti atamatakiti. Ipatari apanakini iītoā auakari kākiti matakani itkapani. ²⁴ Aītoā auakari apiata apotxitakiti aua apaka. Kona apatari ikara. Apanakini aītoā auakari Teoso takari aītoā iteene apaxitini itkapani. ²⁵ Ininiā Teoso kamari itotxi ātinoka inini. Ikamari itotxiā auakani itiretakaniuana itkapani. Apanakini itotxiā auakari naiatiniāri apanakini iītoā auakari, !apakata. ²⁶ Āti itotxiā auakari tsiika. Iuasaaki ikinika kākiti ito atatsiirauata. Āti itotxiā auakari iuikaāka, ininiā ikinika itotxi auakini poxokoniuata.

²⁷ Kristo ito atoko hitxaua hīte. Itotxiā auakani atoko hitxaua Kristo itoā. ²⁸ Teoso sākire auīākani itotxiā auakani atoko itxauana. Ikini sereti parīkatxi aua itotxi itkapani akamini itkapani. Merepanika Teoso mereēri iua iokanatakini. Eereka imereēri kākiti Teoso sākire sāpiretakani. Eereka imereēri kākiti Teoso sākire oereēkani. Eereka imereēri kākiti Teoso posotiire oereēkani, amianatakani makananitakani, kākiti moianatakani, auītetxiakori, kākiti sākire apanakini mimarotakiniti sākiretakani pakini. Teoso takari ikara atoko inakani parīkauatakani iua sākire auīākani imoianatinina itkapani. ²⁹ Kona ikinimaneni Teoso iokanatakini txaua. Kona ikinimaneni Teoso sākire sāpiretakani txaua. Kona ikinimaneni Teoso posotiire oereēkani txaua. ³⁰ Kona ikinimaneni amianatakani makananitakani txaua. Kona ikinimaneni imarotari isākiretiniri kākiti sākire apanakini mimarotakiniti. Ikinimane liposotari isāpiretiniari ikara sākiretixi iua kenakotanimoni ninoa sākireē ninoa apaka imarotini itkapani. ³¹ Auapitika ikara Erekar Matamatakoti sikakiti

aparīkauatini itkapani. Iuaritika hinirekariko isikakiti apiaerekatakari. Uatxa noerekaiko isikakiti api-aerekatakari.

Tiraōkitxi Pirena

13 Atxiīti nimarotari ikini uāka sākire nisākiretini. Atxiīti nimarotari Teoso nitiriakori iaxitikini sākire nisākiretini, txamari iuasaaki nitiraōkiuatini !auari, ininiā !apakata nimarore. Metao āsokiko ene atoko nitxa. Ipi panera tore āsokiko ene atoko nitxa. ² Atxiīti nimarotari Teoso sākire nisāpiretini. Atxiīti nimarotari ikinipoko apanakini mimarotakiniti. Atxiīti ikinipoko imaroretxi aua notamoni. Atxiīti iteene nauikari Teoso posotiire, ininiā niposotari ōtanoxiratari nipaniātini ātiātaā isini. Txamari iuasaaki nitiraōkiuatini !auari, ininiā minakati nitxaua. ³ Atxiīti nisikari ikinipoko nitii, nitxineirote pakini matxineirotenimoni. Atxiīti nauiritari nīto arikiko. Txamari iuasaaki nitiraōkiuatini !auari, ininiā !apakata.

⁴ Pitiraōkiuatakasaaki, piposotari piātapiniri pinirekakiti apokini. Pitiraōkiuatakasaaki, pikamari erekar ātimoni. Pitiraōkiuatakasaaki, kona pixiketari āti. Pitiraōkiuatakasaaki, kona pisāpiretari apanakini piuikiniri pikamakiti. Pitiraōkiuatakasaaki, !piuikaua. ⁵ Pitiraōkiuatakasaaki, kona pitxīkitakari āti pētauatini. Pitiraōkiuatakasaaki, kona pinirekar piteka nireēkitinani. Pitiraōkiuatakasaaki, !katimari pomanākarauatini. Pitiraōkiuatakasaaki, !pixinikapinikari maerekati apanakini kamakiti pitemoni. ⁶ Pitiraōkiuatakasaaki, kona pipoxokoniuata āti kamakasaakiri maerekati. Pitiraōkiuatakasaaki, pipoxokoniuata atāo inakari pikenakotakasaaki. ⁷ Pitiraōkiuatakasaaki, pimīteenekari ikinipoko. Pitiraōkiuatakasaaki, pauikari kākiti sākire. Pitiraōkiuatakasaaki, pauikari kākiti kamaenetakiti ikamini. Pitiraōkiuatakasaaki, !katimari pitakanapiniri piparīka pikamini. ⁸ Tiraōkitxi !ixipoka. Txamari kākiti sāpiretakiti xipokapitikako. Kākiti sākiretiniri āti uāka sākire xipokapitikako. Kākiti imarore ereēkokapitikako. ⁹ Kotxi poiāonoka aimarore. Poiāonoka Teoso sākire aimarota asāpiretini. ¹⁰ Āti ōti aimarotari ikinipoko atāo inakari. Iuasaaki atāo minakati !auaika. ¹¹ Amarini ninakasaakiua, nisākirauata amarini sākirauatini atokokana. Iuasaaki nimarotakiti amarini imarotakiti atoko itxa. Nixinikakiti amarini xinikakiti atoko itxa iuasaaki. Txamari kikipe ninakasaakiua, !ninirekaikari amarini atokokana nininiua. ¹² Uatxa aātamatakiti Teoso oerekakiti !aposota iteene aātamatinini. Ātakaāri katxikoroā atamatakori atoko itxa aātamatakiti, Teoso oerekakiti. Āti ōti Teoso apisatoō aāpoka. Uatxa poiāonoka nimarota. Āti ōti Teoso apisatoō aāpokasaaki, nimarotari ikinipoko, Teoso imarotinino atokokana.

¹³ Ininiā aua ipi āti pakini erekar aākixinireē auakari. Aua Teoso sākire auikiko. Aua Teoso kamaenetakiti ikamini auikiko. Aua tiraōkitxi. Ikara tiraōkitxi api-aerekatakari.

Erekari Matamatakoti Siäkiti

14 Ininiã ikiniõtika hītiraõkiuatako. Hinirekariko Erekari Matamatakoti siäkiti. Apiata hinirekariko iua sikinii Teoso iokanapirena hīsāpiretini. ² Käkiti sākire mimarotakoti sākiretakari misākiretari Teoso. !Imisākiretari kākiti, kotxi kākiti !imarotari isākire. Erekari Matamatakoti posotiireē isāpiretari atão inakari Teoso oerekakiti. ³ Teoso sākire sāpiretakaripekana misākiretari kākiti. Iua txīkitakari kākiti apiata auikiniri Teoso sākire. Isikataparaxiniretana nino. Imīkapiritari ninoa ākixinire. ⁴ Käkiti sākire mimarotakoti sākiretakari, iuaka txīkitakaua apiata auikiniri Teoso sākire. Teoso sākire sāpiretakaripekana, txīkitakari ikinika Xesosi sākire auīākani apiata auikini rina Teoso sākire. ⁵ Erekari hīte hīkinika sākiretiniri kākiti sākire mimarotakoti. Iuaritika apiaerekata hīsāpiretiniri Teoso sākire, kotxi Teoso sākire sāpiretakari apiari itxaua. Käkiti sākire mimarotakoti sākiretakari poiãori itxaua. Iua sāpiretiniãri isākire kenakotakani ninoa sākireē ninoa apaka imarotiniri ũkapani, iusaaki erekari, kotxi iusaaki itxīkitakari Xesosi sākire auīākani apiata auikiniri Teoso sākire. ⁶ Hītemoni napokasaaki, nisākiretiniãri kākiti sākire mimarotakoti, nitxīkitakatai hīte apiata hāuikiniri Teoso sākire? Konapitini. Ininiã kona itxa. Noerekiniã Teoso oereēkiti notamoni, nisāpiretiniã Teoso imarore, nisāpiretiniã Teoso sākire, noerekiniã Teoso sākire atão hāuikini ũkapani, iusaaki nitxīkitakai hīte apiata hāuikiniri Teoso sākire. ⁷ Maxinikari xikari moianatakari atxīiti viorão, atxīiti xõkakori pakini. Käkiti mimatireni kaminiãri ikara, iusaaki xikari atão inakari !imarotaãka. Ienenoka aua.

⁸ Ātipekana noerekai. Trõpeta ene atão ininiã, sota toakori kenakotakasaakiri, aiamatana ineenamauatini ũkapani. Trõpeta ene na atão ininiã, sotatoakori !imarotari neenamtxi manapipe inini.

⁹ Iua atokokana kākiti sākire imarotakiti himasākiretakaniã, kiriãpa ninoa imarotari hīsāpiretakiti? Ikara atoko hīsākirauatiniã, maxikatĩka hīsākirauata. ¹⁰ Itori uãkati sākire aua ikini itixiti. Apakata ikinika imarotiko. ¹¹ Käkiti sākire nimimarotakaniã, ininiã notamoni iua āti tixinikiri atoko itxa. Apaka iuamoni nota āti tixinikiri atoko nitxa. ¹² Hīte iteene nirekari Erekari Matamatakoti siäkiti hāpakapini, ininiã apiata hinirekariko isikinii isikakiti Teoso sākire auīākani iua sākire iteene auikinina ũkapani.

¹³ Ikara atoko ininiã, erekari kākiti sākire mimarotakoti sākiretakari amanainiri Teoso isikaimaroretiniri iua sāpiretiniri isākire kenakotakani ninoa sākireē ninoa apaka imarotiniri ũkapani. ¹⁴ Teoso nimisākiretiniã kākiti sākire mimarotakotiã, nixinire misākiretari Teoso, txamari !imarotari notaka sākire. ¹⁵ Ininiã kipa atão nikamini? Ia atão: Nimisākiretari Teoso nixinireē. Apaka nimisākiretari Teoso nīkitekē. Nixikarauata nixinireē. Apaka nixikarauata nīkitekē. ¹⁶ Käkiti sākire mimarotakotiã hīsāpiretiniãri Teoso ereka inini, kākiti ereē pisākire mimarotakani sauaki, !iposotari “atãopi-

tikara” inini, kotxi !imarotari pisāpiretakiti. ¹⁷ Atxīiti atão hīsāpiretiniri Teoso ereka inini, txamari iusaaki kona pitxīkitakari iua kākiti apiata auikiniri Teoso sākire.

¹⁸ Peerekari Teoso, kotxi apiata isikaimaroretano nota nimisākiretiniri iua kākiti sākire mimarotakotiã. Poiãonoka hīte imarotari kākiti sākire mimarotakotiã himisākiretiniri iua. ¹⁹ Iuaritika, Xesosi sākire auīākanikata nauakasaaki, apiaerekata nisāpiretinina sīkonoka sākiretxi ninoaka sākireē, kotxi apakata nino imarotiniri nisākire. Niposotiniãri sīko mio sākiretxi kākiti sākire mimarotakotiã nisāpiretiniri kākiti, itori nisākire, iuaritika maxikatĩka nisākirauata, kotxi kākiti !imarotari.

²⁰ Nitariakori, !apakata himarore amarini xapitikiri imarore atokokana inini. Iuaritika amarini xapitikiri makamakaniri maerekati ātimoni, iua atokotxikana amarini xapitikiri atoko !hīkamapiri maerekati ātimoni. Aneēkari imarore atoko itxako hīte imarore. ²¹ Teoso sākire iõkatsopatakori txari:

Niokanatarini āti uãka hītemoni, hīte nimisākiretini ũkapani. Āti tixinikini sākireē nimisākiretai hīte. Iuaritika kona hīkīpitari nisākire, itxa Apiananiri.

²² Ininiã Teoso sākire auīākari sākiretiniãri Teoso sākire mauīākani sākire, iua mimarotakinini, Teoso sākire mauīākani iusaaki imarotari Teoso posotiire. Teoso sākire auīākari sāpiretiniãri Teoso sākire apanakini Teoso sākire auīākanimoni, ninoa iusaaki imarotari Teoso posotiire. ²³ Teoso sākire auīākani apotiitiniãua, ikinimane sākiretiniãri kākiti sākire mimarotakotinani, iusaaki kākiti Teoso sākire poiãopani ka imarotakari ũroiniã, Teoso sākire mauīākati atxīiti ũroiniã, ininiã iua uãkatai hīte mapitxiritakani hininiua.

²⁴ Txamari ikinimane sāpiretiniãri Teoso sākire iusaaki, Teoso sākire mauīākati ũroiniã, kākiti Teoso sākire poiãopani imarotakari ũroiniã, ininiã iua imarotari maerekati kamakari ininiua. Iusaaki imarotari imisiritiko auapitika āti õti. ²⁵ Iusaaki ikinimane imarotari iua xinikakiti ākixinireē. Ininiã iusaaki ikapotoreēkaua Teoso apisatoõ. Itxari: “Atãopitikara Teoso aua hīte sauaki,” itxa.

Käkiti Apotiitakasaakia Teoso Apisatoõ

²⁶ Nitariakori, kanatokopa itxa Teoso sākire auīākani apotiitakasaakia? Aãpotiitakasaakia, akinika aminari xikari Teoso ũkapani. Akinika iposope Teoso sākire aõerekini atão aimarotini ũkapani. Akinika iposope Teoso oerekakiti asāpiretini. Akinika iposope kākiti sākire mimarotakoti asākiretini. Akinika iposope iua sāpiretakiti asāpiretini ikinimane imarotiniri ũkapani. Ikara atoko itxa aãpotiitakasaakia Teoso apisatoõ. Iusaaki makamari ikinika, Teoso sākire Teoso nakitakori apiata auikini ũkapani. ²⁷ Iusaaki kākiti sākiretiniãri kākiti sākire mimarotakoti, ipinoka kākiti kamari ikara atoko inakari, atxīiti ipi āti pakini kamari ikara atoko inakari. !Apakata apikomoni kākiti sākiretiniri kākiti sākire mimarotakoti iusaaki. Āti sākirau-

atakasaaki, apanakini kenakotari. Ātinoka sākirauata iuasaaki. Isākirauataka atoko, āti sāpiretari isāpiretakiti isākire mimarotakani sākireē, isāpiretakiti imarotini-
na ūkapani. ²⁸ Iuasaaki isākire sāpiretakari mauakaniā, lapakata kākiti sākire mimarotakoti sākiretakari sākirauatini. Erekarī ākixinireē isākirauatini Teosokata.

²⁹ Kākiti apotiitakasaakia Teoso apisatoō, iuasaaki ipi, atxiīti ipi āti pakini Teoso sākire sāpiretakani sāpiretariko Teoso sākire. Iuasaaki apanakini xinikariko iua sāpiretakiti, atāo inini imarotini ūkapani. ³⁰ Topākakari xinikasaakiri apikomoni Teoso oerekakiti, ininiā iuasaaki sākirauatakari iotoka, Teoso oerekakiti topākakari sāpiretini ūkapani. ³¹ Ikara atoko ininiā ikini-
mane posotari Teoso sākire isāpiretinina. Teoso sākire sāpiretakani āti sākirauata, eereka āti sākirauata. Ikara atoko itxaāpotana. Ininiā ikinimane oerekaākakoko. Ikinimane sikataparaxiniretaākakoko. ³² Teoso sākire sāpiretakani posotari iātapiniri Teoso oerekakiti isāpiretini ūkapani. ³³ Kotxi Teoso kona potxitari ienenoka auini. !Apakata kaiāopokori sākirauatini, kotxi apanakini !imarotari ninoa sāpiretakiti. Neenamtxi atoko itxa. Teoso nirekarī inakitiakori kamakiti atāo inini apotiitakasaakia iua apisatoō.

³⁴ !Apakata sito sākirauatini hāpotiitakasaakia Teoso apisatoō. !Auiritaāka osākirauatini iuasaaki, kotxi Teoso sākire iōkatsopatakori paniātaro sito kaminiri kiki paniātakiti. ³⁵ Ninoa nirekiniāri ipimarauatinina imimarotakinini imarotininina ūkapani, ininiā ninoa pimaāna ūtanirina aapokona apokasaakina. Sito sākirauatiniā kākiti apotiitakasaakia Teoso apisatoō, kākiti pētaua-
ta oa sākirauatini xika.

³⁶ Hīte kona apokaerekatitari nisāpiretakiti? Atxiīti hīte kamari Teoso sākire? Konapitini. Atxiīti Teoso sākire iokanataāka hītenanimoni? Konapitini.

³⁷ Teoso sākire sāpiretakani hininiāua, Erekarī Mata-
matakoti siākiti auiniāi, ininiā iuasaaki himarotari ikara nisākire niōkatsopatakiti Apiananiri paniātakiti inini. Hīsāpiretariko hāuikiniri ikara. ³⁸ Himamaākatakaniāri ikara nisākire, apanakini !imaākatari hīte sākire.

³⁹ Ininiā nitariakori, iteene hinirekariko Teoso sākire hīsāpiretini. Apaka hāuiritariko kākiti sākire mimarotakoti sākiretiko. ⁴⁰ Ininiā hīkamariko ikinika atāo hāpotiitakasaakia Teoso apisatoō, Teoso sākire ikini-
mane kenakotini ūkapani.

Xesosi Ōkitikiniua Pirena

15 Nitariakori, uatxa iuaīkana ninirekarī hīte xinikiniri Teoso iokanapirena erekarī hītemoni nisāpiretakiti. Hīte apakapapekarī ikara nisāpiretakiti. Hīte iteene auikari ikara. ² Ikara Teoso iokanapirena erekarī oerekai himaerekani makatxakiko. Ininiā atāo hīxinikariko ikara nisāpiretakiti. Itene hāuikiniāri Teoso iokanapirena erekarī, himaerekani makatxakaāka. Atāo minakati hāuikiniā, ininiā maxikatīka hāuikari.

³ Nisāpiretipekai mitxi nota apakapakiti, kotxi ia himimarotakaniā !apakata. Ia napakapakiti: Kristo ipina amaerekani imakatkakini ūkapani. Teoso sākire

iōkatsopatakori sāpiretāua ikara. ⁴ Eereka ikataāka. Ipi ōti, āti ōtisaaki iuaīkana ōkitikāua. Teoso sākire iōkatsopatakori sāpiretāua ikara. ⁵ Eereka Petro atamatari iua. Eereka ikinika Kristo moianariakori atamatari iua. ⁶ Eereka kiētosi ātariakori atamatari iua āti ōti apotiitakasaakia. Kaiāopanikani ninoa auapanika. Ātika-
ka ipīpe. ⁷ Eereka Txiako atamatari iua. Eereka ikinika Xesosi iokanatakini atamatari iua. ⁸ Imapotōkire nota apaka atamatari iua. !Natamatari Xesosi ūkorapokoriti itīpokotakasaaki. Eereka iua apoka notamoni.

⁹ Xesosi iokanatakiti poiāori nitxāua. Apanakini iua iokanatakini apiata. Mitxi !erekarī nikamakiti, kotxi nimisiritana Xesosi sākire auīākani Teoso nakitīkari, iuaritika Xesosi akiritano iua iokanatakiti nininiua. ¹⁰ Teoso sikari ikinipoko erekari notamoni, ininiākara iua iokanatakiti kākitimoni nitxāua. Kona maxikatīkani isikari ikinipoko erekari notamoni, kotxi iteene nīparīkauata Teoso ūkapani. Apanakini Xesosi iokanatakini iteene parīkauata, iuaritika nota parīkauata apiata. Kona nota posotiireēni nīparīkauata. Ikinipoko erekari Teoso sikakiti notamoni sikaposotiiretano nota nīparīkauatini ūkapani. ¹¹ Atxiīti nota sāpiretai ikara Kristo sāpiretakiti. Atxiīti apanakini iua iokanatakini sāpiretai. Ikara Kristo sāpiretakiti ate sāpiretai. Ikara Kristo sāpiretakiti hīte auika.

Ipīkani Ōkitikiko Pirena

¹² Ate sāpiretai Kristo iuaīkana ōkitikiniua. Ininiā kinirepa ātikaka hīte txari ia? "!Auari ipīkani iuaīkana ōkitikiniua," hītxa. ¹³ Ipīkani iuaīkana ōkitikiniua mauakaniā, ininiā Kristo apaka kona ōkitikāua. ¹⁴ Kristo mōkitikakaniāua, ininiā maxikatīka asāpiretai iua sākire. Kristo mōkitikakaniāua, maxikatīka hāuikari iua sākire. ¹⁵ Kristo mōkitikakaniāua, na atāo asāpiretai Teoso kamakiti, kotxi ate sāpiretāpekai iua ōkitikiniri Kristo. Ipīkani iuaīkana ōkitikiko mauakaniā, Teoso kona ōkitikari Kristo. ¹⁶ Kotxi ipīkani iuaīkana mōkitikakaniāua, Kristo apaka kona ōkitikāua. ¹⁷ Kristo iuaīkana mōkitikakaniāua, maxikatīka hāuikari iua sākire, kotxi !imakatkakari himaerekani. ¹⁸ Kristo iuaīkana mōkitikakaniāua, ipīkani iua sākire auīākani pīpinanaka. ¹⁹ Xesosi mōkitikakaniāua, iuaritika ikiniōtika ate auikari iua sākire ūkorapokoriti aāuakasaaki, ininiā mīkiteni apiarini atxāua ate.

²⁰ Ikara na atāo. Uatxa maxinikari atāo inakari. Kristo ipīkaripeka ōkitikapeēkaika. Iua amātiiri merēpitipanika auakari atoko itxa. Iua merēpanika ōkitikāua, ininiākara aimarotari apīkasaaki ate apaka ōkitikāua. ²¹ Āti kiki kamakitiā ipīkitxi apaka ikinimanemoni. Iua atokokana āti kiki kamakitiā, ipīkani ōkitikiko apaka. ²² Adāo kamakitiā ikinimane ipina. Kristo kamakitiā iua sākire auīākani auapininiika ātipirika. ²³ Kākiti ōkitikaāka ia atoko. Kristo mitxi ōkitikāua. Iua merēpanika ōkitikakariua. Ikanapiriākasaaki iua nakitiakori ōkitikāuako apaka. ²⁴ Eereka itixi xipokaāka. Iuasaaki ikini-
ka auītetxi maerekati, ikinika kaposotiireri maerekati pakini ixipokako. Eereka ikinika iua nakitiakori isika iri Teosomoni. ²⁵ Kristo ikinimane auīte itxāuako. Iuasaaki

ixipokari ikinika imokaiakari posotiire, kotxi ikiti patapi itakana ninoa. ²⁶ Imokaiakari atoko itxa ipīkitxi. Imokaiakariakori ixipokasaaki, imapotōkire ixipokari ipīkitxi. ²⁷ Teoso sākire iōkatsopatakori txari:

Teoso takapekari ikinika iua kiti patapi. Ikara Teoso sākireē “ikinika” aua, iuaritika aimarotari iuaka !itakaua Xesosi kiti patapi, kotxi Teosora txīkitakari Xesosi ikinimane auite ininiua. ²⁸ Kristo ikinimane auite inakasaakiaua, iua Teoso ākiri auītetariko Teoso, kotxi mitxi Teoso txīkitakari iua ikinimane auite ininiua. Iuasaaki Teosonoka ikinimane auite itxaua.

²⁹ Ipīkani mōkitikakaniāua, kinirepa apanakini patxisataāka ipīkani ōkitikiniua īkapani? ³⁰ Atepekana, ipīkani mōkitikakaniāua, kinirepa ikinioṭtika amīteenekari monōkari? ³¹ Nitariakori, nimarotari ipīkitxi monōkari ikinioṭtika. Ikara nisāpiretai, kotxi niuikai hīte. Niuikai aūni auite Kristo Xesosikata. ³² Uai Épeso sitatxitiā kākiti ākiti kaneenamari atoko inakani nirekari imaīkinino nota. Ipīkani mōkitikakaniāua, kinirepa nimīteenekari ikara atoko inakari? Ipīkani mōkitikakaniāua, ininiā atxari:

Manipokota, maiāta, kotxi katana apinako.

³³ Kona hāuiritapiri āti misirienetini. Kākiti erekari moianatiniāri maerekati kamakani, ninoa txīkitakari iua maerekati kamakari ininiua. ³⁴ Himerekako. Himarotariko atāo inakari hīkamini īkapani. Maerekati !hīkamapinikako. Hīpētauatoko, kotxi apanakini hīte !imarotari Teoso.

Kākiti Īto Ōkitikasaakiaua

³⁵ Atxiiti āti txari: “Kanatokopa itxa kākiti ōkitikiko? Iuasaaki kanatokopa inakaripa iito?” itxa. ³⁶ !Kiīkiteri kākiti pimarauatini ikara atoko. Takariki, pimatakakaniāri kipatxi āki !ipitxaka. ³⁷ Pitakarau-atakasaaki, pitakari okinoka, atxiiti triko, atxiiti kimi. Takari aneēkari kona pitaka. Kona takariki atokoni itxa takari ipitxakasaaki. Ipitxere ipinimoni. ³⁸ Teoso kamari takari pitxere inireēkiti iaōka. Ikini takariki Teoso sikari ipitxere. ³⁹ Āti xinitxi kona āti xinitxi atokoni. Aua kākiti xini. Kaxipirini xini ipinimoni itxa. Kotipiriki xini ipinimoni itxa. Ximaki xini ipinimoni itxa.

⁴⁰ Aua iaxiti apiko nopinixiti auakani, aua itixi takote auakani apaka. Peereri ikinipoko, iuaritika iaxiti apiko nopinixiti auakani ipinimoni, itixi takote auakani ipinimoni. ⁴¹ Peereri atokatxi. Peereri kasiri apaka, txamari kasiri ātiāo. Peereri iōriki apaka, txamari iōriki ātiāo. Apaka āti iōriki āti iōriki atokotxikana !auari.

⁴² Iua atokokana itxa ipīkani iuaīkana ōkitikikosaaki. Ītotxi ixiti taākori !auaika. Iua ōkitikakori kona ipinaika. ⁴³ Ītotxi katikosaaki, !erekari. Ītotxi iuaīkana ōkitikikosaaki, peerekari. Ītotxi katikosaaki !kataparari. Iuaīkana ōkitikikosaaki, kataparari. ⁴⁴ Aīto katikosaaki, aīto itixi auakani ĩto atokotxikana. Aīto iuaīkana ōkitikikosaaki ātiāo aīto. Ītotxi ĩkorapokoriti aūni īkapani aua. Apaka aua ĩtotxi ipinimoni, Teoso sikakiti apīkasaaki. Ikara ĩtotxi !lipina. ⁴⁵ Teoso sākire iōkatsopatakori txari:

Teoso txīkitakari kiki merepitipanika auakari Adāo inakori auāki inini.

Adāo imatonōkari auakari, Kristo inakori, txīkitakari kākiti auāki inini, apaka imapinakani īkapani.

⁴⁶ Teoso nireēkiti axinikini kona apoka merepanika. Merepanika axinikari ateka nireēkiti, eereka axinikari Teoso nireēkiti. ⁴⁷ Kiki merepitipanika auakari kipatxi kamakori itxaua. Āti kiki Apiananiri, Teoso tixinekiri iua. ⁴⁸ Ikinimane kākiti itixi auakani, iua Adāo kipatxi kamakori atokokana. Ikinimane kākiti Teoso tixine sikani, Kristo Teoso tixinekiri atokokana. ⁴⁹ Apōnaniākasaaki, kipatxi kamakori aīto, Adāo ĩto atokokana itxa aīto. Iua atokokana Teoso tixinekiri ĩto, Kristo ĩto atokokana itxako aīto.

⁵⁰ Nitariakori, nisāpiretai hīte, !apakata kākiti ĩto, iarēka pakini sini Teoso auītetxi ininiātaāua. Ipinakari kona auapininiika !itxa. ⁵¹ Hīkenakotariko nisākire. Nisāpiretaiko kākiti mimarotakiniti mitxi. Kona ikinimaneni ipina. Iuaritika amakinika txīkitakaāka ipinipo aniniua.

⁵² Iuasaaki imapotōkire trōpetakero xōkaāka. Iuasaaki mēkokari katimari atoko itxa. Poki katimari matākaātini atoko itxa. Amakinika katimaritika txīkitakaāka ipinipo aniniua. Iua trōpeta xōkikosaaki, iuasaaki ipīkani ōkitikaāka. Kona ipinaikanako. Iuasaaki atxīkitakaāka ipinipo aniniua. ⁵³ Kotxi arakakani txīkitakaākako miarakakani ininiua. Ipīkani txīkitakaākako mipīkani ininiua. ⁵⁴ Arakakani txīkitakikosaaki miarakakani ininiua, apaka ipīkani txīkitakikosaaki mipīkani ininiua, iuasaaki Teoso sākire iōkatsopatakori apopeka. Ia atoko itxa Teoso sākire kitxakapirīka:

Ipīkitxi xipokaākako. Auape kāiatakari, ipīkitxi xipokakari.

⁵⁵ Ipīkitxi tsii !auaika. Maerekani misiritikoātaā anikakari kona kāiata.

⁵⁶ Ipīkitxi tsii mitxi aua amaerekani xika. Teoso paniātakiti iōkatsopatakori oerekaua amaerekani. Teoso paniātakiti iōkatsopatakori mauakaniā, !auari kākiti misiritiko. Txamari maerekanitxi tapara aua, kotxi Teoso paniātakiti iōkatsopatakori auapitika. ⁵⁷ Erekapitikari Teoso, kotxi aūite Xesosi Kristo txīkitakaua akāiatini.

⁵⁸ Ikara atoko ininiā, nitariakori nota tirketakini, kataparaxinire hītxako. Kona hāuiritapiri apanakini txīkitakinii maerekati hīkamini. Hīparīkauatoko ikinioṭtika Apiananiri īkapani, kotxi himarotari maxikatīka !hīparīkauata iua īkapani. Hīparīka īki hāpakapapitkako.

Txineiro Sikiko Xesosi Sākire Auiākani Īkapani

16 Uatxa nisāpiretai txineiro himaktxakini Teoso nakitiakori īkapani. Hīkamariko Karásia tixini auakani nipaniātini atokotxikana. Nipaniātana ninoa Teoso misākiretikoātaā apotiitakaniua ia atoko: ² Ikini Tomīko hīkinika hīte nīkataro txineiro ninoa īkapani. Txineiro Teoso siākiti iaōka, hinīkataro ipixini ninoa īkapani. Ininiā ereē napokasaaki apikomoni txineiro kona apotiitaāka. ³ Napokasaaki ereē, niokanataro kākiti, txineiro hīsikakito anikakani Xerosareēmoni. Hīsāpiretano hīokanatsopatakitiā himereēkini hītxineirote

anikakani ĩkapani. ⁴ Atxĩti erekari nota sini apaka, ininiã ninoa moianatano nota.

Paoro Paniãtakiti Pirena

⁵ Masetónia tixinimoni nisako, eereka napoka hĩtemoni, kotxi nisapitikako Masetóniamoni. ⁶ Iuasaaki atxĩti nikaikota hĩtekata. Atxĩti nikaikota mitaãsaaki hĩtekata. Ininiã eereka hĩte posotari himoianatinino nota naiamatakasaaki apikoxiti nisini ĩkapani. ⁷ Kona ninirekari mapaõtinoka nikaikotini hĩtekata uatxa. Api-ananiri auiritiniãno, ninirekari apikomoni nikaikotini hĩtekata. ⁸ Txamari nikaikota uai Épeso sitatxiti Pētekósitxi kiiniriti manapi õti. ⁹ Kotxi uatxa kaiãopokori kãkiti ĩkorapokoriti auakani nirekari nisãpiretiniri Teoso iokanapirena erekari ninoamoni. Txamari kaiãopokori kãkiti ĩnirekano.

¹⁰ Atxĩti Tximótxio sari hĩtemoni, ininiã hãpakapariko iua, imapĩkarauatakani ĩkapani hĩte sauaki, kotxi iua parĩkauata Apiananiri ĩkapani nota parĩkauatini atokokana. ¹¹ Ininiã kona apakata kãkiti ma-maãkatakaniri iua. Ikanapiriãkasaaki notamoni, iuasaaki hĩokanataru iua erekaxinire inini. Niãtapari iua aĩtariakorikata.

¹² Iteene ninirekari aĩtari Aporo apokini hĩtemoni aĩtariakorikata. Txamari uatxa ĩnirekari isini hĩtemoni, iuaritika iposotakasaaki isapitikako hĩtemoni.

¹³ Araõkire hĩtxako. Iteene hãuikariko Teoso sãkire. Hĩtaparaxinireritika hãuako. Hĩtapararitika hãuako Teoso ĩkapani. ¹⁴ Xesosi tiraõkiã ĩkinipoko hĩkamako.

¹⁵ Hĩte imarotari Esitépana, inirimane pakini. Ninoa Akaia tixini auakani. Iuaãtaã ninoa merepitipanika auikari Xesosi sãkire. Ninoa iteene parĩkauata Teoso nakitiakori ĩkapani. Nitariakori, iteene nipaniãtai hĩte.

¹⁶ Hĩkamariko kãkiti ikara atoko inakani paniãtakiti. Hĩkamariko ĩkinimane amoianari paniãtakiti, atekata parĩkauatakani paniãtakiti. ¹⁷ Esitépana, Potonato, Akaiko pakini apokasaaki uai, nipoxokoniua, kotxi iminarina notamoni mauakati hĩte masikakiniti. ¹⁸ Ninoa sikapoxokonitari nãkixinire, hĩte ãkixinire apaka. Erekari ate iuikiniri kãkiti ikara atoko inakani.

¹⁹ Teoso misãkiretikoãtaã apotiitakaniua Ásia tixini auakani xinikamanapitai hĩte. Ákira inakori, Pirsira inakoro pakini iteene xinikamanapitai hĩte, kotxi Api-ananiri nakiti hĩtxaua. Apaka Xesosi sãkire auĩãkani ninoa aapoko apotiitakaniua xinikamanapitai hĩte.

²⁰ ĩkinimane aĩtariakori uai auakani xinikamanapitai hĩte. Haõkitakakasaakiua, himaratakakauako, kotxi Teoso nakitiakori hĩtxaua.

²¹ Nota Paoro iõkatsopatari ia nitakapiretanapini niuakoã. ²² Kãkiti matiretakaniãri Apiananiri Xesosi Kristo, maerekati takaãka iua nopini.

“Apiananiri, uai pina atemoni,” atxari Xesosi.

²³ Apiananiri Xesosi Kristo sikari ĩkinipoko erekari hĩtemoni. ²⁴ Nitiretai hĩte hĩkinika, kotxi Kristo Xesosi nakitiakori atxaua. Ameẽ.

2 Korīto

1 Nota Paoro, Xesosi Kristo iokanatakitino. Teoso nirekari iokanatinino kākitemoni isākire nisāpiretini ūkapani. Ia aātsopa niōkatsopata. Aītari Tximótxio aua notakata. Ia iōkatsopari niokanata kākiti Teoso mereēkinimoni, Korīto sitatxiti auakanimoni. Apaka ia iōkatsopari niokanata kākiti Teoso nakitiakorimoni, Akaia tixini auakanimoni. ² Aīri Teoso, Xesosi Kristo Apiananiri pakini sikari ikinipoko erekari hītemoni. Ika-maerekaxiniretai hīte.

Teoso Mīkapiritiniua Pirena

³ Peerekari Teoso. Aāuīte Xesosi Kristo iri itxaua. Kaa-monīkareri iua. Āti kākiti amonīkakari iua atoko inakari lauari. Amaerekaxinirensaaki, iua atekata aua. Amaerekaxinireni imaktxakinaua. Iuasaaki imīkapiritaua. ⁴ Imīkapiritaua amaerekaxinirensaaki, ininiā apanakini maerekaxinirensaaki, iua atokotxikana ate mīkapiritana ninoa apaka, kotxi aimarotari Teoso mīkapiritiniua ate. ⁵ Kristo iteene misiritaāka, ininiā ate misiritaāka apaka. Iua atokokana Teoso moianatari Kristo, ininiā iua moianataua ate apaka. ⁶ Apanakini misiritaua, kotxi anirekari Teoso mīkapiritinii hīte. Anirekari Teoso makatxakiniri himaerekani. Teoso mīkapiritaua ate, ininiā hīte apaka imīkapirita. Teoso mīkapiritakasaakii hīte, isikataparatai himisiritiko hīpoxokoniritika himīteenekini ūkapani. Hīte misiritiko ate misiritiko atokokana. ⁷ Aimarotapitikari erekari Teoso sikinii hīte, kotxi himisiritaāka ate misiritiko atokokana, ininiā Teoso mīkapiritai hīte, ate imīkapiritini atokokana.

⁸ Aītariakori, anirekari hīxinikiniri ate misiritiko Ásia tixini aāuakasaaki. Iuasaaki iteene amaxikaāka. Kona amīteenekari. Auākatari aōkiko. ⁹ Iuasaaki aākixinireē atxa: “Apinapitikako,” atxa. Ikara atoko ininiā, aimarotari kona ate posotiire lauari. Aimarotari Teosonoka sikataparataua, kotxi iua posotari ōkitikiniri ipīkari. ¹⁰ Pamōnōkoniri iuasaaki, iuaritika Teoso makatxakaua amapinakani ūkapani. Iua makatxakapanikaua amapinakani ūkapani. Ate auikari iua sākire, iuaīkana imaktxakininiua tīkane. ¹¹ Hīte moianataua ate, kotxi himisākiretari Teoso ate ūkapani. Ininiā Teoso kamari hamanaākiti iaōka, kotxi Teoso kamari erekari atemoni. Eereka kaiōpokori kākiti sāpiretari Teoso iua ereka inini, kotxi ikamari ninoa amanaākiti iaōka ate ūkapani.

Paoro Masikani Korītmoni

¹² Ate pōxokoniuata, kotxi ate kamari erekarinoka Teoso oerekakitinoka, kākitemoni, hītemoni apaka. Atāonoka anireka akamini kākitemoni. Aimarotari ikara aākixinireē, ininiā apoxokoniuata. Ikara atoko aāuini, kotxi ikinipoko erekari Teoso sikakiti sikataparataua. Kākiti imaroreē liposotari ikaminiri iua auini ereka inini, kotxi !kīīkiteri kākiti. ¹³ Hātatsopatakasaakiri aiōkatsopatakiti hītemoni, himarotari axinikakiti aākixinireē. Axinikakiti, asākire pakini ātinoka itxaua. ¹⁴ Hīte na iteene imarotapanikaua ate, iuaritika ninirekari hīuikininiua ate, Apiananiri Xesosi uai ikanapiriini ōtisaa-ki, ate iuikinii atokotxikana.

¹⁵ Ikara nimarota, ininiā ninirekamari hītemoni nisini, ipikata hīpoxokoniuatini ūkapani. ¹⁶ Masetōnia tixinimoni nisini apisapanika, ninirekamari hītemoni nisini. Eereka nikanapiriākasaaki uaimoni, ninirekamari hītemoni iuaīkana nisini, ininiā iuasaaki ninirekamari hīte iokanatinino nota Xotēia tōpamoni. Txamari na nisa. ¹⁷ Atxīīti hīte txano nota: “Pixinikasaakiri uai papokini, na iteene pinirekari uai papokini,” hītxano. Txamari ninirekapitikari napokini hītemoni. Na nota xinikari Teoso sākire mauīākani xinikakiti atoko, kotxi ninoa sākire: “Ari, nisapitika,” txamari ākixinireē itxana: “Na nisapani,” itxana. ¹⁸ Nota sākire hītemoni ninamaā: “Ari nisapitika,” ninakasaaki, nākixinireē apaka txari: “Ari, nisapitika,” nitxa. Teoso atāonoka sākirauatakari imarotari ikara nisākire atāo inini. ¹⁹ Sírasi inakori, Tximótxio inakori, nota pakini sāpiretapekai hīte Teoso ākiri, Xesosi Kristo sākire. Xesosi sākire inamaā auakari, isākire ākixinireē auakaritxikana isākireta. “Nikamapitikariko,” inakasaaki, ākixinireē inirekapitikari ikaminiri. Ikamari isākire iaōka. ²⁰ Teoso sikaenetakiti kākitemoni kaiōpokori aua. Iua Kristo sikaua ikinipoko Teoso sikaenetakiti, ininiākara atxari: “Ameē.” Peerekari Teoso, kotxi Kristo sikapitikaua Teoso sikaenetakiti. ²¹ Teosokara sikataparaxiniretai hīte, ate apaka, Xesosi Kristo amatakanapanani ūkapani. Teosokara mereēua iua nakitiakori aniniua ūkapani. ²² Apaka Teosokara sikaua Erekari Matamatakoti, Teoso nakiti aniniua aimarotini ūkapani. Iua Erekari Matamatakoti aua aākixinireē. Teoso takaōtxikare itxaua iua. Iua Erekari Matamatakoti merepitipanika Teoso sikakiti atemoni, ininiā aimarotari apikomoni isikapanikaua itanapoko inīkatakiti ate ūkapani. ²³ Kona nisari hīte Korīto sitatxiti auakanimoni, kotxi kona ninirekari hīte matinaniuatini hīte maerekani

nisāpiretini xika. Teoso imarotari ikara atāo inini.
²⁴ Hīauīte kona ate txaua. Kona apaniātai: “Ia atoko inakari hāuika. Kona ikara atoko inakari kona hāuikape.” Kona ikara atoko !atxai hīte, kotxi hīte auikapitikari Teoso sākire atāo inakari. Aparīkauata hītekata hīpoxokoniuatini īkapani.

2 Nākixinireē nitxari: “Na nisa iuaīkana ninoamoni nikamamatinanitinina īkapani.” ² Nota xika maerekaxinireninoka hininiā, kiripa kamapoxokinitano nota? Hītenoka aua nota kamapoxokonitakani. Ininiā kona nota nirekari maerekaxinireni hinini nota xika. ³ Kona ninirekari hītemoni napokini, maerekaxiniretikano ninini, hīte maerekani xika, ininiākara nota iokanatsopatarī īkora mitxi niōkatsopatakiti hītemoni ereē napokini apisapanika. Kotxi nikamapoxokonitakini hītxaua hīte. Nimarotari ia. Nota nienenīkasaaki, hīte himakinika enenīka apaka. ⁴ Niokanatsopatarī īkora niōkatsopatakiti hītemoni, kotxi himaerekani xika maerekaxiniretinoka nitxa. Nitxiapata. Niokanatsopatarī īkora niōkatsopatakiti hītemoni, iteene nitiretinii himarotini īkapani. Na ninirekari nikamamatinanitinii.

Maerekanitxi Maxinīkaretiko

⁵ Iua kiki maerekati kamakari maerekaxinireti txīkitakano. Iua apia maerekaxinireti txīkitakai hīte, maerekati ikamini xika. Na iteene ninirekari nitxitiniri iua. ⁶ Uatxa atokopeka homanatiniri. Iua txitaākapeka imaerekani xika. ⁷ Uatxa himaxinīkaretariko maerekati ikamakiti, ininiā hāpakapariko iua. Himisākiretariko iua. Hīkamapoxokonitari iua. Ikara atoko himinakanaiāri, iua kona erekaxinireri. Ikara atoko himinakanaiāri, atxiīti itakanapari Teoso kimapora. ⁸ Ininiākara nota ōtākikai hīte nitapararitika. “Atiretapiatikai,” hītxariko iua, hītiretiniri imarotini īkapani. ⁹ Ininiā mitxi niokanatsopata hītemoni, kotxi iuaasaaki nataerekatai hīte. Ninirekari nimarotiniri, hīkīpitatarī nōtākikinii atxiīti? ¹⁰ Himaxinīkaretakasaakiri maerekati āti kamakiti, nota apaka maxinīkaretari. Maerekati āti ereē kamakiti auiniā, nimaxinīkaretari, kotxi nitiretai hīte. Kristo nirekari nimaxinīkaretiniri maerekati ikamakiti. ¹¹ Axinikasaakiri maerekati āti kamakiti, akamari Satanasi nireēkiti. Ininiākara !akamari Satanasi nireēkiti. Paimatireri iua. Inirekari akerokiniri. Aimarotari iua nireēkiti, ininiā apia imatirerini matxaua.

Txito Paoro Nitini

¹² Tóatxi sitatxiti napokasaaki Kristo iokanapirena erekari nisāpiretini tīkane, kākiti iuaā auakani nirekari nisākire imarotinina, kotxi Apiananiri sikanireōtana nisākire imarotinina īkapani. ¹³ Iuaritika !erekaxinireno, kotxi ninitapiimari aītari Txito inakori. Kona napokari. Ininiā nitakapiretanapana kākiti iuaā auakani: “Ereēpiko. Masetónia tixinimoni nisako,” nitxana.

Kamariāro Atoko Atxa

¹⁴ Peerekari Teoso kamakiti ate īkapani. Kristo nakiti aniniāua, Teoso txīkitakaua ātipirika akāiatini, ikini-mane imarotini īkapani. Teosokata akāiata. Teoso paniātaua Kristo pirena imarotiko ikini tōpati iaripiretini, kamariāro iarikatxiātini atokokana Kristo pirena iaripiretini īkapani. ¹⁵ Kristo sikaua Teosomoni, ininiā Teoso apokaerekataua, kotxi kamariāro arikiko Teoso īkapani atokokana atxa. Kamariāro arikasaaki omari samariāpota ikini tōpati. Iua atokokana asaāpota kākitemoni, kākiti apokakonimoni, kākiti pīpinanaākanimoni apaka. ¹⁶ Kākiti pīpinanaākanimoni kanaiatxiāri atoko atxa, kotxi asāpiretana Kristo sākire imauikakaniāna, ipinana. Kākiti Teoso apokakinimoni kamariāro eretxiāro atoko atxa, kotxi asāpiretana Kristo sākire auikiniāna, auapininiika itxanako Teosokata. Kiripa posotari ikara atoko inakari parīkatxi ikamini Teoso īkapani? ¹⁷ Ate posotari Teoso īkapani aparīkauatini, kotxi kona apanakini atokoni !atxa ate. Kaiāopokori kākiti sāpiretari Teoso sākire txineiro apakapini īkapani. Ninoamoni Teoso sākire tiitxi vētxitiko atoko itxa. Kona ikara atokoni !akama, kotxi Teoso iokanataua ate kākitemoni. Teoso atamataua, ininiā atāonoka asākirauata, kotxi Kristo nitiriakori atxaua.

Iōkatsopari Atoko Hītxa

3 Atxiīti iuaīkana ate sāpiretatarī erekari akamakiti asākire hāuikini īkapani? Atxiīti hinirekatari apanakini iōkatsopatiniri erekari ate kamakiti ate sākire hāuikini īkapani? Atxiīti ate nirekatari apanakini iōkatsopatiniri erekari hīte kamakiti hīte sākire ate auikini īkapani? Apanakini kamari ikara atoko. Ate kona kamari ikara atoko. ² Kona ninirekari iōkatsopari ikara atoko inakari, kotxi iua iōkatsopari atoko hītxa hīte. Ate ākixinireē iōkatsopari atoko hītxa. Ikinimane atatsopatarī ikara iōkatsopari, ininiā imarotarina erekari hīte kamakiti. ³ Iōkatsopari Kristo iōkatsopatakiti ate mīkiti atoko hītxa. Kona txītaā iōkatsopataāka. Erekari Matamatakoti Teoso Mapinakati iōkatsopatarī. Kona aātsopaā iōkatsopataāka. Kākiti ākixinireē iōkatsopataāka.

⁴ Ikara atoko atxai hīte, kotxi iteene aimarotari Teoso, Kristo nakitiakori aniniua. ⁵ !Kimaroreua ate. Ateka !aposotari aparīkauatini Teoso īkapani. Teosora sikaposotiiretaua. Isikari imarore atemoni. ⁶ Isikaposotiiretaua Teoso īkapani aparīkauatini īkapani, isākire amaneri kākiti asāpiretini īkapani. Ikara isākire amaneri oerekaua Erekari Matamatakoti aākixinireē auini. Isākire amaneri !oerekaua ipaniātakiti iōkatsopatakori Moisesimoni isikakiti. Ipaniātakiti iōkatsopatakori Moisesimoni isikakiti paniātari kākiti ipinini imaerekani xika. Erekari Matamatakoti aākixinireē auiniā, itxīkitakaua aāupininiika anini.

Teoso Parīka Amaneri

⁷ Teoso paniātakiti tesi pakini iōkataāka kai nopini. Teoso sikasaakiri ikara Moisesimoni, Teoso iotximere iteene aua. Moisesi toō iusaaki apakapari Teoso iotximere. Iteene iotximere aua Moisesi toō, ininiā kākīti Isaeo auakani kona posotari atamatiniri. Iotximere poiāōpotakasaaki, !iposotapanikarina itoō atamatinina. Ininiā Teoso iotximere auakasaaki, isākire iōkatakori apoka itiximoni kākīti ipinini ūkapani. ⁸ Uatxa iua Erekarī Matamatakoti txīkitakari kākīti ātipirika aui-ni ūkapani, ininiā uatxa Teoso parīka apiata. Peerekari ikara iparīka. ⁹ Peerekari Teoso parīka ipaniātakiti iōkatakori kākītimoni isikasaaki, txamari iusaaki oerekari kākīti misiritiko imaerekani xika. Uatxa Teoso parīka apiaerekata, kotxi Kristo kamaerekatari kākīti. ¹⁰ Uatxa Teoso parīka apiata. Peerekari. Iotximere apitari atoko itxa, ininiā iua parīka kitxakapirīka iotximere napakari atoko itxa. ¹¹ Kitxakapirīka Teoso parīka ipaniātakiti iōkatakori isikasaaki peerekari, txamari ikara Teoso parīka xipope. Ūkorasaaki iparīka kākīti ikamaerekatini !ixipoka, ininiā apiaerekata. ¹² Ia Teoso parīka !ixipoka, ininiā ataparaxinireritika asākiraauata. ¹³ Moisesi atoko !atxaua, kotxi iua ipatoōtaua mākaxi mataā, itoō iotximere Isaeo auakani matamatakani ūkapani. Itoō iotximere poiāota, iuaritika !iposotarina atamatinirina. ¹⁴ Moisesi ipatoōtinia atokokana ninoa Isaeo auakani oki ipataāka, kotxi !imarotarina atāo Teoso nireēkiti. Uatxapiima okina ipataākapanika atatsopatakasaakirina Teoso sākire iōkatsopatakori, Xesosi apokini apisapanika auakari sākiretxiti. !Imarotarina Teoso nireēkiti. Kristo sākire auikikosaaki, iua ipatoōtiko makatxakaāka, ininiā iusaaki kākīti imarotari Teoso nireēkiti. ¹⁵ Ūkorasaaki apaka Moisesi iōkatsopare atatsopatakasaakina, !imarotarina. Okina ipataākapanika. ¹⁶ Kākīti akiritakasaakiri Apiananiri, ipatoōtiko makatxakaāka. ¹⁷ Erekarī Matamatakoti itxaua Apiananiri. Erekarī Matamatakoti auiniā aākixinireē, !aparīkauataika amaerekani makatxakiko ūkapani, kotxi Xesosi makatxakapekari amaerekani. ¹⁸ Xesosi sākire auīākani atxaua, ininiā atoō kona ipataāka. Ātakaāri atoko atxaua. Kākīti atamatakasaakiua ate, atamatari Apiananiri iotximere. Apiananiri Erekarī Matamatakoti aākixinireē txīkitakaāpotaua ikara atoko aniniua, ininiā apiaāpota aiotximere.

Teoso Iokanapirena Erekarī Pokamara Atoko Itxa

⁴ Teoso amonīkaua ate, ininiā iua paniātaua ia parīkatxi akamini, iokanapirena erekarī apanakini-moni asāpiretini. Ikara atoko ininiā, isikataparaxiniretaua, ininiā !anirekarī atakanapiniri ikara parīkatxi. ² Kākīti kipatari ikamakiti, maerekati ikamakasaaki, kotxi ipētauata. Ikara atoko inakarī maerekati !akamai-ka. Atakanapapekari. !Amisirienetari kākīti. Kona akoketari ate sākire Teoso sākirekata. Teoso kenakotari asākire, ininiā atāonoka asākire, ininiā kākīti ākix-

inireē imarotari akamakiti atāo inini. ³ Kākīti mimarotakanisaakiri Teoso iokanapirena erekarī asāpiretakiti, kākīti pīpinanaākari atoko itxa. ⁴ Kākīti pīpinanaākari !imarotari Teoso iokanapirena, kotxi kākīti teosone, Sathanasi inakori, ipatari ninoa oki, ininiā !atamatarina pokamara ninoa iopiniākari. Teoso iokanapirena erekarī pokamara atoko itxa. Peerekari ikara Teoso iokanapirena. Iua erekarī pirena sāpiretari Kristo Apiananiri ininiua, kotxi Teoso itxaua. ⁵ Ate kona sāpiretari kākīti ateka pirena. Ate sāpiretari Xesosi Kristo Apiananiri ininiua. Ate hīte nitiriakori atxaua, kotxi Xesosi nirekarī hinitiriakori aniniua. ⁶ Kitxakapirīka ipiānoka auakasaaki, Teoso txari: “Piopinikaxitita.” Iusaakipeka iopinikaxitita. Iua Teosotxikana iopinikari aākixinire. Ikara iopinikare kamaimaroretāua Teoso Apiananiri kaiotximereri ininiua. Kristo aātamatakasaaki, aātamatarī Teoso iotximere.

Xesosi Sākire Auiākani Misiritiko

⁷ Kopiti maikoti atoko atxaua, kotxi atapara !auari. Iuaritika atemoni auari Teoso iokanapirena erekarī katireri. Ininiā aimarotari Teosonoka kaposotiireri, kataparari ininiua. Atepekana !aposotari. Atapara !auari. ⁸ Asinimoni amaxikakini aua, iuaritika !okaua ate. Atx-iiti laimarotari akamakiti tīkane, iuaritika kona aiotokakari Kristo sākire aūiukini. ⁹ Amisiritiko aua, iuaritika Teoso kona takanapaua ate. Atxīiti akarotaāka, iuaritika kona aōkaāka. ¹⁰ Ikiniōtika aīto okiko monōkoni aua Xesosi sākire aūiukini xika. Xesosi atatsiirauata. Ipina. Iua atokotxikana ate atatsiirauata. Atx-iiti aīto ipina iua sākire aūiukini xika. Xesosi auapika, kotxi ipīpe, eereka ōkitikaua, ininiā iua atokokana aīto auapika. ¹¹ Auapanika anakasaaki, aōkiko monōkoni aua Xesosi sākire aūiukini xika. Aīto ipinapitikako, iuaritika aūapanika, kotxi Xesosi auapanika. ¹² Xesosi iokanapirena asāpiretini xika, apanakini nirekarī okiniua ate. Xesosi iokanapirena asāpiretakasaakii, hīte auikari, ininiā hīte auapika himaxipokakani.

¹³ Teoso sākire iōkatsopatakori txari:

Nota auikari Teoso sākire, ininiā nisāpiretari kākīti. Iua atokotxikana ate auikari Teoso sākire, ininiā ate sāpiretari kākīti. ¹⁴ Teoso ōkitikari Apiananiri Xesosi, iuaīkana auini ūkapani, ininiā aimarotari Teoso ōkitikiniua ate apaka, iuaīkana aūiukini ūkapani. Eereka Teoso anikauako ate hītekata Xesosi aaōkitini Teoso apisatoō. ¹⁵ Amīteenekari ikinipoko amisiritiko Xesosi sākire hītemoni asāpiretini ūkapani. Kākīti apikomoni, apikomoni, txaāpota apakapari ikinipoko erekarī Teoso sikakiti, ininiā ninoa kākīti kaiāopokori txari Teoso: “Erekapitikari pisikakiti notamoni.” Ikara atoko ininiā, kākītipokoni txari: “Peerekari Teoso,” itxako.

Maerekaxinireni !Atxaua

¹⁶ Ininiākara maerekaxinireni !atxaua. Aīto xipokaāpota, iuaritika aākixinire ikiniōtika apiata-paraāpota. ¹⁷ Ūkorasaaki amaxikiko auapitika Xesosi

sākire aūuikini xika. Kona okanani aua amaxikiko. Eereka Teosokata ātipirika aūuapika, kotxi aūuikari isākire. Peerekari iuasaakiko. !Axinikaikari mitxi amaxikiko, kotxi iuasaakiko peerekari. ¹⁸ Kona amaākatari aātamatakiti. Amatamatakiniti axinika. Atamatakori xipokako. Matamatakoti kona xipoka.

Aūuapoko Teoso Tixineē

5 Īkorapokoriti aūuakasaaki, aīto aūuapoko itxaua aākixinire ĩkapani. Āti ōti aīto xipoka. Ixipokasaaki, Teoso sikari ātiāo aūuapoko. Iua aīto isikaua, itixine aāpokasaaki. Iua aīto kona xipokaika. Iua aūuapoko kona uakōtxiā kamakorini. ² Īkorasaaki aātsiirau-atakasaaki, atxari: “Ninirekari ātiāo niīto, niīto Teoso sikakiti itixine napokasaaki.” ³ Anirekari ātiāo aīto, ininiā maītotika !atxaua. ⁴ Īkorasaaki ia aīto auapanika inakasaaki, aātsiitari katsiiri. Kona kataparari ia aīto. Anirekapitikamari aīto. Anirekari ātiāo aīto, ininiā aīto maxipoākati makatxakari aīto xipoākari. ⁵ Teoso kamari aīto maxipoākani ĩkapani. Isikapanikauako aīto ikara atoko inakari. Aimarotari ikara atāo inini, kotxi isikapekari Erekari Matamatakoti atemoni. Ipxixini Teoso sikaenetakiti isikapekauti, ininiā apikomoni isikaenetakiti isikapitikauako.

⁶ Ininiā kataparaxinirepitikaua ate. Aimarotari aūuapoko ia aīto ininiāua, kona aāpokapanika Api-ananiri tixinemoni. ⁷ Xesosi sākire auikiko oerekaua atāo aūuini tīkane. Aōkinoka kona oerekaua atāo aūuini tīkane. ⁸ Kataparaxinirepitikaua ate. Kona ate pīkari apinini. Apiaerekata apinini, kotxi iuasaakiko Api-ananirikata aūu. ⁹ Anirekari amiinitiniri Apiananiri, ia aīto āki aūuakasaaki, ia aīto xipokasaaki apaka. ¹⁰ Āti ōti ate amakinika sariko Kristomoni. Iuasaaki Kristo sāpiretaua aparīka ĩki. Iua imarotari ikinipoko akamakiti ia aīto āki aūuakasaaki. Atxiīti akamari erekari. Atxiīti akamari maerekati. Akamakiti iaōka isikaua aparīka ĩki.

Kākiti Mikanapiriīko Teosomoni

¹¹ Aimarotari Apiananiri katapara inini, kotxi imisiritari kākiti imaerekani xika. Ininiā asāpiretari kākiti auikiniri iua sākire. Aparīkauata, iua sākire kākiti auikini ĩkapani. Teoso iteene imarotaua. Imarotari axinikakiti aākixinireē. Ninirekari hīte apaka iteene imarotiniua ate hākixinireē. ¹² Kona ate nirekari iuaīkana asāpiretinii hīte ereka anini. Anirekari asāpiretinii, apakatapitika hīuikinua ate, kotxi atāonoka akama. Ikara atoko inakari himarotiniā, himarotari kākiti hāpakapapiretini, ninoa misākirepiretakasaakia ate. Ninoa kākiti ate misākirepiretakani iuikari atamatakorinoka. Kona imaākatari kākiti ākixinire ereka inini. ¹³ Atxiīti kākitimoni kona kiīkiteua ate. Ikara atoko atxa Teoso ĩkapani. Atxiīti paīkiteua ate. Ikara atoko atxa hīte ĩkapani. ¹⁴ Kristo iteene tiretaua, ininiākara anirekari iua nireēkiti akamini, kotxi aimarotari iua ipina ikinimane ĩkapani, kotxi ikinimane ipīkani atoko itxauana. ¹⁵ Kristo ipina ikinimane kākiti ĩkapani, kākiti mapinakani ĩkapani, kākiti ātipirika auini ĩkapani. Ininiā iua kākiti kona

kamaikariko iuaka nireēkiti ikiniōtika. Ikamariko Kristo nireēkitinoka, kotxi Kristo ipina iua ĩkapani. Iuaīkana ōkitikapekauti.

¹⁶ Ininiā uatxa !axinikaikari kākiti ĩkorapokoriti auakani xinikakiti atokokana. Mitxi axinikari Kristo ninoa xinikiniri atoko. Uatxa !axinikaikari Kristo ninoa xinikiniri atoko. ¹⁷ Kristo sākire auīākari ākixinire amaneri itxaua. Mitxi maerekati ikamakiti kona ikamai-ka. Amanerinoka ikama. ¹⁸ Ikara atoko inakari Teosora kaminua. Mitxi amokaiakari atoko itxa Teoso, iuaritika imikanapiriāua ate iuamoni, kotxi Kristo ipina ate ĩkapani. Ipaniātaua ate asāpiretiniri ikinimane kākiti, Teoso nirekari imikanapiriinina ninoa iuamoni. ¹⁹ Teoso mikanapiriāri kākiti ikini itixiti auakani iuamoni, kotxi Kristo ipina kākiti ĩkapani. Teoso mikanapiriākasaakiri kākiti iuamoni, kona iaōtari maerekati ikamakitina. Kona ixinikaikari imaerekanina, ininiā kona imisiritana imaerekani xika. Ia pirena, kākiti imikanapiriini pirena, ipaniātaua asāpiretiniri ikinimane kākiti.

²⁰ Asāpiretari Kristo sākire kākitimoni. Asākirauata iua ĩkapani, ininiā Teoso iteene ōtākikai hīte ate sākireē. Kristo nireēkiti iaōka ate ōtākikai hīte. Hīkanapiriāko Teosomoni. ²¹ Kristo kona kamari maerekati, iuaritika Teoso misiritari iua maerekati kamakari imisiritini atokokana. Ininiā Xesosi sākire aūuikiniā, Teoso apakapaua ate, maerekati makamakani apakapini atoko, kotxi iua kamaerekataua ate.

6 Ate parīkauata Teosokata, ininiā ate iteene ōtākikai hīte. Teoso sikari ikinipoko erekari hītemoni, ininiā !apakata mamaākatakinitika hininiri Teoso. ² Kotxi Teoso sākire iōkatsopatakori txari:

Erekari kākitimoni nisika. Niketo apokasaaki, iuasaaki nikenakotari hākiritinino nota. Kākiti maerekani nimakatxakini ōtisaaki, nimoianatai hīte. Nisāpiretai. Uatxa apokapeka Teoso keto erekari kākitimoni isikini. Uatxa Teoso makatxakari kākiti maerekani.

Teoso Nitiriakori Atāo Inakani

³ Kona xatiki akerokari akamakiti kākitimoni, ininiā kākiti kona txari: “Ninoa kerokari ikamakitina, atāo minakati isāpiretinia,” litxana. ⁴ Teoso nitiriakori atāo atxaua. Aūuini ikiniōtika oerekari kākiti Teoso nitiriakori atāo inakani aniniua, kotxi amīteenekari amaxikiko. Amīteenekari amisiritiko. Amīteenekari katsiiri. ⁵ Teoso nitiriakori atāo atxaua, kotxi Teoso parīka akamini xika anoropataākapeka. Kateia āki atakaākapeka. Ahoaātaā kākiti apotiitakaniua naiatapekaua. Teoso parīka akamini, pasāpaniri aparīka. Itokata !aimaka. Itokata anatxita. ⁶ Kākiti imarotari ate Teoso nitiriakori aniniua, kotxi kona akamari maerekati. Aimarotari Teoso sākire. Kona katimari aomanākarauatini. Amoianatari kākiti. Erekari Matamatakoti oerekaua atāo akamini. Atāo atiretari kākiti. Ikara atoko aniniā, kākiti imarotari Teoso nitiriakori aniniua. ⁷ Ate Teoso nitiriakori atāo atxaua, kotxi atāo inakarinnoka asāpireta. Teosora sika-posotiiretaua. Erekari akamakiti aiīkeeko akikomoni, asanaremoni pakini atoko itxa, kotxi erekari aka-

makasaaki, maerekati iokanataāka. ⁸ Teoso nitiriakori atxaua, ininiā apanakini kākiti paxitaua. Txamari apanakini kākiti kona paxitaua. Apanakini sākire: “Peerekana ninoa.” Txamari apanakini sākire: “!Erekana ninoa.” Apanakini sākire: “Kamisirienererini ninoa,” iuaritika atāo inakaranoka asākire. ⁹ Minakaniua ate, iuaritika ikinimane imarotaua. Kaiāokatani apinaarita, iuaritika aāuapanika. Amisiritaāka, iuaritika kākiti kona okapanikaua. ¹⁰ Amatinaniuatakasaaki, Apiananiri kamapoxokonitaua ate. Kona katxineiroteua ate, iuaritika atxīkitakari kaiāopokori kākiti ikini sereti erekari Teoso sikakiti apakapinina. Minakani atxaua, iuaritika ikinipoko erekari Apiananiri sikakiti aua atemoni.

¹¹ Hīte Korīto sitatxiti auakani asāpiretai ikinipoko axinikakiti. Nikipatakiti !auari. Iteene atiretai hīte. ¹² Ate nirekari atiretinii hīte, txamari kona hīte nirekari hītiretinia ate. ¹³ Uatxa nimisākiretai hīte namariteakori nimisākiretini atokotxikana. Hītiretauako ate, ate tiretinii atokotxikana. Hōerekaua hītiretinia ate.

Xesosi Sākire Mauiākani Moianariakori !Hītxapeua

¹⁴ Xesosi sākire mauiākani moianariakori !hītxapeua, kotxi !apakata erekari kaikotini maerekatikata. !Apakata pokamara ūkanōkarikata auini. ¹⁵ Kona Kristo moianatari Satanasi. Xesosi sākire auiaākari nireēkiti āti. Xesosi sākire mauiākati nireēkiti ātiāo. Ininiā !apakata Xesosi sākire auiaākari auini Xesosi sākire mauiākatikata. ¹⁶ Teoso misākiretiko aikoti āki !auari kākiti kamakiti teoso. Aīto Teoso misākiretiko aikoti atoko itxa. Teoso ātipirika auakari itxaua. Iua txari:

Nota auako ninakitiakorikata. Nitīpokota ninoa sauaiki. Ninoa Teosone nitxauako. Nota nakitiakori itxauanako ninoa.

¹⁷ Ininiākara hītakanapanako nisākire mauiākani. Kona ninoakata !hāuape. !Hīkaikotape maerekati takote, ininiā napakapai hīte.

¹⁸ Ininiā hīri nitxauako. Namariteakori, namariteakoro hītxauako hīte, itxa Apiananiri, Kaposotiireri sākire.

7 Nitiretakini ikara atoko itxa Teoso kamaenetakiti ate ūkapani. Ininiā matakanapari ikinipoko maerekati aīto txikotakari, aākixinire txikotakari pakini. Teoso nakitiakorinoka matxaua. Erekarinoka makama Teoso apaxitini.

Paoro Poxokoni

² Hītiretauako ate. Kona amisiritari kākiti. Kona aōerekari kākiti maerekati ikamini. Kona amisirienetari kākiti. ³ Kona ikara atokoni nitxa hīte nitxitini ūkapani. Kona nitxitai, kotxi nisāpiretapekai iteene atiretinii hīte. Ininiā ipīkitxi kona oiarikaua. Auakari kona oiarikaua. Ate oiarikakari !auari. ⁴ Nimarotari hīte kaminiri nota ōtākikakiti iaōka. Nota iuikai hīte. Hīte kamataraxiniretano nota. Amaxikaākapika, iuaritika iteene nipoxokoniua.

⁵ Masetonia tixini ate apokasaaki, kona aiotoka. Kona atomata, kotxi asinimoni aua kākiti ate misiritakani. Kākiti naiataua. Aākixinireē apīkarauata. ⁶ Teoso, mīkapiritari kākiti matinaniuatakani, ininiā imīkapiritaua ate Txito apokasaaki. ⁷ Iua apokini kamapoxokonitaua. Apaka isākire kamapoxokonitaua, kotxi isāpiretaua hīte kamapoxokonitiniri iua. Isāpiretaua ate hīte kinirāo aōkitaka ininino nota. Isāpiretaua, hīte maerekaxinireni, kotxi hītīkitakano maerekaxinireninini. Isāpiretaua hīte ātipirika sāpiretiniri apanakini nota kamakiti ereka inini. Txito sāpirena nikenakotakasaaki, apia nipoxokoniua.

⁸ Mitxi niokanatsopatakiti hītemoni maerekaxinireti txīkitakai hīte, iuaritika erekari niokanatiniri iua niōkatsopatakiti hītemoni. Merepanika nota matinaniuata, kotxi nimarotari niokanatsopatakiti hātatsopatinii xika hīte matinaniuata. Mapaōtinoka maerekaxinireni hītixaua. ⁹ Uatxa poxokopekano nota. Na nipoxokoniua hīte maerekaxinireni nitxīkitakini ūkapani. Nipoxokoniua, kotxi maerekaxinireni hinini xika, hītakanapari maerekati hīkamakiti. Iuasaaki hīkanapiriā Teosomoni. Teoso apokaerekatari ikara atoko inakari himaerekaxinireni, ininiā kona ate misiritai. ¹⁰ Erekari Teoso txīkitakiniri kākiti matinaniuatini, kotxi iuasaaki kākiti takanapari maerekati ikamakiti. Ikanapiriā Teosomoni, ininiā Teoso makatxakari iua maerekani. Ikara atoko inakari matinanitxi erekari. Txamari kākiti Teoso manirekakani matinani ātiāo, ininiā ninoa ipinapikako.

¹¹ Hīte matinaniuata himaerekani xika, ininiā Teoso kamarekakai. Ininiākara uatxa erekarinoka hinireka hīkamini. Uatxa iteene hinirekari hīkaminiri Teoso nireēkiti. Hinirekari ikinimane imarotiniri hīkamakiti ereka inini. Uatxa homanitari maerekati mitxi hīkamakiti. Maerekaxinireti hītixaua himaerekani xika. Uatxa iteene hītiraōki aua. Hinirekari himarotiniri nota pirena, nota ereka ninini himarotini ūkapani. Uatxa hinirekari maerekati kamakari misiritiko. Ininiākara kona hīkerokari, iua kiki maerekati ikamakasaaki.

¹² Iua iōkatsopari mitxi niokanatakiti hītemoni, niōkatsopata hīte ūkapanikara. Kona iua maerekati kamakari ūkapanini niokanatsopata. Kona iua maerekati kamakari misiritakiti ūkapanini niokanatsopata. Niokanatarari iua iōkatsopari hītemoni atiraōki himarotini ūkapani. Teoso imarotari atiretinii.

¹³ Ininiā ate kamataraxiniretaāka, kotxi hīte kamataraxiniretaāka apaka. Apaka apoxokoniua, kotxi Txito poxokoniua. Iua poxokoniua, kotxi hīte himakinika kamapoxokonitari iua. ¹⁴ Txito hītemoni isini apisapanika, nota sāpiretari iua niuikinii hīte, kotxi peerekai hīte. Atāo nisākire, kotxi kona nipētauata hīkamakiti xika, kotxi hīkamakiti atāo. Atāonoka asākire hītemoni. Atāonoka asākire Txitomonii apaka ate iuikinii hīte. ¹⁵ Apiaāpota Txito tiretinii, kotxi hīkamari iua sākire iaōka. Imarotari hāpakapiniri iua hīpaxitinitika. ¹⁶ Nipoxokoniua, kotxi nimarotapitakari hīkaminiri nōtākikinii iaōka.

Txineiro Apanakini Sikakito

8 Nitariakori, anirekari asāpiretinii Teoso misākiretikoātaā apotiitakaniua Masetónia tixini auakani. Peerekari Teoso kamakiti ninoa īkapani, kotxi ikinipoko erekari isika ninoamoni. ² Ninoa !iteene kauarena. Pasāpaniri ninoa misiritiko, iuaritika ienenīkana ninoa. Na katxineiroteni, iuaritika ipotxitarina itiina isikinina kākiti kaamonirinimoni. ³ Nota imarotari ninoa minakati auiniāna, isikarautana apanakinimoni. Iteene isikarautana, ininiā kaiāokatani inatxitana. ⁴ Nota kona amanaāri ninoa txineirote kākiti Teoso nakitiakori Xerosareē sitatxiti auakani īkapani, iuaritika ninoaka txano: “Ate nirekari txineiro asikini ninoamoni. Pauritaua asikiniro ninoamoni. Asikiniāro apoxokoniuata, kotxi ikara atoko akamini amoianatari kākiti Teoso nakitiakori,” itxana. ⁵ Kona ikarananini ninoa nireka. Iteene ninoa kamapoxokonitaua ate, kotxi mitxipe ninoa txaua: “Ate nirekari Apiananiri nireēkiti akamini,” itxana. “Iua oerekiniāri inireēkiti hītemoni, ate nirekari hīte paniātakitiki apaka akamini,” itxana Masetónia tixini auakani. ⁶ Txito amanaāpekai hīte txineiro hīsikini Xerosareē sitatxiti auakani īkapani, ininiā apaniātari iua sini hītemoni hīsikakiti apakapini īkapani, hītiraōki ninoa Teoso nakitiakori hōerekini īkapani. ⁷ Hīte iteene auikari Xesosi sākire. Apanakini poiāoka. Hīte imarotari Xesosi sākire hīsāpiretini kākitimoni. Apanakini na iteene imarotari. Hīte iteene imarotari Xesosi sākire. Apanakini poiāonoka imarota. Hīte iteene nirekari Teoso parīka hīkamini. Apanakini poiāonoka nirekari. Hīte iteene tiretaua ate. Apanakini poiāoka tiretaua. Hīte apiareketa, ininiākara ninirekari hīsikakiti apaka apiari inini, kotxi ikara atoko hīkaminiā, hōerekari Xerosareē sitatxiti auakani hītiretinina.

⁸ Kona nipaniātai nitapararitika hīsikiniro hītxineirote ninoamoni. Nataerekatari hītiraōki. Atāo atxiīti hītiretari apanakini? Masetónia tixini auakani atāo tiretari apanakini. Hīte tiraōki ninoa tiraōki atoko atxiīti? ⁹ Himarotari Apiananiri Xesosi Kristo sikari ikinipoko erekari hītemoni. Itanapoko auiniri Xesosi Teoso tixine auakasaaki. Iuaritika itakanapari ikinipoko. Minakati mauakinitinoka itxapeka hīte īkapani. Ininiākara ikinipoko itakanapini xika, ikinipoko aua hītemoni.

¹⁰ Uatxa nota otākikai hīte, erekari hīkaminiri hīsākire iaōka, kotxi kita anokanani hīte merepanika xinikari: “Natokopa itxa akaminiri Xerosareē sitatxiti auakani īkapani?” hītxa. Hīte merepanika nirekari txineiro hīsikinina ninoa. ¹¹ Ininiā nōtākikai uatxa. Hīkamariko mitxi hīsākire iaōka. Hīpoxokoniritika hinirekariko hīokanatiniro txineiro ninoamoni, ininiā erekari hīpoxokoniritika hīkaminiri hīsākire iaōka. Ipixini txineiro hītemoni auakaro hīsikako ninoamoni. ¹² Hīpoxokoniritika hinirekiniāri hīsikarautani Teosomoni, iua apakapapitikari hīsikakiti. Poiāoka auiniāi, ininiā erekapitikari poiāonoka hīsikini Teosomoni. Iua apakapapitikari. Iua imarotari !apakata apikomoni hīsikiniri.

¹³ Kona ate nirekari hīte kaamoni hinini, ikinipoko ninoamoni auini īkapani. Erekarini ninoa auakiti hīte auak-itixikana. ¹⁴ Uatxa hīte txineirote auapitika ninoa hīsikini īkapani. Āti ōti hīte txineirote mauakanisaaki, atxiīti ninoa txineirote aua, ininiā ninoa sikai hīte. Ininiā hīte moianatinina atokotxikana, ninoa moianatai hīte. Ikara atoko inakari atāo. ¹⁵ Teoso sākire iōkatsopatakori txari:

Kiki kaiāopokori apakapakari itetakori !auari. Kiki poiāoka apakapakari !kaamoniri.

Txito Iokanatiko Korītomoni

¹⁶ “Peerekai,” atxari Teoso, kotxi iua sikanireōtari Txito itiretinii hīte, nota tīretinii atokotxikana. ¹⁷ Txito nirekapitikari ate paniātakitiki ikamini, hītemoni isini. Apaniātiniiri apisapanika, inirekari hītemoni isini, ininiā ipoxokoniritika isa hītemoni. ¹⁸ Aiokanatarini āti āitari iuakata. Ikinimane Teoso misākiretikoātaā apotiitakaniua iteene apokaerekatari iua, kotxi isāpiretari Teoso iokanapirena erekari ikinimanemoni. ¹⁹ Ninoa mereēri iua āitari atekata isini Xerosareēmoni, oa txineiro aanikasaaki. Oa txineiro asikakito oerekana Xerosareē auakani Apiananiri ereka inini. Oerekana apoxokoniritika amoianatinina.

²⁰ Oa txineiro kaiāopokoro aua, ininiā iua āitari siniā atekata, iua imarotari atāo asikiniro oa txineiro Xerosareē auakanimoni. ²¹ Anirekari atāo akamini oa txineiro asikasaaki ninoamoni. Anirekari Apiananiri imarotiniiri atāo akamini. Anirekari kākiti apaka imarotiniiri atāo akamini.

²² Iuaīkana aiokanatarini ātipekana āitari hītemoni. Aātaerekatapekari iua. Ipoxokoniritika imoianatarini kākiti. Apiapoxokonita iua, kotxi imarotari hīte kaminiri mitxi hīsākire iaōka. ²³ Txitopekana, nota moianari itxaua. Iua miparīkatano nota, hīte amoianatinini īkapani. Xesosi sākire auiākani mereēna āitariakori Txitokata sikani hītemoni. Kākiti imarotakasaakina ninoa, “Peerekari Kristo,” itxana kākiti. ²⁴ Ininiākara hōerekanako ninoa kikiakori atāo hītiretinina, ininiā ikinimane Xesosi sākire auiākani imarotari atāo hītirāōkiuati. Iuasaakiko ninoa imarotari ate sākire atāo inini ate iuikinii hīte.

9 Nisāpiretai hīte txineiro asikakito tīkane Teoso nakitiakorimoni, Xerosareē auakanimoni. Nimasāpiretakaniāi hīte, iuaritika hīte nirekari hītxineirote hīsikini ninoamoni. Nimarotari ikara. ² Nimarotari iteene hinirekari himoianatinina ninoa. Nitxapekana Masetónia tixini auakani: “Nota iuikana āitariakori Korīto sitatxiti auakani, Akaia tixini auakani, kotxi kita anokanani ninoa iposope txineiro iokanatinina Xerosareēmoni,” nitxana. Hīte poxokoni txineiro hīokanatinini, sikanireōtana Masetónia tixini auakani apaka iokanatiniro txineiro. ³ Uatxa niokanatanina ninoa āitariakori ipi āti pakini hītemoni. Hīte iposope hininiā hītxineirote hīokanatinini, erekapitikari, kotxi ikara nisākire iaōka. Ininiā atāo ate iuikinii hīte. ⁴ Masetónia tixini auakani siniā notakata, hītxineirote mīposonitipani, ininiā ate pētauata, kotxi ate auikari hīsākire.

Hītepekana apia pētauata hīsākire iaōka himakamakani xika. ⁵ Ininiākara ninirekari ninoa aītariakori sinihitemoni nota ereē napokini apisapanika. Ninoa moianatai txineiro kaiōpokoro hīsikaenetakito hāpotiitini īkapani. Ininiā napokasaaki ereē, iposope hīsikakito nanikini. Ininiā iuasaaki aimarotariko kinirāo sikaenetaka hinakito txineiro. Iuasaaki aimarotariko hīpoxokoniritika hīsikiniro hītxineirote.

Takari Itori Auini

⁶ Ia nisākire hīxinika. Poiāoka komiri pitakiniā pitakarauatakasaaki, poiāonoka iri pimaporoka. Kaiōpokori pitakiniā, kaiōpokori pimaporoka. ⁷ Ininiā pāxixinireē pixinikari atāo pisikakiti ātimoni. Kona erekari pimanirekasikatakiniti pisikini. Āti itapararitika paniātiniā pisikarauatini, lapakata. Teoso apokaerekatari kākiti ipoxokoniritika isikarauatini ātimoni. ⁸ Teoso posotari ikinipoko erekari isikinii hīte, ininiā ikiniōtika ikini sereti hiamonitakiti auiniā, hāpakapari ikinika hinireēkiti. Ininiā ikinipoko erekari hīkama. ⁹ Teoso sākire iōkatsopatakori txari:

Teoso sikari itori erekari matxineirotenimonini. Teoso kamakiti atāo inakari !ixipoka. Auapikako.

¹⁰ Teosora sikari takariki katakarerimonini itakarauatini īkapani, ininiā eereka iposope inakasaaki, auari kienatxi inikakiti īkapani. Iua atokokana Teoso sikari kaiōpokori takariki hītemoni. Iua anakakari hītakare, ininiā eereka iposope inakasaaki, kaiōpokori auari, ininiā kaiōpokori hīkamakiti atāo inakari apanakinimonini. ¹¹ Teoso sikai ikini sereti erekari, ininiā ikinipoko auape hītemoni. Ininiākara kākiti mauarenimonini hīsikariko kaiōpokori. Ate anikasaaki hīsikakito apanakinimonini, ninoa txariko: “Peerekari Teoso, kotxi ninoa sikaua ate aamonitakiti,” itxanako.

¹² Ikara atoko inakari hīkaminiā, hīsikari Teoso nakitiakori amonitakiti ninoamoni. Apaka hīsikasaakiri hīsikakiti ninoamoni, ninoa kaiōpokori txari:

“Peerekari Teoso,” itxanako. ¹³ Ninoa poxokoniuatako, kotxi hīte sikari kaiōpokori ninoamoni, apanakinimonini apaka. Ninoa txariko: “Peerekari Teoso,” kotxi imarotarina erekari hīte kamakiti. Imarotarina hīte kaminiri Kristo paniātakiti iaōka. Imarotarina hīte atāo auikiniri Kristo iokanapirena erekari. ¹⁴ Ininiā ninoa misākiretari Teoso hīte īkapani, kotxi iteene ninoa tiretai hīte, kotxi Teoso sikari ikinipoko erekari hītemoni. ¹⁵ Matxari Teoso: “Peerekai pite, kotxi pite sikaua pamarite. Āti pisikakiti iua atoko inakari lauari.”

Paoro Apakapapiretari Apoītiko

10 Kataparaxinireri Kristo, iuaritika ianaka otākikari kākiti, ininiā nota Paoro ianaka nōtākikai. Txamari apanakini hīte sauaki auakani txari: “Paoro itakoxiti auakasaaki, itapararitika itxitaua ate, atemoni iōkatsopatakasaaki. Txamari iua atekata auakasaaki, ipīkarauata amaerekani isāpiretinia,” itxana. Ikara apanakini sākire na atāo, kotxi itakoxiti nauanāta, iuaritika amaātiki nōtākikai hīte. ² Kona

ninirekari noerekinii hīte apanakini nitxitini ereē napokasaaki. Niposotapitikari nitapararitika nitxitiniri apanakini ereē napokasaaki, kotxi ninoa txari: “Paoro kamakiti Teoso sākire mauiākani kamakiti atokotxikana,” itxana. Txamari na atāo ninoa sākire. ³ Aīto tapara poiāoka, kotxi kākiti atxaua, ininiā aīto taparaā lapakata anaiatiniri maerekati. Teosora sikataparataua aāxixinireē, maerekati anaiatini īkapani. ⁴ Ate ikeeko kona Xesosi sākire mauiākani ikeeko atokoni. Teoso ikeeko isika atemoni. Kaposotiireri Teoso ikeeko, ininiā aposotari Satanasi kamakiti axipokini aiko kaikori axipokini atokokana. ⁵ Kākiti iuikaua. Inirekarina auikinirina Teoso imarore. “Paimatireua ate,” itxanātana. Teoso sikaimaroretāua ate, ninoa sākire paxirari inini aōerekini īkapani. Ikinipoko axinikakiti anireka Kristo nireēkiti iaōka axinikini, ininiā axinikakiti ātiāo auiniā, atxīkitakari iua axinikakiti imamakini Kristo nireēkiti iaōka inini īkapani. ⁶ Hīte iteene kamakasaakiri Kristo nireēkiti iaōka, ate misiritariko kākiti ereē Kristo nireēkiti imakamanisaaki.

⁷ Hīte xinikari hātamatakininoka. Kona hīxinikari kākiti āxixinireē auakari. Kākiti ereē uākatiniāri Kristo nakiti ininiuana, erekari imarotinirina ate apaka Kristo nakitiakori aniniuana, ninoa Kristo nakiti ininiuana atokotxikana. ⁸ Atxīti iteene niuikari Apiananiri sikaposotiiretinia ate, iuaritika kona nipētauata niuikiniri ikara, kotxi Apiananiri sikaposotiiretāua ate, hīte akamataparaxiniretini īkapani. Kona ate nirekari hīte āxixinire tapara poiāoāpotini. ⁹ Kona ninirekari hīpīkarauatini, iōkatsopari niokanatsopatakiti hātatsopatini xika. ¹⁰ Apanakini txari: “Paoro txitaua itapararitika iokanatsopatakitiā, txamari iua atekata auakasaaki, isākire ātiāo. Iuasaaki kona kataparaxinireri iua. Iuasaaki ipīkarauata ate itxitini,” itxana apanakini. Na atāo ninoa sākire. ¹¹ Itakoxiti ate auakasaaki, asākire aiokanatsopatakiti iuatxikana asākireta, ereē hītekata aūakasaaki.

¹² Ninoa ate misākirepiretakani iteene iuikaua. Atauako ninoa apiaerekata? Atauako !erekaua ate? !Kīkitena ninoa. Ninoa uākatari ninoa kamakitinoka erekari inini, ininiā ninoa iaōtari apanakini kamakiti. Apanakini kamakiti ninoa kamakiti atoko ininiā, ninoa uākatari apanakini kamakiti apaka erekatxikana. Txamari na atāo. ¹³ Atepekana, kona ate iuikari ateka kamakiti. Ate iuikari parīkatxi Teoso sikakiti atemoni akamini īkapani. Iuanoka ate iuika. Iua paniātaua aparīkauatini hīte īkapani. Iua aparīka ate iuikapitika. ¹⁴ Teoso paniātakininoka akama. Ia aparīka, ininiā ate sari hītemoni Kristo iokanapirena erekari asāpiretini īkapani. Ininiā apakatapitika ate iuikiniri ikara aparīka. ¹⁵ Apanakini parīka Teoso īkapani ate kona txari: “Iua parīkatxi ate kamakiti,” kona atxa. Ate nirekari hīte auikaāpotiniri Kristo sākire, Kristo sākire iteene hāuikini īkapani, ininiā ate nirekari aparīkauatini Teoso īkapani hīte auiniātaā, Kristo sākire apanakini auikini īkapani. ¹⁶ Ate nirekari Kristo iokanapirena erekari asāpiretiniri kākiti, hīte tixine apiko auakani Xesosi sākire masāpiretakotipanika ininiātaā. Ininiā kona

aparīkauata apanakini parīkauatiniātaā. Ininiā apanakini parīka: “Ate parīkakara iua,” kona atxari.

¹⁷ Teoso sākire iōkatsopatakori txari:

Pinirekatari piuikarauatini? Pinirekiniāri, ininiā piuikariko Apiananiri kamakitinoka.

¹⁸ Teoso kona apokaerekatari kākiti iuaka, “Erekapitikano,” inakari. Teoso sāpiretiniāri: “Erekapitikari iua kākiti,” ininiā Teoso apokaerekatari iua.

Teoso Maiokanatakini

11 Atxiīti miīkiteti sākirauatini atoko nimisākiretai hīte, iuaritika hāuiritano nota. ² Teoso nirekinii hīte iua nakitiakorinani hininiua, iua atokotxikana nota nirekai hīte Teoso nakitiakorinani hininiua. Nisikaenetai Kristomoni hītaniri atoko inini ūkapani. Iuamoninani nisikaenetai. Ninirekari iuamoni nisikinii, ātokoro kikikata masirīkakato atoko inakaro. ³ Kitxakapirīka Satanasi auaitotari imini. Iua imini misirienetaro Eva, kotxi paimatireri Satanasi sākire. Nipīkari Satanasi misirienetini hīte apaka, ininiā eereka hīxinikakiti na atāoni. Nota pīkari Xesosi hītakanapini. Mitxi iteene hītiretari iua. Iuananira hītireta. ⁴ Kotxi hīte apakapari hīpoxokoniritika ikinimane ereē apokakani, “Ate Xesosi sākire sāpiretakaniua” inakani, txamari Xesosi pirena ninoa sāpiretakiti na atāoni. Kona ate sāpiretari ikara atoko inakari, iuaritika hāuikari ninoa sākire. Hāuikasaakiri ninoa sākire, atxiīti hāpakapari mata-matakoti, txamari kona hāpakapari Erekar Mata-matakoti ate sāpiretakiti. Ate sāpiretai hīte atāo Kristo iokanapirena erekari, txamari hīte auikari ātiāo.

⁵ Hītemoni, Teoso iokanatanana ninoa kākitimoni. Hītemoni, ninoa Teoso iokanatakini apiarini. Nota poiāo atxiīti? Ninoa apiata atxiīti? Konapitini. ⁶ Atxiīti kona nota iteene imarotari nisākirauatini, iuaritika nimarotapitikari Teoso sākire. Himarotapekari ikara atoko inakari, kotxi asāpiretapekai.

⁷ Teoso iokanapirena erekari nisāpiretakasaakii hīte, maxikatīka nisāpiretai. Kona ninirekari hīkitixitinino, ininiā nota poiāotakaua, hīte atāo inakari himarotini ūkapani. Ikara atoko nikerokatari atxiīti? ⁸ Hītekata nipaīkauatakasaaki, kākiti ātiātaā Xesosi sākire auīākani iokanataro txineiro notamoni, txamari kona nota moianatanana ninoa iuasaaki. Hītekara nimoianata iuasaaki. ⁹ Hītekata nauakasaaki, nota nirekamaro txineiro. Txamari kona nota amanaāi hītxineirote. Aītariakori Masetónia tixinikini mininano itanapoko niamonitakiti. Iua atokotxikana kona namanaāpaniro hītxineirote nota ūkapani, kotxi atxiīti nota minari atoko nitxa hīporikiā. Kona ninirekari ikara atoko inakari nininiua. ¹⁰ Kristo atāonoka isākire. Isākire nāixire inireē auape, ininiā nota sākire apaka atāo. Nisāpiretanipaniakari kākiti hītxineirote nimanirekakani pirena. Iauari ikara nisākire iotokakakari ikinika Akaia tixiniā.

¹¹ Kinirepa ikara atoko nitxa sākiretai? Atxiīti kona nitiretai hīte? Teoso imarotari nota iteene tiretinii hīte.

¹² Uatxa iuaīkana nisāpiretai hītxineirote nimapakapani. Nanera kākiti uatxa hītekata auakani Teoso maiokanatakini txari: “Ate kamari Paoro

parīkatxikana,” itxana. Ikara atoko ininiā iuikauana. Txamari ninoa parīka ātiāo, kotxi ninoa apakaparo hītxineirote. Ate kona apakaparo hītxineirote. ¹³ Teoso kona iokanatanana nanera hītemoni. Na atāo Teoso iokanatakini !itxauana. Imisirienetaina hīte, “Aparīkauata Teoso ūkapani,” inakasaakina. Nanera txari: “Kristo iokanatakiniraua ate,” itxana. Txamari na atāo nanera sākire. ¹⁴ Ikara atoko inakari auapitika, kotxi Satanasi sari kākitimoni. Itxari: “Nota Teoso nitiri nitxaua. Nota oerekai atāo inakari.” Ininiā iua sākire auīākani auapitika. ¹⁵ Ininiākara nanera kikiakori Satanasi nitiriakori txari: “Atāo inakari kamakaniua ate. Teoso nitiriakori atxaua,” itxana. Xipokatxi ōtisaaki imisiritaākanako ninoa maerekati ikamakitina xika.

Paoro Misiritiko Pirena

¹⁶ Iuaīkana nisāpiretai. Miīkiteti !nitxaua, iuaritika hīte potxitari kākiti miīkiteni, ininiā miīkiteti atoko niuikaua, kotxi nota posotari niuikiniua. ¹⁷ Apiananiri kona sākirauata ia atoko. Miīkitetinoka sākirauata ia atoko iuikiniua. ¹⁸ Nanera kikiakori iuikaua, Teoso sākire mauīākani iuikiniua atokokana, ininiā nota apaka sāpiretari niuikiniua. ¹⁹ Hīte auiritari kākiti miīkiteni himoianarini ininiua, kotxi !kiīkitemi hīte. ²⁰ Nanera hītekata auakani txīkitakai hīte initiriakorina hininiua. Hīte auiritari ikara atoko inakari. Nanera amanaāpotari ikini sereti hīte nakiti. Ikamarina inireēkitina hītemoni. Ipaniātaina ikiniōtika inireēkitina hīkamini. Imisiritaina hīte. Hīte auiritari ikara atoko inakari ikaminina. ²¹ Erekar nipētauatini atxiīti? Kotxi kona kataparaxinireno nota nanera kamakiti atoko nikamini hītemoni. Kataparaxinirena nanera.

Ikamakitina iuikana, ininiā miīkiteti atoko kataparaxinireno nota. Nikamakiti niuikako. ²² Nanera Epireoakorikani? Ari. Nota apaka Epireo nitxaua. Nanera Isaeo apika mekaniriakorikani? Ari. Nota apaka Isaeo apika mekaniri nitxaua. Nanera Aprāo apika mekaniriakorikani? Ari. Aprāo apika mekanirikanarano nota apaka. ²³ Nanera Kristo nitiriakorikani? Atxiīti. Miīkiteti iuikiniua atoko nitxa: “Kristo nitiri api-aerekatakari nitxaua nota.” Nota apia parīkauata Teoso ūkapani. Apiata nimisiritiko, kotxi kaiāokatani kateia āki nitakaāka. Kaiāokatani nota noropataāka aāpitsaā. Kaiāokatani nipinaarita. ²⁴ Ipi ipi āti pakinikata Xoteoakori noropatano aāpitsaā. Iuasaaki inoropatanona trīta novi pakinikata. ²⁵ Ipi āti pakinikata Homanoakori noropatano aākeē. Ātikata kai soroā nikiporonakaāka. Ipi āti pakinikata maporoā nisikasaa-ki, maporo sakika apanīkakiā. Āti ūkanōkati, āti poka-mamariti pakini ninapa potxoari uiniti nipimakaātini. ²⁶ Nianaxititapika. Natamonōkonitari uini torōkani. Natamonōkonitari kiītiririni. Natamonōkonitari ninirimane. Natamonōkonitari ninirimane minakaniua. Natamonōkonitari sitatxi nauakasaaki, kākiti mauakaniātaā nauakasaaki, potxoari uiniti nīpiriātakasaaki pakini. Natamonōkonitari kākiti, “Xesosi sākire aūuika” inakanikata nauakasaaki, kotxi na atāo ninoa sākire. ²⁷ Kaiāokatani nisāpaka itori parīkatxi xi-

ka. Kaiāokatani nitsii aua. Kaiāokatani kona apakata ni-makini īkanōka. Kaiāokatani ninatxita, niposonata. Kaiāokatani nipokori !auari. Kaiāokatani nimīteenekari katxīkareri. Kaiāokatani nimāka !auari. ²⁸ Ikara atoko inakari monōkori auapika notamoni. Apaka nīparīka kasāpaniri aua, kotxi ikiniōtika nīparīkauata kākiti Teoso misākiretikoātaā apotiitakaniua īkapani. ²⁹ Āti iōkapetiniā, nota apaka niōkapeta. Āti txīkitakaāka maerekati ikamini, ininiā nota maerekaxiniretinoka nitxa.

³⁰ Hīte nirekiniāri niuikiniua, ininiā niuikari niōkapere. ³¹ Aāuīte Xesosi Kristo iri, Teoso imarotari nisākire atāo inini. Ātipirika matxari: "Peerekai." ³² Tamāsiko sitatxiti nauakasaaki, kākiti auīte apiari Areta inakori auakasaaki, Tamāsiko auakani auīte paniātari sota-toakori kaikotini sitatxi kākiti īronakiniātaā nota imākinina īkapani. ³³ Txamari kona nota pokīka sitatxi toreātaā. Nīroā kotari mitari āki. Iuasaaki aītariakori iokatxakano aapokotxi sonā sitatxi pirikere mapara. Ixitipe apoka nitxa. Ikara atoko itxa nimitekini, ininiā kona nino māīkano iuasaaki.

Taponetxi Teoso Sikiniri Paoro

12 Hinirekatari apikomoni niuikiniua? !Apakata, iuaritika hinirekiniāri, niuikapanikauako, kotxi Apiananiri sikano taponetxi peereri. Iua oerekano imarore. ² Akokaxiti katosi anokanani inakasaaki, nanikaāka Teoso tixinemoni iaxiti apiko nopinixiti. Iuasaaki nitaponeuataako? Atxīiti niīto atāo anikaākauako? Kona iteene nimarotari. Teosonokara imarotari. ³ Ianoka nimarota. Nanikaāka Teoso tix-inemoni nitaponeē atxīiti, atāo niīto anikaāka atxīiti. Teosonoka imarotari. ⁴ Iuaxiti nikenakotari sākiretxi erekari. Ikara kona nimarota iuaīkana nisāpiretini. Apaka !auritaāka nisāpiretiniri kākiti. ⁵ Ninirekiniāri, niuikari nitapone ikara atoko inakari, txamari !apakata notaka niuikiniua. Niōkaperenoka niuika. ⁶ Ninirekiniāri niuikiniua, atāonoka nisāpireta, kotxi kona miīkiteti !nitxaua. Txamari kona ninirekari niuikiniua, kotxi atxīiti kākiti uākatari nota apiari nininiua. Ninirekari kākiti atāo imarotinino. Erekarī kākiti imarotinino nisākireē, nikamakitiā pakini.

Paoro Misiritiko Inako Tsii Atoko Inini

⁷ Peerekari nitikakiti Teoso tixine nanikikosaaki, iuaritika Teoso kona nirekari niuikiniua, ininiākara Teoso auitari Satanasi misiritinino niītoā. Katsiiri. Inako atoko itxa niītoā, ininiā niuikiniua !auari. ⁸ Ipi āti pakinikata namanaāri Apiananiri ia nitsii imakatkaxini. ⁹ Txamari itxano: "Kona nimakatkaxari. Ikinipoko erekari nisikakiti sikataparatai. Iuanoka pinireka. Piōkapetakasaaki, nota tapara pākixinireē apiata," itxano. Ininiākara nipoxokoniritika niuikari niōkapere, kotxi iuasaaki nimarotari Kristo posotiire nākixinireē auini. ¹⁰ Niōkapetakasaaki, nipoxokoniua. Nixiniketikosaaki, nipoxokoniua. Nimaxikikosaaki, nipoxokoniua. Nimisiritikosaaki, nipoxokoniua.

Nikamakiti tīkane nimimarotakanisaaki, nipoxokoniua. Ikara atoko inakari nimīteeneka nipoxokoniritika, kotxi Kristo nakiti nitxaua. Niōkapetakasaaki, nitapara nākixinireē apiata.

Paoro Nirekari Erekarī Korīto Auakanimoni

¹¹ Miīkiteti sākirauatini atoko nisākirauata, txamari hīte xika nisākirauata miīkiteti sākirauatini atoko, kotxi hīte iukaākamanoko nota, kona nota nirekamariko niuikiniua. Minakati nitxaua, iuaritika nanera Teoso maiokanatakini hītekata auakani kona apiaerekata.

¹² Hītekata nauakasaaki, nikamakiti oerekai atāo Teoso iokanatakiti nininiua, kotxi iuasaaki noerekai Teoso oerekakiti kākitimoni. Noerekai kākiti maposotakiniti. Noerekai posotiiretxi iuasaaki. !Asāpaka ikara atoko inakari aōerekini hīte. ¹³ Atxīiti apiata nitiretari apanakini Teoso misākiretikoātaā apotiitakaniua ātiā-taā auakani? Konapitini. Ninoa nitiretini atokotxikana nitiretai hīte. Namanaāna ninoa txineirote niamonitakiti īkapani. Hīte txineirote kona xatikī namanaāi, ininiā nikerokatari atxīiti? Himaxinīkaretariko ia nikerokakiti.

¹⁴ Ipkata nisipeka hītemoni. Naiamatapeka iuaīkana hītemoni nisini tīkane. Kona hītxineirote kona namanaāpanii. Hītxineirote kona ninireka. Hītera ninireka. Amarini kona nīkatana iri, inoro pakini. Iri, inoro pakinira nīkatana imiakori. Nota hīri atoko nitxaua. ¹⁵ Nipoxokoniua ikinika nota nakiti nisikinii hīte. Notaka nisikaua hītemoni. Nipoxokoniritika nisikai. Txamari nota tiraōki hīte īkapani apiaāpotakasaaki, hīte tiraōki nota īkapani poiāoāpota.

¹⁶ Atāokani ikara atxīiti? Iuaritika ia nimarota. Kona xatikī namanaāi hinakiti hīsikinino. Atxīiti āti ereē auakari txari: "Paoro misirienetaua ate. Paxirari isākire," itxa atxīiti. Txamari ikara na atāo. ¹⁷ Natokopa nitxa nimisirienetini? Atauako kikiakori hītemoni nota iokanatakini misirienetai hīte? !Misirienetaina.

¹⁸ Nōtākikari Txito hītemoni isini tīkane. Nipaniātari āti aītari iuakata isini. Atauako Txito misirienetai hīte? Konapitini. Erekarī Matamatakotira anikano nota. Iua apaka anikari Txito. Nota sari Xesosi nirekinimoni. Txito apaka sari iua nirekinimoni.

Paoro Pīkare

¹⁹ Atxīiti hīte xinikari ikara asāpiretai, ate ereka anini himarotini īkapani. Konapitini. Ate sākirauata hītekata Kristo sākirauatini atokokana, kotxi Teoso atamataua. Ate tiretakini hītxaua hīte, ininiā ikinipoko akamakiti akaminii hīte, hīte ākixinire tapara auini īkapani.

²⁰ Nipīkarauata ereē napokini, kotxi atxīiti hīte kamari nimanirekakiniti. Atxīiti napokasaaki ereē, kona hīte apokaerekatano nota. Ereē napokasaaki, nipīkari nimarotiniri hīte txitakakiniua, hīxikotakakiniua, homanatakakiniua, hīpotxinani auini, himisākirepiretakakiniua, aāpirena hīsāpiretini, hīuikiniua, hineenamauatini. Ikara nimarotini nipīka, ereē napokasaaki. ²¹ Ininiā hītemoni napokasaaki, nipīkari Teoso kamapētatinino nota hīte maerekani xika. Nipīkari nitxiapatini

maerekati hīkamakiti xika, kotxi kaiāopokori kamari maerekati akokaxiti, iuaritika !itakanapapanikari iua maerekati. Ixinikakitina maerekatinoka. Maerekati ikini sereti iītona nireēkiti aua. Ītanoro minakotokatika isirīkana. Ikara atoko inakari kona itakanapapanikana.

Paoro Sākire Imapotōkire Ōtākikare

13 Ipi kata nota sari hītemoni. Iuaīkana hītemoni nisako. Teoso sākire iōkatsopatakorī txari: Ipi āti pakini kākiti atamatiniāri maerekati āti kamakiti, ninoa sākire auikaāka, ininiā iua maerekati kamakari misiritaākako. Ipi kākiti atamatiniāri maerekati āti kamakiti, ninoa sākire apaka auikaāka, ininiā iua maerekati kamakari misiritaākako, itxa Teoso sākire. ² Akokaxiti hītekata nauakasaaki, nōtākikapekai himaerekani hītakanapini. Iuasaaki nōtākikana mitxi maerekati kamakani, apanakini apaka. Nitxana: “Ātikata uai napokasaaki, nimisiritaapitikari ikini mane maerekati kamakani,” nitxapekana. Iuaīkana uatxa ĩtakoxiti nauakasaaki, ikara nisākiretxikana nisāpiretai hīte. ³ Hīte nirekari himarotiniri: “Atāokani atxīti Paoro sāpiretari Kristo sākire?” hītxa. Napokasaaki ereē, himarotapitikariko atāo nisāpiretiniri Kristo sākire. Kristo !iōkapeta. Oerekapekai iposotiire hīte sauaki. ⁴ Kristo okikosaaki aamina ĩpiriāmitakari nopini, iīto iōkapere aua. Uatxa kataparari iua, kotxi Teoso sikataparatarī iua. Ate ĩto apaka iōkapeta, mitxi Kristo ĩto iōkapetini atoko, iuaritika Teoso sikataparataua Kristokata aāuini hīte amoianatini ĩkapani. ⁵ Hīxinikariko hākixinireē auakari. Atāokani hāuikatari Teoso sākire? Hīteka ataerekatauako. Himarotatarī Xesosi Kristo hākixinireē auini? Teoso sākire hākixinireē mauakaniā, Kristo Xesosi !auari hāk-

ixinireē. ⁶ Ninirekari himarotiniri Kristo Xesosi auini ate ākixinireē. ⁷ Ate misākiretari Teoso, maerekati hīte makamakani ĩkapani. Kona ate nirekari kākiti sākire: “Peerekari Paoro. Iua imarotapitikari Teoso sākire oerekini, kotxi Korīto sitatxiti auakani kamari Teoso sākire iaōka.” Ikara kona ate nireka, ate iuikiniua ĩkapani. Atxīti kākiti uākatari Xesosi Kristo !auari ate ākixinireē, iuaritika ate nirekari hīte kaminiri atāonoka. ⁸ !Apakata aiotokakiniri atāo inakari. Atāo inakari auapika. Atāo inakari !ixipoka. Apakata aōerekiniiri atāo inakari. ⁹ Atxīti ate iōkapeta, iuaritika apoxokoniuata hītaparaxinire akenakoenetakasaaki. Ate misākiretari Teoso hīte atāonoka hīkamini ĩkapani ikiniōtika, Xesosi sākire iaōka hīkamini ĩkapani. ¹⁰ Ikara atoko inakari niōkatsopata hīte ĩkapani hītekata ni-mauakanisaaki, kotxi ereē napokasaaki, kona ninirekari nitxitinii hīte. Niposotapitikari nitxitinii, kotxi Apiananiri sikaposotiiretapedano atāo nikamini hītemoni. Txamari kona ninirekari Xesosi sākire hītakanapini, nota txitinii xika. Ninirekari hīte kataparaxinire hini-ni, Xesosi sākire iteene hāuikini ĩkapani.

¹¹ Nitariakori, xipope niōkatsopare. Ereēpiko. Ikiniōtika atāonoka hīkamako. Xesosi sākire iaōka hīkamako. Hīkamariko nisāpiretakiti iaōka. Hīxinikakiti ātinoka itxauako. Kona hītxitakakapeua. Ininiākara Teoso kati-raōkiri, kauāireri, auapikako hītekata.

¹² Haōkitakakasaakiua, hīpoxokoniritika hāpakapakauako, kotxi Apiananiri nakitiakori hītxaua. Ikinimane Teoso nakitiakori uai auakani xinikamanapitai hīte.

¹³ Apiananiri Xesosi Kristo sikari ikini-poko erekari hītemoni. Teoso iteene tiretai. Erekari Matamatakoti moianatai hīte hīkinika. Ameē.

Karásia

1 Nota Paoro iokanatsopata ia aãtsopa hĩtemoni. Nota Teoso iokanatakitino kãkitimoni Teoso iokanapirena nisãpiretini ĩkapani. Kona kãkitini iokanatanano nota. Xesosi Kristora iokanatanano nota. Aĩri Teoso, Xesosi ipinaãka atoko õkitikakarira, iuara iokanatanano nota kãkitimoni. ² Ikinika aĩtariakori notakata auakani, nota apaka xinikanãtai hĩte. Hĩte ikini aikoti Teoso misãkiretikoãtaã apotiitakaniua Karásia tixini auakani axinikanãtapika.

³ Aĩri Teoso, Xesosi Kristo aũũite pakini sikari ikinipoko erekari hĩtemoni. Ninoa kamaerekaxiniretai hĩte.

⁴ Xesosi ipina amaerekani imaktxakini ĩkapani. !Erekari uatxa auakani. Maerekati kamakani sauaki aãuakasaaki, Xesosi ipina ate imaktxakini ĩkapani, amapinakani ĩkapani. Xesosi ipĩpe ate ĩkapani, kotxi aĩri Teoso nirekari Xesosi ipinini ate maerekani imaktxakini ĩkapani. ⁵ Ikiniõtika: “Peerekai,” matxari Teoso. Ātipirika kãkiti txapikari Teoso: “Peerekai.” Ameẽ.

Āti Iokanapirena Erekari !Auari

⁶ Nikenakopiretari Teoso hĩtakanapaãpotini. Iuasaaki nitsorĩkaãnãta. Kinirepa hĩtakanapari Teoso sãkire? Kotxi mapa kasiritinoka hĩte auikari Teoso iokanapirena erekari. Kristo iteene tiretai hĩte, ininiã akiritai hĩte inakitiakori hininiua ĩkapani. Kinirepa hãũikatari āti iokanapirena? ⁷ Atão nisãpiretai hĩte. Āti iokanapirena erekari !auari. Nikenakopiretari kãkiti hĩte oereẽkani. Ninoa nirekari ikoketinirina isãkirena Kristo iokanapirenakata. Uatxa !himarotakari atão sãpirenatxi. ⁸ Atão asãpiretapekai Teoso iokanapirena erekari. Ātião sãkiretxiti asãpiretiniã, Teoso iokanataua ate kãkiti misiritikomoni, ātipirika misirikaretxi auiniãtaã. Teoso nitiri iaxitikiri apaka sãpiretiniã Ātião iokanapirenatxi, Teoso iokanataru iua iniriti imisiritikomoni ātipirika misirikaretxi auiniãtaã. ⁹ Hĩte auikapekari Teoso iokanapirena erekari. Ātião iokanapirenatxi sãpiretakari sãpiretiniã Teoso iokanapirena atão minakati, iokanataãkako imisiritikomoni ātipirika misirikaretxi auiniãtaã. Asãpiretapekai ikara inakari sãkiretxiti. Uatxa iuaĩkana nisãpiretai.

¹⁰ Ikara atoko nitxai hĩte, ininiã himarotari kona ninirekari: “Peerekari Paoro kamakiti,” niniko. Nota nirekari Teosonoka: “Peerekari Paoro kamakiti” ininino. Nanera atão minakati sãpiretakani txai hĩte: “Paoro nirekari kãkiti apokaerekatiniri iua.” Ikara na atãoni.

!Ninirekari kãkiti apokaerekatinino nota. Ninirekiniãri kãkiti apokaerekatinino, kona Kristo nitiri !nitxaikaua.

Teoso Akiritari Paoro

¹¹ Nanera atão minakati sãpiretakani hĩte oereẽkani: “Paoro iokanapirena kona Teoso iokanapirenani,” itxana ninoa sãkire. Nitariakori atãopitikara nisãpiretai hĩte. Iokanapirenatxi hĩtemoni nisãpiretakiti kona kãkiti sãkireni. Teoso sãkirera. ¹² Kona kãkitini sãpiretano ia iokanapirenatxi. Kona kãkitini oerekano. Xesosi Kristora sãpiretano nota iua iokanapirenatxi.

¹³ Hĩte imarotari mitxi nauakasaaki, Xoteo kiomaneakorini oerekakiti nauikasaaki, iuasaaki kona nitiretana Xesosi sãkire auĩãkani. Itene nimisiritana ninoa. Ninirekari nixipokiniri Xesosi sãkire kĩpitakani.

¹⁴ Iuasaaki nimarotari Xoteoakori kitxakapirĩkarini paniãtakiti. Nikamari imakinika ninoa paniãtakiti. Iuasaaki nimoianariakori apaka kamari ninoa kitxakapirĩkarini paniãtakiti. Nota apiata kamari ninoa sãkire iaõka. Itene ninirekari nikaminiri kitxakapirĩkarini paniãtakiti.

¹⁵ Teoso iteene tiretano nota. Iua mereẽno nota nauini apisapanika. Iuasaaki akiritano nota iniriti nininiua tĩkane. ¹⁶ Teoso keto manapi apokasaaki, oerekari imi notamoni, imi Xoteo minakonimoni nisãpiretini ĩkapani. Iuasaaki kona nisãpiretari kãkiti Teoso oerekakiti sãkiretxiti, ininiã na kãkitini sãpiretano nikamakiti tĩkane. ¹⁷ Iuasaaki kona nisari Xerosareẽ sitatxitimoni, ininiã nota apisapanika Teoso iokanatakini kona õtãkikano. Kona kãkitimonini nisa noerekiko ĩkapani. Arãpia tixinimoni nisapitipo. Eereka nikanapiriã Tamásiko sitatxitimoni.

¹⁸ Ipi anokanani, āti anokanani pakinikanani napaãka atoko, nisa Xerosareẽmoni Petro nimsãkiretini ĩkapani. Ipi semanati ninapa Petrokata. ¹⁹ Apanakini Teoso iokanatakini isãkire sãpiretakani kona naõkita. Apiananiri itari Txiako inakorinoka naõkita. Ininiãkara kona kãkiti sãkireni nisãpiretai hĩte. Teoso iokanapirenakara nisãpiretai hĩte.

²⁰ Ia niõkatsopatakiti nisãpiretakiti hĩtemoni atão inakari. Teoso imarotari atão inakari nisãpiretinii.

²¹ Xerosareẽmoni nisaãka atoko, nisari Síria tixini, Sírsia tixini apaka. ²² Iuasaaki Kristo sãkire auĩãkani, Xotéia tõpa auakani, laõkitapanikano nota iuasaaki.

²³ Ninoa imarotari apanakini minapiretakiti. Apanakini sãkire: “Kiki mitxi ate misiritakari, uatxa sãpiretari Xesosi sãkire. Mitxi iua nirekari ixipokiniri Xesosi oereẽkiti sãkiretxiti, iuaritika uatxa inirekari oerekiniri Xesosi

oerekakiti sákiiretxiti kákitimoni,” itxana apanakini sákiire. ²⁴ Ininiákara ninoa: “Peerekari Teoso,” itxana, kotxi nota auikapekari Xesosi sákiire.

Xesosi Iokanatakini Apakapari Paoro

2 Katosi anokanani napaáka atoko, nikanapiriá Xerosareēmoni nimoianari Panapee inakorikata. Nanikari nimoianari Txito inakori apaka notakata. ² Xerosareēmoni nisa, kotxi Teoso oerekano nisini iuamoni. Iuaã napokasaaki, nisákirauata Xesosi sákiire auíákani auíteakorikata. Ninoakatanoka nisákirauata. Teoso iokanapirena erekari Xoteo minakonimoni nisápiretakiti nisápiretana ninoa. Nota nirekari ninoa imarotini nisápiretakiti atão inini. Apaka ninirekari ninoa imarotini iuaíkana katana nisápiretakiti atão inini íkapani. Nisápiretakiti ikenakotakasaakina, ninoa: “Atáopitikara pisápiretakiti Xoteo minakonimoni,” itxana. ³ Txito nimoianari na Xoteo !itxaua. Krekora itxaua, ininiákara Teoso takaótxikare !auari iuamoni, iuaritika Xesosi sákiire auíákani auíteakori na paniátari itsiki mata kisauakiko. ⁴ Mitxi apanakini kikiakori apoka iuaã. Ninoa sákiire: “Ate auikari Xesosi sákiire,” itxana ninoa. Txamari na atão ninoa sákiire. Ninoa apotiitaua Xesosi sákiire auíákanikata. Inirekarina Txito ítoã Teoso takaótxikare takiko. Ninoa nirekari imarotini kitxakapiríkarini Xoteo kiomaneakorini paniátakiti atakanapini, kotxi atakanapapekari ipixini ninoa paniátakiti, kotxi Kristo Xesosi nakitiakori atxapekaua. Ninoa nirekari imarotini ikinika ate oerekakiti sákiiretxiti. Ninoa nirekari ate kaminiri ikinika kitxakapiríkarini Xoteo kiomaneakorini paniátakiti. Ninoa nirekari ikinika Xesosi sákiire auíákani, Xoteo minakaniua apaka kaminiri Xoteo kiomaneakorini paniátakiti. Ninoa nirekari nitirixi amotakoni atoko aniniua. ⁵ Kona xatiki akamari ninoa nireékiti, kotxi inirekarina Teoso iokanapirena atão inakari akoketini Xoteo kiomaneakorini paniátakikata. Ate nirekari Teoso iokanapirena atáonoka inakari asápiretinii.

⁶ Xesosi sákiire auíákani auíteakori txari notamoni: “Xoteo minakonimoni pisápiretakiti erekapitikari. Apikomoni ate sákiire !auari ninoa pisápiretini íkapani,” itxana. Ninoa auítetxiakori itxauana, iuaritika Teosomoni ninoa apanakini kákiti poiáorini atokotxikana itxauana, kotxi Teoso atamatari aákixinire. Ininiákara nota !nipíkari auítetxi. ⁷ Ninoa Xesosi sákiire auíákani auíteakori apokaerekatari nipaírka. Ninoa imarotari Teoso sikano nota ia paríkatxi, ia iokanapirenatxi erekari nisápiretinina Xoteo minakaniua. Iua atokotxikana Teoso sikari paríkatxi Petromoni, iokanapirenatxi erekari Xoteoakori isápiretini íkapani. ⁸ Teoso iokanatarari Petro Xoteoakorimoni, ininiá isikaposotiiretari iua ninoa sauaki iparíkauatakasaaki. Iua atokotxikana Teoso iokanatanota nota Xoteo minakonimoni. Nota apaka isikaposotiireta ninoa sauaki nipaírkaatakasaaki. ⁹ Iuasaaki ninoa auíteakori Txiako, Petro, Xoão pakini imarotari Teoso sakinino notamoni ia paríkatxi, ininiákara imaíkarina niuako, Panapee uako pakini, kotxi akinika aparíkauata Teoso íkapani.

Akinika aápokaerekatari nota, Panapee pakini sápiretiniri Teoso sákiire Xoteo minakonimoni. Akinika aápokaerekatari Txiako, Petro, Xoão pakini sápiretiniri Teoso sákiire Xoteoakorimoni. ¹⁰ Ninoa paniátaua ate matxineiroteni atiretini. Iuanoka ipaniátaua. Napokaerekatari ninoa sákiire, kotxi ninirekapitikari matxineiroteni nitiretini.

Paoro Ótáikikari Petro

¹¹ Eereka Petro motikaétaua ate Átxiokia sitatxiti aáuakasaaki. Iuasaaki Petro kamakiti na atáoni. Ininiákara nota sákirauata Petro apisatoó: “Petro, pite kerokari,” nitxari iua. ¹² Merepanika Petro nipokota ikiniótika aítariakori Xoteo minakonikata. Eereka átika kikiákini apoka Txiako iokanatakini. Iuasaaki Petro píkana ninoa, ininiá kona inikaika aítariakori Xoteo minakonikata, Xoteo kiomaneakorini sákiire xika, kotxi ninoa sákiire: “Kákiti Teoso takaótxikare ítoã mauakaniá, !pinipokotape ninoakata,” itxana ninoa sákiire. Petro píkana Txiako iokanatakini, kotxi ninoa nirekari Teoso takaótxikare auini aítariakori ítoã, Xoteo minakaniua ítoã. ¹³ Apanakini Xoteoakori Xesosi sákiire auíákani apaka kamari Petro kamakiti atokokana, ininiá ninoa apaka kerokari. !Inipokotaikana aítariakorikata, Xoteo minakanikata. Ninoa kerokiniri xika Panapee apaka kerokari. Iua apaka !inipokotaika aítariakorikata, Xoteo minakonikata. ¹⁴ Nimarotakasaakiri ninoa kerokiniri ikamakitina, nota misákiiretari Petro ikinimane ókiátaã, kotxi ninoa !ikamari atão inakari. Teoso iokanapirena erekari iaóka !ikamana. Nitxari iua: “Xoteokarai, iuaritika pauanáta Xoteo minakaniua sauaki, ininiá Xoteo kamakiti atoko !pikamaika. Xoteo minakaniua atoko pitxaua. Ininiákara kinirepa pite paniátana Xoteo minakaniua: ‘Hííkípitariko Xoteo kiomaneakorini sákiire?’ !Erekari,” nitxa Petromoni.

Xesosi Sákiire Auikiko Kamaerekatari Kákiti

¹⁵ Ate Xoteo atxaua, kotxi aírri, ainoro pakini Xoteo txaua apaka. Xoteo kiomaneakorini sákiire: “Xoteo minakaniua maerekati kamakani itxauana,” itxana isákiirena. Xoteo minakaniua !atxaua ate. ¹⁶ Aimarotari, aáuikiniári Xesosi Kristo sákiire, iua kamaerekatari aákixinire, ininiákara Teoso apakapaua. Kitxakapiríka Teoso sápiretari Moisesi ipaniátakiti kákiti kamini tíkane. Ininiákara Moisesi iókatsopatarari ikara Teoso sákiire. Txamari !aposotarari akaminiri imakinika Teoso paniátakiti, Moisesi iókatsopatakiti, ininiákara !ikamaerekatari aákixinire. !Apakapaua ate. Ate auikari Xesosi sákiire ereka anini íkapani, ininiá Teoso apakapitikaua ate. Teoso paniátakiti iókatsopatarari ikinika !aposota akamini, ininiá Xesosi kamaerekatari aákixinire Teoso apakapiniua íkapani, Kristo sákiire aáuikasaaki. ¹⁷ Anirekasaakiri Teoso kamaerekatinina, aápoka Kristomoni. Iuasaaki aimarotari maerekati kamakani aniniua. Iuaritika Kristo makatxakari amaerekani Teoso apakapiniua íkapani. Ikara atoko ininiá, atxíiti Kristo nirekatari maerekati akamini,

imakatxakiniri ĩkapani? Konapitini. ¹⁸ Atxiĩti kãkiti imarotari Xoteo kiomaneakorini paniãtakiti kamiko na kamaerekatari kãkiti ãkixinire, ininiã itakanapari ninoa paniãtakiti ikamini. Atxiĩti ãti õti iuaĩkana ikamari ninoa Xoteo kiomaneakorini paniãtakiti iaõka, ininiã iuasaakiikarako ikerokari. ¹⁹ Moisesi iõkatsopatakiti oerekano nota ipĩkari atoko nininiua, kotxi nota kona posotari ikinika Moisesi iõkatsopatakiti iaõka nikamini, ininiã nimisiritiko auapitikako. Ininiã nimarotari Moisesi iõkatsopatakiti kona makatxakari nimaerekani. Ininiã nimarotari Xesosi sãkire auiãkarinokara auapininiika. Ininiã uatxa ikiniõtika ninirekari Teoso nireẽkitinoka nikamini. ²⁰ Xesosi okaãka aamina ĩpiriãmitakari nopini. Aamina ĩpiriãmitakari nopini okakori atoko nitxaua, kotxi maerekati mitxi nikamakiti !niniãkaikari nikaminiri. Mitxi ninireẽkiti kona auaika. Iuaritika auãkipanika nitxaua, kotxi Kristo aua nãkixinireẽ. Teoso ãkiri sãkire nauikiniã, auãkipanika nitxa. Iua turetano nota. Iua ipĩpe nota ĩkapani. ²¹ Moisesi iõkatsopatakiti kamiko kamaerekatiniãua ate, kinirepa Xesosi ipina? Moisesi iõkatsopatakiti kamiko na xatiki kamaerekataua ate. Teoso tiraõkinokara kamaerekatari aãkixinire.

Natokopa Itxa Teoso Kamaerekatiniua?

3 Hĩte Karásia tixini auakanii kona kiĩkitei hĩte. Kipa misirienetai hĩte atão inakari himakamakani ĩkapani? Kotxi himarotapitikari atão inakari. Himarotari Xesosi Kristo ipina aamina ĩpiriãmitakari nopini amaerekani imaktxakini ĩkapani. Ate oerekapekai ikara atão inini. ² Ianoka nipimaãi hĩte: Kisaakipa hãpakapari Erekar Matamatakoti? Hãpakapatari iua, Moisesi paniãtakiti hĩkamakasaaki? Konapitini. Hãpakapatari Erekar Matamatakoti Teoso iokanapirena erekari hãuikasaaki? Ari, Teoso iokanapirena erekari hãuikasaaki, iuasaakiikara hãpakapari iua Erekar Matamatakoti. ³ Kipa iomaĩkitetai hĩte? Merepanika Teoso sikari Erekar Matamatakoti hĩtemoni, ininiã Erekar Matamatakoti sikaposotiiretai hĩte Teoso paniãtakiti hĩkamini ĩkapani. Uatxa hĩxinikatar Teoso paniãtakiti hĩkamini hĩteka posotiireẽkani? Konapitini. Kona hĩte posotari. ⁴ Himisiritapeẽkaika Xesosi sãkire hãuikini xika. Kinirepa himĩteenekatari himisiritiko? Atauako uatxa kona hãuikaikari mitxi hãuikakiti Xesosi sãkire? ⁵ Kirisaakipa Teoso sikari Erekar Matamatakoti hĩtemoni? Kirisaakipa Teoso oerekari iposotiire hĩtemoni? Atauako ikara atoko itxa Moisesi paniãtakiti hĩkamakasaaki? Konapitini. Isikai Erekar Matamatakoti, oerekai iposotiire, Teoso iokanapirena hãuikasaaki.

⁶ Hĩxinikariko Apraãoni. Apraão auikari Teoso sãkire, ininiãkara Teoso kamaerekatari iua, ininiã Teoso apakapari iua. ⁷ Ininiã ninirekari himarotiniri, kãkiti Teoso sãkire auiãkani Apraão apika mekaniriakori atão inakani itxauana ninoa. ⁸ Teoso kamaerekatari Xoteo minakaniua, kotxi ninoa auikari Xesosi sãkire. Kitxakapirĩka Teoso sãkire iõkatsopatakori sãpiretapekari ikara Teoso iokanapirena erekari Apraãomoni. Ikara

iõkatsopari txari: “Nota sikariko erekari ikinimane kãk-itimoni, kotxi pite Apraão auikari nota sãkire.” ⁹ Apraão kĩpitari Teoso sãkire, ininiãkara Teoso takari erekari iuamoni. Iua atokotxikana Teoso takari erekari iua sãkire kĩpitakanimoni.

¹⁰ Apanakini uãkatari Teoso apakapinina ninoa, kotxi ikĩpitarina Moisesini sãkire. Txamari Teoso misirikare pamonõkonipaniriko ninoamoni, kotxi Teoso sãkire iõkatsopatakori txari: “Teoso misiritariko kãkiti ikinika Moisesi paniãtakiti ikiniõtika imakamakanisaaki.”

¹¹ Teoso sãkire iõkatsopatakori txari: “Teoso kamaerekatariko kãkiti, iua sãkire auiãkani. Ininiã isãkire auiãkani auapininiika itxako Teosokata,” itxa Teoso sãkire iõkatsopatakori. Ininiãkara aimarotari Moisesi paniãtakiti kĩpitiko kona kamaerekatari kãkiti. ¹² Moisesini iõkatsopatakiti kona paniãtaua aũuikiniri Xesosi ipinini amaerekani imaktxakini ĩkapani. Moisesi iõkatsopatakiti paniãtaua akaminiri ikinika Teoso paniãtakiti. Teoso sãkire iõkatsopatakori txari: “Kãkiti, Teoso paniãtakiti iõkatsopatakori ikinika makerokakatirako auapininiika itxako Teosokata,” itxa Teoso sãkire iõkatsopatakori.

¹³ Txamari ãtika Teoso paniãtakiti Moisesi iõkatsopatakiti akerokiniã, amisiritaãkako. Kristo makatxakaua ate ikara misirikaretxi monõkori, kotxi Teoso misiritari Xesosi Kristo aamina ĩpiriãmitakari nopini ate maerekani xika ate mapinakani ĩkapani. Teoso sãkire iõkatsopatakori txari:

Kãkiti aamina nopini okakori Teoso misiritakiti itxaua. ¹⁴ Teoso sikaenetari erekari Apraãomoni. Kristo ipĩpe hĩte Xoteo minakaniua ikara erekari hãpakapini ĩkapani. Ininiã Xesosi Kristo sãkire aũuikasaaki, aãpakapari mitxi Teoso sikaenetakiti. Aãpakapari aãkixinireẽ Erekar Matamatakoti, Teoso sikaenetakiti atemoni.

Teoso Sikaenetakiti Sãkiretxiti

¹⁵ Nitariakori, ikinimane kãkiti imarotakiti nisãpiretaiko hĩte, noereẽkiti sãkiretxiti iteene himarotini ĩkapani. Ipi kãkiti aua itiina isikaenetakakana. Iuasaaki, iõkatarina iuãkana isikaenetakitina tsopaã. Eereka !auiritaãkana imaxinĩkaretinirina isikaenetakitina. Apaka !auiritaãka sãkiretxi apikomoni itakinina isikaenetakitina tsopaã. Teoso sikaenetakiti inakitiakorimoni ikara atoko itxa. ¹⁶ Himarotariko ia. Teoso sikaenetari erekari Apraãomoni, Apraão apika mekanirimoni apaka. Teoso sãkire iõkatsopatakori na txari: “Apika mekaniriakori.” Teoso sãkire iõkatsopatakori txari: “Apika mekaniri.” Ininiã ãtika apika mekaniri. Kristo itxaua iua. ¹⁷ Ia ninireka nisãpiretinii. Kitxakapirĩka Teoso sikaenetakiti Apraãomoni apokapeka. Koatrosõtosi trĩta pakini anokanani Apraão auaka atoko, Teoso sãpiretari Moisesi ipaniãtakiti iõkatsopatinii ĩkapani kãkiti kamini ĩkapani. Moisesi iõkatsopatakiti kona xipokari Teoso sikaenetakiti Apraãomonikari. ¹⁸ Teoso sikari Kristo kãkitimoni, kotxi mitxi isãpiretari isikaenetakiti Apraãomoni. Teoso sikasaakiri ipaniãtakiti sãkiretxiti Moisesimoni ikara iaõka kãkiti kamini ĩkapani,

isikaenetakiti auapeka iusaaki. Ipaniätakiti sikiko !ixipokari isikaenetakiti.

¹⁹ Ininiäkara kininiäpa Teoso sikari ipaniätakiti Moisesimoni käkiti kamini ikapani? Teoso paniätakiti iökatsopatakorori oerekaua maerekati kamakanuia ate, kotxi laposotari ikinika ipaniätakiti akamini. Kristo, Apraão apika mekaniri ikorapokoriti apokini apisapanika, Moisesi iökatsopatakiti oerekaua Teoso nireëkiti akamini ikapani. Teoso sikaenetakiti itxaua Xesosi Kristo. Teoso sikasaakiri ipaniätakiti säkiretxiti Moisesimoni, Teoso nitiriakori aua iuaãtaã. Teoso säpiretari isäkire Moisesimoni. Eereka Moisesi säpiretari käkiti. ²⁰ Teoso säpiretakasaakiri Apraão isikaenetakiti, lipaniätari äti käkiti säpiretiniri Apraão. Teosonokara säpiretari Apraão.

Moisesi Iökatsopatakiti

²¹ Moisesi iökatsopatakiti aäuikiniã, atxïiti lanirekaikari Teoso sikaenetakiti? Anirekapitikari. Akiomaneakorini paniätakiti säkiretxiti, kona txïikitakaua aäuapininiika anini tïkane. Ininiäkara akiomaneakorini säkire kona kamaerekataua ate, ininiã Teoso kona apakapaua ate, ininiäkara kona aäuapininiika !atxa Teosokata. !Auari mauiritakoti säkiretxiti käkiti auapininiika inini txïikitakakari.

²² Teoso säkire iökatsopatakorori txari: "Ikininape käkiti kamari maerekati." Kateia äki auakani atoko atxaua, kotxi !aposotari erekari akamini. Teoso sikaenetakiti sikaäka Xesosi Kristo säkire auiäkanimoni.

²³ Xesosi Kristo säkire auikiko apisa, käkiti kateia äki auakani atokokana itxauana. Käkiti moiaäkari atoko itxaua Teoso paniätakiti Moisesimoni sikakori. !Aposotari anirekinimoni asini. Uatxara aposotapitikari anirekinimoni asini, kotxi Xesosi apokapeka ikorapokoriti. Ipinapeka käkiti ikapani, ininiã uatxa aäuikiniäri iua säkire, kona Teoso misiritaikaua uatxa. ²⁴ Kristo mapokakani apisa, ate oerekakari atoko itxaua Teoso paniätakiti iökatsopatakorori. Kristomoni anikakari atoko itxaua ikara. Kristo apokasaaki, Teoso kamaerekataua ate, kotxi aäuikari Kristo säkire. ²⁵ Uatxa apokapeka Xesosi Kristo säkire auikiko. Ininiäkara Teoso paniätakiti iökatsopatakorori !imoiaäkikaua ate.

²⁶ Teoso anaakori hïtxaua, kotxi häuikari Kristo Xesosi säkire. ²⁷ Hïte patxisatapeëkaika, ininiäkara hïpatxisatiko oerekari apanakini Kristo ätipirika himoianatini ikapani. Ininiäkara Kristo atokopeka hïtxa. ²⁸ Ikara atoko aniniã, akinika Kristo Xesosi nakiti atxaua, kotxi akaikotapika iuakata. Xoteoakori, Xoteo minakanuia, nitiritxi, nitiritxi minakanuia, kiki, sito, amakinika Kristo nakiti atxaua. ²⁹ Kristo nakiti pininiãua, Apraão apika mekaniri pitxaua apaka. Ininiã pite apakapapitikariko Teoso sikaenetakiti.

Teoso Anaakori

⁴ Apikomoni nisäpiretaiko hïte äti säkiretxiti. Amarini lapakapari irini tii itakanapakiti iua ikapani, kotxi xapitipanikari. Ikinipoko irini nakiti imi nakiti txapekaua, iuaritika na apakapapanikari. Axapiti-

panika inakasaaki, nitiritxi atoko itxaua. ² Axapitipanika inakasaaki apanakini moiaäri iua. Ninoa nïkatari itxineirote. Irini ketotiniri manapi apokasaaki, imi apakapari ikinika irini tii itakanapakiti. ³ Mitxi iua eenetxi atoko atxaua ate. Nitiritxi atoko atxaua ate.

Akiomaneakorini paniätakiti säkiretxiti amoiaäkiri atoko itxaua, kotxi oerekaua akamakiti tïkane. ⁴ Teoso iokanatarini imi käkitimoni iketo manapisaaki. Sito ito äki aua merepanika, ikinimane käkiti atoko. Iua kïpitari ikinika Teoso paniätakiti iökatsopatakorori. ⁵ Amakamaniäri ikinika Teoso paniätakiti iökatsopatakorori, amisiritiko auapitika. Xesosi makatxakaua ate amamisiritakoni ikapani. Ininiã Teoso anaakori atxaua.

⁶ Teoso anaakori aniniãua, Teoso iokanatarini Erekari Matamatakoti imi nakiti aäkixiniremoni. Ininiã iua Erekari Matamatakoti aäkixinireë auiniã, aäkiritari Teoso: "Papai, niri," atxariko. ⁷ Ininiã nitiritxi atoko !atxaikaua. Teoso anaakori atxapekaua. Iua anaakori aniniãua, ikini isikaenetakiti isikaua atemonikari, kotxi Kristo makatxakapekari amaerekani.

!Erekaxinireri Paoro Karásia Auakani Xika

⁸ Mitxi hïte !imarotari Teoso. Iusaaki nitiritxiakori amotakoni atoko hïtxaua. Hïparïkauata teoso minakanuia ikapani. ⁹ Uatxa hïte imarotari Teoso. Ari, uatxa Teoso imarotai hïte. Ininiã kinirepa hïte nirekari hïkanapiriini mitxi hïauïteakorimoni. Kona kaposotiirena ninoa. !Kïïkitena ninoa. Kinirepa hïte nirekari iuaïkana ninoa nitiriakori amotakoni atoko hininiãua? Kinirepa hïte nirekatari iuaïkana häuikiniri ninoa oereëkiti säkiretxiti? ¹⁰ Hïte nirekari Xoteo kamakiti atoko inakari hïkamini. Hïuäkatari Teoso apokaerekatini hïte, kotxi ninoa kiinirite atokotxikana hïte apaka kama. ¹¹ Ininiã !erekaxinireno nota ikara nikenakoentini. Atauako maxikatïika nota säpiretari Teoso säkire hïtemoni?

¹² Nitiriakori, nota iteene ötäkikai hïte. Hïtakana-pariko Xoteo kiomaneakorini paniätakiti hïkamini. Nota atoko hïtxako, kotxi hïte sauaki nauakasaaki nota hïte atoko nitxaua. Xoteo minakanuia atoko nitxaua. Hïtekata nauakasaaki, !himisiritano nota. Hïtoretano nota. ¹³ Hïxinikari merepitipanika Teoso iokanapirena erekari hïte nisäpiretakasaaki, namianare xikara nisäpiretai hïte, hïtekata nauakasaaki. ¹⁴ Iusaaki namianatakasaaki, hïparïkauatapitipo nota ikapani. !Hinaiakakano. !Hïokanatanano nisini namianare xika. Hïte apakapano nota Teoso nitiri iaxitikiri häpakapini atokokana. Hïte apakapano nota, Kristo Xesosi häpakapini atokokana. ¹⁵ Iusaaki hïte iteene hïpoxokoni-uata. Nimarotari ereka hinini, kotxi noki amianatakasaaki, hïposotaäkamariko, himakatxakamariko hïteka oki notamoni hïsikini ikapani. ¹⁶ Atauako uatxa himokaiakari nitxataua nota, atão inakari nisäpiretinii xika?

¹⁷ Ninoa kamisirienererini iteene tiretapitikamai hïte, txamari ninoa äkixinire nireëkiti !erekari hïte ikapani. Inirekarina hïte omanatiniua ate. Inirekarina hïte apokaerekatini ninoanoka. ¹⁸ Erekari käkiti iteene

tiretinii hīte, ākixinire inireēkiti erekari inakasaaki. No-ta hītekata nimauakanisaaki apaka, erekari kākiti iteene tiretinii, ākixinire inireēkiti erekari inakasaaki. ¹⁹ Hīte namariteni nota tiretakini atoko hītxa. Hinoro atokotxikana nitxa nota. Kaiamapeka auāenetakaro atoko nitxa, kotxi nota atatsiirauata hīte xika. Kristo kamakiti atokotxikana hīkamakasaaki, iusaakinoka nitsii nākixinire auakari iotoka. ²⁰ Kinirāo auaka nitxa hītekata uatxa. Ninirekari aāpisatoōtakakiniua, ininiā nixinikakiti ipinimonipo itxa atxiīti. !Erekaxinireno nota hīte xika.

Akaa, Sara Pakini

²¹ Hīte Xoteo kiomanekorini paniātakiti nireēkani, himarotatari ninoa sākire? ²² Teoso sākire iōkatsopatakori sāpiretaua, ipi Apraō anaakori aua. Sito niterotxi iamotakitokata aua imi āti. Niterotxi minakotokata itanorokata aua āti imi. ²³ Akaa inakoromoni, niterotxi iamotakitomoni imi aua, kotxi Apraō sirīka oakata. Imi aua Saramoni niterotxi minakotomoni, kotxi Teoso sikaenetari iua imi. ²⁴ Apraō anaakori oerekaua Teoso parīka kākiti īkapani. Iparīka ipi aua, naia sito ipi atoko. Akaa inakoro ākiri nitiritxi amotakori itxaua. Teoso parīka otanoxiratar Sinai inakori iua auakasaaki, niterotxi Akaa atoko itxa. Teoso paniātakiti iusaaki amakamakaniā, amisiritiko auapitikako, nitiritxi amotakori atokotxikana. Nitiritxi makamakaniāri ipatrāote paniātakiti imisiritiko auapitikako.

²⁵ Ininiākara otanoxiratar Sinai inakori Arāpia tixini auakari Akaa atoko itxa. Apaka īkorasaaki Xerosareē sitatxiti oa atokokana itxa, kotxi Xerosareē auakani Akaa anaakori atoko itxana ninoa. Nitiritxiakori amotakoni atoko itxana. Ninoa Xerosareē auakani likamari ikinika Teoso paniātakiti, ininiā Teoso misiritapitikanako ninoa. ²⁶ Āti Xerosareē auapitika, iaxiti auakari Xerosareē, Teoso tixine. Xerosareē iaxiti auakari Sara atoko, kotxi Sara niterotxi amotakoro !otxaua oa. Ate inoro atoko otxaua oa. Sara ākiri atoko atxaua, kotxi amisiritiko !auaika. Aāuikiniāri Xesosi sākire, akiomanekorini kona paniātaikaua ate ninoa nireēkiti akamini. ²⁷ Teoso sākire iōkatsopatakori txari:

Pite sito meenetoi pipoxokoniuatako. Pite sito pauākitakarauatini tsii mimarotakatoi, pixikarauata pipoxokoniritika, kotxi pite takanapakoroi, itori pamariteakori auako. Kītaniri ro poiāoka oamariteakori auako, itxa Teoso sākire iōkatsopatakori.

²⁸ Ininiā nitariakori, Sara ākiri, Isaki inakori atoko atxaua, kotxi Teoso sikaenetari Apraō imi Saramoni auini. Iuatxikana Teoso sikaenetaua Xesosi amaerekani imaktxakini īkapani, Teoso anaakori aniniua īkapani. ²⁹ Akaa ākiri Isimaēo inakori iponaniā, kotxi Apraō nirekari imi, ininiā iua sirīka Akaakata. Sara ākiri Isaki inakori iponaniā Erekari Matamatakoti posotiireē. Eereka Isimaēo misiritari Isaki. Iua atokokana itxa uatxa. Teoso anaakori minakaniua misiritari Teoso anaakori. ³⁰ Teoso sākire iōkatsopatakori txari:

Hīokanataroko niterotxi iamotakoro osipinini imikata, kotxi niterotxi ākiri kona apakapapaniri ipixini iri tii. Niterotxi minakoto ākirinoka apakapari iri tii, itxa Teoso sākire iōkatsopatakori. ³¹ Ininiā nitariakori, niterotxi amotakoro ākiri atoko !atxaua. Niterotxi minakoto ākiri atoko atxaua.

Takaōtxikari !Ikamaerekatari Kākiti

5 Nitiritxi kamari ipatrāote nireēkitinani. Ikara atoko uatxa !atxaika, kotxi aāuikari Kristo sākire. Kristo makatxakapekaua amisiritiko monōkoni. Ininiākara nitiritxi amotakoni atoko iuaīkana !hīttxapeua. !Hāuiritapiri kākiti paniātini ninoa auīākiti hāuikini.

² Hīkenakotako. Nota Paoro sāpiretaiko hīte. Hāuiritiniāri takaōtxikari takiko hītoā Xoteo atoko, ininiā hāuikari takaōtxikari kamaerekatinii hīte Teoso apakapiniī īkapani. Txamari na atāo. Kristonoka kamaerekatari kākiti Teoso apakapiniī īkapani. Erepaniko, pinirekiniāri takaōtxikari, !pinirekaikari Kristo. ³ Iuaīkana nota oṭākikai hīte. Hāuiritiniāri takaōtxikari takiko hītoā Xoteo atoko, ininiā Moisesi paniātakiti ipixini hīkamapeka. Ikara atoko hininiā, ikinika ipaniātakiti hīkamako. ⁴ Ātikaka hīte nirekari Moisesi paniātakiti hīkamini Teoso kamaerekatinii īkapani. Txamari ikara atoko hinirekiniā, hītakanapari Kristo. Ininiākara Teoso !ipositari ikinipoko erekari isikinii. ⁵ Atepekana, ate auikari Xesosinoka txīkitakiniri kākiti ereka inini īkapani, Teoso apakapapiniī īkapani. Ikamaerekataua Erekari Matamatakoti posotiireē, kotxi aāuikari Xesosi sākire. ⁶ Takaōtxikari hītoā auiniā, iua takaōtxikari !ikamaerekatai hīte. Takaōtxikari hītoā mauakaniā, takaōtxikari mauakani likamaerekatai apaka. Kristo Xesosi nakitiakori aniniāua, Teosora kamaerekataua, kotxi aāuikari Xesosi sākire, ininiā atiretari iua.

⁷ Merepanika hīte auikapitikari Xesosi sākire. Kipa xipokatari atāo inakari Teoso sākire hāuikini? Natokopa itxa Teoso sākire atāo inakari hītakanapini? ⁸ Hīte akiritakari itxaua Teoso. Kona iuani xipokari hāuikiniri atāo inakari isākire. ⁹ Kākiti sākire txari: "Pāo ātikaākari axapitiri ipani, iuaritika iātikakakiti itori ipe." Iua atokokana ātika maerekati kamakari xika kaiāopokori kākiti kamari maerekati. ¹⁰ Teoso kamaimaroretano nota hīte takanapiniri hīkerokakiti, atāo inakari hīkamini īkapani. Hīte nitariakori hīttxaua, kotxi Apiananiri nakitiakori atxaua, ininiārako nimarotari nota oṭākikinii iaōka hīkamapanikako. !Nimarotari iua kiki himisirienetakiri. Ia nimarota. Teoso misiritapinikariko iua.

¹¹ Apanakini sāpirenātari: "Paoro paniātari Xoteo minakanua takiniri takaōtxikari iitoāna." Na atāo ninoa sākire. Nipaniātaākamariko takaōtxikari takiko, nimisiriritiko !auamako. Kona nipaniātari Xoteo minakanua takiniri takaōtxikari iitoāna. Ikara xika nimisiritaāka. Nisāpiretari ia: Kristo aamina īpiriāmitakari nopini ipīpe amaerekani imaktxakini īkapani. Kristonoka kamaerekataua Teoso apakapiniua īkapani. Ikara noerekakiti xika nimisiritaāka. ¹² Ninoa kamisirienenerini

nirekiniāri itsiki mata kisauakiko, erekari itsikipati tso-tatiko apaka. Nomanākarauata, ninoa misirienetini xika.

¹³ Nitariakori, Teoso akiritai hīte iua nakitiakori hininiua ũkapani, ininiākara uatxa hīposotari hīteka nireēkiti hīkamini. Iuaritika !hīkamapiri maerekati hīto nireēkiti. Ia hīkamako: Hītiretakakauako ātipirika. Ikara atoko hininiā, himoianatakakauako. ¹⁴ Teoso paniātakiti txari: "Pitiretana apanakini piteka pitiretiniua atokokana." Ikara paniāretxi pikaminiā, pikamapekari ikinika Moisesi paniātakiti. ¹⁵ Kaxipiri ũtopa auakani atoko !hītxape. Ninoa karotakakaua, okakakaua itxana. Erepaniko. Kaxipiri ũtopa auakani atoko hininiā, hīxipokakauako.

Aīto Nireēkiti

¹⁶ Nōtākikare ia atoko itxapaniko: Hāuiritariko Erekar Matamatakoti oerekini iua kimapore ikiniōtika. Iua hīkimapore oereēkari ininiāua, !hīkamapiri maerekati hīto nireēkiti. ¹⁷ Aīto !nirekari Erekar Matamatakoti nireēkiti. Iuatxikana Erekar Matamatakoti !nirekari hīto nireēkiti. Erekar Matamatakoti mokaiakari itxaua aīto. Ininiā aākixinire nireēkiti !aposota akamini aīto nireēkiti xika. ¹⁸ Iua Erekar Matamatakoti oerekiniāi pikimapore ikiniōtika, pikaminiāri iua nireēkiti, ininiā Xoteo kiomaneakorini paniātakiti !oerekaikari pikimapore.

¹⁹ Aimarotapitikari kākiti ũto nireēkiti. Inirekari ũtanir-ixi minakotikatika osirīkini, ũtanorotxi minakotokatika isirīkini, mitxitakari ātokata isirīkini. Kākiti ũto nirekari kākiti xinikaxititini maerekati ũto nireēkiti. Kākiti ũto nirekari āti kākiti ũto, maerekati ikaminina ũkapani. ²⁰ Kākiti ũto nirekari teoso kākiti kamakiti iteosone ũkapani. Kākiti ũto nirekari maerekani matamatakoni paniātakiti ikamini. Kākiti ũto nirekari omanākaretxi, neenamtxi, xikoretxi, norikaretxi, iuikaretxi. Kākiti ũto nirekari kākiti omanatiniri apanakini. ²¹ Kākiti ũto nirekari āti kākiti tii. Inirekari okanitxi, poātakatxi, maerekati kiiniriri ikamini. Ikara atoko inakari maerekati kākiti ũto nireēkiti. Uatxa nipinitai hīte, mitxi nipinitini atokotxikana. Ikara maerekati kamakani !auapani Teoso auītetxi ininiātaāua.

Erekar Matamatakoti Nireēkiti

²² Iua Erekar Matamatakoti aākixinireē auiniā, !ikara atokoni itxa akamakiti. Iua Erekar Matamatakoti aākixinireē auiniā, atiraōkiuata. Apoxokoniua. Erekarinireua. !Katimari aomanākarauatini. Aamonīkarauata. Ereka. Akamaenetakiti akamapitika. ²³ Ate !iuikaua. !Akamari maerekati aīto nireēkiti. Ikara atoko atxa, Erekar Matamatakoti aākixinireē auiniāua. Ikara atoko aniniā, amisiritiko !auari. ²⁴ Kristo nakitiakori aniniāua, !anirekaikari akaminiri maerekati aīto potxitakiti, aīto nireēkiti. Amanirekakiniti aōkini atokokana, aōkapekari maerekati aīto nireēkiti. ²⁵ Erekar Matamatakoti txīkitakari axinire auāki inini, ininiākara makamari ikinipoko iua nireēkiti ikiniōtika. ²⁶ !Apakata

aūiukiniua. !Apakata aneenamauatini. !Apakata axikotakakiniua.

Himoianatakakiniua

⁶ Nitariakori, hīte Erekar Matamatakoti nireēkiti kamakani, himarotakasaakiri aītari kaminiri maerekati, hōtākikariko iua imaerekani itakanapini ũkapani. Hōtākikariko hītiraōkiritika. Iusaaki erepaniko, kotxi atxīiti hīte apaka nirekari iua maerekani atokotxikana hīkamini. ² Himoianatakakauako hītapara poiāonoka inakasaaki. Ikara atoko hininiā, hīkamari Kristo paniātakiti apanakini hītiretini. ³ !Erekar ate iukiniua. Kākiti minakati: "Apiari nota," inakari, iuanika misirienetaua. ⁴ Erekar nataerekatiniri notaka kamakiti. Erekar atxīiti? Nikamakiti ereka ininiā, nipoxokoniua. !Apakata nākixinireē nixinikini: "Iua āti kamakiti apiaerekata. Nota kamakiti poiāo erekar." !Apakata ikara atoko ninini. ⁵ Ikininape kākiti aua iparīka kasāpaniri. Iuanoka posotari ikaminiri.

⁶ Teoso sākire oereēkari oerekiniāi pite Teoso sākire, iusaaki minakati auiniāi pisikari iuamoni. Nipokori atxīiti, txineiro atxīiti, pisika iuamoni, kotxi iua kikiote !auari. ⁷ Piteka !pimisirienetapeuako, kotxi !piposotari Teoso pimisirienetini. Teoso misirienetakari !auari. Pikikioteē mitxi pitakakiti iaōka papakapa. Iua atokokana pikamakiti ereka inini, papakapari erekar. Pikamakiti maerekati inini, papakapari maerekati. ⁸ Pīto nireēkiti pikaminiā, papakapari pīto siākitinoka. Pīto sikai ipīkitxinoka. Teoso misiritapitikai. Erekar Matamatakoti nireēkiti pikaminiā, papakapari iua siākiti. Iua siākiti Teosokata ātipirika pauini ũkapani. ⁹ !Apakata asāpakini erekar ikiniōtika akamini. Makamari erekar ikiniōtika, maiotokakanikaua anini. Erekar akamini amaiotokakaniā, erekar Teoso sikakiti aāpakapini apokapitakako. ¹⁰ Ininiā aposotakasaakiri, makamari erekar ikininapemoni. Merepanika makamari erekar aītariakorimoni Xesosi sākire auīākanimoni.

Imapotōkire Ōtākikaretxi

¹¹ Hātamatariko ia niōkatsopare mitari. Ia iōkatsopari imapotōkire nota niuakoā niōkatsopatakiti. ¹² Apanakini hīte sauaki nirekari ninoaka apokaerekatiko, ininiā isāpiretari kākiti potxitakitinoka. Ninoakara paniātai hī-takiniri takaōtxikari hītoā. Kininiāpa ninoa nirekatari takaōtxikari hītakini? Ninoa misiritiko monōkoni xika, ninoa paniātari Xoteo minakaniua takiniri takaōtxikari ũtoāna, ininiā Xoteoakori potxitari ninoa oereēkiti sākiretxiti. Inirekarina Xoteoakori apokaerekatinina nino. Txamari Kristonoka kamaerekatari kākiti, kotxi ipīpe aamina ũpiriāmitakari nopini kākiti maerekani imaktxakini ũkapani. ¹³ Ninoa kamisirienererini kamari Moisesi paniātakiti takaōtxikari itakinina ũtoāna. Txamari ikinika Moisesi paniātakiti !ikamana. Ninoa nirekari hīte takiniri takaōtxikari hītoā, ininiā eereka ninoa iuikaua, kotxi hīte kamari ninoa paniātakiti. ¹⁴ Kona ninirekari niukiniua. Teoso !nirekari niukini-

ua. Nota iuikari aãuïte Xesosi Kristo. Iuanokara niuika, kotxi iua ipina aamina ïpiriãmitakari nopini ate ïkapani. Ininiã nota !niniãrekaikari Xesosi sãkire mauiãkani nireëkiti. Iuatxikana ninoa !niniãrekaikari nota nireëkiti.

¹⁵ Takaõtxikari hïïtoã auiniã, iua takaõtxikari !ikamaerekatai hïte. Takaõtxikari hïïtoã mauakaniã, takaõtxikari mauakani !ikamaerekatai. Teoso txïkitakiniãi iua anaakori hininiãua, iusaaki ikamaerekatai hïte. Ininiãkara hãkixinire amaneri itxaua. Ininiã mitxi hinireëkiti !hinirekaika. ¹⁶ Teoso kamaerekaxiniretai

hïte, ikara sãkiretxiti hãuikasaaki. Iua amonïkai hïte. Ikara atoko Teoso kamari kãkiti iua nakitiakori ininiuana, atão Isaeo mekaniriakori ininiuana.

¹⁷ Ixipope ia iõkatsopari. Nipinitana nota kamaxiretakani. !Hïkamamaxiretapeno, kotxi nimisiritããkapeka. Nikaro mata auapeka nïïtoã. Auïtetxi nitiri amotakori karo mata atoko itxa nikaro mata, kotxi Api-ananiri Xesosi nitiri nitxaua.

¹⁸ Nitariakori, aãuïte Xesosi Kristo sikari ikinipoko erekari hïte ãkixiniremoni. Ameë.

Épeso

1 Nota, Paoro. Niõkatsopatari ia aãtsopa. Teoso nirekano Xesosi Kristo iokanatakiti nininiua. Ininiã niokanatsopata Teoso nakitiakorimoni Épeso sitatxiti auakanimoni. Kristo Xesosi sãkire auiãkanimoni, ipaniãtakiti kamakanimoni niokanatsopata. ² Aĩri Teoso, Apiananiri Xesosi Kristo pakini sikari ikinipoko erekari hĩtemoni. Ninoa kamaerekaxiniretai hĩte.

Teoso Mereẽua Itixi Kamiko Apisapanika

³ Masãpiretari Teoso, aãũite Xesosi Kristo iri: “Erekapitikai,” kotxi itakapekari ikinika erekari ate ãkix-iniremoni, kotxi Kristo nakitiakori atxaua. Ikara erekari isikakiti Teoso tixinekiri. ⁴ Itakari ikara erekari ate ãkix-iniremoni, kotxi itixi kamiko apisapanika Teoso mereẽpekaua Kristo nakitiakori aniniua. Imereẽua Teoso nireẽkitinoka akamini ĩkapani, maerekati amakamakani ĩkapani, atiraõkiuatini ĩkapani. ⁵ Itixi kamiko apisapanika, Teoso mereẽua iua anaakori aniniua ĩkapani. Xesosi Kristo ipĩpe ate ĩkapani, ininiã iua txĩkitakaua Teoso anaakori aniniua. Teoso txĩkitakaua iua anaakori aniniua, kotxi iua potxitari ikara atoko ikamini. Inirekari ikara atoko ikamini. Erekaripotxitakiti ikamini tĩkane.

⁶ Teoso txĩkitakaua iua anaakori aniniua, kotxi inirekari asãpiretiniri: “Peerekari ikinipoko erekari pisikakiti kãkitimoni.” Teoso sikaua ikara erekari, kotxi iua tirketakiti nakitiakori atxaua.

⁷ Xesosi ĩkitxitari amaerekani, kotxi iarẽka xiketa ate ĩkapani, ininiã Teoso maxinĩkaretari amaerekani. Uatxa !imisiritaikaua amaerekani xika. Teoso kamari ikara ate ĩkapani, kotxi ikinipoko erekari isika atemoni. !Ixipoka ikara erekari Teoso sikakiti. Ikinipoko erekari aua iuamoni. ⁸ Kãkiti kona posotari iaõtiniri erekari Teoso sikakiti ate maerekati kamakanimoni. !Kaiãotikori. Ikinipoko imaroretxi aua iuamoni. Atão inakarınoka imarota ikamini, ininiã ikara erekari ikaminiãua. ⁹ Mitxi !aimarotari Teoso inireẽkiti ikamini tĩkane. Uatxa ikamaimarorettaua. Ipotxitari oerekiniua inireẽkiti. Peerekari iua potxitakiti. ãkixinireẽ ixinikari ikara ikamini. ¹⁰ Teoso ketotini õti manapi, ikinipoko iposope inakasaaki, iua apotiitariko ikinimane itixine auakani, itixiã auakani pakini.

¹¹ Xesosi Kristo nakitiakori atxaua, ininiã aãpakapari ate ĩkapani inĩkatakiti. Itixi kamiko apisapanika ixinikari ikamakiti ate ĩkapani. Ikamari ikinika inirekakiti iaõka. ¹² Iua mereẽua ate, merepitipanika Kristo sãkire auiãkanuia, ikinimane asãpiretini ĩkapani: “Peerekari Teoso. Erekapitikari ikamakiti.”

¹³ Hĩtepekana auikari Xesosi sãkire, atão inakari hĩkenakotakasaaki. Ikara atão inakari Teoso iokanapirena erekari itxaua, kotxi iua iokanapirena oerekai hi-maerekani makatxakiko. Xesosi sãkire hãuikasaaki, Erekarimatamatakoti apoka hãkixinireẽ. Iua Teoso takaõtxikare itxaua. Iua oerekai hĩte Teoso nakitiakori hininiua. Xesosi sikaenetapekari Erekarimatamatakoti atemoni iokanatini. ¹⁴ Isikaenetakiti Erekarimatamatakoti atemoni auape, ininiã aimarotapitikari aãpakapiniri ikinika isikaenetakiti, inĩkatakiti ate ĩkapani. Iuasaaki Xesosi apakapaua ate iua nakitiakori, iua iamotakini, kotxi imaktxakapekari amaerekani. Ikara atoko ininiã, ikinimane kãkiti txari iua: “Peerekai pite. Erekapitikari ikinipoko pikamakiti.”

Paoro Misãkiretiniri Teoso

¹⁵ Ikara atoko ininiã, nota kenakopiretakasaakiri Apiananiri Xesosi sãkire hãuikini, ikinimane Teoso nakitiakori hĩtoretini nikenakopiretakasaaki, ¹⁶ nimisãkiretapikari Teoso hĩte ĩkapani. Nitxari iua: “Erekapitikai, kotxi pite maktxakari ninoa Épeso sitatxiti auakani maerekani,” nitxa. ¹⁷ Teoso, aãũite Xesosi Kristo Teosone itxaua. Xesosi iri itxaua. Kaiotximereri iua Teoso. Nimisãkiretari Teoso hĩte ĩkapani ia atoko: “Pisikaimaroretana ninoa ãkixinire. Ninirekari Erekarimatamatakoti oerekinina pite iteene imarotinina ĩkapani. ¹⁸ Piopinikariko ninoa ãkixinire atão inakari imarotinina ĩkapani. Pite akiritana ninoa ikinipoko erekari apakapinina ĩkapani. Ikara poerekana ninoa imarotirinina ĩkapani, iãtapirinina ĩkapani. Pika-maimaroretana ninoa pite nĩkatakiti pite nakitiakori ĩkapani. Ikara pinĩkatakiti, pisikaenetakiti, peerekari. Itori pinĩkatakiti. !Ixipoka pinĩkatakiti. !Kaiãotikori pinĩkatakiti pinakitiakori ĩkapani. ¹⁹ Pikamaimaroretana ninoa kaposotiire pinini. Ininiã piposotari iteene pisikaposotiiretinuia ate pisãkire auiãkani. Ikara piposotiire !auari ãtimoni. Pataparari pite posotiire.” Ia atoko nimisãkiretari Teoso hĩte ĩkapani.

²⁰ Ikara Teoso posotiire õkitikari Kristo ipĩkani sauaki auakasaaki. Iposo atoko iposotiireẽ itakari Kristo apiari topãkiniãtaã, ikikomoni itixineẽ. ²¹ Ininiã Kristo Apiananiri itxaua. Iua posotiire apiata. Maerekani matamatakoni auĩteakori posotiire poiãoka. ĩkorapokoriti auĩtetxiakori posotiire poiãoka. Kristo posotiire apiata. ĩkorasaaki Kristo Apiananiri. Apaka katana Kristo atoko inakari !auari. !Auari ãti kaposotiireri Kristo atoko. Kristo apiata. ²² Teoso txĩkitakari Kristo ikinimane auĩte ininiua. Itakari ikinimane imokaiakariakori

ikiti patapi, ininiã Xesosi paniãtakinoka ikamana. Imokaiakari !auaika. Ininiã ikinipoko Teoso kamakiti auïte itxaua Kristo. Teoso sikari iua isãkire auïãkani auïte ininiua. Inakitiakori kii atoko itxa Xesosi. ²³ Iua ïto atoko itxa inakitiakori, ininiã ikinimane inakitiakori sauaki iua aua. Itxïkitakari ikinipoko atão inini.

Mitxi Ipïkani Atoko Atxaua

2 Hïtepekana, Xesosi txïkitapekari hïxinire auãki inini. Mitxi, isãkire hãuikini apisapanika, ipïkani atoko itxa hãkixinire, Teoso manirekakiniti hïkamini xika, himaerekani xika. ² Iuasaaki hïte kamari ikini sereti maerekati, ïkorapokoriti auakani maerekani atokokana. Iuasaaki hïkïpitari Satanasi sãkire, maerekani matamatakoni auïte sãkire. Iua, initiriakorikata aua ïtima auiniãtaã. Iua parïkauata Teoso sãkire makïpitakani xinire ãki. ³ Mitxipeka amakinika ate Teoso sãkire makïpitakani atxaua, kotxi akamari maerekati aïto paniãtakiti. Iuasaaki akamari maerekati aïto nireëkiti. Akamari maerekati axinikakiti iaõka iuasaaki. Ikinimane itixi auakani atoko, ate, apanakini apaka maerekati kamakani atxaua iuasaaki, ininiã Teoso omanãkarauata amaerekani xika. Iposope amisiritiko.

⁴ Iuaritika Teoso iteene amonïkaua. Kaamonïkareri Teoso atoko inakari !auari. Iua iteene tiretaua. Ate maerekati kamakani atxaua, iuaritika itiretaua. ⁵ Ipïkani atoko anakasaaki, maerekatinoka akamakasaaki, iuasaaki itxïkitakaua auãki anini, Kristo auãki inïkitakini atoko. Iuasaaki imaktxakari amaerekani, kotxi inirekari ikinipoko erekari isikiniua. ⁶ Ininiã Teoso õkitikaua ipïkani sauaki aãuakasaaki, Kristo õkitikini atokokana. Ininiã itixineë Teoso takaua ate aïtopãkini Kristo Xesosikata, kotxi iua nakitiakori atxaua. ⁷ Ininiã katanarako ätipirika inirekari oerekiniri ikinipoko erekari atemoni. Erekarisikakiti !ixipoka. !Kamapotõkireri. Kona erekaua, iuaritika iteene itiretaua, kotxi Xesosi Kristo nakitiakori atxaua. ⁸ Atemoni erekari isikakitinokara makatxakari amaerekani, isãkire aãuikasaaki. Ininiã !aposota ateka maerekani amaktxakini, kotxi maerekati kamakani atxaua. Teoso sikakitinokara makatxakari amaerekani. ⁹ Akamakiti erekari !iposotari amaerekani imaktxakini. Ininiã kãkiti iuikiniua !auari. Teosonokara posotari imaktxakiniri kãkiti maerekani. ¹⁰ Peerekari Teoso parïka aãkixinireë, kotxi ikamaua ate ereka anini. Ininiã Xesosi Kristo nakitiakori atxaua. Ikara iparïka amaneri. Ikamaua ate amaneri anini, erekari akamini ïkapani. Ikara ikamini apisapanika Teoso xinikari ikara. Iuasaaki inirekari erekarinoka akamini.

Kristo Nakitiakori Ätïka Nirimanetxi

¹¹ Xoteo minakanuia hïtxaua, kotxi ikara atoko hïponaniã. Teoso takaõtxikare auãïtotakini takauãkatai hïte: "Teoso takaõtxikare mauãïtotakini." Xoteoakori auari ikara Teoso takaõtxikare, kotxi ikisauakarina amarini tsiki mata axapiti. Ikara oerekari Teoso nakiti-

akori ininiuana. ¹² Hïxinikariko mitxi, Kristo sãkire hãuikini apisa, Kristo !auari hïtemoni. Iuasaaki maparakini atoko hïtxaua. Isaeokini !hïtxaua. Ätião hïtxaua. Ikara xika kona hïte posotari hãpakapiniri Teoso sikaenetakiti iuasaaki. Iuasaaki !himarotari Xesosi makatxakiniri himaerekani. Iuasaaki !himarotari Teoso.

¹³ Uatxa Kristo Xesosi apakapapekai hïte. Mitxi ïtakoxiti auakani atoko hïtxaua, iuaritika uatxa iua minai hïte Teosomoni, kotxi Kristo arëka xiketa hïte ïkapani.

¹⁴ Iuanokara kamaerekaxiniretaua, ininiã ixipokari Xoteo, Xoteo minakanuia pakini omanatakakiniua. Ikara omanãkaretxi paretxi atoko itxa. !Auiritari Xoteo sini Xoteo minakonimoni. Uatxa ätïka nirimanetxi atxaua. ¹⁵ Kristo ipïkasaaki, ixipokari ikara omanãkaretxi, kotxi iuasaaki ikamari ikinimane ïkapani. Ikara Xoteoakorimoni sikakori. !Isikaãka Xoteo minakonimoni. Ininiã Kristo ipïkasaaki, itxïkitakana Xoteoakori, Xoteo minakanuia pakini ätïka kãkiti amaneri atoko inini. Neenamatzï !auaika, kotxi Kristo kamaerekaxiniretaua amakinika. ¹⁶ Ipina aamina ïpiriãmitakari nopini, ininiã iuasaaki iuaïkana iminana Xoteoakori, Xoteo minakanuia pakini Teosomoni. Ätïka nirimanetxi atoko iminana Teosomoni. Iuasaaki ixipokari Xoteoakori, Xoteo minakanuia omanatakakiniua. ¹⁷ Xesosi apoka ïkorapokoriti Teoso iokanapirena erekari isãpiretiniri kãkiti. Isãpiretari kãkiti, Teoso omanatiniri kãkiti imaerekani xika xipope, Xesosi sãkire auikasaakina. Isãpiretai hïte Xoteo minakanuia. Apaka isãpiretari Xoteoakori. Mitxi õtakoxiti auakani atoko hïtxaua, kotxi iuasaaki !himarotari Teoso sãkire. Mitxi Xoteoakori imarotari Teoso sãkire, ininiã Teoso takote auakani atoko itxauana. ¹⁸ Erekarimatamatakoti ätinoka aua. Kristo sãkire aãuikasaaki, iua Erekarimatamatakoti anikaua aïri Teosomoni. Anikari Xoteoakori, Xoteo minakanuia pakini iuamoni.

Teoso Aapoko Atxaua

¹⁹ Uatxa Teoso mimarotakani !hïtxaikaua. Uatxa äti uãka !hïtxaikaua. Teoso tixine auakani hïtxaua, apanakini Teoso sãkire auïãkanikata. Iua aapoko auakani hïtxaua.

²⁰ Teoso aapoko atoko atxaua. Aapokotxi kamaãka kaikori nopini imirikakani ïkapani. Xesosi moianariakori tosi pakini, iua iokanatakini kãkitimoni, ninoa sãpiretakiti iua kaikori atoko itxa. Kitxakapirïka Teoso sãkire sãpiretakani sãpiretakiti apaka iua kaikori atoko itxa. Aapokotxi aua ätïka kai mitari, apanakini kai soro maïkakari. Xesosi Kristo iua kai mitari atoko itxa.

²¹ Ininiã iua maïkaua. Iuakata aãua, ininiã kãkiti itoãpotari auikiniri Xesosi sãkire. Apiananiri aapoko aneeãpotini atoko itxa. Iua Apiananiri aapoko atoko atxa. Imisãkiretiko aikoti atoko atxa. ²² Ininiã iua apotitai hïte hïkinika iua aapoko hininiua ïkapani, kotxi Teoso auiniãtaã hïtxaua. Erekarimatamatakoti auiniãtaã hïtxaua apaka.

Paoro Sāpiretari Teoso Sākire Xoteo Minakonimoni

3 Ikara atoko ininiā, nota Paoro kateia āki naua, hīte Xoteo minakaniua Xesosi Kristo sākire nisāpiretini xika. Kateia āki naua, kotxi nauikari Xesosi sākire.

² Hīkenakopiretapekari parīkatxi Teoso sikakiti notamoni, isākire Xoteo minakaniua nisāpiretini ūkapani. Ikinipoko erekari isika notamoni, hīte nisāpiretini ūkapani. ³ Teoso oerekapekano kākiti mitxi mimarotakiniti. Mitxi axapitiki ikara Teoso oerekakiti niōkatsopatapeka hītemoni. ⁴ Uatxa ia hātatsopatakasaaki, hīposotari himarotini nimarotakiti, kākiti mitxi mimarotakiniti, Kristo parīka kākiti ūkapani. ⁵ Kitxakapirīka kākiti kona imarotari ikara Kristo parīka kākiti ūkapani. Uatxa Erekari Matamatakoti oerekari ikara Xesosi iokanatakinimoni. Apaka oerekari ikara Teoso sākire sāpiretanimoni. Teoso parīkanoka ikamana ninoa. ⁶ Nisāpiretai hīte kākiti mitxi mimarotakiniti. Xoteo minakaniua apakapariko Teoso nīkatakiti itixineē, Xoteoakori apakapiniri atokotxikana. Xoteo minakaniua, Xoteoakorikata Kristo ūto atoko itxauana. Xoteo minakaniua apakapariko Teoso sikaenetakiti, Xoteoakori apakapiniri atokotxikana. Teoso iokanapirena erekari sāpiretari kākiti isikaenetakiti, kotxi isikari Kristo, Xoteoakori maerekani, Xoteo minakaniua maerekani apaka imaktxakini ūkapani. Ikara kākiti mitxi mimarotakiniti.

⁷ Teoso iokanatanona nota kākitimoni iua iokanapirena erekari nisāpiretini ūkapani. Ikara parīkatxi isikano, kotxi ikinipoko erekari Teoso sikano nota iposotiireē.

⁸ Itomaneri Teoso nakitiakori poiāorini, iuaritika nota poiāori nininiua atoko inakari !auari. Iuaritika Teoso sikano ikinipoko erekari, kotxi iokanatanona Xoteo minakonimoni erekari Kristo auakiti nisāpiretinina ūkapani. Ikara erekari !ixipoka. Itori. !Kimarotikori ikinipoko erekari Kristo auakiti. ⁹ Apaka Teoso nirekari noerekiniri ikinimane, ikara mitxi imimarotakiniti, Teoso nakitiakori tirketakiniua. Itixi kamikosaaki, Teoso kipatari ikara kākiti mimarotakiniti. Ikipatiniritika uatxa ikara noerekari ikinimane. Teoso kamakasaakiri itixi, Xesosi Kristokata ikamari ikinipoko. Mitxi kona xatiki !auari. ¹⁰ Uatxa Teoso nirekari imereēkini oerekiniri ikinipoko Teoso imarore auētetxakori matamatakonimoni, Teoso tixine auakanimoni. ¹¹ Itixi kamiko apisapanika, ātipirika Teoso nirekari aāuīte Kristo Xesosi kaminiri ikinika inirekakiti kākiti ūkapani. ¹² Kristo kamakiti ate ūkapani aāuikiniā, aposotapitikari aāpokini Teosomoni, ininiā !kapīkareua Teosomoni aāpokini. Ataparaxinireritika asari iuamoni. ¹³ Ininiākara nōtākikai hīte. !Himatinaniuatape nimisiritiko xika. Nimisiritiāka hīte ūkapani, Xesosi sākire hāuikini ūkapani, ininiā hīuikariko nimisiritiko. Teoso auiritari nimisiritiko, kotxi iua iteene tiretai hīte.

Iuaīkana Paoro Misākiretiniri Teoso

¹⁴ Teoso nirekakiti kākiti ūkapani nixinikasaaki, nikapotoreēkaua aāuīte Xesosi Kristo iri apisatoō, nimisākiretiniri ūkapani. ¹⁵ Ikinimane Teoso nakitiakori, itixine auakani, apaka ikinimane ūkorapokoriti auakani apakapari iua uāka. ¹⁶ Ia atoko nimisākiretari Teoso hīte ūkapani: "Peerekai pite. Ikinipoko erekari aua pite-moni. !Ixipoka ikara erekari. Ininiākara, pisikaposotiiretana Épeso auakani ākixinire. Ninirekari Erekari Matamatakoti iteene sikataparatinina ninoa ākixinire. ¹⁷ Ninirekari iteene auikinirina Kristo sākire, ininiā Kristo auapika ākixinireēna. Ninirekari ninoa iteene imarotini pite tiraōki. Takari kotsa kipatxi erekari āki auini atokokana, ninirekari ninoa kaiketini pitekata pitiraōki sikataparatinina ūkapani. Imarotiniārina pitiraōki, !irikana. !Ikamarina maerekati. ¹⁸ Ninirekari ninoa, pinakitiakori, apanakini pinakitiakori pakini, imarotini Kristo tiraōki kākiti ūkapani, kotxi Kristo tiraōki !ixipoka. !Kaiāotikori iua tiraōki. ¹⁹ Kākiti kona posotari imarotini ikinika Kristo tiraōki. Ninirekari ninoa Épeso auakani apakapiniri ikini sereti erekari pisikakiti ākixinireēna, pite atāo imarotini ūkapani." Ikara atoko nimisākiretari Teoso hīte ūkapani.

²⁰ Ininiā uatxa maxinikariko iua. Kaposotiireri apiatakari itxaua. Ikinipoko iposota ikamini. Imaposotakiniti !auari, ininiā ikinika aamanaākiti, ikinika axinikakiti pakini, iposota ikamini. Ari, apikomoni iposota ikamini ate ūkapani. Axinikakiti, aamanaākiti poiāoka. Apiata iposotiire. Iua posotiire parīkauata aākixinireē. ²¹ Ininiā Teoso mereēkini kitxakapirīka auakani, uatxa auakani, katana auakani pakini ātipirika txariko Teoso: "Peerekai pite. Apiananiri pitxaua." Ikara atoko itxana, kotxi Xesosi Kristo makatxakari amaerekani Teoso anaakori aniniua ūkapani. Ameē.

Xesosi Auiākani Ātika ūto Atoko Itxauana

4 Kateia āki naua, kotxi nauikari Apiananiri sākire. Ininiā nota iteene ōtākikai hīte ikiniōtika atāo hīkamini, kotxi Teoso akiritai hīte iua anaakori hininiua ūkapani. Ikara atoko hininiā, iua kamakiti atokokana hīkamako. ² Ininiākara !hīuikapeua. !Hinirekapiri hinirekakitinoka hīkamini. Hāuiritariko āti kaminiri iua nirekakiti. Katima homanākarauataka !hītxapeko. Himīteenekakauako hīkerokasaakiri hīkamakiti. Hītiretakauako. ³ Erekari Matamatakoti txīkitakari axinikakiti, anireēkiti pakini ātinoka inini, kotxi iua kamarekaxiniretaua. Ininiākara hīparīkauatako ikara atoko auini ūkapani. ⁴ Xesosi ūto atoko atxaua. Ātika ūto, ininiā ūtotxi ātika atoko atxaua. Erekari Matamatakoti ātinoka aua. Teoso akiritakasaakii inakitiakori hininiua, hiātapariko hāpokini iua tixine uakata hāuini ūkapani. Ininiā ātinoka hiātapakiti. ⁵ Ātinokara Apiananiri aua. Ātinokara aāuīākiti sākiretxiti aua. Ātinokara apatxisatiko. ⁶ Ātika Teoso aua. Iua ikinimane iri ātika aua. Iua ikinimane apisatoō apiatakari itxaua. Ikini itixiti iua aua. Amakinika aākixinireē iua aua.

Teoso Sikakiti Atemoni

⁷ Kristo sikapekari iposotiire ate amakinimoni iparīka akamini īkapani. Iposotiire isikaua aparīka akamini īkapani. Aparīka pamimari, ininiā apiata isika iposotiire atemoni. ⁸ Kotxi Teoso sākire kitxakapirīka txari:

Ikanīkasaaki itixinemoni, imikanapiriāna kākiti mitxi imokaiakari maīkakini. Iuasaaki isikari erekari kākitemoni.

⁹ Iua kanīka, kotxi mitxipe iua katxaka itixi patapixiti ipīkani auiniātaā. ¹⁰ Iua itixi patapixiti katxakakari, iuatxikana kanīka iaxiti apiko nopinixiti, ininiā uatxa iua aua ikini itixiti, iaxiti, Teoso tixine pakini. !Auari iua mauakaniātaā.

¹¹ Iposotiire isikasaaki isākire auiākanimoni, isikari ia atoko parīkauatakani ininiuana īkapani: Kristo iokanatakini kākitemoni, Teoso sākire sāpiretakani, Teoso iokanapirena erekari sāpiretakani, Teoso nakitiakori ōtākikakani, Teoso sākire oerekakani pakini isikaua. ¹² Ikara atoko isikaua, kotxi inirekari ninoa oerekiniua inakitiakori iparīka atāo akamini īkapani. Ikara atoko isikaua, kotxi ninoa sikataparaxiniretaua. ¹³ Ninoa sikataparaxiniretiniritika ātika aāuiākiti auako. Ipinimoni inakari aāuiākiti !auaika, kotxi atāo aimarotariko Teoso ākiri sākire. Ininiā kiīkitekua, kimaroreua iuasaaki. Kristo atoko atxauako, kotxi paimatireri iua.

¹⁴ Ininiā iuasaaki amarini atoko !atxaikaua, kotxi amarini !imarotari atāo inakari. Tsakati anikakiti atoko, ītima anikakiti atoko itxana kākiti kamisirienereri sākire auiākani. !Imarotarina atāo Teoso sākire. Ninoa kamisirienereri xinikaxitita atāo minakati oerekini īkapani. ¹⁵ Atāo inakarinoka asāpiretako kākiti atiraōkiritika. Ikara atoko akaminiā, aimarore aneeāpota. Kristo sākire iteene aāuikaāpota. Erekari akamakiti aneeāpota. Ininiā Kristo atoko atxaua, kotxi iua īto atokotxikana atxaua. Ate kii atoko itxaua Kristo.

¹⁶ Ītotxi kamari ikii paniātakiti. Iua atokokana ate kamari Kristo paniātakiti. Ininiā aāpotiitaua. Amoianatakakaua Kristo parīka akamini īkapani, kotxi ītotxi ātika atoko atxaua. Kristo sikataparataua amoianatakakiniua. Ininiā ikinika Kristo nakitiakori atāo parīkauatiniā iua īkapani, apiaāpota aimarotari iua imarore atāo akamini īkapani. Akinika atāo aparīkauatiniā Kristo īkapani, ikamataparaxiniretaua. Iuasaaki atiretakakaua. Iuasaaki ītotxi erekari, mami-anatakati atoko itxaua Kristo nakitiakori.

Aāuini Amaneri

¹⁷ Ikara atoko ininiā, ia nisāpiretai. Apiananiri imaroreē iteene nōtākikai. !Hīkamapinikariko apanakini Xoteo minakaniua kamakiti atoko. !Kiīkiteri ninoa kamakiti. !Kiīkiteri ixinikakitina. ¹⁸ !Imarotarina atāo inakari. Mapiāri atoko itxa iīkitena. Ikara atoko ininiā, !kimarorena. Teoso !itxīkitakana auapininiika ininina, kotxi ākixinireēna !inirekarina atāo inakari imarotinina. ¹⁹ Ninoa ākixinire āpatapeka, ininiā !ipētauatana maerekati ikamakasaakina. Ininiākara ninoaka sikaua

Satanasimoni iītona nireēkitinoka ikaminina īkapani. Ininiā ikamarina ikinika maerekati. Itori maerekati inireka ikaminina. !Inirekarina iotokakinirina ikara maerekati ikaminina.

²⁰ Hītepekana, ikara maerekati !hōerekaāka, Kristo himarotakasaaki. ²¹ Iuasaaki hīkenakotapitikari iua sākire. Iua oerekai atāo inakari, kotxi Xesosi imarotari ikinipoko atāo inakari. ²² Hōerekaāka hītakanapiniri maerekati mitxi hīkamakiti, hīxinikakiti pakini. Himāka kitxakari hōkini atokokana hītxapaniko himaerekani hītakanapini. Hītakanapariko ikara kitxakari hinireēkiti, kotxi ikara maerekati hinireēkiti misirienetai. ²³ Ininiā eereka hamanaāriko Teoso txīkitakiniri hīxinikakiti, hinireēkiti pakini amaneri inini. ²⁴ Ininiā himāka amaneri hīeretakini atokokana, amanerinoka atāo inakarinoka hīkamako, kotxi Teoso txīkitakai hīxinire amaneri inini, Teoso atoko hinini īkapani. Ininiā atāo inakari himarota. Erekarinoka hīkama. Teoso īkapani-nanira hīparīkauatako.

²⁵ Ininiā aāpirena kona hīkamape hītariakorimoni. Atāo inakarinoka hīsākiretako, kotxi amakinika ate ātika ītotxi atoko atxaua. ²⁶ Hinaiatakasaakia, !hāuiritapiri homanākare txīkitakinii maerekati hīkamini. Himakini apisapanika, hītokakariko homanākarauatini. ²⁷ Ikara homanākare himatakanapanisaaki, hāuiritari Satanasi txīkitakinii maerekati hīkamini, ininiā !hāuiritapiriko iua.

²⁸ Atxīiti hītiriuatapeka, ininiā !hītiriuatapinikako. Hīparīkauatako. Erekari parīkatxi hīuakoā hīkamako, hīparīka īki hāpakapini īkapani. Ininiā eereka aua minakati hītemoni, kākiti minakati mauinakinimoni hīsikini īkapani. ²⁹ Maerekati sākiretxiti !hīsāpiretapiri kākiti. Erekarinoka hīsāpiretako, hīsākire kenakotakani hīsikataparaxiniretini īkapani, ikinipoko erekari Teoso sikakiti ninoa apakapini īkapani. ³⁰ Kona hīkamamatinanitamapiri Erekari Matamatakoti Teoso nakiti himaerekani xika. Erekari Matamatakoti Teoso takaōtxikare itxaua. Teoso sikapekari iua atemoni, ininiā aimarotapitikari aāpakapiniri ikinipoko Teoso sikaenetakiti Kristo uai kanapiriākasaaki. Iuasaaki imaktxakaua ikinika maerekati auiniātaā. ³¹ !Hinīkatapiri homanākare hākixinireē. Katima naiataka !hītxapeko. Ātipirika apanakini homanatini, hītakana-pako. !Hītxitapiri āti. !Himisākirepiretapiri āti. Ikini sereti maerekati ikara atoko inakari hītakanapako. ³² Erekari hīkaminakakauako. Hiamonīkakauako. Himaxinīkaretariko maerekati āti kamakiti hītemoni, maerekati ate kamakiti Teoso maxinīkaretini atokotxikana. Teoso maxinīkaretari amaerekani, kotxi Kristo ipina ate īkapani.

Hītiraōkiuatako Ikiniōtika

5 Teoso anaakori itiretakini hītxaua, ininiā hīkamari Teoso kamakiti atokotxikana. ² Hītiraōkiuatako ikiniōtika, Kristo tiritiniua atokotxikana. Iuaka isikaua Teosomoni, kotxi ipina ate īkapani. Teoso apokaerekatari Kristo ipinini ate īkapani. Peerekari isikiniua Teosomoni.

³ Teoso nakitiakori hĩtxaua, ininiã kona ninirekari nikenakopiretiniri pĩtaniri minakotikatika, pĩtanoro minakotokatika pisirĩkini. !Apakata maerekati hĩto nireẽkiti hĩkamini. !Apakata maerekati hĩto nireẽkiti hĩxinikini, hĩsãpiretini. Ikara hĩxinire txikotakari hĩ-takanapako. Txineiro potxitakani !hĩtxapeuako.

⁴ !Hĩsãpiretapiriko sãkiretxi maerekati. Sãkiretxi mĩĩkiteti apaka !hĩsãpiretape. !Hinapetapiri ãti. Hĩsãki-rauatakasaaki, hĩtxariko: "Peerekari Teoso, kotxi isikaua ikinipoko erekari." ⁵ Aimarotari ia: !Tanoro minakotokatika sirĩkakari, maerekati iĩto nireẽkiti kamakari, txineiro potxitakani pakini !liteosonetari Teoso. Teoso kamakari misãkiretakani atoko itxana. Ikara atoko inakani !lapakapari Teoso sikaenetakiti iua anaakorimoni, Kristo, Teoso pakini auĩtetxi ininiã-taãua.

⁶ Kona hãuiritapiri kãkiti misirienetini hĩte mĩĩkiteti sãkiretxitiã. Kona !hãuikapiri ninoa sãkire, kotxi ikara atoko inakari maerekati xika, Teoso misiritariko isãkire makĩpitakani. ⁷ Ininiã ikara atoko inakani moianariakori !hĩtxapeuako.

Pokamara Atoko Hĩtxaua

⁸ Mitxi hĩte mapiãri atoko hĩtxa, kotxi !himarotari Apiananiri iusaaki. Uatxa hĩte imarotapitikari iua, ininiã pokamara atoko hĩtxaua. Ininiãkara erekarinoka hĩkamako ikiniõtika. ⁹ Erekari Matamatakoti auakasaaki kãkiti ãkixinireẽ, erekarinoka inireka ikamini. Atãonoka ikama. Atão inakarinoka isãpireta. Ikara atoko inakari Erekari Matamatakoti sikakiti. ¹⁰ Hinitariko Apiananiri nireẽkiti hĩkamini !tkapani. ¹¹ Ikara atoko ininiã, kona himoianatapiri kãkiti maerekati kamakani, kotxi ikara parĩkatxi ipiaã potoriakari. Ikara atoko inakari parĩkatxi !iminari erekari atemoni. Ininiã maerekati !hĩkamape. Ia hĩkamako. Hõerekariko kãkiti maerekati makamakani. ¹² Apẽtauata asãpiretiniri Teoso sãkire makĩpitakani kamakiti ipiaã, kotxi apia maerekati !korara. ¹³ Ikinika tirikapi kamara auiniãtaã atamataãka, ¹⁴ kotxi tirikapi iopinikari ikinika. Ininiã ãti txari: "Himereka, imakakani atoko inakanii. Hõkitikauako ipĩkani atoko inakanii. Ininiã iusaaki Kristo iopinikariko hãkixinire."

Mĩĩkiteti !Hĩtxapeua

¹⁵ Erepaniko. Atão inakari hĩkamako ikiniõtika. !Hĩkamapiri mĩĩkiteti kamakiti atoko. Hĩkamariko kãkiti kiĩkiteri kamakiti atoko. ¹⁶ Hĩkamariko erekari, kotxi poiãonoka hãuini. Hĩkamariko erekari ikiniõtika, kotxi maerekati auapitika !korasaaki. ¹⁷ Ininiã mĩĩkiteti !hĩtxapeua. Himarotariko Apiananiri nireẽkiti.

¹⁸ Kona hiãtapero iãriã kapoãro hĩpoãtini !tkapani, kotxi itxĩkitakai maerekati hĩkamini. Hãuiritariko Erekari Matamatakoti txĩkitakinii erekarinoka hĩkamini. ¹⁹ Hĩsãpiretakakaua xikari Teoso !tkapani, xikari kitxakari, xikari !korapokoriti auakari pakini. Hĩxikaretari ikara atoko inakari xikari Teoso !tkapani. Hãkixinireẽ apaka hĩxikarauata Teoso !tkapani. ²⁰ !tipirika hĩtxariko

ãri Teoso: "Erekapitikai pite, kotxi erekari ikinipoko pisikakiti atemoni." Xesosi Kristo aãuĩte ininiua, asãpiretari Teoso ikara atoko inakari.

Tanorotxi Pirena.

²¹ Hĩpaxitakakauako, ãti nirekakiti hĩkamini, kotxi hĩpĩkariko Teoso manirekakiniti hĩkamini. ²² Ininiã hĩte sitoakoro hĩkamariko hĩtaniri nireẽkiti. Apiananiri nireẽkiti hĩkamini atokokana hĩkamariko hĩtaniri nireẽkiti, ²³ kotxi pĩtãniri pikii atoko itxaua. Ininiã iua piauĩte itxaua. Iua atokokana Kristo inakitiakori kii atoko itxaua Kristo. Iua !to atoko atxaua. Aãuĩte itxaua. Amaerekani makatxakakari itxaua. Ininiã sito kamariko oĩtaniri paniãtakiti. ²⁴ Ininiã kãkiti Kristo nakitiakori kamari Kristo nireẽkiti. Iua atokotxikana sito kamariko ikinipoko oĩtaniri nireẽkiti.

Taniritxi Pirena

²⁵ Hĩte taniritxi, hĩtiretaroko hĩtanoro. Kristo tiretinina inakitiakori atokokana, hĩtiretaroko hĩtanoro. Iua iteene tiretana, kotxi ipina inakitiakori !tkapani. ²⁶ Iua ipina, kotxi inirekari itxĩkitakiniiua ate iua nakitiakori aniniua. Inirekari imaktxakiniri amaerekani. !paraã maktxakiniri aĩto txiko atokokana, iua sãkire maktxakari amaerekani aãkixinireẽ auakari. ²⁷ Kristo ipina inakitiakori !tkapani, kotxi inirekaua iposope anini ate apakapini !tkapani. Iusaaki peerekaua. !tika amaerekani !auaika. !tika akerokakiti !auaika. Ikara atoko inakari maerekati !auaika. Iusaaki atão Teoso nakitiakori atxaua. Erekarinoka akama iusaaki. ²⁸ Ikara atoko ininiã, kiki tiretaroko !tanoro, iĩto itiretini atokokana. !tanoro tiretakari iuaka itiretaua. ²⁹ Kãkiti !omatari iuaka !to. Isikakienatari. Itiretari. Apiananiri tiretiniri inakitiakori atokokana, kãkiti tiretari iuaka !to. ³⁰ Apiananiri !to atoko atxaua. Ixini atoko atxaua. Api atoko atxaua. Ikanoke atoko atxaua. Iuako atoko atxaua. Itxaãpota. ³¹ Iua !to atoko atxaua, ininiãkara kiki !tanorouatakasaaki, itakanapana iri, inoro pakini !tanorokata ikaikotini !tkapani. Ininiã !tinoka !totxi atoko itxauana. ³² Nisãpiretai mitxi !kimarotikori. Kristo inakitiakorikata !tika !totxi atoko itxauana. Kãkiti !imarotari ikara mitxi. ³³ Ininiã pitiretaroko pĩtãnoro piteka !to pitiretini atokokana. Pite tanorotxipekana, pipaxitariko pĩtaniri.

Amarini Pirena

6 Hĩte amariniakori, hĩkĩpitanako hĩri, hinoro pakini sãkire, kotxi ikara Apiananiri paniãtakiti. Atão pikĩpitanako ninoa sãkire. ² Kitxakapirĩka Teoso sãkire paniãtaua:

Hĩpaxitanako hĩri, hinoro pakini. Ikara Teoso paniãtakiti hĩkaminiã, Teoso sikaenetakiti isika hĩtemoni. Mitxi Teoso paniãtakiti !uari Teoso sikaenetakiti.

³ Hĩri, hinoro pakini sãkire hĩkĩpitiniã, ia isikaenetakiti apokapitikako hĩtemoni. Hĩkĩpitiniãri ninoa sãkire,

erekari hāuini. Hīkīpitiniāri ninoa sākire, hāuiniritika kiomātxi hītchauako.

Irītxi Pirena

⁴ Hītepekana irītxiakori, kona hītīkitakapena hamariteakori omanākarauatini atāo minakati hīkamini xika. Hōerekanako Apiananiri nireēkiti ikaminina. Hōerekanako Apiananiri sākire imarotini.

Nitiritxi Pirena

⁵ Hītepekana nitiritxiakori amotakoni, hīkamariko hīhāuīteakori īkorapokoriti auakani paniātakiti. Hīpaxitanako ninoa. Hīpīkariko ninoa manirekakinini hīkamini. Hākixinireē hinirekariko ninoa nireēkitinoka hīkamini. Kristo paniātakiti hīkamini atokokana, hīkamariko ninoa paniātakiti. ⁶ !Hīparīkauatapeko hīparīka erekari apanakini atamatini īkapani īkapani, kotxi iusaaki hinirekari ninoa poxokotini. Kristo nitiriakori hītchaua, ininiā hīparīkauata Teoso nireēkiti hīkamini, kotxi hākixinireē ikananoka hinireka hīkamini. ⁷ Hīkamariko hīparīka ikinika hīpoxokoniritika, hinirekiniritika. Apiananiri īkapani hīparīkauatini atokokana, hīparīkauatako hīhāuīte īkorapokoriti auakari īkapani. ⁸ Kotxi himarotari Apiananiri sikariko parīkatxi īki kākītimoni, ikinipoko erekari ikamakiti īki. Nitiritxi iamotakoni, apaka nitiritxi miamotakoni Kristo nakitiakori apakapariko erekari ikamakitina īki.

Patrão Pirena

⁹ Hītepekana patrão, ia atoko inakari hīkamako hinitiriakorimoni. !Hītixapiri hinitiriakori: "Ikinika nota paniātakiti himakamankiā, iteene nimisiritai hīte," kotxi hīte patrãoote aua apaka iaxiti. Iua Teoso. Teoso kamakiti poiāorimoni, iua atokotxikana ikamakiti auītetximoni.

Kākīti Xinire Tokapare

¹⁰ Nitariakori, ia nisākire mapotōkire: Katapara hītchauako. Hīkosekataparatariko Apiananiri tapara, kotxi kaposotiireri iua. ¹¹ Sotato ieretakari iito tokapare, neenamati ikamini apisapanika. Iua atokokana Teoso sikaua axinire tokapare, ininiā maeretakariko ikinika ikara axinire tokapare, kotxi neenamati auapitika Satanasikata. Iua paimatireri. Ixinikaxitapekari itxīkitakiniua maerekati akamini. ¹² !Aneenamauata kākītikata. Aneenamauata maerekani matamatakoni auīteakorikata, ikinika maerekani matamatakoni kaposotiirerinkata. Aneenamauata auītetxiakorikata īkorapokoriti ipiaā auakanikata. Aneenamauata ikinipoko maerekani matamatakoni iaxiti auakanikata.

¹³ Ininiākara hīeretakariko ikinika Teoso sikakiti hīxinire tokapare. Ininiā maerekati apokasaaki, linokai. Kona hīrika. Kona himiteka. Hīokanatarari Satanasini. Hīte kāiata.

¹⁴ Sotato iposope ineenamauatini atoko hītchauako. Sotato takari ipakiomatare. Ipakiomatare maīkari ikinipoko iito tokapare. Sotato pakiomatare atoko itxa hīxinire tokapare maīkiko. Atāo inakari sākiretxiti itxaua iua. Ininiā hītakariko ikara hīpakiomatare.

Sotato takari itorota koana, itorota tokapare īkapani. Sotato torota koana atoko itxa hīkamakiti atāo inakarinoka. Ininiā hīeretakariko ikara hītorota tokapare.

¹⁵ Sotato kiti apaka iposope ineenamauatini, kotxi itakari ikiti mata ikiti tokapare īkapani. Sotato kiti mata atoko itxa Teoso iokanapirena erekari aanikapiretakiti kākītimoni. Ikara iokanapirena sāpiretaua Teoso !imisiritaikaua, isākire aūikasaaki. Ininiā hīeretakariko ikara hīkiti mata.

¹⁶ Sotato maīkari itokapare, iito imokaiakari xiripi minokakani īkapani. Xiripitxi tirinakari itokaparemoni apokasaaki, oaka. Iua tokaparetxi atoko itxa Teoso sākire auikiko. Iteene hāuikiniāri Teoso sākire Satanasini !iposotari inokini maerekatiā. Ininiā himaīkariko ikara tokaparetxi.

¹⁷ Sotato takari ikii tokapare metao kamakori. Sotato kii tāta atoko itxa amaerekani makatxakiko aimarotini. Ikara imaroretxi axinikakiti akii tokapare itxaua. Ininiā hītakariko ikara hīkii tāta.

Sotato anikaro iouata mitaro. Oa iouata mitaro atoko itxa Erekari Matamatakoti sāpiretiniua Teoso sākire. Ininiā himaīkaroko oa iouata mitaro.

¹⁸ Himisākiretariko Teoso ātipirika. Hamanaāriko, Erekari Matamatakoti nireēkiti iaōka hāpakapini. Araōkire hītchauako. !Hītakanapapiri hīsākirauatini Teosokata. Hamanaāriko Teoso, ikinimane inakitiakori nireēkiti isikinina.

¹⁹ Himisākiretari Teoso nota īkapani apaka. Hamanaāri Teoso, isākire isikinino nisākirauatakasaaiki, nitaparaxinireritika nisākirauatini īkapani, kotxi ninirekari Teoso iokanapirena erekari nisāpiretiniri kākīti. Mitxi Teoso iokanapirena erekari !kimarotikori. ²⁰ Uatxa Teoso iokanatanota kākītimoni, iokanapirena erekari nisāpiretini īkapani. Ikara nisāpiretini xika, kateia āki naua nota uatxa. Hamanaāri Teoso, isākire nitaparaxinireritika nisāpiretini, kotxi ikara inakari niparīka.

²¹ Niokanatarari Txīkiko inakori hītemoni. Aītari atiretakiti iua. Apiananiri nitiri itxaua. Atāo iparīkauata Apiananiri īkapani. Iua sāpiretaiko hīte nota pirena. Ikara atoko himarotariko nauini, nikamakiti pakini. Iua sāpiretai ikinipoko nota pirena. ²² Ininiā niokanatarari iua hītemoni ate pirena himarotini īkapani, isikataparaxiniretinii hīte īkapani. ²³ Nitariakori, āri Teoso, Apiananiri Xesosi Kristo pakini kamaerekaxiniretai. Itiretaina hīte. Itxīkitakaina Teoso sākire iteene hāuikini.

²⁴ Teoso sikari ikinipoko erekari aūiite Xesosi Kristo ātipirika tirketanimoni. Ameē.

Piriposi

1 Nota Paoro, Tximótxio pakini, Kristo Xesosi nitiriakori iua amotakini atxaua. Niõkatsopata ikini kãkiti Kristo Xesosi nakitiakorimoni, Piriposi sitatxiti auakanimoni aiokanapireta. Niõkatsopata hïte kõtãkikarerinimoni, kotxi hïte õtãkikana Xesosi sãkire auiaãkani. Hïtepekana, kamiparïkarerini, niõkatsopata hïtemoni, kotxi hïte moianatana Xesosi sãkire auiaãkani.

² Ereëkai hïte. Aïri Teoso, Xesosi Kristo Apiananiri pakini sikai ikinipoko erekari. Ninoa kamaerekaxiniretai.

Paoro Misãkiretari Teoso Piriposi Auakani Ìkapani

³ Hïte nixinikasaaki: "Erekapitikari aTeosone," nitxa. ⁴ Teoso nimisãkiretakasaaki hïte himakinika Ìkapani, nipoxokoniritika nimisãkiretari Teoso. ⁵ Nipoxokoniuata, kotxi hïte miparïkatano nota Teoso iokanapirena erekari nisãpiretini Ìkapani, kotxi hïte iokanataro txineiro notamoni. Teoso iokanapirena erekari hãuikasaaki, hïpotorika himiparïkatinino. Eereka kona hïte iotokaika himiparïkatinino nota. Uatxa auapika himiparïkatinino nota. ⁶ Teoso sikari erekari hïtemoni merepanika isãkire hãuikasaaki, ininiã nota imarotapitikari Teoso sikari erekari hïtemoni ikiniõtika. Ikara Teoso parïka hïtemoni. Erekarisikiniritika Xesosi kanapiriã Ìkorapokoriti. ⁷ Atãopitika nixinikinii hïte nipoxokoniritika, kotxi iteene nitiretai hïte himakinika. Atxïiti kateia ãki naua. Atxïiti mapara naua, kãkiti Teoso iokanapirena erekari atão ininiua noerekini Ìkapani. Atxïiti nisãpiretari Teoso iokanapirena erekari, kãkiti iteene imarotiniri Ìkapani. Kateia ãki nauakasaaki, mapara nauakasaaki, ikiniõtika hïte notakata apakapari ikinipoko erekari Teoso sikakiti. ⁸ Nota iteene tiretai hïte. Kristo Xesosi tiretinii atokokana nitiretai hïte. Teoso imarotari ikara nisãkire atão inini.

⁹ Nota misãkiretari Teoso hïte Ìkapani ia atoko: Ninirekari hïtiraõkiuatini apiaãpotini ikiniõtika. Hïtiraõki aneeãpotakasaaki, ninirekari himarore apaka aneeãpotini. Imaroretxi himaroãpotakasaaki, ninirekari atãonoka himarotini. ¹⁰ Ikara atoko hininiã, himereëri apia erekari hïkamini. Ininiã maerekati Ihïkama. Maerekati na apanakinimoni Ihïkama. Ikara atoko hininiã, iposopeka hïtxa Kristo kanapiriãkasaaki.

¹¹ Ikara atoko hininiã, ikinipoko hïkamakiti erekari. Xesosi Kristonokara kamaerekatai hïte hïkamakiti ereka inini Ìkapani. Apanakini atamatakasaakiri erekari hïkamakiti, ninoa imarotari Teoso posotiire, ininiã eereka ninoa: "Peerekari Teoso," itxanako.

Paoro Misiritiko Pirena

¹² Nitariakori, himarotari nota iteene misiritaãka. Iuaritika Teoso iokanapirena erekari iaripiretapeka. Ninirekari himarotiniri, nimisiritiko xika apikomoni kãkiti imarotari Teoso iokanapirena erekari. ¹³ Ininiã nimisiritiko xika ikinika sotatoakori, Homanoakori auïte aapoko inïkatakani, ikinimane kãkiti mapara auakani apaka imarotari nota uai kateia ãki nauakasaaki Kristo sãkire nisãpiretini xika. ¹⁴ Itori aïtariakori Apiananiri sãkire auiaãkani, sikataparaxiniretaãka, kotxi imarotarina Teoso nïkatinino nota kateia ãki nauakasaaki. Ininiã ninoa sãpiretari Teoso sãkire itaparaxinireritikana. Mapïkaretika itxana.

¹⁵ Ninoa sãpiretari Kristo sãkire, kotxi inirekarina erekari ikaminina. Txamari apanakinipekana sãpiretari Kristo sãkire nota xikotiko xika. Inirekarina kãkiti auikiniri ninoaka sãkire, nota sãkire poiãoka auikinina Ìkapani. Ninoa sãpiretari Kristo iokanapirena, kotxi ninoa potxitari kãkiti taparakienatakakiniua. ¹⁶ Aïtariakori, erekarinani nirekakani, sãpiretari Kristo iokanapirena, kotxi ninoa taretano nota. Ninoa imarotari Teoso sikinino nota ia parïkatxi, Teoso iokanapirena erekari atão inini noerekini Ìkapani. ¹⁷ Nota xikotakani sãpiretari Kristo sãkire, txamari inirekarina ninoaka nireëkiti ikaminina. Inirekarina Teoso nireëkiti. Inirekarina nota apia atatsiitiniri nimisiritiko uai kateia ãki nauakasaaki.

¹⁸ Atxïiti Kristo iokanapirena sãpiretakani ãkixinire erekari. Atxïiti ninoa ãkixinire kona erekari. Iuaritika erekapitikari, kotxi Kristo iokanapirena sãpiretapeëkai. Ininiãkara nipoxokoniuata nota. Ari, !niotokapani nipoxokoniuatini. ¹⁹ Nipoxokoniuata, kotxi nimarotari nitakanapiniri kateia, kotxi hïte misãkiretari Teoso nota Ìkapani. Nimakatxakaãkako kateia ãki, kotxi Erekaris Matamatakoti Xesosi Kristokata auakari moianatano nota. ²⁰ Kona ninirekari nipëtauatini, Kristo iokanapirena nisãpiretakasaaki. Ninirekari kataparaxinire ninini, Kristo apanakini nisãpiretini Ìkapani. Ikara atoko nininiã, apanakini imarotari Kristo Apiananiri ininiua. Ikiniõtika nauapanika ninakasaaki, ninirekari kãkiti imarotiniri Kristo Apiananiri ininiua. Ari, nipïkasaaki apaka, ninirekari apanakini imarotiniri Kristo Apiananiri ininiua. ²¹ Auapanika ninakasaaki, ninirekari Kristo nireëkitinoka nikamini. Erekapitikari nipinini, kotxi eereka Kristokata nauapika. ²² Auapanika ninakasaaki, nipaïkauatapitipo Teoso sãkire nisãpiretini, ininiãkara erekari nipaïka. Kïpa ninireka? Nota auapanika nininikani? Nipininikani? !Nimarotari ninireëkiti.

²³ Ninirekari auapanika ninini. Apaka ninirekari nipinini. Apiata ninirekari nipinini Kristokata nauini ĩkapani. Ikara atoko apiaerekata. ²⁴ Txamari hĳte noerekini ĩkapani, ninirekari auapanika ninini, kotxi hĳte nirekapanikano nota. ²⁵ Ikara nimarotapitika, ininiā auapanika nitxa, himakinika noerekini ĩkapani, kotxi nota nirekari himaroāpotiniri Teoso sākire. Ninirekari hāuikiniri hĳpoxokoniritika. ²⁶ Ininiā eereka hĳtxari: “Erekapitikari Kristo Xesosi, kotxi Paoro iuaĳkana apoka atemoni,” hĳtxapaniko. Ininiā iteene hĳpoxokoniuata iuasaaki.

²⁷ Atxĳiti auapanika nitxa, atxĳiti nipina, iuaritika ikiniōtika ereka hĳtxako hāuini. Erekaru Kristo iokanapirena, ininiā hĳte apaka ereka hĳtxako hāuini. Atxĳiti nisa hĳtemoni. Atxĳiti kona nisa. Atxĳiti nikenakopiretai hĳte uai kateia āki nauakasaaki. Iuaritika, hāuini ereka inakasaaki, nimarotariko hĳte himakinika iteene auikiniri Kristo sākire iua iokanapirena erekari. Hāuini ereka inakasaaki, nimarotari hĳte himakinika sāpiretiniri Kristo iokanapirena iaōka apanakinimoni. ²⁸ Hāuini ereka inakasaaki, na hĳpĳkana hĳte omanatakani. Hĳtaparaxinireritika hāuiniā, ninoa hĳte omanatakani imarotari ixipokinina āti ōti. Hĳtaparaxinireritika hāuiniā, ninoa imarotari Teoso makatxakinii hĳte himapinakani ĩkapani. ²⁹ Ininiā Teoso sikari erekari hĳtemoni, kotxi iua auiritai hĳte auikiniri Kristo iokanapirena. Apaka erekari isikai hĳte, kotxi iua auiritai hĳte atatsitiniri himisiritiko Kristo ĩkapani. ³⁰ Hĳte atamatapekari nota misiritiko, hĳte sauaki nauakasaaki. Hĳkenakopiretari nimisiritiko auapanika uatxa. Uatxa hĳte nota atoko, kotxi hĳte apaka misiritaāka.

Kristoka Poiāotakaua.

2 Kristo sikataparaxiniretaua ate, iua nakiti aniniāua. Kristo mĳkapiritaua ate, amarini axapitiri inoro mĳkapiritini atoko itxa, kotxi iua tiretaua. Ātipirika iua Erekaru Matamatakoti amoianari itxaua. Kristo iteene tiretaua. Iua amonĳkaua. ² Ininiākara nota ōtākikai hĳte hĳkinika. Hĳxinikariko Teoso nireēkitinoka hĳkamini, ininiā hĳxinikakiti ātinoka txauako. Hĳtirtakakauako Teoso tirtiniua atokokana. Hinireēkiti ātinoka txauako. Ikara atoko hininiā, iteene hĳkamapoxokonitano nota. ³ Kona kapotxinaniri hĳtxapeua. Hĳiukapeua. Hĳteka minakati hĳtxauako. Hĳxinikariko: “Apanakini apiata, nota poiāoka”. ⁴ Hĳxinikapiri pite nireēkitinani. Himiparĳkatanako apanakini, ninoa nireēkiti ikaminina ĩkapani.

⁵ Xesosi Kristo xiniākitikanerako hĳxinikako. Kristo kamakitikanerako hĳkamako. ⁶ Teoso itxaua Kristo Xesosi, ininiā iposotari ipaniātiniri ikinimane inireēkiti ikaminina. ⁷ Iuaritika itakanapari auĳtetxi ininiua. Nitiritxi atoko itxapekua. Iuaka minakati itxĳkitakaua, kotxi kākĳtipeka itxaua uai itixi iponaniākasaaki. ⁸ Iuasaaki kiki inakasaakiua, iuaĳkana iuaka ipoiāotakaua, kotxi ikĳpitari Teoso sākire ipinini ĩkapani. Imarotari okiko tĳkane, kokaniri okiko atoko inaākako aamina ĳpiriāmitakari nopini. Iuaritika ikĳpitari Teoso sākire ipinini ĩkapani. ⁹ Ikara atoko ininiā, Teoso txĳkitakari iua Api-

ananiri ininiāua. Āti iua atoko inakari !auari. Teoso takari iuāka. Āti uāka iua atoko inakari !auari, ¹⁰ kotxi kākĳiti ikininape kenakotakasaakiri iuāka Xesosi, ikapotoreēkauako Xesosi apisatoō. Ikinimane Teoso tixine auakani, ikinimane itixi auakani, ikinimane ipĳkani auiniātaā pakini kapotoreēkauako Xesosi apisatoō, kotxi iauĳtena itxaua Xesosi. ¹¹ Ikinipoko kākĳiti txako: “Xesosi Kristo Apiananiri itxaua,” itxanako. Ikara atoko ininiā ikinimane: “Peerekari āiri Teoso,” itxanako.

Iōriki Atoko Hĳtxako

¹² Ininiā nota tirtakini, hĳkĳpitariko nisākire uatxa, mitxi hĳtekata nauakasaaki nisākire hĳkĳpitini atokokana hĳtxako. Uatxa kona hĳtekataikano, iuaritika ninirekari apiata hĳkĳpitiniri nisākire. Teoso makatxakapekari himaerekani itixine hĳsini ĩkapani, ininiākara ikiniōtika hĳparĳkauatako Teoso ĩkapani. Hĳpĳkariko maerekati hĳkamini. Erekarinanira hĳkamapikako. ¹³ Hĳposotari ikara atoko hĳkamini, kotxi Teosokara moianatai hĳte. Iua kamanirekaretai hĳte iua nireēkiti hinirekini ĩkapani. Iua sikaposotiiretai hĳte iua nireēkiti hĳkamini ĩkapani.

¹⁴ Hĳparĳkauatakasaaki, !hĳtsoatape, !hĳtixitakapeua. ¹⁵ Ikara atoko hĳkaminiā, hĳkerokiniri !auari, himaerekani !auari, ininiā erekarinoka hĳkama apanakinimoni. Ininiā Teoso anaakori erekarini hĳtxaua. Kākĳiti kamisirienererini sauaki hāuanāta hĳte. Kākĳiti maerekani sauaki hāuanāta. Iōriki iopinikari iaxiti ĳkanōka. Iōriki atoko hĳtxako. Hĳopinikariko maerekati auiniātaā, atāo inakari kākĳiti imarotini ĩkapani. ¹⁶ Hĳte iopinikari ipiā, Teoso sākire apanakinimoni hĳsāpiretakasaaki. Teoso sākire txĳkitakari kākĳiti ātipirika auāki inini tĳkane, Teosokata auini ĩkapani. Hĳte Teoso anaakori erekarini hininiāua, nota iuikaiko hĳte, Kristo uaimoni kanapiriākasaaki, kotxi hĳte auikapekari Teoso sākire nisāpiretakiti. Kona maxikatiĳkani nĳparĳkauatapitipo hĳte ĩkapani, kotxi hĳte auikapekari Teoso sākire nisāpiretakiti.

¹⁷ Atxĳiti nota okaāka Teoso sākire nisāpiretini xika. Atxĳiti niarēka oxikepoakataāka, Teosomoni sikakori atoko inakari, Teoso sākire nisāpiretinii xika, Teoso sākire hāuikini xika. Nokaāka atxĳiti, iuaritika nipoxokoniuata. Nipoxokoniuata hĳtekata. ¹⁸ Ininiā erekari hĳte apaka poxokoniuatini. Erekaru hĳpoxokoniuatini notakata.

Tximōtxio Pirena

¹⁹ Xesosi Apiananiri nirekiniāri nota iokanatiniri Tximōtxio hĳtemoni, ininiā mapaōtipeka inakasaaki niokanataru iua. Ininiā eereka iua minapiretari hĳte pirena, nota apaka poxokoniuatini ĩkapani. ²⁰ Āti Tximōtxio atoko inakari uai !auari, kotxi iua iteene tirtai hĳte. Iua nirekari hāuini ereka inini. ²¹ Apanakini kākĳiti xinikari ninoaka nireēkitinoka. !Xinikarina Xesosi Kristo nireēkiti. ²² Himarotari iua Tximōtxio parĳkauatape notakata, imi irikata parĳkauatakari atoko itxa. Iparĳkauata notakata Teoso iokanapirena erekari

apanakini asāpiretini ĩkapani. Ininiākara himarotari Tximótxio atamakaākapeka, ininiā himarotari erekapitikari iua. ²³ Kiatokopa ninataāka? Uatxa !nimarotari. Nimarotakasaakiri, niokanatarari Tximótxio hĕtemoni. ²⁴ Apiananiri kamaimaroretano nota, Tximótxio tikinimoni nota apaka apoka ereĕ hĕtemoni.

Epararotxito Pirena

²⁵ Notamoni erekari iuaĭkana niokanatiniri hĕkanapirena mĕkari, Epararotxito inakori. Hĕte iokanatapekari iua notamoni nota itiretini ĩkapani. Iua nitari atoko itxa. Imiparĭkatapitipono nota, Teoso iokanapirena asāpiretakasaaki. Iua, nota pakini sotato atoko atxaua, kotxi ate neenamauata Teoso ĩkapani. ²⁶ Iua ipiātai hĕte hĕkinika. Iua maerekaxiniretinoka itxa, kotxi ikenakopiretari hĕte imaropiretiniri iua amianatini. ²⁷ Atāopitikara iua amianatapitika. Iua ipinaarita, iuaritika Teoso amonĭkari iua. Itxĭkitakari iua iuaĭkana ereka inini. Ininiā Teoso amonĭkano nota apaka, kotxi Epararotxito ipinaākamako, apia maerekaxiniretinoka nitxamako. ²⁸ Ininiākara iteene ninirekari niokanatiniri iua hĕtemoni, hĕpoxokoniuatini ĩkapani haōkitakasaakiri. Ikara atoko ininiā, nota maerekaxiniretinoka ninini !auaika. ²⁹ Ininiā hĕpoxokoniritika hāpakapariko iua, kotxi iua Epararotxito aĭtari itxaua, kotxi Apiananiri nakitiakori atxaua. Hĕpaxitariko kākiti Epararotxito atoko inakari, ³⁰ kotxi Kristo ĩkapani iparĭkauatini xika ipinaarita. Iuaka monōkorimoni isa nota imoianatini ĩkapani, kotxi iua imarotari hĕte nirekapitikamari himoianatinino, txamari !hĕposota himoianatinino, ininiā iua iteene moianatano.

Kiatokopa Kākiti Atāo Ereka Inini?

3 Nitariakori, apikomoni nisāpiretai. Hĕpoxokoniuatoko, kotxi Apiananiri nakitiakori atxaua. !Nisāpaka iuaĭkana nisāpiretakitipeka nisāpiretinii hĕte. Iuaĭkana nōtākikai hĕte, atāo minakati himauikakani ĩkapani. ² Erepaniko kākiti maerekati kamakani, atāo minakati sāpiretakani, kotxi ninoa sāpiretari kākiti: “Teoso takaōtxikare piĭtoā mauakaniā, kona Teoso nakiti !pitxaua,” itxana. ³ Ninoa auapitika Teoso takaōtxikare iĭtoāna, txamari kona Teoso nakitiakori !itxauana. Atera Teoso nakitiakori, kotxi atemoni aua atāo inakari Teoso takaōtxikare ate ākixinireĕ, kotxi Erekarari Matamatakoti oerekaua amisākiretiniri Teoso. Kristo Xesosinokara ate iuika. Aimarotari ateka kamakiti !itxa. Teoso kamakitinokara apakata. ⁴ Hĕuākatari atxĭiti hĕte kamakiti ereka inini Teoso apakapini ĩkapani? Konapitini. Nota kamakiti apiarekata, iuaritika nikamakiti !txĭkitakano Teoso apakapinino ĩkapani. Hĕkenakotariko erekari nota kamakiti: ⁵ Teoso takaōtxikare niĭtoā takaāka oito ōti nauakasaaki. Nirini, ninoroni pakini Xoteo itxauana. Natokiri kitxakapirĭka Pĕxamĭ inakori. Kitxakapirĭka natokiriakorini, nakiroakoroni pakini ikinika Xoteoakori itxauana, ininiā atāo Xoteo nitxaua. Nota Kĭpitari aūĭteakori kitxakapirĭkarini paniātakiti, kotxi nota

pariseo nitxaua, ininiā Teoso sākire iōkatsopatakori oerekakari nitxaua. ⁶ Nota iteene nirekari Teoso nireĕkiti nikamini, ininiā nimisiritari kākiti Xesosi sākire auiākani, kotxi niuākatari Teoso nirekari ikara nikamini. Aātokiriakorini paniātakiti ikinika nikĭpita. !Nikerokari.

⁷ Mitxi niuākatari ikara atoko nininiā erekapitikari, ininiā, “Teoso apakapapitikano nota,” nitxa. Uatxa nimarotari Kristo, ininiā nimarotari mitxipe minakati nininiua nota. ⁸ Uatxa nimarotari niauĭte Kristo Xesosi. Ikara apiaerekata. Xesosi nimarotini apisapanika, nikamakiti !itxa xatiki. Nitakanapapekari mitxi nikamakiti. !Itxaika. Mitxi nikamakiti itiki atoko, kotxi !ninirekaikari. Kristo nakiti uatxa nitxaua. ⁹ Nitakanapapekari mitxi nikamakiti Kristokata ātipirika nauini ĩkapani. Nota Kĭpitari Moisesini paniātakiti. Ikara atoko inakarini kona ereka txĭkitakano nota. Teosonokara kamaerekatano nota, kotxi nauikari Kristo sākire. ¹⁰ Ninirekari Kristo iteene nimarotini. Ninirekari nimarotini Teoso posotiire, kotxi iposotiireĕ ōkitikari Kristo, iuaĭkana auāki inini ĩkapani. Kristo atatsiirauatape, ininiā nota apaka nirekari natatsiirauatini atāo imoianari nininiua ĩkapani. Ninirekari nota nireĕkiti ipinini, Kristo aamina ĩpiriāmitakari nopini ipinini atoko. Ninirekari Xesosi nireĕkitinoka nikamini, ininiā iua atoko nitxaua. ¹¹ Ininiā itixi xipokini ōti Teoso ōkitikanoko, iuaĭkana auāki ninini tĭkane.

Mitekakari Atoko Nitxa

¹² Ikara ikinika !nimarotapanika. Nimaroāpotapanikariko. Teoso kamapanikari iparĭka nota ākixinireĕ. !Ixipokapanikari, ininiā !niotokakari niparĭka Teoso ĩkapani. Niparĭkauatapitipo. Mitekakari mitekini atoko, !niotoka. Mitekakari nirekari mitekaxi mapotōkire apokini. Iua atokokana nota nirekari niparĭka mapotōkire napokini, kotxi Kristo Xesosi mereĕno nota ikara atoko nikamini ĩkapani. ¹³ Nitariakori, niparĭka mapotōkire !napokapanika. Ia nikamako: !Nixinikaikari mitxi nikamakiti. Mitekakari masapotorikakati atoko nitxa. Nitapararitika nisa apikomoni, niparĭka mapotōkire napokini ĩkapani. ¹⁴ Mitekakari iteene nirekari mitekaxi mapotōkire apokini imitekini ĭki apakapini ĩkapani, ininiā imitekaxitipo. !Iotoka. Iua atokokana nota parĭkauatapitipo Teoso ĩkapani, niparĭka mapotōkire napokini ĩkapani, niparĭka ĭki Teoso sikakiti napakapini ĩkapani, kotxi Teoso pĭkapiretano nota Kristo Xesosiā itixine nisini ĩkapani, niparĭka ĭki napakapini ĩkapani. ¹⁵ Akinika ate Kristo iteene imarotakani xinikamariko nota oerekakiti atoko inakari. Ikara atoko himaxinikakanisaaki, Teoso oerekaiko hĕte atāo inakari. ¹⁶ Mitekaxi kamakari paniātakiti iaōka mitekakari kama imitekasaaki. Iua atokokana makamariko Teoso paniātakiti. Uatxaika akamakiti atokokana makama. ¹⁷ Nitariakori, hĕkamariko nota kamakiti atoko inakari, kotxi ate oerekapekai hĕte ikara atoko inakari hĕkamini. Hĕkĭpitari nota kamakiti atoko inakari kamakani sākire. ¹⁸ Kaiōpokori kākiti !auikari Kristo ip-

inini amaerekani imakatzakini ĩkapani. Kristo omanatakani itxauana ninoa. Itokatapeka ikara nisāpiretai hĩte, ininiā uaiĩkana uatxa ikara nisāpiretai. Iteene nimatinaniuata ninoa xika. ¹⁹ Itixi mapotōkire ōtisaaki ninoa iokanataākako maerekani misiritikoā-taā. ĩtona iteasonena atoko itxana, kotxi ĩtona nireēkitinoka ikamana. Ikamakitina !erekari, iuaritika iuikarina ikamakitina. !Ipētauatana. Ninoa xinikapikari ĩkorapokoriti. !Ixinikarina Teoso. ²⁰ Atepekana, Teoso tixine auakani atxapekaua. Aiātapari apoxokoniritika kākiti maerekani makatzakakari iuaxitikiri uaimoni apokini. Iua Xesosi Kristo Apiananiri itxaua. ²¹ Iuasaakiko inoākari aĩto mataparati. Itxĩkitakari aĩto iua ĩto erekari atoko inini. Iposotari, kotxi kaposotiireri itxaua iua. Ikinimane kamapitikariko ipaniātakiti, kotxi kataparari iua Xesosi.

Ōtākipirenatxi

4 Nitariakori, nota iteene tiretai hĩte. Nipiātai hĩte. Hĩkamapoxokonitano nota. Niuikai hĩte, kotxi nipaĩka ĩki atoko hĩtxa. Nitiretakini, hĩxinikariko ikara nota ōtākikinii uatxa. Nota ōtākikinii hĩkĩpitiniā, !hĩtakanapari Apiananiri.

² Nota ōtākikai hĩte Epótchia inakoro, Sĩtxiki inakoro pakini. Hĩkĩpitariko Apiananiri sākire. Hĩtokakariko hĩtxitakakiniua. ³ Pitepekana nimoianari erekari, nota nirekai pite ōtākikinina naia sito ipi, kotxi ninoa paĩkauatapeka notakata Teoso iokanapirena erekari asāpiretakasaaki. Ninoa paĩkauata notakata, Kremēxi inakori pakinikata, apanakini nimoianariakorikata apaka. Ninoa uāka Teoso aātsopateē iōkatapeēkaika, Teosokata auapininiika ininina tĩkane.

⁴ Hienenĩkapikako, kotxi Apiananiri nakiti hĩtxaua. Iuaĩkana nitxai. Hienenĩkako.

⁵ Erekari hĩkamako apanakinimoni. !Hĩtxitapena. Erekari apanakini imarotiniri hĩte ereka hinini. Apiananiri kaiamapeka ikanapiriini uaimoni. ⁶ Na xatiki maerekaxiniretika !hĩtxape. Maerekaxinireti hinakasaa-ki, himisākiretariko Teoso. Hamanaāri hinireēkiti. Himisākiretakasaakiri Teoso, hĩtxariko: “Erekapitikari notamoni pikamakiti,” hĩtxariko. ⁷ Ikara atoko aniniā, Teoso kamaerekaxiniretaua. Kiātokopa ininiāpa Teoso kamaerekaxiniretaua? !Kimarotikori, iuaritika peerekari. Hākixinire erekaxinirepeka ininiā, maerekati !ĩroā hākixinireē. !Hinirekaikari maerekati hĩxinikini. !Hinirekaikari maerekati, kotxi Kristo Xesosi nakiti hĩtxapekaua.

⁸ Nitariakori, nisāpiretakiti xipokini apisa, nisāpiretanikaiko hĩte. Hĩxinikariko atāo inakari sākirextiti. Hĩxinikariko atāo inakari hĩsāpiretini. Hĩxinikariko atāo inakari hĩkamini. Hĩxinikariko erekarinoka. Hĩxinikariko tiraōkitxi. Hĩxinikariko potxitakori. Ikara atoko inakarinoka hĩxinikako, kotxi erekapitikari ikara. Peerekari

ikara. ⁹ Hĩkamapikariko noerekakiti iaōka. Hĩsāpiretanako apanakini hĩtemoni nisāpiretakiti. Hĩkamariko nota kamakiti hĩtiākiti atokokana. Ininiā Teoso kākiti kamaerekaxiniretakari kaikota hĩtekata.

Paoro Potxitari Ninoa Sikakiti

¹⁰ Apiananiri nakiti nitxaua, ininiā iteene nipoxokoni-uata. Iuaĩkana hĩte oerekari hĩtiretinino, txineiro hĩsikakito hĩokanatinano, ininiā nipoxokoni-uata. Ātipirika hĩxinikano, kotxi iteene hĩtiretano. Txamari mitxi !hĩposotari hĩsikakiti hĩokanatinani notamoni.

¹¹ !Namanaāi uaiĩkana txineiro hĩokanatinani notamoni. Ikinipoko ninireēkiti auakasaaki, nipoxokoni-uata.

Ikinipoko ninireēkiti mauakanisaaki, iuaritika nipoxokoni-uata. ¹² Nota napapekari nimamākani, nimanipokoreni, nimatxineiroteni pakini. Apaka nimarotari ātikataā ninireēkiti ikinipoko auinano. Teoso oerekepekano ikiniōtika nipoxokoni-uatini. Nienenĩka nipokori auakasaaki. Nienenĩka ninatxitakasaaki apaka. Nienenĩka ikini sereti auinakasaakino. Nienenĩka minakati mauinakanisaakino. ¹³ Ikinipoko niposota nikamini, kotxi Kristo sikano iposotiire.

¹⁴ Erekapitikai hĩte, kotxi nimatxineirotenisaaki, hĩokanatarari txineiro notamoni. ¹⁵ Teoso iokanapirena erekari merepitipanika hĩkenakotakasaaki, ereē Masetónia tixini nosipikasaaki, hĩte Piriposi auakaninokara iokanataro txineiro napakapini ĩkapani. Apanakini Xesosi sākire auiākani ātiātaā auakani, !iokanatinano nota. Himarotapekari ikara. ¹⁶ Tesarónika sitatxiti nauakasaaki, ninirekakiti auakasaaki, itokata txineiro hĩokanatinano. ¹⁷ !Niātaparo txineiro hĩsikinino. Niātapari Teoso sikinii erekari, kotxi hĩte tirtapekano nota. ¹⁸ Napakapapekari ikinipoko hĩokanatakiti. Kaiāopokori hĩokanatakiti. Epaparotxito inakori mininano hĩsikakiti, ininiā ikinika ninireēkiti uatxa auinano nota. Teosomoni sikakori kamariri atoko itxa hĩte sikakiti notamoni. Teoso potxitari hĩsikakiti notamoni. ¹⁹ NiTeosone sikaiko hĩte hinireēkiti ikini sereti, kotxi ikinipoko aua iuamoni. Isikaua, kotxi Kristo Xesosi nakitiakori atxaua. ²⁰ Ātipirika matxari Teoso: “Peerekai aĩri, aTeosone. Ameē.”

Takanapapirenatxi

²¹ Hĩsāpiretanako ikinimane ereē auakani Kristo Xesosi nakitiakori, nixinikamanapitinina ninoa. Ātariakori uai notakata auakani xinikamanapitai hĩte apaka.

²² Ikinimane uai auakani Teoso nakitiakori iokanapireta hĩtemoni ixinikiniina. Homanoakori auĩte aapoko auakani, Teoso nakitiakori, iokanapireta hĩtemoni iteene ixinikiniina.

²³ Xesosi Kristo Apiananiri sikari ikinipoko erekari hĩtemoni. Ameē.

Koroso

1 Nota Paoro. Niokanatsopata hītemoni. Teoso mereēno nota, kotxi inirekari nota Xesosi Kristo iokanatakiti nininiua. Aītari Tximótxio apaka iokanapireta hītemoni. ² Ininiā aiokanataria ia iōkat-sopari Teoso nakitiakorimoni, ikinika Teoso paniātakiti kamakanimoni Koroso sitatxiti auakanimoni. Aītariakori hītixaua. Aīri Teoso, Apiananiri Xesosi Kristo pakini sikari ikinipoko erekari hītemoni. Ninoa kamaerekax-iniretai hīte.

Teoso Misākiretiko Koroso Auakani Īkapani

³ “Erekapitikai,” atxari Teoso, aāuīte Xesosi Kristo iri, iua amisākiretakasaaki hīte ĩkapani. Ātipirika amisākiretari Teoso hīte ĩkapani. ⁴ Ikara atoko atxari Teoso, kotxi ate kenakopiretari hīte auikiniri Kristo Xesosi sākire. Apaka akenakopiretari hīte tiritiniri ikinika kākiti Teoso nakitiakori. ⁵ Teoso iokanapirena erekari atāo sākiretixiti itxaua. Ikara hīkenakotakasaaki, hīkenakotari Teoso sikaenetakiti ipotetakiti itixineē hīte ĩkapani, ininiā hiātapani hāpakapiniri Teoso sikaenetakiti. Himarotari hāpakapiniri, ininiā Teoso sākire hāuikini aua, hītiraōkiuatini pakini aua. ⁶ Teoso iokanapirena erekari hīkenakotakiti iaripiretapeka ikini itixitimoni. Ikiniōtika apikomoni kākiti kenakotari. Iuasaaki kākiti auikaāpotari Teoso iokanapirena. Ikiniōtika kākiti apakapani erekari Teoso sikakiti. Iua atokokana hīte kenakotari Teoso iokanapirena erekari. Iuasaaki himarotari ikinipoko erekari Teoso sikakiti. Iuasaaki himarotari Teoso atāo sikiniri ikinipoko erekari kākitimoni.

⁷ Amoianari, atiretakiti, Epápara inakori, iuara oerekai Teoso sikiniri ikinipoko erekari kākitimoni. Iua Kristo nitiri itxaua. Ātipirika iparīkauata Kristo ĩkapani, ininiā ātipirika iparīkauata hīte ĩkapani. ⁸ Iua sāpiretaua ate hītiraōki, Erekar Matamatakoti siākiti hītemoni.

⁹ Hīte pirena akenakopiretakasaaki, ātipirika amisākiretari Teoso hīte ĩkapani. Ate nirekari hīte iteene imarotiniri Teoso nireēkiti hīkamini ĩkapani. Anirekari kīkiteni hininiāua. Anirekari himarotiniri Teoso imarore Erekar Matamatakoti siākiti.

¹⁰ Ininiā ate misākiretari Teoso hīte atāo hīkamini ikiniōtika, kotxi Apiananiri anaakori hītixaua. Anirekari hīkamakiti kamapoxokonitini Teoso. Ininiā hīkamakiti ikiniōtika erekarinoka, amātiiri erekari atoko. Ininiā ikiniōtika himaroāpotari apikomoni Teoso nireēkiti.

¹¹ Anirekari Teoso sikataparaxiniretinii hīte iposotiireē, kotxi kaposotiireri iua. Ininiā iuasaaki hiātapani himisir-

itiko xipokini. Iuasaaki !hinaiatua. Iuasaaki hīposotari himīteenekiniri himisiritiko hīpoxokoniritika. ¹² Iuasaaki hītixariko aīri: “Erekapitikai,” kotxi iua kamaerekataua. Ininiā aāpakapani iua potetakiti inakitiakori ĩkapani Teoso tixineē, ipiā mauakaniātaā. ¹³ Iua sikakaua ipiā posotiireē aāuakasaaki, maerekati posotiireē aāuakasaaki. Iua anikaua imi itiretakiti auiniātaā. Iuaātaā auakani auīte itxaua imi. ¹⁴ Imi Kristo iīkitxitari Teoso amaerekani ĩki ipīkasaaki, ininiā Teoso makatxakari amaerekani. !Ixinikaikari amaerekani.

Kristo Apiananiri

¹⁵ Kākiti kona posotari atamatini Teoso. Teosotxikana itxaua Kristo, iuaritika aposotari Kristo aātamatini. Ikinipoko kamiko apisa, Kristo aua Teosokata. ¹⁶ Iua kamari ikinipoko. Ikamari iaxiti auakani, uai itixi auakani apaka. Ikamari ikinipoko kākiti atamatakiti, kākiti matamatakinini apaka. Ikamari ikinika kaposotiirerini, auītetxiakori matamatakoni, ikinika Teoso nitiriakori pakini. Ikamari ikinika. Ikinika kamaāka iua ĩkapani. ¹⁷ Kristo aua ikinipoko apisa. Iua maīkari ikinika imaxipokakani ĩkapani. Ikara atoko ininiā, ikinipoko auapanika. Iua mauakaniā, ikinika iari-ka. Iua mauakaniā, ikinipoko xipoka.

¹⁸ Kākiti Teoso mereēkini Kristo ĩto atoko itxauana. Teoso mereēkini kii atoko itxa Kristo. Merepitipanika ipīkari ōkitikakariua iua. Ininiā ōkitikasaakua, oerekari kākiti Apiananiri ininiua. Āti kaposotiireri iua atokokana inakari !auari. ¹⁹ Teosotxikana iua. Ikinika Teosomoni auakari aua iuamoni. Ikara atoko Teoso apokaerekatari. ²⁰ Kristo arēka xiketakasaaki aamina ĩpiriāmitakari nopini, iuasaaki Kristo xipokari Teoso omanākarauatini kākiti maerekani xika. Kotxi Teoso nirekari Kristo mininiri ikinipoko iuaīkana iuamoni, ĩkorapokoriti auakani, iaxiti auakani pakini. Ininiā uatxa Teoso apakapani Kristo sākire auīākani.

Kristo Kamakiti Koroso Auakani Īkapani

²¹ Hītepekana, mitxi !himarotari Teoso. Iuasaaki !hāuari Teosokata. Maerekati hīkamakiti xika homanataria Teoso hākixinireē. Teoso mokaiakariakori hītixaua iuasaaki. Uatxa Teoso apakapai hīte, ²² kotxi Kristo ĩto ipina hīte ĩkapani. Ininiā iua anikai hīte Teosomoni iua makatxakakini hininiua ĩkapani. Teosomoni himaerekani !auaika, kotxi Kristo makatxakapekari imakinika himaerekani. Teoso apisatoō hāpokasaaki, kona āti posotari apoītinii himaerekani xika. ²³ Ikara

atoko aua hitemoni, iteene hāuikiniāri Kristo sākire ikiniōtika, Kristo sākirenoka hāuikiniā, isākire hi-matakanapakaniā. Ikara atoko hīkaminiā, apanakini kona txīkitakai hītakanapiniri hiātapiniri ikinika Teoso kamakiti hīte īkapani. Teoso iokanapirena erekari sāpiretaua ikinika Teoso kamakiti inakitiakori īkapani. Hīte kenakotapekari Teoso iokanapirena erekari. Isāpiretaākapeka ikinika itixi auakanimoni. Nota Paoro Teoso nitiri, iua iokanapirena erekari ikinimane nisāpiretini īkapani.

Paoro Parīkauata Kākiti Teoso Mereēkini īkapani

²⁴ Uatxa nipoxokoniua hīte īkapani natatsiirauatini, kotxi natatsiirauatini xika hīte auikari Kristo sākire. Natatsiirauata nītoā Teoso mereēkini īkapani. Kristo īto atoko itxauana kākiti Teoso mereēkini. Natatsiirau-atapitika, iuaritika Kristo atatsiirauatini apiata. ²⁵ Teoso iokanatanota nota imereēkini nitiri nininiua. Ipaniātano nisāpiretiniri ikinika isākire hitemoni. ²⁶ Ipaniātano nisāpiretinii mitxi kākiti mimarotakiniti. Okananipeka Teoso loerekari ikara kākiti mimarotakiniti. Kristo ipini-ni apisa ikini itixiti auakani !imarotari ikara. Mitxi kākiti mimarotakiniti uatxa oerekaāka Teoso nakitiakori-moni. ²⁷ Uatxa Teoso nirekari inakitiakori Xoteo minakaniua imarotini mitxi kākiti mimarotakiniti, kotxi peerekari. Natokopa itxa ikara kākiti mimarotakiniti? Nisāpiretai. Kristo posotari kākiti ākixinireē auini. Ia mitxi kākiti mimarotakiniti. Kristo aua hākixinireē. Ininiā himarotari hīsini Teoso tixinemoni. ²⁸ Ininiā asāpiretari kākiti Kristo pirena. Aōtākikari ikinimane Teoso imaroreē. Aōerekari ikinimane Teoso imaroreē, kotxi Teoso sikaimaroretua. Iua aua ikinika imaroretxi. Ikara atoko aanikana Kristo nireēkitinoka kamakani Teosomoni. ²⁹ Ikara nikamini īkapani, ni-parīkauatapitipo. Pasāpaniri. Kristo posotiireē ni-parīkauata, kotxi kaposotiireri iua. Iua iteene sikata-paratari nākixinire, ininiā niposotari iteene niparīkauatini iua īkapani.

Paoro Nirekakiti

² Ninirekari himarotini iteene nimisiritiko hīte īkapani. Apaka iteene nimisiritiāka Araotxiséia sitatxiti auakani īkapani. Nimisiritiāka apanakini nimataōkitakini īkapani apaka. ² Ninirekari ikinimane nino kataparaxinire ininina. Apaka ninirekana itiretakakiniuana, ininiā ātika nino nireēkiti. Ikara atoko ininiāna, iteene imarotarina ikinika Teoso sākire. Iuasaaki imarotarina Kristo, mitxi kākiti mimarotakiniti, mitxi aīri Teoso moerekakiniti. ³ Paimatireri Kristo. Iua mimarotakiniti !auari. Ikinipoko imarota. ⁴ Ikara atoko nisāpiretai hīte, apanakini mamisirienetakanii tīkane kākiti imaroreē. ⁵ Nīto !auari hītekata, iuaritika nixinikapikai hīte nākixinireē. Nipoxokoniua, kotxi nimarotari hīkamakiti atāo inini. Apaka nipoxokoniua, kotxi hīte iteene auikari Kristo sākire.

Atāo Kristo Sākire Auiākani Kamakiti

⁶ Hāpakapapekari Kristo Xesosi hīauite ininiua īkapani, ininiā hīkamariko inirekakiti ikiniōtika. ⁷ Iua taparanoka hīkosekako. Aākotsa kosekiniri āparaā atoko hītxako. Ikara atoko hininiā, kataparari hīxinire. Ininiā atāo hāuikari Kristo sākire mitxi aōerekakiti atoko, ininiā kataparaiko. Ininiā iteene hītxariko Teoso: "Ikinika pikamakiti ate īkapani peerekari," hītxako.

⁸ Erepaniko. Kona hāuiritapiri kākiti makatxakinii Teoso kimaporeē. !Hāuikapiri nino sākire, kotxi ātiāo nino sākire. Na atāo isākirena. Kākiti imarorenoka imarotana. Kamisirienererini nino. Maxikatīka isākirauatana. Kitxakapirīka auakani sāpiretakiti nino sākire. Īkorapokoriti auakani nireēkiti maerekati isāpiretana kākiti. Kona Kristo sākireni.

Apiananiri Itxaua Kristo

⁹ Kristo aua iito, iuaritika Teosotxikana iua. Kristo aua ikinipoko Teoso posotiire, ikinipoko itiraōki, ikinipoko imarore, txaāpokata, kotxi Teoso itxaua. ¹⁰ Kristo aua hākixinireē, ininiā ikinipoko aua hitemoni. !Auari apikomoni hinirekakiti, kotxi auītetxiakori iaxiti auakani auite itxaua. Apiananiri itxaua. Kaposotiireri iua atoko inakari !auari.

Kristo Kamakiti Hīte īkapani

¹¹ Hāpakapapekari Teoso takaōtxikare kākiti mataākiniti. Hākixinireē Teoso takari itakaōtxikare. Kristo makatxakasaakiri himaerekani hīto nireēkiti, iuasaaki hāpakapari Teoso takaōtxikare. ¹² Hīpatx-iatikosaaki, Kristokata ikatakoni atoko hītxaua. Eereka hōkitikaāka Kristo ōkitikiko atoko. Hīte ōkitikaākako, kotxi hīte auikari Teoso posotiire Kristo ōkitikini ipīkasaaki.

¹³ Mitxi ipīkani atoko hītxaua himaerekani xika. Xoteo minakaniua hīte, ininiā mitxi kona himarotari Teoso nireēkiti. Hīponaniākasaaki, maerekati auape hitemoni. Iuaritika Teoso txīkitakai auāki hinini Kristokata. Teoso makatxakari ikinipoko himaerekani. !Ixinikaikari himaerekani. ¹⁴ Iua oakari iōkatsopatakori amaerekani sāpiretiko. Ikara iōkatsopatakori sāpiretari amisiritiko amaerekani xika. Amitekini !auari. Amisiritiko auapitika. Iuaritika iua oakari ikara iōkatsopatakori. Imakatxakari ikara iōkatsopatakori. Īpiriāmitakari nopini Kristo tokakitikosaaki, ikara iōkatsopatakori tokakitaāka apaka iuaā, ininiā !itxaika. Iuasaaki amisiritiko !auaika.

¹⁵ Kristo ĩpiriāmitakari nopini ipīkasaaki, iuasaaki imakatxakari ikinika Satanasi posotiire, iniritiakori posotiire pakini. Iua oerekari ikinimane !kaposotiirena nino. Iua ōkitikasaakiua, oerekari ikinimane iuananira Apiananiri ininiua. Iuasaaki Kristo oerekari ikinimane ikāiatini.

¹⁶ Ininiā kona hāuiritapiri apanakini txitinii hinikakiti xika, hiātakiti xika pakini. Kona hāuiritapiri apanakini txitinii kiiniri Teoso īkapani hīkamini xika, kiiniri kasiri itopāitakasaaki hīkamini xika, kiiniri tomatiko ōti hīka-

makiti xika pakini. ¹⁷ Kiiniri Teoso ĩkapani ĩkorasaaki sanõkatxi atoko itxa. Oerekaua atão inakari, txamari na iteene oerekaua. Iteene oerekaãka atemoni, Kristo aõkitakasaaki. ¹⁸ Erepaniko kãkiti ia atoko inakari: Nino a iuikari imiukakaniuana. Ninoa teosonetari Teoso nitiriakori matamatakoni. Ninoa sãpiretari kãkiti matamatakoni aõkitinina itaponeẽna. Ixinikarina ninoaka nireẽkitinoka. Ixinikarina kimarorerini ininiuana, ininiã iuikauana. Erepaniko kãkiti ikara atoko inakani. Hãuikiniãri ninoa sãkire, lauauka hĩparĩka ĩki. ¹⁹ Kãkiti ikara atoko inakani ĩnirekari Kristo iauĩtena ininiua. Kotxi Kristo akii atoko itxa. Ate iua ĩto atoko atxaua. Ikara atoko ininiã, isikataparataua. Aãpotiitaua. Asikataparatakaua. Åtika ĩtotxi atoko atxaua. Ikara atoko aniniã, aimaroãpotari isãkire. Aaneẽ, kãkiti ĩto aneini atoko.

Apinini, Aãuini Pakini Kristokata

²⁰ Mitxi hinireẽkiti itixi auakani nireẽkiti atoko. Hãuikasaakiri Kristo sãkire, mitxi hinireẽkiti lauauka. Ipĩpe. Txamari hĩkamapanikari ĩkorapokoriti auakani kamakiti atoko. Ninoa nireẽkiti iaõka hĩkamapanika. ²¹ Ninoa txari: "Kona pimaĩkapiri ikara. Kona pinikapiri ikara nipokori. Kona piouãtakapiri ikara." Kinirepa hĩkĩpitari ikara isãkirena? ²² Ninoa paniãtakiti xipokapitakako. Ikara atoko ĩtxa, kotxi ikara atoko inakari paniãtakori kãkitinoka paniãtakiti. Kãkiti oerekakiti sãkirexitinoka ikara. ²³ Kãkiti uãkatari ninoa paniãtakiti kimarorerini paniãtakiti atoko. Ninoa xinikakiti iaõka ĩnirekarina Teoso. "ĪErekano," ĩtxana, txamari ãkixĩnreẽna ĩtxana "Peerekano." Ninoaka misiritaua ĩtõãna. Ikamarina ikinika ĩtona nireẽkiti.

Atão Hĩkamakiti Erekaru Hãuini ĩkapani

3 Hĩte õkitikaãka Kristokata hãuini amaneri inini ĩkapani, ininiã hinirekariko hĩkaminiri Teoso tixine auakani kamakiti iaõka. Iuaã Kristo topãkanãta Teoso kikomoni. Apiananiri ĩtxaua Teoso kikomoni topãkakari. ² Hĩxinikariko Teoso tixine. Kona hĩxinikapiri ĩkorapokoriti. ³ Ipĩkani atokopeka hĩtxa, kotxi hãuini kitxakari !auaika, ininiã kona hĩxinikaikari ĩkorapokoriti auakari. Teoso sãkire mauĩãkani ĩmarotari hãuini amaneri Kristokata Teoso auiniãtaã. ⁴ Kristo txĩkitakari aãuini amaneri inini. Iua uai apokasaaki iuaĩkana atamataãka. Iuasaaki hĩte apaka atamataãka iuakata. Iuasaaki hĩtemoni auari Kristo iotximere atokokana. ⁵ Hĩxipokariko hĩito nireẽkiti, kotxi ĩkorapokoriti auakari nirekari ĩtotxi nireẽkitinoka. Hõkariko. Kipa aua aãkixĩnreẽ aõkini ĩkapani? Auari anokaretxi. Auari aĩto nireẽkitinoka kamiko nirekiko. Auari ãti ĩto nirekiko. Apaka auari ãti nakiti nirekiko aãkixĩnreẽ. Iteene anirekĩniãri ãti nakiti, ateosone atoko ĩtxaua anireẽkiti. ⁶ Ikara maerekati xika, Teoso omanãkare apokapitakako Teoso paniãtakiti makĩpitakanimoni. ⁷ Mitxi hĩte kamari maerekati ikara atoko inakari. Iuasaaki hĩtotapekari ikara atoko inakari hĩkamini. ⁸ Uatxa ia atoko inakari hĩtakanapako:

omanãkaretxi, ãti iteene txitiko, Teoso misãkirepiretiko, maerekati sãkiretxiti pakini. ⁹ Kona himisirienetakapeua, kotxi hĩtakanapapekari maerekati mitxi hĩkamakiti. Himãka kitxakari hõkini atoko, hĩtakanapapekari ikara maerekati.

¹⁰ Uatxa hĩkamakiti amaneri. Himãka amaneri hĩretakini atoko, hĩkamakiti uatxa amaneri. Teoso txĩkitakari hĩkamakiti amaneri inini, ininiã himarotari atão inakari imaroretxi. Ininiã Teoso kamakiti atokokana hĩkama, kotxi hĩte kamakari ĩtxaua. ¹¹ Uatxa kãkiti apiari !auari. Kreoakori, Xoteoakori, Teoso takaõtxikare auãtotakini, Teoso takaõtxikare mauãtotakini, ĩmaroreni, kãkiti ĩtopa auakani, nitiritxi amotakoni, kãkiti miamotakoni pakini !auari kãkiti apiari. Åti kãkiti ãti kãkitixikana, kotxi Kristonoka Apiananiri. Iua aua ikini-mane isãkire auĩãkani ãkixĩnreẽ.

¹² Ininiãkara hiamonĩkariko ãti. Hĩkamariko erekari ãtimoni. !Hĩuikapeua. Kaneenama !hĩtxape. !Katimari homanãkarauatini. Ikara atoko hãuako, kotxi Teoso mereẽkini, iua nakitiakori, itiretakini hĩtxaua. ¹³ Himĩteenekakakauako. Himaxĩnĩkaretariko apanakini kamakiti, hĩte mapokaerekatakiniti. Kristo maxĩnĩkaretapekari maerekati hĩte kamakiti, ininiã iua atokotxikana himaxĩnĩkaretariko maerekati apanakini kamakiti hĩtemoni. ¹⁴ Ikara erekari hĩkamako. Erekaru apiari hĩkamini, hĩtiraõkiuatini. Hĩtiraõkiuatoko. Hĩtiraõkiuatakasaaki, ininiã iuasaaki ikinika hĩkamakiti atão.

¹⁵ Kristo kamaerekaxĩnretai, ininiã erekari hãkixĩnre. Hãuiritariko ikara erekari kaikotini. !Hĩkamapiri ikara erekari makatxakiko ĩkapani. Hĩkinika ãtika ĩtotxi atoko hĩtxaua. Teoso akiritai hĩte hãkixĩnre ereka inini ĩkapani. Hĩtxariko Teoso ãtipirika: "Erekapitakari pikamakiti nota ĩkapani," hĩtxako. ¹⁶ Hãuiritariko ikinika Kristo sãkire kaikotini hãkixĩnreẽ, ininiã iuasaaki himarore iteene aua. Hõerekakakaua. Hõtãkikakakaua. Hĩxikaretari xikari Teoso ĩkapani. Hĩxikaretariko xikari Teoso sãkire iõkatsopatakori xikariti. Hĩxikaretariko xikari kitxakari, amaneri pakini Teoso ĩkapani. Hĩxikarauatakasaaki, hãkixĩnreẽ hĩtxariko Teoso: "Erekapitakari pikamakiti nota ĩkapani." ¹⁷ Ikinika hĩkamakiti hĩkamako Apiananiri Xesosi ĩkapani. Hĩsãkirauatakasaaki, hĩsãkirauata Apiananiri Xesosi ĩkapani. Iuasaaki hĩtxariko aĩri Teoso: "Erekapitakari pikamakiti nota ĩkapani," hĩtxariko.

Kãkiti Aapoko Auakani Őtãkikiko

¹⁸ Hĩte ĩtanorotxi, hĩkĩpitariiko hĩtaniri sãkire, kotxi Apiananiri nakiti hĩtxaua, ininiã ikara atão hĩkamini.

¹⁹ Hĩte ĩtaniritxi, hĩtiretaroko hĩtanoro. Kona hĩtxitapero oa. Kona homanatapero.

²⁰ Hĩte amarini, hĩkĩpitariiko hĩri, ĩnoro pakini sãkire. Ikinika ninoa paniãtakiti hĩkamako, kotxi Teoso apokaerekatari ikara atoko inakari.

²¹ Hĩte ĩrĩtxi, kona hĩkamanaiananetapena hamariteakori, kotxi eereka maerekaxĩnreteri aua ĩnoamoni, ininiã ĩnirekaikarina hĩte paniãtakiti ikaminina.

²² Hīte nitiritxi, hīpatrāote ūkorapokoriti aua, ininiā hīkamariko ikinika ninoa paniātakiti. Apanakini iteene parīkauata ipatrāote apisatoō, iua apokaerekatiniiri ūkapani. Iua mauakanisaaki apaka iteene hīparīkau- atako. Ikinini hīxinireritika hīkamariko hīparīka. Ikara atoko ininiā, atāo hīpaxitari Teoso. ²³ Ikinika hīkamakiti hīkamako hītaparaxinireritika. Hīparīkauatakasaaki, parīkatxi Apiananiri ūkapani hīkamini atokotxikana, hī- parīkauata kākiti ūkapani. ²⁴ Hīparīkauatako ikara atoko, kotxi himarotari Apiananiri sikinii ipotetakiti iax- itikiri hīparīka ūki. Itixine hāpokasaaki, hāpakapariko. Apiananiri Kristo nitiriakori hītxaua. ²⁵ Maerekati ka- makari apakapariko imisiritiko. Teoso misiritari āti maerekati kamakari, āti maerekati kamakari imisiritini atokotxikana.

4 Hīte patrāo, hīkamariko atāo inakari hinitiriakori ūkapani. Kona himisirienetapena ninoa. Kotxi hīte apaka aua hīpatrāote Teoso tixineē.

Apikomoni Paoro Ōtakikakiti

² Kona hītakanapapiri Teoso himisākiretini. Araōkire hītxako maerekati mapokakani ūkapani. Ātipirika hītxariko Teoso: “Erekapitikari ikinipoko pikamakiti no- ta ūkapani,” hītxariko iua.

³ Apaka himisākiretariko Teoso ate ūkapani. Hamanaāriko Teoso, iua oerekiniua isākire apanakini- moni asāpiretini ūkapani, kotxi anirekari asāpiretiniri kākiti Kristo pirena, mitxi kākiti mimarotakinini. Ikara nisāpiretini xika, kateia āki naua.

⁴ Himisākiretariko Teoso, Kristo pirena atāo nisāpire- tini ūkapani, kākiti atāo imarotini ūkapani.

⁵ Kimarorerini hītxauako Teoso sākire mauīākani sauaki hāuakasaaki. Aūini poiāo, ininiā ikiniōtika hini- tari kākiti Teoso sākire hīsāpiretini ūkapani.

⁶ Teoso sikapekai ikinipoko erekari, ininiā hīsākirau- atakasaaki, hōerekari kākiti hīsākireē hītiretinina. Iōki- ra mauakaniā nipokoriā, !kaposeri. Iua atokotxikana erekari mauakaniā hīsākireē, kākiti !inirekari ikenako- tiniri hīsākire. Erekarini hīsākire ininiā, himarotari hā- pakapapiretiniri kākiti.

Paoro Iokanapiretini Pirena

⁷ Txīkiko inakori sāpiretaiko ikinika nota pirena. Aī- tari, atiretakiti itxaua. Iua parīkauatapitipo Apiananiri ūkapani. Apiananiri nitiri itxaua atekata. ⁸ Niokanitari iua hītemoni, hīte imaropiretini ūkapani, hīte isikata- paraxiniretini ūkapani. ⁹ Niokanitari Onésimo inakori apaka iuakata. Koroso sitatxitikiri iua, hīte atoko. Aītari atiretakiti itxaua apaka. Ātipirika atāo iparīkauata Kris- to ūkapani. Ninoa sāpiretaiko hīte ikinipoko Kristo sākire auīākani kamakiti uai.

¹⁰ Arisitako inakori, notakata kateia āki auakari, xinikamanapitai hīte. Panapee itaro ākiri Marko, xinikamanapitai hīte apaka. Nisāpiretipekai hīte Marko pirena. Ininiā ereē iua apokasaaki, hīpoxokonir- itika hāpakapariko iua. ¹¹ Xosoe Xósito inakori xinika- manapitai hīte apaka. Ninoa ipi āti pakini Xoteoakori notakata parīkauatakani itxauana. Ninoa parīkauata notakata, Teoso auītetxi ininiua pirena asāpiretini ūka- pani. Isikataparaxiniretanona nota.

¹² Epāpara inakori apaka xinikamanapitai hīte. Ereēkiri iua. Kristo nitiri itxaua. Ātipirika imisākiretari Teoso hīte ūkapani, Teoso nireēkitinoka hīkamini ūka- pani, ikinika hīkamakiti atāonoka hīkamini ūkapani.

¹³ Nota imarotari iteene iparīkauatini hīte ūkapani. Apa- ka nimarotari iparīkauata kākiti Araotxiséia sitatxiti auakani ūkapani. Apaka nimarotari iparīkauata Ierapori sitatxiti auakani ūkapani.

¹⁴ Aītari atiretakiti, amianari imarotakari Arókasi in- akori apaka xinikamanapitai hīte. Témasi inakori apaka xinikamanapitai hīte. ¹⁵ Hīsāpiretanako aītariakori Araotxiséia auakani nixinikinina ninoa. Hīsāpiretaroko Nīpa inakoro, Teoso mereēkini oaāpoko apotiitakaniua pakini, nixinikinina ninoa. ¹⁶ Ia niokanatsopatakiti hā- tatsopatakoti hīkinika hīkenakotini ūkapani, eereka hī- paniātariko atatsopatiko Araotxiséia sitatxitiā, Kristo sākire auīākani kenakotiniri ūkapani. Apaka hīte atat- sopatariko Araotxiséia auakani iokanatsopatakiti.

¹⁷ Hītxariko Akipo inakori: “Pikamariko ikinipoko parīkatxi Apiananiri paniātakiti pikamini.” ¹⁸ Nota Paoro niōkatsopatarini ia niuakoā: Hīxinikariko kateia āki nauini. Teoso sikari ikinipoko erekari hītemoni. Ameē.

1 Tesarónika

1 Paoro, Sírası, Tximótxio pakini iokanatsopata Teoso mereëkinimoni Tesarónika sitatxitiã. Aïri Teoso nakitiakori hïtxaua. Apiananiri Xesosi Kristo nakitiakori hïtxaua. Aïri Teoso, Apiananiri Xesosi Kristo pakini sikai ikinipoko erekari. Ninoa kamaerekaxiniretai hïte.

Paoro Misäkiretari Teoso Tesarónika Auakani Ìkapani

² Amisäkiretari Teoso hïte Ìkapani. Ätipirika atxari Teoso: "Peerekai pite, kotxi Tesarónika auakani auikari pisäkire," atxari. ³ Aïri Teoso amisäkiretakasaaki, axinikapikari hïte parïka Teoso Ìkapani. Atão hïparïkauata, kotxi iteene hãuikari iua sãkire. Axinikari hïparïka Teoso Ìkapani, kotxi iteene hïtoretari iua. Axinikari himarotiniri Apiananiri Xesosi Kristo sãkire iaõka hïkamini. Hïpoxokoniritika hiãtapari isãkire iaõka apokini.

⁴ Nitariakori, Teoso tiretapitikai hïte. Iua mereëi hïte iua nakitiakori hininiua Ìkapani. Aimarotari ikara. ⁵ Teoso iokanapirena erekari hïtemoni asãpireta Teoso posotiireë. Ate sãkirenoka !kaposotiireri. Erekari Matamatakoti oerekai asãkire atão inini. Hïte iteene imarotari asãkire atãonoka inini. Hãtamatarari aparïka hïte Ìkapani hïte sauaki aãuakasaaki, ininiã himarotapitikaua ate. ⁶ Ininiã hïte kamari ate kamakiti atokotxikana. Hïkamari Apiananiri kamakiti atokotxikana. Himisiritiko aua, iuaritika hãuikari Xesosi sãkire. Himisiritiko aua, iuaritika Erekari Matamatakoti kamapoxokonitai. ⁷ Ininiãkara Masetónia tixini auakani, Akaia tixini auakani pakini nirekari hïte atoko ininina. ⁸ Inirekarina hïte atoko ininina, kotxi hïte sãpiretari Apiananiri sãkire Masetónia auakanimoni, Akaia auakanimoni pakini. Apaka ikini itixiti iaripireta hïte iteene auikiniri Teoso sãkire. Ininiã kona ate sãpiretari kãkiti iteene hãuikiniri Teoso sãkire, kotxi ikinimane imarotape. ⁹ Ikinimane sãpiretari hïpoxokoniritika hãpakapiniua ate. Ninoa sãpiretari hïte takanapiniri teoso kamakori. Isãpiretarina hïparïkauatini uatxa Teoso atão inakari Ìkapani, auãkipika inakari Ìkapani. ¹⁰ Ninoa sãpiretari, hïte iãtapiniri Teoso äkiri itixine auakari kanapiriini Ìkorapokoriti. Iua Xesosi. Ipïkani sauaki Teoso õkitikakiti iua. Iua makatxakapekari amaerekani, ininiã amisiritiko !auaika kãkiti misiritiko õti apokasaaki.

Paoro Parïka Tesarónika Sitatxitiã

(Átosi 17.1-9)

2 Nitariakori, himarotari maxikatïka kona ate sari hïtemoni. ² Himarotari amisiritiko Piriposi sitatxiti

aãuakasaaki, hïtemoni aãpokini apisa. Iuaã auakani äsokaua, kateia äki taka itxauana. Iuaritika Teoso sikataparaxiniretaua asãpiretiniri Teoso iokanapirena erekari hïtemoni. Itori kãkiti !nirekari asãkire, iuaritika ate sãpiretari Teoso iokanapirena erekari hïtemoni. ³ Ate oerekakiti !akeroka. Teoso nireëkitinoka anireka akamini. Äti anireëkiti !auari. !Anirekari amisirienetini hïte.

⁴ Teoso auiritaua iua iokanapirena erekari asãpiretiniri kãkiti. Teoso auikari atão asãpiretiniri isãkire kãkitimoni, ininiã asãpiretari isãkire kãkitimoni. Asãkirauata, kona kãkiti akamapoxokonitini Ìkapanini. Anirekari akamapoxokonitini Teoso, kotxi iua ataerekatarari aãixinire. ⁵ !Asãpiretai ereka hinini, ate nireëkiti hïkamini Ìkapani. Asãpiretari Teoso sãkire hïtemoni, kona hïte nakiti anirekini Ìkapanini. Ikara himarotape. Teoso apaka imarotari ikara nisãkire atão inini. ⁶ Ate !anirekari kãkiti iuikiniua ate. !Anirekai hïte iuikiniua ate. !Anirekari apanakini iuikiniua ate. Kristo iokanatakini-raua ate hïtemoni, ininiã aposotari apaniãtinii ikinipoko anireëkiti hïsikiniua. Iuaritika !anirekari ikara atoko akamini. ⁷ Hïte sauaki aãuakasaaki iteene atiretai hïte. Sito tiretiniri oimi atokokana, ate tiretai hïte. ⁸ Iteene atiretai, ininiã anirekari asikinii Teoso iokanapirena erekari. Kona iuananini anireka asikinii hïte. Axinire, aïto pakini anireka asikinii, kotxi ate tiretakini hïtxapekaua. ⁹ Nitariakori, hïxinikari aparïka hïte sauaki. Pasãpaniri. Ìkanõka, pokamara pakini aparïkauatapitipo, akiena, anireëkiti pakini aãpakapini Ìkapani, kotxi !anirekari aamanainii hïte aamonitakiti Ìkapani. !Anirekari hïte parïka apiatini ate Ìkapani, Teoso iokanapirena erekari asãpiretakasaakii.

¹⁰ Hïte Kristo sãkire auiaãkani sauaki aãuakasaaki, hïte itikari aãuini ikiniõtika. Teoso apaka itikari. Himarotari Teoso nireëkitinoka akama iuasaaki. Himarotari !akamari erekarinoka akama iuasaaki. ¹¹ Hïri atoko atxaua iuasaaki, kotxi aõtäkikai hïte. Amïkapiritai, imi iri mïkapiritini atokokana. Apaniãtai atão inakarinoka hïkamini. ¹² Ikara atoko akaminii, kotxi Teoso anaakori hïtxaua, ininiã anirekari hïte kaminiri hïri kamakiti iaõka. Iua akiritai hïte hãuïte inini Ìkapani. Inirekari hãtamatiniri iua iotximere itixine hãuakasaaki. ¹³ Ininiã ätipirika amisäkiretari Teoso: "Erekapitikai, kotxi Tesarónika auakani auikari pisäkire, ninoamoni asãpiretakiti. Ninoa imarotari kona ate sãkireni asãpiretana. Ninoa imarotari asãpiretana atão pite sãkire," nitxari Teoso. Teoso sãkire parïkauata hïte Xesosi sãkire auiaãkani äixinireë isãkire hãuikini Ìkapani. ¹⁴ Xotëia tixini auakani,

Kristo Xesosi nakitiakori, Teoso sákire auiäkani, ninoa kamakiti atoko hīkamako hīte nitariakori. Xoteoakori misiritana ninoa. Iua atokotxikana hīte nirimane misiritapekai hīte. ¹⁵ Ninoa Xoteoakori okari Apiananiri Xesosi. Ninoa apaka okana ninoaka nirimane, Teoso sákire sápiretakani. Ninoatxikana misiritapekaua ate. Teoso lapokaerekatari ninoa kamakiti. Ninoa omanatari kákiti. ¹⁶ Kotxi !auiritarina Xesosi sákire asápiretini Xoteo minakanuia, imaerekanina makatxakiko ĩkapani. Uatxa ninoa maerekani xápoka. Uatxa Teoso omanákare apokaepka ninoamoni.

Paoro Ipiätinina Tesarónika Auakani

¹⁷ Ätiätaã ate auakasaaki, ätipirika axinikapikai. Aĩto hītekata mauakanisaaki, aãkixinire xinikapikai. Ate ipiätai. Iteene anirekari uaiäkana aõkitinii. ¹⁸ Anirekapi-tikamari hītemoni akanapiriini. Nota Paoro itokata nirekamari napokini hītemoni, txamari Satanasi !auiritaua asini hītemoni. ¹⁹ Aãũite Xesosi äti õti ikanapiri-ikäsaaki, aãpotiitaua iua apisatoõ. Iuasaaki aiätapakiti apokaepka. Kĩpa aiätapakiti? Hītera. Iuasaaki iteene apoxokoniuatako. Kinirepa apoxokoniuata? Kotxi hīte aua iuaã. Iuasaaki aãpakapari aparĩka ĩki. Kinirepa aãpakapari aparĩka ĩki? Kotxi hīte auikari Xesosi sákire ate sápiretakiti. Ininiã peerekari iuasaaki. ²⁰ Atãopitikara nisákire. Ate iuikai hīte. Hīte kamapoxokonitaua ate.

³ Iuasaaki !amĩteenekari amimaropiretakani hīte, ininiã axinikari atenoka kaikota uai Atena sitatxitiã. ² Ininiã iuasaaki aiokanatarari aĩtari Tximótxio hītemoni. Teoso nitiri itxaua. Imoianataua Kristo iokanapirena erekari asápiretakasaakiri kákiti. Aiokanatarari iua hītemoni, Xesosi sákire iteene hãuikini ĩkapani, isikataparaxiniretinii ĩkapani. ³ Ikara atoko ininiã, kona hĩxinikari Teoso sákire hītakanapini, kákiti misiritinii xika, kotxi himarotari amisiritiko apokapitikako. Teoso auiritari. ⁴ Hītekata aãuakasaaki, asápiretipekai amisiritiko apokini. Uatxa himarotapitikari atão asákire, kotxi uatxa apopeka asákire iaõka. ⁵ Ininiã apikomoni !nimĩteenekaikari nimimaropiretakani hīte. Ininiã iuasaaki niokanatarari Tximótxio hītemoni, Xesosi sákire hãuikini nimarotini ĩkapani. Nipĩkari Satanasi sikanireõtinii hīte, Xesosi sákire hãuikini hītakanapini. Nipĩkari maxikatĩka Xesosi sákire asápiretinii hīte, hītekata aãuakasaaki.

Tximótxio Sápiretakiti Ikanapiriãkasaaki

⁶ Uatxa Tximótxio kanapiripeka atemoni. Iua minapiretai hīte. Erekari isápiretakiti. Iua txaua ate: "Tesarónika auakani iteene auikari Xesosi sákire. Ninoa tiraõkiuatapika. Ipotxitarina ixinikiniina hīte. Ipiätaina hīte, ninoa hĩpiätini atokotxikana," itxa Tximótxio atemoni. ⁷ Nitariakori, ate amaxikiko auapitika. Ate misiritiko auapitika, iuaritika hīkamapoxokonitaua, kotxi iteene hãuikari Xesosi sákire. ⁸ Uatxa peerekari ate aui-ni, kotxi Apiananiri sákire iaõka hīkama. ⁹ Iteene apoxokoniuata Teoso apisatoõ, kotxi hãuikari iua sákire. Ax-

inikasaakii, apoxokoni iteene auapitika. Ininiã ätipirika atxari aTeosone: "Peerekai pite, kotxi Tesarónika auakani iteene auikari pisákire, ininiã ikamapoxokonitauana ate," atxari. ¹⁰ ĩkanõka, pokamara pakini iteene aamanaãri Teoso hīte iuaĩkana aaõkitini, kotxi anirekari apikomoni Teoso sákire himimarotakiniti aõerekinii.

¹¹ Anirekari aĩri Teoso, aãũite Xesosi Kristo pakini oerekiniãua aãpokini hītemoni. ¹² Anirekari Apiananiri txĩkitakinii himarotini hītiretakakiniua. Anirekari hītiraõki aneini. Anirekari iteene hītiraõkiuatini. Anirekari ikinimane apaka hītiretini, ate tiritinii hīte atokotxikana. ¹³ Anirekari Apiananiri sikataparaxiniretinii hīte. Ininiã Apiananiri Xesosi Kristo ikinika inakiti-akorikata ĩkasaaki uai, iuasaaki maerekati !auaika hītemoni aĩri Teoso apisatoõ. Iuasaaki hīte apoĩtakari !auari. Iuasaaki erekai hīte.

Akamakiti Teoso Apokaerekatakiti

⁴ Nitariakori, apikomoni nisápiretai. Asápiretipekai hīkamakiti tĩkane, hãuini Teoso apokaerekatini ĩkapani. Ikara atoko inakari hīkamapitika uatxa. Erekari hãuini uatxa, ininiã nõtãkikai Apiananiri Xesosi posotiereẽ, apikomoni iua apokaerekatakiti ikiniõtika hīkamini ĩkapani. ² Himarotapitikari aõereẽkiti hīkamini ĩkapani. Apiananiri Xesosi paniãtaua ikara aõerekinii hīte.

³ Teoso nirekari himaerekani xipokaãpotini hãkixinireẽ. Ininiãkara hītaniri minakotikatika, hītanoro minakotokatika, !hĩsirĩkape. ⁴ !Hãuiritapiri hĩto nireẽkiti ikamini. Hĩto auĩte hĩtxauako, ininiã maerekati hĩto nireẽkiti !hĩkama. Atão hĩpaxitariko hīteka ĩto, apanakini ĩto apaka. ⁵ !Apakata hĩxinikini ätipirika maerekati hĩto nireẽkiti äti ĩtokata hīkamini. Xoteo minakanuia, Teoso mimarotakani, xinikari ikara atoko inakari. ⁶ !Apakata hĩtxĩkitakiniri äti aĩtari maerekati ĩtotxi nireẽkiti ikamini, kotxi Apiananiri misiritariko kákiti ikara atoko inakari maerekati ikaminiã. Asápiretipekai ikara. Apinitapekai. ⁷ Teoso kona akiritaua iuamoni, maerekati aĩto nireẽkiti akamini ĩkapani. Akiritaua iua nakiti aniniua ĩkapani, erekarinoka akamini ĩkapani. ⁸ Ininiã ikara asákire manirekakati, !omanataua ate. Omanatarari Teoso. !Inirekari Teoso sákire, kotxi Teoso sikari Erekari Matamatakoti kãkitimoni.

⁹ Hītariakori hītiretini pirena kona aiõkatsopata hītemoni, kotxi Teoso oerekepekai hītiretakakiniua. ¹⁰ Nimarotari hītiretiniri ikinika hītariakori Masetónia tixini auakani. Iuaritika nitariakori, aõtãkikai apiata hītiretiniri kákiti ikiniõtika. ¹¹ Hãpaiaõkariko hĩtsorĩkaãtini. Apanakini parĩka !himaãkatape. Hīkamariko hīteka parĩka hãuini ĩkapani. Ikara atoko asápiretipekai hīte. ¹² Ikara atoko hīkaminiã, Xesosi sákire mauĩkani paxitai. Ikara atoko hīkaminiã, !auari hiamonitakiti.

Apiananiri Kanapiriini

¹³ Nitariakori, anirekari himarotini atão inakari ipĩkani pirena. Kona anirekari himatinaniuatini Xesosi

sáikire mauiákani matinianiuatini atoko, kotxi ninoa ipíkasaaki, !imarotarina isinimonina. ¹⁴ Aáuihari Xesosi ipinini. Aáuihari iuaíkana ókitikiniua. Ininiákara aáuihari ipíkani Teoso sáikire auiákani apaka ókitikiniua. Teoso minana ninoa Xesosikata ikanapiriákasaaki. ¹⁵ Iuasaaki ate auákipanika inakanuia Apiananiri kanapiriákasaaki, lasari ninoa mitxi ipíkani apisapanika. Mitxi ninoa sa. Iposo atoko ate sa Apiananirimoni. Apiananirira sápiretapedekaua ikara. ¹⁶ Iuasaaki Apiananiri potorika itixine. Iuaka katxaka uaimoni. Iuasaaki akiripoakata iua apokasaaki, ininiá kákiti kenakotariko Teoso nitiriakori auíte sáikire. Teoso trópetane xókiko kenakotaáka. Iuasaaki mitxi ipíkani, Kristo sáikire auiákani, merepanika ókitikauako. ¹⁷ Eereka ate auapanika inakanuia anikaáka ipíkanikata Apiananiri aaókitini íkapani. Aaókitari iua itanoxiti katxiáriá. Ininiá eereka iuakata aauapininiika. ¹⁸ Ikara sáikiretxiti híspiretakakauako, ininiá híkamataparaxiniretakakauako.

Apiananiri Kanapiriini Óti

5 Nitariakori, kona asápiretari Xesosi kanapiriini óti. !Asápiretari apokini kasiriti, ikanapiriinikanani pakini. ² Kotxi atáo himarotari, Apiananiri uai apokini, kíitiriri íkanóka apokini atokokana itxako. Ininiá kákiti !imarotari Apiananiri apokini óti. ³ Iuasaaki kákiti sáikire: “Neenamtxi !auari. Erekaua. Imonókonu !auari,” inakasaaki, iuasaakipeka katimaritika Teoso xipokari ikinipoko. Katimari sito amarini tsiíkini atoko itxako. Oa sito tsii apokasaaki, omitekini !auari. Iua atokokana kákiti mitekini !auari iuasaaki Xesosi kanapiriákasaaki. ⁴ Nitariakori, kákiti ipiá auakani atoko !hítxaua. Himarotapitikari áti óti Apiananiri uai kanapiriini, ininiá hiátapari ikanapiriini óti apokini, himatikokakani íkapani, kíitiriri tikokakiniri kákiti atoko himinakanu íkapani ikanapiriákasaaki. ⁵ Híte híkinika kaiotximereri anaakori hítxaua. Pokamarari anaakori atoko hítxaua. !Akaiakota ipiá. !Akaiakota íkanóka, kotxi !anirekaikari maerekati akamini. ⁶ Ininiákara apanakini imakakani atoko !himapeko. Araókire matxako, maerekati mapokakani íkapani. Aíto auíte matxaua. ⁷ Imakakani imaka íkanóka. Poátakani poáta íkanóka. !Iátapari Xesosi kanapiriini. Ikara atoko !hítxapeko. ⁸ Pokamarari anaakori atxaua, ininiá áito auíte matxaua. Sotato takari itorota koana, itorota tokapare íkapani. Sotato torota koana atoko itxa Teoso sáikire iteene háuikini. Sotato torota koana atoko itxa apaka hítxiraóki. Ininiá háuikasaakiri Teoso sáikire, hítxiraókiuatakasaaki, hákixinire tokapare auape. Sotato takari ikii táta ikii tokapare íkapani. Sotato kii táta atoko itxa

amaerekani makatxakiko aimarotini. Ikara imaroretxi axinikakiti akii tokapare itxaua. ⁹ Teoso mereéua ate kona imisiritiniua íkapani. Iua mereéua ate amaerekani aáuíte Xesosi Kristo makatxakini íkapani. ¹⁰ Iua ipina kákiti íkapani. Ipina iuakata aúini íkapani. Ikanapiriákasaaki, isáikire auiákani auákipanika inakani, ipíkani pakini aua iuakata. ¹¹ Ininiá hísikataparaxiniretakakauako. Himoianatakakauako Teoso sáikire iteene háuikini íkapani. Uatxa ikara atoko inakari híkamapeka.

Paoro Ótáikikare Mapotókire

¹² Nitariakori, aótáikikai himarotinina híte sauaki paríkauatakani, Apiananiri sáikire sápiretakani, híte ótáikikakani. ¹³ Ininiá iteene hípaxitanako. Hítiretanako ninoa, kotxi ninoa iteene paríkauata híte íkapani. !Hítxitakapeua. !Hineenamauatape. ¹⁴ Nitariakori, iteene aótáikikai híte ia atoko: Hípinitariko kákiti paniátakiti makípítakani. Hísikataparaxiniretariko píkarauatakani. Himoianatariko mataparani. Katima !hítxapeko homanákarauatini kákiti kerokasaaki. ¹⁵ Kona háuiritapiri misiritakori misiritiniri imisiritakiri. Átipirika híkamari erekari hítxariakorimoni, Xesosi sáikire mauiákanimoni apaka.

¹⁶ Átipirika hípoxokoniuatakani. ¹⁷ Himisákiaretapikariko Teoso. ¹⁸ Hípoxokoniuatakasaaki, hítxariko Teoso: “Erekari pikamakiti nota íkapani,” hítxako. Himatinianiuatakasaaki, iuaritika hítxariko Teoso: “Erekari pikamakiti nota íkapani,” hítxako. Ikara atoko Teoso nirekari átipirika híspiretiniri iua, kotxi Kristo Xesosi nakitiakori hítxaua. ¹⁹ !Hítokakapiri Erekari Mata-matakoti paríkauatini hákixinireé. Híkamari ipaniátakiti. ²⁰ !Homanatapiri Teoso sáikire kákiti sápiretakiti. ²¹ Hátaerekatariko ikinika. Erekarinoka híkamako.

²² !Hísipeko maerekati kamikoátaá, kotxi hísinia, apanakini xinikari atáo maerekati hinireka híkamini. ²³ Anirekari Teoso, kákiti kamaerekaxiniretakari, iua iteene kamaerekatinii híte iua nakitiakorinoka hininiua íkapani. Nimisákiaretari Teoso híte íkapani, híxinire, hákixinire, híto pakini ereka inini, ininiá aáuíte Xesosi Kristo uai apokasaaki maerekati !auaika hítemoni, ininiá híte apoítiko !auari. ²⁴ Híte akiritakari kamari isáikire iaóka.

²⁵ Nitariakori, himisákiaretariko Teoso ate íkapani.

²⁶ Haókitakakasaakia, hítxiraókitika hápakapakauako, kotxi hítxariakori itxauana. ²⁷ Apiananiri posotiireé nipaniátaí hátsopatiniiri ia niokanatsopatakiti ikinika átxariakori kenakotini íkapani.

²⁸ Aáuíte Xesosi Kristo sikari ikinipoko erekari hítemoni. Ameé.

2 Tesarónika

¹ Paoro, Sírası, Tximótxio pakini iokanatsopata Teoso mereëkinimoni Tesarónika sitatxitiã. Aïri Teoso nakitiakori hïtxaua. Apiananiri Xesosi Kristo nakitiakori hïtxaua. ² Aïri Teoso, Apiananiri Xesosi Kristo pakini sikai ikinipoko erekari. Ninoa kamaerekax-iniretai hïte.

Xesosi Kanapiriini Pirena

³ Nitariakori, ätipirika atxari Teoso: “Erekapitikari pikamakiti Tesarónika auakani ïkapani,” atxa. Ikara atoko asäpiretari Teoso, kotxi ikiniötika Teoso säkire häuikini apiaãpota. Apaka hïtiretakiniua ikiniötika apiaãpota. ⁴ Ininiã apanakini Teoso säkire auiãkanikata aãuakasaaki, asäpiretana ninoa ate iuikinii hïte. Ate iuikari himisiritiko himïteenekini. Ate iuikari häuikiniri Teoso säkire. Iteene himaxikiko, himisiritiko pakini, iuaritika himïteenekari. Iteene häuikari Teoso säkire.

⁵ Himisiritiko himïteenekini oerekari Teoso misiritiniri maerekati kamakani, kotxi ikara atão. Hïte misiritaãka, kotxi hïkamari hïauïte Teoso paniãtakiti, ininiãkara iuamoni apakatapitika häuini Teoso auïtetxi ininiãtaãua.

⁶ Teoso kamari atão inakarinoka. Ininiã imisiritariko hïte misiritakani. ⁷ Ixipokariko hïte misiritiko, ate misiritiko apaka. Iuasaaki hïtomata atekata. Ikara atoko inakari ikama, Apiananiri Xesosi oerekikosaaki Teoso tixine ipotorikasaaki, iniritiakori kaposotiireririkata.

⁸ Xamina tirinakariã imisiritanako Teoso mimarotakani, aãuïte Xesosi Kristo iokanapirena erekari makïpitakani.

⁹ Ninoa misiritaãkako ätipirika. Ikinipoko xipope ninoa ïkapani. !Auritaãkana Apiananiri auiniãtaã apokinina. !Atamatarina iua iotximere. !Atamatarina iposotiire.

¹⁰ Ninoa misiritaãka, Apiananiri kanapiriini ötisaaki.

Iuasaaki inakitiakori, isäkire auiãkani, txariko: “Peerekai. Peerekai. Äti kaposotiireri pite atoko inakari !auari,” itxanako. Ikara atoko hïte apaka säpiretari iua iuasaaki, kotxi hïte auikari asäpiretakiti hïtemoni.

¹¹ Ininiã amisäkiretapikari aTeosone hïte ïkapani. Ia atoko atxari iua: “Pite akiritari Tesarónika auakani pinakitiakori ininiuana ïkapani, ininiã ninirekari pite apokaerekatiniri ninoa kamakiti pite ïkapani. Pisikaposotiiretana ninoa ikinipoko inireëkitina erekari ikaminina ïkapani. Ninoa auikari pisäkire, ininiã iparïkauatana pite ïkapani. Ininiã pisikaposotiiretana ninoa ikara iparïkana ikaminina ïkapani.” ¹² Ikara atoko amisäkiretari Teoso, kotxi apanakini atamatakasaakiri erekari hïkamakiti, itxarinako aãuïte Xesosi Kristo: “Peerekai pite,” itxanako, ininiã Xesosi uãka iuikaãka. Apaka Xesosi txaike hïte: “Peerekai hïte,” itxaiko. Ikara

atoko aua, kotxi aTeosone, Apiananiri Xesosi Kristo pakini sikari ikinipoko erekari hïtemoni.

Apia Maerekati Apokini

² Nitariakori, maxinikari aãuïte Xesosi Kristo kanapiriini. Maxinikari iuakata aãpotiitiniua. Ikara axinikasaaki, aötäkikai hïte. ² Apanakini säpiretai: “Apiananiri kanapiriini öti apokapeka,” itxana. Maerekax-iniretika !hïtxape. Ikara atoko inakasaakina, !hïpïkarau-atape. Paxirari ninoa säkire. Atxiïti ninoa txari: “Erekari Matamatakoti säpiretano ikara.” Atxiïti ninoa txari: “Paoro säpiretari ikara.” Atxiïti ninoa txari: “Paoro iökatsopatari ikara.” Paxirari ninoa säkire. Kona häuikapiri ikara atoko inakari. ³ Kona xatiki häuiritapiri kãkiti misirienetini. Apiananiri kanapiriini apisapanika, kãkiti !nirekari Teoso säkire ikïpitini. Iuasaaki maerekati kamakari apiatakari apoka. Xipokatxi äkiri akiritaãka. Iua xipokaãkapitikako. ⁴ Iua apia maerekati !nirekari Teoso paniãtakiti ikamini. Iuikauako. “Kãkiti teosonetakini posotiire poiãoka. Nota posotiire apia-ta,” itxako. Iuasaaki iitopãka Teoso misäkiretiko aikoti äki. “Teosorano nota. Notanokara Teoso txaua. Äti Teoso !auari,” itxako iuasaaki. ⁵ Hïtekata nauakasaaki, nisäpiretapekai ikara. Atxiïti hïte xinikapanikari nisäpiretakiti? ⁶ Uatxa kona apakatapanika iua apia maerekati apokini. Himarotari Teoso !auritari iua apokini. Iuasaaki iuaka oerekaua. ⁷ Maerekati kipatakori posotiire auape uatxa, iuaritika maerekati mauritakati !auritapanikari iteene maerekati iarikini. Äti öti maerekati mauritakati makatxakaãka. ⁸ Iuasaaki iua apia maerekati oerekaua kãkitimoni. Apiananiri kanapiriãkasaaki, okari iua. Ixökare, isinanirenani xipokari iua. Iotximere xipokari iua apia maerekati. ⁹ Iua apia maerekati apokasaaki, Satanasi posotiire aua iuamoni. Ikamariko ikini sereti posotiiretxi kãkiti maposotakinini. Iua oerekari ikara, kãkiti imisirienetini ïkapani, isäkire kãkiti auikini ïkapani. ¹⁰ Ikini sereti maerekati ikama kãkiti pïpinanaãkani imisirienetini ïkapani. Ninoa pïpinanaãkani xipokapitikako, kotxi !nirekarina atão inakari itiretinina, ininiã imaerekanina makatxakiko !auari. ¹¹ Ininiã iuasaaki Teoso txïkitakana auikimirina ninoa misirienetakani säkire, ininiã auikarina atão minakati apiatakari. ¹² Ininiã atão inakari mauikakati misiritaãkako, kotxi iteene ipotxitari imaerekani.

Iteene Hāuikariko Teoso Sākire

¹³ Nitariakori, Apiananiri tirketakini, ātipirika erekari amisākiretiniri Teoso hīte ūkapani ia atoko: “Erekapitakai, kotxi pite mereēna Tesarónika auakani imaerekanina pimaktxakini ūkapani.”

Itixi kamiko apisapanika, iua mereēi hīte. Imaktxakari himaerekani, kotxi Erekar Matamatakoti tūkitakai Teoso nakitiakori hininiua. Imaktxakari himaerekani, kotxi hāuikari atāo inakari. ¹⁴ Teoso iokanapirena erekari asāpiretakiti hītemoni hāuikasaa-ki, iusaaki Teoso akiritai hīte. Ininiā aūūite Xesosi Kristo iotximere hīte apaka apakapako. ¹⁵ Ininiā nitariakori, iteene kataparaxinire hītxako. Iteene hāuikariko Teoso sākire asāpiretakiti, aiōkatsopatakiti pakini. !Hī-takanapapiri.

¹⁶ Anirekari aūūite Xesosi Kristo, aīri Teoso pakini sikataparaxiniretinii hīte. Ninoa iteene tirketaua. Ātipirika isikataparaxiniretaua. Isikaua erekari aiātapini ūkapani. Aimarotari ikara erekari apokapitikako. Ikara atoko inakari ikama ate ūkapani, kotxi isikaua ikinipoko erekari. ¹⁷ Erekar hīsākiretakasaaki, erekari hīkamakasaaki, anirekari isikataparaxiniretinii hīte apikomoni erekari hīkamini ūkapani.

Himisākiretariko Teoso Ate ūkapani

3 Nitariakori, nisākire mapotōkire apoka. Himisākiretariko Teoso ate ūkapani Apiananiri sākire katima iaripiretini ūkapani. Himisākiretariko Teoso Apiananiri sākire auikiko ūkapani, hīte auikiniri atokotxikana. ² Himisākiretariko Teoso imaktxakiniua ate amapinakani ūkapani, maerekati kamakani sauaki aūuakasaaki, kotxi apanakini !auikari Teoso sākire. ³ Apiananiri kamari ikinika isākire iaōka. Iua sikataparaxiniretai hīte. Itokapakeētai, ininiā Satanas !inokai. ⁴ Apiananiri tūkitakaua ate aimarotiniri ate paniātakiti hīkamini. Ate imarotari, katana apaka hīkamapanikariko asākire iaōka. ⁵ Anirekari Apiananiri oerekinii Teoso tiraōki. Anirekari himīteenekiniri ikinika himisiritiko, Kristo imisiritiko imīteenekini atokokana.

Kākiti Paniātakiti Makīpitakani

⁶ Nitariakori, aūūite Xesosi Kristo nireēkiti iaōka asāpiretai hīte, ininiā apaniātai ia atoko. Hītari kākiti paniātakiti makīpitakati, aōereēkiti iaōka imakamaniā, ininiā iua moianari !hītxapeuako. Hītakana-pariko iua. ⁷ Hīte imarotari akamakiti iaōka hīkamini, kotxi hītekata aūuakasaaki ate kīpitari kākiti paniātakiti. ⁸ Kona anikari nipokori amaīkitxitakiniti. Iusaaki iteene aparīkauata. Īkanōka, pokamara pakini aparīkauata akiena aiमतोनि ūkapani, kotxi !anirekari hīte kaamatini hīte kiena. ⁹ Apakatapitika kākiti ūkitxitiua aparīka ūkapani, iuaritika !anirekari hīkitxitiniua, kotxi anirekari hīte parīkauatini ate parīkauatini atokokana. ¹⁰ Hītekata ate auakasaaki, ate paniātai hīte ia atoko: “Kākiti manirekakaniāri iparīkauatini, !inikapani.”

¹¹ Ate kenakopiretari hīte sauaki auari kākiti paniātakiti makīpitakani. !Iparīkauatana. Ātipirika ipotxitarina imarotinirina āti kākiti kamakiti. ¹² Aūūite Xesosi Kristo posotiireē, apaniātana kākiti ikara atoko inakani iparīkauatinina. Aōtākikana iparīkanoka ikaminina ikienana apokinina ūkapani. !Himaākatapiri apanakini kamakiti. ¹³ Nitariakori, !hīsāpakape erekari hīkamini.

¹⁴ Kākiti ereē makamakaniāri ate ōtākikakiti ia iōkatsopariā, erepaniko iua. Iua moianari !hītxapeuako. Hī-takanapariko iua, ininiā iusaaki atxīiti ipētauata. Iusaaki atxīiti iuaīkana atāo ikama. ¹⁵ Imoianari !hītxapeuako, iuaritika himokaiakari !itxaua. Hīpinitariko iua, kotxi hītari itxaua.

Paoro Sākire Mapotōkire

¹⁶ Anirekari Apiananiri, kākiti kamaerekaxiniretakari, kamaerekaxiniretinii hīte ikiniōtika. Anirekari iua kaikotini hītekata.

¹⁷ Nota Paoro iōkatsopata nisākire mapotōkire ni-uakoā. Ia nitakaōtxikare, ininiā himarotari atāo ia nota iokanatsopatakiti. Ia atoko inakari niōkatsopata.

¹⁸ Aūūite Xesosi Kristo sikari ikinipoko erekari hīte hīkinikamoni. Ameē.

1 Tximótxio

¹ Nota Paoro iokanatsopata pite Tximótxiomoni. Xesosi Kristo iokanapirena sãpiretakari nota. Teoso amaerekani makatxakakari itxaua. Aimarotari Xesosinoka anikaua Teoso tixinemoni. Apiananiri itxaua. Teoso, Xesosi Kristo pakini iokanatano nota kãkiti-moni, iokanapirena nisãpiretini ũkapani. ² Pite Tximótxio, nota ãkiri atoko pitxaua, kotxi merepitipanika pauikari Xesosi sãkire nota sãpiretakasaakii. Aĩri Teoso, aãũite Xesosi Kristo pakini sikai ikinipoko erekari. Iamonĩkana. Ikamaerekaxiniretaina pite.

Atão Minakati Oerekakani

³ Masetónia tixinimoni nisikasaaki, nipaniãtai pite Épeso sitatxiti pikaikotini. Uatxa iuaĩkana nipaniãtai ereë Épeso pikaikotini. Ikara ninireka, kotxi apanakini ereë auakani oerekari Teoso sãkire kãkitimoni, txamari na atãoni ninoa oerekakiti. Ninirekai pite pinitinina ninoa atão minakati imoerekakanina ũkapani, ⁴ kotxi ninoa sãpiretapikari kitxakapirĩkari pirena. Ninoa xinikapikari aãtokiriakorini uãka, ininiãkara kãkiti taparakienatakakaua iuãkana ixinikasaakina. Põtãkikanako ninoa ikara atoko inakari sãkiretxiti itakanapinina, kotxi ikara sãkiretxiti !oerekari kãkiti Teoso nireëkiti. Teoso sãkire aãukiniã, aimarotari Teoso nireëkiti. ⁵ Nipaniãtai pite ikara atoko, kotxi ninirekari ereë Teoso sãkire auiãkani tiretakiniua. Kãkiti ãkixinire maerekati mauakaniã, ininiã itiretakakaua. Kãkiti imarotakasaakiri ikamakiti ereka inini, itiretakakaua. Kãkiti ikara atoko inakari atão auikari Xesosi sãkire. ⁶ Kãkiti, Teoso sãkire atão masãpiretakani, takanapari ikara erekari kimaporiti. Pĩpinanaãkani atoko itxauana, kotxi !imarotaikarina Teoso kimapore. Maxikatĩka isãkirauatapikana. ⁷ Ninoa kãkiti nirekamari Teoso paniãtakiti oerekakani ininiuana, txamari !imarotarina Teoso paniãtakiti. !Imarotarina isãpiretakitina, iuaritika ninoa: "Atãopitika asãkire," itxanãtana.

⁸ Kãkiti atão sãpiretakasaakiri Teoso paniãtakiti iõkatakori, iuasaaki aimarotari ipaniãtakiti ereka inini. ⁹ Mauiritakoti aua, kona kãkiti atão inakari kamakani ũkapanini. Mauiritakoti aua, kotxi maerekati kamakani auapitika. Aua mauiritakoti manireëkani. Aua Teoso manireëkani. Aua maerekati kamakani. Aua erekari manireëkani. Aua Teoso paniãtakiti napetakani. Kãkiti aua iri okakani. Kãkiti aua inoro okakani. Aua kokanirini. Mauiritakoti aua, kãkiti ikara atoko inakari ũkapani. ¹⁰ Aua kãkiti ãti ũtanorokata sirĩkakari. Aua kãkiti ãto tanirikata sirĩkakaro. Aua kiki ãti kikikata sirĩkakari.

Aua sito ãto sitokata sirĩkakaro. Aua kãkiti ãti kãkiti ũtir-iãkani ivẽtxitiniri ũkapani. Aua aãpirenaãri. Aua kãkiti ãti apoĩtakani. Mauiritakoti aua ikara atoko inakari kãkiti ũkapani. Ninoa !auikari Teoso sãkire atão inakari. ¹¹ Ikara Teoso iokanapirena erekari sãpiretaua. Peerekari Teoso. Peerekari iua iokanapirena. Iua paniãtano nota iua iokanapirena nisãpiretini ikininapemoni.

Teoso Amonĩkiniri Paoro

¹² Nitxari aãũite Kristo Xesosi: "Erekari pite kamiano, kotxi pisikataparaxiniretano nota pite ũkapani nipaĩkauatini ũkapani. Erekari pauikiniri nisãkire. Erekari pimereinino nota pisãkire ikininapemoni nisãpiretini ũkapani," nitxari Kristo Xesosi. ¹³ Meresaaki nota misãkirepiretari iua Xesosi. Nasikatikinitana iua sãkire auiãkani nokinina ũkapani. Kaneenamari nitxaua iuasaaki. Iuaritika Teoso amonĩkano. !Imisiritano nota, kotxi iuasaaki !nimarotari nikamakiti Xesosi sãkire nimauiakani xika. ¹⁴ Iuasaaki !erekano. Maerekati nitxaua. Iuaritika aãũite Kristo Xesosi sikari ikinipoko erekari notamoni. Kristo Xesosi nakiti nitxapekaua, ininiãkara nauikari isãkire. Iua nakiti nininiãua, nitiretari iua. Nitiretari apanakini apaka. Mitxi !nimarotari nitiraõkiuatini. ¹⁵ Nisãpiretaiko ia sãkiretxiti atão inakari, pauikiniri ũkapani, ikinimane auikiniri ũkapani. Nitxai: "Kristo Xesosi apoka ũkorapokoriti maerekati kamakani maerekani imaktxakini ũkapani," nitxa. Maerekati apiata kamakari nitxaua nota. ¹⁶ Maerekati apiata kamakari nitxaua, iuaritika Teoso !imisiritano. Iamonĩkano, kotxi inirekari apanakini imarotiniri Kristo matima omanãkarauatakani kãkiti maerekani xika. Xesosi nirekari nota eereka auakani, isãkire auiãkani imarotiniri Xesosi amonĩkinina ninoa, kotxi iua amonĩkano nota maerekati apiata kamakarino. Ninoa auikari isãkire, ininiãkara auapininiika Teosokata. ¹⁷ Nitxari Teoso: "Ari Teoso, peerekai. ãtipirika ikini-mane auĩte pitxaua. Pipinini !auari. Matamatakoti pitxaua. Pitenokara Teoso txaua. Pitenokara kimaroreri. Ikinimane paxitaiko ãtipirika. Ikinimane ãtipirika sãpiretaiko ereka pinini. Atãopitikara nisãkire. Ameë."

Xesosi Sãkire Iteene Auikiko

¹⁸ Tximótxio, namarite atoko pitxaua. Nisãpiretai noerekakiti sãkiretxiti pikaminiri ũkapani. Pixinikariko akokaxiti Teoso sãkire sãpiretakani sãpiretakiti. Ninoa sãpiretai Teoso nirekakiti pite kamini tĩkane. Nota sãkire uatxa ninoa sãkire atokotxikana. Ikara ninoa

oerekakiti sáikiretxiti pikamapikako, ininiákkara pite so-tato erekari atoko pitxaua Satanasi pinaiatini.

¹⁹ Pauikapikariko Xesosi sáikire. Ikara pikeeko atoko itxa. !Pikamapiri pákixinire mapokaerekatakiniti. Ikara apaka pikeeko atoko itxa. Apanakini kamapekari ákix-inirena mapokaerekatakiniti, ininiá eereka !auikaikari-na Xesosi sáikire. Kanaua sakikini atoko itxa ninoa auikiniiri Xesosi sáikire. ²⁰ Imeneo inakori, Arexátri in-akori apaka ikara atokokana itxana. Ninoa mis-ákiropiretari Teoso, ininiákkara nota sikanapana ninoa Satanasi. Satanasi misiritakasaakina ninoa, atxiíti itakanaparina Teoso imisákiropiretinina.

Teoso Misákiropetiko Ikinimane Íkapani

2 Merepanika nótákkikai pimisákiropetiniri Teoso ikini-nape kákiti íkapani. Pimisákiropetariko Teoso ninoa nireékiti íkapani. Pamanaárikiko Teoso sikiniri erekari ni-noamoni. Pitxariko Teoso: "Peerekai pite, kotxi erekari pisikakiti kákitimoni." ² Teoso pimisákiropetako auítetxi-akori apiari íkapani, auítetxiakori poiáori íkapani apa-ka. Pamanaárikiko Teoso ninoa íkapani, aáuiini ereka ini-ni íkapani, neenamati mauakani íkapani. Ikara atoko aniniá, akamari Teoso nireékiti erekarinoka. ³ Ikara akaminiá erekapitikari. Teoso, amaerekani makatx-akakari, apokaerekatari asáikire ikara atoko inakari akamini. ⁴ Teoso nirekari imaktxakiniri ikinimane maerekani. Inirekari ikinimane imarotiniri atáo inakari sáikiretxiti. ⁵ Átinokara Teoso aua. Áti kikinokara mikanapiriári kákiti Teosomoni. Xesosi Kristonokara mikanapiriári kákiti Teosomoni, kotxi iuanoka mis-ákiropetari Teoso kákiti íkapani. ⁶ Iua ipina ikinimane ká-iti íkitxitini íkapani. Teoso ketotini óti manapi Xesosi ipina. Xesosi ipinini oerekaua Teoso nirekiniri imaktx-akiniri ikinimane maerekani. ⁷ Ininiákkara Teoso akiri-tano nota isáikire ikinimanemoni nisápiretini íkapani. Ininiá Teoso iokanatakiti kákitimoni nitxaua nota. Ikara nisáikire atáo. Kona paxirarini. Teoso akiritano Xoteo minakanuia noerekini íkapani. Akiritano atáo inakari sáikiretxiti noerekinina íkapani. Akiritano noerekinina Teoso sáikire auikinina íkapani.

⁸ Ininiá ninirekari kikiakori erekarinoka kamakani, iki-ni itixiti auakani, misákiropetiniri Teoso. Ninirekari Teoso imisákiropetakasaakina, iusaaki ninirekari isáikire auikin-ina apaka, áti imomanatakanina.

Sitoakoro Xesosi Sáikire Auiákkani

⁹ Ninirekari sito máka atáo inini, kiki paxitiniro íka-pani. !Apakata oáuikiniua omáka ereka inini xika. !Erekari sito átipirika oeretiniri oiáko kákiti xikaueretiniro íkapani. Oro, pérora pakini otakiniá oiáko kákiti xikaueretiniro íkapani, !erekari. !Erekari mákatxi kakaroneri oieretakini. ¹⁰ Sito Teoso nireékiti nireékkaro kaminiári erekari, erekapitikari. Mákatxi peereri atoko itxa erekari okamakiti, kotxi kákiti atamatari okamakiti. ¹¹ Teoso sáikire sápiretakari oerekarauatakasaaki, erekari sito kenakotiniri. !Apakata iusaaki osákirauati-ni. Erekari opaxitiniri iua, isáikire okípitini íkapani.

¹² Nota !auritaro sito oerekinina kikiakori, ikamakitina tikkane opaniátinina. Erekari masákiropetoka onini.

¹³ Ikara atoko itxa, kotxi merepitipanika Teoso kamari kiki Adáo inakori. Eerekaikara ikamaro sito Eva inako-ro. ¹⁴ Kona Adáoni misirienetaáka. Sitora misiriene-tapeéka. Oa kamari maerekati, kotxi !okamari Teoso paniáttakiti, ininiákkara !apakata sito paniáttiniri kiki ika-makiti tikkane. ¹⁵ Sito auikiniári Teoso sáikire, otiretiniári apanakini, maerekati omakamakaniá, omasarau-atakaniá, Teoso makatxakari omaerekani, kotxi áto sito eenetari Xesosi, amaerekani makatxaákkari.

Kótákkikarerini Pirena

3 Ia nisáikire atáo. Kiki nirekiniári kótákkikareri inini-ua, Teoso sáikire auiákkani óttákkikini inirekiniá, iua nirekari paríkatxi erekari. ² Ia atoko kótákkikareri tx-auako: !kamari maerekati, ininiá iua apoítiko !auari. Átonanirako ítanoro. Kíkkiteri itxauako. !Katimari omanákarauatini. Ipaxitaákkako. Kákiti átiátaá íkani apakapako aapoko. Imarotariko oerekarauatini. ³ !Ipoáttapeko. Kaneenamari !itxapeuako. Katiraókkiri itxauako. !Ipotxitapiriko neenamati. Txineiro iteene !ixinikaperoko. ⁴ Iua níkkatanako aapoko auakani, ninoa auini ereka ininina tikkane. Itxíkitakanako imiakori ipaniáttakiti ikípitinina íkapani, ininiá ninoa paxitari iua. ⁵ Ikara atoko itxako kótákkikareri, kotxi aapoko auakani imamimataníkkaretakaniá, ininiá !imarotari kákiti Xe-sosi sáikire auiákkani iníkkatini. ⁶ Kiki mapaóttinoka auikiniári Xesosi sáikire, !apakata iua Xesosi sáikire auiákkani óttákkikakari ininiua. Xesosi sáikire auiákkani óttákkikakari ininiáua, iuikaua atxiíti. Iuikiniáua, Teoso misiritari iua, kitxakapiríka Satanasi iuikasaakia imisiritini atokokana. ⁷ Kiki Xesosi sáikire auiákkani óttákkikakari paxitaákkako, Xesosi sáikire mauíákkani apa-ka paxitari iua. Ikara atoko ininiá, likamapaniri kákiti kamapétatakari. Ininiá Satanasi !imaíkkari iua itakapire-moni.

Kamiparíkkareri Pirena

⁸ Átipekana, Xesosi sáikire auiákkani miparíkkataka-nipekana nisápiretaiko: Iua kamariko erekari, ipaxitiko tikkane. Átika isáikire itxauako. !Ipoáttapeko. !Apakata tx-ineironoka ixinikini. ⁹ Kamiparíkkareri iteene auikariko Teoso sáikire atáo inakari. Ákixinire imarotariko ikaminiri Teoso sáikire iaóka. ¹⁰ Xesosi sáikire auiákkani ataerekatariko kiki, kamiparíkkareri ininiua nireékkari. Erekarinoka ikaminiá, ininiá iua auiritaáka ninoa mi-paríkkatakari ininiua. ¹¹ Iua atokokana kamiparíkkareri ítanoro kamariko erekari opaxitiko íkapani. Aápirena !okamapeko. !Opoáttapeko. Okamariko okamaenetakiti iaóka. Ininiá kákiti auikari osáikire. ¹² Átonanirako kami-paríkkareri ítanoro. Iníkkatariko imiakori, kákiti iua aapoko auakani apaka, ninoa auini ereka ininina íka-pani. ¹³ Kamiparíkkareri atáo paríkkauatiniá, iteene ipaxi-taáka. Apanakini apokaerekatari iparíka. Ininiá ita-paraxinireritika isápiretari Kristo Xesosi sáikire auikiko kákitimoni.

¹⁴ Uatxa pitemoni niókatsopatakasaaki, ninirekari paĩtiki nisini hĩtemoni. ¹⁵ Atxiĩti uai okanani nauapanika, ininiã ia iókatsopari oerekaiko pite Teoso nakitiakori atão auini ikiniõtika, kotxi Teoso aapoko atoko atxaua, iua auiniãtaã ĩkapani. Teoso auãki itxapika. Kãkiti iua nakitiakori nĩkatari iua sãkire. !Auiritana apanakini koketiniri atão minakati Teoso sãkirekata. Isãpiretana ikinimane Teoso sãkire atão inakari. ¹⁶ Peerekari Teoso parĩka kãkiti ĩkapani. Merepanika kãkiti !imarotari, eereka Teoso oerekari iparĩka. Ia atoko Teoso kaminaua ate:

Kãkiti itxapekaua. Iua Xesosi. Erekari Matamatakoti oerekari kãkiti Xesosi sãkire atão inini. Teoso nitirakori iaxitikini atamatari iua. Isãkire sãpiretaãka ikini itixiti auakanimoni. Kãkiti auikari isãkire. Eereka Xesosi anikaãka iaxiti Teoso tixinemoni. Ikara atoko inakari Teoso parĩka kãkiti ĩkapani.

Atão Minakati Oerekakani

4 Iua Erekari Matamatakoti sãpiretaua, apanakini !auikaikari Xesosi sãkire itixi mapotõkire õti takote. Ikara atão. Iuasaaki ninoa auikari maerekani matamatakoni misirienere. Auikarina Satanasi nitirakori oerekakiti. ² Kãkiti ikara atoko inakani sãpiretari atão minakati. Ninoa sãkire ãti, txamari ninoa xinikakiti ipinimoni. Ninoa ãkixinire sãkire !auaika. !Isãpiretaikarina maerekati imakamakanina ĩkapani. Kapatakari arikakiti atoko itxa ninoa ãkixinire sãkire. ³ Kãkiti ikara atoko inakani !auiritari kãkiti ĩtanorouatini. “!Erekari kãkiti ĩtanorouatini,” itxa ninoa sãkire. Teoso kamari ikini nipokori kãkiti nikini ĩkapani. Txamari ninoa kamisirienenerini !auiritari kãkiti apanakini nipokori inikinina. Teoso nirekari Xesosi sãkire auĩãkani, atão inakari imarotakani, nikiniri ikara nipokori Teoso imisãkiretaka atoko: “Erekapitakai ia nipokori pisikiniãua.” ⁴ Ikinika Teoso kamakiti erekari. !Apakata kãkiti manirekakaniãri apanakini nipokori. Ikinipoko nipokori hinikasaaki, himisãkiretariko Teoso. Hĩtxariko: “Erekapitakai ia nipokori pisikiniãua.” ⁵ Teoso sãkire sãpiretaua ikinipoko nipokori anikini. Nipokori anikasaaki, amisãkiretiniãri Teoso, nipokori isikakiti ereka inini asãpiretiniãri, ininiã ikara nipokori erekari anikini.

Kristo Xesosi Nitiri Erekari Inakari

⁶ Aĩtariakori põtãkikiniã ikara atoko, Xesosi Kristo nitiri erekari pitxaua. Nipokori sikataparitari kãkiti ĩto. Teoso sãkire aãuiãkiti, oerekaretxi atão inakari, nipokori atoko itxa, kotxi isikataparitari axinire. Pite auikapikari oerekaretxi atão inakari. ⁷ !Pimaãkatapiri mĩĩkiteti sãpiretakiti, sãkiretxi Teoso mapokaerekatakiniti. Ikiniõtika piteka poerekauako Teoso paniãtakitinoka pikamini, ininiã Teoso nireẽkitixikana pikama. ⁸ Piĩto parĩkauatakasaaki, piĩto tapara apiaãpota, ininiã erekari piparĩkauatini. Apiarekata pixinire parĩkauatini pixinire auãki inini ĩkapani. Pixinire ĩkorasaaki auãki ininiã, pauapikako

Teosokata ãtipirika. ⁹ Ikara nisãkire atão. Erekari ikini mane auikiniri ikara. Erekari ikinimane kaminiri ikara. ¹⁰ Ininiãkara iteene aparĩkauata Teoso ĩkapani. Pasãpaniri, iuaritika aparĩkauatapitipo, kotxi aãuikari Teoso sãkire, Teoso mipĩkati sãkire. Iua ikinimane kãkiti maerekani makatxaãkari itxaua. Iua makatxakari isãkire auĩãkani maerekani, maerekani misiritikoãtaã imasikanina ĩkapani.

¹¹ Pipaniãtariko kãkiti noerekakiti sãkiretxiti iaõka ikaminina. Poerekana noerekakiti.

¹² Pite ãtokoripanika, iuaritika pimarotapitikari Teoso sãkire, ininiã !pauiritapiri kãkiti napetiniri poerekakiti sãkiretxiti. Atão inakarinoka pikamako Xesosi sãkire auĩãkani atamatini ĩkapani, ininiãkara ninoa auikapitkariko pisãkire, ininiã ninoa nirekari pite atoko ininina. Erekarinoka pisãpiretako. Erekarinoka pikamako. Kãkiti pitiretako. Iteene pauikariko Teoso sãkire. Maerekati !pikamapeko. Ikara atoko pininiã, ninoa nirekari pite atoko ininina. ¹³ Ereẽ nimapokakanisaakipanika, patatsopatariko Teoso sãkire iókatsopatakori, apanakini kenakotiniri ĩkapani. Pisãpiretanako Teoso sãkire. Teoso sãkireẽ põtãkikanako. Poerekana Teoso sãkire atão imarotiniã ĩkapani. Ikara atoko pitxapikanako, ereẽ napokini apisapanika. ¹⁴ Akokaxiti kõtãkikarerini sãpiretai piparĩka Teoso ĩkapani. Iuasaaki ninoa takari iuakona pite nopini, pite ĩkapani imisãkiretakasaakirina Teoso. Ikara atoko ininiãkara, pikamapikariko ikara piparĩka Teoso ĩkapani. ¹⁵ ãtipirika pixinikariko ikara nõtãkikini. Ikiniõtika pikamariko piparĩka Teoso ĩkapani. Ininiã apanakini imarotari Teoso sãkire apiaãpota pauikini. ¹⁶ Erepaniko pikamakiti ereka inini ĩkapani. Erepaniko poerekakiti sãkiretxiti Xesosi oerekakiti iaõka inini. Ikara ãtipirika pikaminiã, piteka makatxakaua pimapinakanani ĩkapani. Apaka pimakatxakana pisãkire auĩãkani imapinakanani ĩkapani.

Õtãkipirenatxi Pirena

5 !Pitxitapiri kiki aneẽkari. Põtãkikariko, piri pimisãkiretini atokokana. Põtãkikariko kikiakori pite tikini auakani, pitariakori pimisãkiretini atokokana. ² Põtãkikaroko sito aneẽkaro pinoro põtãkikini atokokana. Põtãkikaroko ãtokoro, pitaro põtãkikini atoko. Iuasaaki pipaxitaroko.

Sitoãkini Tikinitakoni

³ Pinĩkatanako sitoãkini tikinitakoni onirimane matiretakini. ⁴ Tikinitakoro oimiakori auiniã, oĩtariakori anaakori auiniã, ninoa nĩkatamaroko oa. Ikara ikaminiãna, erekari Teosomoni. Teoso poxokotana ninoa. Merepanika ninoa kaminiãri erekari ninoaka aapoko ãki, aimarotari ninoa atão auikiniri Teoso sãkire, kotxi meresaaki irina, inorona pakini nĩkatana ninoa. ⁵ Tikinitakoro minĩkatakoto auikari Teoso inĩkatiniro oa. Oa misãkiretari iua pokamara, ĩkanõka pakini inĩkatiniro ĩkapani. ⁶ Tikinitakoro osarauatininoka nireẽkaro, ipĩkaro atoko otxaua. ⁷ Pisãpiretanako ereẽ

auakani, Xesosi sáikire auiákani níkatiniina inorona, inorona itaro tikinitakoro pakini. Iníkatiniána, lapoítaákana. ⁸ Xesosi sáikire auiákani maníkatakaniári iniri mane, itakanaparina Teoso sáikire auikinina. Apia maerekanita iua aapoko áki auakani imaníkatakaniá. Kákiti Teoso sáikire mauíákati maerekati itxaua. Apia maerekati itxaua iua aapoko áki auakani maníkatakati.

⁹ Apanakini sito tikinitakoni moianatana Xesosi sáikire auiákani. Pitakariko ninoa tikinitakoni uáka aátsopaá himoianatini íkapani. Sito ikara atoko inakaro seséta ano apiko auakaro oa. Átinoka oítanirini. ¹⁰ Oa imarotaáka, kotxi erekarinani okama. Atáo oóerekari oimiakori. Osikakienatana átiátaá íkani. Oimarotaáka, kotxi oa arokakititari kákiti Teoso nakitiakori. Oimarotaáka, kotxi kákiti maerekaxinireni otireta. Oimarotaáka, kotxi ikini sereti erekari átipirika okama. Tikinitakoro ikara atoko inakoro uáka aátsopaá pitaka himoianatini íkapani.

Tikinitakoni Átokoropanika Inakani Ótáikikiko

¹¹ !Pitakapiri tikinitakoro uáka iua aátsopaá, átokoropanika inakaro, kotxi iuaíkana onirekari kikikata osirítkini, ininiá onirekari iuaíkana oítaniriuatini, ininiá !onirekaikari Kristo. ¹² Ikara atoko okaminiá, okamari maerekati, kotxi mitxi osáikire: "Nikamariko paríkatxi Teoso íkapaninani. !Nítaniriuataikako," otxama.

¹³ Tikinitakoro átokoropanika inakaro itotari oiarinauatini. Oianapokotapika. Apia maerekati okama, kotxi ototari aápirena okamini. Onirekari ikinika apanakini kamakiti oimarotini, txamari ikara atoko !apakata. !Apakata áti kamakiti osápiretini apanakinimoni.

¹⁴ Ikara atoko ininiá, !pitakapiri tikinitakoro átokoro inakaro uáka iua aátsopaá. Nota ótáikikana átokoroakoro tikinitakoni iuaíkana taniriuatini. Erekari keene inini na, aapokona iparíkauatinina. Ikara atoko ininiá, Xesosi sáikire mauíákani kona misáikirepiretana Xesosi sáikire auiákani. ¹⁵ Nota ikara atoko nisápiretai, kotxi átikaka tikinitakoni átokoroakoro inakani takanapapekari Xesosi sáikire auikinina, Satanasi paniátakiti ikaminina íkapani. ¹⁶ Xesosi sáikire auiákani inirimane na tikinitikoá, iníktanako ninoa. !Erekari imaníkakanirina inirimanena tikinitakoni. !Erekari inirekinirina apanakini Xesosi sáikire auiákani níkatini na inirimanena, kotxi ninoa níkatana kaiáopokori tikinitakoni manirimaneni. Pasápaniri ninoa paríka.

Kótáikikarerini Pirena

¹⁷ Kótáikikarerini atáo kaminiári iparíka Xesosi sáikire auiákani íkapani, erekari hísinikina iparíkana íki apiata. Teoso sáikire isápiretiniána apanakinimoni, Teoso sáikire oerekiniána, ininiákara erekapitikari apiata iparíkana íki híkitxitinina. ¹⁸ Teoso sáikire iókat-sopatakori txari:

!Híaxirikanamatapiri kema auíte iparíkauatakasaaki, triko ikatxaratakasaaki. Pauiritariko inikiniri triko iki, iparíkauanáatakasaaki.

Teoso sáikire iókat-sopatakori txari apaka:

Erekapitikari paríkauatakari apakapiniri iparíka íki. ¹⁹ Áti apoítiniári kótáikikarerini, !pimaákatapiri isápiretakiti. Ipi, atxíiti ipi áti pakini kákiti atamatiniári kótáikikarerini kaminiri maerekati, isápiretiniána pite, pikenakotapitikari ninoa sápiretakiti. ²⁰ Pótáikikanako Xesosi sáikire auiákani maerekati kamakani apanakini Xesosi sáikire auiákani apisatoó, ininiákara apanakini píkarini maerekati ikaminina.

²¹ Tximótxio, nota paniátaí ikara noerekakiti iaóka pikamini. Teoso apisatoó, Apiananiri Xesosi Kristo apisatoó apaka, Teoso nitiriakori iaxitikini imereékini apisatoó apaka, nipaniátaí ikara noerekakiti iaóka pikamini. Ninoa kenakotari nisáikire pitemoni. Áti-nokarako pisáikire txauako ikininape kákitimoni. Erekari pikamako ikininape kákitimoni, kákiti pipotxitakinimoni, kákiti pimapotxitakinimoni apaka. ²² Atxíiti aua Teoso sáikire auiákari iteene pimimarotakiniti. Ininiá !pimereépiri iua Xesosi sáikire auiákani ótáikíakari ininiua. Atxíiti ikamapanikari maerekati. Pimereiniári iua, pite moianatari iua maerekati ikamini. Erepaniko maerekati pimamakamani íkapani.

²³ Pite itokata amianata. Pitsii iriko, ininiákara kona áparaánanini piáta. Ovaá poiáoka apaka piátako pipini íkapani.

²⁴ Apanakini !ikipatari maerekati ikamakiti, ininiá ikimane imarotari. Apanakinipekana maerekati ikamakitina !atamataáka ikamakasaakina. Ninoa kipatari. Okananixiti atokoikara imarotaáka ninoa maerekani. ²⁵ Iua atokokana erekari apanakini kamakiti atamataáka. Erekari apanakini kamakiti !atamataáka ikamakasaaki. Iuaritika okananixiti atokoikara imarotaáka.

Nitiritxi Amotakoni Pirena

6 Nitiritxi amotakoni, Xesosi sáikire auiákani, iteenerako iparíkauatana ipatráotena íkapani. Ninoa paxitanako ipatráotena. Ikara atoko ininiána, Teoso uáka !imisáikirepiretaáka. Iua sáikire ate oerekakiti apaka !imisáikirepiretaáka iusaaki. ² Nitiritxi patráote Xesosi sáikire auiákari ininiáua, initiri paxitariko iua, kotxi itari apaka itxaua iua. !Apakata poiáonoka ipaxitiniri ipatráote, itari ininiua xika. Erekari iteene iparíkauatini ipatráote íkapani, kotxi ipatráote auikari Xesosi sáikire. Teoso tirketakiti ipatráote. Tximótxio, ikara noerekakiti sáikiretxiti poerekariko apanakinimoni. Pótáikikanako ikara iaóka ikaminina.

Txineiro Potxitakani Pirena

³ Aua kákiti atáo minakati oereékani. Ninoa !auikari aáuíte Xesosi Kristo sáikire atáo inakari. !Auikarina atáo inakari oerekakori, Teoso sáikire. ⁴ Kákiti ikara atoko inakari iuikaua, txamari !kimaroreri. Ipotxitari isákiruatini apanakinikata itaparakienatakakiniana íkapani. Ininiákara xikoretxi aua, neenamtxi aua, misáikirepiretaktxi aua. Ininiá kákiti !auikari áti sáikire. Iuákatari áti kaminiri maerekati. ⁵ Ninoa txitakakapikaua, kotxi ixinikakitina maerekatinoka.

!Imarotaikarina Teoso sãkire atão inakari mitxi imarotakitina. Ninoa oerekari Teoso sãkire kãkitimoni txineiro ito apakapinina ïkapani. Txamari na atão ninoa oerekakiti sãkiretxiti. !Pimaãkatapiri kãkiti ikara atoko inakari.

⁶ Teoso nireëkitinoka pinirekiniã, ikinipoko pinireëkiti auape, ininiã pãkixinire poxokoniuata. Kipa apikomoni pinireka? !Auari. ⁷ Kiripa ate mina uai itixi aponaniãkasaaki? !Kaminareua. Kiripa aanika atekata apïkasaaki? !Kanikareua. ⁸ Kamãka aniniã, kanipokore aniniã, apakatape. ⁹ Satanasi oerekari kãkiti maerekati ikamini txineiro apakapini ïkapani. Ininiã tiitxi nireëkari mokatanitika kamari Satanasi oereëkiti. !Erekari tiitxi nireëkari nireëkiti. !Kïlkiteri iua. Inireëkiti txikatoro atoko, kotxi imaïkari iua. Eereka !auaika itii, itxineirote, ipoxokoni pakini xipope. Inireëkiti xika Teoso iokanataru iua kãkiti misiritikomoni. ¹⁰ Kãkiti iteene potxitiniãri txineiro, ikamari maerekati. Takari aneë, kotxi ikotsa aua. Iua atokokana maerekati aua ikotsa. Txineiro potxitiko maerekati kotsa itxaua. Txineiro potxitiko auiniã, ikini sereti maerekati aneë. Apanakini txineiro potxitakani takanapaãpotari Teoso sãkire, ininiãkara txineiro potxitakari iuaka karotapekaua äkixinireë. Iuaka maerekaxinireti itxïkitakaua.

Paoro Ötãkikiniri Tximótxio

¹¹ Pitepekana Tximótxio, Teoso paniãtakiti kamakari pitxaua, ininiãkara ikara maerekati xatiki !pikamape. Atão inakarinanirako ikiniötika pikamako. Teoso nireëkitinoka pikamako. Iteene pauikariko Teoso sãkire. Katiraötkiri pitxauako. Pimisiritiko auakasaaki, pimiteenekariko. Teoso nireëkitinoka pinirekako. Kona pinirekapiri piteka nireëkiti. ¹² Pineenamauatako Teoso ïkapani. Ikara neenamtxi erekari, Satanasi piokanatin, kãkiti Teoso sãkire auikini ïkapani. Papakapariko Teoso sikakiti, kotxi iua akiritai iuakata pauapininiika pinini ïkapani. Kaiãopokori kãkiti imarotari Xesosi sãkire iteene pauikini, kotxi ikenakotapekari pisãpiretinina. Peerekari pisãkire ninoamoni. ¹³ Tximótxio, nimisãkiretai pite Teoso apisatoö, Kristo Xesosi apisatoö apaka. Ninoakara kenakotari nisãkire uatxa. Teoso ikinimane auãki inini txïkitakakari iua. Kristo Xesosi Homano auïte Pösio Pirato inakori apisatoö

auakasaaki, isãpiretari atão Teoso sãkire. ¹⁴ Nipaniãtai ikara noerekakiti sãkiretxiti iaöka pikamini. !Pima-makapiri ikara noerekakiti. Ikara noerekakiti iaöka pikaminiritika aãuïte Xesosi Kristo kanapiriãko.

¹⁵ Teoso ketotari Xesosi kanapiriini öti. Iuasaaki Teoso akiritari Xesosi ïkorapokoriti ikanapiriini ïkapani. Iuanokara kaposotiireri. Peerekari iua. Auïtetxiakori auïte itxaua. Apiarini sauaki iuanokara Apiananiri txaua. ¹⁶ Iuanoka !lipina. Iuanokara ikinipoko auãki inini txïkitakakari. Iua auiniãtaã iotximere auapika, ininiãkara kãkiti !liposota imatokotiniri Teoso. !Katamatikori. Kãkiti !liposotari atamatiniri iua. Iuanokara kaposotiireri ätipirika. Ätipirika maãkiritari: "Peerekari Teoso." Ameë.

Xesosi Sãkire Auiãkani Katxineiroterini

¹⁷ Pipaniãtanako kãkiti katxineiroterini: "Katii hininiã, !hïuikapeuako. !Hïpoxokotapero hïtxineirote, kotxi äti öti atxïiti hïtxineirote !auaika. Hïpoxokotariko Teoso, ätipirika auãkiri, kotxi iuara sikaua ikinipoko apotxitakiti. Kaiãopokori isikaua. ¹⁸ Erekari hïkamako. Hïtxineirote kaiãopokoro auini atokokana, erekari kaiãopokori hïkaminanako apanakini. Kaiãopokori hïtii auiniã, hïsika kãkiti kaamonirimoni. Himarotakasaakiri, matxineiroteni amonitakiti hïsikanako ninoa. ¹⁹ Ikara atoko hininiã, häpotiiãpotari erekari Teoso tixinekiri. Iuaã apotiitakori lixipoka. Ipinaãkana atoko, auinapanikana. Ikara atoko hïkaminiã, häpakapari Teoso sikakiti. Iua txïkitakai häuapininiika hinini Teosokata."

Ikara pisãpiretako katxineirotenimoni.

Paoro Iökatsopare Mapotökire

²⁰ Ari, Tximótxio, atão pikamariko parïkatxi Teoso sikakiti pitemoni pikamini ïkapani. !Pimaãkatapiri sãkiretxi Teoso mapokaerekatakiniti. !Pimaãkatapiri kãkiti, "Kimaroreno nota," inakari, kotxi !imarotari imaroretxi atão inakari. ²¹ Ninoa sãkire: "Imaroretxi auapitika notamoni," itxa. Txamari na xatiki imarotari Teoso imarore. Ikara xika ninoa takanapaãpotari Teoso sãkire auikinina.

Teoso sikai ikinipoko erekari. Ameë.

2 Tximótxio

1 Tximótxio, nota Paoro iokanatsopata pitemoni. Teoso mereëno nota, Kristo Xesosi iokanatinino ĩkapani, isãkire nisãpiretini ĩkapani. Kãkiti Kristo Xesosi nakiti ininiãua, Teoso txĩkitakari ixinire auãki inini, kotxi Teoso kamaenetapekari ikara ikamini.

² Pite Tximótxio namarite nitiretakiti atoko pitxaua. Aĩri Teoso, aãũite Kristo Xesosi pakini sikai ikinipoko erekari. Iamonĩkaina. Ikamaerekaxiniretaina.

Paoro Őtãkikiniri Tximótxio

³ Nota parĩkauata Teoso ĩkapani. Ninirimane kitxakapirĩkarini parĩkauatini atokokana niparĩkauata. Nãkixinireë nimarotari maerekati nimakamakani, Teoso ĩkapani niparĩkauatakasaaki. Nota txari Teoso: "Erekapitikari pikamakiti Tximótxio ĩkapani," nitxa. Nimisãkiretapikari Teoso pite ĩkapani, ĩkanõka, pokamara, ĩkanõka, pokamara nitxapika. ⁴ Nipiãtai. Nixinikari pite txiapatini nitakanapakasaakii, ininiã ninirekari naõkitinii iuaĩkana nipoxokoniuatini ĩkapani. ⁵ Nixinikari pite atão auikiniri Teoso sãkire. Merepanika pakiro Arõitxi inakoro, pinoro Eonisi inakoro pakini atão auikari Teoso sãkire. Nimarotapitikari pite apaka auikiniri Teoso sãkire ninoã auikiniri atokotxikana. ⁶ Ininiãkara nõtãkikai. Akoka niuako nitakasaakiri pikiã, Teoso sikai parĩkatxi iua ĩkapani pikamini. Iuasaaki isikaposotiiretai ikara parĩkatxi pikamini ĩkapani. Iteene pikamariko ikara parĩkatxi iua ĩkapani. ⁷ Teoso sikapekaua Erekari Matamatakoti, ininiã !kapĩkareua. Iua Erekari Matamatakoti sikataparatarari aãkixinire. Iua oerekaua atiraõkiuatini. Oerekaua maerekati aĩto nireëkiti amanirekakani.

⁸ Ininiã !pipëtatapiri aãũite sãkire pisãpiretini. Apaka !pipëtatapeno nota, kotxi kateia ãki nauã Xesosi sãkire nisãpiretini xika. Maãtatsiirauata, Teoso iokanapirena erekari asãpiretini xika, kotxi Teoso sikataparataua amisiritiko amĩteenekini ĩkapani. ⁹ Teoso makatxakapekari amaerekani. Iua akiritapekaua inakitiakori aniniua ĩkapani. Aparĩka kona txĩkitakari Teoso makatxakiniri amaerekani. Imakatxakari amaerekani, kotxi inirekari ikara atoko ikamini. Imakatxakari amaerekani, kotxi inirekari ikinipoko erekari isikiniua. Itixi kamiko apisapanika Kristo Xesosi sikari ikara erekari atemoni. Iuasaaki imakatxakari amaerekani. Iuasaaki akiritaua inakitiakori aniniua ĩkapani. ¹⁰ Uatxa Teoso oerekari ikara erekari kãkitimoni, kotxi amaerekani makatxakakari Xesosi Kristo apokapeka ĩkorapokoriti. Iua xipokapekari ipĩkitxi.

Isãpiretari Teoso iokanapirena erekari, kãkiti mapinakani ĩkapani, Teosokata ãtipirika auini ĩkapani.

¹¹ Teoso mereëno nota ikara iokanapirenatxi sãpiretakari nininiua tĩkane. Imereëno iua iokanatakiti kãkitimoni nininiua. Imereëno Xoteo minakaniua oereëkari nininiua. ¹² Teoso iokanapirena erekari nisãpiretini xika, natatsiirauata. Iuaritika Inipëtauata, kotxi nimarotari Xesosi. Iteene nauikari iua sãkire. Nimarotapitikari iua nĩkatinino nota. Inĩkatiniritikano ikanapiriãko.

¹³ Teoso sãkire pitemoni noerekakiti iaõka poerekako apanakini, kotxi noerekakiti atão. Pauikapikariko Kristo Xesosi sãkire. Katiraõki pitxako, kotxi Xesosi nakiti atxaua. ¹⁴ Pimarotari Teoso iokanapirena erekari. !Pauiritapiri ikoketiko. Teoso sikari ikara iokanapirena pitemoni, apanakini pisãpiretini ĩkapani. Erekari Matamatakoti auãitotaua. Iua posotiireë pinĩkatari Teoso iokanapirena pitemoni isikakiti.

¹⁵ Pimarotari kãkiti Xesosi sãkire auiãkani Ásia tixine auakani takanapano nota. Aĩtariakori Pixero inakori, Emoxeni inakori pakini takanapano nota. ¹⁶ Onesĩporo inakori !itakanapano. Ninirekari Teoso tiretinina iua aapoko auakani. Itokata ikamapoxokonitano nota. !Ipëtatano kateia ãki nauakasaaki. ¹⁷ Homa sitatxiti apokasaaki, initaãpotano nota, eereka apokano. ¹⁸ Pite imarotari iua iteene moianatinino nota, Épeso sitatxiti nauakasaaki. Ininiã nitxari Apiananiri: "Ninirekari piamonĩkiniri Onesĩporo itixi xipokini õti manapisaaki."

Misirikaretxi Mĩteenekiko

2 Pitepekana namarite Tximótxio, kataparaxinire pitxako. Kristo Xesosi nakitiakori atxaua, ininiã iua sikari ikinipoko erekari atemoni. Ikara erekari sikataparatarari axinire. ² Pite kenakotapekari nisãkire noerekakiti kãkitimoni. Ininiã poerekariko ikara iaõka apanakinimoni atão inakari kamakanimoni. Eereka ninoã posotari oerekiniri nisãkire noerekakiti apanakinimoni apaka.

³ Sotato erekari mĩteenekari imisiritiko. Kristo Xesosi sotatone atoko atxaua, ininiã pimĩteenekariko pimisiritiko sotato erekari mĩteenekiniri atoko. ⁴ Sotato parĩkauatakasaaki, !ixinikaikari iparĩka mitxi ikamakiti sotato iminakanisaaki. Ixinikapikari sotato auĩte nireëkiti ikamini, iauĩte poxokotiniri ĩkapani. Ikara nokara ixinikanãta.

⁵ Aĩtepekana nisãpiretai. Miteëkari mitekatzxi mapotõkire merepanika apoãkari apakapari imitekini ĩki. Mitekatzxi paniãtakari paniãtini iaõka imitekiniã, apakapari imitekini ĩki.

⁶ Ātipekana nisāpiretai. Katarakeri poparīkari nikari itakare merepanika, kotxi iteene iparīkauata. ⁷ Pixinikariko ikara nisākire. Apiananiri kamaimaroretai ikara.

⁸ Pixinikariko Teoso iokanapirena erekari nisāpiretakiti kākitimoni. Xesosi Kristo nisāpireta ikinimanemoni. Iua ipinaka atoko, iuaīkana auāki itxīkitakaāka. Iua Taviini apika mekaniri. ⁹ Natatsiirauata Teoso iokanapirena erekari nisāpiretini xika. Nota omanatakani iaxirikapekano kohētxiā, kokaniri iaxirikinina atoko, nota masikani īkapani. Teoso sākire !iaxiriāka. Iaripireta ikini tōpati. ¹⁰ Teoso mereēpekari kākiti, imaerekani imaktxakini īkapani. Ininiā nota mīteenekari nimisiritiko Teoso iokanapirena ninoa kenakotini īkapani, imaerekanina Kristo Xesosi makatxakini īkapani, ātipirika Teosokata auinina īkapani. Iuasaaki peerekari. ¹¹ Nisāpiretaiko ia sākiretxi atāo inakari:

Xesosi Kristo ipina ate īkapani, ininiā amanirekakaniāri mitxi anireēkiti, Xesosi nireēkitinoka anirekiniā, ininiā aāuapika iuakata ātipirika.

¹² Amīteenekiniāri amisiritiko Xesosi sākire aāuikini xika, auītetxi atxauako iuakata. Akipatiniāri iua aimarotini, iua apaka kipatari ate imarotini.

¹³ Atxiīti !akamari akamaenetakiti. Xesosi kamapitikari iua kamaenetakiti, kotxi iua !iposotari maerekati ikamini.

Teoso Nitiri Atāo Inakari

¹⁴ Ikara nisākire pikamaxinikaretana Xesosi sākire auīākani. Ninoa Apiananiri apisatoō apotiitakasaakia, pōtākikanako: “!Hītixitakapeua maxikatīka kākiti sākire xika, kotxi !erekari,” pitxako ninoamoni. Kākiti kenakotiniāri hītixitakinia, ininiā !nirekaikarina Xesosi sākire auikinina.

¹⁵ Tximótxio, pite Teoso nitiri pitxaua, ininiā iteene papaiaōkariko isākire iōkatsopatakori Teoso apokaerekatinii īkapani. Ininiā !pipētāuata, kotxi atāo poerekari Teoso sākire iōkatsopatakori apanakinimoni. Teoso sākire iōkatsopatakori atāo inakarinoka itxa.

¹⁶ Apanakini sākirauatakaakia, isākiretarina sākiretxi Teoso mapokaerekatakiniti. Ikara atoko !pisākiretape. Kākiti ikara atoko inakani takanapaāpotari Teoso. ¹⁷ Ninoa oerekakiti sākiretxiti karōtxi arakakari atoko itxa. Ikara atoko inakari amianari iarikaāpota. Ikara amianari iarikini atoko, ninoa oerekakiti iarikaāpota. Itxīkitakari kākiti maerekati ikamini. Imeneo inakori, Pireto inakori pakini oerekakiti sākiretxiti ikara atoko itxa.

¹⁸ Ninoa takanapapekari Teoso sākire atāo inakari. Ninoa sākire: “Teoso ōkitikapekana Xesosi sākire auīākani ixinirena auāki inini īkapani. !Ōkitikapanina iītona itixi xipokini ōti,” itxana. Ikara ninoa sākire xika, apanakini !auikaikari Xesosi sākire.

¹⁹ Aapokotxi tsota paikori inakasaaki, itsota iriko paītanori inakasaaki, iua aapokotxi !irika. Teoso sākire ikara aātsota atoko. Auapika. !Ixipoka. Teoso sākire txari: “Apiananiri imarotari inakitiakori.” Apaka Teoso

sākire txari: “Kākiti, ‘Nota Kristo nakiti’ inakari takanapariko imaerekani.”

²⁰ Ikini sereti tiitxi aua aapokotxi mitari āki. Aua apiata karonetakari oro kamakori, pirata kamakori pakini. Apaka aua poiāo īki aamina kamakori, kipatxi kamakori pakini. Apanakini tiitxi āki kaapokori takari nipokori kiiniri īkapani. Apanakini tiitxi āki itakari nipokori ikiniōtika kākiti nikini īkapani. ²¹ Ikara tiitxi atoko itxa kākiti. Kākiti takanapiniāri imaerekani, tiitxi apiata karonetakari atoko itxa iua. Teoso nirekari iua. Imereēri iua iparīka erekari ikamini īkapani. Ininiā kākiti iua atoko inakani iposope Teoso parīka ikamini īkapani.

²² Ātokoripanika pinakasaakia, apanakini nirekiniāri maerekati pikamini, pimatekako, maerekati pimakamini īkapani. Pinirekariko atāo inakarinoka pikamini ikiniōtika. Pinirekariko Xesosi sākire iteene pauikini. Pinirekariko iteene katiraōki pinini. !Pinirekapiri neenamtxi. Ikara atoko kākiti kaminiā, erekaxinireri. Iua akiritari Apiananiri imoianatiniri īkapani.

²³ Tximótxio, kākiti txitakakasaakia sākiretxi mīkiteti mimaroreti xika, !pikamapiri ikara atoko inakari, kotxi eereka ninoa neenamauata isākirena xika.

²⁴ Apiananiri nitiri atāo inakari ia atoko itxako: “!Itxitari āti. Itiretari ikinimane. Koerekareri erekari itxaua. !Kati-mari omanākarauatini. ²⁵ Ōtākikanako isākire mauikakani momanākaretika.” Ikara atoko Apiananiri nitiri ininiāua, atxiīti Teoso oerekana isākire mauikakani atāo inakari imarotinina īkapani, imaerekani itakanapinina īkapani. ²⁶ Ininiā iuaīkana kīkitepeka itxana. Teoso sikakana ninoa txikatoro Satanasi takakitiā, kotxi mitxi Satanasi maīkana, iua nireēkiti ikaminina īkapani.

Itixi Xipokini Ōti Apisa

3 Tximótxio, pimarotariko ia nisākire. Itixi xipokini ōti apisa pamonōkopaniriko. ² Iuasaaki kākiti ia atoko inakari: Kapotxinaniri iua. Txineiro tiretakani iua. Isāpiretari iposotiire ikinimanemoni. Iuikaua. Imisākirepiretari Teoso, kākiti pakini. !Ikamari iri paniātakiti. Inoro paniātakiti apaka !ikama. Āti kamakasaakiri erekari iuamoni, !itxari: “Erekapitikari pikamakiti nota īkapani,” !itxari. !Inirekari Teoso. ³ !Itiretari inirimane. !Ikamari ikamaenetakiti. Imisākirepiretari āti maxikatīka. !Iposotari erekari ikamini. Paneenamari. Omanatana erekari kamakani. ⁴ Imīkapiritari āti. Ikamakiti ikamini apisa, !ixinikari ikamakiti tīkane. Iuaka ixinikapikaua. Isarauatininokara itireta. !Itiretari Teoso. ⁵ Iua sākire: “Nauikari Teoso sākire,” txamari !auikari Teoso posotiire. !Pauikapiri kākiti ikara atoko inakari sākire.

⁶ Kākiti ikara atoko inakari ianapokota sitomoni oaāpokomoni. Sito ikara atoko inakoro mīkiteto. Maerekatinoka okama. Ōito nireēkiti maerekati onirekapika. Iua ianapokotapika oamoni, ininiā oa auikaāpotari iua oerekakiti sākiretxiti. ⁷ Sito ikara atoko inakoro nirekari oimarotini oerekaretxi, txamari !oimarotari oerekaretxi atāo inakari.

⁸ Kitxakapiríka Moisesi Exito tixine auakasaaki, Xani inakori, Xápiri inakori pakini linirekari auikinirina Moisesi sápiretakiti. Ninoa atokokana kákiti itixi xipokini óti apisa auakani, linirekari atáon inakari. Ixinikapikarina maerekatinoka. Teoso linirekari kákiti ikara atoko inakari, kotxi iua kákiti !auikari Teoso sáikire. ⁹ Poiáonoka kákiti auikari ikara atoko inakari sáikire, kotxi imarotari miiikiteti iua. Iua atokokana kitxakapiríka apanakini imarotari Xani, Xápiri pakini miiikiteni ininiua.

Teoso Nakitiakori Misiritiko

¹⁰ Pitepekana, pimarotapitikari noereékiti sáikiretxiti. Pimarotari nikamakiti ikiniótika. Pimarotari ninireékiti nikamini. Pimarotari iteene nauikiniri Xesosi sáikire. Pimarotari nimíteenekiniri nimisiritiko. Pimarotari nitiretiniri áti. Pimarotari !katimari nomanákarauatini. ¹¹ Pimarotari nimisiritiko. Pimarotari natatsiirauatini. Pimarotari nimíteenekiniri nimisiritiko Átxiokia sitatxiti nauakasaaki, Ikónio sitatxiti apaka nauakasaaki, Arisitarara sitatxiti apaka nauakasaaki. Iteene natatsiirauata, iuaritika Apiananiri makatxakano ikinika nimisiritiko. ¹² Ari, ikininape kákiti nirekiniári Kristo Xesosi nakiti ininiáua, inirekiniári Teoso nireékutinoka ikaminiá, atatsiitariko imisiritiko. ¹³ Iuasaaki maerekati kamakani maerekani, kamisirienererini maerekani, apiaápotako. Ninoa misirienetari apanakini. Apaka apanakini misirienetana ninoa.

Teoso Sáikire Iókatsopatakori

¹⁴ Pitepekana Tximótxio, pauikapikariko atáon inakari poerekiko. Ikara pauikapitika, kotxi pimarotana pite oerekakani. Pimarotari atáonoka ninoa oerekakiti. ¹⁵ Pite axapitipanika pinakasaaki, pimarotari Teoso sáikire iókatsopatakori. Iua sáikire iókatsopatakori txíkitakua kimatire anini. Isáikire iókatsopatakori oerekaua Teoso makatxakiniri amaerekani Kristo Xesosi sáikire aáukasaaki. ¹⁶ Teoso oerekana isáikire iókatsopatakani atáonoka iókatsopatinina, ininiá ikinika Teoso sáikire iókatsopatakori atáonoka. Ininiá apakata Teoso sáikire iókatsopatakori oerekiniua atáon Teoso sáikire aáukini íkapani. Oerekaua ikinipoko Teoso sáikire iókatsopatakori atáon inini. Isáikire iókatsopatakori ótákkikaua amaerekani atakanapini. Oerekaua atáon inakarinoka akamini. ¹⁷ Ininiá kákiti Teoso nakiti imarotiniári Teoso sáikire iókatsopatakori, iposotari ikinika paríkatxi Teoso paniátakiti ikamini. Erekarí paríka.

Tximótxio Ótákkikiko

⁴ Tximótxio, nótákkikai Teoso apisatoó, Apiananiri Xesosi Kristo apisatoó apaka, kotxi áti óti Kristo Xesosi kanapiriákasaaki, isápiretari ikininape kákiti sinimoni. Isáikire auiákani sari Teosomoni ikaikotinina íkapani. Isáikire mauiákani sari kákiti misiritikomoni ikaikotinina íkapani. Isápiretari kákiti auapanika inakani, kákiti mitxi ipíkani apaka. Xesosi kanapiriá ikininape auíte ininiua íkapani, ininiákara nipaniátaí ia:

² Pisápiretariko Teoso sáikire kákitimoni. Iposope pitxako Teoso sáikire ikiniótika pisápiretini kákitimoni, píito tapara auakasaaki, pisápakasaaki apaka. Pótákkikanako imaerekani itakanapinina, erekarinoka ikaminina íkapani. Pisikataparaxiniretanako, Teoso sáikire poerekiniina. Pisákirauatakasaaki, !katimari pomanákarauatini. ³ Áti óti apokako. Iuasaaki kákiti !inirekaikari oerekaretxi atáon inakari ikenakotinina. Ninoaka nireékutinoka inirekana, ininiá apotiiápotana ninoakata koerekarerini ninoa potxitakiti oerekaretxiti oereékani. ⁴ !Inirekaikarina atáon inakari. Auikarina sáikiretxi atáon minakati.

⁵ Pitepekana, ikinika pikamako píikiteritika. Pimíteenekariko pimisiritiko. Pikamariko piparíka Teoso iokanapirena erekari pisápiretini kákitimoni ninoa auikiniri íkapani. Teoso nitiri pitxaua, ininiá pikamariko ikinika piparíka Teoso paniátakiti.

⁶ Notapekana, nipinini óti manapi apokaápotape. Nipinako Teoso íkapani. Pirátxi Teoso íkapani okiko atokokana, notaka sikauako Teosomoni. Niketo apokapeka itixi nosipikini íkapani. ⁷ Neenamatzí erekari inakari nikamapeka Satanasi ninaiatini. Miteékari mitekatxi mapotókkire apokini atokokana, nota apokapeka nipaíka mapotókkire. !Nítakanapari Xesosi sáikire nauikini. ⁸ Uatxa Teoso níkatari nipaíka íki nota káiatakiti napakapini íkapani. Miteékari merepanika mitekatxi mapotókkire apokakari apakapari imitekini íki. Apakapari saporíeta. Iua atokokana Apiananiri sikanoko nipaíka íki, kotxi nota nirekari atáon inakarinoka nikamini. Apiananiri imarotari atáon, ininiá imarotari paríkatxi íki apakapakani. Imarotari imisiritiko apakapakani apaka. Nipaíka íki isikano notamoni uai ikanapiriini ótisaaki. Na notananini apakapari. Isikari paríkatxi íki ikininapemonei ikanapiriini nirekakanimonei.

Paoro Iókatsopatakiti Mapotókkire

⁹ Piposotiniá, katima pitxako notamoni papokini. ¹⁰ Témasi inakori asikapekano, kotxi itiretari Xesosi sáikire mauiákani nireékiti. Isipeka Tesarónika sitatxitimoni. Kiresétxi inakori sari Karásia tixinimoni iparíkauatini íkapani. Txito inakori sari Taomásia tixinimoni iparíkauatini íkapani. ¹¹ Arókasinokara moianatano uatxa. Pakiritariko Marko. Piminari iua pitekata. Iua posotari imiparíkatini, Xesosi sáikire nisápiretakasaaki kákitimoni. ¹² Txíkiko inakori nipaniáta Épeso sitatxitimoni isini. ¹³ Tóatxi sitatxiti nauakasaaki, nítakanapari nimáka áti nimáka nopini nitakakiti. Nítakanapari iua nimáka Kapo inakorikata. Pite uai íkasaaki piminariko. Apaka piminariko atatsopari ninakiti aátsopa kamakori. Apia ninirekari pimininiri atatsopari ninakiti aamata kamakori.

¹⁴ Arexátri inakori iteene misiritano. Iua Arexátri tiitxi kamakari iua. Tiitxi metao kamakorinoka ikama. Iua misiritinino xika, Teoso misiritari iua. ¹⁵ Erepaniko iua. Pamonókoniri iua, kotxi iua iteene misáikirepiretari aóereékiti sáikiretxiti.

¹⁶ Merepitipanika nota apoítakani anikasaakino auítetxiakori apisatoõ, nisãkire ikenakotinina íkapani, na áti nimoianari kaikota notakata iuasaaki. Ikinimane nimoianariakori takanapano, iuaritika na ninirekari Teoso misiritinina itakanapinino xika. ¹⁷ Ninoa takanapano, iuaritika Apiananiri kaikota notakata. Iua sikata-paraxiniretano, ininiã niposotari Teoso iokanapirena ikinika nisãpiretinina ninoa Xoteo minakaniua ikenakotinirina íkapani. Ininiã ákiti namaã takote nauakasaaki, Teoso tokapakeétano nota. ¹⁸ Nimarotapitikari Apiananiri tokapakeétapanikano nota ikini sereti maerekati auakasaaki. Iua níkatano. Anikano itix-

inemoni, iua auítetxi ininiãtaãua. Ikinimane átipirika sãpiretari iua: “Peerekai. Pitenokara erekari.” Ameẽ.

¹⁹ Pisãpiretana Pirisira inakoro, Ákira inakori pakini nixinikamanapitana. Apaka Onesíporo inakori aapoko auakani nixinikamanapita. ²⁰ Erásito inakori kaikota Koríto sitatxiti. Tópimo inakori nitakanapa Mireto sitatxitiã, kotxi iua amianata.

²¹ Tximótxio, piposotiniã, mitaã apisapanika papokako uaimoni. Eoporo inakori, Porotêtxi inakori, Arino inakori, Karáotxia inakori pakini ikini aítariakorikata iokanapireta pitemoni ixinikamanapitiniina.

²² Apiananiri Xesosi Kristo átipirika kaikota pitekata pãkixinireẽ. Ikinipoko erekari isika pitemoni. Ameẽ.

Txito

1 Nota Paoro. Teoso nitiri amotakori nitxaua. Xesosi Kristo iokanatakiti nitxaua. Iua iokanatanokākitimoni Teoso mereēkini auiākiti sākiretxiti nisāpiretini ĩkapani. Iokanatanokākitimoni atāo inakari imarotininina ĩkapani. Atāo inakari imarotiko oerekaua Teoso nireēkiti akamini ĩkapani. ² Aāuikari aāuapininiika anini Teosokata, kotxi kitxakapirīka itixi kamiko apisa Teoso kamaenetari ikara. Ininiā apokapitikako, kotxi atāonoka iua sākire. !Iposotari atāo minakati isāpiretini. ³ Ike-totiniri manapi oerekari isākire. Isākire sāpiretakani sāpiretari isākire. Ininiā Teoso sākire notamoni isikakiti nisāpiretai, kotxi Teoso amaerekani makatxakakari paniātano nota nisāpiretiniri isākire.

⁴ Niokanatsopata pite Txitomoni. Namarite atāo inakari atoko pitxaua, kotxi pite auikari Xesosi sākire nota auikiniri atokotxikana. Aīri Teoso, aāuīte Xesosi Kristo amaerekani makatxakakari pakini, sikari ikinipoko erekari pitemoni. Ninoa iamoniākai. Ikamaerekaxiniretaina.

Kōtākikarerini

⁵ Nitakanapai pite Kreta pokomiriīti, kotxi aparīka iuaātaā kona xipokapanika, ininiā ninirekari pite kaminiri ikara parīkatxi. Pimereēna kōtākikarerini ikini sitatxitiā Teoso sākire auiākani ōtākikakani tīkane. Pimereēna mitxi nisāpiretakiti iaōka. ⁶ Ia atoko inakari kākiti pimereē kōtākikarerini ĩkapani: Iua kamari erekari, ininiā maerekati auakasaaki, kona iua xikani maerekati apoka. Ātonokara ĩtanoro aua. Imiakori auikari Xesosi sākire. Ninoa !neenamauata. Ikamarina iri paniātakiti iaōka.

⁷ Teoso sikari iparīka kōtākikarerimoni ikamini ĩkapani, ininiā kōtākikarerini kamari erekarinoka. Maerekati auakasaaki, kona iua xikani maerekati apoka. !Iuikaua. !Katimari omanākarauatini. !Ipoāta. Kona kaneenamari. !Itiretaro txineiro. ⁸ Kōtākikarerini atāo inakari potxitari apakapiniri kākiti iua aapoko āki. Ipotxitari kākiti erekari kamakani. !Katima omanākarauatini. Erekarinoka ikama. !Ikamari maerekati. Erekari imarotakiti !itakanapari ikamini. ⁹ Kōtākikarerini atāo inakari oerekaākapeka Teoso sākire. Imarotari Teoso kaminiri isākire iaōka, ininiā iteene inīkatari Teoso sākire. !Imamakari Teoso sākire. Ininiākara imarotari ōtākikiniri apanakini. Iteene imarotari Teoso sākire, ininiā imarotari oerekiniri apanakini Teoso sākire manirekakani, Teoso sākire auikinina ĩkapani.

Erepaniko, Atāo Minakati Oerekakani

¹⁰ Kaiāopokori kākiti kona nirekari Teoso nireēkiti ikaminina. Maxikatīka isākirauatapika.

Kamisirienererini ninoa. Ikara atoko inakani nirekari Teoso takaōtxikare Xoteo minakanuia ĩtoā auini.

¹¹ Matxīkitakari ninoa iotokakiniri atāo minakati isāpiretinina, kotxi kākiti aapoko āki auakani naitakakaua ninoa oerekakiti sākiretxiti xika. !Apakata ninoa oerekakiti sākiretxiti. Iuaritika ninoa oerekari atāo minakati, txineiro apakapinina ĩkapani. ¹² Ninoa atokiriniri kitxakapirīka, koerekareri, uai Kreta pokomiriīti auakarini, txari: “Kreta auakani ātipirika misirieneritari kākiti. Maerekati kamakani itxauana. Kaneenamari ĩtopa auakari atoko ikamana. Iarinouatana. Paixonina,” itxa iua.

¹³ Isāpiretakiti atāopitikara. Ininiā pitaparaxinireritika pipinitana ninoa imasāpiretakanirina ikara atāo minakati, Xesosi sākire atāo auikinina ĩkapani. ¹⁴ Ininiā pisāpiretana: “!Himaākatapiriko Xoteoakori kiomaneakorini sākire atāo minakati. !Himaākatapena atāo inakari manirekaākani paniātakiti.” ¹⁵ Kākiti Teoso kamaerekatakiti, ikamakiti erekari. Ikinipoko ikamakiti erekari, kotxi Teoso makatxakapekari imaerekani. Kākiti imaerekani auapanika inakari, Teoso sākire iaōka makamakati, ikinipoko ikamakiti aua imaerekani. Imaerekani txikotari ixinikakiti. Imaerekani txikotari iua ākixinire, ininiā ākixinire !ōtākikari iua maerekati imakamakani ĩkapani. ¹⁶ Ninoa txa: “Ate imarotari Teoso,” txamari ikamarina Teoso manirekakiniti, ininiā !imarotarina Teoso. !Inirekarina Teoso. Arakakani atoko itxana, maerekati ikamakitina xika. !Ikamarina Teoso nireēkiti, ininiā !iposotarina erekari ikaminina.

Txito Ōtākikiko

2 Ininiā poerekariko ikinika atāo inakari Teoso oerekiko sākiretxiti.

Kiki Aneēkani Ōtākikiko

² Ia atoko pōtākikana kiki aneēkani: “Hīxinikariko hīkamakiti tīkane hīkaminiri apisapanika. Erekari hīkamako apanakini paxitinii ĩkapani. Kona hīkamapiri hīto nireēkiti. Iteene himarotariko hāuiākiti. Iteene hītraōkiuatako. Katima omanākarauataka !hītxape.” Ikara atoko pōtākikana kiki aneēkani.

Sito Aneěkani Ötåkikiko

³ Ia atoko pötåkikana sito aneěkani: "Hĩkamariko Teoso pĩkakani kamakiti atoko. Maxikatĩka !hãpoĩtapiri äti. Kona iteene hiãtapiri iãriã kapoãro. Erekarinoka hõerekako." Ikara atoko pötåkikana ninoa. ⁴ Apaka pötåkikana sito aneěkani ötåkikinina ätokoroakoro ia atoko: "Hĩtretanako hĩtaniri, hamariteakori pakini. ⁵ Kona hĩkĩpitapiri hĩito paniãtakiti. Erekarinanira hĩkamako. Hĩkamariko hĩparĩka haãpoko äki. Erekarĩ hĩkamako apanakini ĩkapani. Hĩtaniri nireěkiti hĩkamako, ininiã iuasaaki Teoso säkire mauĩãkani !imisãkirepiretari Teoso säkire." Ikara atoko sito aneěkani oerekanako ätokoroakoro.

Ätokoriakori Ötåkikiko

⁶ Ininiã iua atokokana pötåkikana ätokoriakori ia atoko: "!Apakata hĩkaminiri hĩito nireěkiti."

Txito Ötåkikiko

⁷ Txito, ikini pikamakiti pikamako kãkiti erekari kamiko imarotini ĩkapani. Poerekarauatakasaaki, poerekari kãkiti pitiretiniri atão inakari säkirexitinoka. Poerekanako Teoso säkirenoka apiari inini. Poerekarauatakasaaki, poerekariko kãkiti pimakoketakaniri atão minakati pisãkirekata. ⁸ Poerekariko atão inakarinoka, ininiã !uari papoĩtiko, kotxi !pikerokari pisãkire. Ikara atoko ininiã, pimokaiakarini pẽtauata, kotxi !liposotarina imisãkirepiretinii.

Nitiritxi Amotakoni Ötåkikiko

⁹ Ia atoko poerekanako nitiritxi amotakoni: "Hĩkĩpitariiko hĩpatrãote säkire. Hĩkamariko hĩpatrãote apokaerekatakitinoka. Kapakapaenere !hĩtxape. ¹⁰ !Hĩtirĩkapiri hĩpatrãote tii. Hõerekariko hĩpatrãote pisãkire atão inini. Ininiã hĩpatrãote nirekari imarotini rina Teoso oerekiko, amaerekani makatxakakari oerekiko."

Ikinipoko Erekarĩ Teoso Sikakiti

¹¹ Ikinimanemoni Teoso oerekapokari erekari isikakiti kãkiti maerekani imaktxakini. ¹² Teoso sikakiti erekari oerekaua atakanapiniri Teoso manirekakiniti. Teoso sikakiti erekari oerekaua amanirekakaniri ĩkorapokoriti auakani ĩto nireěkiti. Teoso sikakiti erekari oerekaua äto paniãtakiti atakanapini, atão inakarinoka akamini, Teoso nireěkiti akamini ĩkorapokoriti äauakasaaki. ¹³ ĩkorapokoriti äauakasaaki, aiãtapari poxokonitxi öti Apiananiri aTeosone apokini öti. Iuasaaki Xesosi Kristo, amaerekani makatxakakari, motika atemoni. ¹⁴ Iuaka sikaua Teosomoni ate ĩkapani ipĩkasaaki. Iuasaaki ĩk-ixitari Teoso, ininiã Teoso makatxakaua ikinika maerekanitxi sauaki. Ikara atoko ininiã, ika-maerekataua ate. Ininiã itxĩkitakaua inakitiakori aniniua, ininiã anirekari erekari akamini.

¹⁵ Auĩtetxi pininiua atoko pipaniãtariko kãkiti kĩpitiniri ikara nisãpiretakiti. Pötåkikana nisãkire makĩpitakani. Kona pauiritapiri kãkiti säpiretiniri pisãkire atão minakati inini.

Teoso Nireěkiti Kamiko

³ Txito, ia atoko poerekariko kãkiti: "Hĩpaxitariko ĩkorapokoriti auĩtetxiakori paniãtakiti, poiãori auĩtetxiakori paniãtakiti apaka. Iposope hĩtxako ikinika erekari hĩkamini. ² Kona himisãkirepiretapiri apanakini. !Hineenamauatape. Merepanika hĩxinikariko apanakini, eereka hĩteka hĩxinika. Hõerekariko kãkiti, hĩxinireẽ hinirekiniri erekari hĩkamini ikinimanemoni." Ikara atoko poerekana.

³ Teoso aimarotini apisapanika miĩkiteni atxaua. Kona akĩpitari kãkiti säkire, Teoso säkire apaka. Iuasaaki ate misirienetaãka. Iuasaaki akamari äito nireěkitinoka. Ikini sereti maerekati akama apoxokoniuatini ĩkapani. Iuasaaki ikiniõtika axinikari maerekati akamini. !Apakata akamakiti. Kaxikorinerini atxaua iuasaaki. Ate omanataãka. Apaka ate omanatari apanakini iuasaaki.

⁴ Ininiã eereka Teoso tiraõki, amaerekani makatxakakari tiraõki, iua amonĩkare, apoka atemoni. ⁵ Ateka parĩka erekari !imakatxakari amaerekani. Iua amonĩkarenokara makatxakari amaerekani. Iuasaaki na atão akama, iuaritika imaktxakari amaerekani, kotxi itiretaua. Iuasaaki iua arokari äãkixinire. Itxĩkitakaua ate aponaniini uaiãkana. Iuasaaki Erekarĩ Matamatakoti kamari ikinika amaneri axinireẽ. ⁶ Teoso iokanatarĩ Erekarĩ Matamatakoti kaposotiireri atemoni, kotxi Xesosi Kristo, amaerekani makatxakakari, ipina ate ĩkapani. ⁷ Iua sikari ikinipoko erekari atemoni, ininiã ikamaerekataua. Ininiã itxĩkitakaua Teoso anaakori aniniua, ininiã äãpakapariko ipotetakiti ate ĩkapani. Iua atoko ininiã, aiãtapari ätipirika Teosokata äãuini ĩkapani. ⁸ Atãopitikara ia nisãpiretakiti.

Ininiã ninirekari ätipirika pisãpiretiniri ikinika nisãpiretakiti Teoso säkire auĩãkanimoni. Ikara atoko Teoso auĩãkani itaparaxinireritika kamariko erekari apanakini ĩkapani. Kona maxikatĩka ikamarina erekari. Teoso atão ĩkitxitariko kãkiti. Ikara atoko kãkiti kaminiã, ininiã erekari ikinimane ĩkapani.

⁹ Kona pimaãkatapiri miĩkiteti säkire. !Hĩtaparakienatakapeua kitxakapirĩkarini uãka xika. Kona himaãkatapenako kãkiti kiomãtxiakori oerekakiti xika tsoatakani. Ikara säkiretxiti !itxĩkitakai erekari hininiua. !Itxa ikara säkiretxiti.

¹⁰ Kãkiti oerekiniãri atão minakati Teoso manirekakiniti, pötåkikari iua ipikata. Iposo atoko !pimaãkataikari. ¹¹ Ikara atoko inakari atão ĩkĩte !uari. Maerekati ikama. Ikamakiti oerekari apanakini, maerekati kamakari ininiua. Iuaka imaerekani xika imisiritiko apokako.

Paoro Sāpiretakiti Mapotōkire

¹² Niokanatarī Atemasi inakori, atxīīti Txíkiko inakori apaka pitemoni. Ninoa apokasaaki, paīamata pisini īkapani, katimari notamoni Nikópori sitatxitiā hāpokini īkapani. Ninirekari ia mitaāti nikaikotini iuaā.

¹³ Pimoianatarī Sena inakori, Aporo inakori pakini. Auītetxiakori paniātakiti imarotakari iua Sena. Pimoianatanako ninoa aiamatini. Iamonitakitina

pisikanako. ¹⁴ Aītariakori Xesosi sākire auiākani apa-iaōkariko erekari ikaminina, kākiti minakati mauakiniti imoianatinina īkapani. Makamaretika hinini !apakata.

¹⁵ Notakata auakani xinikapikai pite. Pisāpiretanako ate tirketakani ereē Xesosi sākire auiākani nixinika-manapitana ninoa.

Ikinika erekari Teoso sikai hīte hīkinika. Ikara atoko niōkatsopata pitemoni. Ameē.

Piremõ

¹ Nota Paoro. Kateia äki naua, Kristo Xesosi säkire nauikini xika. Nota, aĩtari Tximõtxiokata aiokanat-sopata pitemoni Piremõmoni. Ate iteene tiretai pite. Atekata parĩkauatakari pitxaua. ² Aiokanapireta Xesosi säkire auiäkanimoni, paapoko apotiitakanimoni. Aiokanapireta aĩtaro Ápiamoni, Akipo pakinimoni. Iua Akipo Xesosi sotatone itxaua, ate Xesosi sotatone atokotxikana.

³ Aĩri Teoso, Xesosi Kristo Apiananiri pakini sikai ikinipoko erekari. Ikamaerekaxiniretaina.

Piremõ Tiraõkiuatini Pirena

⁴ Nitari Piremõ, Teoso nimisäkiretakasaaki, ätipirika nisäkirauata pite ĩkapani. Nisäpiretari Teoso ereka inini, kotxi iua kamaerekatai pite. ⁵ Ikara atoko itxa nisäkire, kotxi nikenakopiretari iteene pauikiniri Apiananiri Xesosi säkire. Nikenakopiretari ikinimane käkiti Teoso nakitiakori pitiretini. ⁶ Nimisäkiretari Teoso pite ĩkapani, kotxi ninirekari pisäpiretiniri pauikäkiti säkiretxiti ikiniõtika apanakinimoni, ininiäkara pimarotari ikini sereti erekari Teoso siäkiti Kristo nakitiakorimoni. ⁷ Ate poxokoniuaata, kotxi pite tiretana käkiti Teoso nakitiakori. Pitiraõki iteene sikataparaxiniretaua ate. Pite aĩtari kamapoxokonitana Teoso nakitiakori äkixinire.

Paoro Amanaäkiti Säkiiretxiti

⁸ Kristo sikaposotiiretano, ininiä nitapararitika niposotapitikari nipaniätiniii atão inakari pikamini. ⁹ Iuaritika nitapararitika na nipaniätai atão inakari pikamini. Nõtäkikakai Kristo tiraõkiä pikaminiri atão inakari. Nota Paoro kiomãtxipekano. Kateia äki nauanãta, Kristo Xesosi säkire nauikini xika. Notakara õtãkikakai pite atão pikamini. ¹⁰ Nota amanaäi pinitiri Onésimo inakori piamonĩkini ĩkapani. Namarite atoko inakari iua, kotxi iua kĩpitari nisäkire uai kateia äki nauakasaaki. Uatxa iua auikari Xesosi säkire. ¹¹ Nimarotari iuãka poparĩkari uãka itxaua. Mitxi ĩparĩkauata, pitekata auakasaaki. Paiariniri. Uatxa poparĩkari itxapekaua iuãka atokokana. Uatxa iparĩkauatapitikako pite ĩkapani, nota ĩkapani iparĩkauatini atokokana.

¹² Niokanatariko Onésimo, ikanapiriini pitemoni. Ininiä papakapariko iua. Nitiretari iua nota niĩto nitire-

tini atokokana. ¹³ Ninirekamari notakata uai ikaikotini, nota imoianatini ĩkapani, kotxi pite kona posotari pimoianatinino uai kateia äki nauakasaaki, kotxi pite aui-ni maioakari. Nota uai aua Teoso iokanapirena erekari nisäpiretini xika. ¹⁴ Ninirekamari Onésimo uai, txamari !ninirekari nikaminiri pite mauiritakiniti. !Ninirekari nitapararitika nipaniätiniii pauiritiniri Onésimo notakata ikaikotini. Pite nirekiniäri, imoianatano.

¹⁵ Akokaxiti Onésimo miteka. Mapakanani itakana-pai. Atxĩiti Teoso auiritari poiãoka itakanapinii, ätipirika pitekata iuaĩkana ikaikotini ĩkapani. ¹⁶ Iua pinitiri pi-amotakiti itxapanikaua. Uatxa apiaerekata iua. Pitari pitiretakiti itxapekaua, kotxi iua auikari Kristo säkire. Iteene nota tiretari iua. Pite apia tiretariko iua, kotxi iua pinitiri itxaua. Apaka iua pitari itxaua, kotxi Apiananiri nakiti hĩtxaua.

¹⁷ Nota pimoianari nininiãua, nota papakapini atokokana pitxariko papakapiniri iua. ¹⁸ Akokaxiti maerekati ikaminiä, ĩtiriuatiniä, pisäpiretano. Nota ĩk-itxitaiko. ¹⁹ Nota Paoro, uatxa niuakoã niõkatsopatari ia säkiiretxiti. Notakarako ĩkitxitai pite. Pite imarotari pite xinire auäki inini, kotxi notara akokaxiti nisäpiretai Xesosi säkire pauikini ĩkapani. Ininiä atxĩiti erekape pite ĩkitxitinino nota? ²⁰ Ininiäkara nitari, pikaminano ninirekakiti, kotxi Apiananiri nakitiakori atxaua. Pikamapoxokonitariko nãkixinire, kotxi Kristo nakitiakori atxaua. ²¹ Niõkatsopatari pite ĩkapani, kotxi nimarotapitikari pikaminiri namanaäkiti. Ari, nimarotari apiata pikaminano.

²² Apikomoni nitxai. Poeretari ereë nimakiniãtaã ĩkapani. Hĩte misäkiretapekari Teoso kateia nitakanapini ĩkapani, ininiä nimarotari Teoso auiritano iuaĩkana nikanapiriini hĩtemoni.

Itakapiretanapini Pirena

²³ Epãpara inakori notakata kateia äki aua, kotxi iua parĩkauata Kristo Xesosi ĩkapani. Iua xinikamanapitai hĩte. ²⁴ Markoma, Arisitakoma, Témasima, Arókasima pakini notakata parĩkauatakani, ninoa apaka xinikamanapitai hĩte.

²⁵ Aãũite Xesosi Kristo sikari ikinipoko erekari hãkixiniremoni. Ameë.

Epireo

Teoso Ākiri Apiatini Pirena

1 Teoso kitxakapirīka sāpiretari isākire kaiāokataikani, isākire sāpiretanimoni. Ininiā ninoā sāpiretana aātokiriakorini Teoso sāpiretakiti. Kiriāpa Teoso misākiretana ninoā? Kaiāopokoriā imisākiretana ninoā: Itaponeēna, ixinireēna, isākire iōkatsopatakoriā, initiri itixine auakari sākireē, txaāpota imisākiretinina ninoā.

² Uatxa ĩkorasaaki, Teoso misākiretaua iua ākiri sākireē. Teoso mereēri iua ākiri ikinipoko apakapini ĩkapani. Teoso ākiri kamari ikinipoko. Ikamari itixi, ikinipoko iaxiti apiko nopinixiti auakari apaka. ³ Iua iotximere Teoso iotximeretxikana. Teosotxikana iua. Kaposotiireri iua, kotxi isākireēnoka imaĳkari imakinika auini ĩkapani. Iuanokara makatxakari amaerekani. Amaerekani imaktxakasaaki, iusaaki iitopāka ikini mane auĳte Teoso kikomoni itixineē.

Teoso Ākiri Apiata, Initiriakori Poiāoka

⁴ Ininiā Teoso ākiri iteene apiaerekata. Apiananiri iua. Teoso nitiriakori iaxitikini poiāorini. Teoso mereēri iuāka apiari. Ninoā uāka poiāorini itxauana.

⁵ Teoso ĩsāpiretari initiriakori ia isākire kitxakapirīkari:

Pite nota ākiri pitxaua. Uatxa pite iri nitxaua nota, ĩtxa initiriakorimoni.

Apaka Teoso ĩsāpiretana ninoā ia isākire kitxakapirīkari:

Nota iua iri nitxauako. Iua nota amarite itxauako, ĩtxa initiriakori itixine auakanimoni.

⁶ Ātipekana. Teoso mīkasaakiri iua ākiri imatonōkari ĩkorapokoritimoni, iponaniini ĩkapani, iusaaki Teoso txari initiriakori:

Ninitiriakori, ĳkapotoreēkauako iua apisatoō. ĳteosonetariko iua,

itxa. Ikara atoko Teoso paniātari initiriakori.

⁷ Teoso sākire iōkatsopatakori, initiriakori pirena txari:

Itxīkitakana initiriakori matamatakoni ininiuana, ĳtima atoko ininiuana. Xamina tirinakari atoko itxauana ninoā, kotxi kaposotiirerini ninoā,

itxa. ⁸ Iua amaritemoni Teoso txari:

Teoso pitxaua. ĩxipoka auĳtetxi pininiāua. Ātipirika pite atāo mīkiikari pite auĳtetakani.

⁹ Pite tiretari atāo inakari. Pomanatari maerekati. Ikara atoko ininiā, nota piTeosone mereēi pite apiari pininiuā ĩkapani, pimoianariakori poiāorini ininiuana

ĳkapani, kotxi apiata nikamapoxokonitai pite. ĩtxiā nimereēkiti nopini nitakini atokokana, nitakari poxokonitxi pite nopini. Nimereēi pite auĳtetxi pininiāua. Ikara atoko itxa Teoso kitxakapirīka. ¹⁰ Iuaĳkana Teoso sākire iōkatsopatakori txari:

Apiananiri, merepitipanika pite kamari itixi. Apaka pikamari iaxiti piuakoā.

¹¹ ĩkorapokoriti, iaxiti pakini xipokapitikako. Iuaritika pite auapanika. Mākatxi kitxakariāpotakari atoko itxa ikinika.

¹² Mākatxi atoko piapirikariko iaxiti, itixi pakini. Ininiā ipinimoni itxako. Iuaritika pite mitxi atoko pitxapikako. ĩxipoka.

Itxa Teoso sākire.

¹³ Teoso txari imi:

Nota kikomoni piitopākiniritika nixipokariko pimokaiakariakori. Nikamariko ninoā pikiti pitakiniātaā atoko ininiuana.

Ikara atoko ĩtxari initiriakori iaxitikini.

¹⁴ Ininiā kipa Teoso nitiriakori iaxitikini? Ninoā erekari matamatakoni. Iparīkauatana Teoso ĩkapani. Teoso iokanatana ninoā imoianatinirina kākiti iua sākire auĳākani, kotxi Teoso makatxakari ninoā kākiti maerekani.

Erepaniko

2 Ininiā iteene mamixinikari ikinika atāo sākiretxiti mitxi akenakotakiti. Amakamakaniāri ikara atoko, kanaua tiokaāpotakari atoko atxaua. Ininiā iusaaki ĳaimarotaikari atāo. Maxinikari atāo inakari. ² Kitxakapirīka Teoso nitiriakori iaxitikini sāpiretari atāo inakari ate apiko atokiriakorimoni. Kākiti makamakaniāri ninoā paniātakiti, ininiā ninoā kākiti apakapari Teoso misirikare. Atāo ninoā apakapiniri imisiritikona. ³ Ininiā uatxa amitekini lauari, amanirekakaniāri amaerekani makatxakiko. Peerekari Teoso makatxakiniri kākiti maerekani. Merepitipanika Apiananiri sāpiretari ikara maerekantxi makatxakiko. Iua sākire kenakotakani apaka sāpiretaua ate iua sāpiretakiti atokotxikana. ⁴ Teoso apaka oerekaua ninoā sākire atāo inini, kotxi oerekari itakaōtxikare. Ikamari kākiti mimarotakiniti. Ikamari ikini sereti posotiiiretxi. Erekari Matamatakoti siākiti isika inirekakinimoni. Kākiti isika inirekaka iaōka. Ikara atoko Teoso oerekaua ninoā sākire atāo inini.

Xesosi Kākiti Atoko Itxa

⁵ Teoso ĩtxīkitakana initiriakori iaxitikini itixi amanerĳi auakani auĳteakori ininiuana. Iua itixi amaneri ĳkari

asäpiretai hïte. ⁶ Kitxakapirïka Teoso säkire iökat-sopatakori Xikari oitoätaã txari:

Kipa kãkiti? Kinirepa pite xinikana ninoa? Ate minakati. Kinirepa aïtari iaxitikiri maãkatatari kãkiti?

⁷ Mapakanani pikamari kãkiti itari iaxitikiri poiãori ininiãua. Iuasaaki pinitiriakori iaxitikini apiatakani txaua. Eereka pitxïkitakari iua auïtetxi ininiua. Pitxïkitakari iua kaiotximereri ininiua. Pitxïkitakari ikinimane paxitiniri iua. Pitxïkitakari iua ikinipoko auïte ininiua.

⁸ Pitxïkitakari ikinimane kaminiri iua paniãtakiti. !Auari ätika iua paniãtakiti makamakati.

Ikara atoko Teoso säpiretaua ate itxïkitakiniri ikinipoko auïtetiniri iua. !Auari ätika iua mauïtetakati. Txamari kona ate atamatapanikari iua ikinipoko auïte ininiua.

⁹ Iuapitikara aãtamatakiti Xesosi. Mapakananinoka Teoso txïkitakari iua poiãori ininiua. Iuasaaki Teoso nitiriakori iaxitikini apiata. Teoso txïkitakari iua poiãori ininiua, kotxi iuasaaki Xesosi atatsiirauata. Iuasaaki ipina. Uatxa Teoso txïkitakari iua auïtetxi ininiua. Itxïkitakari iua kaiotximereri ininiua. Itxïkitakari ikinimane paxitiniri iua. Teoso kamari ikara atoko inakari, kotxi Xesosi ipina kãkiti mapinakani ïkapani. Iuasaaki Teoso oerekari ikinipoko erekari isikini kãkitimoni.

¹⁰ Ikinika Teoso nakiti. Ikinika iua kamakiti. Apakata iua txïkitakiniri kãkiti maerekani makatxakakari atatsiirauatini, kotxi iuasaaki iposope kãkiti maerekani makatxakiko, kotxi iuasaaki Xesosi kamari ikinipoko iri paniãtakiti. Ininiãkara Teoso anikari iua anaakori iotximere auiniãtaã. Kaiãori ninoa. ¹¹ Kãkiti kamaerekatakari iritxikana iua kamaerekatakini iri. Ikara atoko ininiã, Xesosi !ipëtatari iua itariakori akiritiniua ate. ¹² Itxari Teosomoni:

Nisäpiretariko piuãka nitariakorimoni. Pitemoni apotiitakaniua sauaki nixikaretari ereka pinini.

¹³ Iuaïkana kitxakapirïka Teoso säkire iökatsopatakori txari:

Nauikariko Teoso säkire.

Iuaïkana Xesosi txari Teoso:

Uai nota aua pamariteakorikata. Pite sikana ninoa notamoni. itxa.

¹⁴ Kaïtori Teoso anaakori. Ninoa aua ixini, iarëka pakini. Ininiã kaïtopekari Xesosi ninoa atokokana. Ininiã ipïkasaaki ixipokari ipïkitxi posotiire auakiti. Satanasi inakori iua. ¹⁵ Ikara atoko inakasaaki, isikakari kãkiti ipïkitxi pïkakani. Mitxi ninoa iaxirikakoni atoko itxana.

¹⁶ Aimarotari, iuasaaki !imoianatana initiriakori iaxitikini. Iuasaaki imoianatana Apraã apika mekaniriakori.

¹⁷ Ikara atoko ininiã, Xesosi txïkitakaãka itariakori atokokana ininiua, ininiã iposotari sasetotxi auïte apiatakari ininiua kãkiti ïkapani. Iparïkauatakasaaki Teoso ïkapani, ikamari ikinipoko ikamaenetakiti. Maerekati kamakani kãkiti, iuaritika iamoniãkari kãkiti. Kãkiti itxapekaua Xesosi, ininiã iua ipina kãkiti maerekani imaktxakini ïkapani, iuaïkana kãkiti imikanapiriini Teosomoni ïkapani. ¹⁸ ïkorapokoriti Xesosi auakasaaki, imarotari Satanasi atamakaerekatini iua. Ininiã Sa-

tanasi atamakaerekatakasaakina kãkiti, iua posotari isikataparatinina ninoa.

Xesosi Apiatakari, Moisesi Poiãori

3 Ininiã nitariakori, Teoso mereëkini, hïte akiritaãka Teoso tixine häuini ïkapani. Iteene hïxinikariko Kristo Xesosi, kotxi iua Teoso iokanatakiti itxaua. Apaka iua sasetotxi auïte apiatakari itxaua. Iuara asäpiretari apanakini. ² Moisesi kamari ikinika Teoso paniãtakiti inirimane apisatoõ, Teoso aapoko aamata kamakori ikamakasaaki. Iua atokokana Xesosi kamari ikinika iua mereëkari paniãtakiti. ³ Apiaerekata Xesosi, ininiã iua apakapari apiata ipaxitiko, Moisesi poiã, kotxi aapokotxi kamakari apakapari apiata ipaxitiko. Poiã aapokotxi paxitiko aua. Iua atokokana, Xesosi aapokotxi kamakari atoko itxaua. Moisesi aapokotxi atoko itxaua. ⁴ Ikinika kãkiti aapokona kamakani auapitika, iuaritika Teoso ikinipoko kamakari itxaua. ⁵ Moisesi Teoso nitiri itxaua. Iua ätipirika kamari ikinipoko Teoso nirekakiti inirimane apisatoõ. Ikara erekari ikamakiti oerekari Teoso säkire iua säpiretakiti atão inini.

⁶ Kristo Teoso äkiri itxaua. Iua ätipirika kamari ikinipoko Teoso paniãtakiti Teoso aapoko inïkatini. Teoso aapoko atoko atxaua ate, iteene aãuikiniãri iua säkire, apoxokoniritika ätipirika aiãtapiniãri Xesosi kanapiriini õti.

Erepaniko, !Hïtakanapapiri Häuikakiti

⁷ Ininiã Erekari Matamatakoti txari:

Uatxa õti hïkenakotakasaakiri nisäkire,

⁸ kona hïkamapiriko hïxinire paikori inini hätokiriakorini atoko hinini. Äparaã makipakaniãtaã auakasaakina, iuaã ninoa !auikari nota säkire. !Ikamarina nipaniãtakiti. Iuasaaki ninoa ataerekatapikano nota.

⁹ Koarëtakanani, ikiniõtika hïte apika atokiriakori ataerekatapikano nota. Ninoa atamatari niposotiire. Txamari ikiniõtika ninoa ataerekatano nota. !Auikarina nisäkire.

¹⁰ Ikara xika nomanatana ninoa. Iuasaaki nitxa: "Ätipirika ninoa sapika apanakini säkire tikini. !Imarotarina nixinikakiti, nikamakiti pakini."

¹¹ Nomanatakasaakina ninoa imaerekanina xika, iuasaaki nitxako: "Atão nisäpiretana ninoa. Ninoa maïroãpekaniiarako nikamakiti tomatikoãtaã," itxa Erekari Matamatakoti.

¹² Ininiã nitariakori, erepaniko. Atxïiti ätikaka hïte aua hïxinire maerekati mauikareti. Ikara atoko inakasaaki, hïtakanapapekari Teoso ätipirika auãki inakari, maerekati tikini hïsinini ïkapani.

¹³ Ininiã ikiniõtika hïkamataparaxiniretakakauako. Uatxapanika inakasaaki hõtãkikakauako. Ininiã maerekanitxi kona misirienetai. !Ikamari kaikoxinire hinini. ¹⁴ Aãuini mapotökire manapi iteene aãuikiniãri Kristo säkire merepitipanika aãuikiniiri atokotxikana, atão iuakata parïkauatakani atxaua. ¹⁵ Uatxa nisäpiretai kitxakapirïka iökatsopatakiti:

Uatxa ia ōti hīkenakotakasaakiri iua sākire, kona hīkamapiriko hīxinire paikori inini, hātokiriakorini atoko hinini, āparaā makipakaniātaā auakasaakina. Ninoā !auikari nota sākire.

¹⁶ Ninoā kenakotari Teoso sākire, txamari !inirekarina ikaminirina isākire iaōka. Kipa ninoā? Exito tixini Moisesi makatxakakinira ninoā. ¹⁷ Kikākititipa kamari Teoso naiatinuia koarētakanani? Ninoā maerekati kamakani. Ikara xika ninoā ipīpeka āparaā makipakaniātaā. ¹⁸ Kirimonipa Teoso txari ia? “Atāo nisāpiretai hīte. Kona himaīroāpekaniiarako nikamakiti tomatikoātaā.” Teoso sāpiretari ikara iua sākire mauikakanimoni. ¹⁹ Ininiā aimarotari, ninoā !īroā iuaā, Teoso sākire imauikakanina xika.

Tomatikoātaā Aua Teoso Nakitiakori Īkapani

4 Auapitika Teoso kamaenetakiti kākiti tomatiniātaā Teoso kamakiti aīroini tīkane, ininiā erepaniko. Atāo inakari hīkamako iuaā hīiroini ĩkapani. ² Teoso iokanapirena erekari sāpiretaāka atemoni, kitxakapirīka Moisesi auakasaaki auakanimoni apaka. Txamari maxikatīka ninoā kenakotari Teoso sākire, kotxi ninoā !auikari ikenakotakitina. ³ Ate, Teoso sākire auīākanuia, īroā ikara Teoso kamakiti tomatikoātaā. Ininiā Teoso sāpiretakiti iaōka auapeka. Ia atoko Teoso txari:

Nomanatakasaakina ninoā imaerekanina xika, iusaaki nitxako: “Atāo nisāpiretana ninoā. Ninoā maīroāpekaniiarako nikamakiti tomatikoātaā,” itxa Teoso. Ikara atoko itxama, iuaritika ikara tomatikoātaā iposope iparīka ixipokasaaki, itixi ikamakasaaki. Ikara atoko ikama ate ĩkapani. ⁴ Teoso sākire iōkatsopatakori sāpiretari itomatini ōti pirena. Itxari:

Iparīkauata seisi ōti, ininiā eereka apikomoni āti ōti inakasaaki itomata. Iusaaki itakanapari ikinika iparīka, itxa Teoso sākire iōkatsopatakori. ⁵ Teoso sākire iōkatsopatakori txari:

Ninoā maīroāpekaniiarako nikamakiti tomatikoātaā.

⁶ Iuaritika apanakini īroāpanikako iua tomatikoātaā. Txama apanakini kitxakapirīka auakani !īroā. Ninoā merepitipanika sāpiretaāka Teoso iokanapirena erekari, txamari !īroāna, kotxi !ikamarina Teoso paniātakiti. ⁷ Ininiā Teoso kamari iketo ōti apanakini iuaātaā apokini ĩkapani. Iusaaki Teoso akiritari iketo ōti “uatxa.” Ikara atoko Teoso misākiretari Tavii:

Uatxa ōti hīkenakotiniāri nisākire, ininiā kona hīkamapiriko hīxinire paikori inini.

⁸ Aātokiri kitxakapirīka auakari Xosoe inakori, iuara anikari kākiti itixi Teoso sikaenetakitimoni. Txamari !īroāna atāo inakari tomatikoātaā Teoso sikakiti, kotxi eereka Teoso sāpiretari āti ōti tomatikoātaā īroīko ōti. ⁹ Ikara atoko ininiā, auapanikako Teoso kamakiti tomatikoātaā inakitiakori ĩkapani. ¹⁰ Ininiā kākiti īroākasaaki Teoso kamakiti tomatikoātaā, iotokakari iparīka, Teoso iparīka iotokakini atokokana. ¹¹ Ininiā nitarikori makamariko ikinika atāo inakari iua tomatikoātaā aīroini ĩkapani. Erepaniko, kotxi apanaki-

ni !īroā, Teoso sākire imauikakanina xika. Ininiā !hīkamapiri ninoā kamakiti atokokana.

¹² Teoso sākire kaposotiireri. Isākire auāki itxapika, kotxi Teoso ātipirika auāki inakari sāpiretakiti. Saasara ipi auanaro auakaro, iteene kauanaro, ininiā iposotari ikisauakiniri inirekiniātaā. Iposotari ikisauakiniri kākiti pakaki, iua āki auakari axīpe imaktxakini ĩkapani. Apiata Teoso sākire, kotxi Teoso sākire posotari apokini kākiti iīkite kākiti xinirekata apotiitiniātaāua. Teoso sākire imarotari ikinika axinikakiti, anireēkiti pakini aākixinireē. Teoso sākire atamakaerekatari ikara aākixinireē auakari. ¹³ Teoso atamatarari ikinipoko akamakiti, ininiā !auari iomaātakori. Ikinipoko lipataāka. Aāuīte Teoso apisatoō ikinipoko kasarori.

Xesosi Sasetotxi Auīte Apiatakari

¹⁴ Ininiā atemoni auari sasetotxi auīte apiatakari, Xesosi, Teoso ākiri. Apiananiri iua. Iua sari iaxiti Teoso auiniātaā. Ininiā iteene maūikari iua sākire. ¹⁵ Ate nakiti sasetotxi auīte apiatakari imarotari ate ākixinire iōkapetini. Imarotari ate maposotakinini. Imarotari ate tsii. Ikara atoko inakari imarota, kotxi Satanasi iteene atamakaerekatari iua, ate atamakaerekatiko atoko. Iuaritika maerekati !ikama. ¹⁶ Ininiā ataparaxinireritika masa Teosomoni. Aāuīte topākiniātaā masa ikinipoko erekari isikakiti aāpakapini ĩkapani, iamoniākanuia ĩkapani. Isikaua ikinipoko erekari. Isikataparataua amaxikiko auakasaaki.

Xesosi Sasetotxi Auīte Apiatakari Mereīko

5 Ikinimane sasetotxi auīte apiatakari mereēka kākiti sauaki. Iua misākiretari Teoso kākiti ĩkapani. Isikari kākiti sikakiti iuamoni. Kitxakapirīka iua okari pirātxi Teoso apisatoō kākiti maerekani iīkitxitini ĩkapani. ² Iamonīkari mimaroreni, Teoso takanapakani pakini, kotxi imarotari kākiti ākixinire iōkapetini, kotxi iua apaka kākiti itxaua. ³ Sasetotxi apaka maerekati kamakari itxaua. Ikara xika merepanika iua okari pirātxi Teoso apisatoō iuaka maerekani iīkitxitini ĩkapani. Eereka iua okari pirātxi kākiti maerekani iīkitxitini ĩkapani.

⁴ Kākiti paxitari sasetotxi, iuaritika ninoā kona mereēri sasetotxi parīka. Teosonoka mereēri kākiti sasetotxi ininiua ĩkapani, sasetotxi Arāo inakori Teoso mereini atokokana kitxakapirīka.

⁵ Xesosi iuaka !ikamaua sasetotxi auīte apiatakari ininiua. Kona itxari: “Apakatapitika sasetotxi nininiua.” Iuaritika Teoso txari iua:

Pite namarite. Uatxa noerekariko kākiti nota pite iri nininiua, itxa Teoso.

⁶ Iuaīkana Teoso txari: Ātipirika sasetotxi pitxaua. Sasetotxi Meokisiteki inakori atoko inakari pitxaua, itxa Teoso Xesosimoni. ⁷ Xesosi ĩkorapokoriti auakasaaki, iua iteene misākiretari iri. Ipinini apisapanika iteene amanaāri iri imapinakanini ĩkapani.

Imisākiretakasaakiri iua, iteene itxiīta. Irinokara posotari itxīkitakiniri imapinakani. Iri kenakotari isākire, kotxi Xesosi txari: “Pinirekakitinokara ninireka.”⁸ Xesosi Teoso ākiri, iuaritika atatsiirauatakasaaki, imaroāpotari Teoso nireēkiti iaōka ikamini.⁹ Iua kamari ikinipoko iri paniātakiti. Ikara atoko ininiā, kākiti maerekani makatxakakari itxapekaua. Imakatxakari ipaniātakiti kamakani maerekani, ininiā ninoa auapininiika itxanako Teosokata.¹⁰ Teoso mereēri iua sasetotxi auīte apiatakari ininiua, Meokisiteki inakori sasetotxi ininiua atokokana.

Erepaniko, Atāo Sākirexti !Hītakanapape

¹¹ Aua apikomoni kaiōpokori ikara atoko inakari asāpiretinii hīte, txamari pamimari ikara asāpiretinii hīte, kotxi !katimari himarotiniri Teoso sākire.
¹² Akokaxiti hīte auikari Xesosi sākire, ininiā uatxa apiarekata Xesosi sākire oereēkani hininiua. Txamari hīte nirekari āti oerekinii iuaīkana merepitipanika atāo inakari Teoso sākire iōkatsopatakorīā auakari. Hīte eenetxi xapitikiri atoko. Hinirekari Teoso sākire tinitxiā atoko inakari. Teoso sākire nipokori atoko inakari !hīposotapanika hāpakapini.¹³ Teoso sākire imarotakari tinitxiānoka nirekakari atoko inakari, iteene !imarotapanikari Teoso sākire. !Imarotari atāo inakarinnoka ikamini, kotxi iua eenetxi xapitiri atoko inakari.¹⁴ Kākiti aneēkari nikari xinitxi. Kataparaxinireri nirekari Teoso sākire, xinitxi aneēkari nirekini atokokana. Kākiti ikiniōtika kenakotiniāri Teoso sākire, ininiā imarotari atāo inakari. Imarotari atāo minakati apaka.

Maāpaiaōkarauata Apikomoni

6 !Apakata ikiniōtika merepitipanika Kristo sākire oerekakorinnoka axinikini, kotxi aimarotapekari. Aimarotapekari atakanapiniri maerekati akamakiti. Aimarotapekari ateka kamakiti txīkitakaua apinini. Aimarotapekari Teoso sākire aāuikini.² Aimarotapekari apatxisarauatini. Aimarotapekari atakauakotiniua āti nopini. Aimarotapekari ipīkani iuaīkana ōkitikiniua. Aimarotapekari Teoso misiritinina maerekati kamakani ātipirika. !Apakata ikara ātipirika aōerekinii.
³ Apikomoni auapitika, ininiā maāpaiaōkarauata apikomoni. Teoso auiritiniāua, apikomoni maxinika.
⁴ Kākiti takanapiniāri Teoso sākire auikini, !apakataika ikanapiriinina Teosomoni. Mitxi ninoa imarotari Teoso sākire atāo inakari. Mitxi ninoa imarotari erekari iaxitikiri. Mitxi imarotari Erekari Matamatakoti parīka ākixinireēna.⁵ Mitxi imarotarina Teoso sākire ereka inini. Mitxi imarotarina Teoso posotiire itixi amaneri apokasaaki.⁶ Ikara atoko ninoa imarota, iuaritika ninoa takanapari Teoso. Ininiākara !apakata iuaīkana ikanapiriinina Teosomoni, kotxi iuaīkana imisiritarina Teoso ākiri aamina ipiriāmitakari nopini imisiritiko atoko. Iuasaaki ninoa txīkitakari kākiti iuaīkana nape-tiniri Xesosi.

Kikio Atoko Anini Pirena

⁷ Teoso takari erekari itixi ia atoko inakari nopini: Āparaā ikipa kaiōokatani iuaā, ininiā iminaua kienatxi katakareri nirekakiti.⁸ Txamari itixi inako, aanaia pakini auiniā, !itxa. Ikara xika atxiīti imisiritaāka. Ininiā arikaākako. Ikara atoko inapeēkanako kākiti. Maerekati aniniāua, ininiā pamonōkoniri atemoni. Ikara atoko ininiā, imapotōkire ōti Teoso !nirekaikaua ate. Ixipokaua aanaia xipokiko atoko.

⁹ Nitariakori, ikara atoko asāpiretai hīte, iuaritika ate imarotari kona hīte ikara atokoni. Aimarotari hāpakapiniri erekari, kotxi Teoso makatxakapekari hi-maerekani.¹⁰ Teoso kamari ikinika atāo. Iua !imaxinīkaretari hīparīka iua īkapani. Hītiraōki iuamoni !imaxinīkareta, kotxi himoianatapekari iua nakitiakori. Uatxa himoianatapanikana ninoa.¹¹ Ate nirekari ikini-ka hīkaminiritika Teoso īkapani imapotōkire ōti manapi apokini. Ikara atoko ininiā, himarotari hiātapakiti apokapitikako hītemoni.¹² Kona apakata hīarinuatini. Apanakini Teoso sākire auīkani kamakiti atoko hīkamako, kotxi ninoa iātapari Teoso sikaenetakiti apakapinina.

Teoso Sikapitikariko Isikaenetakiti

¹³ Kitxakapirīka Teoso sāpiretari isikaenetakiti Apraāomoni. Apiatakari Teosonokara aua. Āti apiatakari iua atoko inakari !lauari, ininiā iuaka uākaā isāpiretari isikaenetakiti isikini Apraāomoni.¹⁴ Ininiā Teoso txari Apraāo: “Nitakapitikari erekari pitemoni. Nisikaiko itomaneri papika mekaniriakori,” itxa.
¹⁵ Ininiā Apraāo kenakotakasaakiri ikara, iteene iātapari Teoso sāpiretakiti apokini. Eereka Apraāo apakapari Teoso sikaenetakiti.

¹⁶ Kākiti sāpiretakasaakiri isikaenetakiti āti kākiti-moni, iuasaaki ninoa apoka āti apiatakari apisatoō isikaenetakiti isāpiretinina īkapani. Ininiā iuasaaki kākiti imarotapitikari isākire atāo inini. Ikara atoko ininiā, aāpirena !lauari isikaenetakiti xika.¹⁷ Teoso nirekari inakitiakori iteene imarotiniri imatakanapanakari isikaenetakiti isikinina ninoa. Ininiā isikaenetakiti isāpiretakasaaki, isikari isākire iuaka uākaā.¹⁸ Ininiā ipi aua: Teoso, Teoso sākire pakini. Teoso mitxi atoko itxapikako. Teoso sākire mitxi atoko itxapikako. Ininiā Teoso !iposotari atāo minakati isāpiretini. Amiteka iuamoni, iua nīkatiniua īkapani, aiātapakiti aāpakapini īkapani. Ininiā asikataparaxiniretaāka.

¹⁹ Ikara atoko inakasaaki, aposotari iteene aāuikiniri Teoso sākire. Aiātapari ikinipoko iua sākire iaōka apokini. Teoso sākire aāuikini, minari maporo maīkakari atoko itxa. Maporo maīkakari !auiritari maporo tiokini. Teoso sākire aāuikini maīkari axinire. Isikataparatarari axinire. !Auiritaua atiokini maerekanitximonni. Teoso sākire aāuikini anikaua Teosonani Auini Pakitaātaā, mākatxi mata arōkakari apikomoni auakari pakitamoni. Kitxakapirīka sasetotxiakori auīte apiatarinnoka iroā iuaā.²⁰ Iuaā Xesosi iroā ate iroini

apisa. Iuaã imisäkiretari iri ate ïkapani. Sasetotxiakori auïte apiatakari itxapekaua ätipirika ate ïkapani. Meokisiteki inakori sasetotxi ininiua atoko itxa Xesosi.

Meokisiteki Pirena

7 Meokisiteki inakori Sareë tixini auakani auïte itxaua. Iuasaaki sasetotxi itxaua apaka. Teoso, Api-ananiri, kamari iua sasetotxi ininiua. Kitxakapirïka Apraão kamari neenamtxi äti tixini auakani auïteakorikata. Iua kanapiriãkasaaki, aõkitari Meokisiteki. Iuasaaki Meokisiteki takari erekari Teoso sikakiti iuamoni. ² Iuasaaki Apraão sikari iua tiitxi imaktxakakiti ipixini. Tesi tiitxi auiniã, isikari äti Meokisitekimoni. Meokisiteki akiritaãka "Auïtetxi Atã Inakari Kamakari." Apaka akiritaãka "Auïtetxi Kãkiti Kamaerekaxiniretakari." ³ ïKimarotikori Meokisiteki iri, inoro pakini. ïKimarotikori apika atokiriakori. ïKimarotikori iponaniini, ipinini pakini. Teoso äkiri atoko itxa. Sasetotxi ätipirika itxaua.

⁴ Hïxinikariko iua Meokisiteki. Apiatakari iua. Apraão iteene paxitari iua, ininiã isikari ipixini tiitxi iua maktxakakiti iuamoni. ⁵ Eereka äti õti Apraão tikini Teoso paniãtari Arevii apika mekaniriakori, sasetotxiakori, apakapiniri ipixini kãkiti apakapakiti, txineiro, tiitxi pakini. Ninoa apakapari kãkiti sikakiti Teoso ïkapani. Ikinimane ninoa Apraão apika mekaniriakori itxauana. Iuaritika sasetotxiakori apakapari inirimane sikakiti. ⁶ Iua Meokisiteki Arevii nirimane !itxaua. Iua aua kitxakapirïka Arevii apisapanika. Iuaritika iua apakapari ipixini Apraão maktxakakiti. Eereka Meokisiteki takari erekari Teoso sikakiti Apraõmoni, Teoso sikaenetakiti apakapakarimoni. ⁷ Iua Apraão poiãori. Apiatakari Meokisiteki, kotxi apiari takari erekari Teoso sikakiti poiãorimoni. ⁸ Ikinika Arevii apika mekaniriakori, Teosomoni kãkiti sikakiti apakapakani, ipinanipeka. Ätipirika auakari atoko itxa Meokisiteki. ⁹ Atxiïti aposotari asãpiretiniri ia atoko: "Arevii sikari isikakiti Meokisitekimoni Teoso ïkapani, kotxi iua ina Apraão ïto äki." ¹⁰ Kotxi Apraão aõkitakasaakiri Meokisiteki, iuasaaki Arevii kona auapanika. Ininiã iua auini apisapanika Apraão ïtoã aua, kotxi Apraão apika mekaniri itxaua Arevii.

Xesosi Meokisiteki Atoko Inini

¹¹ Arevii apika mekaniriakori sasetotxiakori itxauana. Iua apika mekaniri Arão inakori. Arão apika mekaniriakori apaka sasetotxiakori itxauana. Teoso sikari ipaniãtakiti iõkatsopatakori ninoamoni, isãkire kãkiti imarotini ïkapani. Iuaritika ninoa sasetotxiakori parïka !oerekari kãkiti kamaerekatiko. Ininiã ätião sasetotxi nirekaãka. Sasetotxi Arão atoko inakari !nirekaãkaika. Sasetotxi Meokisiteki atoko inakari nirekaãka.

¹² Ätião sasetotxi auakasaaki, ätião Teoso paniãtakiti iõkatsopatakori aua iuasaaki. ¹³ Xesosi kona Arevii apika mekanirini. Iua Xotaa apika mekaniri. Xotaa mekaniriakori kona sasetotxiakorini. Ninoa kona okari pirãtxi Teoso ïkapani. Kona iparïkauatana Teosomoni

sikakori takikoãtaã. ¹⁴ Ikinimane imarotari aãuïte Xesosi Xotaa nirimane ininiua. Moisesi iõkatsopatakiti !auiritana ninoa sasetotxi ininiuana. ¹⁵ Ate sãpiretapedekari Meokisiteki pirena. Aimarotari auapitika äti sasetotxi, Meokisiteki atoko inakari. Uatxa aimarotari Xesosi Meokisiteki atoko itxaua.

¹⁶ Kitxakapirïka sasetotxi pitxaua, kotxi pikiomaneakori sasetotxi apaka itxauana. Teoso kamari Xesosi sasetotxi ininiua, kotxi iua auapikako. Kaposotiireri iua. !Ixipoka. ¹⁷ Teoso txari Xesosi isãkire iõkatsopatakoriã:

Ätipirika sasetotxi pitxaua. Sasetotxi Meokisiteki atoko inakari pitxaua, itxa.

¹⁸ Ininiã mitxi auakari sasetotxiakori parïka !auaika, kotxi itapara !auari. Xipope ikara. ¹⁹ Moisesi paniãtakiti iõkatsopatakori !ikamari kãkiti ereka inini. Uatxa apiarekatakari aiãtapakiti apokapeka ïkorapokoriti. Ininiã iua anikaua Teosomoni.

²⁰ Teoso isãkireë txïkitakari Xesosi sasetotxi ininiua. ²¹ Teoso lisãkirauata ikara atoko kãkiti sasetotxipeka inakasaaki. Teoso txïkitakari Xesosi sasetotxi ininiua isãkireë, kotxi itxari Xesosi:

Nota Apiananiri sãpiretapedekari nikamaenetakiti. Ikara nikamapitikako, ininiã ätipirika sasetotxi pitxaua, sasetotxi Meokisiteki atoko inakari pitxaua, itxa Teoso. ²² Ininiã ikara Teoso sãkireë, aimarotari Teoso kamapitikariko ikamaenetakiti apiari, kotxi iposope isikiniua Xesosi.

²³ Auapeka itori sasetotxiakori. Ninoa kona posotari ätipirika iparïkauatinina, kotxi ikoriãpekana. ²⁴ Xesosi auapikako, ininiã ätipirika sasetotxi itxaua. ²⁵ Ininiã iposotari imaktxakiniri ikinika amaerekani, Teosomoni anikasaakiaua, kotxi ätipirika aua, ininiã ätipirika imisäkiretari Teoso ate ïkapani.

²⁶ Ininiã ikara atoko inakari sasetotxi auïte apiatakari anirekapitika. Apiaerekatakari iua. !Kaneenamari. Ikerokakiti !auari. Itxiko ixinireë !auari. Maerekati !ikama. Iaxiti apiko nopinixiti auakari, auïtetxi Apiatakari itxaua. Ikara atoko inakari sasetotxi anirekapitika.

²⁷ Apanakini sasetotxi auïte apiatakani ïkorapokoriti auakani atoko !itxaua. Ninoa ikiniõtika okari pirãtxi, merepanika ninoaka maerekani maktxakiko ïkapani. Eereka ninoa okari pirãtxi kãkiti maerekani maktxakiko ïkapani. Kona ikara atokoni itxa Xesosi. Ätikatanokara Xesosi oxiketari iarëka kãkiti ïkapani. Iuaka ipina kãkiti ïkapani. ²⁸ Mitxipe sasetotxi auïte apiatakani mereeëka Moisesi paniãtakiti iõkatsopatakori iaõka. Ninoa tapara !auari. Moisesi sãkire tikini Teoso mereëri imi ätipirika sasetotxi ininiua ïkapani. Ätipirika erekarinoka kamakari iua.

Xesosi Sasetotxi Auïte Apiatakari

8 Ia atoko asãpiretakiti: Atemoni auapitika atão sasetotxi auïte apiatakari. Iaxiti iua topãka aãuïte Teoso kikomoni, auïtetxi auiniãtaã. ² Iuaã Teoso auiniãtaã, imisäkiretari iua ate ïkapani. Iuaã aua atão inakari

Teoso aapoko, Apiananiri kamakiti. Kona kākiti kamakiti.

³ Ikinika sasetotxi auite apiatakari auari iparīka. Isikari kākiti siākiti Teosomoni. Isikari pirātxi okakori Teosomoni. Ininiā Xesosi parīka apaka aua isikarauatini. Iuaka isikaua Teosomoni. ⁴ Īkorapokoriti Xesosi auakasaaki, sasetotxi !itxaua, kotxi auape ĩkorapokoriti sasetotxiakori kākiti siākiti sikakani Teosomoni. Moisesi iōkatsopatakiti atokotxikana ikamana. ⁵ Sasetotxi ĩkorapokoriti auakani kamakiti atāo, txamari ninoa parīka !inirekaākaika. Ninoa parīka sanōkatxi atoko itxa, Xesosi parīka iaxitikiri aimarotini ĩkapani.

Kitxakapirīka Teoso paniātakasaakiri Moisesi Teoso aapoko aamata kamakori ikamini ĩkapani, Teoso txari Moisesi:

Pikamariko naapoko nipaniātakiti iaōka ixirata auite nopini aāuakasaaki noerekakiti. Ipinimoni inakari !pikamape, itxa Teoso.

⁶ Xesosi parīka Teoso sikakiti apiaerekata. Kitxakapirīka sasetotxiakori parīka poiāo erekari. Iua atokokana Teoso kamaenetakiti amaneri apiaerekata. Kitxakapirīka ikamaenetakiti poiāo erekari. Xesosi txīkitakari Teoso kamaenetakiti amaneri apokini kākiti ĩkapani, kotxi iua ipina kākiti ĩkapani. Teoso kamaenetakiti amaneri apiaerekata, kotxi ikamaenetari kaiāopokori erekari apiaerekatakari.

⁷ Teoso kamaenetakiti Moisesimoni apakatiniā maerekati imaktxakini ĩkapani, ininiā kona ikamari āti ikamaenetakiti apiatakari. ⁸ Txamari Teoso lapokaerekatari kākiti, kotxi kākiti kamapanikari maerekati. Ininiā Apiananiri txari kākiti:

Āti ōti nisāpiretariko nikamaenetakiti amaneri Isaeo nirimanemoni, Xotaa nirimanemoni pakini.

⁹ Kitxakapirīka nisāpiretari mitxi nikamaenetakiti ninoa atokiriakorinimoni. Iuasaaki nota makatxakana ninoa imisiritikosaakina Exito tixiniā. Txamari ninoa !ikamari nisākire iaōka. Ininiā nitakanapana ninoa. Nikamaenetakiti amaneri kona mitxi nikamaenetakiti atokoikani.

¹⁰ Āti ōti ĩkari nikamaenetakiti amaneri nisāpiretariko Isaeo tixini auakani. Ia atoko inakari nikamaenetakiti amaneri: Nitakariko nipaniātakiti kākiti ĩkitekē. Niōkatariko nipaniātakiti ninoa ākixinireē. Iuasaaki ninoa Teosone nitxauako. Iuasaaki ninoa nota nakitiakori itxauanako.

¹¹ Iuasaaki kākiti kona oerekari āti imarotini Api-ananiri. Kona kākiti oerekari itari imarotini Api-ananiri, kotxi iuasaaki ikinimane imarotanoko nota. Poiāoka inakani, apiatakani pakini imarotanoko nota.

¹² Nimaxinīkaretariko ikinika maerekati ikamakitina. Kona nimisiritaikanako ninoa. Kona nixinikaikariko maerekati ikamakitina, itxa Apiananiri. ¹³ Teoso kamakasaakiri ikamaenetakiti amaneri, iuasaaki oerekari kākiti mitxi ikamaenetakiti Xoteoakorinoka ĩkapani ikamape, ininiā inapape. Tiitxi kitxakari patimari xipokini atoko, ikara mitxi Teoso kamaenetakiti xipoka.

Teoso Aapoko Aamata Kamakori

⁹ Kitxakapirīka Teoso kamaenetakiti isāpiretakasaakiri Moisesi, Teoso oerekari Moisesi oerekiniri kākiti Teoso apisatoō apokini. Iua apaka sāpiretari kākiti iua aapoko ĩkorapokoriti ikaminina ĩkapani. ² Ininiā ninoa kamari Teoso aapoko aamata kamakori. Sasetotxiakori ĩroiniātaā aua tirikapi takiko tiitxiti. Iuaā aua apaka komiri Teosomoni siākori amesa nopini. Iua pakita ninoa takauākatari “Teoso Auini Pakitaātaā.” ³ Apanīkaki mākatxi mata kasipiri arōkakari aua. Iua mākatxi mata apikomoni auakari pakita ninoa takauākatari “Teosonani Auini Pakitaātaā.” ⁴ Iuaā aua kamariāro arikiko amesati oro kamakoro. Iuaā aua Teoso kaixane. Iua kaixa akiritaāka “Teoso kamaenetakiti kaixati.” Iua kaixa nopini mapara itaāka oronokara. Iua āki itakaāka kopitipaki oro kamakoro. Iua kopitipaki āki itakaāka xapitiri komiri manaa inakori. Iua kaixa āki aua apaka Arāo tsonareke. Īkora mitxi pitxaka iuaīkana. Apaka iua kaixa āki aua ipi kaita. Īkora kaita nopini aua Teoso paniātakiti iōkatakori. ⁵ Iua kaixa nopini aua ipi Teoso nitiriakori iaxitikini atoko inakani. Oro kamakori ninoa. Akiritaāka Keropiī inakoni. Keropiī matameēkari imīkita iua kaixa tore nopini. Iuaā Teoso maxinīkaretari kākiti maerekani.

Uatxa lapakata apikomoni noerekinii ikara pirena.

⁶ Teoso Auini Pakitaātaā sasetotxiakori ĩroā ikiniōtika iparīkana ikaminina Teoso ĩkapani. ⁷ Sasetotxi auite apiatakarinoka ĩroā Teosonani Auini Pakitaātaā. Ātikanani ātikatika ĩroā. Iua anikari arēkatxi iuakata. Arēkatxi imanikakaniā, !īroā. Iua arēkatxi isika Teosomoni merepanika iuaka maerekani Teoso makatxakini ĩkapani. Eereka ikamari ikara apanakini kākiti maerekani Teoso makatxakini ĩkapani. ⁸ Iuasaaki Teoso kona auiritari kākiti ĩroini Teosonani Auini Pakitaātaā. Ikara atoko Erekari Matamatakoti oerekaua ate, kotxi kona Teoso oerekapanikari ikinimane kākiti ĩroini Teoso apisatoō. Teoso aapoko aamata kamakori auapanika inakasaaki, Teoso kona oerekari kākiti iuamoni apokini. ⁹ Ikara Teoso aapoko kitxakapirīka auakari ate oerekiko itxaua uatxa. Oerekari ia. Kākiti sikakiti Teosomoni, pirātxi okiko Teoso ĩkapani apaka, kona posotari oeretiniri Teoso teosonetakani ākixinire. ¹⁰ Ikara Teoso oerekakiti kitxakapirīka oerekari kākiti iniākiti atāo inakari, iātakiti atāo inakari pakini. Oerekari kākiti iito arokiko, itii arokiko pakini Teoso apisatoō apokini iposope inini ĩkapani. Teoso kamaenetakiti amaneri apokasaaki, kona akamaikari ikara mitxi Teoso oerekakiti.

Kristo Arēka

¹¹ Kristo apokapeka. Sasetotxi auite apiatakari itxaua. Oerekaua erekari Teoso sikakiti. Iparīkauata Teoso aapoko apiaerekatakari āki. Iua Teoso aapoko kākiti makamakiniti. Iua aapoko !auari ĩkorapokoriti. ¹² Iua ĩroākasaaki iuaātaā, !anikari potxi arēka, kema auite

ākiri arēka iiroini ĩkapani. Iua ĩroākasaaki Teosonani Auini Pakitaātaā iaxiti auakariātaā, anikari iuaka arēka, kotxi ikitakari iarēka ātikatika ikinimane kākiti ĩkapani. Ininiā ĩkitxitari Teoso ātikatika kākiti maerekani ĩki, ininiā kākiti aua Teosokata ātipirika. ¹³ Potxi arēkaā, kema auĭte arēkaā, kema auĭte ākiri ariākori paniā pakiniā, kitxakapirĭka sasetotxi tseētari maerekati kamakani Teoso apisatoō apokinina ĩkapani. Ininiā iuasaaki maparanoka oeretaāka. Ākixinirena !oeretaāka.

¹⁴ Apiaerekata Kristo arēka, kotxi iua posotari oeretiniri aākixinire. Maerekati !auari Kristomoni. Iuaka sikaua Teosomoni Erekar Matamatakoti posotiireē, ātipirika auakari posotiireē. Iuara oeretari aākixinire. Imakinika akamakiti apinini txĭkitakakari imaktxaka. Ininiā uatxa aposota aparĭkauatini Teoso ātipirika auāki inakari ĩkapani.

¹⁵ Ininiā iua Kristo txĭkitakari Teoso kamaenetakiti amaneri apokini. Ininiā kākiti Teoso akiritakini posotari apakapiniri ātipirika Teoso sikaenetakiti iua anaakori ĩkapani. Kristo ipĭkasaaki, isikakana ninoa imaerekani itakanapinina ĩkapani. Iuasaaki ĩkitxitari Teoso imaerekanina ĩki. Ikara imaerekanina ikamana Teoso kamaenetakiti mitxipe auakari auakasaaki.

¹⁶ Kākiti ipinini apisa, iōkatsopataru itii apakapakani uāka, ininiā ipĭkasaaki itii apakapakani imarotaāka. Ininiā iua ipinini imarotiko tsopa auiniā, iuasaaki itii apakapakani apakapari ipĭkari tii. ¹⁷ Ipĭkari tii apakapakani imarotiko tsopa nirekaāka kākiti ipĭkasaakinokara. Ikara !inirekaāka ipinini apisa. Iua auākipanika inakasaaki, kākiti !apakapari itii. ¹⁸ Ininiākara mitxi Teoso sikaenetakiti isika kākitemoni, arēkatxi auakasaaki, ipĭkari auakasaaki. ¹⁹ Kitxakapirĭka Moisesi merepitipanika sāpiretari kākiti ikinika Teoso paniātakiti iōkatsopatakori. Eereka ikosekari kema auĭte ākiri arēka, potxi arēka pakini. Ikara ikoketa āparaākata. Iposo atoko itseētari Teoso sākire aātsopate, ikinimane kākiti pakini isopo inakori poria, soti auĭte piti pōkamararia pakiniā. ²⁰ Iuasaaki itxari: "Ia arēkatxi oerekaua Teoso kaminiri ikamaenetakiti. Teoso paniātai hĭkĭpitiniri iua sākire." ²¹ Iua atokokana Moisesi tseētari Teoso aapoko aamata kamakori, ikinika iua āki auakari pakini arēkatxiā. ²² Teoso sākire iōkatsopatakori paniātari kākiti, tiitxi pakini oeretiko arēkatxiā. Okakori mauakaniā, arēkatxi kitaākori mauakaniā, Teoso !imaktxakari kākiti maerekani.

²³ Ininiā Moisesi takari pirātxi arēka ikinika Teoso aapoko āki auakari nopini oeretiniri ĩkapani. Ikinika Teoso aapoko āki auakari ĩkorapokoritikiri, iaxitikiri oerekiko ĩkapani itxa. Sanōkatxi atoko itxa. Pirātxi arēka kona apakata iaxiti ĩkapani. Teoso nirekakari arēkatxi apiatakari. ²⁴ Kristo iparĭka ikamakasaaki ate ĩkapani, kona iiroā Teoso aapoko kākiti kamakitiā. ĩkorapokoriti kākiti kamari Teoso aapoko atoko inakari, txamari na atāo iua aapoko. Kristo ĩroā atāo Teoso aapoko Teoso tixineē. Uatxa iuaātaā Teoso apisatoō iua misākiretari Teoso ate ĩkapani. ²⁵ Sasetotxiakori auĭte apiatakari ĩroā Teosonani Auini Pakitaātaā

ikinikanani. Iuasaaki anikari pirātxi arēka. Kristo likamari ikara atoko. Ātikatika Kristo oxiketari iarēka. ²⁶ Iua ninoa atoko inaākamako, itokata imisiritaākamako itixi kamikosaakipekamako. Uatxa imapotōkire ōti takote iua apokapeka maerekati ātikatika imaktxakini ĩkapani. Iuaka isikaua ipinini ĩkapani, amaerekani ixipokini ĩkapani. ²⁷ Teoso kamari ikinimane kākiti ātikatika koriini. Eereka ikinimane sari Teoso apisatoō. Iuasaaki apanakini apakapari imisiritiko. Apanakini apakapari iparĭkana ĩki. ²⁸ Ininiā Kristo okaāka ātikatika kaiāopokori kākiti ĩkapani, imaerekanina imaktxakini ĩkapani. Iuaĭkana iua kanapiriā. Iuasaaki !imisiritaākaikako kākiti maerekani xika. Iua ĩkasaaki, imaktxakariko iua iātapakani, maerekani sauaki auakani. Anikana itixinemoni ātipirika Teosokata auinina ĩkapani.

Pirātxi Arēka Kona Apakata

10 Kitxakapirĭka Teoso paniātakiti Xoteoakorimoni sanōkatxi atoko itxa. Ikara oerekari kākiti iuasaaki auakani atāo inakari apokini āti ōti. Ikinipoko atāo inakari !apokapanika ninoamoni. Ininiā pirātxi okiko ātipirika kona txĭkitakari kākiti iposope Teosomoni apokini. !Ikamaerekatana ninoa. ² Pirātxi arēka maktxakiniāri kākiti maerekani, ininiā ninoa takanapamariko pirātxi okinina, kotxi Teosomoni apokakani oeretapeēkaika, ininiā imarotamarina ākixinireēna imaerekanina mauakani. ³ Txamari pirātxi arēka !imaktxakari kākiti maerekani. Ininiā ikinikanani pirātxi okakori oerekari kākiti imaerekani auapanika. ⁴ Kema auĭte arēka, potxi arēka pakini kona posotari imaktxakiniri kākiti maerekani.

⁵ Kristo apokasaaki ĩkorapokoriti, itxari Teoso: Pirātxi okakori pitemoni siākori kona pinireka. Ininiā pite kamari ĩtotxi nota ĩkapani.

⁶ Pirātxi arikiko pite ĩkapani, pite !apokaerekatari. Kākiti sikiniri isikakiti pitemoni imaerekani pimaktxakini ĩkapani, pite !apokaerekatari. !Ikamapoxokonitai.

⁷ Iuasaaki nitxai. "Uaikarano nota. Paātsopateē iōkatapeēkaika nota pirena. NiTeosone uai napoka pinireēkiti nikamini ĩkapani," itxa Xesosi.

⁸ Merepanika Xesosi txari iri: "Pirātxi okakori pitemoni siākori kona pinireka. Pirātxi arikiko pite ĩkapani, pite !apokaerekatari. Kākiti sikiniri isikakiti pitemoni, pite !apokaerekatari. !Ikamapoxokonitai," itxa. Iuaritika Teoso sākire iōkatsopatakori kitxakapirĭka paniātari ikara kamiko. ⁹ Eereka Kristo txari iri: "Uaikarano nota. Uai napoka pinireēkiti nikamini ĩkapani," itxa. Ikara atoko inakasaaki, Xesosi xipokari pirātxi okiko, kotxi iua apoka uai Teoso nireēkiti ikamini ĩkapani.

¹⁰ Teoso nireēkiti iaōka ikamini kamaerekataua ate, kotxi Xesosi Kristo ipina ātikatika ikinimane ĩkapani.

¹¹ Sasetoxiakori ĩkorapokoriti auakani sapika ikiniōtika Teoso apisatoō iparĭkana ikaminina ĩkapani. Ātipirika iua okari pirātxi Teoso isikini ĩkapani. Itxama, ikara !iposotari maerekati imaktxakini. ¹² Iuaritika Kristo, ate sasetotxine, iuaka sikapekaua ikoriini kākiti

maerekani imaktxakini ikapani. Ikamari ikara ätikatika. Iposo atoko, iitopäka Teoso kikomoni. Ikara atoko ininiä, ixipokari iparika. ¹³ Iuaä iätapari ikinika imokaiakari xipokini. Ikiti itakiniätaä atoko ninoa. ¹⁴ Ininiä ätikatika okaäka käkiti ereka inini ikapani. Iua ka-maäpotana ninoa erekaäpo ininina ikapani.

¹⁵ Erekar Matamatakoti apaka txaua ate ikara atão inini. Merepanika itxari:

¹⁶ Apiananiri txari: "Ia nikamaenetakiti nikamako nikanitiakori ikapani äti öti. Ia nikamaenetakiti: Nipaniä-takiti nitakako ninoa äkixinireë. Nipaniätakiti niökatako iikiteëna."

Itxa Erekar Matamatakoti. ¹⁷ Apikomoni itxa:

Kona nixinikaikari maerekati ikamakitina. Apaka nipaniätakiti ninoa takanapakiti, Inixinikaikako.

¹⁸ Teoso maktxakasaakiri maerekati akamakiti, ininiä amaerekani maktxakaäkapeka. Ininiä !uaika okakori käkiti maerekani maktxakini ikapani.

Maäpoka Teosomoni

¹⁹ Ininiä nitariakori uatxa !hïpïkarauatape hïïroini Teosonani Auini Pakitaätaä, kotxi Xesosi iikkititapekari aïroini ikapani iuaka arëkaä. ²⁰ Xesosi ipïkasaaki, iua kamari kimapori amaneri, maxipokati, Teosomoni asini ikapani. Ipïkasaaki, imaktxakari mäkatxi mata Teosonani Auini Pakitaätaä arökakari, Teosomoni aïroini ikapani.

²¹ Atemoni aua sasetotxi apiatakari Teoso aapoko nïkatakari. ²² Ininiä maäpoka Teosomoni. Maäuiritari atão inakarinoa kaikotini aäkixinireë. Maäuikari ikini-ka iua säkire. Käkiti kitxakapirïkarini tseërauata arëkatxiä, maerekati maktxakiko ikapani. Ininiä maamanaäri Xesosi tseëtiniri aäkixinire oeretiniri ikapani. Kitxakapirïka käkiti kipaätaua Teoso aapoko iïroini ikapani. Iua atokokana maamanaäri Xesosi aïto arokini äparaä ereriä. Ikara atoko aniniä, maäpoka Teosomoni. ²³ Iteene maäuikari aimarotakiti asäpiretakiti, kotxi Teoso kamapitakariko ikamaenetakiti. ²⁴ Maxinikariko ia. Natokopa itxa aötäkikakakiniua atiraökiautini ikapani, erekari akamini ikapani apaka? ²⁵ !Apakata atakanapiniri aäpotiitiniua Teoso ikapani. Apanakini !itotaikari apotiitiniua Teoso ikapani. Masikataparaxiniretakakaua. Apiata masikataparaxiniretakakaua, kotxi aäuïte kanapiriini iïkorapokoritimoni kaiamapeka.

²⁶ Atão inakari aimarotiniä, atão inakari aäpakapiniä, eereka maerekati akamapika, kotxi anirekari maerekati akamini. Iuasaaki !uaika amaerekani ikitxitiko. Iuasaaki !uaika amaerekani maktxakiko.

²⁷ Iuasaaki aimarotari käkiti ikara atoko inakani misirtaäkako, kotxi Teoso mokaiakariakori itxauana. Arikatxi apiatakari xipokanako ninoa. Pïkaretxinoka aua ninoa ikapani. ²⁸ Kitxakapirïka käkiti makïpitakaniäri Moisesi paniätakiti okapeëkaika. Ipi, atxïiti ipi äti pakini käkiti atamatiniäri iua kaminiri maerekati, ininiä okaäka. !Auiritaäka imitekini. ²⁹ Ininiä natokopa itxa käkiti misiritiko Teoso äkiri säkire imakïpitakaniä? Apiata iua misiritiko, kotxi Teoso äkiri ikatxaratini atoko itxa imakïpitakaniri iua säkire. Iuasaaki !ipaxitari

iua arëka amaerekani maktxakakari Teoso sikaenetakiti. Iuasaaki imisäkirepiretari Erekar Matamatakoti, ikinipoko erekari sikakari. ³⁰ Aimarotari ia säpiretakari. Iua txari:

Notanoka xikatxirauata. Notanoka misiritanako ninoa imaerekanina xika, itxa Teoso.

Apaka Teoso säkire iökatsopatakori txari: Apiananirinoka säpiretari käkiti inakitiakori misiritiko. ³¹ Käkiti maerekati kamakani apokasaaki Teoso ätipirika auäki inakari apisatoö, iuasaaki pamonökoniri, kotxi käkiti misiritakari itxaua.

³² Hïxinikariko merepitipanika Teoso säkire häuikini öti. Hïkite iopinikiko atoko itxa iuasaaki. Iuasaaki himarotari Teoso säkire. Iuasaaki iteene hätatsiirauata Xesosi säkire häuikini xika. Iuaritika iuasaaki hïtaparaxinireritika häua. Iuasaaki !hïtakanapari Xesosi säkire häuikini. ³³ Iuasaaki käkiti apisatoö apanakini napetai. Ninoa misäkirepiretai hïte. Imisiritaina hïte. Iuasaaki hïte moianatari apanakini Teoso säkire auikäni, käkiti misiritakini. Ininiä iuasaaki hïte apaka misirtaäka. ³⁴ Hïtaretana apanakini Teoso säkire auikäni kateia äki auakani. Apanakini mixirikari hïtii Kristo säkire häuikini xika, iuaritika hïpoxokoniua, kotxi iuasaaki himarotapekari auapitika iaxiti hïtii Teoso sikakiti. Iïkora tiitxi kona xipoka. Apiaerekata tiitxi iuaxiti auakari.

³⁵ Ininiä kona hïtakanapapiri hïtaparaxinire, kotxi äti öti Teoso iikkititai hïtaparaxinire auiniä. ³⁶ Himïteenekariko ikinika Kristo ikapani. Hïkamariko ikinika hïtaparaxinireritika. Ininiä Teoso paniätakiti hïkamakasaaki, häpakapariko isikaenetakiti. ³⁷ Teoso säkire iökatsopatakori txari:

Apikomoni mokatanitika iua kanapiriäko. Iketo öti ikanapiriäpitika.

³⁸ Käkiti atão inakari kamakari auini erekari, kotxi auikari nota säkire. Käkiti sipikapapiretiniäri nisäkire, nota !apokaerekatari iua, itxa Teoso. ³⁹ Ate kona sipikapapiretari Teoso säkire. Ininiä !axipokaäka. Teoso säkire auikäni atxaua ate. Iua maktxakari amaerekani aäkixinireë auakari.

Teoso Säkire Auikiko Pirena

11 Atão aäuikasaakiri Teoso säkire, iuasaaki aimarotapitikari aäpakapiniri aiätapakiti. Atão aäuikasaakiri Teoso säkire, iuasaaki aimarotari amata-makinini auapitika. ² Kitxakapirïka Teoso apokaerekatana isäkire auikäni, kotxi iteene auikarina isäkire.

³ Teoso säkire aäuikasaaki, aimarotari iua kamari itixi, iaxiti pakini isäkireënokara. Aätamatakitiä !ikamari itixi, iaxiti pakini. Isäkireënokara ikamari ikinipoko.

Teoso Säkire Auiäkari Apeo Inakori (Xënesisi 4.2-12)

⁴ Apeo inakori auikari Teoso säkire, ininiä Teosomoni isikakiti apiaerekata, kotxi Apeo sikari Teosomoni

Teoso sākire iaōka. Itari Kaiī inakori sikakiti poiāo erekari. Apeo auikari Teoso sākire, ininiā Teoso apokaerekatari iua sikakiti. Teosomoni atāo inakari kamakari itxaua Apeo. Kitxakapirīka Apeo koriā, iuaritika iua auikiniri Teoso sākire oerekapanikaua Teoso tiretiniri kākiti isākire auiākani.

Teoso Sākire Auiākari Enoki Inakori (Xénesisi 5.21-24)

⁵ Enoki inakori apaka auikari Teoso sākire. Ininiā Teoso anikari iua iaxiti. Kona ipina. Mapīkatipanika anikaāka Teosomoni. Iuasaaki kākiti !apokaikari iua, kotxi Teoso anikapekari iua. Isini apisa kākiti imarotari Teoso apokaerekatiniri iua. Iua kamapoxokonitari Teoso. ⁶ Teoso sākire amauikakaniā, kona akamapoxokonitari Teoso. Kākiti Teosomoni apoākari, merepanika auikariko Teoso auini. Apaka ninoa auikariko Teoso sikiniri erekari kaiāopokori iua nitakarimoni.

Teoso Sākire Auiākari Noee Inakori (Xénesisi 5.28-9.29)

⁷ Noee apaka auikari Teoso sākire. Teoso sāpiretari iua kākiti mimarotakiniti monōkoni. Iuasaaki iua pīkarauata, ininiā ikamari maporo mitari iua aapoko āki auakani mapinakani īkapani. Noee auikari Teoso sākire, ininiā isāpiretari Teoso misiritiniri kākiti imaerekani xika. Teoso txīkitakari iua atāo inakari ikamini, kotxi iua auikari Teoso sākire.

Teoso Sākire Auiākari Apraño Inakori

⁸ Apraño apaka auikari Teoso sākire, Teoso paniātakasaakiri iua ātiātaā isini. Iua kīpitari Teoso sākire, ininiā iua sari, txamari kona imarotari isinimoni. ⁹ Iua auikari Teoso sākire, ininiā iua aua Teoso sikaenetakiti tixitiā. Iuaā iua aapoko aamata kamakori, kotxi āti tixinikiri itxaua. Apaka Isaki, Xakoo pakini aua aapokotxi aamata kamakori. Ninoa apaka apakapari itixi Teoso sikaenetakiti. ¹⁰ Apraño iātapari Teoso sitatxine apokini, kotxi Teoso kamari ikara sitatxi. Ixinikakiti iaōka ikamari. Ikara sitatxi kamaāka kaikori nopini, ininiā !ixipoka.

¹¹ Apraño auikari Teoso sākire. Iua imarotari ikiomaneēpeka inini. Apaka imarotari ītanoro Sara kona posotaikari keene onini. Iuaritika auikari Teoso sākire irītxi ininiua īkapani. Imarotari Teoso sikapitkariko isikaenetakiti. ¹² Ininiā iua kiki iteene kiomātxi inakariua, iuaritika irītxi itxaua. Iua aua itomaneri imekaniriakori, itomaneri apika mekaniriakori pakini. Itomaneri apika mekaniriakori iōriki iaxiti auakani atoko itxanako. Ikipatxite atoko itxanako apika mekaniriakori. Kaiāopanina ninoa.

Teoso Sākire Auiākani Iātapakiti

¹³ Ikinika ninoa kākiti Apeo, Enoki, Noee, Apraño pakini auikari Teoso sākire. Ikorīākasaakina, ninoa kona apakaparina ikinika Teoso sikaenetakiti. Ninoa imarotari Teoso sikaenetakiti ōtakopanikari apokini

tīkane. Ninoamoni īkorapokoriti kona atāo ninoa tixine. Maparakini atoko itxauana. ¹⁴ Kākiti ikara atoko inakani oerekari ninoa nitiniri ninoaka tixine. ¹⁵ Itixi itakanapakitina ixinikaākamanako, ininiā iuaīkana ikanapiriāmanako iuaātaā. ¹⁶ Ninoa kona kanapiriā, kotxi inirekarina apiaerekatakari itixiti, iaxiti auakari. Ininiā Teoso !ipētauata ninoa Teosone ininiua īkapani, kotxi iua kamapekari sitatxi ninoa īkapani.

Apraño Okaaritiniri Imi

¹⁷ Apraño auikari Teoso sākire, Teoso ataerekatakasaakiri iua. Iuasaaki iposope okiniri Isaki Teoso īkapani. Teoso sikaenetakiti apakapakari iua Apraño. Iposope imatonōkari imi okini Teoso īkapani. ¹⁸ Teoso sāpiretapekari iua: "Isakimoni auako pimekaniriakori, papika mekaniriakori pakini," itxari. ¹⁹ Iuasaaki Apraño xinikari Isaki ipininiā, Teoso ōkitikari iua iuaīkana. Iuasaaki Isaki ipinaarita, ininiā kākiti ipīkari iuaīkana ōkitikiniua atoko itxa Isaki iuasaaki.

Isaki, Xakoo, Xosee Pakini Auikiniri Teoso Sākire

²⁰ Isaki apaka auikari Teoso sākire, kotxi itakari erekari imi Xakoo, Isao pakinimoni, Teoso nireēkiti iaōka ikaminina tīkane. ²¹ Xakoo apaka auikari Teoso sākire. Ikorīini apisa itakari erekari Xosee anaakorimoni. Iuasaaki isāpiretari Teoso iua ereka inini. Iuasaaki iioītekaua itsonarekeē. ²² Xosee apaka auikari Teoso sākire. Ipinini apisa isāpiretana Isaeokini Exito osipikinina īkapani. Ininiā iua paniātana ninoa anikiniri iua api Teoso siākiti itixitimoni.

Moisesi Auikiniri Teoso Sākire

²³ Moisesi iri, inoro pakini auikari Teoso sākire. Iponaniāka atoko, ninoa kipatari iua ipi āti pakini kasiriti. Iuasaaki imarotarina Moisesi kona āti eenetxi atokoni. Ipinimoni itxa. Ninoa imarotari Paraoo paniātiniri amarini okiko, iuaritika !ipīkarina Paraoo paniātakiti.

²⁴ Moisesi auikari Teoso sākire. Mitapeka inakasaaki, kona inirekari kākiti akiritiniri iua Paraoo ākero ākiri ininiua. ²⁵ Iua mereēri imisiritiko Teoso nakitiakorikata. Ininiā iua sari ninoakata. !Inirekari poxokonitxi maerekati kamakiti, kotxi ikara poxokonitxi mokatantika xipoka. ²⁶ Iuamoni apiaerekata ninoa xinitiniri iua Kristo sākire auikini xika. Kona iua nirekari katiiri ininiua Exito auakanikata, kotxi imarotari āti ōti Teoso sikiniri iua iparīka īki.

²⁷ Exito ipotorikasaaki, iua auikari Teoso sākire. Iuasaaki Exito auakani auīte omanākarauata. Iuaritika !ipīkari iua. Imīteenekari ikinipoko, kotxi auikari Mata-matakoti sākire. Atamatakiti sākire auikini atokotxikana, auikari imatamatakiniti sākire. ²⁸ Iua auikari Teoso sākire, ininiā ipaniātari kākiti okiniri soti auīte. Eereka ipaniātari itakiniri iarēka īronakikoātaā tinikata. Ininiā Teoso nitiri ipīkitxi mīkari iaxitikiri ninoa nopini inapaāpotakasaaki, kona okari Isaeokini merepanika auakani, kotxi atamatari arēkatxi.

²⁹ Kākiti Isaeokini auikari Teoso sākire, ininiā ģpiriātarina potxoari uiniti Pōkamarariā inakori sonākakari kimaporiti nopini. Kākiti Exitokini apaka nirekari inapinina ninoa napini atoko. Txamari iusaaki āparaā kanapiriāpe iua kimapori nopini, ininiā ikinika ninoani axāpoātape.

Teoso Sākire Auiākani Kāiatini

³⁰ Isaeokini auikari Teoso sākire, ininiā Xerikoo sitatxiti iakirokana setxi pakini ōti. Iusaaki pirikeri sitatxi ākitakari irikapoakata, kotxi ninoa kamari Teoso sākire iaōka.

³¹ Haapi inakoro kanokarero otxaua mitxi. Eereka oāuikari Teoso sākire, kotxi oāpakapana kākiti iuaātaā apokakani, Teoso iokanatakini, ininiā kona okoriā kākiti Teoso sākire mauīākanikata.

³² Kiripa apikomoni nisāpiretai? Auapitika apikomoni itomaneri kākiti Teoso sākire auiākani. Kona apakata uatxa nisāpiretinii hīte Kitxiāo pirena, Paraki pirena, Sāsāo pirena, Xepitee pirena, Tavii pirena, Samoeo pirena, apanakini Teoso sākire sāpiretakani pirena pakini. ³³ Ninoa kākiti auikari Teoso sākire. Ininiā inaiatakasaakina Teoso sākire mauīākani, ninoa kāiata. Ninoa kamari atāo inakarinnoka. Iusaaki apakaparina Teoso sikaenetakiti. Ninoa okaāka ākitimoni. Iuaritika kona ākiti okana. Ākiti nama totaāka iusaaki. ³⁴ Xaminamoni okapeēkana, iuaritika xamina !arikana. Kona apakata okikona iouata mitaroā. Ninoa mataparani, iuaritika kataparaxinirepeka itxana, kotxi auikarina Teoso sākire. Neenamtxi auakasaaki, pataparana ninoa, ininiā āti uāka sotatoakori miteka.

³⁵ Sitoakoro Teoso sākire auiākani iuaīkana aua imiakori, kotxi Teoso ōkitikana ninoa ipīkasaakina. Apanakini Teoso sākire auiākani noropataāka. Imatakanapakaniārina Teoso sākire auikinina, okaākana, iuaritika ninoa linirekarina itakanapinirina, kotxi ninoa imarotari āti ōti Teoso ōkitikana ninoa. Iusaaki apiaerekata ninoa apakapakiti.

³⁶ Apanakini Teoso sākire auiākani napetaāka. Inoropataākana aāpitsaā. Apanakini Teoso sākire auiākani iaxirikaāka, kateia āki taka inaākana.

³⁷ Apanakini kiporonakaāka kai soroā. Apanakini kākiti sehotxiā kitxirākaāka apanīkaki iītona, auākipanika inakasaakina. Apanakini okapeēka iouata mitaroā. Apanakini māka soti auīte mata, potxi mata pakini. !Kamākana. !Katiina. Maerekati kamakani nitana ninoa okinina ģkapani. Imisiritapeēkana. ³⁸ !Apakata ģkorapokoriti ninoa ģkapani, kotxi ninoa iteene erekari.

Ninoa miteēkata āparaā makipakaniātaā, ōtanoxiratarari auiniātaā apaka. Aariko itixiākiriā, kai iriko āki apaka apanakini Teoso sākire auiākani aua, kotxi aapokona !auari.

³⁹ Teosomoni peerekana ninoa, kotxi iteene auikarina iua sākire. Iuaritika ninoa !apakapapanikari Teoso sikaenetakiti iusaaki. ⁴⁰ Teoso nirekari apiari erekari ate ģkapani. Inirekana ninoa atekata aāpakapiniri isikaenetakiti.

Teoso Oerekari Atāo Iua Anaakori Aniniua

12 Ininiā kaiāopokori Teoso sākire auiākani itixine apokakani atamataua ate uatxa. Ininiā matakanapari ikinika ate iomakotetakari. Matakanapari maerekati akamakiti, kotxi ikara patimari iaxirikiniri axinire. Ataparaxinireritika maūuako. Mamīteenekari ikinipoko. Mitekakani mitekini atoko mamitekako Teoso oerekinimoni. ² Ātipirika maāmatari Xesosi. Maūuikari iua sākire, kotxi iuanoka amaerekani makatxakakari. Iua txīkitakaua ate atāo aūuikiniri Teoso sākire. Xesosi xinikari poxokonitxi apokini ōti, ininiā iusaaki imīteenekari aamina ģpiriāmitakari nopini ipinini. !Imaākatari pētatxi ikara atoko ipinini. Ikinipoko iposo atoko iitopāka iri kikomoni, kotxi iparīka ate ģkapani iposope. ³ Hīxinikariko Xesosi. Iteene imīteenekari maerekati kamakani manirekakaniri iua. Hīxinikariko iua, ininiā kataparaxinirei hīte. Iusaaki !hiōkapeta.

⁴ Hīarēka kona xiketapanika maerekati hītakanapini xika. Ininiā hīte kona naiatari maerekati iua Xesosi naiatiniri atoko. ⁵ Atxiīti himaxinīkaretari Teoso sāpiretakiti ate isikataparaxiniretini ģkapani. Iua akiritaua iua anaakori aniniua. Ia isākire:

Namarite, Apiananiri auiritai pite atatsiirauatini atāo inakari pimarotini ģkapani, ininiā kona pimataniuatape iua misiritakasaakii pimaerekani xika.

⁶ Kotxi Apiananiri misiritana itiretakini maerekati ikamakasaakina, imaerekani itakanapinina ģkapani. Imisiritana ikinimane iua anaakori atāo inakari imarotininina ģkapani.

⁷ Ininiā himīteenekariko hīri iaxitikiri misiritinii himaerekani xika. Ikara himisiritiko oerekai Teoso anaakori hininiua, kotxi inīkakai hīte amarini irītxi nīkatini atokokana. Ikinini irītxi ģkorapokoriti auakari misiritari iua anaakori atāo erekari ikaminina ģkapani.

⁸ Teoso mamisiritakaniāi hīte maerekati hīkamakasaa-ki, ininiā iua anaakori atāo inakani !hītxaua. Teoso hīri !itxaua iusaaki. Ikinimane Teoso sākire auiākani misiritaāka, maerekati ikamakasaakina. ⁹ Akinika ate irītxi aua ģkorapokoriti. Ninoa misiritaua maerekati akamakasaaki. Iuaritika ate paxitana ninoa. Apiata apaxitari āiri iaxiti auakari imisiritakasaakiau ate, maerekati akamakasaaki, kotxi axinire iri itxaua. Ininiā akamakasaakiri āiri iaxiti auakari nireēkiti, aūuapininiika atxako. ¹⁰ ģkorapokoriti auakani irītxi misiritaua maerekati akamakasaaki. Mapakananinani ikara atoko ikamana. Imarotakitina iaōka ikamana. Teoso misiritaua maerekati akamakasaaki ereka anini ģkapani iua atoko anini ģkapani. ¹¹ Amisiritikosaaki, kona apoxokoniua, kotxi patsiiri. Iuaritika eereka akamari atāo inakarinoka. Iusaaki erekaxinireua, kotxi Teoso oerekepekaua atakanapiniri amaerekani imisiritakasaakiau.

¹² Ininiā hōkitikari hūuako sāpakakari. Hīkamataparatarari hīpotoriki iōkapetakari. ¹³ Hōeretariko kimapori atāo hīsini ģkapani. Ikinika himaerekani hītakanapako. Ininiā hīkamakiti atāo inakari aua. Ininiā

apanakini hīte atamatakani !irika hīte maerekani xika. Ininiā maerekati likamana, kotxi hīte oerekapekana erekari imarotiniina ūkapani. Ininiā erekapekana ninoa.

¹⁴ Ikinipoko hīkamako apanakinikata himaneena-mauatakani ūkapani. Ikinipoko hīkamako erekarinoka hīkamini ūkapani. Kākiti makamakanisaakiri erekari, kona atamatapaniri Apiananiri. ¹⁵ Erepaniko, kotxi atx-īiti kona hāpakapari ikinipoko erekari Teoso siākiti. Kona hāuiritapiri kapixi inakari aneini hākixinireē, kotxi ikara maxikari kaiāori kākiti. Itxikotari ninoa ākixinire. ¹⁶ Kona hāuiritapiri anokaretxi kamakani auini hītekata. Kona hāuiritapiri Teoso manirekakiniti kamakari Isao atoko inakari auini hīte sauaki. Merepiti-panika iponaniākari iua Isao, txamari isikari iri sikaenetakiti itarimoni axapitiki nipokori apakapini ūkapani. ¹⁷ Eereka iuaikana inirekamari ikara iri sikaenetakiti. Inirekari iri takiniri erekari iuamoni, txamari lapakataika iua apakapiniri. Itxiapata, kotxi mitxi ikamakiti inirekari imamakini, txamari iposope itarimoni iri sikaenetakiti isikini.

¹⁸ Kitxakapirīka kākiti Isaeokini sari ixirata Sinai inakorimoni Teoso paniātakiti apakapinina ūkapani. Iuasaaki ixirata arika. Ipiā, ūtima kataparari apaka aua iuasaaki. Ikara atoko inakari ixiratamoni kākiti maātakitimoni !haāpoka. ¹⁹ Ixirata Sinai inakoriātaā kākiti kenakotari trōpeta. Ikenakotari iaxitikiri sākire. Iuasaaki iteene ipīkarena auana, ininiā !inirekaikarina ikenakotirinina apikomoni ikara sākiretxi. ²⁰ Kotxi iuasaaki !imīteenekarina ia Teoso paniātakiti, kotxi iuasaaki Teoso txari: “Kākiti, pirātxipeka apaka maātakinīari oxiratarari, ikiporonakaākana kai soroā ipinini-na ūkapani.” ²¹ Iua xirata auīte kamari kākiti pīkarauatini. Iuasaaki Moisesi txari: “Nititinanaka. Iteene nipīkarauata,” itxa.

²² Hīte kona apoka oxiratarari Sinai inakorimoni. Hīte apokapeka ixirata auīte iaxitikiri Siāo inakorimoni. Hāpokapeka Xerosareē sitatxiti iaxitikirimoni, Teoso ātipirika auāki inakari sitatxineātaā. Hīte apokapeka Teoso nitiriakori iaxitikini apotiitiniātaāua. Ninoa iaōtiko !auari, kotxi kaiāopokori. ²³ Hīte apopeka Teoso mereēkini apotiitiniātaāua. Ipoxononiuatana. Teoso anaakori itxauana. Iuākana iōkatsopatapeēkaika Teoso aātsopateē itixineē. Hīte apopeka Teosomoni. Iuara sāpiretari kākiti misiritiko. Apaka iua ūkitxitana atāo inakari kamakani erekari ikamakiti ūkapani. Hīte apopeka erekari kamakanimoni. Teoso txīkitakana ninoa atāo inakari ikaminina. ²⁴ Hīte apoka Xesosimoni. Iuara txīkitakari Teoso kamaenetakiti amaneri apokini. Xesosi arēka xiketakasaaki, hīte apoka Teosomoni. Apeo oxiketari pirātxi arēka imaerekani makatxakiko ūkapani. Kristo oxiketari iuaka arēka ātikatika amaerekani imakatxakini ūkapani, ininiā Kristo arēka apiaerekata.

²⁵ Ininiā erepaniko. Hīkenakotariko Teoso sākire isākirauatakasaaki. Kitxakapirīka kākiti manirekakaniāri Teoso sākire sāpiretakari ūkorapokoriti auakari, imisiritaākana. Imitekinina !auari. Teoso tixine auakari sākire amanirekakaniā, apiata amisiritiko.

Amitekini !auari, ininiā erepaniko. ²⁶ Teoso misākiretakasaakiri Moisesi, itixi iakeka. Uatxa Teoso sāpiretari ikamaenetakiti. Itxari: “Iuaīkana niōkokariko itixi. Niōkokariko iaxiti apaka,” itxa. ²⁷ Isākire “iuaīkana,” kotxi iōkokariko ikinipoko ikamakiti. Ninoa makatxakaākako. Auapitikako maiōkokaeētakoni. Ikara kaikotako.

²⁸ Teoso auītetxi ininiātaāua, ate sinimoni, !iōkokaāka. Iuaātaā ixipokini !auari. Ininiā mapoxokoniuaata. Masāpiretari iua: “Peerekai pite.” Atāo maparīkauata Teoso ūkapani. Makamari iua apokaerekatakiti. Mapaxitarari iua. Mapīkari iua manirekakiniti akamini. ²⁹ Kotxi aTeosone xipokari imanirekakiniti, xamina tirinakari xipokiniri atokokana.

Iōkatsopari Mapotōkire Pirena

13 Ininiā hītiretakakauako. Itarixi atoko hītixako, kotxi Teoso anaakori hītixaua. ² Ātiātaā ūkani apokiniā, hāpakapanako ninoa haāpoko. Apanakini apakapakasaakina ātiātaā ūkani, apakapana Teoso nitiriakori itixinekini. Iuasaaki !imarotarina ninoa Teoso nitiriakori ininiuana. ³ Hītiretanako Teoso sākire auiākani kateia āki auakani. Kateia āki ninoakata hāuini atokokana, hīxinikanako ninoa. Ininiā hītiretanako misiritakoni. Kākiti misiritiniāi hīte, iuasaaki hinirekari apanakini tiritinii. Iua atokotxikana hītiretanako misiritakoni.

⁴ Hīpaxitaroko āti ūtanoro. Hīpaxitariko āto ūtaniri. Pītanirikatanani pisirīkako. Pītanorokatanani pisirīkako. Teoso misiritanako ikinika kanokarero, kanokareri pakini.

⁵ Txineiro !hītiretape. !Hinirekapiri āti kākiti nakiti. Hīpoxokotariko hīteka tii, hīteka txineirote pakini. Apikomoni !hinirekape, kotxi Teoso txari:

Nimatakanapapekaniikaraiko hīte. Nimasikapekaniikaraiko hīte, itxa. ⁶ Ininiā ia Teoso sākire iōkatsopatakori aāuika: Apiananiri nimoianari itxaua, ininiā kona nipīkari kākiti kaminiri maerekati notamoni.

⁷ Hīxinikariko hāuīteakori Teoso sākire hītemoni sāpiretakani. Hīxinikariko ninoa auini, ninoa ipinini apaka. Hāuikariko Teoso sākire ninoa auikiniri atokotxikana. ⁸ Xesosi Kristo kitxakapirīka atokotxikana uatxa. Xesosi Kristo uatxa atokotxikana ātipirika.

⁹ Kona hāuikapiri apanakini oerekakiti atāo minakati, kotxi ikini sereti oerekakori atāo minakati auapitika. Hāuiritariko ikinipoko erekari Teoso sikakiti sikataparatiniri hākixinire. Anikakiti !isikataparatarari aākixinire, ininiā !hāuikapiri kākiti sāpiretinii apanakini nipokori erekari hīxinire ūkapani, apanakini nipokori !erekari hīxinire ūkapani.

¹⁰ Sasetotxiakori Teoso aapoko aamata kamakori āki parīkauatakani Teosomoni sikakori takikoātaā !apakaparina erekari Teoso sikakiti ate apakapiniri atokokana.

¹¹ Teoso aapoko aamata kamakori auakasaaki, sasetotxiakori auīte apiatakari anikari pirātxi arēka Teoso-

nani Auini Pakitaãtaã. Iuaã isikari pirãtxi arëka Teosomoni kãkiti maerekani Teoso makatxakini ïkapani. Iua pirãtxi ïto anikaãka aapokotxi mapotõkire. Iuaã arikaãka. ¹² Xesosi pirãtxi okakori atoko itxa, kotxi anikaãka sitatxi mapotõkire okiko ïkapani. Ininiã iua arëkaã imaktxakari kãkiti maerekani, ikamaerekatini-na ïkapani. ¹³ Ininiã masa iuamoni ipininiãtaã. Iua napetiko atokokana maãpakapa. ¹⁴ ïkorapokoriti kona aua sitatxi maxipoãkati. Aiãtapari sitatxi iaxiti ïkari.

¹⁵ Kipa asika Xesosimoni Teoso ïkapani? Ätipirika masikari asãkire erekari. Matxari: "Peerekari Teoso." Ikara asikakiti Teosomoni, kotxi asãpiretari kãkiti iua aãuïte ininiua. ¹⁶ !Himaxinïkaretapiri erekari hïkamini apanakinimoni. !Himaxinïkaretapiri himoianatakakiniua. Ikara atoko akaminiã, Teosomoni asikakiti inireëkiti atoko itxa, ininiã ikara atoko inakari akaminiã, ikamapoxokonitari Teoso.

¹⁷ Hïkïpitariko hïauïteakori sãkire. Hïkamariko ninoa paniãtakiti, kotxi ninoa nïkatari hïxinire. Teoso sikari ikara parïkatxi ninoamoni, ininiã äti õti ninoa sãpiretari Teoso ikamakitina. Ininiã hïkamariko ninoa paniãtakiti, ininiã iusaaki ninoa poxokoniuaata iparïkauatakasaaki. Himakamakaniãri ninoa paniãtakiti, ninoa matinaniua-ta, ininiã ikara atoko inakari !erekari hïte ïkapani.

¹⁸ Himisãkiretariko Teoso ate ïkapani. Aimarotari aãkixinire ereka inini, kotxi anirekari ikiniõtika atão in-

akarinoka akamini. ¹⁹ Iteene namanaãi himisãkiretiniri Teoso, iua païtiki iokanatinino iuaïkana hïtemoni.

Teoso Misãkiretiko

²⁰ Nimisãkiretari Teoso, kãkiti kamaerekaxiniretakari. Aãuïte Xesosi ipïkaripeka inakasaaki, Teoso õkitikari iua. Soti auïte atoko atxaua. Soti auïte nïkatakari apiari atoko itxa Xesosi, ininiã iua iteene nïkataua. Xesosi ipïkasaaki, iusaaki kãkiti apakapari Teoso sikaenetakiti. Ätipirika Teoso sikari ikara isikaenetakiti kãkitimoni. ²¹ Nimisãkiretari Teoso isikiniri ikinika erekari hinireëkiti hïtemoni, iua nireëkiti hïkamini ïkapani. Namanaãri iua Xesosi Kristo uãkaã, ikaminaua ate iua apokaerekatakiti. Ätipirika kãkiti txari Xesosi: "Erekai pite." Ameë.

²² Nitariakori, iteene hïkenakotariko ikara nisãpiretakiti. Ia niõkatsopatakiti xapitinoka.

²³ Ninirekari himarotiniri aïtari Tximótxio kateia äki auakari sikakaãka. Mokatanitika iua apokiniã uai, nota sari iuakata hïtemoni. ²⁴ Hïsäpiretari hïauïteakori ate xinikamanapitinina ninoa. Hïsäpiretari ikinimane Teoso nakitiakori axinikamanapitinina. Xesosi sãkire auiãkani uai Itãria tixini auakani xinikamanapitai hïte. ²⁵ Ikinipoko erekari Teoso sikakiti aua hïtemoni.

Ameë.

Txiako

1 Nota Txiako. Teoso nitiri nitxaua. Apiananiri Xesosi Kristo nitiri nitxaua apaka. Niökatsopataria aätsopa hitemoni, Xoteoakori tosi nirimanetximoni Xesosi säkire auiañanimoni. Hite iarikape ikinika itixiti. Ereëkai hite.

Auiañkori Ataerekatiko

² Nitariakori, ikini sereti maerekati apokasaaki hitemoni, hienenikako, kotxi ikara ataerekatai hite. ³ Kotxi himarotari häuiäkiti ataerekatikosaaki, hitaparaxinireritika häua. Himiteenekari imakinika himisiritiko hixpokoniritika. ⁴ Ininiä imakinika himiteenekasaaki, hixinikakiti, hixsäkire, hikamakiti pakini erekari. Kona apikomoni pinireka ereka pinini ikapani.

⁵ Himarore mauakanisaaki, hamanaäri Teoso imarore isikinii ikapani. Ininiä isikaiko hite hamanaäkiti. Itori Teoso sikakiti ikinimanemoni. !Isäpaka ate ätipirika aamanainiri iua. !Itxitai. Isikapitikari hamanaäkiti. ⁶ Hamanaäkasaakiri, häuikariko Teoso sikinii hamanaäkiti. !Erekari hixinikiniri: "Atxiiti iua sikano namanaäkiti. Atxiiti kona isikano namanaäkiti." Ikara atoko !hixinikape. Ikara atoko xinikakari, tsakati potxoari uinitikiri atoko itxa. Itima anikari tsakati itano, eereka ixitika. Käkiti ikara atoko inakari, äti öti auikari Teoso säkire, äti öti kona auikari Teoso säkire. Itxaäpota. ⁷ Käkiti ikara atoko inakari kona xatiki apakapari Apiananiri siäkiti, ⁸ kotxi ipi ixinikakiti aua, ininiä apanakini !auikari isäkire ikamakiti tikane.

Matiiti, Katiiri Pakini Poxokoniuatini

⁹ Pite aitari Teoso säkire auiañkari, atxiiti poiäori pitxaua, iuaritika pipoxokoniuatako, kotxi Teoso txikitakai pite apiari pininiua. ¹⁰ Pite katiirii, pipoxokoniuatako, kotxi Teoso kamapoiäotakai pite, kotxi katimari xipokini aäui katimari xipokini atoko. ¹¹ Atokatxi kanikasaaki, kapatakari itxaua. Iuasaaki katsotati txiaroka. Iiui katxaka. !Erekaikaro. Iua atokokana käkiti katiiri xipokini. Pañtiki ipinako, ininiä itakanapariko imakinika itii, iparika pakini.

Misirikaretxi Miteenekakani

¹² Teoso takari erekari käkitimoni imisiritiko miteenekakarimoni, Teoso säkire matakanaapatimoni. Ikinipoko imiteenekasaaki, Teoso txikitakari iua ätipirika auini Teosokata. Apiananiri sikaenetari ikara iua tirketanimoni.

¹³ Pinirekasaakiri maerekati pikamini, kona pitxapiri: "Teoso sikanireötano maerekati nikamini," kotxi Teoso

kamanireötiko maerekati ikamini ikapani !auari. Apaka kona Teoso sikanireötari käkiti maerekati ikamini ikapani. ¹⁴ Käkiti sikanireötaäka maerekati ikamini, kotxi iua ito nireëkiti kosekari iua maerekati ikamini. Iuasaaki iteene inirekari inireëkiti ikamini. ¹⁵ Maerekati pitto nireëkiti pikamakasaaki, maerekati itxaua. Ininiä eereka maerekati pikamapika. Eereka iua maerekati txikitakari pixinire ipinini.

¹⁶ Nitariakori nota tirketakini, kona häuiritapiri äti misirienetini. ¹⁷ Ikinipoko sikakori erekari atäo inakari, iaxitiki itxaua. Äri sikakiti ikara. Iuara kamari atokatxi, kasiri, iöriki pakini ponikini. Iua ätipirika kamari erekarinoka. Kita, uatxa, katana pakini, iua atokotxikana äri Teoso. ¹⁸ Aponaniä iuaikana äkixinireë, kotxi aäuikari iua säkire. Iua nirekari aponaniini ikara atoko. Teoso kamari ikinipoko. Ikamakini, merepanika iuaikana ponaniäkani, atxaua ate.

Teoso Säkire Kipitiko Pirena

¹⁹ Ininiä nitariakori nota tirketakini, iteene himixinikariko äti säkire. Eereka iteene hixinikariko hikenakotakiti, hixsäkirauatini apisapanika. Katima !hitxape hinaiatiniua. Hinaiatiniua apisa hixinikariko hikamakiti tikane, ²⁰ kotxi käkiti omanäkarauatakasaaki, !ikamari atäo inakari Teoso paniätakiti iaöka. ²¹ Ininiä hökariko ikinika maerekati häkixinire txikotakari. Hitakana-pariko ikinipoko maerekati. Häuikariko Teoso säkire häkixinireë takakori. Himarotariko iuanoka makatxakiniri himaerekani.

²² Teoso säkire akenakotakanani atxa, !hitxape. Hikamariko isäkire iaöka apaka. Teoso säkire kenakotakani makamakaniäri ipaniätakiti, ninoaka misirienetaua.

²³ Teoso säkire kenakotakari makamakaniäri isäkire iaöka, kiki ätakaäriä atamatoötakari atoko itxa. ²⁴ Iua itoö atamataka atoko, isa. Iuasaakipeka imaxinikaretoötapekua. Isanöka !ixinikaika. ²⁵ Ikinika Teoso paniätakiti erekari. Maerekati kamakani iaxirikakoni atoko. !Iposotarina erekari ikaminina. Ininiä käkiti kamakasaakiri Teoso paniätakiti, Teoso paniätakiti sikakari käkiti erekari ikamini ikapani. Käkiti iteene imarotiniäri Teoso paniätakiti, imamaxinikaretakaniäri, ätipirika ikaminiäri, ininiä Teoso takari erekari iuamoni, ikamakitimoni.

²⁶ Käkiti säpiretiniäri: "Nota auikari Teoso säkire. Nikamari iua säkire iaöka," txamari käkiti nini iauite atoko itxa. !Iposotari iotokakiniri maerekati isäpiretini. Iuaka misirienetaua. Iua auiañkiti na atäo. Ikamakiti na atäo apaka. ²⁷ Käkiti auiañkiti atäo inakari auakasaaki,

ikamakiti atão inakari auakasaaki, aĩri Teoso apokaerekatari. Iua kãkiti kamari ia atoko: Itiretana imenõkariakori, tikinitakoni pakini, kotxi mauareni nino. !Auiritari ikorapokoriti maerekati txikotiniri iua ãkixinire.

Hĩpaxitana Ikini Kãkiti

2 Nitariakori, Xesosi Kristo aũũite Apiananiri itxaua. Iua sãkire atão auiãkani hininiãua, ininiã hĩpaxitariko ikinimane kãkiti. !Apakata hĩpotxitakininani hĩtoretini. ² Maxinikariko. Atxĩiti hãpotiitakasaakia, kiki apoka eremãkari. Iuakokiã aneo oro kamakoro aua. Apaka iuasaaki apoka ãti kiki matiiti. Kitxakari imãka. ³ !Apakata hĩpaxitiniri eremãkarinoka. Hĩsãpiretiniãri: "Uai iitopanatxi ereri nopini piitopãka," pitxari. Txamari hĩsãpiretari matiiti: "Ikiraã pitima." Atxĩiti hĩsãpiretari iua: "Uai ixiti nikitaki takote piitopãka," pitxari. Ikara atoko hĩkaminiã, !apakata. ⁴ Ikara atoko hĩkamakasaa-ki, hĩxinikari katiiri apiaerekatini, matiiti poião ereka inini. Iuasaaki hĩxiniãkiti na atão itxaua. Hãkixinire maerekati itxaua.

⁵ Nitariakori nota tiretakini, hĩkenakotariko nisãkire. Teoso mereẽpekari matiini ikorapokoriti auakani isãkire iteene auikinina iƙapani. Ininiã nino Teoso tirketakani sariko Teoso auĩtetxi ininiãtaãua. Ikara isikaenetapeka iua tirketanimoni. ⁶ Txamari hĩte kona paxitana matiini. !Apakata. Katiirinira misirienetai hĩte. Nino anikai hĩte kãkiti misiritiko mereẽkanimoni. ⁷ Nino katiirini misãkirepiretari Teoso. Peerekari iua uãka, iuaritika nino kona paxitari iuãka. Nino misãkirepiretakiti nakitiakori hĩtxaua hĩte.

⁸ Kitxakapirĩka Teoso sãkire iõkatsopatakori txari: Piteka pitiretiniua atokokanera, pitiretanako pite takote auakani.

Ikara ikinimane auĩte paniãtakiti hĩkaminiã, hĩkamari atão inakari. ⁹ Hĩtoretiniãri hĩpotxitakininani, maerekati hĩkama. Ikara Teoso paniãtakiti oerekai maerekati kamakani hininiãua. ¹⁰ Ikinika Teoso paniãtakiti hĩkaminiã, txamari ãtinoka Teoso paniãtakiti himakamakaniã, ininiã ikinika ipaniãtakiti makamakani atoko hĩtxaua. ¹¹ Teoso txari:

Kona pisirĩkape pĩtanoro minakotokatika. Apaka itxari:

Kona pokaniuatape. Atxĩiti kona pisirĩka pĩtanoro minakotokatika, txamari pokaniuata, ininiãkara !pikamari ikinika Teoso paniãtakiti. ãtika Teoso paniãtakiti pimamakaniã, lapakata. Ikara atoko ininiã, Teosomoni maerekati kamakari pitxaua.

¹² Teoso sãkire iaõka akaminiã, aposotari erekari akamini. Opoĩkakoni atoko atxaua. Maerekati !imaĩkaikaua. Ininiãkara atão hĩsãkirauatako. Atão inakari hĩkamako, kotxi Teoso kamariko hĩtemoni isãkire iaõka. ¹³ Himaamonĩkakaniãri ãti, Teoso kona amonĩkai hĩte. Imereẽri himisiritiko. Apiaerekata hiamonĩkiniri ãti, maerekati ikamakasaaki. Poião erekari himisiritiniri iua imaerekani xika.

Kãkiti Sãkire, Kãkiti Kamakiti Pakini Pirena

¹⁴ Nitariakori, kãkiti txari: "Nota Teoso sãkire auiãkari nitxaua," itxamari, !ikamari Teoso nirekaãkiti. Atauako iua auikari Teoso sãkire? Atauako, iua sãkire posotari imaktxakiniri imaerekani Teosomoni isini iƙapani? Konapitini. ¹⁵ Atxĩiti hĩtari, atxĩiti hĩtaro Teoso sãkire auiãkani imãkana !auari. Atxĩiti nipokori !auari ninoamoni. ¹⁶ Iuasaaki atxĩiti hĩtxana: "Hĩsipiniikaua, erekaxinire hinini. Kamãkaiko. Itene hinikako," hĩtxana atxĩiti. Txamari iuasaaki mãkatxi !hĩsikana, nipokori !hĩsikana. Ikara atoko hĩkaminiã, !apakata hĩkamakiti. Hĩsãkirenanira hĩsikiniã, ininiã maxikatĩka hĩsãpiretakiti. ¹⁷ Atxĩiti ikara atoko atxa. Asãpiretari aũuikiniri Xesosi sãkire. Txamari kona akamari ipaniãtakiti. Ikara atoko aniniã, asãkire kona itxa. Aũuĩãkiti sãkiretxiti ipinakari atoko itxa. !Kakamareri iua.

¹⁸ Kãkiti atxĩiti txari: "Pite auikari Teoso sãkire. Nota parĩkauata Teoso iƙapani." Piposotari atxĩiti poerekinino pauĩãkiti, Teoso paniãtakiti pimamakamanisaaki? Kona piposota, kotxi atão pauĩãkiti !auari. Notapekana, nota posotari noerekini nisãkire nauĩãkiti nikamakitiã Teoso paniãtakiti nikamakasaaki. Ikara atoko nininiã, kãkiti imarotapitikari atão nauikiniri Xesosi sãkire. ¹⁹ Pite auikari ãtinani Teoso auini. Ininiã erekapitikari pauĩãkiti. Txamari ikara !imaktxakari pimaerekani Teosomoni pisini iƙapani, kotxi Satanas nitiriakori apaka auikari ãtinani Teoso auini. Iua xika nino titinana ipĩkarauatiniãna. Nino imarotari ãti õti ixipokinina.

²⁰ !Kiĩkitei pite. Pinirekatari noekinini !apakata pisãkireẽ pauikiniri Xesosi sãkire, iua paniãtakiti iaõka pimamakamanisaaki. Iuasaaki pisãkire na atão. Ipĩkari atoko itxa. ²¹ Maxinikariko ate apika atokirini, Apraão. Kitxakapirĩka isikasaakiri amarite Isaki inakori Teosomoni sikakori takikoãtaã, iuasaaki Teoso apokaerekatari ikamakiti, kotxi ikamakiti oerekari Teoso, iua auikiniri isãkire, ininiã Teoso kamaerekatari iua. ²² Ininiã himarotari atão iua auikiniri Teoso sãkire. Ikamakiti oerekari isãkire atão inini. Hĩxinikari iua. Atão ikamari Teoso paniãtakiti, ininiã atão iua auikari Teoso sãkire. ²³ Ininiã Teoso sãkire iõkatsopatakori apokapeka. Itxari:

Apraão auikari Teoso sãkire, ininiã Teoso txĩkitakari iua atão inakari ikamini, Teoso apakapiniri iƙapani. Ininiã iua akiritaãka Teoso moianari. ²⁴ Ininiãkara ia himarota. Teoso kamaerekatari kãkiti ãkixinire isãkire iaõka ikamakasaaki. Kona Teoso kamaerekatari kãkiti ãkixinire, isãkirenoka auakasaaki. Inirekari atamatiniri kãkiti parĩka apaka.

²⁵ ãto atão Teoso sãkire auiãkaro nisãpiretai hĩte. Kitxakapirĩka kanokarero Haapi inakoro aua. Teoso kamaerekatari oa ãkixinire, kotxi oa apakapana Xosoe iokanatakini otixine apokasaakina. Oaãpoko okipatana nino. Iuasaaki oa oerekana ãti kimaporiti imitekinina iƙapani.

²⁶ Kãkiti iƙoã ixinire mauakanisaaki, iua ipĩpe. Iua !kakamareri. Ininiã iua atokokana iua sãkire iua auiãki-

ti ipinakari atoko, erekari imakamakanisaaki. Iua auiäkitinani, isäkirenani, imakataxakari imaerekani.

Käkiti Nini Pirena

3 Nitariakori, lapakata itori hïte Teoso säkire oerekakani hininiua, kotxi ate Teoso säkire oerekakani maerekati akamakasaaki, apiata Teoso misiritaua ate. ² Amakinika ate kerokapanikari. Käkiti makerokakaniäri isäkire, ininiä erekari iua. !Auiritari iïto kaminiri maerekati.

³ Anirekasaakiri kavaro kïpinitiri anireëkiti, atakari inamaä metaoke ipiriäketakari. Ininiä iusaaki ikamariko anireëkiti. Ia metaoke axapitikeri, iuaritika aposotari akakiriokiniri kavaro, ininiä isari anirekinimoni.

⁴ Apaka hïxinikaroko maporo. Maporo mitaro. Itima kataparari anikaro. Maporo oerekakire axapitiki, iuaritika käkiti kakiriokaro maporo oerekakireë, ininiä maporo sari käkiti nirekinimoni.

⁵ Iua atokokana, aïtoä auakari anini apaka axapitiki, iuaritika iposotari iteene maerekati ikamini. Hïxinikariko. Xaminaminiki axapitiki, iuaritika iposotari iotikiniri itori kikio. ⁶ Iua atokokana ninitxi. Xamina tirinakari atoko itxa, ininiä kona erekari. Maerekati ninitxi säpiretakiti. Iarika käkiti xinireë ikinika, xamina itopa iarikini atoko. Ininiä iua maerekatnoka itxa, ininiä ikinipoko ikamakiti maerekatnoka. Maerekani misiritikoätaä ïkari itxa asäkire maerekati. Xamina tirinakari iuaätaäkiri atoko itxa asäkire maerekati.

⁷ Käkiti piratari ikini sereti kaxipiri itopakiri, kotipiriki, imini, iaä auakari pakini. Itori käkiti piratapeka. ⁸ Txamari ninitxi paneenamari. Käkiti !iposotari imïkapiritiniri inini. Kona ikamari anireëkiti. Imini katsiiri atoko itxa. Imini tsii posotari okiniri käkiti. Iua atokokana, käkiti säpiretakiti posotari okiniri käkiti.

⁹ Anini posotari isäpiretiniri erekari aïri aäuïtemoni. Apaka iposotari maerekati isäpiretini käkitimoni. Itora atoko !erekari, kotxi Teoso kamari käkiti iuaka atoko inakari ikapani. ¹⁰ Anamaä potorika erekari, maerekati pakini. Nitariakori, ia koketakori na atäo. !Apakata.

¹¹ Amomo !oposotari äparaä ponikoäri, posiäri pakini otxïkitakini. ¹² Nitariakori, atauako mäka mina iritari iöpetä? Atauako iöpetä mina iritari mäka? Konapitini. Apaka amomo äparaä ponikoäri !uari äparaä maxiäri pakini. Iua atokokana käkiti säkire. !Apakata käkiti äti öti isäkire ereka inini, äti öti isäkire maerekati inini.

Imaroretxi Pirena

¹³ Kiripa kimaroreri hïte sauaki auakari? Käkiti atäo kimaroreri inakari, oerekari imarore ikamakiti erekari ikamakasaaki. Erekari ikamakasaaki, !iukaua, kotxi atäo imaroretxi auiniä käkitimoni, !auiritari iua iuikiniua. ¹⁴ Txamari pinïkatiniäri xikoretxi papixiri päkixinireë, piteka nireëkitinani pinirekiniä päkixinireë, kona pitxape: "Kimaroreno nota." Iusaaki kona pikipatapiri atäo inakari. ¹⁵ Itora pimarore !iaxitikirini. Itkorapokoritikirinokara ikara pimarore. Ikara pimarore piïto

nireëkitikara. Imaroretxi ikara atoko inakari Satanasi oerekakiti. ¹⁶ Xikoretxi auakasaaki, piteka nireëkitinani pinirekini auakasaaki, ikara atoko inakasaaki, neenamtxinoka aua, ikini sereti maerekati aua apaka.

¹⁷ Imaroretxi iaxiti itkari kona ikara atokoni itxa. Iua imaroretxi imarotakari, erekarinoka ikama. !Inirekari neenamtxi. Merepitipanika ixinikari apanakini käkiti nireëkiti. Apiananiri nireëkiti ikama. Iamonïkari äti. Erekarinoka ikama ätimoni. Apiarimoni isäkire atokotxikana isäkire poiäorimoni. Ikamakiti isäkire iaöka itxa. ¹⁸ Kauärreri ötäkikari apanakini imaneenamauatakani, ininiäkara itori käkiti kamari atäo inakarinoka.

Itkorapokoriti Auakani Nireëkiti !Hinirekape

4 Neenamtxi auakasaaki hïtemoni, hïxtitakakasaakiaua, näpa ikara atoko inakari potorika? Häkixinireë ipotorika neenamtxi. Hinireëkiti maerekati xika hineenamauata. ² Hinireëkiti kona häpakapa, ininiä hökari äti. Iteene hinirekari äti nakiti, txamari !häpakapari hinireëkiti. Hïxtitakakaua. Hineneenamauata. Txamari kona häpakapari hinireëkiti. Kona hamanaäri Teoso hinireëkiti häpakapini itkapani. Ikara xika kona häpakapari hinireëkiti. ³ Atxïiti Teoso hamanaäkasaaki, kona häpakapari hinirekakiti, kotxi hamanaäkasaaki, maerekati hïxinikapanika. Hinirekari häpakapiniri hamanaäkiti hïtenani itkapani, hïtenoka poxokoniuatini itkapani. Ikara xika Teoso !isikai hinireëkiti.

⁴ Kanokarero, kanokareri pakini atoko hïtxaua. Hïte takanapari Teoso, itkorapokoriti auakaninoka hïtoretini itkapani. Hïtoretiniäri itkorapokoritinoka, iusaaki homanatarari Teoso. Hinirekiniäri itkorapokoriti auakani nireëkiti, ininiä Teoso mokaiakari hïtxaua. ⁵ Kona maxikatiïka Teoso säkire iökatsopatakori säpiretaua ia atoko inakari:

Erekari Matamatakoti aäkixinireë auakari nirekari iteene anirekiniri Teoso taretiniua. Iua !inirekari anirekiniri itkorapokoriti auakaninoka taretiniua.

⁶ Teoso sikari iteene erekari atemoni, kotxi Teoso säkire iökatsopatakori txari:

Teoso !apokaerekatarari käkiti iuikakaniua.

!Imoianatana ninoa. Käkiti miuikakaniua, ikinipoko erekari isika ninoamoni.

⁷ Ininiä häuiritariko Teoso hïäuïte ininiua. Iua nireëkitinoka hïkamako. Kona hïkamapiri Satanasi nireëkiti. Kona hïkïpitapiri iua säkire, ininiä eereka iua miteka.

⁸ Teosomoni häpokako, ininiä iua apoka hïtemoni.

Maerekati kamakani hininiäua, hïtakanapariko hi-maerekani. Kona häuiritapiri hïuako kaminiri

maerekati. Hïtepekana, hïte säkire ipinimoni itxa. Häkixinire xinikakiti ipinimoni itxa. Ininiäkara

hïokanatariko maerekati häkixinire auakari, erekarinoka kaikotini itkapani. ⁹ Himatinaniuatako, hïtxiapatako iteene, maerekati hïkamakiti xika. Hïtakanapariko

hïsiroatini hïtxiapatini itkapani. Hïtakanapariko hïpoxokoniuatini himatinaniuatini itkapani. Ikara atoko hïkamako, maerekati hïkamakiti xika. ¹⁰ Apiananirimoni

hïtxariko: "Nimaerekani xika !erekano nota. Minakati

nitxaua. !Niposotari erekari nikamini. Piamonikano," hĩtxariko Teoso. Eereka iua sikataparaxiniretai hĩte.

!Himisäkirepiretapiri Hĩtari

¹¹ Nitariakori, !himisäkirepiretakakapeua. Āti misäkirepiretiniāri āti, kona ipaxitari Teoso paniātakiti. Āti akiritiniāri āti: "Maerekati kamakarii," akiritari Teoso paniātakiti: "maerekati." Ikara atoko inakasaaki, iuamoni iuaka sākire apiata, ininiā iua !ikamari Teoso paniātakiti iaōka. ¹² Teosonokara atāo inakari imarotakari aua. Iuanoka posotari isāpiretiniri kākiti: "Pite kamakiti kona erekari. Pitepekana kamakiti erekari." Iuanoka posotari ikara atoko ininii, kotxi iuanoka posotari kākiti maerekani imaktxakini. Iuanoka posotari iokanatiniri kākiti imisiritikomoni. !Apakata ikara atoko hĩte ininiri apanakini.

Katana Kamaenetakori

¹³ Atxiĩti hĩte txari: "Atxiĩti uatxa, atxiĩti katana asa sitatximoni. Anapariko ātikanani iuaātaā. Aparĩkauata itomane txineiro aāpakapini ĩkapani," hĩtxama. ¹⁴ Txamari kona himarotari katana auakari tĩkane. Kanatokopa itxa kākiti? Ianiĩ atoko itxa kākiti. Ianiĩ apoka, eereka patimari ixipokini. Ikara atoko kākiti auini. ¹⁵ Api-aerekata hĩsākire ia atoko hinini: "Teoso nirekiniāri, nauapanika ninakasaaki, nikamariko ikara parĩkatxi," hĩtxako. ¹⁶ Ikara atoko himasākirauatakaniā, hĩuikaua, kotxi hĩuikari hĩkamakiti tĩkane. Maerekati ikara atoko inakari. ¹⁷ Ininiā erepaniko. Kākiti erekari imarotakani makamakaniāri ikara erekari imarotakiti, ikamari maerekati.

Katiiri Pirena

⁵ Hĩkenakotariko nisākire. Ikinika katiirini kapotxinanirini hĩkenakotariko nisākire. Hĩtxiapatako. Hākiripoatako, kotxi itori hātatsiire apokako hĩtemoni. ² Hĩtii paiakapeka. Kapite nikapekari himāka. ³ Hinakiti oro kamakori, pirata kamakori pakini oereēkatapeka. Ikara oerekari hĩkamakiti !apakata. Hĩtii xipokini atoko, hĩte apaka xipokako. Apiata himisiritiko. Maxikatĩka hāpotiitari hĩtii, kotxi itixi xipokini ōti apokanapanoka. ⁴ Himarotariko ia. Kākiti hĩte kikioteē parĩkauatakasaa-ki, himisirienetana ninoa. Na atāo hĩkitxitana iparĩkana ĩki. Ininiā ninoa akiritari Teoso. Iuasaaki Api-ananiri kaposotiireri kenakotari ninoa sākire. ⁵ ĩkorapokoriti hāuakasaaki, ikinipoko aua hĩtemoni. Hi-amotari ikinika hĩito potxitakiti. Kākiti sikari kema auĩte ito kienatxi, okiko ōti manapi pāĩperi inini ĩkapani. ⁶ Hĩte iokanatapekari kākiti erekarini ipininimoni. Hōkapekana ninoa maxikatĩka. Ninoani kona naiatai hĩte, iuaritika hōkana ninoani.

Apiananiri Kanapiriini Hiātapini

⁷ Nitariakori, atxiĩti hĩtemoni !katimari Apiananiri kanapiriini, iuaritika hiātapariko hĩpoxokoniritika, kotxi

himarotapitikari āti ōti iua kanapiriini. Hĩxinikariko katakareri. Iua iātapapikari itakare aneini, ikiena iposope inikini ĩkapani. Iātapari āparaā kipini itakare aneini ĩkapani. Iua imarotapitikari ikiena aneini, ininiā iātapari. ⁸ Iua atokokana hiātapariko Apiananiri kanapiriini. Hĩtaparaxinireritika hiātapari, kotxi Xesosi kaiamapeka ikanapiriini. ⁹ Nitariakori, kona hĩtxitakakapeua. Hĩtxitakakiniāua, hāpakapariko himisiritiko. Kākiti misiritiko mereēkari kaiamapeka apokini hĩtemoni.

¹⁰ Nitariakori, hĩxinikariko Teoso sākire sāpiretakani, kitxakapirĩka auakani, sāpiretari Teoso sākire Teoso posotiireē. Ninoa misiritaāka, iuaritika ninoa mĩteenekari imakinika. Ninoa oerekaua amĩteenekiniri imakinika. ¹¹ Ari, aimarotari Teoso takari erekari misirikaretxi mĩteeneēkanimoni. Hĩxinikari Xo inakori. Iua iteene atatsiirauata, iuaritika, !itapanari Teoso. Atatsiirauataka atoko, Apiananiri sikari ikini sereti erekari iuamoni, kotxi katiraōkiri, kaamonĩkareri itxaua iua.

¹² Nitariakori, "Ari," hinakasaaki, "Kona," hinakasaaki, kona maxikatĩka hĩsākirauatape. Hĩkamariko hĩsāpiretakiti iaōka. Hĩkamaenetakiti hĩsāpiretakasaaki, kona hākiritapiri Teoso tixine auakani uāka, kona hākiritapiri itixi auakani uāka, hĩsāpiretakiti apanakini atāo imarotini ĩkapani. Na atāo hĩsākire ininiā, Teoso misiritapitikai.

Teoso Misākiretiko Kākiti ĩkapani

¹³ Hātatsiirauatakasaaki, himisākiretariko Teoso. Hĩpoxokiniuatakasaaki, hĩxikarauata Teoso ĩkapani. ¹⁴ Āti amianatakasaaki, hĩpĩkapiretanako kōtākikarerini Xesosi sākire auĩkani Teoso imisākiretinina amianatakari ĩkapani. Iuasaaki itakarina ĩtxi iua amianatakari nopini Apiananiri uāka. ¹⁵ Hāuikiniāri Teoso posotiire himisākiretakasaakiri Teoso, iua makananitatipitikari iua amianatakari. Ininiā Apiananiri ōkitikariko iua. Maerekati ikaminiā, Teoso makatxakari imaerekani apaka. ¹⁶ Ininiā hĩkerokakiti hĩsāpiretakakauako. Himisākiretariko Teoso āti ĩkapani. Ininiā apanakini misākiretariko Teoso hĩte ĩkapani. Iua atokokana, Teoso txĩkitakari hākixinire ereka inini. Atāo inakarinoka kamakari sākire kataparari, Teosokata isākirauatakasaaki, kotxi Teoso kamapitikari iua amanaākiti iaōka.

¹⁷ Kitxakapirĩka Erĩasi inakori, ate atoko inakari iua. Iua misākiretari Teoso itapararitika āparaā makipakani ĩkapani. Ikara atoko inakasaaki, āparaā ĩkipa ipi āti pakini anokanani, seisi kasiriti. ¹⁸ Iuaĩkana imisākiretari Teoso āparaā iuaĩkana ikipini ĩkapani. Ininiā āparaā kipa. Iuaĩkana itixi iriuata.

¹⁹ Nitariakori, āti takanapiniāri atāo inakari Teoso sākire, hōtākikariko iua Teosomoni ikanapiriini ĩkapani. ²⁰ Maerekati kamakari takanapiniāri imaerekani, iua pōtākikasaaki, ininiā pite makatxakapekari iua ipinini. Teoso makatxakari ikinipoko maerekati ikamakiti.

1 Petro

1 Petro nitxaua nota. Xesosi Kristo iokanatakiti nitxaua. Niokanatsopata hīte Xesosi sākire auīākani-moni. Hīte iarikape Pōto tixiniā, Karásia tixiniā, Kapatósia tixiniā, Ásia tixiniā, Pitxínia tixiniā pakini. Hītakanapari hīteka tixine Xesosi sākire hāuikini xika. Āti uākakata hāuanāta.

² Aīri Teoso mereēi hīte iua nakitiakori hininiua īkapani. Itixi kamiko apisa, iua imarotapekari hīte iua anaakori hininiua. Erekarī Matamatakoti parīkauata hāixinireē Teoso nireēkitinoka hīkamini īkapani. Ininiā uatxa hīposotiire aua Xesosi Kristo paniātakiti hīkamini īkapani, kotxi Xesosi Kristo arēka xikepoata hīte īkapani. Teoso sikari ikinipoko erekari hītemoni. Itori isikai. Iteene ikamaerekaxiniretai.

Kākiti Maerekani Makatxakiko

³ Mamisākiretari Teoso: “Peerekai pite. Aāuīte Xesosi Kristo Teosone pitxaua. Iua iri pitxaua,” matxari. Maerekati kamakaniua, iuaritika iteene iamoniākaua. Itxīkitakari axinire iuaīkana iponaniini, kotxi Xesosi Kristo ipina, iuaritika iuaīkana ōkitikaua. Ininiā ikiniōtika aimarotari Teoso kaminiri ikinipoko ikamaenetakiti. ⁴ Iuaīkana axinire iponaniā, ininiā iua anaakori atxaua. Ininiā aīri potetakiti erekari aua itixineē aāpakapini īkapani. Ikara ipotetakiti !ixipoka. !Oerēkata. Auapika. Teoso nīkatari ikara hīte īkapani.

⁵ Hīte auikari Teoso sākire, ininiā iposotiire toka-pakeētai hīte. Hīte itokapakeētinititika Xesosi kanapiriāko xipokatxi ōtisaaki. ⁶ Ikara himarota, ininiā iteene hīpoxokoniuata. Uatxa atxīti !erekaxinirei hīte, kotxi ikini sereti maerekati apoka hītemoni. ⁷ Ikini sereti himaxikiko apoka hītemoni, kotxi iuasaaki Teoso imarotari atāo hāuikiniri iua sākire, himīteenekiniāri himaxikiko. Iuasaaki Teoso ataerekatai hīte, oro ataerekatiko atokokana. Kākiti axitaro oro otxiko makatxakiko īkapani, oronoka kaikotini īkapani. Iuasaaki peerekaro. Pakaronero. Iuaritika āti ōti oxipokaākakako. Erekaro oro, iuaritika apiaerekata hāuikiniri Teoso sākire, kotxi isākire hāuikini !ixipoka. Xesosi Kristo kanapiriākasaaki īkorapokoriti, Teoso sāpiretaiko hīte: “Erekarī hāuikiniri nisākire, kotxi himīteenekari ikinipoko. Peerekai hīte,” itxaiko hīte. Iuasaaki hīto iotximere auape Xesosi iotximere atokokana.

⁸ Hīte kona aōkitapanikari Teoso, iuaritika hītiretari iua. Kona hātamatanapanikari, iuaritika hāuikari iua sākire. Ininiā hīte iteene poxokoniuata. Kākiti sākireē lapakata hīsāpiretiniri hīpoxokoni. ⁹ Hīpoxokoniuata,

kotxi himaerekani makatxakaākapeka. Ininiā hīxinire !ipinaika, kotxi hāuikari Xesosi sākire.

¹⁰ Kitxakapiriāka Teoso sākire sāpiretakani nirekamari imarotininirina kākiti maerekani makatxakiko. Initarina ikara imarotininina Teoso sākire iōkatsopatakoriā. Iteene apaiaōkarauatana ikara imarotininina īkapani. Nino sāpiretari ikara erekari, Teoso āti ōti sikiniri kākiti. ¹¹ Inirekarina imarotininirina ikara erekari apokini ōti. “Kisaakipa apoka atxīti? Natokopa itxa apokini?” itxanātana. Iuasaaki Erekarī Matamatakoti oerekana nino āixinireēna Kristo atatsiirauatini tīkane. Oerekana nino Kristo atatsiirauatini xipoka atoko, ikinimane auīte itxauako. Peerekari iuasaaki. ¹² Kitxakapiriāka Teoso sāpiretari ikamakiti tīkane isākire sāpiretakanimoni, kona ninoanoka imarotini īkapanini. Nino sāpiretari Teoso kamakiti tīkane hīte īkapani, kotxi uatxa apokapeka nino sākire iaōka. Kitxakapiriāka Teoso sāpiretari ikamakiti tīkane ninoamoni, ate uatxa imarotini īkapani. Teoso iokanapirena erekari sāpiretakani sāpiretapekai uatxa ikara Teoso sāpiretakiti kitxakapiriāka. Teoso paniātari Erekarī Matamatakoti posotiireē nino sāpiretari Teoso iokanapirena erekari. Teoso nitiriakori iaxitiki iteene nirekamari imarotininirina hīte imarotakiti.

Ereka Hītxako

¹³ Ininiā iposope hītxako hīxinikiniri atāo inakari hīkamini. !hīkamapiri maerekati hīto nireēkiti. Iteene hāuikariko hāpakapiniri ikinipoko erekari Teoso sikakiti Xesosi Kristo kanapiriākasaaki. ¹⁴ Amarini kaminiri iri paniātakiti atokotxikana, hīkamariko Teoso paniātakiti. Xesosi sākire himimarotakanisaaki, hīkamari maerekati hinireēkiti. Uatxa !hīkamapinikariko. ¹⁵ Hīte akiritakari kamari erekarinoka, ininiā iua atokokana erekarinoka hīkama ikiniōtika. ¹⁶ Teoso sākire iōkatsopatakori txari:

Erekarinoka hīkamako, kotxi nota kamari erekarinoka, itxa Teoso kitxakapiriāka.

¹⁷ Himisākiretari hīri iaxiti auakari. Atāonoka ikaminana ikinimane kākiti iparīkana atamatakasaaki. Ininiā kākiti kamakasaakiri maerekati, aīri misiritiniri āti atokotxikana, imisiritari āti. Himitekini !auari. Hīxinikariko, haāpoko atāo inakari īkorapokoriti !auari. Teoso tixineē aua haāpoko. Ininiā īkorapokoriti hāuakasaaki, iteene hīpaxitariko Teoso. Hīpīkariko iua manirekakiniti hīkamini. ¹⁸ Mitxi !apakata hāuini, kotxi

iuasaaki hīkamari hātokiriakorini sākire iaōka. Uatxa Xesosi oerekai ātiāo hāuini, kotxi iamotai hīte, iua nakitiakori hininiua īkapani. Himarotari iamotini. !Iamotai pirataā. !Iamotai oroā. !Iamotai txineiroā, kotxi pirata, oro, txineiro pakini xipokako. ¹⁹ Kristo arēkaā iamotai hīte, kotxi ipīkasaaki iamotai hīte. Peerekari iua arēka, kotxi iua arēka makatxakari amaerekani. Soti auīte erekari atoko itxa Kristo. Kona maerekati aua iuamoni. ²⁰ Itixi kamiko apisa, Teoso mereēri iua. Iua apoka uai himaerekani imakatxakini īkapani. ²¹ Xesosi txīkitakai hīte auikiniri Teoso auini, kotxi Teoso iuaīkana ōkitikari Xesosi ipīkani sauaki. Iuasaaki isāpiretari Xesosi ikinika ikamakiti ereka inini. Ikara atoko ininiā, hāuikari Teoso sākire. Himarotari isākire iaōka ikamini. ²² Erekari Matamatakoti oerekapekai atāo inakari, ininiā uatxa hīkamari atāo inakari. Ikara atoko ininiā, hākixinire erekari. Ininiākara atāo hītiretari hītariakori. Ininiā iteene hītiretakauako hākixinireē.

²³ Hīte xinire iuaīkana iponaniāpeka. Teoso sākireē hīxinire iponaniā iuaīkana. Teoso sākire auapika. !Ixipoka. Ininiā iua anaakori hītixaua. Hīri īkorapokoriti auakani xipoka. Hīri iaxiti auakari !ixipoka, ininiā hīte iua anaakori !ixipoka apaka. ²⁴ Teoso sākire iōkatsopatakori txari:

Kākiti katsotati atoko itxa. Katsotati paītiki ipinini. Iua atokokana patimari kākiti ipina. Ikinika erekari ikamakiti, aāui atoko itxa. Aāui patimari ipinini. Iua atokokana patimari kākiti kamakiti xipokini.

²⁵ Iuaritika Teoso sākire auapika. !Kaxiporeri, itxa Teoso sākire iōkatsopatakori. Teoso sākirepitikara sāpiretaākapeka hītemoni, hīkenakotakasaakiri Teoso iokanapirena erekari.

2 Ininiākara hītakanapariko ikinipoko maerekati hīkamakiti. !Himisirienetapiri āti. Hīkamari hīsākire iaōka. !Hīxikotapiri āti. !Himisākirepiretapiri āti. Ikinini sereti maerekati kākiti kamakiti hītakanapako.

² Hinirekariko Teoso sākire makoketakoti. Tinitxiā imi axapitiri nirekini atokokana, hinirekariko Teoso sākire. Teoso sākire hāpakapakasaaki, himaroāpotari iua, ininiā apiaāpota hāuikiniri iua sākire. ³ Kotxi uatxa himarotapekari Apiananiri ereka inini.

Kai Atoko Itxa Xesosi

⁴ Ininiā hīsako Xesosimoni, kotxi auapika inakari itxaua. Kai aapokotxi kamakari manirekakinini atoko itxa Xesosi. Kākiti !inirekari iua. Iuaritika Teoso mereēri iua. Teoso tirketakiti itxaua Xesosi. ⁵ Hīte apaka kai atoko hītixaua Teoso aapoko īkapani. Itxīkitakari hīxinire auāki inini, kotxi iua nakitiakori hītixaua. Ininiā, Teoso aapoko atoko hītixaua. Ininiā iua aapoko āki sasetotxi hītixaua, iua īkapani hīparīkauatini. Ininiā hīsikariko iua amanaākiti, iua nireēkiti. Iua apakapariko hīsikakiti, kotxi Xesosi Kristo makatxakapekari himaerekani. ⁶ Teoso sākire iōkatsopatakori txari:

Hātamata. Nitakari kai Siāo sitatxitiā. Iua kai apiari, Teoso mereēkiti. Apiaerekata iua. Iua kai atoko inakari sākire auīākani lipētauata,

itxa Teoso sākire.

⁷ Iua kai atoko inakari itxaua Xesosi. Peerekari Xesosi hītemoni, kotxi hīte auikari iua sākire. Āti iua atoko inakari !auari. Txamari isākire makīpitakani !inirekari iua. Teoso sākire iōkatsopatakori txari:

Aiko kamakani txari: “!Apakata ia kai. !Anirekari.” Iuaritika iua kai apiari. Itakaāka aiko kamikosaaki, apanakini kai soro maīkakari ininiua īkapani.

⁸ Iuaīkana Teoso sākire iōkatsopatakori txari:

Iua kai xika kākiti mākitita. Iua kai xika kākiti irika, itxa Teoso sākire. Imākititana, kotxi !auikarina Teoso sākire. Teoso txīkitakana ninoa irikini, kotxi !auikarina iua sākire.

⁹ Hītepekana, Teoso mereēkini hītixaua. Sasetotxi hītixaua. Hīparīkauata Apiananiri īkapani. Hīte makatxakaāka maerekani sauaki erekarinoka hīkamini īkapani. Teoso nakitiakori hītixaua. Imereēi hīte iua ereka inini kākiti hōerekini īkapani, kotxi ipiā hāuakasaaki, iua akiritai hīte ipiaā hītakanapini īkapani. Itakai ikamaraā atāo inakari himarotini īkapani. Peerekari iua kamara. ¹⁰ Mitxi Teoso nakitiakori !hītixaua. Uatxa Teoso nakitiakori hītixapekua. Mitxi Teoso !amonīkapanikai. Uatxa Teoso amonīkapekai.

Teoso Nitiriakori Iamotakoni Pirena

¹¹ Nitiretakini, uai itixi hāuakasaaki, āti tixinikini atoko hītixaua. Atāo hāapoko Teoso tixine aua. Īkorasaaki hīsaāpota hāapokomoni. Ininiā ikini nixinireritika nōtākikai hīte himakamaniri maerekati hīto nireēkiti. Hīto nireēkiti hīxinire mokaiakari atoko itxa. Hīto !inirekari hīxinire nireēkiti. ¹² Teoso sākire mauīākani sauaki hāuakasaaki, ikiniōtika erekarinoka hīkamako. Atxiīti ninoa maxikatīka apoītai maerekati hīkamini, iuaritika iuasaaki ninoa imarotari erekarinoka hīkamini. Ininiā Teoso ketotini ōti manapi iua oerekariko atāo inakari ninoamoni. Ininiā iuasaaki ixinikarinako erekari hīkamakiti. Ininiā itxarinako Teoso: “Peerekai pite,” itxana.

Hīkamari Hīauīte Paniātakiti

¹³ Hīkamari kākiti auītetakinini paniātakiti, kotxi Apiananiri nirekari ikara atoko hīkamini. Ikinimane hīauīteakori paniātakiti hīkamako. Hīauīte apiari paniātakiti hīkamako. ¹⁴ Hīauīte poiāori paniātakiti apaka hīkamako, kotxi hīauīte apiari paniātana hīauīte poiāorini maerekati kamakani imisirinina īkapani. Ipaniātana ninoa isāpiretinina erekari kamakani: “Erekapitikari hīkamakiti.” ¹⁵ Teoso nirekari hīkamini erekari, ininiā iuasaaki mīlkiteni !iposotari imisākirepiretinini hīte. !Kasākirena iuasaaki, kotxi apanakini imarotari erekarinoka hīkamini. ¹⁶ Hīposotari ikinipoko hinireēkiti hīkamini, kotxi Teoso sikakai hīte. Iuaritika kona hinirekapiri maerekati hīkamini. Teoso nitiriakori hītixaua, ininiā iua paniātakininoka hīkamako. ¹⁷ Hīpaxitariko ikinimane. Hītiretanako ikini mane aītariakori Teoso sākire auīākani. Hīpīkariko Teoso. Hīpaxitariko hīauīte apiari.

Hīkamariko Hīpatrāote Paniātakiti

¹⁸ Nitiritxiakori, hīkamariko hīpatrāote paniātakiti. Hīpaxitariko iua. Atxīiti iua tiretai. Atxīiti imisiritai. Iuaritika hīpaxitariko iua. ¹⁹ Erekapitikari himīteenekiniri kākiti misiritinii maxikatīka. Himīteenekiniāri, Teoso nireēkiti hīkamini īkapani, erekapitikari. ²⁰ Erekarī hīpatrāote misiritinii hīte, maerekati hīkamakasaaki. Iuasaaki himīteenekiniri himisiritiko kona txīkitakari Teoso apokaerekatini. Erekarī hīkamakasaaki, himīteenekiniāri himisiritiko, iuasaaki Teosomoni erekapitikai.

Kristo Misiritiko

²¹ Teoso akiritai hīte inakitiakori hininiua īkapani, himisiritiko himīteenekini īkapani. Kristo misiritaāka hīte īkapani, ininiā iua nirekarī amīteenekiniri amisiritiko iua misiritiko imīteenekini atokokana.

²² Maerekati !ikama. !Imisirienetari āti.

²³ Ninoa misākirepiretakasaakiri iua, !apakapaenetana. Imisiritakasaakirina iua, !itxitana. !Isāpiretana imisiritinina imaerekanina xika. Iua auikari iri nīkatiniri iua, kotxi atāonoka kamakari itxaua Teoso. Atāo imarotari kākiti kamakiti. ²⁴ Aamina īpiriāmitakari nopini Xesosi īto misiritaāka ate maerekani xika. Ipina ate īkapani, apikomoni maerekati akamini amanirekakani īkapani. Inirekarī anireēkiti maerekati ipīkari atoko inini. Itxīkitakari axinire auāki inini atāo inakarīnoka akamini īkapani. Xesosi karo txīkitakaua erekape anini. ²⁵ Xesosi himarotini apisapanika, soti auīte pīpinanakakani atoko hītxa. Uatxa hīkanapiriāpeka hīpitikirimoni. Hīxinire nīkatarimoni hāpokapeka uatxa.

Taniritxi, Tanorotxi Pakini Ōtākikiko Pirena

3 Nitiritxi kaminiri ipatrāote paniātakiti atokokana, hīte tanorotxi hīkamariko hītaniri nireēkiti. Atxīiti hītaniri !auikari Teoso sākire, ininiā erekarīnoka hīkamako. Atamatakasakirina erekarī hīkamakiti, ninoa auikari Teoso sākire. Hīkamakiti erekarī txīkitakana auikirinina Teoso sākire. Hīsākirenoka !itxīkitakana auikirinina. ² Maerekati himakamakanisaaki ikiniōtika, Teoso iteene hīpaxitiniā ikiniōtika, iuasaaki ninoa auikari Teoso sākire atāo inini.

³ Apanakini sito xinikapikari oiāko oōeretini, oro oītoā otakini, omāka ereri oieretakini, oīto ere inini īkapaninani oxinika. Sito erero !oxinikari ikaranani. ⁴ Sito erero oākixinire ereri apaka. Hākixinire ereri inakasaaki, ikara ereri !ixipokapani. Hākixinire ereri inakasaaki, !hītxitapiri hītaniri. Hīkamari iua nireēkiti. Teosomoni apiaerekata hākixinire ereri inini.

⁵ Kitxakapirīka sitoākini ererini, Teoso sākire auīkani, ikara atoko inakani. Ninoa ākixinire erekarī, kotxi ikīpitarina ītanirina sākire. ⁶ Sara inakoro kamari Apraō sākire iaōka. Oa kamari Apraō paniātakiti, kotxi oamoni oa auīte itxaua Apraō. Sara anaakoro atoko hītxaua atāonoka hīkaminiā, himapīkarauatakaniā.

⁷ Hīte taniritxi, iua atokokana hīxinikariko erekarī hīkaminana hītanoro. Hīpaxitaroko hītanoro, kotxi !katapararo. Oa apaka hītekata apakapariko Teoso sikakiti erekarī. Iua txīkitakai hāuapininiika hinini iuakata. Hītiretaroko hītanoro, ininiā Teoso kenakotariko himisākiretiniri iua.

Himisiritiko Pirena

⁸ Ia nisākire mapotōkire nisāpiretai. Hīxinikakiti ātika xinikakiti atoko hītxako. Hiamonīkakauako. Hītiretariko āti, hītari hītiretini atokotxikana. Hīkamariko erekarī ātimoni. !Hīuikapeua. ⁹ Āti kaminiāri maerekati hītemoni, !hīkamapiri maerekati iuamoni. Āti misākirepiretakasaakii, kona hīte misākirepiretapiri iua. Āti kaminiāri maerekati hītemoni, iuasaaki hamanaāri Teoso sikiniri erekarī iuamoni, kotxi Teoso paniātai ikara atoko inakari hīkamini, erekarī Teoso sikakiti hīte apaka apakapini īkapani. ¹⁰ Teoso sākire iōkatsopatakori txari:

Pinirekiniāri pauini ereka inini, pinirekiniāri ikiniōtika pipoxokoniatini, !pauiritapiri pisākire maerekati inini. !Pimisirienetapiri āti.

¹¹ Pinirekiniāri pauini ereka inini, pitakanapariko maerekati pikamini. Erekarīnoka pikamako. Pitakanapariko pineenamauatini. Pinirekariko kākiti auini ereka inini.

¹² Apiananiri nīkatari kākiti atāo inakari kamakani. Teoso imisākiretakasaakina, Teoso kenakotapitikari isākirena. Txamari Apiananiri misiritari maerekati kamakani, itxa Teoso sākire kitxakapirīka.

¹³ Erekarī hīkamakasaaki, kākiti !inirekarī imisiritinii.

¹⁴ Atāo inakari hīkamakasaaki, kākiti misiritiniāi, hāpakapariko erekarī Teoso sikakiti. Ininiā !hīpīkapena nino. Maerekaxiniretinoka !hītxape. ¹⁵ Hākixinireē hītxako: "Teosonoka niauīte. Apiananiri itxaua. Iua nireēkitinoka nikamako." Ikara atoko hītxako. Hāpaiaōkariko Teoso sākire, isākire iteene himarotini īkapani. Ininiā kākiti pimainiāi: "Kinirepa hāuikari Teoso sākire?" Iuasaaki himarotari hāpakapapiretiniri iua. Hāpakapapiretakasaakiri iua, !hītxitapiri. Hīpaxitariko iua iuasaaki. ¹⁶ Hīsākirauatakasaaki, !hīsāpiretapiri hākixinire manirekakiniti. Hinirekariko erekarī hākixinire nireēkiti hīkamini. Apanakini misākirepiretai. Ninoa atamatakasakiri erekarī hīkamakiti Kristo paniātakiti, ipētatarī imisākirepiretinii. ¹⁷ Teoso nirekiniāri hātatsirauatini erekarī hīkamini xika, ininiā erekarī, kotxi iuasaaki hīkamari erekarī. Txamari hātatsirauatiniā himaerekani hīkamini xika, !erekarī, kotxi iuasaaki hīkamari maerekati.

¹⁸ Xesosi Kristo ipina kākiti maerekani imaktxakini īkapani. Iuasaaki iposope imaktxakiniri kākiti maerekani. Iuaīkana latatsirauataika kākiti maerekani imaktxakini īkapani. Erekarīnoka kamakari ipīpe maerekati kamakani īkapani. Ipīpe, Teosomoni ate anikini īkapani. Iīto ipīpe, iuaritika Erekarī Mata-matakoti txīkitakari iua iuaīkana auāki inini. ¹⁹ Iuasaaki Erekarī Matamatakoti posotiireē isari ipīkani auiniātaā-

moni. Iuaã kateia äki ipíkani aua. Iuaã isäpiretana Teoso misiritinina ninoa, kotxi iuaka käiata. ²⁰ Kitxakapiríka ninoa ipíkani, auákipanika inakasaakina, !nirekarina Teoso paniätakiti ikaminina. Iuasaaki Noee kamanätari maporo. Teoso iätapana imaerekanina itakanapinina íkapani. Txamari !itakanaparina. Iuasaaki poiãonoka !ipina. Oitonoka !ipina, xirataãtxi apokasaaki. Teoso nîkatana ninoa imapinakani íkapani. ²¹ Ikara xirataãtxi hípatxisatiko atokokana. Hípatxisatiko oerekari kâkiti, Teoso makatxakapekai himapinakani íkapani. Hípatxisataãka hítoãkiri txiko makatxakiko íkapanini, kona maerekati híkamakiti makatxakiko íkapanini. Hípatxisatikosaaki, hítxari Teoso: “Nâkixinireë ninirekari nikaminiri ikinika pite nireëkiti iaõka,” hítxariko. Xesosi iuaíkana õkitikasaakua, imakatxakai himapinakani íkapani. ²² Iua kanapiriã Teoso tixinemoni. Uatxa iri kikomonu iitopãka. Iuaã Teoso nitiriakori, auítetxiakori, kaposotiirerini pakini auíte itxaua. Ninoa ikinika kamari Xesosi paniätakiti.

Híkamariko Ikinipoko Teoso Nireëkiti

4 Xesosi atatsiirauata iitoã híte íkapani. Ininiã hinirekariko Xesosi xinikakiti iaõka híkamini. Ikara atoko hinirekiniã, híxinikakiti sikataparitari hákixinire. Kâkiti atatsiirauatakasaaki iitoã, !nirekaikari maerekati ikamini. ² Ininiãkara íkorapokoriti auakasaaki, !nirekaikari maerekati iito nireëkiti ikamini. Ikamari Teoso nireëkiti iaõka ikiniõtika. ³ Mitxi maerekati híkamakiti iaõpe. Mitxi Teoso sâkire mauíãkani nireëkiti iaõka híkama. Ikini sereti maerekati híkama iuasaaki. Iuasaaki híkamari ikini sereti híto nireëkiti. Hinirekari äti kâkiti íto. Hípoãta. Ikinipoko maerekati híkama hípoãtakasaaki. Híkamaru kiiniri maerekati. Híteosonetari kâkiti kamakiti, Teoso mauiritakinini.

⁴ Ninoa Teoso sâkire mauíãkani txai: “Kinirepa kona hípotxitari ate kamakiti iaõka híkamini? Peerekari akamakiti,” itxaina. Ininiã ninoa nireëkiti iaõka himanirekakani xika, ninoa misâkirepiretai híte. ⁵ Txamari äti õti ninoa apakapapiretariko Teoso, kotxi Teoso iposope isäpiretiniri maerekati kamakani misiritiko. Isäpiretari kâkiti auákipanika inakani, apaka kâkiti mitxi ipíkani. ⁶ Ininiã Teoso iokanapirena erekari sâpiretaãkapeka kâkiti. Uatxa ninoa ipípe. Auákipanika inakasaaki, isäpiretaãka ninoamoni kâkiti misiritiko imaerekani xika. Isäpiretaãka ninoamoni kâkiti kaminiri Teoso nireëkiti äkixinireë ikiniõtika.

⁷ Imakinika xipokini õti imatokotapeka. Ininiã kona háuiritapiri híto kaminiri inireëkiti. Araõkire hítxako, ininiã híposotari himisâkiretiniri Teoso. ⁸ Iteene hítiretakakauako. Ia apiata Teoso nirekakiti. Iteene hítiretakakauako, kotxi iteene hítiretiniãri äti, poiãõ híxinikari maerekati ikamakiti. ⁹ Kâkiti apokasaaki háapoko, hípoxokoniritika hápakapanako. Kona hítsotape hákixinireë ninoa apokini xika. ¹⁰ Híkinika hápakapapekari imaroretxi Teoso paríka híkamini íkapani. Ikara Teoso sikakiti hítemoni. Ininiã ikara himaroreë híparíkauata apanakini íkapani. Iuasaaki Teoso nitiriakori erekarini hítxaua. Hísikariko ätimoni

ikini sereti erekari Teoso sikakiti. ¹¹ Hísâkireuatakasaaki, híspiretariko Teoso sâkire kâkitimoni. Himoiannatakasaakiri äti, himoiannatariko Teoso posotiireë, ininiã iuasaaki kâkiti txari Teoso: “Peerekai pite, kotxi Xesosi Kristo nakitiakori atxaua,” itxari Teoso. Ätipirika ikinimane txapikari Teoso: “Peerekai pite. Ikinipoko posotiiretxi aua pitemoni.” Ameë.

Xesosi Sâkire Auiãkani Misiritiko

¹² Nitiretakini, !hítikokape himisiritiko apokasaaki, kotxi ikara ataerekatai. Iteene himisiritãkako, kotxi ikara atoko inakari apokapitikako. ¹³ Iuasaaki hípoxokoniuatako, kotxi Xesosi atatsiirauatape, ininiã híte apaka atatsiirauatako. Xesosi kanapiriãkasaaki, peerekari iuasaaki. Híte atamatariko ikara, ininiã iuasaaki iteene hípoxokoniuata. ¹⁴ Kâkiti xinitakasaakii híte, Kristo nakitiakori hininiua xika, hípoxokoniuatako, kotxi iuasaaki himarotari Teoso aua hítekata. Himarotari Erekari Matamatakoti aua hákixinireë.

¹⁵ Kokaniri, kíitiriri, maerekati kamakari, aãpirena kamakari pakini !hítxapeuako. Ikara atoko inakari hininiãua, apakatapitika hátatsiirauatini, kotxi hátatsiirauata maerekati híkamini xika. ¹⁶ Iuaritika hátatsiirauatiniã Xesosi sâkire háuikini xika, ininiã iuasaaki erekapitikari. !Hípëtauatape. Hítxariko Teoso: “Peerekai pite, kotxi Xesosi nakiti nitxaua,” hítxako. ¹⁷ Apokapeka Teoso anaakori misiritiko õti. Merepanika Teoso misiritari iua anaakori imaerekanina xika. Teoso misiritiniãua ate isâkire auiãkani amaerekani xika, ininiã Teoso iokanapirena erekari manirekakani mitekini !uari. Iteene imisiritana ninoa. ¹⁸ Kitxakapiríka Teoso sâkire iõkatsopatakori txari:

Pamimari atão inakari kamakani sini Teoso tixinemoni. Ininiãkara Teoso manirekakani mitekini, maerekati kamakani mitekini !uari. Imisiritãkapanakanako, itxa Teoso sâkire. ¹⁹ Apanakini atatsiirauata, kotxi Teoso nirekari atatsiirauatini. Ikara atoko hátatsiirauatiniã, iuaritika erekari híkamapanikako. Háuikariko ikinipoko kamakari sâkire, kotxi iua kamari ikinipoko isâkire iaõka.

Kõtãkikarerini, Ätokoriakori Pakini

5 Kõtãkikareri nitxaua nota, ininiã nõtãkikai híte kõtãkikarerini. Nota atamatari Kristo misiritiko. Ikanapiriãkasaaki, natamatari iua iotximere ikinimane auíte inakasaakua. ² Ininiã nota õtãkikai híte. Hiníktanako Teoso sâkire auiãkani ereë. Soti auíteakori ipitikiri nîkatini atokokana, hiníkatana. Hísâpiretanako Teoso sâkire, kotxi ikara sikakienatari ninoa äkixinire. Teoso sikana ninoa hítemoni hiníkatinina íkapani. Atão hinirekariko hiníkatinina ninoa. Kona hítxape hákixinireë: “!Ninirekari niníkatinina ninoa, iuaritika niníkatana, kotxi ikara niparíka.” Kona híxinikapiri ikara atoko inakari. !Híparíkauatape txineiro hápakapini íkapani. Híparíkauatako apanakini himoiannatinini íkapani. ³ Ninoa auíte atoko !hítxapeua. Teoso

sikana ninoa hītemoni hinīkatinina īkapani, soti auīteakori ipitikiri nīkatini atokokana, ininiā erekari hīkamako, hīte kamakiti iaōka ninoa kamini īkapani. ⁴Ininiā ipitikiri apiari apokasaaki, Xesosi apokasaaki, hāpakapariko hīparīka īki. Iuasaaki hāpakapariko saporīēta atoko inakari. Ikara Teoso sikakiti peerero, ininiā ikara apakapakani auapininiika. Atamatapikarina Teoso iotximere. Iuasaaki erekari hāpakapakiti !ixipoka.

⁵Hīte ātokoriakoripekana, hīkamariko aneēkani paniātakiti. Hīkinika, himoianatakakauako. !Hīuikapeua, kotxi Teoso sākire iōkatsopatakori txari:

Teoso iotokakari iuikakaniua kaminiri inireēkitina. Iua sikari ikinipoko erekari miuikakaniuamoni.

Itxa Teoso sākire. ⁶Ininiā hīteka poiāotakauako, kotxi Teosonoka kaposotiireri. Iketo manapī Teoso iuikai hīte, erekari hīkamakiti isāpiretiniri ikinimane.

⁷Maerekaxiniretinoka hinakasaaki, imakinika hi-maerekaxinire hīsāpiretariko iua. Hīsikariko hi-maerekaxinireni iuamoni, kotxi iua tiretai.

⁸Kona hīkamapiri hīito nireēkiti. Araōkire hītxako, kotxi himokaiakari Satanasi inakori ākiti monōkori atoko itxa. Isaāpota initiniri ikiena. ⁹Satanasi apokasaaki hītemoni, iteene hāuikariko Teoso sākire. Iuasaaki hītaparaxinireritika hāuako. !Himitekape. !Hīkamapiri inireēkiti. Himarotari hītariakori ikini itixiti

auakani atatsiitiniri imisiritikona hīte atatsiirauatini atokotxikana. ¹⁰Hīte atatsiirauatako poiāonoka, eereka Teoso parīka hākixinireē iposope ikamini. Iua sikataparaxiniretai. Iteene hāuikari Teoso sākire iuasaaki. Satanasi !iposotari itxīkitakinii maerekati hīkamini iuasaaki. Teoso, ikinipoko erekari sikakari, kamari ikara atoko inakari hīte īkapani. Iua akiritai itixine hīsini, ātipirika hāuini īkapani, iua iotximere ātipirika hātamtini īkapani, kotxi Kristo Xesosi nakitiakori hītxaua. ¹¹Ātipirika ikinimane txari iua: “Peerekai pite.” Ātipirika ikinimane auīte itxaua. Ameē.

Petro Takapiretanapini

¹²Sīrasi moianatano ia niōkatsopatakiti axapitiri niōkatsopatini hīte īkapani. Iua aītari. Iua iteene auikari Xesosi sākire. Niōkatsopata hīte nisikataparaxiniretini īkapani. Ninirekari himarotiniri atāo asāpiretinii erekari Teoso sikakiti pirena. !Hītakanapapiriko erekari Teoso sikakiti hītemoni. ¹³Teoso nakitiakori, Papirónia sitatxiti auakani, xinikamanapitai hīte. Teoso mereēna ninoa hīte imereini atokotxikana. Marko, namarite atoko inakari, xinikamanapitai hīte apaka.

¹⁴Haōkitakakasaakiua, himaratakakauako, kotxi hītiretakakaua. Teoso kamaerekaxiniretai hīte Kristo Xesosi sākire auīākani. Ameē.

2 Petro

1 Nota Simão Petro nitxaua. Xesosi Kristo nitiri, iua iokanatakiti nitxaua. Niokanatsopata hītemoni, kotxi hīte auikari Xesosi Kristo sākire, ate auikiniri atokotxikana. Peerekari iua sākire aāuikini. Aāuikari iua sākire, kotxi atāonoka kamakari itxaua. ATeosone, amaerekani makatxakakari itxaua Xesosi Kristo.

² Himaroāpotakasaakina Teoso, aāuīte Xesosi pakini, hāpakapari ikinipoko erekari ninoa sikakiti. Itori hāpakapa. Ninoa iteene kamaerekaxiniretai hīte.

Erekari Akamini

³ Teoso posotiireē isikaua imakinika anireēkiti ūkopakoriti aāuini ūkapani, Teoso paniātakiti akamini ūkapani. Aāpakapari iua posotiire, iua aimarotakasaaki. Iua akiritaua iua nakitiakori aniniua ūkapani. Aāpoka iuamoni akiritakasaakiau, kotxi peerekari iua. Aāpoka iuamoni, kotxi erekarinoka ikama. ⁴ Ikara atoko ininiā, isikaua apia erekari isikaenetakiti. Isikaenetakiti anirekakiti apiari. Ikamaenetari ikamakiti erekari ikaminua. Teoso nirekari ikara atoko ikaminiāua, atāo inakarinnoka akamini ūkapani, atāo inakarinnoka Teoso kamini atokotxikana. Kristo sākire mauīākani nirekari maerekati iītona nireēkiti ikaminina. Hīte linirekaikari ninoa nireēkiti iaōka hīkamini, ininiā ikara maerekati linokai hīte.

⁵ Ininiā ikinika hākixinire taparaā hāuikariko Teoso sākire. Hāuikiniāri Teoso sākire, hīkamariko erekarinnoka. Erekarinnoka hīkaminiā, hinirekariko Teoso sākire iteene himarotini. ⁶ Iteene himarotiniāri Teoso sākire, hīito auīte hītxauako. Hīito auīte hininiāua, himīteenekariko himisiritiko. Himisiritiko himīteenekiniā, hīkamariko erekari Teoso kaminiri atokokana.

⁷ Hīkaminiāri erekari Teoso kaminiri atokokana, hītiretanako hītariakori, Teoso sākire auīākani. Hītariakori, Teoso sākire auīākani, hītiretiniā, hītiretari ikinimane.

⁸ Ikara atoko hininiā, ikara atoko apiaāpotiniā, aāuīte Xesosi Kristo himarotakasaaki, erekari hīparīka iua ūkapani. Iuasaaki makamareti atoko !hītxapeuako. Himinariko ito kākiti Kristomoni isākire auikinina ūkapani.

⁹ Ikara erekari mauakaniā hītemoni, mōsiāreni atoko hītxaua. !Himarotari atāo inakari. !Hīxinikari Teoso kamakiti katana. Himaxinīkaretepekari Xesosi makatxakiniri himaerekani mitxi hīkamakiti.

¹⁰ Ininiā nitariakori, ikara atoko !hītxapeko. Hīkamariko ikinipoko Teoso paniātakiti, ininiā iteene himarotari Teoso akiritinii inakitiakori hininiua ūkapani. Iuasaaki himarotari Teoso mereinii hīte iua anaakori hininiua ūkapani. Ikara atoko inakari hīkaminiā, !hīka-

mari maerekati. ¹¹ Ikara atoko hīkaminiā, Teoso ipoxokoniritika apakapai hīte aāuīte Xesosi Kristo auītetxi ininiātaāua hāuini ūkapani. Iuaā Xesosi, amaerekani makatxakakari, ātipirika ikinimane auīte itxauako.

Atāo Inakari Teoso Sākire

¹² Ninirekari ikara noerekakiti ātipirika nisāpiretinii. Himarotapekari ikara noerekakiti, iuaritika iuaīkana nisāpiretai. Hīte imarotari ikara noerekakiti atāo inini, iuaritika kona nitakanapari ikara nisāpiretinii. ¹³ Nota auapanika ninakasaaki, notamoni atāopitika nitxīkitakinii hīte ikara noerekakiti hīxinikini. ¹⁴ Kotxi nimarotari pāitiki nipinini. Aāuīte Xesosi Kristo oerekepekano pāitiki nipinini. ¹⁵ Ininiā uatxa Teoso sākire nisāpiretapikai, ininiā kona himaxinīkaretari noerekakiti nipīkasaaki.

¹⁶ Asāpiretai aāuīte Xesosi Kristo posotiire. Asāpiretai iua iuaīkana kanapiriini. Ikara asāpiretakiti hītemoni kona kākiti sākireni. Kona kākiti kimarorerini xinikakitinii asāpiretai. Atāo inakari ate sāpiretai hīte, kotxi ateka atamatari Xesosi ikinimane auīte ininiua. ¹⁷ Aīri Teoso oerekari iuikiniri iua. Oerekari iua ereka inini, kotxi itxari iua: "Ere namarite, nitiretakiti. Iua iteene kamapoxokonitano," itxa Teoso kaposotiireri. ¹⁸ Ateka kenakotari ikara Teoso sākire, itixineē isākirau-atakasaaki. Iuasaaki ate aua Xesosikata ōtanoxiratari Teoso nakiti nopini.

¹⁹ Ininiā aimarotapitikari Teoso sākire sāpiretakani sāpiretakiti kitxakapirīka atāo inini. Himixinikariko ninoa sāpiretakiti. Ninoa sāpiretakiti tirikapi ipiā iopinikini atoko itxa, kākiti sinimoni atamatini ūkapani, kotxi axinikasaakiri ninoa oerekakiti, aimarotari atāo inakari, atāo minakati pakini. Teoso sākire sāpiretakani sāpiretakiti hīxinikiniritika Xesosi kanapiriāko. Iuasaaki iua txīkitakai Teoso iteene himarotini. Iuasaaki atokatxi ponikini atoko itxa Xesosi apokini. Iōriki ūkanōkapanika pokīkini atoko itxa iuasaaki Xesosi apokini. ²⁰ Merepanika ninirekari iteene himarotiniiri Teoso sākire sāpiretakani sāpiretakiti Teoso sākire iōkatsopatakorii. Kona ninoa sākireni. Kona ninoa xinikakitinii. ²¹ Kitxakapirīka Teoso sākire sāpiretakani kona iōkatsopatarii kākiti nireēkiti sākiretxiti. Erekari Matamatakoti txīkitakari kākiti Teoso nakitiakori sāpiretiniri atāo inakari Teoso sākire.

Atāo Minakati Oerekakani

2 Kitxakapirīka Teoso sākire sāpiretakani auakasaa-ki, auari apaka atāo minakati oerekakani. Iua

atokotxikana uatxa aua atão minakati oerekakani hïte sauaki. Kãkiti mimarotakanisaakiri, oerekari atão minakati. Kona erekari ninoa oerekakiti. Na atão ninoa oerekari Teoso sãkire. Ninoa !auikari Apiananiri ipinini kãkiti ïkapani Teoso ïkitxitini ïkapani. Ikara xika mokatanitika Teoso xipokanako ninoa. ²Itori kãkiti auikari isãkirena, ininiã ikamarina ninoa kamakiti atokokana. Ikamarina maerekati ïtona nireëkiti, maerekati ninoa kamini atokotxikana. Ininiã ikara xika, apanakini misãkirepiretari Teoso sãkire atão inakari aukiko. ³Kapotxinanirini ninoa atão minakati oerekakani. Isãkirena atão minakati xika, imisirienetai. Ninoa nireëkiti iaõka ikaminiina hïte. Kitxakapirïka Teoso sãpiretapekari imisiritinina ninoa imaerekanina xika. Ixipokinina õti païtiki apokapitikako. Teoso !imaka. Ninoa xipokini õti apokapitikako.

⁴Teoso nitiriakori !axiti auakani kamakasaakiri maerekati, imisiritana. !auritana imitekinina. Iokanataka maerekani misiritikoãtaã. Iuaã itakana kateia ãki ipiaã. Iuaã !ataparina Teoso misiritinina ninoa imaerekanina xika.

⁵Kitxakapirïka Teoso xipokari ikinimane kãkiti iua nireëkiti manirekakani xirataãtxiã. Teoso !auritana ninoa mitekini. Noee, apikomoni setxi kãkitikata nïkataãka. Ninoanoka !xipokaãka. Iua nïkatari Noee, kotxi atão inakari sãpiretakari itxaua.

⁶Apaka ixipokari Sotoma sitatxiti auakani, Komoha sitatxiti auakani pakini arikatxiã. Atapaninoka kaikota iusaaki. Ininiã ikara pinitari kãkiti Teoso nireëkiti manirekakani. ⁷Iusaaki Teoso makatxakari Aroo inakori imapinakani ïkapani, kotxi erekari kamakari itxaua. Maerekati kamakani txïkitakari Aroo matinaniuatini, kotxi ikiniõtika iua atamatari maerekati ninoa kamakiti, maerekati ninoa ïto nireëkiti. Itxiko atoko itxa ninoa kamakiti. ⁸Aroo, atão inakari kamakari, aua ninoa sauaki. Ikiniõtika atamatari maerekati ninoa Teoso paniãtakiti manirekakani kamakiti. Ikiniõtika ikenakotari maerekati ninoa sãpiretakiti. Ininiãkara ãkixinireë Aroo maerekaxiniretinoka itxa ninoa maerekani xika, kotxi iua ãkixinireë inirekari atão inakarinoka ikamini.

⁹Ikara atoko ininiã, Apiananiri imarotari iua nireëkiti nirekakani imakatxakini imisiritikosaakina. Iua apaka imarotari imisiritiniri atão minakati kamakani uatxa. Apaka imarotari imaïkinina ninoa, kãkiti misiritiko sãpiretiko õtisaaki imisiritinina ïkapani. ¹⁰Iteene Teoso misiritari kãkiti, maerekati ïto nireëkiti kamakani. Ninoa maerekani txikotari ninoa ãkixinire. Apaka iteene imisiritari auïtetxi paniãtakiti makamakani.

Ninoa atão minakati oerekakani iteene iuikaua. !Ipxitarina ãti. !Ipiïkarina imisãkirepiretinirina !axiti auakani. ¹¹Teoso nitiriakori !axitikini iteene kaposotireni. Apiataparata ninoa. Iuaritika Teoso nitiriakori !apoïtana ninoa atão minakati oerekakani. !Imisãkirepiretana Teoso apisatoõ.

¹²Ninoa atão minakati oerekakani misãkirepiretari ikinika imimarotakinina. Kaxipiri ïtopa auakari atoko itxana, kotxi ikamarina ïtona nireëkitinoka. Kaxipiri ïtopa auakari iponaniã, eereka imaïkaãka, oka inaãka.

Iua atokokana ninoa atão minakati oerekakani xipokaãkako imaerekanina xika.

¹³Ininiã ninoa misiritaãka, kotxi na atão ninoa kamakiti. Kona ïkanõkananini ikamarina maerekati. Ipotxitarina maerekati ïtona nireëkiti ikaminina poka-mara, ikinimane atamatini ïkapani. Ninoa kamapikari maerekati, iuaritika apotiitauana hïtekata kiiniri Teoso ïkapani hïkamakasaaki. Ininiã apanakini !auikari hïte sãkire ninoa maerekani xika. Itxiko mãkatxi kasarori nopinikiri atoko itxana ninoa. Karõtxi kãkiti toõã auakari atoko itxana ninoa. ¹⁴Inirekapikarina sito ïtanoro minakotokatika isirïkinina. Kona iposotarina iotokakinirina maerekati ikaminina. Anikarina kãkiti mataparaxinireni, maerekati ikaminina ïkapani. Kapotxinanixinirena ninoa. Ininiã Teoso misiritapitikanako ninoa. ¹⁵Ninoa osipikari kimapori atão inakari. Ipïpinanakana. Ikamarina maerekati Paraõo inakori maerekani atokokana. Iua Paraõo, Peoo inakori ãkiri. Kitxakapirïka aua. Iua nirekaro txineiro maerekati ikamini ïkapani. ¹⁶Txamari ipira txitari iua imaerekani xika, kotxi Teoso txïkitakari poho sãkirauatini kãkiti sãkirauatini atokokana. Ininiã ipira iotokakari iua atão minakati sãpiretakari kaminiri maerekati mïïkiteti.

¹⁷Ninoa atão minakati oerekakani !iposotari ikaminirina ikamaenetakitina. Aariko ãparaã mauakinini atoko itxana. Kãkiti nirekari ãparaã, txamari !auari. Katxiãri ïtima anikakiti atoko itxana ninoa. Kãkiti nirekari ãparaã kipini, txamari !ikipa. Teoso mereëri ipiaãtaã ninoa ãtipirika kaikotini ïkapani. Kãkiti atamarauatini iuaãtaã !auari. ¹⁸!Kïïkiteri ninoa sãkire. Iuikauana isãkirauatakasaakina. Isãpiretarina kãkiti, erekari akaminiri aïto nireëkiti. Ininiã isikanireõtari kãkiti ikara maerekati ikamini. Imisirienetarina Teoso sãkire poiãopanika auiãkani. Ninoa !okananipanikani auikari Teoso sãkire. !Okananipanikani imarotarina atão inakari. Atão minakati oerekakani sikanireõtana ninoa ikara maerekati ikaminina.

¹⁹Itxana: "Kateia ãki auakani atoko hïtxaua. !Erekari ikara atoko hinini. Hïkamariko hinirekakiti. Ininiã ikara atoko hïkaminiã, hïsikakaãka," itxana. Txamari ninoaka kateia ãki auakani atoko itxauana, kotxi ninoa !iposotari itakanapinirina imaerekanina. Imaerekanina iauïtena itxaua, kotxi ikamarina imaerekanina paniãtakitinoka. ²⁰Mitxi ninoa imarotari Apiananiri Xesosi Kristo sãkire, kãkiti maerekani makatxakakari sãkire. Iusaaki ninoa iotokakari ikaminirina Xesosi sãkire mauiãkani kamakiti, kãkiti xinire maerekati inini txïkitakari. Txamari eereka iuaïkana ikamarina ikara maerekati. Eereka !iposotaikarina ikara maerekati itakanapinina. Ininiã uatxa apiata imisiritikona.

²¹Erekamariko atão inakari kamiko ninoa mimarotakanimako, kotxi ninoa imarotari, iuaritika !inirekaikarina Teoso paniãtakiti, iua iokanatakini sãpiretakiti. Uatxa ninoa misiritiko apiata. ²²Atãopitikara kitxakapirïka sãkiretxiti:

Anãpa kanapiriã okanakakitimoni onikiniri ïkapani. Irari ipitikiri arokakito kanapiriã !ãropemoni osirïkini ïkapani.

Ininiã iuaĩkana ninoa atão minakati oerekakani kamari maerekati, mitxi ninoa takanapakiti.

Apiananiri Kanapiriini

3 Nitiretakini, mitxi niokansopatapeka hĩtemoni. Iuaĩkana niõkatsopataria aãtsopa. Imakinika niõkatsopata, kotxi ninirekari hĩte iuaĩkana hĩxinikiniri erekari mitxi himarotakiti. ² Ninirekari hĩxinikiniri Teoso sãkire sãpiretakani sãkire kitxakapirĩka, kotxi Teoso nakitiakori itxauana. Apaka ninirekari hĩxinikiniri ate paniãtakiti, kotxi Apiananiri iokanatakini atxaua. Kãkiti maerekani makatxakakari iokanatakini atxaua.

³ Merepanika himarotariko ia: Imapotõkire õti takote auako kãkiti Teoso sãkire napetakani. Ninoa kamari maerekati iĩtona nireẽkiti. ⁴ Ia atoko itxanako: "ĩtapari iua? 'Nikanapiriãko,' itxa iua. Txamari kona apoka. Aãtokiriakorini ipĩkasaakipanika, itixi kamikosaakipanika iuatxikana. Mitxi itixi, uatxa iuatxikana," itxana.

⁵ Ninoa nirekari imaxinĩkaretinirina Teoso kamakiti kitxakapirĩka auakari, kotxi Teoso txĩkitakari iaxiti apiko nopinixiti auini isãkireẽ. Apaka ikamari itixi ãparaã kamakori. Ikamari itixi ãparaã sauaki. ⁶ Apaka ninoa maxinĩkaretari ia: Teoso iokanataria iua ãparaã, ininiã xirataãtxi xipokari itixi mitxi auakari, ikinimane kãkiti iuasaaki auakani apaka. ⁷ Uatxa isãkireẽ inĩkatari iaxiti apiko nopinixiti, itixi pakini arikatxi xipokiniri ĩkapani. Imakinika inĩkatiniritika Teoso manirekakani misiritiko isãpiretako. Iuasaaki ninoa xipokaãkako. Iuasaaki ixipokari iaxiti apiko nopinixiti, itixi pakini.

⁸ Nitiretakini, kona himaxinĩkaretapiri ia nisãkire: Teosomoni ãti õti, mio anokanani atokotxikana itxa. Iuamoni mio anokanani, ãti õti atokotxikana itxa. ⁹ Apiananiri kamapitikari ikamaenetakiti. Apanakini kãkiti xinikari !katimari ikaminiri ikamaenetakiti. Kona ikara atokoni. Iãtapari kãkiti auikiniri isãkire, kotxi !nirekari kãkiti sini imisiritikomoni. Inirekari ikinimane takanapiniri imaerekani.

¹⁰ Apiananiri kanapiriãkasaaki, kiĩtiriri ĩkanõka apokini atokokana. Iua apoka kãkiti mimarotakanisaakiri. Iuasaaki iaxiti apiko nopinixiti ereẽkoka itaparakieneri-

tika. Iuasaaki ikinipoko xipokaãka arikatxiã. Iuasaaki iteene ipataka aua. Imakinika itixi xipokako iuasaaki.

¹¹ Ikara atoko itxako ikinipoko xipokini, ininiãkara natokopa itxa hãuini ikiniõtika ereka hinini? Erekarinoka hĩkamako ikiniõtika, kotxi iua nakitiakori hĩtxaua.

Teoso nireẽkitinoka hĩkamako ikiniõtika. ¹² Iuasaaki hiãtapari hĩpoxokoniritika Teoso keto apokini. Iteene hinirekariko ikara õti apokini. Iuasaaki iaxiti apiko nopinixiti xipokaãka arikatxiã. Ikinika iãkokako kapatarari xika. ¹³ Iuaritika aiãtapari iaxiti apiko nopinixiti amaneri, itixi amaneri apaka atão inakari kamakani ĩkapani. Ikara atoko inakari Teoso sikaenetakiti.

¹⁴ Ininiã nota tiretakini, hinirekasaakiri Xesosi kanapiriini õti apokini, iteene hĩparĩkauatoko maerekati himakamakani ĩkapani. Ininiã iua kanapiriãkasaaki, iua imarotari himakamakarini maerekati. Iuasaaki imarotari hĩkerokiniri !auari. Iuasaaki imarotari erekaxinire hinini. ¹⁵ !Katimari iua kanapiriini, kotxi iãtapari kãkiti takanapiniri maerekati ikamakiti, imisiritiko mapokakani ĩkapani. Iua atokokana aĩtari atiretakiti Paoro iõkatsopata hĩtemoni Teoso imaroreẽ. ¹⁶ Ikinika Paoro iokansopatakitiã isãpiretari Apiananiri kanapiriini õti Teoso imaroreẽ. Ipinini iua iõkatsopatakiti pamimari kãkiti imarotiniri ĩkapani. Aua kãkiti miĩkiteni. !Apakata aũikiniri ninoa sãkire. Kãkiti ikara atoko inakani oerekari Paoro iõkatsopatakiti, apanakini Teoso sãkire iõkatsopatakori pakini, txamari na atão ninoa sãpiretakiti. Ipinimoni ninoa oerekakiti. Imamakarina Teoso sãkire, ininiã ikara xika ixipokaãkanako.

¹⁷ Nitiretakini, himarotapekari pamonõkoniri ninoa atão minakati oerekakiti. Ininiã araõkire hĩtxako. Kona hãuikapiri Teoso sãkire kerokakani sãkire, kotxi Teoso paniãtakiti makamakani itxauana. Kona hĩtakanapapiri Teoso sãkire atão inakari, uatxa iteene hãuikakiti.

¹⁸ Ikiniõtika himarotariko ikinipoko erekari aãuĩte Xesosi Kristo sikakiti hĩtemoni, amaerekani makatxakakari sikakiti hĩtemoni. Ikiniõtika himaroãpotariko iua. Ninirekari ikinimane uatxa sãpiretiniri iua: "Peerekai pite." Ninirekari ikinimane ãtipirika sãpiretiniri iua: "Peerekai pite." Ameẽ.

1 Xoão

Xesosi “Teoso Säkire” Inakori

1 Nota iökatsopata hïte ïkapani, iua “Teoso säkire” inakori asäpiretini ïkapani. Ätipirika auakari itxaua. Itxïkitakari ikinipoko auäki inini. Itixi kamiko apisa iua aua. Atera kenakotari isäkire. Aökiä ate atamatari iua. Auakoä amaätakari iua. Ininiä atäopitika ate imarotari iua. ² Iua ikinipoko auäki inïkitaäkari. Iuaka oerekaua atemoni. Ate imarotapekari iua, ininiä asäpiretai aätamatakiti, akenakotakiti pakini. Ate säpiretai hïte iua ätipirika auakari, käkiti auäki inïkitaäkari, ininiä käkiti auapikako Teosokata. Iua Xesosi Kristo inaäka akiritiko. Iua aua irikata, Teosokata. Iuaka oerekaua atemoni. Aätamatari ïto. ³ Ate säpiretai hïte aätamatakiti, akenakotakiti pakini, amoianatakakiniua ïkapani. Atäo nisäpiretai. Amoianatakakaua Teosokata, Xesosi Kristo pakinikata. ⁴ Ia säkiretxiti aiokanata hïtemoni, iteene hïpoxokoniuatini ïkapani.

Teoso Pokamara Atoko Itxa

⁵ Teoso pokamara atoko itxa, kotxi maerekati !ikama. Ipiä !uari Teoso auiniätaä, kotxi maerekati !ikama. Ikara iokanapirena imi säpiretaua ate. Ininiä ate säpiretai hïte. ⁶ Maerekati akamakasaaki, ipiaä auakani atoko atxa. Iuasaaki, “Teoso amoianata,” aniniä, paxirari asäkire. Kona atäo akamakiti iuasaaki. ⁷ Teoso aua ikamaraä, kotxi erekarinoka ikama. Ate ikamaraä aäuniä Teoso atoko aniniä, erekarinoka akaminiä, ininiä ate Teoso säkire auikäni moianariakori atxaua, ininiä amoianatakakaua. Ikamaraä aäuniä, Teoso arokaua Xesosi arëkaä. Imaktxakari ikinika maerekati akamakiti, kotxi imi Xesosi Kristo ipina ate ïkapani. Iarëka xikepoakata ate maerekani imaktxakini ïkapani.

⁸ “Na nota kamari maerekati,” aniniä, ateka misirienetaua. Ikara atoko aniniä, ate !imarotari atäo Teoso säkire aäkixinireë. ⁹ Amaerekani Teosomoni asäpiretiniä, iua makatxakapitikari amaerekani. Oeretari ate äkixinire. Imaktxakari ikinipoko amaerekani. Ikamari ikara atoko, kotxi imaktxakaenetari amaerekani. Ikamapitikari ikamaenetakiti. Ikamapikari atäo. ¹⁰ “Uatxapiima maerekati !nikama,” pininiä, pitemoni Teoso säkire paxirari atxiïti? Kotxi Teoso txapekari käkiti: “Maerekati kamakari käkiti.” “Maerekati !nikama,” pininiä, !pimarotari Teoso säkire päkixinireë. !Pikamari Teoso säkire iaöka iuasaaki.

Käkiti Teoso Atäo Imarotakari

2 Namariteni nota tiretakini atoko hïtxaua hïte. Ikara niökatsopata, maerekati himakamakani ïkapani. Maerekati akamakasaaki, masäpiretari Xesosi Kristo. Aïri Teoso misäkiretakari itxaua Xesosi. Atäo inakarinoka kamakari itxaua iua. Iua misäkiretari Teoso ate ïkapani, amaerekani imaktxakini ïkapani. ² Iua makatxakari maerekati akamakiti. Kona ate maerekaninanini imaktxaka. Ipina ikini itixiti auakani maerekani imaktxakini ïkapani.

³ Teoso paniätakiti akïpitiniä, atäo aimarotari Teoso.

⁴ Teoso paniätakiti makïpitakati, “Nota imarotari Teoso,” inakari, paxirari isäkire. Äkixinireë !imarotari atäo inakari Teoso säkire. ⁵ Teoso säkire kïpitakari iteene taretari Teoso. Kininiäpa aimarotatari iua nakiti aniniäua? ⁶ Akamakiti ikiniötika Xesosi kamakiti atokokana akaminiä, iuasaaki aimarotari Teoso nakiti aniniäua. “Teoso nakiti nitxaua,” pininiä, pikamariko Xesosi kamakiti atokokana.

Iteene Matiretakakaua

⁷ Nitiretakini, Apiananiri paniättaua atiretakakiniua. Ia paniätxi niökatsopatakiti hïtemoni, kona amaneriikani. Hïkenakopiretapekari ikara paniätxi merepitipanika Xesosi säkire hïkenakotakasaaki. Iuasaaki hïkenakotari ikara paniätxi hïtiretakakiniua tïkane. Ikara paniätxi kitxakapirïkari itxaua. Hïkenakotapekari ikara paniätxi. ⁸ Iuaritika ikara paniätxi amaneri itxaua. Xesosi kïpitari ikara paniätxi, kotxi itiretari käkiti. Hïte apaka taretari käkiti, ininiä aimarotari ikara paniätxi ereka inini. Ininiä ipiä napaäpota, kotxi käkiti imaroäpotari atäo Teoso säkire. Atäo inakari käkiti imarotakasaaki, pokamarari atoko itxa käkiti äkixinireë.

⁹ “Pokamara naua,” pininiä, txamari iuasaaki pomanatari pitari Xesosi säkire auikäni, ikara atoko pininiä, uatxapiima ipiaä pauapanika. ¹⁰ Pitari Xesosi auikäni pitiretiniä, pokamara pauapitika. Ininiä erekari päkixinire, ininiäkara päkixinireë auakari kona txïkitakai maerekati pikamini. ¹¹ Pitari Xesosi säkire auikäni pomanatiniä, ipiaä auakari atoko pitxaua. Iuasaaki pitïpokotapika ipiaä. !Pimarotari pisinimoni. Mösiäreti atoko pitxaua, kotxi !apakata patamarauatini ipiä xika.

¹² Namariteni nota tiretakini, niökatsopata hïte ïkapani, kotxi Xesosi makatxakapekari himaerekani, kotxi käkiti maerekani makatxakari itxaua.

¹³ Hīte irītxiakoripekana, niōkatsopata hīte īkapani, kotxi hīte iteene imarotari Xesosi, itixi kamikosaaki auapeka inakari.

Hīte ātokoriakoripekana, niōkatsopata hīte īkapani, kotxi homitikapekari Satanasi hītapararitika.

Namaritenipekana, niōkatsopata hīte īkapani, kotxi himarotari āri Teoso.

¹⁴ Hīte irītxiakoripekana, niōkatsopata hīte īkapani, kotxi himarotari Xesosi. Itixi kamikosaaki auakaripeka itxaua.

Hīte ātokoriakoripekana, niōkatsopata hīte īkapani, kotxi pataparari hākixinire. Teoso sākire auapika hākixinire. Homitikapekari Satanasi hītapararitika.

!Hinirekapiri Itixi Auakani Nireēkiti

¹⁵ Itixi auakani nireēkiti atoko inakari !hinirekape, kotxi ninoa nirekari maerekati ikaminina. Hītiretiniāri ninoa kamakiti, !hītiretari āri Teoso. ¹⁶ Maerekati kākiti kamakiti ia atoko itxapaniko: Inirekarina maerekati iītona nireēkiti ikaminina. Inirekarina maerekati okina nireēkiti ikaminina. Iuikauana, katii ininiāuana. Iuikarina ikamakitina. Ikara maerekati kākiti kamakiti potori-ka īkorapokoriti. Kona Teosomonikirini ikara. ¹⁷ Itixi xipokako. Ikinipoko tiitxi kākiti nireēkiti apaka xipokako. Kākiti Teoso nireēkiti kamakarirako !ixipoka. Auapininiika Teosokata.

Kristo Omanatakani

¹⁸ Namariteni nota tirketakini, itixi xipokini ōti katanapananoka apoka. Kristo omanatakani auīte apokako itixi xipokini ōti apisa. Ikara himarotapeka. Uatxa Kristo omanatakani itomane apokapeka. Ikara atoko ininiā, aimarotari itixi xipokini ōti takotepeka inini. ¹⁹ Ninoa Kristo omanatakani, mitxi atekata apotitaua, Teosokata aāpotitakasaakia. Txamari ninoa !auikari Xesosi sākire ate auikiniri atokokana, ininiā ninoa sipe. Ninoa atāo Xesosi sākire auikaākamako, atekata ikaikotapikamanako. Itakanapaua, kotxi ate auikari Xesosi sākire. Ninoa !auikari.

²⁰ Teoso, erekarinoka kamakari, sikapekai hīte Erekarī Matamatakoti himoianari tīkane. Ininiā hīte imarotari atāo inakari Xesosi sākire. ²¹ Hīte imarotari atāo inakari Xesosi sākire, iuaritika niōkatsopata hītemoni. Niokanatsopata hītemoni, kotxi himarotari atāo inakari. Paxiene kamakari !imarotari atāo inakari sākiretxiti.

²² Natokopa itxa iua paxiene kamakari? Paxiene kamakari txari: "Xesosi kona Teoso mereēkitini." Kākiti ikara atoko inakari Kristo omanatakari itxaua iua. Iua !inirekari āri Teoso. Imi apaka !inireka. ²³ "Xesosi kona Teoso ākirini" inakari, na kaikota Teosokata. "Teoso ākiripitakara Xesosi" inakarirako kaikotapitakako Teosokata.

²⁴ Hāuiritariko merepitipanika Xesosi sākire hīkenakotakiti kaikotini hākixinire. Ikara kaikotiniā hākixinire, Teoso ākirikata hīkaikotapikako. Aīri Teosokata

hīkaikota apaka. ²⁵ Xesosi sikaenetapekua aāuapinini-ika anini Teosokata.

²⁶ Niōkatsopata hīte nōtākikini īkapani, kotxi aua kākiti Xesosi hītakanapini nireēkani. ²⁷ Erekarī Matamatakoti, Xesosi sikakiti, auapanika hīte ākixinire, ininiā hīte na nirekari āti koerekareri. Iua Erekarī Matamatakoti oerekai ikinipoko. Iua oerekakiti atāopitika. Kona paxieneni iua. Ininiā hīkaikotako Xesosikata, Erekarī Matamatakoti oereēkiti hīkīpitini.

²⁸ Ininiā namariteni nota tirketakini, himoianat- apikariko Xesosi. Ininiā uaimoni ikanapiriākasaaki, hīpīkarauatini !auari. Ininiā na hīpētauata haōkitakasaakiri iua. ²⁹ Xesosi kamari atāo inakarinoa. Ikara himarotapeka. Ininiākara himarotari, kākiti atāo inakarinoa kamakani Xesosi anaakori ininiuana.

Teoso Anaakori

3 Aīri Teoso iteene tirtetaua ate. Hīxinikariko iua tiraōki. Iua iteene tirtetaua ate, ininiā, "Namariteni," itxaua ate. Ari, atāopitakara Teoso anaakori atxaua. Ninoa Teoso anaakori minakanuia !auikari Teoso anaakori aniniua, kotxi ninoa !imarotari Teoso. ² Nitirketakini, Teoso anaakori atxapekua uatxa. Eereka !aimarotari kanatokoako atxapaniko. Ia aimarotapitika. Xesosi kanapiriākasaaki, Xesosi atoko atxapekauako, kotxi iuasaaki aātamatariko iua. ³ Kākiti ikara auīkāni, !inirekarina maerekati ikaminina, kotxi Xesosi !ikamari maerekati.

⁴ Maerekati kamakari !ikamari Teoso paniātakiti. Amakamakanisaakiri Teoso paniātakiti, iuasaakipeka akamari maerekati. ⁵ Himarotari Xesosi apokapeka īkorapokoriti maerekati akamakiti imaktxakini īkapani. Xesosi !ikamari maerekati. ⁶ Kākiti Xesosi ātipirika moianatakari !inirekaikari maerekati ikamini. Iua ātipirika maerekati kamakari !aōkitapanikari Xesosi. !Imarotapanikari Xesosi.

⁷ Namariteni nota tirketakini, !hāuiritapiri apanakini misirienetini hīte. Atāo inakarinoa kamakari kamapitiki Teoso nireēkitinoka, Xesosi kaminiri atokokana, kotxi Xesosi kamari atāo inakarinoa. ⁸ Ātipirika maerekati kamakari Satanasi nakiti itxaua, kotxi Satanasi kamapikari maerekati. Itixi kamikosaakipekara ikamaāpokotapitiporiri maerekati. Uatxa ikapanikari. Teoso ākiri apoka īkorapokoriti maerekati Satanasi parīka ixipokini īkapani.

⁹ Teoso anaakori !inirekaikari maerekati ikaminina, kotxi Teoso aua ākixinire. Ininiā !liposotarina maerekati ikamaāpotinina, kotxi iritarina Teoso. ¹⁰ Ininiā kipa Teoso anaakori txataua? Atāo inakarinoa kamakanira Teoso anaakori txaua. Āti tirketakanira Teoso anaakori txaua. Ininiā kipa Satanasi anaakori txataua? Erekarī makamakanira Satanasi anaakori txaua. Āti matirtetakanira Satanasi anaakori txaua.

Kākiti Tirtetakiniua Pirena

¹¹ Matirtetakakua. Merepitipanika Xesosi sākire hīkenakotakasaaki, hīkenakotari ikara ōtākīpīrenatxi,

hītiretakiniua. ¹² Kaiĩ inakori atoko !hĩtxape. Maerekatinoka kamakari nakiti itxaua iua Kaiĩ. Satanasi nakiti itxaua. Kaiĩ okari atão itarika. Kixikapa okari? Ixikotiniri xika okapiri, kotxi itari kamari erekari-noka. Kaiĩ kamari maerekatinoka.

¹³ Nitariakori, Xesosi sãkire mauĩãkani omanatakasaakii hĩte, !hĩtsoriĩkaãtapeko. “Kixikapa nino omanataua ate?” !hĩtxapeko, kotxi ikara atoko inakari apokapitikako. ¹⁴ Atiretiniãri aĩtariakori Xesosi sãkire auĩãkani, aimarotari !apinaika. Aãupininiika Teosokata. Matiraõkiti ãkixinire ipĩkari atoko itxa. ¹⁵ Kãkiti itari omanatakari, Xesosi sãkire auĩãkari omanatakari, kokaniri atoko itxaua. Himarotari kokaniri !uari ãtipirika Teosokata.

¹⁶ Xesosi Kristo ipina amaerekani imaktxakini ĩkapani, ãtipirika Teosokata aũuini ĩkapani. Ikara oerekaua atão tiraõkitxi. Ininiã erekari aĩtariakori atiretini. Xesosi tiritiniua ate atokokana, erekari atiretiniri aĩtariakori. Atxĩiti apina aĩtari mapinakani ĩkapani.

¹⁷ Pitii, pikiena pakini auiniãi, pitari, Teoso sãkire auĩãkari tii, ikiena pakini mauakaniã, pisikariko iuamoni. Pimasikakaniãri iuamoni, Teoso tiraõki pãkixinireẽ !uari. ¹⁸ Namariteni nota tiretakini, “Apanakini ate tireta,” atxaua, txamari kaamoni inakasaakina na asikana minakati, ininiã na atão atiretana. Atão matiretana apanakini. Kaamoni inakasaakina, masikana nino amonitakitina.

Teoso Sãkire Kĩpitakari

¹⁹ Ikara atoko akaminiã, aimarotari Teoso anaakori aniniãua. Aimarotari atão inakari sãkiretxiti akĩpitini. Ikara atoko akaminiã, erekapitikari aãkixinire. Ikara atoko akaminiã, !apĩkari Teoso amisãkiretini. ²⁰ “Kona erekano,” pininiã pãkixinireẽ, mitxi pimaerekani pikamini xika, !pipĩkarauatape, kotxi Teoso iteene imarotai, iuaritika iteene iamoniĩkai. Poiãoka aimarotari aãkixinireẽ auakari. Teoso imarotari ikinipoko.

²¹ Nitiretakini, pãkixinireẽ: “Namanaãpekari Teoso imakinika nimaerekani imaktxakini,” pininiã, kataparaxinirepitikai Teoso pimisãkiretini. ²² Ininiã iua sikaua aamanaãkiti, kotxi ate kamari ipaniãtakiti iaõka. Iua apokaerekatakitinoka akama. ²³ Teoso paniãtaua ate: “Hãuikariko namarite Xesosi Kristo sãkire.” Apaka Teoso paniãtaua: “Hītiretakakauako.” Teoso paniãtaua ikara akamini. ²⁴ Teoso sãkire iaõka kamakari kaikotapika Teosokata ãtipirika. Teoso kaikotapika iuakata ãtipirika apaka. Aimarotari Teoso kaikotini atekata, kotxi iua sikaua Erekar Matamatakoti aãkixinireẽ auini ĩkapani.

Atamakaerekarauatini

4 Nitiretakini, !hãuikapiri ikinimane kãkiti sãkire, “Erekar Matamatakoti aua nota ãkixinireẽ,” inakani. Hãtaerekatanako ninoa. Atão Erekar Matamatakoti auatana atxĩiti ãkixinireẽna? Atxĩiti matamatakoti ãkixinireẽna auakari kona Teosomoni ĩkarini. Itomaneri kãkiti, “Nota Teoso sãkire sãpiretakarino,”

inakani, txamari na atão ninoa sãkire. Kãkiti ninoa atoko inakani aua ikini itixitika. !Isãpiretarina atão Teoso sãkire. Imisirienetarina kãkiti. ² Kãkiti sãpiretiniãua: “Teoso ãkiri Xesosi Kristo apokapeka ĩkorapokoriti. Kãkitipeka itxaua,” ininiã iuasaaki aimarotari Erekar Matamatakoti auapitika iua ãkixinireẽ. Ikara atoko aimarotari Erekar Matamatakoti Teoso sikakiti auaĩtotiniri kãkiti. ³ Kãkiti sãpiretiniãua: “Xesosi na atão kãkiti !itxaua,” ininiã iuasaaki aimarotari Erekar Matamatakoti !uari iua kãkiti ãkixinireẽ. Matamatakoti iua kãkiti ãkixinireẽ auakari Satanasi nakiti itxaua. Kristo omanatakari nakiti itxaua. Iua Erekar Matamatakoti Teoso nakiti itxaua. Hĩkenakopiretapekari: “Maerekati Matamatakoti Kristo omanatakari iokanatakiti apokapitikako ĩkorapokoriti,” itxa. Uatxa apokapeka.

⁴ Hĩte namariteni, Teoso nakitiakori hĩtxaua. Ininiã hĩte !auikari atão minakati sãpiretakani sãpiretakiti, kotxi Erekar Matamatakoti hĩte ãkixinireẽ auakari apia posotiireri itxaua iua. Maerekati matamatakoti, Xesosi sãkire mauĩãkani ãkixinireẽ auakari, kaposotiireri itxaua, iuaritika Erekar Matamatakoti hĩte ãkixinireẽ auakari apia sikaimaroretai hĩte. ⁵ Ninoa atão minakati sãpiretakani xinikakiti, itixi auakani xinikakiti atoktxikana, ininiãkara itixi auakani auikari ninoa sãkire. ⁶ Atepekana, Teoso nakitiakori atxaua. Teoso imarotakari auikari asãkire. Teoso nakiti minakatiua !auikari asãkire. Ininiãkara aimarotari kãkiti Erekar Matamatakoti auaãkixiniretakini. Iua Erekar Matamatakoti atãonoka isãkirauata. Aimarotari kãkiti ãti matamatakoti auaãkixiniretakini. Iua ãti matamatakoti kamisirienereri itxaua.

Teoso Tiraõki

⁷ Nitiretakini, matiretakakaua, kotxi tiraõkitxi Teosomoni potoriakari itxaua. Katiraõkirini Teoso anaakori itxauana. Ninoa atão imarotari Teoso. ⁸ Matiraõkiti !imarotari Teoso, kotxi Teoso tiraõkiuatapika. Tiraõkitxi Teosomoni potoriãkari itxaua. ⁹ Teoso iokanatar imatonõkari imi atemoni, Teosokata ãtipirika aũuini ĩkapani. Ikara atoko ininiã, Teoso oerekaua itiretiniua. ¹⁰ Ikara tiraõkitxi atão inakari itxaua. Mitxi ate !atiretari Teoso. Iuaritika iua tiretaua ate, ininiã iokanatar imi atemoni ipinini ĩkapani, maerekati akamakiti imaktxakini ĩkapani.

¹¹ Nitiretakini, ikara atokorako itxa Teoso tiritiniua, ininiã matiretakakaua. ¹² !Auari Teoso atamatakari, iuaritika Teoso auari aãkixinireẽ, atiretakaniãua. Ininiã Teoso oerekaua atão atiraõkiuatini.

¹³ Aimarotari Teosokata akaikotini ãtipirika. Aimarotari Teoso ãtipirika kaikotini atekata. Aimarotari ikara atoko inakari, kotxi iua sikari Erekar Matamatakoti atemoni. ¹⁴ Aãtamatapekari Xesosi kamakiti. Akenakotapekari isãpiretakiti. Ininiã asãpiretari ikinimane, aĩri Teoso iokanatar imi kãkitimoni, amaerekani makatxakakari ininiua ĩkapani, kãkiti ãtipirika Teosokata auini ĩkapani. ¹⁵ “Xesosi Teoso ãkiripitikara,” ina sãkiretakani, Teoso kaikotapika ninoakata. Apaka ninoa kaikota

Teosokata ätipirika. ¹⁶ Aimarotari Teoso turetiniua. Aãuikapiretapitikari Teoso turetiniua.

Teoso tiraõkiuatapika. Kãkiti katiraõkiri kaikota Teosokata ätipirika. Teoso kaikota ätipirika iuakata apaka. ¹⁷ Teoso oerekepekaua atão atiraõkiuatini iua tiraõkiuatini atokokana. Ininiã kataparaxinireua Kristo apisatoõ aãpokasaaki, kãkiti misiritiko õtisaaki. Aimarotari !imisiritaua iuasaaki, ininiã kataparaxinireuako, kotxi !korapokoriti aãuakasaaki Kristo atoko atxaua. ¹⁸ Atiraõkiuatakasaaki, !ap!karauata. Atão atiraõkiuatiniã, !auari ap!kare. Ap!karauatakasaaki, amaãkaua.

¹⁹ Atiretari Teoso, kotxi mitxipeka iua turetaua ate. ²⁰ Iua itari omanatakari, "Nota turetari Teoso" ina sãkiretakari, paxirari isãkire. !Itiretari itari iuakata auakari. Ininiã !iposotari itiretiniri Teoso imaõkitakiniti. ²¹ Ininiã Teoso paniãtaua: "Teoso turetakari turetari itari apaka."

Teoso Äkiri Auikiko

5 Xesosi Teoso mereëkiti itxaua. Ikara auiaãkani Teoso anaakori itxauana. A!ri Teoso atiretiniã, a!tariakori apaka atireta, kotxi Teoso anaakori ninoa apaka txaua. ² Teoso atiretiniã, inireëkiti iaõka akaminiã, aimarotari Teoso anaakori apaka atiretini. ³ Teoso atiretiniã, ak!pitari ipaniãtakiti. Aposotari akaminiri ipaniãtakiti, kotxi na kamimari ipaniãtakiti. ⁴ Aposotari akaminiri iua paniãtakiti, kotxi iua anaakori atxapekaua, ininiã isikataparataua, maerekati itixi auakani nireëkiti amakamakani !kapani. Kininiãpa isikataparataua maerekati ninoa nireëkiti amakamakani !kapani? Isikataparataua, kotxi Xesosi sãkire aãuika. ⁵ Kipa posotari maerekati itixi auakani nireëkiti imakamakani? Kãkiti auikiniãri Xesosi Teoso äkiri ininiãua, iuanokara posotari maerekati imakamakani.

⁶ Xesosi Kristo Teoso äkiri itxaua. Teoso oerekepekaua Xesosi iua äkiri ininiãua. Kãuaãriã Xesosi patxisatikosaaki isãpiretaua. Iua!kana Teoso sãpiretaua Xesosi iua äkiri ininiãua, Xesosi ip!kasaaki iarëka ixikepoatakasaaki. Teoso sãpiretaua kona Xesosi patxisatikosaakinanini. Iua oerekaua Xesosi Teoso äkiri ininiãua ip!kasaaki apaka. Erekar Matamatakoti sãpiretaua Xesosi Teoso äkiri ininiãua. Iua atãonoka isãkire. ⁷ Teoso tixini auakani ipi, äti pakini oerekaua Xesosi Teoso äkiri ininiãua, a!ri Teosoma, "Teoso Sãkire" inakorima, Erekar Matamatakotima pakini. Naia ipi, äti pakini ätinoka. ⁸ !korapokoriti auakani ipi, äti pakini, Erekar Matamatakotima, Xesosi patxisatikoma,

Xesosi ipininima pakini oerekaua Teoso äkiri ininiãua Xesosi. ⁹ Kãkiti erekarini sãpiretakiti aãuikapitika, ininiã apiata maãuikari Teoso sãpiretakiti, kotxi atãonoka isãkire. Iuara sãpiretaua Xesosi iua äkiri ininiãua.

¹⁰ Teoso äkiri auiaãkari äkixinire imarotari ikara Teoso sãpiretakiti atão inini. Teoso sãpiretakiti mauiaãkati txari: "Paxirari Teoso sãkire," kotxi !auikari Teoso sãpiretakiti Xesosi iua äkiri ininiua. ¹¹ Kiripa Teoso sãpiretaua? Iua sãpiretaua: "Nitx!kitakai auãki hinini notakata hãuapininiika hinini t!kane. Ikara atoko nitx!kitakai namarite nakitiakori hinakasaakia." ¹² Iua Teoso äkiri nakiti Teosokata ätipirika auako. Iua Teoso äkiri nakiti minakatiua, !auapani ätipirika Teosokata.

Aãuini Ätipirika Anini T!kane

¹³ H!te auikari Xesosi Teoso äkiri ininiua. Niokanatsopata h!temoni, Teosokata ätipirika hãuini himarotini !kapani. ¹⁴ Teoso nireëkiti atoktxikana aamanainiãri Teoso, aimarotari ikenakotari amisãkiretiniri, ininiã kataparaxinirepitikaua amisãkiretiniri, kotxi aimarotari iua apakapapiretapitikaua. ¹⁵ Ikara atoko aniniã, aimarotari ikenakotari aamanaãkiti, ininiã isikapitika.

¹⁶ Himarotakasaakiri pitari kaminiri maerekati, himisãkiretari Teoso iua !kapani. Ininiã Teoso makatxakari maerekati ikamakiti. Teoso kamari iua ätipirika iuakata auini !kapani. Ikara maerekati makatxakiko auapitika, ininiã kona itx!kitakari iua xinire ipinini. Ätião maerekati kãkiti kamakiti aua. Ikara maerekati makatxakiko !auari, ininiã itx!kitakari kãkiti xinire ipinini. Nota !õtãkikai himisãkiretiniri Teoso ikara atoko inakari maerekati kamakari !kapani. ¹⁷ Teoso paniãtakiti amakamakaniã, iuara maerekati txaua. Iuaritika aamanainiãri Xesosi ikara maerekati imakatxakini, ininiã ikara maerekati !itx!kitakari kãkiti xinire ipinini.

¹⁸ Teoso anaakori atão inakani !inirekaikari maerekati ikaminina. Aimarotari ikara. !Inirekaikarina maerekati ikaminina, kotxi Teoso äkiri n!katana ninoa. Ininiã maerekati au!te Satanasi !iposotari imisiritinina.

¹⁹ Ikini itixiti auakani au!te itxaua Satanasi, maerekati kamakari. Iuaritika aimarotari Teoso anaakori aniniua ate.

²⁰ Aimarotari, Teoso äkiri apokapeka !korapokoriti. Aimarotari iua sikaua imarore, ininiã aimarotari Teoso atão inakari. Akaikota iua atão inakarikata. Ari akaikota imi Xesosi Kristokata. Teoso atão inakari itxaua iua. Itx!kitakaua iuakata ätipirika aãuini.

²¹ Namariteni, nota turetakini, !h!teosonetapiri Teoso minakatiua. Ameë.

2 Xoão

¹ Nota Xoão, mitxipe Xesosi imarotakarino nota. Niokanatsopata hïte Xesosi sãkire auiãkanimoni, hamariteakorimoni apaka. Teoso mereẽpekai hïte inakitiakori hininiua ïkapani. Nitiretai, kotxi hïtiretari Teoso sãkire atão inakari. Kona notananini tiretai hïte. Ikinimane atão inakari imarotakani tiretai hïte apaka. ² Atiretai hïte, kotxi atão inakari aua aãkixinireẽ. Atão inakari kaikotapika atekata ãtipirika.

³ Aïri Teoso, imi Xesosi Kristo pakini sikari ikinipoko erekari hïtemoni. Amonïkai hïte. Ikamaerekaxiniretaina hïte. Ininiãkara himarotari atão inakari. Himarotari Teoso tiraõki.

⁴ Iteene nipoxokoniua, kotxi nimarotari apanakini hïte kïpitapikari Teoso sãkire. Atão inakaranoka hïkama, kotxi aïri Teoso paniãtaua ikara atoko inakari akamini. ⁵ Nota tiretakini, ia nipaniãtai: "Matiretakakaua." Ikara Teoso paniãtakiti !amanerini. Akenakopiretapekari ikara Teoso paniãtakiti, merepitipanika Xesosi sãkire akenakotakasaaki. ⁶ Kisaakipa atiraõkiuata? Teoso paniãtakiti ikiniõtika akïpitakasaakira, iusaaki atiraõkiuata. Merepitipanika pikenakotapekari ia Xesosi paniãtakiti: "Matiraõkiuata ikiniõtika."

Kristo Omanatakani

⁷ Kaiãopokori kamisirienererini aua ikini itixiti. Ninoa sãkire: "Na kãkiti !itxaua Xesosi Kristo," itxana isãkirena. Ikara atoko inakani misirienetari kãkiti. Kristo omanatakani itxauana ninoa. ⁸ Erepaniko. !Hãuikapiri isãkirena atão minakati, kotxi ninoa nirekari ixipokinirina hïparïka Teoso ïkapani. Hinirekapitikari Teoso sikinii ikinipoko hïparïka ïki.

⁹ Kãkiti takanapiniãri Kristo oerekakiti sãkiretxiti, ikamari maerekati. Teoso nakiti !itxaua. Kãkiti ãtipirika auikiniãri Kristo oerekakiti, imoianatari aïri Teoso, imi pakini. ¹⁰ Kãkiti apokiniã paapoko, Kristo oerekakiti mauikakati, sãkiretxi atão minakati oerekakari, kona paupiritapiri ikaiкотini paapoko. !Papakapapiri iua. ¹¹ Iua apakapakari apaka kamari maerekati iuakata, kotxi auiritari atão minakati isãpiretini.

¹² Ninirekari ito nisãpiretinii, txamari !ninarekari aãt-sopaã nisãpiretakiti nitakini. Ninirekari naõkitinii hïte. Iusaaki asãkirauatako aãpisatoõtakakiniua, ininiã iteene apoxokoniua iusaaki.

¹³ Hïtariakori Teoso mereẽkini uai auakani iokanapireta hïtemoni. Ixinikamanapitaina hïte. Ameẽ.

3 Xoão

¹ Nota Xoão, mitxi Xesosi imarotakarino, niõkatsopata pite nitiretakiti Kaiomoni. Nitiretai pite, kotxi pite tiretari atão inakari Teoso sãkire.

² Nitiretakiti, ninirekari ereka pinini pauini. Nimarotari pãkixinire ereka inini. Iua atokotxikana ninirekari piĩto ereka inini pimamianareni ĩkapani. ³ Aĩtariakori mitxi hĩtemoni nota iokanatakini, apokapeka uai. Isãpiretanona pite iteene auikiniri atão inakari Teoso sãkire. Ikiniõtika pikamari Teoso sãkire iaõka. Atãonoka pikama. Ininiã ninoa minapiretakiti iteene kamapoxokonitano. ⁴ Namariteni atoko hĩtxaua, ininiã nikenakopiretakasaakiri ikiniõtika hĩkaminiri atão inakari Teoso sãkire iaõka, nipoxokoniuata. Ikara atoko inakari minapirenatxi, ninoa minapiretakiti, apia kamapoxokonitano nota.

⁵ Nitiretakiti peerekai pite, kotxi ikiniõtika pimoianatana aĩtariakori ereẽ apokakani. Mitxi !pimarotana ninoa, iuaritika pimoianatana. ⁶ Ninoa aĩtariakori sãpiretapekari pitiraõki Xesosi sãkire auĩãkanimoni uai auakanimoni. Paapoko iuaĩkana ipotrikasaakina, erekari ninoa amonitakiti pisikinina, kotxi Teoso apokaerekatari ikara atoko pitiretinina. ⁷ Ninoa takanapari aapokona Xesosi sãkire isãpiretinina ĩkapani. Xesosi sãkire mauĩãkani !isikana iamonitakitina ninoamoni. ⁸ Ininiãkara maãpakapana Xesosi sãkire sãpiretakani aãuapokoã. Ininiã amoianatana Teoso sãkire atão inakari iaripiretini ĩkapani.

Txiótepi, Temétxio Pakini

⁹ Niõkatsopatapeka Xesosi sãkire auĩãkanimoni ereẽ pauiniãtaã auakanimoni. Txamari Txiótepi inakori !ikĩpitari nõtãkikare. Iua iuikapikaua. Inirekari ninoa auĩtetiniri iua, ininiã !imaãkatari nisãkire. ¹⁰ Iua kamapiretapikaua ate. Kona ikarananini ikama. Apaka !apakapana aĩtariakori, hĩtemoni sikani. Apaka !auiritana apanakini apakapinina ninoa. !Auiritaikari aĩtariakori nirekaãkani apotiitiniua Teoso misãkiretiko aikotiã. Ereẽ napokasaaki, iusaakiko nisãpiretai hĩte iua apisatoõ ikinika maerekati ikamakiti.

¹¹ Nitiretakiti, !pikamapiri maerekani kamakiti atoko. Erekari kamakiti atoko inakarinanira pikamako. Erekari kamakari Teoso nakiti itxaua. Maerekati kamakari !imarotari Teoso.

¹² Temétxio inakoripekana, ikinimane sãpiretari iua ereka inini. Atão inakari Teoso sãkire oerekaua Temétxio kamakiti atão inini. Ate apaka sãpiretari iua ereka inini. Himarotari atão inakarinoka asãpireta.

¹³ Ninirekamari ito nisãpiretinii, txamari !ninirekari aãtsopaã nisãpiretakiti nitakini. ¹⁴ Ninirekari paĩtiki naõkitinii pite. Iusaaki asãkirauatako aãpisatoõ-takakauako.

¹⁵ Ninirekari Teoso kamaerekaxiniretinii. Aĩtariakori uai auakani sãpiretai ixinikamanapitinii. Pisãpiretana ikinikana aĩtariakori ereẽ auakani, axinikamanapitinina ninoa.

Xota

¹ Nota Xota. Xesosi Kristo nitiri amotakori nitxaua. Txiaiko itari nitxaua. Niokanatsopata kăkitimoni, Teoso akiritakinimoni, Teoso aïri tiretakinimoni. Xesosi Kristo nĭkatakiniimoni niokanatsopata.

² Teoso iteene amonĭkai. Iteene ikamaerekaxiniretai. Iteene itiretai.

Atăo Minakati Oerekakani

³ Hĭte nota tirketakini, Xesosi makatxakapekari himaerekani, nota maerekani apaka. Ninirekamari niĭkatsopatiniri amaerekani makatxakiko pirena hĭte-moni. Iuanoka ninireka niĭkatsopatiniri, txamari nix-inikari erekape ātiāo niĭkatsopatiniri. Ninirekari nĭtăkikinii. Teoso oerekakiti săkiretxiti inakitiakori-moni isikakiti hinĭkaenatariko. Teoso oerekakiti ikinika isikapekari inakitiakorimoni. !Hăuiritapiri apanakini koketiniri ikara ninoa oereĕkitikata. ⁴ Hĭte Xesosi săkire auĭăkani sauaki aua Teoso mapaxitakani. Merepanika ninoa apotiitakasaakiua hĭtekata, !himarotari kamisirienererini ininiuana. Ninoa koketari isăkirena Teoso săkirekata. Ninoa săkire: "Ate sirĭka anireĕkitokata, kotxi Teoso katiraĭkiri, ininiă iua !imisiritaua." Ikara atokora itxana ninoa. Xesosi Kristonokara aăuĭte. Apiananiri itxaua. Iuaritika ninoa !inirekari Xesosi. Kitxakapirĭka Teoso săkire iĭkatsopatakori săpiretari Teoso misiritiniri kăkiti ninoa atoko inakani.

⁵ Kitxakapirĭka Exito tixini auakani misiritana Xoteoakori. Himarotapekari ikara inakari. Ninirekari iuaĭkana hĭxinikiniri ikara inakari pirena. Teoso moianatana Xoteoakori, ininiă ninoa miteka, Exito tixini osipikinina ĭkapani. Hĭxinikariko ia: Teoso makatxakana ninoa iuasaaki imapinakanina ĭkapani, iuaritika mapa kasiriti napa atoko Teoso okana ninoa iua săkire mauiăkani.

⁶ Ātipekana nisăpiretai. Hĭxinikariko Teoso nitiriakori iaxitikini kitxakapirĭka. Teoso txĭkitakana ninoa auĭtetxi ininiuana, txamari !inirekaikarina Teoso paniătakiti ikaminina, ininiă itakanaparina auiniătaăna Teoso tixineĕ. Hĭxinikariko ia: Teoso paniătana ninoa ipiaă ikaikotinina ātipirika. Itixi xipokini ōtisaaki Teoso misiritanako ninoa.

⁷ Ātipekana nisăpiretai. Hĭxinikariko Sotoma sitatxiti, Komoha sitatxiti, apanakini sitatxiti apaka iuaătaă takote auakari. Iuaă auakani !inirekari Teoso paniătakiti ikaminina, ninoa Teoso nitiriakori atokokana. Maerekatnoka inirekapikana, kiki sirĭkini āti kikikata. Ininiă Teoso xipokari iuaă auakari sitatxiniri. Ninoa maerekani xika Teoso iokanatana ninoa arikatxi max-

ipokatimoni. Iuaă imisiritaăkapikana. Ikara ōtăkikaua maerekati amakamakani tĭkane.

⁸ Ninoa maerekati kamakani, kamisirienererini hĭte sauaki auakani, kitxakapirĭkarini atokokana itxana. Ixiniăkitina maerekati xika ninoaka ĭto imisiritauana. !Inirekarina Teoso ninoa auĭte ininiua. Imisăkirepiretarina Teoso nitiriakori iaxiti auakani. ⁹ Mikeo inakori Teoso nitiriakori auĭte itxaua, iuaritika !imisăkirepiretari āti Teoso nitiri iaxitikiri. Kitxakapirĭka iua Mikeo Satanasikata itaparakienatakakaua, kotxi Mikeo nirekari Moisesini ĭto ikatini, txamari Satanasini nirekari Moisesini ĭto iua inakiti ĭkapani. Iuasaaki Mikeo !imisăkirepiretari Satanasini. Ianoka isăkire: "Teoso misiritapanikaiko pite," itxari Satanasini. ¹⁰ Txamari ninoa kamisirienererini hĭte sauaki auakani misăkirepiretari ikinika imimaro-takinina. Ninoa ĭkrite kaxipiri ĭtopa auakani ĭkrite atokokana, kotxi ikamarina ĭtonani nireĕkiti. Ikara ĭkrite xipokanako ninoa.

¹¹ Teoso misiritanako ninoa. Kitxakapirĭka Kaiĭ inakori kamari maerekati. Iua maerekani atokokana ninoa maerekani. Kitxakapirĭka Paraăo inakori kamari maerekati txineiro apakapini ĭkapani. Iua maerekani atokokana ninoa maerekani. Kitxakapirĭka Koree inakori !inirekari Moisesini iauĭte ininiua. Iua atokokana ninoa !inirekari Teoso iauĭtetini. Ininiă ixipokaăkanako Koree xipokiko atokokana.

¹² Hăpotiitakasaakiua hinipokotini ĭkapani, ninoa kamisirienererini apaka nipokota hĭtekata. !Ipĕtauatana. Itxikotarina iua kiiniri imaerekanina xika. Ninoaka itiretaua. !Itiretarina apanakini. Ītima anikari katxiări iaxitikiri, ininiă katxiări napiniătaă āparaă kipa, takari aneini ĭkapani. Txamari ninoa kamisirienererini katxiări āki āparaă mauakinini atoko itxa. !Erekana kăkiti ĭkapani. Mitaăsaaki aua txipokori, txamari ninoa kamisirienererini mitaăsaaki aamina mariti atokokana ninoa. Aamina mariti ipĭkari atoko, kotxi !iminua. Ninoa iua atokokana, kotxi !ikamari erekari. Aamina mariti tokaăka. Ikotsa maporokaăka, ininiă atăo ipĭkari itxaua. Ninoa kamisirienererini ikara aamina atoko, kotxi ipinanako. !Ikaikotana Teosokata ātipirika.

¹³ Potxoari uiniti tsakati pamonĭkoniri atoko itxa ninoa kamisirienererini. Tsakati sori txiko atoko itxa ninoa maerekani. Iĭriki atoko itxana. Iua iĭriki sinimoni !kimarotikori. Ninoa sariko ipiămoni ātipirika ikaikotinina ĭkapani. Teoso mereĕri ikara ipiaătaă ninoa auini ĭkapani.

¹⁴ Kitxakapirĭka Enoki inakori săpiretapekari kamisirienererini pirena. Iua Enoki Adăo apika mekaniri apika mekaniri itxaua. Enoki txari:

Hätamatariko. Apiananiri apokako itiximoni ito-
maneri inakitiakorikata. Mio, apikomoni mio,
apikomoni mio, itxaãpokata inakitiakori iuakata ïkani.

¹⁵ Iua ikinipoko misiritiko sãpiretakari itxaua. Iua
apokasaaki, isãpiretanako maerekati kamakani misiri-
tiko, Teoso manireëkani misiritiko, kotxi Teoso !ipotxi-
tari ninoa kamakiti. Ninoa misãkirepiretapikari Teoso.
Ninoa maerekani xika, Teoso imanirekakanina xika,
imisiritaãkanako,
itxa Enoki sãpiretakiti kitxakapirïka.

¹⁶ Ninoa kamisirienererini ätipirika tsoatapika. Ätipiri-
ka apoïtapikana apanakini. Iïtona nireëkitinanira ika-
mana. Iuikauana. "Peerekai pite," itxana ätimoni
inireëkitinani apakapinina ïkapani.

Ötãkipirenatxi

¹⁷ Nitiretakini hïxinikariko aãuïte Xesosi Kristo
iokanatakini sãpiretakiti akokaxiti. ¹⁸ Ninoa txai:
"Xipokatxi öti kaimapeka inini manapi apokanako
kikiakori hïte napetakani tïkane. Ninoa kamariko ni-
noaka nireëkiti, Teoso manireëkiniti," itxana Xesosi
Kristo iokanatakini sãpiretakiti. ¹⁹ Ninoa maerekani xi-
ka kãkiti txitakakaua. Ninoa kamisirienererini kamari
ïïtona nireëkitinoka. Erekar Matamatakoti lauinana ni-
noa.

²⁰ Hïtepekana nota tirketakini, iteene hãuikapikariko
Teoso oereëkiti. Ikara atoko hininiã, kataparaxinireiko
hïte. Hãuikariko Teoso oereëkiti, kotxi Teoso sãkire itx-
aua. Himisãkiretariko Teoso. Erekar Matamatakoti

oerekai atão hïsãkirauatini ïkapani. ²¹ Maerekati ka-
makanii, iuaritika aãuïte Xesosi Kristo !imisiritali. Iua
anikai ätipirika iuakata hãuini ïkapani. Ikara hiãta-
pakasaaki, ätipirika hïxinikapikariko Teoso tiraöki hïte
ïkapani. !Hïtakanapapiri iua.

²² Apanakini !auikapikariki ikinika Teoso oereëkiti,
iuaritika !hïtxitapena. Himoianatanako ninoa iteene
auikiniri ïkapani. ²³ Pamonökoniri, kãkiti kamakasaakiri
maerekati. Xamina tirinakari atoko itxa imisiritikona
imaerekanina xika. Ininiã hïsãpiretanako Teoso sãkire,
imisiritikona apokini apisapanika. Xamina tirinakari äki
katxakakari pimakatxakini atokokana itxa, pisãpire-
takasaakiri Teoso sãkire ninoamoni. Apanakinipekana
hiamonïkako. Hiamonïkasaakina, erepaniko, kotxi pa-
monökoniri ninoa maerekani. Homanatariko
maerekati ninoa kamakiti, hïte makamakaniri ïkapani.

Peerekari Teoso

²⁴ Teoso kaposotiireri nïkataua maerekati amaka-
makani ïkapani. Iua anikaua iua apisatoö apoxokoniri-
tika. Iuasaakiko amaerekani !auaikako. Peerekari aãui-
ni iua apisatoö. ²⁵ Äti Teoso !auari. Iuanokara Teoso tx-
aua. Iuanokara kimaroreri. Amaerekani makatxakakari
itxaua, kotxi aãuïte Xesosi Kristo ipina ate ïkapani. Iua
iotximere aua, kotxi imaerekani !auari. Auïtetxiakori
auïte itxaua iua. Kaposotiireri iua. Iposotari ikinipoko
ikamini. Itixi kamiko apisapanika ikara atoko itxa
Teoso. Uatxa ikara atoko itxapanika Teoso. Ikara atoko
itxapikako ätipirika Teoso. Amëë.

Apokorípisi

Ia Aätsopa Oerekaua Xesosi Kamakiti

1 Ia aätsopa oerekari Teoso nakitiakori Xesosi Kristo paítiki kamaenetakiti. Teoso iokanitari inítiri iaxitíkiri Xoõomoni Xesosi Kristo kamaenetakiti oereki-ni íkapani. ² Ikinika Xoõo atamatakiti, ikinika ikenakotakiti pakini isäpireta ia aätsopaã. Ikara atoko isäpiretaua ate Teoso säkire, Xesosi Kristo säpiretakiti iua-moni. ³ Ia aätsopa atatsopatakani Teoso takariko erekari ninoamoni. Teoso takariko erekari ia isäkire kenakotakanimoni, ia isäkire kípitakanimoni, kotxi ikinika Xoõo iõkatsopatakiti okatapaniri apokini.

Xoõo Iõkatsopare

⁴ Nota Xoõo. Niokanitari ia niõkatsopare Teoso mereëkinimoni. Setxi sitatxiti Ásia inakori tixini auakanimoni niokanata niõkatsopare.

Teoso sikari ikinipoko erekari hitemoni. Ika-maerekaxiniretai híte. Uatxa iua aua. Merepitipanika kitxakapiríka iua aua. Iua ätipirika auapikako. Setxi matamatakoni iaxitíkiri Teoso topäkiniätaã apisatoõ auakani sikari erekari hitemoni. ⁵ Xesosi Kristo apaka sikari erekari hitemoni. Atão inakarinoka säpiretakari itxaua iua. Iua merepitipanika õkitikaua ipíkani sauaki. Apaka itixi auakani auíteakori auíte itxaua iua.

Iua ate tiretakari. Ipina ate íkapani amaerekani imaktxakini íkapani, ininiã isikakaua erekari akamini íkapani. ⁶ Itxíkitakaua auítetxiakori aniniua. Itxíkitakaua sasetotxiakori aniniua, kotxi asäkirauata Teosokata. Ininiã atxari Xesosi:

“Ätipirika peerekai pite. Ätipirika pitenokara kaposotiireri. Ameë.”

⁷ Hätamata, Xesosi napani. Iua inako katxiärikata. Iuusaaki ikinimane kãkiti atamatariko. Aamina ípiriãmitakari nopini iua tokakitakani apaka atamatariko iua. Iuusaaki ikini uãkati kãkiti atapariko iua. Ninoa at-apakasaakiri iua, itxiapatana, akiripoakatana maerekati ikamakitina xika. Ikara atoko apokako. Ameë.

⁸ Apiananiri txari:

—Iõkatxi merepitipanika auakari Aopa inakori atoko nitxaua. Iõkatxi imapotõkire auakari Ómika inakori atoko nitxaua. Uatxa naua. Merepitipanika naua. Katana nota auapikako. Ikini posotiiretxi aua notamoni —itxa.

Xoõo Atamatarari Aítari Iaxitíkiri

⁹ Nota Xoõo, hítari. Nikamari Xesosi Kristo nireëkiti, ininiã himoianari nitxaua, kotxi ätipirika nimíteenekari nimisiritiko, híte misiritiko himíteenekini atoko. Ikara misirikaretxi apokapitika atemoni, kotxi aäuíte Xesosi Kristo nakitiakori atxaua. Nota aua Patamosi inakori pokomiríiti. Nitakaãka uai, kotxi Teoso säkire nisäpireta apanakinimoni. Ikinipoko nimarotakiti Xesosi Kristo pirena nisäpiretini xika kãkiti takano nota uai. ¹⁰ Kãkiti Apiananiri xinikini õtisaaki, Erekari Matamatakoti sikaimaroretano nota. Iuusaaki nikenakotari säkiretxi nitikinimoni. Säkiretxi apiaenetakari, trõpetata atoko nikenakota. ¹¹ Itxari:

—Kãkiti apisapanika naua nota. Nota auapanika ikinipoko xipokaãka atoko. Piõkatsopata aätsopaã patamatakiti tíkane. Eereka piokanatarari iua aätsopa kãkiti Teoso mereëkinimoni setxi sitatxiti auakanimoni Ásia tixineë. Piokanatsopata Épeso sitatxiti auakanimoni, Esimina sitatxiti auakanimoni, Pékamo sitatxiti auakanimoni, Txiatxira sitatxiti auakanimoni, Satxima sitatxiti auakanimoni, Piratéopia sitatxiti auakanimoni, Araotxiséia sitatxiti auakanimoni pakini —itxa notamoni.

¹² Ininiã eereka nikirioka notakata säkirauatakari natamatini íkapani. Nikiriokasaaki, natamatarari setxi tirikapi topäkini oro kamakori. ¹³ Tirikapi topäkiniätaã, natamatarari kãkiti itari iaxitíkiri, iuaritika ipinimoni itxaua. Iua mäka õtanori. Ikitiãpeka apoka. Ipakiomatara atoko oro kamakoro aua itorotamoni. ¹⁴ Iãko iteene kasarori mapoa atoko itxa. Xamina tirinakari atoko itxa oki. ¹⁵ Ikiti mëkoríka pirõsi xamina äki imëkoríkinini atoko. Isäkire ene äparaã torõkani atoko. ¹⁶ Iuako ikikomoni imaíkaro setxi iõriki. Inamaã iouata mitari pokíka. Iua iouata ipi uanaro aua. Atokatxi iotximere atoko itxa itoõ.

¹⁷ Natamatakasaakiri, nirika ikitimoni. Koriãkari atoko nitxa. Ininiã iuusaaki itakari iuako ikikomonikiri nota nopini. Itxano:

—Kona pipíkarauatape, kotxi ikinipoko auini apisapanika nota aua. Ikinipoko xipokaãka atoko nota auapanika. ¹⁸ Nota auãkipika inakarino. Nota koriãkaripekano, iuaritika hätamatano. Ätipirika auãki inakarino nota. Ameë. Kaposotiireno nota, kotxi nipaniãtari kãkiti ipinini. Niposotiire aua niokanatiniri kãkiti maerekati kamakani misiritikoãtaã. ¹⁹ Piõkatsopatari mitxi patamatakiti, uatxaika patamatakiti pakini. Apikomoni noerekakiti apaka piõkatsopata, kotxi no-

erekaiko katana itiximoni ĩkari. ²⁰ Kiripa ninoa iōriki setxi pakini niuako nikikomoni auakani? Teoso nitirirakori itxauana. Ninoa anikari nota sākire nisākire auiākanimoni ninoa setxi sitatxi auakanimoni. Kiripa ninoa setxi tirikapi topākini oro kamakori? Nisākire auiākani ninoa setxi sitatxi auakani itxauana —itxa Xesosi Xoāomoni.

Xesosi Iokanapirena Épeso Auakanimoni

2 Xesosi misākiretari Xoāo: —Piokanatariko ia nisākire Teoso nitirimoni, Teoso sākire auiākanikata auakarimoni Épeso sitatxi-tiā:

Ninoa setxi iōriki maĩkakarino nota. Nimaĩkari ninoa iōriki niuako nikikomoni. Ninoa setxi tirikapi topākini oro kamakori sauaki tĩpokotakarino nota. Ia nota sākire. ² Nimarotari ikinika hĩkamakiti. Nimarotari itori parĩkatxi pamimari hĩkama. Parĩkatxi kamimari inakasaaki, kona hĩtakanapari. Maerekati kamakani apokasaaki hĩtemoni, kona hĩte apakapana. Apokapeka apanakini kākiti hĩtemoni. Itxana: “Teoso iokanatakiniraua ate.” Txamari, kona atāo ninoa sākire. Nimarotari kona hĩte auiritana ninoa kaminiri maerekati. Hĩte atamakaerekatana. Eereka himarotari kona atāo ninoa sākire. ³ Himisiritaāka nisākire hĩsāpiretini xika, iuaritika himĩteenekari ikinipoko nota ĩkapani. Kona hĩsāpaka hĩparĩkauatini nota ĩkapani.

⁴ Ikara hĩkamakiti erekari, txamari hĩtakanapari hĩtoretinino. Merepanika hĩtoretano. ⁵ Hĩxinikariko merepitipanika hĩtoretinino. Uatxa poiāoka hĩtoretano. Iuaĩkana hĩkamariko merepitipanika hĩkamakiti atoko. Himatakanapakaniāri ikara himaerekani, patimari napokini hĩtemoni. Nimakaxakariko hĩtirikapite topākini. Ininiā Teoso sākire auiākani lauauka ereē, himatakanapakaniāri ikara himaerekani. ⁶ Auapitika atāo hĩkamakiti, kotxi hĩte omanatari Nikoraito inakoni kamakiti. Nota apaka omanatari ninoa kamakiti.

⁷ Kakenakokii hĩte, ininiā hĩkenakotariko Erekari Matamatakoti sākire Teoso sākire auiākanimoni. Maerekati makamakati nauiritako amātiiri Teoso tixine apanĩkaki auakari itximini. Iua amātiiri tximakari auapika ātipirika Teosokata, —itxa Xesosi Épeso auakanimoni.

Xesosi Iokanapirena Esimina Auakanimoni

⁸ —Piokanatariko ia nisākire Teoso nitirimoni, Teoso sākire auiākanikata auakarimoni Esimina sitatxi-tiā:

Ikinipoko auini apisapanika nota aua. Ikinipoko xipokaāka atoko, nota auapanika. Nipĩpe, iuaritika iuaĩkana nōkitikaua. Uatxa ĩnipinaika. Ia nota sākire. ⁹ Nimarotari hātatsiire. Nimarotari hĩte minakati lauari. Iuaritika ikinipoko erekari aua hĩtemoni. Nimarotari apanakini misākirepiretinii hĩte. Ninoa txa: “Xoteoakorira ate.” Txama kona atāo Xoteoni ĩtxauana. Ninoa apotiitiniātaāua Satanasi nakiti.

¹⁰ Kona hĩpĩkapiri himisiritiko ĩkapani ĩkari. Satanasi takari apanakini hĩte kateia āki ataerekatinii ĩkapani. Himisiritaākako tesi pakini ōti. Atxiĩti hĩpina nisākire hāuikini xika, iuaritika kona hĩtakanapapiri nisākire hāuikini, ininiākara nisikai ātiāo saporīēta. Iua saporīēta apakapakari auapika ātipirika Teosokata.

¹¹ Kakenakokii hĩte, ininiā hĩkenakotariko Erekari Matamatakoti sākire Teoso sākire auiākanimoni. Maerekati makamakati kona iuaĩkana ikoriāika, —itxa Xesosi Esimina auakanimoni.

Xesosi Iokanapirena Pékamo Sitatxiti Auakanimoni

¹² Eereka Xesosi iuaĩkana misākiretari Xoāo: —Piokanatariko ia nisākire Teoso nitirimoni, Teoso sākire auiākanikata auakarimoni Pékamo sitatxi-tiā:

Notamoni auari oa iouata ipi uana auakito. Ia nota sākire. ¹³ Nimarotari ikinika hĩkamakiti. Nimarotari hāuiniātaā. Ereē Satanasi kākiti auĩte itxaua. Iuaritika hĩte auikari nota sākire. Kona hĩte takanapari nisākire hāuikini. Ātxipa inakori auama hĩte sauaki. Iua sāpiretapikari nisākire kākitemoni. Ikara xika okapeēka ereē Satanasi auiniātaā. Iuaritika kona hāsikano. !Hĩtakanapari nisākire hāuikini.

¹⁴ Txamari auapitika hĩkerokakiti. Aua kākiti hĩte sauaki Paraāo inakori sākire auiākani. Kitxakapirĩka iua oerekari Paraki inakori kākiti Isaeo auakani imisirienetini. Iua Paraki xika ikamarina maerekati, kotxi inikarina xinitxi teoso kamakorimoni sikakori. Oerekana kākiti kaminiri maerekati ĩto nireēkiti āti kākiti ĩtokata. !Apakata kākiti auikiniri Paraāo sākire.

¹⁵ Hĩte sauaki aua kākiti Nikoraito inakoni sākire auiākani. Nota omanatari ninoa auiākiti sākiretixiti.

¹⁶ Hĩtakanapariko ikinika himaerekani. Hĩkanapiriāko notamoni. Ikara atoko himakamakaniā, patimari hĩtemoni napokini. Ininiā nineenamauata maerekati kamakanikata mitaro iouataā ninamaā auakaroā.

¹⁷ Kakenakokii hĩte, ininiā hĩkenakotariko Erekari Matamatakoti sākire Teoso sākire auiākanimoni. Maerekati makamakati nisikariko komiri iaxitikiri kipatakori. Apaka nisikariko kai kasarori maerekati makamakanimoni. Iua kai nopini iōkataāka kākiti uāka amaneri apanakini mimarotakinini. Apakapakarinani imarotari iuāka amaneri, —itxa Xesosi Pékamo auakanimoni.

Xesosi Iokanapirena Txiatxira Auakanimoni

¹⁸ Eereka Xesosi iuaĩkana misākiretari Xoāo: —Piokanatariko ia nisākire Teoso nitirimoni, Teoso sākire auiākanikata auakarimoni Txiatxira sitatxi-tiā:

Teoso ākirirano nota. Noki xamina tirinakari atoko itxa. Nikiti mēkorĩka pirōsi atoko itxa. Ia nota sākire.

¹⁹ Nimarotari ikinika hĩkamakiti. Nimarotari hĩtiraōki. Nimarotari iteene hāuikari nisākire. Nimarotari iteene hĩparĩkauata nota ĩkapani, apanakini ĩkapani apaka. Hĩparĩka nota ĩkapani pasāpaniri inakasaaki,

iuaritika hīkamapanikari nota īkapani. Uatxa api-aāpota hīparīka nota īkapani.

²⁰ Itxama, nisāpiretaiko hīkerokakiti. Hīte auiritaro sito, Xesapeo inakoro, maerekati okamini hīte sauaki. Oa txa: “Teoso sākire sāpiretakarono nota.” Otxama, omisirienetana ninitiriakori. Oa xika, ninoa kamari maerekati iītona nireēkiti apanakinikata isirīkinina. Apaka ninoa nikari nipokori teoso kamakori sikakori. ²¹ Niātapari otakanapiniri omaerekani, txamari kona onirekari otakanapiniri omaerekani. ²² Ininiā nota kamariko oa amianatini. Oakata sirīkakani matakanapakaniāro, iteene ninoa atatsiirauata. ²³ Oa anaakori nokapitikako. Ikara atoko inakasaaki, ikinimane Teoso sākire auīākani imarotariko nimarotari ikinika kākiti ākixinire, ikinika ixinikakiti pakini. Ininiā erekari nisikako erekari kamakanimoni. Apaka nimisiritari maerekati kamakani. Hīkamakiti iaōka nīkitxitai hīte.

²⁴ Uatxa nimisākiretai hīte apanakini Txiatxira sitatxiti auakani. Hīte auikari Teoso sākire. Hīte laukari Xesapeo sākire. Hīte kona apaiaōkari Satanasi oerekakiti, iua imarore. Kona ninirekari nisikinii apikomoni parīkatxi nota īkapani, kotxi uatxa iteene hīparīkauata nota īkapani. ²⁵ Ianoka ninireka hīkamini. Hīte auikari nisākire, ininiā hāuikiniritika nisākire, nikanapiriāko.

²⁶ Iua maerekati makamakati, ātipirika nipaniātakiti kamakari, iuamoni nisikariko niposotiire itixi auakani auīte ininiua. ²⁷ Teoso sākire kitxakapirīkari txari:

Auītetxi itxauako. Itapararitika ipaniātana ninoa nireēkiti ikaminina. Imakamakaniārina inireēkiti, imisiritana ninoa, tiitxi kamakari tii imanirekakiniti ipakauanakini atoko. Niri posotiire napakapakiti atoko iua apakapa. ²⁸ Apaka nisikariko iōriki īkanōkapanikero iuamoni, ininiā notaka nisikaua iuamoni, kotxi iua iōriki atoko nitxaua. ²⁹ Kakenakokii hīte, ininiā hīkenakotariko Erekar Mata-matakoti sākire Teoso sākire auīākanimoni, —itxa Xesosi Txiatxira auakanimoni.

Xesosi Iokanapirena Satxi Auakanimoni

3 Iuaīkana Xesosi misākiretari Xoāo:
—Piokanatariko ia nisākire ninitirimoni, Teoso sākire auīākanikata auakarimoni, Satxi sitatxitiā:

Notamoni aua ninoa setxi Matamatakoni Teoso nakiti. Notamoni aua ninoa setxi iōriki. Ia nota sākire. Nimarotari hīparīka. Apanakini sāpiretai hīte auāki hinini hīxinire, txamari Teosomoni koriākanipekarai hīte. ² Himereka. Araōkire hītxapaniko. Hīsikataparatariki erekari hākixinireē auakari, kotxi iua erekari ipinaariāpota. Ininiā hītxīkitakari iua erekari auāki inini iuaīkana. Notamoni hīparīka Teoso apisatoō na atāo. ³ Hīxinikariko hāpakapakiti, apaka hīkenakotakiti. Hīkīpitariiko hīkenakotakiti. Hītakanapariko maerekati. Erekar hīkamako, kotxi kītiriri apokini atoko napokako uai. Kākiti kona

imarotari kītiriri apokini manapi. Ikara atokokana nitxako nikanapiriākasaaki.

⁴ Hīte Satxi sitatxiti auakani sauaki auapanika apanakini maerekati makamakani. Ninoa auikapitikari nisākire. Ninoa kākiti imāka matxikotakani atoko itxana. Ininiā notakata isanako. Imākana kasarori. Ikara atoko nikaminana, kotxi ninoa kamari erekari nipaniātakiti.

⁵ Maerekati makamakani ieretakariko mākatxi kasarori. Kona noakapaniriko iuākana naātsopateē. Kākiti iuākana ikara aātsopaā auakani ātipirika auapikako Teosokata. Ikara atoko ininiā, nisāpiretari iuākana nirimoni, initiriakori iaxitiki pakinimoni. Nitxana: “Nota nakitiakori itxauana ninoa.”

⁶ Kakenakokii hīte, ininiā hīkenakotariko Erekar Matamatakoti sākire Teoso sākire auīākanimoni, —itxa Xesosi Satxi auakanimoni.

Xesosi Iokanapirena Piratēopia Auakanimoni

⁷ Iuaīkana Xesosi misākiretari Xoāo:
—Piokanatariko ia nisākire Teoso nitirimoni, Teoso sākire auīākanikata auakarimoni Piratēopia sitatxitiā:
Nota maerekati makamakatarano. Atāo inakarinani sāpiretakaritarano nota. Kaposotiireri auītetxi Tavii inakori atoko nitxa, kotxi nota matakakakiti, kona āti totari. Nota totakiti kona āti matakakari. ⁸ Nimarotari hīte parīka. Hātamata. Hīparīka nota īkapani aapokotxi tore matakakakori atoko itxa. Kona āti posotari iseretiniri. Ininiā kākiti liposotari iotokakinii hīte nisākire hīsāpiretini. Ikara atoko nikaminii hīte, kotxi kona kataparai hīte. Ikara atoko nikaminii hīte, kotxi hīkīpitari nisākire. Kona hīkipatari nisākire apanakini apisatoō. ⁹ Apanakini txari: “Atāo Xoteoakori atxaua.” Txamari Satanasi nakitiakori itxauana. Paxirari ninoa sākire. Nika-mariko ninoa kapotoreēkiniāua hīte apisatoō. Iuasaaki ninoa txako: “Atāopitikara Xesosi tiretapitikai.” ¹⁰ Hīkīpitapekari nisākire. Kamonōkoniri inakasaaki, kona hītakanapari nisākire, ininiākara apia maerekati ikini itixiti apokasaaki, iuasaaki ninīkataiko hīte. Iua maerekati kona misiritai hīte. Iua maerekati apokako itixi auakani atamakaerekatini īkapani.

¹¹ Erepaniko, patimapaniriko napokini ereē. Ātipirika hīkamariko erekari. Hītakanapapikariko maerekati. Ininiā iuasaaki āti kona posotari imaktxakiniri auītetxi saporietane hītemoni nisikakiti. !Imaktxakarina ikara hīparīka īki. ¹² Nikamariko maerekati makamakati itīkare mina atoko inini niTeosone misākiretiko aikoti āki. Auapika Teoso misākiretiko aikoti āki, ininiā !itakanapari Teoso sākire. Niōkatariko niTeosone uāka iua nopini. Apaka niōkatariko Teoso sitatxine uāka iua nopini. Ininiā apanakini imarotari Teoso nakitiakori ininiuana ninoa. Iua Teoso sitatxine Xerosareē amaneri iua tixine katxakakari. Iua maerekati makamakati nopini niōkatariko apaka nota uāka amaneri.

¹³ Kakenakokii hīte, ininiā hīkenakotariko Erekarī Matamatakoti sākire Teoso sākire auīākanimoni, —itxa Xesosi Piratéopia auakanimoni.

Xesosi Iokanapirena Araotxiséia Auakanimoni

¹⁴ Iuaīkana Xesosi misākiretari Xoāo: —Piokanatariko ia nisākire Teoso nitirimoni, Teoso sākire auīākanikata auakarimoni Araotxiséia sitatxitiā:

Niuāka “Ameē.” Nota atāo sākiretxiti sāpire-takarikarano. Nikamari ikinika nisāpiretakiti. Merepanika nikamari ikinipoko. Ininiā ikinipoko auīte nitxaua nota. ¹⁵ Nimarotari ikinika hīparīka. Hītixari: “Nauikapitiki Xesosi sākire.” Txamari kona iteene hinirekari hīkaminiri nipaniātakiti. Apaka kona iteene hinirekari hītakanapiniri nisākire. Kona kapatakari atokoni hītixaua hīte. Kona katxīkareri atokoni hītixaua hīte. Poomari atoko hītixaua. Notamoni apiaerekata kapatakari atoko hininiua hīte. Iuasaaki iteene hinirekari hīparīkauatini nota īkapani. Iteene himanirekakaniāri hīparīkauatini nota īkapani, apiaerekata katxīkareri atoko hininiua hīte, nisākire ikinika hītakanapini. ¹⁶ Notamoni hīte āparaā poomari atoko hītixa. Ininiā kona āparaā kapatakaāri atoko !hītixa. Apaka kona āparaā katxīkareēri atoko !hītixa. Ikara atoko inakasaaki !ninirekai. Ininiā mapara nikanakai hīte. ¹⁷ Hīte txa: “Katxineirotea ate. Katiiua ate. Apikomoni anirekakiti !uari,” hītixa. Txama kona himarotari hākixinireē iteene himatinaniuatini. Hākixinireē minakati !uari. Hākixinireē mokiri atoko hītixaua. Kasarari atoko hītixaua hākixinireē. Ikara atoko hininiā, kona himarotari Teoso. ¹⁸ Nōtākikai hīte himotiniri notamoni auakari oro atoko inakari. Oa oro xamina oeretakito. Ikara atoko hīkaminiā, ikinika hinirekakiti auako hītemoni. Hiamotariko mākatxi kasarori notamonikiri hīeretakini īkapani, ininiā kona hīpētatauata kasara hinini xika. Ikara atoko hīkaminiā, hākixinire !uari maerekati. Hiamotariko apaka pinītxi notamoni auakari hōki īkapani, ininiā atāo hīposota hātamarauatini.

¹⁹ Nitiretakini nōtākika, apaka noerekana. Ininiā ikinipoko atāo hīkamako maerekati hītakanapini īkapani. ²⁰ Hātamatakoto. Hākixinire toreē nota auapeka. Nota haāpoko maparakiri akiritakari atoko. Hīkenakotiniāri nakiritinii, hōsereiniāri hākixinire tore, niīroā hītekata nikaikotini īkapani. Iuasaaki ninipokota hītekata. Hīte nipokota notakata.

²¹ Nauiritari maerekati makamakati topākini notakata auītetxi topanere nopini. Iua auītetxi topanere nota nakiti. Iua atokotxikana nota topāka nirikata auītetxi topanere nopini iua nakiti nopini, kotxi maerekati makamakati nota apaka txaua.

²² Kakenakokii hīte, ininiā hīkenakotariko Erekarī Matamatakoti sākire Teoso sākire auīākanimoni, —itxa Xesosi Araotxiséia auakanimoni.

Iaxiti Auītetxi Topanere

4 Eereka natamatari iaxiti tore. Itore imatakakaāka. Merepanika nikenakotari trōpeta atoko inakari. Kākiti sākire atoko itxa. Imisākiretano: —Uai pina notamoni. Noerekaiko katana auakari tīkane.

² Iuasaakipeka Erekarī Matamatakoti anikano. Iuasaaki natamatari auītetxi topanere iaxiti. Topākakari aua iua nopini. ³ Iuaā topākakari kai peereri pomēkoriri atoko itxa. Iua kai satónia inakori atoko. Apaka āti kai sátxio inakori atoko itxa iua topākakari. Kisi ākitari iua auītetxi topanere. Iua kisi kai esimeráota inakori atoko itxa.

⁴ Iua ītinikata aua vītxi koatro pakini topaneretxi. Vītxi koatro pakini totiakori topāka iua topaneretxi nopini. Ninoa māka kasarori. Ikiina aua saporīēta oro kamakori. ⁵ Auītetxi topanereātaā atamataāka ito mēkokari. Iotxira, iokaamori aua iuaātaā. Iteene poenexitiri. Iua auītetxi topanere apisatoō aua setxi tirikapi. Setxi Matamatakoni Teoso nakitiakori itxauana ninoa setxi tirikapi.

⁶ Iua auītetxi topanere apisatoō ipoa ātakaāri atoko itxa. Auītetxi topanere ītinikata aua koatro Teoso tixine auakani. Ninoa okītxinoka xāpokaītotakini. Auana okina ikini iītoāna. Itorotaāna aua okina. Iporikiāna apaka aua okina. ⁷ Okītxinoka xāpokaītotakiti āti, ākiti atoko itxa. Ātipekana kema auīte atoko itxa. Ātipekana aua kiki toō atoko. Ātipekana kokoi araākari atoko itxa. ⁸ Ninoa ikininape aua imīkitana seisi pakini. Imīkitana nopini, ipatapi apaka okina aua. Kona itomatana. Ikinipokamarariti, ikini īkanōkati itxana:

“Erekai. Erekai. Erekai. Teoso Apiananiri pitxaua. Kaposotiireri pitxaua. Ātipirika auakarii. Kitxakapirīka auakarii. Uatxa auakarii. Katana apaka pite auapanika,” itxana ātipirika.

⁹ Ninoa okītxinoka xāpokaītotakini xipoātakasaaki, ixikaretarina Teoso paxitiko pirena. Ixikaretarina: “Ikinipoko ikamakiti ate īkapani erekarinoka. Peerekari iua auītetxi topanere topākakari, ātipirika auapika inakari.” Ninoa xikaretari ikara Teoso īkapani. ¹⁰ Ninoa vītxi koatro pakini totiakori xikarauatakasaaki, ikapotoeēkauana ixitimoni iua auītetxi topanere nopini topākakari apisatoō. “Ateosone,” itxana iua ātipirika auapika inakarimoni. Itakarina isaporīētane Apiananiri apisatoō, kotxi Teosonokara ikinimane auīte. Iuasaaki itxana:

¹¹ “Apiananiri, aTeosone pitxaua. Erekai pite, ininiā apakatapitika apaxitinii. Apakatapitika ikinimane sāpiretinii: ‘Peerekai.’ Apakatapitika pite apakapiniri ikini posotiiretxi. Ikara atāo, kotxi pite kamari ikinika. Pite kamari ikinika, kotxi pite nirekari pikaminiri. Pite nirekari ikinipoko auini,”

itxana ninoa vītxi koatro pakini totiakori.

Aãtsopa Iapiriãkori Pirena

5 Iuasaaki natamatari aãtsopa iapirikakori iua auítetxi topanere nopini topãkakari uakoã. Iuako ikikomnikiriã aua. Iua aãtsopa auari iõka äkiriko, inopinimoni pakini. Iua aãtsopa aua setxi popitari kãkiti makatamëkakaniri ïkapani. ² Iuasaaki natamatari äti Teoso nitiri iaxitikiri. Kataparari iua. Itaparasãkireritika itxa:

—Kiripa apakata imaktxakiniri ia popitari? Kiripa posotari ikatamëkiniri ia aãtsopa? —itxa.

³ Itxama, kona auari iaxiti auakari, kona auari itixi auakari, apaka kona auari itixi patapi auakari, iua aãtsopa katamëkakarari !auari. Ninoa !iposotari ikatamëkinirina iua aãtsopa. !Iposotarina atamatinirina iua aãtsopa äki.

⁴ Ininiã iteene nitxiapata, kotxi iua aãtsopa iapiriãkori katamëkakarari !auari. Erekarari kamakarari !apokaãka ikatamëkiniri ïkapani, atatsopatiniri ïkapani. ⁵ Iuasaaki ninoa totiakori äti txari notamoni:

—Kona pitxiapatape. Patamata ikiraã. Äkiti atoko inakari iua. Xotaa apika mekaniriakori auíte iua. Tavii apika mekaniri iua. Oerekapekarari Satanasi poiãori inini. Iua apiata. Ininiã iuanani posotari ikatamëkiniri iua aãtsopa iapiriãkori. Iuanani posotari imaktxakiniri ninoa setxi popitari —itxa iua toti.

⁶ Iuasaaki natamatari soti auíte okakori atoko. Iua itima iua auítetxi topanere apisatoõ. Ninoa ipi ipi pakini okïtxinoka xãpokaïtotakini, ninoa totiakori pakini äkitari iua. Setxi iko, setxi oki pakini aua iuamoni. Setxi oki aua iuamoni, kotxi setxi Matamatakoni Teoso naki-tiakori aua. Teoso iokanatana ninoa ikini itixitimoni.

⁷ Iua soti auíte atoko inakari sari iua auítetxi topaneremoni. Imaïkari aãtsopa topaneretxi nopini topãkakari uakoã auakari. Iuako ikikomnikiriã aua.

⁸ Imaïkasaakiri, ninoa koatro okïtxinoka xãpokaïtotakini, ninoa vïtxi koatro totiakori pakini patimari ipamakinina soti auíte apisatoõ. Ikinikana auari arpa inakori xikari ikaminina ïkapani. Imakinikana auari kopitipaki oro kamakori. Naia kopitipaki xãpoka koria atoko inakari peeremariri. Ia kamariãro Teoso sãkire auiãkani sãkire iuamoni.

Amaneri Xikariti

⁹ Iuasaaki ninoa xikaretari amaneri xikariti. Ixikaretarina:

“Pitenani apakata papakapiniri iua aãtsopa iapiriãkori. Pitenani apakata pimaktxakiniri popitari, kotxi pitenanira erekari. Pite okaãka. Piarëkaã piamotaua ate Teoso ïkapani. Piamotapekaua ikini uãkati kãkiti sauaki. Ikini äti uãka sãkire sãkiretakani sauaki piamotapekaua. Ikinika itixiti auakani sauaki piamotapekaua ate.

¹⁰ Pite txïkitakaua ate auítetxiakori aniniua, sasetotxiakori apaka aniniua, Teoso ïkapani aparïkauatini. Ininiã itixi auakani auíte atxauako ate.”

¹¹ Iuasaaki natamatari itomaneri Teoso nitiriakori. Nikenakotari ninoa sãkire. Kaiãopokori ninoa. Seï mio, apikomoni seï mio, apikomoni seï mio itxaãpokatana. !Apakata ninoa iaõtiko. Ninoa äkitari iua auítetxi topanere, okïtxinoka xãpokaïtotakini, totiakori pakini.

¹² Itaparasãkireritika ixikarauatana. Itxana:

“Soti auíte okaãka kãkiti ïkapani. Ininiã ätipirika apakata iua apakapiniri posotiiretxi, ikinika erekari, imaroretxi, taparãtxi pakini. Apakata ikinimane paxitiniri iua. Apakata ikinimane sãpiretiniri iua ereka inini. Apakata ikinimane iuikiniri iua.”

Ikara atoko ninoa xikarauata.

¹³ Ikara eereka nikenakotari ikinika iaxiti auakani, ikinika ïkorapokoriti auakani, ikinika itixi patapi auakani, ikinika potxoari uiniti nopini auakani, ikinika potxoari uiniti äki auakani pakini xikarauatini. Itxana:

“Ikinika erekari ätipirika aua iua auítetxi topanere topãkakarimoni, iua soti auíte pakinimoni. Ikinika ätipirika paxitana. Ikinika ätipirika txari: ‘Peerekana ninoa.’ Ikinika taparãtxi ätipirika aua ninoamoni.”

¹⁴ Ininiã ninoa koatro, okïtxinoka xãpokaïtotakini txana:

—Ameë.

Iuasaaki ninoa vïtxi koatro totiakori patimari pamakini.

—ATEosone pitxaua —itxana iua ätipirika auakari-moni.

Soti Auíte Makatxakari Popitari

6 Natamatari soti auíte makatxakiniri äti popitari. Ikara natamatakasaaki, nikenakotari okïtxinoka xãpokaïtotakiti sãkire. Isãkire ikarokirauatini atoko itxa.

—Uai pinako. Patamata —itxa.

² Iuasaaki natamatari kavaro kasarori. Kiki aua oporikiã. Iua tapotxi aua. Auítetxi saporietane sikaãka iuamoni. Iua sari ikini itixitimoni kãkiti auíte ininiua ïkapani.

Äti Popitari Makatxakiko

³ Eereka soti auíte makatxakari äti popitari aãtsopaã, ininiã ipi auape. Iuasaaki nikenakotari ätipekana, okïtxinoka xãpokaïtotakiti sãkire:

—Uai pinako. Patamata —itxa.

⁴ Ikara eereka natamatari kavaro pökamarari. Kiki aua oporikiã. Iua kiki sikaãka posotiiretxi neenamtxi ikamini ikini itixitiã, ininiã neenamtxi mauakaniãtaã !auari. Itxïkitakari kãkiti okakakiniua. Isikaãka iouata mitapoari ineenamauatini ïkapani.

Äti Popitari Makatxakiko

⁵ Eereka soti auíte makatxakari äti popitari, ininiã ipi äti auape. Iuasaaki ätipekana, okïtxinoka xãpokaïtotakiti txari:

—Uai pina. Patamata —itxa.

Ininiã iuasaaki natamatari kavaro pomamari. Kavaro nopini topãkakari aua minari iaõtiko iuakoã. ⁶ Eereka

nikenakotari äti säkirauatini okĩtxinoka xäpokaĩtotakini sauaki. Itxa:

—Ipixini kiro triko ĩki, äti öti kãkiti parĩka ĩkitxikana. Äti, ipixini pakini kiro atarokiri atoko inakari ĩki, äti öti kãkiti parĩka ĩkitxikana. Iĩtxiã ĩki, ovaã ĩki pakini poiãopanikako.

Äti Popitari Makatxakiko

⁷ Eereka soti auĩte makatxakari äti popitari, ininiã ipi ipi pakini auape. Iuusaaki nikenakotari imapotötkirekiri, okĩtxinoka xäpokaĩtotakiti säkire. Itxari:

—Uai pina. Patamata —itxa.

⁸ Iuusaaki natamatari kavaro posëtakari. Inopini topãkakari uãka “Ipĩkitxi” inaãka. Äti iua tikini sa. Iua akiritaãka “Maerekani Misiritikoãtaã” inaãka. Isikaãkana posotiiretxi kaiãopokori itixi auakani okiniua ĩkapani, ininiã koatro kãkiti auiniãtaã äti okaãka. Ninoã okana kãkiti neenamatiã, natxiã, amianariã, kaxipiri kaneenamariã pakini.

Äti Popitari Makatxakiko

⁹ Ininiã soti auĩte iuaĩkana makatxakari äti popitari, ininiã ipi ipi äti pakini auape. Iuusaaki natamatari Teosomoni sikakori takikoãtaã patapi kãkiti okakoni. Ninoã okaãka Teoso säkire isãpiretinina xika. Kona itakanaparina isãpiretinina Teoso kamakiti ninoã ĩkapani, ininiã ikara xika okaãkana. ¹⁰ Itapasãkireritika akirikatarina Teoso. Itxana:

—Apiananiri, ätipirika erekari kamakarii pite. Atãonoka pisãkire. Kirisaakipa pimisiritari itixi auakani? Kirisaakipa pixikatxitaua ate, kotxi ninoã okaua ate? —itxana.

¹¹ Ininiã mäkatxi kasarori sikaãka ninoamoni. Eereka isãpiretaãkana:

—Hiãtappariko apikomoni. Teoso nirekari apanakini hĩtariakori, initiriakori okiko hĩte atoko iniko. Hĩtariakori okaãka atoko, Teoso xikatxitai hĩte. Hiãtappariko ikara öti —itxa.

Äti Popitari Makatxakiko

¹² Eereka nitikari soti auĩte makatxakiniri äti popitari, ininiã seisi pakini auape. Iuusaakipeka itixi iteene iakeëkata. Atokatxi mamãka, sako mata pomamari potxi iãko kamakori atoko. Kasiri kamarãka arëkatxi atoko. ¹³ Iõriki itori iaxiti auakaro irika ĩkorapokoritimoni. Amãtiiri ĩtima iokatxaãkiti atoko otxa. ¹⁴ Natamatari iaxiti aãtsopa iapirikiniua atoko. Ikinika ixirata mitari, ikinika ipokomiriĩ pakini makatxakaãka. Ätiãtaã itakaãka.

¹⁵ Iuusaaki ĩkorapokoriti auĩtetxiakori, kãkiti kaposotiirerini, katiirini, sotato auĩteakori, kãkiti katapararini, nitiritxi amotakoni, nitiritxi minakanuia pakini kipataua aarikoã, kai mitari sauaki ixirataã. ¹⁶ Iuusaaki itxana ixirata auĩtemoni apaka kai mitarimoni:

—Hĩrikako ate nopini. Hĩkipataua, kotxi topaneretxi nopini topãkakari, soti auĩte pakini nirekari imisiritini-

ua ate. ¹⁷ Soti auĩte misirikare öti manapi apopeka. Kona kãkiti mĩteenekari ikara misirikaretxi.

Sëto Koarëta Koatro Mio Teoso Nitiriakori Itixi Auakani

7 Eereka natamatari Teoso nitiri iaxitikiri timini atokatxi pokĩkinimoni, äti atokatxi ereëkokinimoni, äti atokatxi kimapore sanaremoni, äti atokatxi kimapore kikomoni. Ininiã ipi ipi pakinipe ninoã. Ninoã maĩkari ĩtima ipi ipi pakini itixi auakari ĩtimati. Ininiã ĩtima kona inapaika itixiã. Kona kãuaãriã !inapaika ĩtima. Kona aaminaã !inapaika ĩtima. ² Natapari äti Teoso nitiri iaxitikiri inaãpotini atokatxi pokĩkinimoni. Teoso ätipirika auakari takaötxikare aua iuamoni. Itapasãkireritika akiritana ninoã ipi ipi pakini Teoso nitiriakori. Ninoã parĩka itixi, potxoari uiniti pakini imisiritinina. ³ Iua Teoso takaötxikare auakiti txari ninoãmoni:

—Uatxa kona himisiritapiri itixi, potxoari uiniti, aaminapakini. Himisiritinina apisa, ate takari Teoso takaötxikare initiriakori itixi auakani teëtaã.

⁴ Eereka nimarotari Teoso takaötxikare apakapakani. Itakaötxikaãkana sëto koarëta koatro mio kãkiti. Ikinii uãka Isaeo tixinikini takaötxikaãka.

⁵ Tosi mio Xotaa apika mekani takaötxikaãka.

Tosi mio Hopë apika mekani takaötxikaãka.

Tosi mio Katxi apika mekani takaötxikaãka.

⁶ Tosi mio Asee apika mekani takaötxikaãka.

Tosi mio Natarii apika mekani takaötxikaãka.

Tosi mio Manasee apika mekani takaötxikaãka.

⁷ Tosi mio Simião apika mekani takaötxikaãka.

Tosi mio Arevii apika mekani takaötxikaãka.

Tosi mio Isakaa apika mekani takaötxikaãka.

⁸ Tosi mio Seporö apika mekani takaötxikaãka.

Tosi mio Xosee apika mekani takaötxikaãka.

Tosi mio Pëxamiĩ apika mekani takaötxikaãka.

Itomaneri Kãkiti Teoso Apisatoö

⁹ Ikara eereka natamatari itomaneri kãkiti apotiitakanuia. !Apakata kãkiti iaötiniri ikinikana. Aua kãkiti ikini itixitikini, kãkiti ikini sereti. Aua ikini uãka säkire säkiretakani. Ikinikana ninoã timanãta Apiananiri apisatoö, soti auĩte pakini apisatoö. Ninoã mãka kasarori. Aãtape aua iuakoãna. ¹⁰ Itapasãkireritika itxana:

—ATEosone topãka auĩtetxi topanere nopini. Iuara, soti auĩte pakini makatxakapekari amaerekani.

¹¹ Iuusaaki ikinika Teoso nitiriakori iaxiti auakani tima. Ninoã äkitana auĩtetxi topanere, totiakori, ninoã ipi ipi okĩtxinoka xäpokaĩtotakini pakini. Ikapotoreëkauana itoõna xitimoni, auĩtetxi topanere apisatoö. “ATEosone pite,” itxana Teosomoni. ¹² Ixipoãtana Teosomoni:

—Ameë. Ätipirika ikinimane säpiretai ereka pinini. Peerekai. Kimarorei. Erekari pikamakiti ate ĩkapani. Ikinimane paxitai. Kaposotiirei. Pataparai. Ätipirika ikara atoko atxai. Ameë.

¹³ Ininiã eereka ninoã totiakori äti pimaãno nota:

—Kiripa ninoa kākiti mākatxi kasarori ieretakakani? Mamonipa inana ninoa? —itxa iua.

¹⁴ Ininiā nota txari iua:

—Pitera imarotari.

Ininiā iua txano:

—Ninoa iteene misiritaākapeka. Uatxa ixipope ninoa misiritiko. Soti auīte makatxakapekari imaerekanina. Ininiā imākana soti auīte arēkaā arokakori atoko itx-auana. Uatxa kasarori imākana, kotxi itxiko !auari. Soti auīte makatxakapekari kākiti maerekani ipīkasaaki, ininiā mākatxi kasarori atoko itxa ninoa ākixinire.

¹⁵ —Ininiā ninoa aua Teoso topanere apisatoō.

Imisākiretiko aikoti āki iparīkauatana Teoso īkapani ikiniōtika pokamara, īkanōka pakini. Ininiā iua auītetxi topanere nopini topākakari auapikako ninoa sauaki.

¹⁶ Ninoa kona natxitaika. Kona iposonataikana.

Atokatxi kona arikana ninoa. Kona kapatakari kona arikana. ¹⁷ Kotxi soti auīte auītetxi topanereātaā auakari nīkatanako ninoa. Iua anikana ninoa sōtoāri-moni. Iuaā auakari sōtoāri iātakani ātipirika auapikako. Teoso makatxakariko ikinika iātsaāna. !Itxi-apataikana.

Imapotōkire Popitari Makatxakiko

8 Imapotōkire popitari imakatxakasaaki, ikinipoko tsořikaxitita Teoso tixineē. Ikara atoko ipixini oara.

² Eereka natamatana setxi Teoso nitiriakori, iua apisatoō timakani. Isikaākana setxi xikari kamiko trōpeta inakori.

³ Eereka āti Teoso nitiri apoka. Itima Teosomoni sikakori takikoātaā. Kamariāro arikiko koanati oro kamakori iuamoni aua. Kamariāro ito sikaāka iuamoni, Teosomoni isikini īkapani, ikinika Teoso nakitiakori amanaākiti sākiretxitikata. Ininiā arikari iua kamariāro Teosomoni sikakori takikoātaā nopini. Oro kamakori iua Teosomoni sikakori takikoātaā auītetxi topanere apisatoō. ⁴ Ininiā iuakoā kamariāro txiā, Teoso nakitiakori amanaākiti sākiretxitikata kanīka Teoso apisatoō.

⁵ Ininiā eereka iua Teoso nitiri kosekari okoana. Ixāpokakari xaminaminiki mēkorīkakariā, Teosomoni sikakori takikoātaā nopini auakariā. Eereka okari itiximoni. Iuasaakipeka aua karokirauari, mēkokari pakini. Apaka iuasaaki itixi iakeēkata.

Koatro Trōpeta Pirena

⁶ Ininiā ninoa setxi Teoso nitiriakori setxi trōpeta auakini iposope itrōpetane ixōkinina īkapani.

⁷ Ininiā ninoa Teoso nitiriakori āti xikarauata itrōpetaneē. Iuasaaki katxīkareri kai soro atoko inakari, apaka xaminaminiki mēkorīkakari arēkatxiā koketakori okaāka itiximoni. Ikara xika apanakini aamina itixi auakari arika, ininiā ipi āti pakini aamina auiniātaā ātika arikaāka. Ikinika katsotati arika apaka.

⁸ Eereka āti Teoso nitiri xikarauata itrōpetaneē. Ininiā ixirata auīte atoko inakari arikatxikata okaāka potxoari uinitimoni. Ininiā ipixini potxoari uiniti arēkatxi itxapekaua. ⁹ Ininiā apanakini potxoari uiniti āki

auakani ipīpe, ininiā ipi āti pakini potxoari uiniti auakani auiniātaā ātika ipīpe. Iuasaaki apanakini maporoni apaka xipokaāka, ininiā ipi āti maporo auiniātaā ātoka xipokaāka.

¹⁰ Eereka āti Teoso nitiri xikarauata itrōpetaneē, ininiā ipi āti pakini initiriakori xikarauatape. Iuasaaki iōriki mitari iaxitikero katxaākata. Otirika tirikapi atoko. Oīrika ipixini uini nopini. Oīrika ipixini sōtoāri nopini apaka. ¹¹ Iōriki uāka, “Kapixiro,” otxaua. Ininiā ipixini āparaā kapixiā. Ipi āti pakini sōtoāri auiniātaā, ātinoka sōtoāri kapixiā. Ito kākiti iātari iua āparaā, eereka ikoriāna, kotxi kapixiāri āparaā.

¹² Ininiā āti Teoso nitiri xikarauata itrōpetaneē, ininiā ipi ipi pakini initiriakori xikarauatape. Iuasaaki atokatxi ponikare, kasiri, iōriki pakini kona iteene !iponikaika. Imamākapeka. Ininiākara pokamara ipi ipi pakini oara atokatxi !iponikaika. Iua atokotxikana īkanōka ipi ipi pakini oara kasiri, iōriki pakini !iponikaika. ¹³ Ininiā eereka nitikarauatakasaaki, nikenakotari āti Teoso nitiri sākire. Iua araaāpota Teoso tixine. Itaparāsākireritika itxari:

—Erepaniko. Erepaniko. Erepaniko itixi auakanii. Auapanika apikomoni ipi, āti pakini trōpeta Teoso nitiriakori xōkini īkapani.

Āti Trōpeta Xōkiko

9 Ininiā āti Teoso nitiri xikarauata itrōpetaneē. Iuasaaki nitikari āto iōriki iaxitikero katxakini itiximoni. Iōrikimoni osikaāka xavi aariko mamapotōkire irikoti tore īkapani. ² Ininiā iōriki atoko inakari mataakari iua aariko. Eereka katxiāri kaiāopoko pokīka. Katxiāri tokori arikikosaaki atoko itxa. Eereka iaxiti, atokatxi pakini piāka itxiā xika. ³ Iposo atoko txītxiri atoko inakari pokīka itxiā. Posotiiretxi isiākana, ininiā kaxihiro itixi auakari posotiire atoko aua txītxirimoni, kākiti ioākini īkapani. ⁴ Ipaniātaākana katsotati imokakanina, apaka takari, aamina pakini imokakanina. Ipaniātaākana imisiritinina Teoso takaōtxikare iteētaā mauakini. ⁵ Kona isikaākana posotiiretxi kākiti okinina īkapani. Sīko kasiritinanira ninoa paniātaāka imisiritinina ninoa. Imisiritarina kaxihiro ioākini atoko. ⁶ Iuasaaki kākiti nirekariko ipinini. Itxama, kona iposotarina ikoriinina. Initarina ipīkitxi, txamari iuasaaki ipīkitxi mitekapeka.

⁷ Iua txītxiri kavaro atoko itxana. Kavaro neenamtxi kamakani atoko itxana. Ikiiāna aua saporietā atoko oro kamakori. Itoōna kākiti toō atoko itxana. ⁸ Ninoa iāko sito iāko atoko itxana. Itsiriīna ākiti tsiriī atoko itxana. ⁹ Itorota ipatinina koana metao kamakori atoko. Imīkitana ene kavaro itomaneri miteēkani ene atoko. Mitekaī ene atoko itxana. ¹⁰ Ninoa xipi kaxihiro xipi atoko itxana. Oko aua ixipiāna. Ninoa posotari kamatsiitiniri kākiti sīko kasiriti. ¹¹ Ninoa auīte aua. Iua Sattanasi nitiri. Mitxi aariko mamapotōkire irikoti āki auakari iua. Xoteo sākireē iua uāka Apatō itxaua. Kreko sākireē iua uāka Aporioō itxaua. Popīkari sākireē “Ikinipoko Xipokakari,” itxaua.

¹² Āti misirikaretxi napapeka. Txama auapanikako apikomoni ipi misirikaretxi.

Āti Trōpeta Xōkiko

¹³ Āti Teoso nitiri xikarauata itrōpetaneē. Iuasaaki seisi trōpeta xōkapeēkaika. Teosomoni sikakori takikoātaā oro kamakori aua ipi ipi pakini iko. Ikara Teoso apisatoō. Nikenakotari iko takote auakari sākirauatini. ¹⁴ Ininiā iua txari Teoso nitiri iua trōpetaā xikarauatakari:

—Pisikakanako ipi ipi pakini Teoso nitiriakori iaxirikakoni Eoparatxi inakori uiniti auakani.

¹⁵ Naia ipi, ipi pakini Teoso nitiriakori iposopekana ia anokanani, ia kasiriti, ia ōti, ia oara manapi ũkapani. Ininiā ninoa sikakaāka kaiāopokori kākiti okinina ũkapani. Ininiā ipi āti pakini kākiti auiniātaā auritaāka ātika okinina. ¹⁶ Āti sāpiretano ninoa sotatone kavaro nopini auakani tosētosi mirāo aua. Kaiāopokori.

¹⁷ Natamatari ninoa sotatoakori kavaro nopini nitaponemoni. Natamatakasaakina ia atoko ninoa. Itorotana koana metao kamakori auana. Apanakini torota koana pōkamarari xamina tirinakari atoko itxa. Apanakini poporeri. Apanakini posētakarari ēxōpiri atoko. Ikiina ākiti kii atoko. Inamaāna ipokīka xamina tirika, katxiāri, ēxōpiri pakini. ¹⁸ Ikara xamina tirinakari, ikara katxiāri, ikara ēxōpiri pakini inamaāna pokīkakari, okari kaiāopokori kākiti itixi auakani. Ininiā ipi āti pakini kākiti auiniātaā ninoa okari ātika.

¹⁹ Kavaro posotiire inamaā, ixipiā pakini aua. Ninoa xipi imini atoko itxa. Ixipiāna aua ito kiiri. Ninoa kii misiritari kākiti.

²⁰ Ininiā itomane kākiti koriā ia misirikari xika. Iuaritika kākiti mokakoni maerekati kamakani linirekari itakanapinirina imaerekani. Ninoa kapotoreēkapanikaua Satanasi nitiriakorimoni. Ikamapanikarina ninoa amanaākiti. Iteosonetari aamina kamakori, oro kamakori, pirata kamakori, pirōsi kamakori, kai kamakori pakini. Ninoa teosone kona posotari atamarauatini. Kona iposotarina ikenakorauatini. Kona iposotarina itīpokotinina. ²¹ Ninoa kākiti okapanikari apanakini. Ikamapanikarina mīiti parīka. Isirīkapanikana apanakinikata. Iitirīkapanikarina apanakini kākiti tii. Kona inirekarina maerekati itakanapinina.

Aātsopa Axapitiri Iapirikakori

10 Iuasaaki natamatari Teoso nitiri iaxitikiri katxakini ũkorapokoritimoni. Kataparari iua. Iua katxiāri iaxitikiri āki. Katxiāri imāka atoko itxa. Kisi ikii nopini aua. Itoō atokatxi atoko itxa. Itapike aātsota tirinakari atoko itxa. ² Imaīkanātari aātsopa iapirikakori axapitiri. Iuakoā aātsopa ikatamēka. Itakari ikiti ikikomokiri potxoari uiniti nopini. Isanaremonikiri ikiti itakari imiri. ³ Akiripoakata ākiti atoko. Iuasaaki setxi iokaamori kenakotaāka. ⁴ Iuasaaki niōkatsopaaritari ninoa setxi iokaamori sākire. Txamari nikenakotari āti iaxitikiri sākire. Itxano:

—Kona piōkatsopatapiri ninoa setxi iokaamori sākire —itxa iaxitikiri.

Aātsopa Axapitiri Nikiko

⁵ Iuasaaki Teoso nitiri aua āti ikiti imiri. Potxoari uiniti nopini āti ikiti aua. Iua ōtanōkari iuako iaxiti.

⁶ Iuasaaki itxa:

—Uatxa nisāpiretakiti Teoso ātipirika auakari sākire. Ikamari ikinika iaxiti, iaxiti auakani pakini. Ikamari ikinika ũkorapokoriti, ũkorapokoriti auakani pakini. Ikamari potxoari uiniti, ikinika iua āki auakani pakini. Teoso misiritinina maerekati kamakani lokananiikari apokini. ⁷ Apikomoni āti trōpeta xikarauatapanika. Iuasaaki kitxakapirīka Teoso kipatakiti oerekaākako. Teoso sāpiretakiti iniriakori ũkorapokoritimoni, isākire sāpiretanimoni pāitiki oerekaākako —itxa Teoso nitiri.

⁸ Eereka iuaīkana nikenakotari iaxitikiri sākirauatini: —Pisa. Papariko aātsopa iapirikakori, Teoso nitiri uakoā auakari. Iua āti ikiti imiri, āti ikiti potxoari uiniti pakini aua kititakari.

⁹ Ininiā nisa iuamoni, ininiā nitxari iua: —Pisikano ere aātsopa iapirikakari.

Iuasaaki itxano:

—Papakapariko, nika pitxari ia aātsopa. Pitikakoā kapixiriko ia pinikakiti, iuaritika pinamaā potxoariko. Mapa atoko itxako —itxano nota.

¹⁰ Ininiā nimaīkari ũkora aātsopa, nika nitxari. Nina-maā potxoari. Mapa atoko itxa. Txamari nitikakoā kapixiri iua aātsopa ninikakiti. ¹¹ Iposo atoko isāpiretano:

—Iuaīkana pisāpiretariko apikomoni Teoso sākire, kaiāopokori kākitimoni, kaiāopokori āti uākamoni, kaiāopokori āti uāka sākire sākiretanimoni, kaiāopokori auītetxiakorimoni pakini pisāpiretariko nisākire —itxano.

Ipi Teoso Sākire Sāpiretakani

11 Aāke niaōrauatinini ũkapani nisikaāka. Iuasaaki Teoso nitiri txano:

—Pisa. Piaōtariko Teoso misākiretiko aikoti. Piaōtariko Teosomoni sikakori takikoātaā. Piaōtana Teoso misākiretakani iuaā auakani. ² Kona piaōtapiri Teoso misākiretiko aikoti pirikere, kotxi Xoteo minakanuia apotiitiniātaāua iuaā. Iuaā ninoa ũkapani. Ninoa misiritariko Teoso sitatxine koarēta toisi kasiriti. Ikara Teoso sitatxine, Xerosareē inakori. ³ Nisikaposotiiretanako ipi kiki. Teoso sākire sāpiretakani ninoa. Ninoa ieretakariko sako mata. (Sako mata kākiti ieretakasaaki oerekari imatinaniuatini.) Ininiā mio tosētosi sesēta ōti pakini ninoa sāpiretariko nisākire.

⁴ Ninoa ipi oriva mina atoko itxana. Apaka ipi tirikapi topākini atoko itxana. Ikini itixiti auakani auīte apisatoō, Teoso apisatoō ninoa aua. ⁵ Kākiti nirekasaakiri imisiritinina ninoa, iuasaaki xamina tirinakari pokīka inamaāna. Ininiā iuasaaki imokaiakarini xipope. Kākiti nirekasaakiri imisiritinina, ikara atoko

itxa okikona. ⁶ Teoso sãkire isãpiretakasaakina, iposotarina iaxiti itotini. Ininiã iusaaki ãparaã kona ikipaika ãkorapokoriti. Ninoa posotari ãparaã arẽkatxi inĩkitakini. Iposotarina itxĩkitakiniri ikini sereti maerekati apokini ãkorapokoriti auakanimoni. Inirekasaakina, ninoa posotari ikara ikinika ikaminina.

⁷ Teoso sãkire isãpiretinina xipoka atoko, monõkori aariko mamapotõkire irikoti ãki potoriãkari pokõka. Iusaaki iua kamari neenamatiã ninoa ipi Teoso sãkire sãpiretakanikata. Eereka iua okapena ninoa. ⁸ Ininiã ninoa ãto sirĩkako kimaporiãtaã, mitari sitatxitiã. Iua sitatxitiã Apiananiri tokakitaãka aamina ãpiriãmitakari nopini. Iua sitatxi akiriuãkataãka Sotoma, Exito pakini, kotxi Sotoma, Exito pakini atoko itxa Xerosareẽ.

⁹ Ininiã iuaã ikini kãkiti, ikini inirimane, ikinimane ãti uãka sãkire sãkiretakani, ikini ãti uãka atamatanako ninoa ãto kimaporiãtaã. Iuaã ikaikotanako ipi õti, ãti õti, ipixini õti pakini. Kãkiti kona auiritari ikatikona.

¹⁰ Ininiã ikini kãkiti atamatariko ninoa koriãkari ãto. Ininiãkara ikinimane enenĩkako. Ninoa kamari kiiniri. Ninoa iokanatariko isikakitina apanakinimoni ipoxokoniuatini ãkapani. Ninoa kamariko ikara atoko inakari, kotxi ninoamoni naia ipi Teoso sãkire sãpiretakani misiritana ninoa. Ininiã ninoa enenĩka, kotxi Teoso sãkire sãpiretakani koriãpeka.

¹¹ Iuaritika ipi õti, ãti õti, ipixini õti pakini napaka atoko, Teoso txĩkitakana ninoa iuaĩkana auãki ininina ãkapani. Õkitakauana. Iusaaki kãkiti atamatana, ininiã ipĩkarauatana. ¹² Ikara eereka ninoa ipi Teoso sãkire sãpiretakani kenakotari iaxitikiri sãkirauatini:

—Uaimoni hina.

Ininiã ninoa kanĩka katxiãriã Teoso tixinemoni. Ninoa mokaiakariakori itikana ninoa kanĩkaãpotini Teoso tixinemoni. ¹³ Iusaakipeka itixi iteene iakeẽkata. Ininiã iua sitatxitiã kaiãopokori aapokotxi irika. Tesi aapokotxi auiniãtaã ãtika irika. Iusaaki setxi mio kãkiti ipina. Kãkiti auapanika inakani pĩkarauata. Iusaaki itxana:

—Teoso iaxiti auakari apiatakari itxaua —itxana.

¹⁴ ãkora misirikaretxi xipopeka. Iusaaki ipi misirikaretxi apiari napapeka. Iuaritika erepaniko, kotxi paĩtiki ãti misirikaretxi apiari apokapanikako.

Trõpetã Imapotõkirekiri Xõkiko

¹⁵ Iusaaki Teoso nitiri mapotõkirekiri xikarauata itrõpetaneẽ. Itomane iaxiti auakani iteene akiritari: —Ikini itixiti auakani auĩte itxapekaua aãuĩte Teoso, Kristo pakini. ãtipirika iua ikinimane auĩte itxauako —itxana.

¹⁶ Iusaaki vĩtxi koatro totiakori Teoso topãkiniãtaã apisatoõ topãkakani pamaka Teoso apisatoõ. Itxana:

¹⁷ “Erekapitikari ikinipoko pikamakiti. Apiananiri pitxaua. Kaposotiirei pite. Uatxa pite auapitika. Pite kitxakapirĩka aua. Katana ãtipirika pauapika. Erekapitikari, kotxi kaposotiirei, ininiã ãtipirika ate auĩte pitxaua.

¹⁸ Kãkiti ikini itixiti auakani omanãkarauata. Uatxa piteka omanãkarauatini manapi apope. Uatxa

apokapeka ipĩkani misiritiko mereĩko õti. Pinitiriakori, pisãkire sãpiretakani, apaka pinakitiakori pite paxitakani pakini ãkitxitiko õti apokapeka. Ikinimane kãkiti poiãorini, kãkiti kaposotiirerini pakini apakapariiko ikamakitina ãki. Iusaaki pixipokariko ãkorapokoriti xipokakani,” itxana.

¹⁹ Eereka natamatari iuaã Teoso tixineẽ imisãkiretiko aikoti tore imataakaãka. Iua aiko ãki natamatari Teoso kaixane, iua apokiniãtaã. Iusaaki natamatari ito mẽkokari. Nikenakotari ito okaratxirari, ito iokaamori pakini. Itixi iakeẽkata. Ito ãparaã kai soro katxĩkareri atoko katxaka.

Imini Mitapoari, Sito Pakini

12 Eereka nitaponeẽ nitikoka. “Kipa atxĩti?” nitxa nãkixinireẽ. “Natokopa itxa Teoso oerekiniri kãkiti?” Kotxi sito tokiã Teoso tixine. Atokatxi iotximere iakirokaro oa omãka atoko inakari. Kasiri aua okiti patapi. Okiã aua auĩtetxi saporĩetane, tosi iõriki kamakori. ² Oa kamixiro. Oa akiripoakata oãtatsiirauatini xika, kotxi kaiamapeka amarini oãuãkitakini.

³ Eereka iuaĩkana nitikoka, kotxi imini mitapoari tokiã Teoso tixineẽ. Põkamarari. Iua setxi ikii aua. Aua tesi iko. Ikininape ikii aua auĩtetxi saporĩetane. ⁴ Ixipiã ikosekari kaiãopokori iõriki iaxitikero, uai ixiti oka itxaro iõriki. Itima oa sito apisatoõ, kotxi paĩtiki amarinini oãuãkitaka. Inirekari iixirãkiniri amarini, amarini auakasaaki. ⁵ Eereka oa sito auãkitakari amarini, kiki. Oa sito ãkiri aneẽkasaaki ikini itixiti auakani auĩte itxauako. Auĩtetxi kataparari itxauako iua amarini. Auakasaaki, imini !ixirãkari amarini. Patimari maĩkiko iua amarini. Teoso auinimoni anikaãka amarini. Iuaãtaã Teoso topãkanãta auĩtetxi itopanere nopini. ⁶ Oa sito miteka ãparaã makipakaniãtaã. Teoso oerekatapekari iuaã okaikotini ãkapani. Iuaã oinĩkataãkako mio tosẽtosi sesẽta õti. Ipi anokanani, ãti anokanani ipixini pakini itxa.

⁷ Eereka aua neenamatiã Teoso tixine. Teoso nitiri Mikeo inakori apanakinikata naiatari imini mitapoari initiriakorikata. Imini initiriakori pakini neenamauata apaka. ⁸ Teoso nitiriakori tapara apiata, ininiã imini initiriakorikata !auritaãkaika Teoso tixine ikaikotinina. ⁹ Iua imini mitapoari iokanataãka maparamoni. Iua imini kitxakapirĩkaripekara. Iua Txiapo inakori. Iua Satanasi inakori. Iua misirienetari kãkiti ikini itixiti auakani. Maparamoni iokanatikosaaki, iua, initiriakori pakini okaãkana uai ãkorapokoritimoni.

¹⁰ Eereka nikenakotari Teoso tixinekiri sãkire kataparakieneri:

—Kãkiti maerekani makatxakiko apokapeka uatxa. Teoso makatxakari kãkiti maerekani. Uatxa Kristo posotiire oerekaãka. Uatxa oerekari ikinimane auĩte ininiua. Teoso mereẽkiti ikinimane auĩte itxaua uatxa, kotxi aĩtariakori kamapiretakari iokanatapeẽkaika mapara. !Ikaikotaika Teoso tixine. Mitxi ikamapiretari aĩtariakori Teoso apisatoõ. Pokamara, ãkanõka ikamapiretana. ¹¹ Aĩtariakori iokanatapekari Satanasi isini. Ninoa posotari iokanatiniri Satanasi, kotxi Teoso

Soti Auĩtene ipina ninoa ĩkapani. Iarēka xiketa ninoa ĩkapani. Ninoa posotari Satanasi iokanatinina, kotxi nino a sãpiretari atão inakari Teoso sãkire. Ninoa iposope okikona Teoso ĩkapani. ¹² Hĩte Teoso tixine auakani hĩpoxokoniuatoko. Txamari hĩte itixi auakani, potxoari uiniti auakani, erepaniko, kotxi Satanasi apopeka ereē hĩte sauaki. Iua iteene naiataua, kotxi imarotari pãĩtiki Teoso !auiritaikari iua maerekati apikomoni ikamini —itxa iua Teoso tixinekiri sãpirena.

¹³ Uai itiximoni okikosaaki, imini mitapoari asikatikinitaro oa sito amarini auãkitakakaro okiniro ĩkapani. ¹⁴ Oa osikaãka ipi mĩkitatxi kokoi mitari mĩkita, oãraini ĩkapani. Oa araã ãparaã makipakanimoni. Teoso oerekinimoni osa. Iuaã Teoso nĩkataro oa ipi anokanani, ãti anokanani, ipixini pakini. Iuaã imini mitapoari liposotari oamoni apokini. ¹⁵ Oa araãkasaaki, imini mitapoari koporikaãtari ãparaã inamaãkiri oa tikini. Uini atoko itxĩkitakari ãparaã, oa sito axãpoãtini ĩkapani. ¹⁶ Kipatxi !auiritari ãparaã sini oamoni. Ixoreka. Ixorekasaaki, ikinika ãparaã imini namaãkiri kipatxi ãki isa. ¹⁷ Ininiã imini iteene omanataro oa sito. Ininiã asikatikinitana apanakini oa anaakori inaiatinina ĩkapani. Kãkiti Teoso paniãtakiti kamakani oa anaakori itxauana. Kãkiti Xesosi Kristo sãkire auĩãkani oa anaakori itxauana.

Monõkori Potxoari Uiniti Pokĩkaãtakari

13 Ininiã nitaponeē nitima ikipatxite nopini. Iuaã nitikari monõkori potxoari uiniti pokĩkaãtini, kanĩkiĩta itxa. Iuamoni auari iko tesi pakini. Apaka ikii setxi aua. Ikinika iko aua auĩtetxi saporĩētane. Ikini ikii aua uãkatxi Teoso misãkirepiretakari. ² Iua monõkori nitikakiti ãkiti kaiõkari atoko itxa iĩto. Ikiti oso kiti atoko itxa. Inama ãkiti nama atoko itxa. Iua imini mitapoari sikari iposotiire maerekati, iua potxoari uinitikirimoni. Ininiã iua auĩtetxi itxaua. Imini auĩtetxi ininiua atoko itxa. Imini txĩkitakari iua potxoari uinitikiri sãkire kaposotiire inini, isãkire kãkiti auikini ĩkapani. ³ Nota atamataro ikiiniri. Ikii ãti ipĩpe ikaro mitari xika. Eereka ikaro tximõka. Iuaĩkana auãki itxa ikii ipinakari. Kãkiti ikini itixitikini atamatakasaakiri, itsorĩkaãtana. Ininiã auikarina isãkire. Ikamarina iua nireēkiti. ⁴ Ikinimane auikari imini mitapoari sãkire. Iteosonetarina iua, kotxi iua sikari iposotiire iua potxoari uinitikirimoni. Apaka ninoa auikari iua potxoari uinitikiri sãkire. Ninoa teosonetari iua apaka. Ninoa sãkire:

—ãti kaposotiireri potxoari uiniti pokĩkaãtakari atoko inakari !auari. Kãkiti !liposotari inaiatiniri iua —itxana.

⁵ Iua potxoari uinitikiri auiritaãka isãpiretiniri maerekati sãkiretxiti. Imisãkirepiretari Teoso. Auiritaãka auĩtetxi ininiua koarēta toisi pakini kasiriti. ⁶ Iua misãkirepiretari Teoso. Imisãkirepiretari Teoso uãka. Imisãkirepiretari Teoso auiniãtaã. Imisãkirepiretari Teoso tixine auakani. ⁷ Iua auiritaãka inaiatiniri kãkiti Teoso nakitiakori. Apaka auiritaãka ninoa imaĩkini. Auiritaãka kãkiti ikini uãkati auĩte ininiua, ikini itixiti auakani auĩte ininiua, ikini kãkiti sãkire sãkiretakani auĩte ininiua. Ikinimane auĩtetari iua maerekati ka-

makari. ⁸ Ikini itixiti auakani, Teoso nakitiakori minakaniua, auikariko iua potxoari uiniti pokĩkaãtakari sãkire, kotxi iteosonetarina iua. Itixi kamiko apisapanika nino a uãka !iõkatakãka Soti Auĩte okakori aãtsopateē. Iua aãtsopaã auauãkatakani auapikako Teosokata mapĩkaninoka ininina.

⁹ Hĩte, ia atatsopatakani kakenakokii, ininiã hĩkenakotariko nisãkire. ¹⁰ Teoso nirekiniãri kateia ãki pitakiko, ininiã erekapitikari kateia ãki pauini. Teoso nirekiniãri pokiko iouata mitariã, erekapitikari pokiko. Ininiã pokaãkako iouata mitariã. Ininiã hĩte Teoso nakiti inakanua himĩteenekariko himisiritiko. Kona hĩtakanapapiri Teoso kimapore. ãtipirika hĩkamariko Teoso nirekakiti.

Monõkori Itixiãkiri

¹¹ Eereka nota itikari ãti monõkori. Itixiã ipokĩka. Aua ipi iko. Soti auĩte ãkiri iko atoko itxa, iuaritika isãkirauata imini sãkire atokokana. ¹² Potxoari uiniti pokĩkaãtakari nitiri itxaua iua itixiã pokĩkakari. Potxoari uinitikiri sikaposotiiretari iua, ininiã isari ikini itixitimoni. Itxĩkitakana ikinimane teosonetiniri potxoari uinitikiri. Iua potxoari uinitikiri mitxi mita karori, eereka ikaro tximõka. ¹³ Iua itixiã pokĩkakari kamari posotiiretxi mitxi mimarotakoti. Ipaniãtari xamina tirinakari iaxiti auakari ĩkorapokoriti apokini ikinimane atamatiniri ĩkapani. ¹⁴ Iua potxoari uinitikiri auiritari itixiãkiri kaminiri posotiiretxi iua ĩkapani. Posotiiretxi xika itixiãkiri misirienetari ikinimane itixiã auakani. Itxĩkitakari kãkiti kaminiri potxoari uinitikiri ĩto atoko inakari kai kamakori. Ikara atoko ipaxitarina potxoari uinitikiri, kotxi ikarotaãka iouata mitariã, iuaritika iuaĩkana auapanika ikii. ¹⁵ Itixiã pokĩkakari auiritaãka itxĩkitakiniri potxoari uiniti pokĩkaãtakari atoko inakari kai kamakori kosekasinaniretiniaua, ininiã iua kai kamakori posotari isãkirauatini kãkitikata. Ipaniãtari kãkiti okiko imanirekakanisaakiri iteosonetiniri iua. ¹⁶ Itixiã pokĩkakari paniãtari ikinimane kãkiti apakapiniri Satanasi takaõtxikare iuakoãna ikikomoni, minakaniã iteētaãna. Ipaniãtari ikinimane kãkiti auĩtetxi inakanua, auĩtetxi minakaniua, katiini, matiini, nitiritxi, nitiritxi minakaniua pakini, apakapiniri Satanasi takaõtxikare. ¹⁷ Kãkiti iua takaõtxikari mauakiniri !auiritaãka iamotiitinina. !Auiritaãkana ivētxirauatinina. Iua takaõtxikari potxoari uinitikiri uãka. Iuãka mauakanisaaki, aua nómero iua nakiti.

¹⁸ Kimarore hĩtxako, ikara himarotini ĩkapani. Kimarore hininiã himarotari potxoari uinitikiri nomerone kiki uãka itxa. Nómero 666.

Soti Auĩte Sēto Koarēta Koatro Mio Kãkitikata

14 Eereka nionakaãta nitaponeē. Natamataro Soti Auĩte. Ōtanoxirataro nopini auanãta. Ixirata uãka Sião inaãka. Kãkiti sēto koarēta koatro mio pakini aua iuakata. Kaiõpokori kãkiti. Iteētaãna Soti Auĩte iri uãka iõkatsopatapeēkaika. ² Eereka nikenakotari ninoa xikarauatini. Itorõkani ene atoko itxa, kotxi ama

eneeneri. Ikarokirauatini ene atoko itxa ninoa xikare. Viorão ene atoko itxa iua xikari ene. ³ Ninoa kãkiti sêto koarêta koatro mio pakini tima auñtetxi topanere apisatoõ, okĩtxinoka xãpokañtotakini ipi ipi pakini apisatoõ. Totiakori vñtxi koatro pakini apisatoõ apaka itimana. Ninoa sêto koarêta koatro mio xikaretari xikari amaneri. Apanakini lĩmaĩkari iua xikari amaneri. Ninoa sêto koarêta koatro mio ĩkorapokoriti Teoso amotakini, ninoanoka posotari ixikaretiniri iua amaneri xikariti. ⁴ Ninoa kiki ĩsirĩkana sitokata. !Auritarina ĩtona kaminiri maerekati. Soti Auñte sinimoni nino apaka sa. ĩkorapokoriti auakasaakina, Teoso amotana ninoa. Ninoa merepanika sikaãka Teosomoni, Teoso Soti Auñtene pakinimoni. ⁵ !Ikamarina maxikatĩka isãkirena. Atão inakarĩnoka isãpiretana. !Ikerokarina isãkirena Teoso iauñtena apisatoõ.

Ipi Āti Pakini Teoso Nitiri Sãkire

⁶ Eereka nitikari Teoso nitiri araaãpotini iaxiti itanoxiti. Iua sãpiretari Teoso iokanapirena erekari kãkitimoni ikini itixiti auakanimoni. Iua iokanapirenatxi kona xipoka. Isãpiretari Teoso iokanapirena erekari ikini uãkatimoni. Āti uãka sãkire ipinimoni. Āti uãka sãkire ipinimoni. Itxaãpota, itixi auakani sãkire, iuaritika isãpiretari Teoso iokanapirena ikini uãkatimoni. ⁷ Itaparasãkireritika itxari:

—Hĩpĩkariko Teoso. Hĩsãpiretariko, iua Apiananiri ininiua. Apokapeka kãkiti maerekati kamakani misiritiko õti. Hĩteosonetariko Teoso, kotxi iua kamari iaxiti, ĩkoraxiti, potxoari uiniti, sõtoãri pakini —itxa iua Teoso nitiri araãkari sãkire.

⁸ Iua sãkirauataka atoko, āti Teoso nitiri txari:

—Papurónia sitatxiti xipokapeka. Iuaã auakani kaposotiirerini, iuaritika ixipokapena. Papurónia sitatxiti auakani paniãtari imakinika itixi auakani maerekati ikaminina, maerekati ĩtotxi nireẽkiti. Ininiã ninoa kamari maerekati Papurónia auakani paniãtakiti.

⁹ Ninoa Teoso nitiriakori ipi sãkirauataka atoko, āti Teoso nitiri txari itaparasãkireritika:

—Teoso misiritanako kãkiti potxoari uinitikiri teosonetakani, potxoari uinitikiri atoko inakari kai kamakori teosonetakani. Teoso misiritanako kãkiti Saturanasi takaõtxikare iteẽtaãna takakani, iuakoãna takakani. ¹⁰ Kãkiti iua atoko inakani misiritaãkako, kotxi Teoso iteene omanãkarauata maerekati ninoa kamakiti xika. Teoso misiritanako ninoa, ininiã atatsirauatana xamina tirinakariã. Ēxõpiri arikanako ninoa. Teoso nitiriakori erekarini, itixine auakani, Teoso Soti Auñtene pakini itikariko ikara kãkiti misiritiko. ¹¹ Iua xamina txĩkitakari kãkiti atatsirauatini. Iua xamina tirinapikako. !Ixipoka. Itirinapika. Itxiãkapika. Ninoa misiritiko !iotoka. Pokamara, ĩkanõka auapika ninoa misiritiko. Kãkiti iua potxoari uinitikiri teosonetakani, potxoari uinitikiri atoko inakari kai kamakori teosonetakani, iuãka ĩtoãna auañtotakini misiritaãkako ikara atoko —itxa iua Teoso nitiri sãkire.

¹² Ininiã hñte Teoso nakitiakori, hñte ipaniãtakiti kĩpitakani, hñte Xesosi nireẽkiti ātipirika kamakani, kataparaxinire hñtxako. Himĩteenekariko kãkiti misiritinii.

¹³ Eereka nikenakotari Teoso tixine auakari sãkire.

Itxano:

—Nisãpiretakiti piõkatsopata. Kãkiti ipĩkasaaki Apiananiri ĩkapani iparĩkauatakasaaki, Teoso sikari erekari iuamoni.

Iua Erekari Matamatakoti txari:

—Ia atão. Mitxi pasãpaniri Teoso parĩka ikaminina. Uatxa itomatana, kotxi Teoso imarotapekari erekari ikamakitina.

Takari Amiko Pirena

¹⁴ Eereka nitaponeẽ nionakaãta iaxiti. Iuasaaki natamatar katxiãri kasarori iuaã. Añtari iaxitikiri atoko inakari topãka iua katxiãri nopini. Ikiã aua auñtetxi saporĩetane oro kamakori. Iuakoã saasara ãtoião aua. Pauanaro. ¹⁵ Iposo atoko āti Teoso nitiri pokĩka Teoso aapoko. Iua itaparasãkireritika akiritari iua katxiãri nopini topãkakari:

—Pikosekariko pisaasarate. Pamariko takari, kotxi takari amiko manapipekara. Takari ikini itixitikiri amiko manapipekara.

¹⁶ Ininiã iua katxiãri nopini topãkakari isaasarateẽ isauakari ikini itixiti nopini auakari. Amari takari imakinika.

¹⁷ Iposo atoko nitikari āti Teoso nitiri pokĩka Teoso aapoko Teoso tixineẽ. Iuamoni apaka aua saasara ãtoião iuakoã. Pauanaro.

¹⁸ Iuaĩkana āti Teoso nitiri apoka. Teosomoni sikakori takikoãtaã ipotorika iua. Inĩkatari xamina tirinakari iuaã. Iua itaparasãkireritika akiritari Teoso nitiri saasara auakiti:

—Pimaĩkaroko pisaasarate. Pimakatxakaroko ova ikini itixitikero, kotxi ova oionapeka —itxa.

¹⁹ Ininiã Teoso nitiri isaasarateẽ isauakaro ova ikini itixitikero. Itsotakitataro ovatsa. Iposo atoko okaro ova ori ova iopetiko mitari āki. Okatsonakaãka. Teoso omanãkare iua ova iopetiko atoko itxa, kotxi Teoso iteene omanãkarauata kãkiti maerekani xika. ²⁰ Ova ori kãkiti kitiã iopetikoãtaã sitatxi mapotõkire. Txamari na ovapeñi ikara atoko itxa. Arẽkatxiãra ikara atoko itxa. Iua arẽkatxi uini panaã atoko itxa. Tresẽtosi kirõmetro arẽkatxi aua. Arẽkatxi ĩpanaã kavaro namaãpeka apoka arẽkatxi. Āti metro ipixini ĩpanaã arẽkatxi.

Teoso Misirikare Mĩkani Setxi

15 Eereka nitaponeẽ nitikoka iuaĩkana.

—Kipa atxiĩti? —nitxa iuaĩkana nãkixinireẽ, kotxi natamatar Teoso nitiriakori setxi itixineẽ.

Ninoa minari misirikaretxi setxi pakini kãkitimoni. Apikomoni misirikaretxi !auaika. Ia misirikaretxi setxi inokasaakiri kãkiti, Teoso misiritana ninoa imaerekani na xika.

² Eereka natamatar ipoa atoko inakari. Ātakaãri, xamina tirinakarikata koketakori atoko itxa ipoa. Kãkiti

tima ipoa itinikata. Ninoa iokanatapekari Satanasi sini, kotxi likamarina iua potxoari uinitikiri paniätakiti. Iua potxoari uinitikiri atoko inakari kai kamakori paniätakiti likamana. !Apakaparina Satanasi takaötxikare, iuäka nomerone. Ikininape aua viorão atoko inakari Teoso sikakiti. ³ Ninoa xikaretari Moisesi xikare, Teoso nitiri uai itixi auakari xikare. Ixikarenätari Teoso Soti Auítene xikare. Ia ixikaretana. Itxana:

“Teoso Apiananiri, ikini posotiiiretxi auakiti pite.

Peerekari piparíka. Pite kaposotiireri. Pite atãonani pikamakiti. Ikini uäkati auíte pitxaua pite.

⁴ Ikinimane paxitaiko pite ipíkareritika, kotxi pite Api-ananiri pitxaua. Ikinimane txaiiko pite: ‘Peerekai,’ itx-aina. Kotxi pitenoka !auari maerekati. Käkiti ikini uäkati apokako pitemoni. Ninoa txaiiko: ‘Ate teosone pitxaua,’ itxana kotxi ikinimane itikari erekari pikamakiti.”

Ikara atoko itxa ninoa xikaretakiti.

⁵ Eereka natamatari Teoso aapoko äki. Natamatari iua auiniätaã. ⁶ Iposo atoko ninoa Teoso nitiriakori setxi, misirikaretxi setxi míkani, pokíka Teoso aapoko. Ninoa mäka katsopiri, pomëkoriri. Ninoamoni aua oro kamakori. Itinimañ nopini inapa. ⁷ Ninoa ipi ipi pakini okítxinoka xäpokaítotakini iuaã aua. Okítxinoka xäpokaítotakiti sikari iätatxi setxi pakini oro kamakori ninoa setxi Teoso nitiriakorimoni. Teoso auapininiika inakari xäpokakapekari iua setxi pakini iätatxi omanäkareë. ⁸ Teoso iotximere xäpoka iua aapoko äki. Katxiäri kasarori atoko itxa. Iuusaaki käkiti !auiritaäka Teoso aapoko ñoini, ninoa Teoso nitiriakori, misirikaretxi míkani setxi pakini, misiritakasaakina käkiti.

Iätatxi Teoso Omanäkare Auakiti

16 Eereka nikenakotari Teoso aapoko äki auakari säkire. Itaparakieneritika imisäkiretana ninoa Teoso nitiriakori setxi. Itxana:

—Hísa. Híkitakari Teoso omanäkare iätatxi äki auakari itixi auakanimoni —itxa.

² Ininiã ninoa Teoso nitiriakori sari. Merepanika ätika initiri kitakari iätatxi äkikiri itixi auakanimoni. Iuusaaki kimiti mitari, katsiiri, apoka käkiti Satanasi takaötxikare auakini itomoni. Potxoari uinitikiri atoko inakari kai kamakori teosonetakani itomoni apoka ikara atoko inakari amianari.

Äti Iätatxi

³ Iposo atoko ätipekana Teoso nitiri kitakari iätatxi äkikiri potxoari uinitimoni. Iuusaaki äparaã arëkatxi itxapekaua. Käkiti ipíkari arëka atoko itxa iuusaaki. Ininiã ikinipoko potxoari uiniti auakani iuusaaki xipoka.

Äti Iätatxi

⁴ Iposo atoko ätipekana Teoso nitiri kitakari iätatxi äkikiri uinimoni, sötoäri pakinimoni. Iuusaaki äparaã

arëkatxinoka itxapekaua. ⁵ Iuusaaki nikenakotari Teoso nitiri äparaã níkatakari säkire. Itxari Teosomoni:

—Pite maerekati makamakatii. Ätipirika auakarii pite. Atão pikamakiti pimisiritinina maerekati kamakani ño-ora atoko. ⁶ Kotxi ninoa okari käkiti pite nakitiakori.

Okarina pisäkire säpiretakani. Ninoa oxiketari ninoa arëka. Ininiã uatxa pite sikana arëkatxi iätinina. Atão imisiritikona kotxi maerekati ikamana —itxa Teoso nitiri.

⁷ Iposo atoko nikenakotari äti säkire. Teosomoni sikakori takikoätaã auakari iua. Itxari Teoso:

—Pite Teoso Apiananiri, Kaposotiireri pitxaua.

Erekapitikari maerekati kamakani pimisiritini. Pite kona kerokari pikamakiti, kotxi atão inakarinoka pika-ma —itxa.

Äti Iätatxi

⁸ Eereka ätipekana Teoso nitiri kitakari iätatxi äkikiri atokatximoni. Iuusaaki atokatxi apiata patakata. Auiri-taäka käkiti arikini itaparapatakaã. ⁹ Ininiã käkiti arikaäka atokatxi patakaã. Iuaritika linirekarina maerekati ikamakitina itakanapinina. “Peerekari Teoso,” kona itxana. Teosonoka posotari iotokakiniri iua misirikaretxi, txamari ninoa maerekati pirenaã akiritari Teoso uäka.

Äti Iätatxi

¹⁰ Ininiã ipi ipi pakini Teoso nitiriakori kitakapekari iätatxi äkikiri itiximoni. Eereka iuaíkana äti Teoso nitiri kitakari iätatxi äkikiri auítetxi topaneremoni iua potxoari uiniti pokíkaätakari topaneremoni. Iuusaakipeka iua potxoari uinitikiri auítetxi ininiätaãua patimari ipiäkini. Käkiti iuaätaã auakani akatsaninitaua itsii xika. ¹¹ Iuaritika linirekarina maerekati ikamakitina itakanapinina. Imisäkirepiretarina Teoso iaxiti apiko nopinixiti auakari, atatsiirena xika, kimiti xika.

Äti Iätatxi

¹² Eereka iuaíkana Teoso nitiri äti kitakari iätatxi äkikiri mitari uinitimoni Eoparatxi inakorimoni. Iuusaaki uini auaã. Isonäka. Kimapori itxaua, auítetxiakori atokatxi pokíkinimoni ñkani inapinina ñkapani. ¹³ Iposo atoko nitikari maerekani matamatakoni ipi äti pakini. Atiniro atoko itxana. Äto pokíka mitapoari imini namaã. Äto pokíka iua potxoari uiniti pokíkaätakari namaã. Äto pokíka iua itixi pokíkakari namaã. Iua itixi pokíkakari iua Satanasi säkire säpiretakari itxaua. Na atãoene isäkire. Poxirari ikama. ¹⁴ Ninoa maerekani matamatakoni ipi äti pakini Satanasi nitiriakori. Ninoa kamari posotiiiretxi. Isana auítetxiakorimoni, ikini itixiti auakanimoni. Akiritana käkiti apotiitiniua ineenamauatinina ñkapani. Teoso kaposotiireri naiatanako ninoa itixi xipokini ötisaaki.

¹⁵ Híte ia atatsopatakani, Apiananiri txai híte:

—Erepaniko. Napokako kiitiriri apokini atoko, käkiti mimarotakinipanika. Napokasaaki ereë, pikoatiniã, kamäka pininiã, pipoxokoniua. Ikara atoko pininiã,

kona kasarai ikinimane apisatoõ pisini, ininiã kona kapêtai —itxa Apiananiri sãkire.

¹⁶ Eereka ninoa ipi ãti pakini Satanasi nitiriakori maerekani matamatakoni, apotiitari auñtetxiakori Amaketõ inakoriãtaã. Iuaãtaã akiritaãka Amaketõ Xoteo sãkireẽ.

Imapotõkire Iãtatxi

¹⁷ Ninoa setxi Teoso nitiriakori, seisi kitakapekari iãtatxi ãkikiri. ãtinoka !ikitakapanikari. Iuasaakiika iua kitakari iãtatxi ãkikiri ãtimamoni. Iuasaaki nikenakotari auñtetxi itopanereãtaã auakari sãkire:

—Ixipokapeka —itxa itaparakieneritika.

¹⁸ Iposo atoko iotxira mẽkoãkata. Ikarokirauata. Pataparaeneri. Itixi iakeẽkata. Mitxi !auari itixi iakeẽkatini ãkora atoko inakari. Iuasaakiikarako apiatako. ¹⁹ Iua sitatxi apiari Papirõnia inakori xoreka. Ipiakata ixoreka, ininiã ipi ãti pakini sitatxiti atoko itxaua. Ikini itixiti auakari sitatxi xipokaãka iuasaaki. Teoso !imaxinãkaretari Papirõnia sitatxiti auakani kamakiti, ininiã iteene imisiritana ninoa, kotxi iteene omanãkarauata imaerekanina xika. ²⁰ Iuasaaki ikini ipokomirĩ !auaika. Õtanoxiratarari ikinipoko xipoka iuasaaki. ²¹ Katxãkareri iaxiti auakari, kai mitari atoko inakari, katxaka itiximoni. Apanakini kai minani koarẽta sãko kiro. Iua irika kãkiti nopini. Ikara katxakakari pamonõkonipaniri. Iua xika kãkiti iteene misãkireporetari Teoso.

Sito Potxoari Uinitikiri Nopini Topãkakaro

17 Ninoa Teoso nitiriakori setxi pakini iãtatxi setxi auakini, seisi kaikota. ãtika ina notamoni. Itxano nota:

—Notakata pisa. Noerekai sitatxi miramaneri. Sito kanokarero kaposotiirero atoko itxa iua sitatxi. Oa topãkanãta uini itori nopini. Iuaã auakani misiritiko noerekaiko pite. ² Auñtetxiakori ikini itixiti auakani kamari maerekati iua sitatxiti auakanikata isirãkinina. Iua sitatxi auakani txãkitakari kãkiti ikini itixiti auakani maerekati ikaminina. Kapoãroã poãtakari nirekini atokokana, ninoa nirekari iua maerekati iua sitatxiti auakani kamakiti —itxa notamoni.

³ Eereka iua Erekari Matamatakoti paniãtano iua Teoso nitirikata nisini. Iua Teoso nitiri anikano ãparaã makipakaniãtaã. Iuaã natamataro sito topãkanãta iua potxoari uinitikiri nopini. Põkamarañtorari iua. Iõtoã aua iõkatakori kaiãopokori Teoso imisãkireporetini iõka. Ikini setxi aua. Iko tesa aua. ⁴ Oa sito mãka pomamari ipixini. Põkamarari itxa omãka. Pakaroneri omãka. Oõtoã aua oro, pãrora, kai soro pomãkoriri pakini aua. Omañkari iãkoanxiti oro kamakori. Iua iãkoanxiti ãki aua maerekati okamakiti itxiko atoko inakari. Maerekati oõto kamakiti ikara atoko itxa. ⁵ Oteẽtaã aua sãkiretxi iõkatakori. Itxari: “!Kimarotikori. Kanokareroakoro inoro itxaua Papirõnia sitatxiti miramaneri. Maerekati kamakani inoro itxaua Papirõnia.”

⁶ Nitikaro oa sito opoãtini, Teoso nakitiakori arẽka oãti-

ni xika. Xesosi sãkire auikinina xika, okaãkana. Nata-matakasaakiro nitikoka.

—Kipa atxãiti? —nitxa.

⁷ Iua Teoso nitiri txano:

—Kininiãpa pitikoka? Nisãpiretaiko oa sito pirena. Apaka nisãpiretaiko iua potxoari uinitikiri pirena, ikini setxi, iko tesa auakiti pirena, oa porikitakari pirena nisãpiretai, kotxi kona pimarotari. ⁸ Iua potxoari uinitikiri patamatakiti mitxi aua, txamari uatxa !auaika. Iua eereka ipokãkapanikako aariko mamapotõkire irikotiã. Eereka anikaãkako ixipokikomoni. Ikini itixiti auakani Teoso aãtsopateẽ iuãkana maiõkatakoni tikokako iua potxoari uinitikiri atamatakasaakinako. Itixi kamiko apisa iuãkana !iõkatsopataãka Teoso aãtsopateẽ. Iua aãtsopaã iõkauãkatakoniinoka ãtipirika auapikako Teosokata. Kãkiti tikokako iua potxoari uinitikiri atamatakasaakina, kotxi mitxi auãki itxa, eereka !auaika, eereka iuaãkana auãkipeka itxa.

⁹ —Ikara inakari pimarotini ãkapani, iteene pimixinikariko. Kinirepa ikini setxi aua? Kotxi õtanoxiratarari setxi apaka aua. Oa sito topãkanãta iua õtanoxiratarari nopini. ¹⁰ Kinirepa ikini setxi aua? Kotxi auñtetxiakori setxi apaka auako. Auñtetxi !itxaukaiana ninoa sãko. ãtinoka auñtetxi txapanikaua. ãti kona apokapanika. Iua apokasaaki mapaõtinoka auñtetxi itxauako. ¹¹ Iua potxoari uinitikiri mitxi auãki inakari, iposo atoko !auaika inakari, iua apokako. Iuara auñtetxi txauako. Iua mitxi apotiitua ninoa setxi auñtetxiakorikata. ãti õti iua xipokaãkako.

¹² —Patamatarari iko tesa pakini. Kinirepa iko tesa aua? Kotxi auñtetxi tesa aua. Ninoa auñtetxiakori kãkiti auñteakori !itxapanikauana. Ninoa sikaposotiiretaãkako auñtetxi ininiuana iua potxoari uinitikirikata. Ninoa auñtetxi itxauanako ãti oaranoka. ¹³ Ikininape ninoa tesa auñtetxiakori parãkauata iua potxoari uinitikiri ãkapani. Iposotiireãna, itaparaãna iparãkauatana iua potxoari uinitikiri ãkapani. ¹⁴ Inaiatarinako Teoso Soti Auñtene. Teoso Soti Auñtene iokanatana ninoa isinina, kotxi iuanani Apiananiri itxaua. Auñtetxiakori auñte itxaua. ãtipirika iuakata sikani, iua akiritakini, imereẽkini, ãtipirika iua nireẽkiti kamakani, ninoa moianatarari iua Soti Auñte ineenamauatini —itxa Teoso nitiri sãkire.

¹⁵ Iua Teoso nitiri apikomoni txari notamoni:

—Pite atamataro oa kanokarero topãkanãta kãuaãri nopini. Kinirepa kãuaãri nopini oãua? Kotxi iuaãtaã kãkitipokoni, ikini uãka, ikini itixiti auakani, ikini ãti uãka sãkire sãkiretakani pakini. Iua kãuaãri mitari atoko itxana. ¹⁶ Iua potxoari uinitikiri, ninoa tesa auñtetxiakori pakini omanataroko oa kanokarero. Ninoa makatxakariko ikinipoko oa nakiti. Imakatxakarinaroko omãka. Kasarapeka otxako. Oxini inikanako. Ninoa xipokaroko oa xaminaã. ¹⁷ Teoso txãkitakari Teoso nireẽkiti ikaminina, kotxi ninoa auñtetxiakori parãkauata iua potxoari uinitikiri ãkapani Teoso nireẽkiti iaõka. Ininiã Teoso sãkire mitxi auakari auapeka. Isãkire iaõka ikamana. Ininiã ninoa nirekari iparãkauatinina iua potxoari uinitikiri ãkapani. Ininiã ninoa auñtetxiakori itxauana iua potxoari uinitikiri ãkapani.

¹⁸ —Oa sito kanokarero patamatakito kona atão sitoni. Sitatxi miramaneriã auakani oa sito kanokarero atoko itxana, kotxi iua sitatxiã auakani paniãtana ikini auãtetxiakori itixi auakani maerekati inireẽkitina ikaminina.

Papirónia Sitatxiti Xipokini

18 Ikara inaãka atoko nitikari äti Teoso nitiri Teoso tixine auakari katxakaãpotini ãkorapokoriti Teoso tixine potoriãkari. Iua kaposotiireri. Iotximere iopinikari imakinika itixi. ² Iua säkirauata ita-parasãkireritika. Itxari:

—Ixipokapeka Papirónia sitatxiti miramaneri. !Auai-ka. Uatxa Satanasi nitiriakori aua iuaã. Ikini sereti maerekani matamatakoni aua iuaã. Araãkari ikini sereti arakakari nikakani, kãkiti mapokaerekatakiniti, iuaã apoka. ³ Oa sito kanokarero atoko itxa iua sitatxi, kotxi iua sitatxi auakani txĩkitakana ikini itixiti auakani maerekanitxi ninoa kamakiti iaõka ikaminina. Papirónia sitatxiti auakani kamari maerekati ãtona nireẽkiti. Itixi auakani nirekari ikara maerekati ikaminina kapoãroã poãtakari nirekini atokokana. Auãtetxiakori ikini itixiti auakani kamari ikara maerekati Papirónia sitatxiti auakanikata. Tiitxi vëtxitakani apakaparo txineiro kaiãopokoro, kotxi Papirónia sitatxiti auakani amotari tiitxipokoni —itxa Teoso nitiri säkire.

⁴ Eereka nikenakotari äti Teoso tixine auakari säkire. Itxari:

“Hĩte nota nakitiakori inakani takanapariko iua sitatxi. !Hĩkamapiri maerekati ninoakata. Ininiã !himisiritaãka ninoakata.

⁵ Kotxi maerekati ninoa kamakiti apiaãpota. Tiitxi tsorinatakori atoko itxana ninoa maerekani. Iaxitipeka apokaãpota ninoa maerekani. Teoso xinikari ninoa maerekani, ininiã iua misiritanako ninoa.

⁶ Himisiritanako ninoa. Hĩte imisiritinina atokokana, hĩte misiritana ninoa. Ipikata himisiritanako ninoa, ninoa maerekani xika. Ninoa misiritapekari apanakini, ininiã ia imisirikarena xika ipikata himisiritanako ninoa.

⁷ Hĩtxĩkitakanako ninoa atatsiirauatinina. Hĩtxĩkitakanako ninoa maerekaxiniretinoka ininina. Ikara atoko ninoamoni hĩkaminiã, atãopitikara hĩkamakiti, kotxi iteene iuikauana ninoa. Itomaneri itiina, ininiã ninoa iarinouata. Ninoa säkire: ‘Ate uai topãkanãta, kotxi auãtetxi kaposotiireni atxaua. Tikinitakoro atoko !atxaua, ininiã maerekaxiniretika !atxa,’ itxana äkixinireẽna.

⁸ Ikara isãkirena xika äti õti ninoa misiritaãkako. Amianari, maerekaxinirenitxi, natxi pakini apokako ninoamoni. Arikatxi xipokanako ninoa, kotxi Teoso iusaaki misiritanako ninoa. Imisiritanako ninoa, kotxi Teoso Apiananiri Kaposotiireri itxaua,” itxa iua Teoso tixine auakari säkire.

Kãkiti Txiapatini Sitatxi Xipokini Xika

⁹ Auãtetxiakori ikini itixiti auakani, Papirónia sitatxiti auakanikata sirĩkakani, ninoakata tiitxi apokaerekatakani, itikasaakirina iua sitatxi misiritiko, iteene itxiapatana. Ninoa auãtetxiakori txiapata iua sitatxi arikasaaki, xamina txiã itikasaakina. ¹⁰ Õtakoxiti itimana, kotxi ipĩkarina sitatxi auakani xipokini. Iuasaaki itxanako:

—!Erekari. !Erekari. Ia sitatxiti miramaneri !auaika. Papirónia sitatxiti !auaika. Kãkiti kaposotiirerini xipokapeka. Äti oaranoka arikatxi xipokapena ninoa imaerekanina xika.

¹¹ Ikini itixiti tiitxi vëtxitakani apaka txiapatana. Ninoa maerekaxinireninoka itxanako sitatxi auakani xipokasaaki.

—Kiripa amotatari atii uatxa? —itxana.

¹² Mitxi ninoa vëtxitari oro, pirata, kai soro pomëkoriri, kai soro kasarori pérora inakori. Mitxi ivëtxitarina mãkatxi mata arínio inakori, mãkatxi mata seta inakori, mãkatxi mata põkamarari, mãkatxi mata pomamari pakini, ivëtxitana. Ivëtxitarina ikini sereti aamina eremari inakari. Ivëtxitarina ikini sereti tiitxi iko kamakori, aamina pakaroneri kamakori, pirõsi kamakori, metao kamakori, kai kamakori. ¹³ Ivëtxitarina kanera, koketxi pakini. Ivëtxitarina kamariãro miha inakori. Ivëtxitarina kamariãro pirãkĩsësi inakori. Ivëtxitarina iãriã, aseitona ã, triko, triko pani pakini. Ivëtxitarina kema auĩte, soti auĩte, kavaro, mitekaĩ kavaro anikakiti pakini. Kãkiti apaka ivëtxitana, nitiritxi ãkapani. Kãkiti ãto, kãkiti xinire apaka inirekana ivëtxitinina. ¹⁴ Ninoa tiitxi vëtxitakani säkire sitatximoni:

—Ikinika hĩtii erekari hinireẽkiti xipokaãkapeka. Ikini-ka hĩtxineirote !auaika. !Auaika hãpokaerekatakiti. Hĩtii arikapeka —itxana ninoa säkire.

¹⁵ Ninoa tiitxi vëtxitakani katxineiroterini itxauana, kotxi kãkiti iua sitatxiti auakani mitxi amotari ninoa tii. Iua sitatxi xipokasaaki, ninoa tiitxi vëtxitakani timanãta õtakoxiti, kotxi ipĩkarina sitatxi arikini. Itxiapatana. Imatinaniuatana. ¹⁶ Itxana:

—!Erekari. Sitatxi miramaneri !auaika uatxa. Mitxi ia sitatxi peerepokori sito erero atoko itxa. Oia sito mãka pakaroneri, pomamari, põkamarari pakini. Oĩtoã aua oro, kai soro pomëkoriri. Pérora pakini aua. Oia sito atokokana ia sitatxi. ¹⁷ Äti oara napa atoko ia sitatxiã auakani tii kakaroneri xipokapeka —itxana.

Sitatxi arikasaaki, maporo auakini, maporo äki sikani, maporo äki parĩkauatakani apaka õtakoxiti atamatarina iua sitatxi arikini. ¹⁸ Ninoa itikasaakiri katxiãri iua sitatxi arikini, itxana:

—Ia sitatxi miramaneri atoko inakari !auari —itxana ninoa.

¹⁹ Iuasaaki itakarina atapani ikiiãna imatinaniuatiniãna. Itxiapatana iusaaki. Imatinaniuatana iusaaki. Itxarina:

—!Erekari. !Erekari. Kamatinanipitikari sitatxi miramaneri xipokini. Mitxi iuaã ikinimane maporo auakini apakapari kaiãopokoro txineiro, kotxi iuaã auari tx-

ineiopokoni. Eereka äti oara napaka atoko ixipokapeka ikinika —itxana isäkirena.

²⁰ Hïtepekana Teoso tixine auakanii hïpoxokoniuatoko iua sitatxi xipokiniã. Hïte Teoso nakitiakori hïpoxokoniuatoko. Hïte Xesosi moianariakorii, hïte Teoso sãkire sãpiretakaniï pakini hïpoxokoniuatoko, kotxi Teoso arikapekari iua sitatxiã auakani hïte imisiritinina xika.

Kai Miramaneri Potxoari Uinitimoni Okiko

²¹ Eereka äti Teoso nitiri kataparari maïkari kai meraminapoari. Kai triko kamiriãkari atoko itxa iua kai. Okari potxoari uinitimoni. Iua txari:

—Itapararitika kai nokini atoko, Papirónia sitatxiti miramaneri xipokini. !Atamataãkaika sitatxi iuaã —itxa isäkire.

²² Itxari iua sitatximoni:

—Xikari !ikenakotaãkaika ereë. !Auaika xikari viorãokata, koitxikata, trõpeta pakinikata. Ereë kãkiti parïkauatini !auaika. Atarokiri kamiko ene !kakenakotikoikari. ²³ Tirikapi kamara !katamatikoikari ereë. Taniriuatakani kiinirite ene !kakenakotikoikari. Ereë mitxi vëtxirauatakani apiari itxauana. Ninoa atoko inakari !auari ikini itixiti. Kãkiti ereë auakani misiriene-tana ikini kãkiti ikini itixiti auakani, kotxi ninoa sãkire maerekatinoka —itxa Teoso nitiri sãkire.

²⁴ Papirónia sitatxiti misiritaãka, kotxi iuaã auakani okapena Teoso sãkire sãpiretakani kãkiti Teoso nakitiakori. Ikinimane kãkiti itixi okakoni xika Papirónia sitatxiti xipokaãka.

Areroia, Peerekari Teoso

19 Eereka nikenakotari kãkiti sãkire, kaiãopokori kãkiti Teoso tixine auakani. Itaparasãkিরeritikana itxana:

—Areroia. Peerekari Teoso. Ate Teosone makatxakari kãkiti maerekani. Kaiotximereri aTeosone. Kaposotireri. ² Ikerokari ikamakiti, kotxi atão inakaranoka ikama, ininiã atão imisiritinina maerekati kamakani. Erekarinoka ikama aTeosone. Iua misiritari Papirónia sitatxiti. Kanokarero kaposotiirero atoko itxa iua sitatxi, kotxi iua sitatxi auakani iomatari kãkiti xinire ikini itixiti auakani xinire, kotxi oerekarina maerekati ïtotxi nireëkiti ikaminina. Teoso misiritana Papirónia auakani, kotxi okana Teoso nitiriakori itixi auakani —itxana ninoa sãkire.

³ Iuaïkana itxana itaparakieneritikana:

—Areroia. Peerekari Teoso. Iua sitatxi miramaneri arikapikako. Katxiãri iuaãkiri itimatxiãtapikako ätipirika —itxana.

⁴ Iuasaaki ninoa totiakori vïtxi koatro pakini, ninoa okïtxinoka xãpokaïtotakini ipi ipi pakini apaka, ipamakana Teoso apisatoõ. Iuasaaki Teoso topãkanãta auïtetxi topanere nopini. Ninoa misãkiretari iua:

—Pite aTeosone. Peerekai pite. Ameë, areroia —itxana ninoa.

Soti Auïte ïtanorouatini Kiiniriti

⁵ Eereka nikenakotari Teoso topanereë auakari sãkire. Itxari:

—Hïte Teoso nitiriakori ikini itixiti auakanii, “Peerekari aTeosone” hïtxako. Hïte auïtetxi inakanii, auïtetxi minakanii apaka, hïpïkiniãri Teoso, “Peerekari aTeosone,” hïtxako —itxa.

⁶ Iposo atoko nikenakotari itomaneri kãkiti sãkire ene atoko itxa, ãparaã kai auiniãtaã auakari ene atoko itxa, ikarokirauatini ene atoko itxa. Nikenakotari ninoa sãkire:

—Areroia, peerekari Teoso, kotxi aTeosone, Api-ananiri, kaposotiireri, ikinimane auïte itxaua —itxana ninoa.

⁷ —Mapoxokoniuaata. Apoxokoniritika masãkirauata. Matxari: “Peerekari Teoso.” Teoso Soti Auïtene ïtanorouatini iketo apokapeka. ïtaniriuatakaro iua ïkapani oãiamatapeka. ⁸ Osikaãka mãkatxi ereri, kasarori oieretaãkiti tïkane —itxana ninoa sãkire.

Teoso nakitiakori kamakiti atão inakari oa mãka atoko itxa.

⁹ Iposo atoko iua Teoso nitiri txano nota:

—Ia piõkatsopata. Iua Soti Auïte ïtanorouatini kiiniriti kemaïtxitakoni poxokoniuaata —itxa notamoni.

Iuaïkana itxano:

—Ia nisãpiretakiti Teoso sãkire atão itxa.

¹⁰ Ikara nikenakotakasaaki nipamaka iua Teoso nitiri apisatoõ, Teoso apisatoõ pamaãkarino atoko nitxaua. Txamari iua txano:

—Kona pipamakape nota apisatoõ. Nota Teoso nitiri pite atoko, pitariakori Xesosi sãpiretakiti auïãkani atoko. Teoso apisatoõnani pipamakako. Xesosi sãpiretakiti iopinikari Teoso sãkire sãpiretakani ãkixinire. Ininiã ninoa sãpiretari kãkiti atão Teoso sãkire —itxa.

Kavaro Kasarori Nopini Topãkakari

¹¹ Eereka natamatari Teoso tixineë auakari. Natamatari kavaro kasarori. Iua kavaro nopini topãkakari ikamaenetakiti kamakari itxaua. Isãkire atãonoka. Atão imereëri kãkiti misiritiko imaerekani xika, kotxi iua imarotari ikinipoko kãkiti kamakiti, ininiã ikamari atão. Inaiatana maerekati kamakani, kotxi iua kamari atão. ¹² Oki xamina tirinakari atoko itxa. Ikiiã ito auïtetxi saporietane aua. Iuãka iõkatakori ïtoã aua. !Kimarotikori iua uãka. Iuanoka imarotari iuãka.

¹³ Arëkatxinoka imãkaã aua. Iua akiritaãka, “Teoso Sãkire” inakori. ¹⁴ Isotatoneakori, Teoso nitiriakori Teoso tixine auakani, saãpota iuakata. Iua ïkiika. Ninoa apaka topãka kavaro kasarori nopini. Imãkana peereri, kasarori. ¹⁵ Iua “Teoso Sãkire” inakori namaã opokïka iouata mitaro neenamatzxi ikamini ïkapani. Kauanaro. Iua iouataneë okanako imokaiakarini ikini äti uãka, ininiã ikini äti uãka auïte kataparari itxauako iua. Imisiritanako ninoa imaerekanina xika. Ova katxaratiko atoko itxako imisiritikona. Teoso kaposotireri omanãkare ova katxaratiko atoko itxako. Teoso

iteene omanákarauata iusaaki kákiti maerekani xika. ¹⁶Iua “Teoso Sákire” inakori mákaã, itapikeë apaka iökataãka: “Auítetxiakori auíte. Apiananiri,” iökataãka.

¹⁷Iposo atoko natamatari áti Teoso nitiri. Atokatxi iotximereë itima. Iua itaparakieneritika akiritari ikinika itano araãkani:

—Hina. Hãpoka Teoso kiiniritemoni. Mitari ikiinirite —itxa.

¹⁸—Hina. Auítetxiakori xini hinika. Sotatoakori auíteakori xini hinika. Sotato xini apaka hinika. Kavaro xini hinika. Hinikari kikiãkini kavaro nopini topãkakani xini apaka. Hinikari ikini kákiti xini, nitiritxi iamotakoni xini, nitiritxi minakaniu xini, kákiti apiatakani xini, kákiti mapiatakani xini apaka hinika —itxari itano araãkani.

¹⁹Eereka nitikari iua potxoari uinitikiri. Iuakata aua itixi auakani auíteakori, isostatoneakori apaka. Ninoa apotiitaua, iua kavaro kasarori nopini topãkakari isostatoneakorikata inaiatinina ñkapani. ²⁰Iua neenamtxi xipoka atoko, iua potxoari uinitikiri maíkaãka. Isákire sãpiretakari, atão minasákiretakati, imaíkaãka apaka. Mitxi iua kamari posotiiretxi iua potxoari uinitikiri ñkapani. Ikara posotiiretxi xika imisirienetana ninoa potxoari uinitikiri takaõtxikare auãtotakani. Imisiriene-tana ninoa iua kai kamakori teosonetakani. Iua potxoari uiniti pokíkaãtakari, isákire sãpiretakari pakini, auãkipanika okaãka ipoa atoko inakarimoni, ëxópiri arikiniãtaã. ²¹Isostatoneakori okapeëka iouataã, kavaro kasarori nopini topãkakari namaãkeroã. Iusaaki ikini-ka maiori nikapena ninoa xini. Kamitopekana. !Iposo-taikarina ikinika okakoni xini inikinina.

Mio Anokananisaaki

20 Eereka nitikari Teoso nitiri katxakaãpotini Teoso tixine ñkari. Iuakoã iua minaro xavi iua mamapotókire irikotimoni. Apaka iminari kohëtxi mitari. ²Iusaaki imaíkaru iua imini mitapoari. Kitx-akapiríkarikara iua imini. Iua maerekani mata-matakoni auíte, Satanasi inakori. Iua maíkaru Satanasi. Iaxirikari kohëtxiã, mio anokanani imatípokotakani ñkane. ³Iua Teoso nitiri okari Satanasi iua aarikoã, tota itxari itore. Ikakiriokari oa xavi itore sonaã, ininiã !apakata itore matakakiko. Ininiã mamapotókire irikoti áki ikaikota Satanasi. !Iposotakari imisirienetiniri ikini itixiti auakani. Mio anokanani auako iriko áki iua Satanasi. Mio ano napaãka atoko auiritaãka ipokíkinu. Mapaõtinoka auiritaãka mapara auini.

⁴Eereka natamatari auítetxiakori topanere. Kaiãopokori auari iuaã. Natamatari iua topaneretxi nopini topãkakani. Ninoa txíkitaãka auítetxi ininiuana. Iusaaki natamatari apanakini kákiti. Mitxi sauakanopitakoni. Okapeëkana Xesosi iokanapirena, Teoso sákire pakini isãpiretinina xika. !Iteosonetarina iua potxoari uinitikiri. Iua kai kamakori !iteosonetana. Iua potxoari uinitikiri takaõtxikare !itakana iteëtaãna, iuakoãna pakini. Iuaíkana auapekana. Auítetxi itxapekauana Kristokata. Mio anokanani auítetxi itx-auana. ⁵Ikara ipíkani ökitikiko merepanika ipíkani öki-

tikiko. Iua mio anokanani napaãka atoko apanakini ipíkani ökitikaãka. ⁶Ipíkani merepanika ökitikiko iuaíkana auãki ininina ñkapani, Teoso nakitiakori itx-auana ninoa. Teoso sikari erekari ninoamoni. !Atatsi-itarina átião ipíkixi Teoso misiritakasaakina maerekati kamakani. Sasetotxi itxauana, kotxi Teoso nireëkiti ikamana. Kristo nireëkiti apaka ikamana. Mio anokanani auítetxi itxauana Teosokata.

Satanasi Xamina Mitapoarimoni Okiko

⁷Mio ano napaãka atoko, Satanasi kateia áki auakari, sikakaãkako. Ipokíka mapara. ⁸Iusaaki Satanasi ñpirixititari itixi kákiti ikini áti uãka imisirienetini ñkapani. Iua misákiretari áti uãka Koki inakori, Makoki inakori pakini. Txamari na atão isákire. Inirekari ninoa neenamauatini iuakata. Apitiitana ninoa Teoso nakitiakori inaiatinina ñkapani. Itori kákiti Satanasi apotiitakani. Uuni ikipatxite atoko itxana.

⁹Ñpirixititarina itixi. Iakirokarina Teoso tiretakiti sitatxiti, kákiti Teoso nakitiakori auiniãtaã. Iusaaki xamina iaxitikiri katxaka. Ixipokana ninoa ikinikana. ¹⁰Iusaaki Satanasi, kákiti misirienetakari, okaãka arikatxi mitapoarimoni ëxópiri arikikoãtaã. Iua potxoari uinitikiri, isákire sãpiretakari pakini okapeëkaika iuaã. Iuaã ninoa atatsiirauatapikako pokamara, ñkanõka átipirika. !Ixipoka ninoa atatsiirauatini.

Ipinakani Apakapari Iparíkana Ñki

¹¹Eereka natamatari auítetxi topanere kasarori mitari. Natamatari iua inopini topãkakari. Iusaaki patimari iaxiti, itixi pakini ereëkokini iua topãkakari apisatoõ. Iaxiti, itixi pakini kona katamatikoikari.

¹²Iposo atoko natamatari kákiti mitxi ipinakani timini Teoso topanere apisatoõ. Kákiti apiarini, kákiti poiãorini pakini tima Teoso apisatoõ. Iposo atoko itori aãtsopa katamëkitataãka. Iua aãtsopaã aua ikinika kákiti kamakiti. Apaka áti aãtsopa katamëkaãka. Kákiti uãka aua iua aãtsopaã Teosokata auakani ñkapani. Iusaaki ninoa mitxi ipinakani apakapari ikamakitina ñki uai itixiã auakasaakina. ¹³Ninoa mitxi potxoari uiniti áki ipinakani apoka iuaã. Mitxi kipatxiã ikatakoni apaka apoka iuaã. Ikini kákiti ipíkani auiniãtaã auakani apoka iuaã. Ikinika apakapari ikamakitina ñki, ikamakitina itixiã auakasaakina. ¹⁴Eereka ipíkixi, ipíkani auiniãtaã pakini okaãka iua arikatxi mitapoarimoni. Iua arikatxi mitapoarimoni iuaíkana kákiti ipina átião ipíkixi maxipokatimoni. ¹⁵Kákiti átipirika Teosokata auakani uãka aua Teoso aãtsopateë. Kákiti iuaã mauauãkatakani okaãka iua arikatximoni.

Iaxiti, Itixi Pakini Amaneri Txapekaua

21 Eereka natamatari iaxiti amaneri, itixi amaneri pakini. Iaxiti mitxiri ereëkokape. Ñkora itixi mitxiri ereëkokape. Potxoari uiniti !auaika. ²Natamatari Teoso sitatxine Xerosareë amaneri. Iua sitatxi Teoso tixinekiri. Teoso paniãtari iua sitatxi ñkorapokori-

ti apokini. Natamatari ikatxakaãpotini. Iua sitatxi peereri. Sito ïtaniriuatakasaaki, omãka peereri oïtanirimonni osini ïkapani. Oa sito erero atoko itxa iua sitatxi. ³ Nikenakotari Teoso topanereë auakari sãkire. Ita-parasãkiretika itxari:

—Uatxa Teoso kamari iua auini kãkiti sauaki. Iua ni-noakata aua. Iua nakitiakori itxauana. Teosora aua ni-noakata. Ninoa Teosone itxaua. ⁴ Iuasaaki iua kax-ipokariko ninoa oki ätsaã. !Itxiapataikana. Ipïkitxi lauaika. Matinanitxi !lauaika. Ätsaãtxi !lauaika. Katsiiri lauaika. Ikinipoko mitxiri ereëkokapeka uatxa —itxa.

⁵ Iua auïtetxi topanere nopini topãkakari txari:

—Uatxa nikamari ikinipoko amaneri —itxa.

Apikomoni itxari notamoni:

—Piökatsopatari nisãkire, kotxi nisãkire atão.

Nisãpiretakiti apokapitikako.

⁶ Apikomoni itxano:

—Uatxa niparïka xipopeka. !Auaika. Merepitipanika iõka Aopa inakori atoko nitxa, kotxi nota merepitipanika aua. Imapotökire iõka Ómika inakori atoko nitxa, kotxi ikinipoko mapotökire nitxaua apaka. Nisikari kãkiti posonatakani iãtini ïkapani. Na ninirekari ïïki. Iãtari-nako äparaã amomoãkiri. Iua äparaã txïkitakari kãkiti ätipirika Teosokata auini. ⁷ Nisikariko iua äparaã kãkiti Satanasi nireëkiti makamanimoni. Ninoa Teosone nitxaua nota. Nota anaakori itxauanako ninoa. ⁸ Kãkiti mataparaxinireni okaãkako xamina mitarimoni. Teoso sãkire mauikakani apaka okaãkako iua xaminamoni. Maerekati potxitakani, kokanirini, maerekati iïtoãna potxitakiti kamakani apaka okaãkako xamina mitapoarimoni. Miïti apaka okaãkako iuamoni. Teoso kamakori teosonetakani okaãkako iuamoni. Ikinika kãkiti maxikatïka sãpiretakani apaka okaãkako xamina mitarimoni. Ninoa kãkiti ikinikana misiritaãkako arikatxi mitariã, ëxópiri arikikoãtaã. Iuaã kãkiti iuaïkana ipina, ätião ipïkitxi maxipokatimoni —itxa iua auïtetxi topanere nopini topãkakari sãkire.

Xerosareë Sitatxiti Amaneri

⁹ Ninoa Teoso nitiriakori setxi, iãtatxi setxi auakini, äti ina notamoni. Iua txari:

—Uai pina. Noerekaiko pite iua Soti Auïte tirketakito ïtanoro ïkapani —itxa.

¹⁰ Iua Erekaru Matamatakoti anikano nota. Itxïkitakari Teoso nitiri anikinino oxirataru nopini. Mitaxiratarïã oerekano sitatxi Teoso nakiti Xerosareë inakori. Natamatari iua sitatxi Teoso tixine potorikakari katxakaãpotini ïkorapokoritimoni. ¹¹ Teoso iotximeretxikana aua iua sitatxi. Kai pomëkoriri kakaroneri xásipi inakori mëkorïkini atoko itxa iotximere. Iua sitatxi iotximere peereri. Kristao mëkori atoko itxa. ¹² Pirikeri kai kamakori piriketari iua sitatxi. Iua pirikeri mitapoari, païtanori. Iua pirikeri tosi itore aua. Teoso nitiriakori iaxitiki tosi nïkatari iua tosi itore. Ikinika itore nopini iökataãka Isaeo anaakori uãka, kotxi Isaeo tosi imiakori aua. ¹³ Ipi äti pakini iua itore atokatxi pokïkinimoni. Ipi äti pakini iua itore atokatxi pokïkini sanaremoni. Ipi äti iua itore atokatxi pokïkini ikikomoni. Ipi äti pakini

iua itore atokatxi ereëkokinimoni. ¹⁴ Iua sitatxi pirikere tosi kai mitari nopini ikamaãka. Ikinika iua kai nopini Soti Auïte moianariakori uãka iökataãka, kotxi Soti Auïte moianariakori tosi aua.

¹⁵ Iua Teoso nitiri notakata sãkirauatakari aua aãke oro kamakori iuakoã. Iua aãke iua sitatxi, itore, ipirikere pakini iaõtiko. ¹⁶ Sitatxi tore atokatxi pokïkinimoni ipotorika. Itore atokatxi ereëkokinimoni apoka. Iaõtari ipi mio, koatrosëtosi pakini kirómetro.

Maioakari. Iuaïkana ipotorika sitatxi itore atokatxi pokïkini sanaremoni. Itore atokatxi pokïkini ikikomoni apoka. Iaõtari iua atokotxikana ipi mio, koatrosëtosi pakini kirómetro. Eereka iaõtari sitatxi ïtano timakari. Iua atokotxikana ipi mio, koatrosëtosi pakini kirómetro. Iua Teoso nitiri iaõtari iua sitatxi iua aãkeë.

¹⁷ Iua Teoso nitiri iaõtari pirikeri timakari. Sesëta metro ïtano. Teoso nitiri iaõrauata kãkiti iaõrauatinu atokokana. ¹⁸ Iua pirikeri kai kamakori xásipi inakori. Iua sitatxi oro kamakori. Kristao erero atoko itxa oa oro. ¹⁹ Iua kai mitari pirikeri patapi auakari ipataãka ikini sereti kai soroã. Pomëkoriri, kakaroneri iua kai soro.

Äti iua kai mitari aua kai soro xásipi inakori.

Äti iua kai mitari aua kai soro sapira inakori.

Äti aua ákata inakori.

Äti aua esimeráota inakori.

²⁰ Äti kai mitari aua kai soro satónia inakori.

Äti kai mitari aua kai soro sãtxio inakori.

Äti aua krisórito inakori.

Äti aua periro inakori.

Äti aua topásio inakori.

Äti aua krisópraso inakori.

Äti aua xasïto inakori.

Äti aua ametxísita inakori.

²¹ Iua tosi itore tosi kai kasarori kamakori. Iua kai kasarori pérora inakoro. Iua itore ätika, pérora ätoka kamakori. Oro kamakori itxaua kimapori. Peereri. Pomëkoriri. Kristao atoko itxa ahoa.

²² Kona natamatari Teoso misãkiretiko aikoti. !Auari iua aiko iua sitatxiã, kotxi Teoso Apiananiri kaposotireri, iua Soti Auïte apaka iuaã auapikana. ²³ Iuaã !nirekaãka atokatxi, kasiri pakini sitatxi iopinikini ïkapani, kotxi Teoso iotximere iopinikari ikinipoko. Iua Soti Auïte sitatxi tirikapite atoko itxaua. ²⁴ Kãkiti maerekanitxi mauakini ikini äti uãka auari iua kama-raã. Kãkiti ikini itixiti auakani auïteakori apokako iuaã Teoso ipaxitinina ïkapani, inirekakitina Teosomoni isikinina ïkapani. ²⁵ Iua sitatxi tore imatakakaãkapika. !Itotaãka, kotxi ïkanökari lauari iuaã. ²⁶ Kãkiti ikini itixiti auakani anikariko ikinipoko erekari iua sitatximoni Teoso ipaxitinina ïkapani. ²⁷ Kãkiti maerekati kamakani !auritaãkana ïroinina. !totxi nireëkiti kamakani !auritaãkana ïroinina. Atão masãpiretakani apaka !auritaãkana ïroinina. Kãkiti Teoso iökauãkatakini aãtsopateë, ninoanokara auri-taãka ïroinina iua sitatxitiã. Iua Soti Auïte aãtsopateë auauãkatakani auapikako Teosokata.

Iua Āparaā Iātakari Aua Teosokata Ātipirika

22 Eereka iua Teoso nitiri oerekano sōtoāri. Iua sōtoāri mapotōkire ikiitaā Teoso itopanere aua. Apaka iua Soti Auīte itopanere aua iuaā. Iua āparaā peereēri. Kristao mēkori atoko itxa iua āparaā. Iua āparaā iātakari !ipina. Ātipirika auapika. ² Iua sitatxi apanīkaki aua ahoa mitapoari. Iua sōtoāri sa ahoa apanīkaki. Sōtoāri !tinikata aua amātiirinape. Iua amātiiri tximakani !ipina. Auapikana. !Ipinakana. Kasiri iaōka iriuata iua amātiiri. Āti kasiriti iri ātiāo, eereka āti kasiriti ātiāo. Iuaīkana āti kasiriti ātiāo. Itxaāpota iua amātiiri iriuatini iuaxiti. Tosi pakini kasiriti amātiiri iriuata. Amātiiri tsopa sikataparatarari kākiti !to, ikinimane kākiti itixi auakani !to.

³ Teoso misiritiniri kākiti !auaika. Teoso, Soti Auīte pakini auītetxi itxauana iuaā. Teoso nitiriakori itixi auakani kamari iua nireēkiti. ⁴ Ninoa atamatariko itoō. Teoso uāka iteētaāna auako. ⁵ !kanōka !auaika iuaxiti. Kākiti iuaā kona nirekaikari tirikapi, atokatxi kamara pakini, kotxi Teoso Apiananiri iopinikari ikinika iuaā. Kākiti iuaā auakani auītetxiakori itxauana ātipirika.

⁶ Eereka iua Teoso nitiri txari notamoni:
—Atāo nisākire. Ia iaōka apokapitikako. Teoso Apiananiri sikari Erekari Matamatakoti isākire sāpiretanimoni. Iua paniātari initiri itixine auakari oerekinina initiriakori itixi auakani Teoso kamakiti apokini apisapanika —itxa iua Teoso nitiri sākire.

Xesosi Kanapiriini Pirena

⁷ —Hīkenakota —itxa Xesosi. —Patimariko napokini ereē. Ia aātsopa sāpiretari ereē nikanapiriini pirena. Kākiti auikiniāri Teoso sākire ia aātsopa sāpiretakiti, apakapari erekari Teoso sikakiti —itxa Xesosi.

⁸ Nota Xoāo sāpiretai hīte nitiākiti. Nikenakotakiti apaka nisāpiretai hīte. Ikinika nikenakotaka atoko, ikinika natamataka atoko, iuasaaki nipamaka iua Teoso nitiri apisatoō, kotxi iua oerekari ikinipoko notamoni. Nipamaka iua apisatoō Teoso apisatoō nipamakini atokokana. ⁹ Txamari iua Teoso nitiri txari notamoni:

—Kona pipamakape nota apisatoō. Nota Teoso nitiri pite atokokana nitxa. Pitariakori Teoso sākire sāpiretakani Teoso nitiriakori itxauana. Ninoa atokokana nitxa nota. Ikinika kākiti ia aātsopa sāpiretakiti auīākani Teoso nitiriakori itxauana. Ninoa atokokana nitxa nota. Teoso apisatoōnoka pipamakiniā atāo —itxa Teoso nitiri sākire.

¹⁰ Iuaīkana itxano nota:

—Ia aātsopa sāpiretari Teoso kamakiti apokini apisapanika. Na pikipatapiri ia aātsopa sāpiretakiti, kotxi paītiki Teoso sākire iaōka apokapitikako. ¹¹ Maerekati pikamapanika pinakasaaki, ininiā apikomoni maerekati pikama. Maerekati pīto nireēkiti pikama-

panika pinakasaaki, ininiā apikomoni pikama. Atāo inakari pikaminiā, apikomoni atāo inakari pikama. Teoso nireēkitinoka pikaminiā, ininiā apikomoni Teoso nireēkitinoka pikama —itxa.

¹² —Hīkenakota —itxa Xesosi. —Patimapaniriko napokini ereē. Niminariko ikinimane parīka !ki ninoa apakapini !kapani. ¹³ Iōkatxi merepitipanika auakari Aopa inakori atoko nitxaua. Iōkatxi imapotōkire auakari Ōmika inakori atoko nitxaua. Ikinipoko auini apisapanika nota aua. Ikinipoko xipokaāka atoko nota auapanika. Itixi kamiko apisapanika naua. Itixi xipoka atoko nauapanika nota —itxa Xesosi.

¹⁴ Teoso sikari erekari iua nireēkiti kamakanimoni. Ninoa kākiti auiritaākako Teoso amātiirite itximinina auapika ininina tīkane. Auiritaākanako !roinina Teoso sitatxineē. ¹⁵ Kākiti maerekati !tona nireēkiti kamakani !auiritaāka !roinina iua sitatxitiā. Mī!ti, !tanoro minakatatika sirīkakani, kokanirini pakini !auiritaāka !roinina iua sitatxitiā. Apaka kākiti ikamakitika teosonetakani !auiritaāka !roinina iua sitatxitiā. Aāpirena potxitakani, atāo minasākiretakani pakini !auiritaāka !roinina iua sitatxitiā.

¹⁶ —Nota, Xesosi txaua. Nota paniātari ninitiri nitixine auakari sāpiretiniri ia nisākire pitemoni, ininiā ikara pite sāpiretanako Teoso misākiretikoātaā apotiitakaniua. Tavii apika mekanirirano nota. Iōriki mitaro pokamara iatokopeka inakasaaki !karo atoko nitxa nota —itxa Xesosi.

¹⁷ Erekari Matamatakoti txari Xesosi:

—Uai pina.

Xesosi nakitiakori txari iua:

—Uai pina.

Hīte ia nisākire kenakotakanii, hītxariko:

—Uai pina.

Hīte posonatananii, uai hina. Hinirekiniāri, ia āparaā hiātako, kotxi ia āparaā kākiti auapininiika inīkitaākari. Ia āparaā Teoso sikakiti kākitimoni. Na pī!kitxitari.

¹⁸ Nota, Xoāo, ōtākikari kākiti ia Teoso sākire iōkat-sopatakori kenakotakani. Ia Teoso sāpiretakiti apokini apisapanika, isāpiretaua. Ia aātsopa sāpiretari kākiti misiritiko. Ninoa misiritiko atokotxikana Teoso misiritai hīte, hīkoketiniāri hīteka sākire Teoso sākirekata.

¹⁹ Kākiti kipatiniāri ipixini ia Teoso sāpiretakiti iōkat-sopatakori, Teoso !auiritari iua tximiniri iua amātiiri kākiti auapininiika inīkitaākari. !Auiritari iua !roini isitaxineē. Ia aātsopa sāpiretapekari iua amātiiri, iua sitatxiti pakini.

²⁰ Xesosi txari:

—Ia niokanapirena atāo. Iposopeka napokini tīkane. Atxari iuamoni:

—Ameē. Ari, uai pina Xesosi, Apiananiri.

²¹ Xesosi Apiananiri sikari ikinipoko erekari ikinimane Teoso nakitiakorimoni. Ameē.